


Iwo Surua Mua Wie  
Pha Bible



The Holy Bible in the Bugun language of India, first Bible  
translation

# **Iwo Surua Mua Wie Pha Bible** **The Holy Bible in the Bugun language of India, first Bible translation**

copyright © 2023 The Word for the World International

Language: Kho (Bugun)

Contributor: The Word for the World Southeast Asia

The New Testament in Bugun  
published as

## **IWO SURUA** **Mua Wie Pha Bible**

The Word For The World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-31

---

PDF generated using Haiola and XeLaTeX on 21 Feb 2024 from source files dated 31 Aug 2023  
02eb8fa0-132d-5640-b9e8-5b17ef13756c

## Contents

Methiu . . . . .	1
Marg . . . . .	59
Lug . . . . .	98
Jon . . . . .	157
Bliathek . . . . .	197
Romanthek . . . . .	250
1 Khorinthek . . . . .	273
2 Khorinthek . . . . .	295
Galathithek . . . . .	310
Iphisithek . . . . .	319
Philiphithek . . . . .	327
Kholosithek . . . . .	333
1 Thesalonithek . . . . .	339
2 Thesalonithek . . . . .	345
1 Timothi . . . . .	349
2 Timothi . . . . .	356
Thaidas . . . . .	361
Philimon . . . . .	364
Hebriuthek . . . . .	366
Jems . . . . .	385
1 Phithar . . . . .	392
2 Phithar . . . . .	399
1 Jon . . . . .	404
2 Jon . . . . .	411
3 Jon . . . . .	413
Jud . . . . .	415
Dong . . . . .	417

## METHIU Ro Muawie Yaophi

*Methiu pha Muawie yao pha ji ne* Isu ne Ragia ro sbang rek, ai Chiang shii Hamangkhang-aphuii è ihèg surua shii awai brantheek shii sbangtheek rek pha ji duiine zab rey yi. Hi pha mua wie jine Jewish brantheek jia shii asidoh bie ro, jishii zab pha sohjambling shii, hanyie thek duchoi shii Isu giak ne sieng pha ji shii de ro.

Methiu pha jigigam ne gayiigang ne zey marui ro. Hi ne Isu giak pha è jao ne, airo khowo nane chuajan, ji pha idoh shii Galili hà airo muyua nane gang rek phi pha ji id yi. Jithek zey ched ne Isu è Galili è Jerusalem wuii dun, chiih-è idoh pha habda aishii bai hà ziin ne ua muui chiih-è ai hòi din chiih-è nyie rey pha miyao ji de zey ne um ro.

Hi pha Muawie è yao pha ji ne Isu ne, hanyie shii Hamangkhang-aphuii pha Iphey ji shii yua mua pha riichai um, chiih-è Hamangkhang-aphuii pha Sajathua Chiang yuaphi pha bajoboh Masdo ro. Ai muyua marui pha miyao khrab pha ji ne guui rang shii rab ne zey pha miyao ro: (1) Phiing giu shii yua pha muyua ro: Hamangkhang pha Sajathua shii rai pho ro bujuu, bliathek, chua, nane phariang ishak nane hi zab pha Chiang shii yao. (Itho 5-7); (2) samoy snanyi shii blia khi-èrek chiid pha ji yua pha jigigam ro (itho 10); (3) Hamangkhang pha Sajathua shii najang yao (itho 13); (4) samoy izai rek pha miyao siu yao pha jigigam ro (itho 18); (5) thuh shii um pha ishak ji jong ne Hamangkhang-aphuii pha Sajathua thog sharuii pha miyao ji de zey ne um ro (ithothek 24-25).

### **Iliing shii um pha ji**

Achinmoi nane Isu giak pha ji (1:1—2:23)

Jon khowo ro Blia (3:1-12)

Isu shii khowo phi pha ji nane chuajan (3:3—4:11)

Isu è Galili shii hong ne blia rek (4:12—18:35)

Galili è Jerusalem (19:1—20:34)

Idohhè pha habda Jerusalem hà chiih-è inui shii (21:1—27:66)

Ithong hòi pha nane dong pha (28:1-20)

### *Isu Masi ro blangtheek*

(Lug 3:23-38)

<sup>1</sup> Hi ne Isu Masi pha blangtheek, Dawid ro riingtheek, hanyie yi Abraham ro riingtheek, ithek ro sasab ro boh phabi.

<sup>2-6a</sup> Abraham re-è yie dang ne Dawid Saja khama blangtheek um pha ne ichiih luii shii zey muui ro: Abraham, Ishak, Jakhob, Juda chiih-è airo khiuinothek, ji pha idoh Pherez nane Zera (ithek amuii ne Thamar ro), Hezron, Ram, Aminadab, Nasa, Salmon, Boaz (ai amuii ne Rahab ro), Obed (ithek ro amuii ne Ruth ro), Jese nane Dawid Saja.

<sup>6b-11</sup> Dawid Saja sieng pha ishak re-è yie dang ne Israel pha bran shii Babylon hà zum ne noh dun pha blangtheek de ichiih luii shii zey muui ro: Dawid, Solomon (airo amuii ne Uria yiy ne rajjong noh pha bimì ji ro), Rehoboam, Abija, Asa, Zehoshaphath, Zehoram, Uzia, Zotham, Ahaz, Hezekhia, Manase, Amon, Josia nane Jehoiachin nane airo khiuinothek.

<sup>12-16</sup> Babylon hà zum ne rai marui pha ishak è yie dang ne Isu giak pha ishak thogdang pha blangtheek ne ichiih luii shii zey muui ro: Jehoiachin,

Shealhthiel, Zerubabel, Abiud, Eliakhim, Azor, Zadokh. Achim, Eluid, Eliazer, Muthan, Jakhob nane Joseph, hanyie è Isu giak pha amuii Mery shii yiy pha bufuii ji ro. Hanyie shii Masaiya rone ho muui pha ji ro.

<sup>17</sup> Ji-è, chiihphado Abraham è Dawid Saja thogdang pha blang ne snawi um ro, chiih-è, Dawid pha ishak è Babylon hà zum ne raidun pha ishak thogdang pha blangthek ne snawi um ro. Babylon è yie dang ne Isu Masi giak pha blangthek de snawi um ro.

*Isu Masi giak  
(Lug 2:1-7)*

<sup>18</sup> Hi ne Isu Masi khi-èrek ne giak pha ji ro. Ai amuii Mery ne Joseph è shadiiegang rekjong ne ruii pha bimi ro. Jishii, ai ne ayiy-agey ba pha ibi shii ai ne Ragung So è ani wiig yi pha doh. <sup>19</sup> Joseph ne idang giang sieng ne rai pha bran ro, jiè ai ne Mery shii ug ne che pha saro, nyieliieshii ai è Mery shii hong ne biwo rek yi pha ayang ro. <sup>20</sup> Ai è ji è now ramuii shii, Ithong pha hamangkhlhie jia ai ibang shii dongkhlei ruii ne aishii yao, “Dawid ring è giak pha Joseph, Mery shii na yiy rek ne noh pha arum chid rabo, ai ani ji ne Ragung So re-è wiig yi ro. <sup>21</sup> Ai è ani bufuii jia giak ruii phro, na ne ji pha ani shii Isu beng bo, nyieliieshii, ai è awai branthek shii awaithek layog è ragia rek phi ruii phro.”

<sup>22</sup> Thuh hithek rey ruii pha ji è Ithong è awai chaigthek è khi-èrek ne yao yi pha jithek zab rey sharuii pha ji ro. <sup>23</sup> “Ayiy-agey ba pha miliao bimi jia è ani wiig ne dufuii jia giak ruii phro, ai ibeng ne Imanuel beng ruii phro” (Jipha miyaosiu ne, Hamangkhang-aphuii ne gethek rog shii um ro).

<sup>24</sup> Ji-è Joseph sieng srane Ithong pha hamangkhlhie è khi-èrek ne yao pha duiine Mery shii awai yiy rek noh. <sup>25</sup> Jishii, ji pha ani agiak sapho ne ai è ji pha Mery rog shii ò amen ro. Chiih-è Joseph è aishii Isu rone beng.

## 2

*Idpho bichiu è wuii*

<sup>1</sup> Isu ne Juda pha Bethlehem thawun shii Herod è saja khoh ne rai ramuii shii giak. Khthiie ji pha idoh shii, giak branthek hanyie yi dadiangthek gayiig rek pho, bichiu è Jerusalem hà wuii thog <sup>2</sup> ne sai, “Jewthek pha saja rek ruii pha ani giak pha ji ne khi hà lei? Gathek è airo dadiang ne bichiu è ichiuh shii chuang thog pha doh dun ro, jiè gathek de aishii misiasia pha ichiuh shii wuii ro.”

<sup>3</sup> Herod saja è ji pha chiang yoi mage shii duhug rey dun, chiih-è Jerusalem hà rai pho de zab duhug rey dun. <sup>4</sup> Herod è khama jia pha boh phabithek nane Iphey yua pha masdothek um pho shii male ho srane sai, “Masi ne khi hà giak pha um ga?”

<sup>5</sup> “Ji ne Juda pha thawun Bethlehem hà giak ruii phro,” Ithek è chang. Hi ne nyieliieshii chaigthek è zey ro:

<sup>6</sup> Juda pha soh Bethlehem,

hà chiih-è Juda hà khama boh rajan um pha ji re-è chiih-è ìu rey sapho nyie chiang oi ro;

nyieliieshii na è dumuii jia wuii ruii phro

hanyie è guro branthek Israel pho shii gayiig rek ruii phro.

<sup>7</sup> Ji-è, Herod saja ne bichiu è wuii pho shii ug srane male ho srane ne dadiang dong pha isbang ishak ji nathek è thieg. <sup>8</sup> Jipha idoh ai è nathek bichiu è wuii pho shii hì pha muyuathék rog shii Bethlehem thoh ge: “Wuii srane ji pha ani shii gayiig ne sow bo, nathek è aishii doh mage shii, gu shii de thieg yi bo, jiè gu de aishii wuii srane misiasia mua.”

<sup>9-10</sup> Chiuh-è ithek ne dun dun. Din ne nathek bichiu hà doh pha dadiang ji ne dinne doh din. Ithek ji doh mage shii, ithek ne khama sang dun, ithek ne bajo lised dun! Ji ne ithek è ibi wuii ne ani um pha lakhung shii thung dun. <sup>11</sup> Ithek è ji pha ani giak pha hò bucho khud ne ani yi awai amuii Mery rog shii iang pha doh mage shii, ithek ne lagiung niing srane aishii misiasia. Ithek è awaithek ro san, bisikho nane remnow pha mana chiuh-è lasen yi ji pha ani shii phi marui.

<sup>12</sup> Jipha idoh ithek ne gai lumuii è dong ne awaithek soh hà dun dun. Nyieliieshii, Hamangkhang-aphuii è ithek shii Herod shii idoh adun rabo ne ibang shii bang ne phrii.

### *Egyph hà yo dun*

<sup>13</sup> Ithek dun ched pha idoh shii, Ithong pha hamangkhliei è Joseph ibang shii yao, “Herod ne ani ji ua pha sow ramuii ro, ani nane ai amuii shii noh ne Egyph thiig hà yo ne rai mage bo, nashii aho sbo ne thiisa rai bo.”

<sup>14</sup> Joseph sieng srane ji pha ani nane ai amuii shii noh srane habiu dang shii Egyph thiig hà yodun. <sup>15</sup> Ai è thiichiih shii Herod a-iy ba sapho thogdang pha rai marui. Hùtek rey pha ji è Ithong è khi-èrek ne chaig pho è yaojong pha ji izai rey yi pha ji rek ro, “Gune gu dufuii shii Egyph è ho jong ro.”

### *Aniphiing shii ua muui*

<sup>16</sup> Herod è bichiu re-è wuii pha biwenthek è aishii khinrin marui pha ji thieg ne bajo lijiig dun. Ji-è ai ne awai brantheek shii yung ne Bethlehem nane thiichiih nui shii um pha thiig pha aniphiing dam nyi è luui ne khama jia um pho shii zab ua muui bo ne yung. Dadiang dong pha ishak pha Chiang è ai ne biwenthek è nyie id pha ji pha ishak pha sasab rek ne hì pha blii rek.

<sup>17</sup> Hì duine chaig Jerimia è yao marui pha ji ne izai rey dun ro:

<sup>18</sup> “Rama shii roh pha jia yoi ramuii ro,  
khewegkho ne cho ramuii ro.  
Rakhel ne awai ani Chiang cho pha yoi muui ro;  
Ai ne cho pha ne them pha anuii phi ro,  
nyieliieshii ithek ne zab iy dun ro.”

### *Egyph è thadoh dun din*

<sup>19</sup> Herod iy dun pha idoh re-è Ithong pha hamangkhliei è Egyph hà Joseph ibang shii bang, <sup>20</sup> ne yao, “Sieng srane ani nane ai muui shii noh ne Israel pha soh hà dun din mage bo, nyieliieshii, ani ji ua pha bidiang pha bran ji ne iyjong dun ro.” <sup>21</sup> Ji-è Joseph ne sieng srane ji pha ani nane ai amuii shii noh ne Israel pha soh hà dun thog. <sup>22</sup> Jishii, Joseph è Arkhelous, Herod pha dufuii è Herod Chiang Juda shii saja khoi muui rone yoi mage ne rum srane thiichiih adun. Ai ibang shii yua din mage ne jiè ai ne Galili pha soh hà dun dun. <sup>23</sup> Chiuh-è Nazareth beng pha thawun shii hò rung ne raidun. Ji ne chaigtheek è khi-èrek ne yao marui pha ji izai rey dun ro: “Ai ne Nazareth pho rone ho ruii phro.”

## 3

*Jon khowo phi pha miyao*  
(Mrg 1:1-8; Lug 1:18; Jon 1:19-28)

<sup>1</sup> Jipha ishak shii Jon Khowa phi pha bran de Juda pha balimuang shii wuii thog ne jao ne yua, <sup>2</sup> “Nawaithek layogthek re-è khid mage bo, ai è yao, nyeliieshii, hamangkhang pha Sajathua ne inui sha ro!” <sup>3</sup> Jon Khowa pha bran ji ne Aijaya chaig è khi-èrek ne yao marui pha ji ro, “Bran jia ne balimuang hà ziaak muui ro, ‘Ithong wuii ruui pha lumuii saro iang bo; ai lua pha lumuii miang rab phi bo!’”

<sup>4</sup> Jon ne ùd pha iman è rab pha yung guui ne rai ro; ai ne sukhug pha rathang re-è awai rinyi shii rieng ne rai ro; chiih-è ai michie ne muroma nane chimudkho ro. <sup>5</sup> Jerusalem pha brantheck de Juda soh pho thek de, chiih-è Jordan khoboh moe shii rai pho thek de aishii wuii thog. <sup>6</sup> Ithek è layog arek sha phro è yao phi ne ai è ithek shii Jordan kho shii Khowo phi.

<sup>7</sup> Jon è bajo Pharisithek nane Sadusithek de khowo yi pha wuiiramuii pha ji riig mage shii, ai è ithek shii yao, Nathek phamthek—Natek ne Hamangkhang-aphuii è lakhung re-è thoh pha lago ji re-è ruang yo bone nathek shii hanyie miyao lei? <sup>8</sup> Nathek de nawaithek layog re-è idoh khed rone doh yi pha jithek rek mage bo. <sup>9</sup> Nathek de Abraham pha riing re-è giak rone yao ne ji pha lago re-è yo pha anow chid rabo. Gu nathek shii yao. Hamangkhang-aphuii è hithek pha lubaothek re-è de Abraham pha blang nyarab mua phro. <sup>10</sup> Thabiu ne hingmuithek pha iriingthek shii jog pha khriig rek ne ruijong ro; iwoi wie awoi pha hingmuithek ne zab chueg ne bai shii fen muui phro. <sup>11</sup> “Gu è nathek shii kho re-è khowo phi srane nathek ne layog khid rone doh yi, jishii gu idoh shii wuiiramuii pha bran ji re-è nathek shii Ragung So nane bai è khowo phi ruui phro. Ai ne gu re-è de boh ro; gu ne ai lakhiathek than sbo de asi ro. <sup>12</sup> Ai ne igam shii isug re-è yoyo rek pha dasai ne awai rog shii um ro, ai è awairo phiug shii awai haphuii hà khrab, jishii ai è isug shii ne khuchung de a-iy pha bai shii ziao ruui phro.”

*Isu khowo yie*  
(Mrg 1:9-11; Lug 3:21-22)

<sup>13</sup> Jipha ishak shii Isu de ai re-è khowo yie pha Galili è thog srane Jordan hà Jon shii wuii thog. <sup>14</sup> Jishii Jon è ai khani lai yi pha bidiang. “Gu ne na re-è Khowo yie pha um habuii shii,” Jon è yao, “Chiih-è thuh nane gushii wuii ne bey?”

<sup>15</sup> Jishii Isu è aishii yao, “Thuh shii hì è rey yi bo. Chiih-è hì duiine gethek ne Hamangkhang-aphuii è chiid pha ji zab rek mua.” Ji-è Jon è nuui.

<sup>16</sup> Khthiie Isu Khowo yieched ne, ai yi kho è fuang khia. Chiihphado hamangkhang ne aishii hongphi. Chiih-è ai è riig shii Hamangkhang-aphuii ro Ragung ne khu-atham duiine thazam khey ne ai lakhung shii jo.

<sup>17</sup> Chiihphado gow yi hamangkhang re-è yao, “Hi ne guro bushun Dufuii ro, hanyie shii gu è nyu pha ji ro.”

## 4

*Isu shii chuajan**(Mrg 1:12-18; Lug 4:1-13)*

1 Chiihphado Ibuii è chuajan yi pha Ragung è Isu shii balimuang hà noh dun. 2 Sawi Inaithek nane ibiuthek nyie de achie pha rai ne, Isu ne chi-iyiy dun. 3 Chiihphado Ibuii è aishii wuii srane yao, “Na Hamangkhung-aphuii pha Dufuii arone, hi pha lubao shii yung srane iweb rey yi bo.”

4 Jishii Isu è chang, “Jigigam shii yao, ‘Tharothamang ne iweb ji è asieng bie, jishii Hamangkhung-aphuii ro zab miyaothek pha miyaogam de chiiid ro.’”

5 Chiihphado Ibuii è Isu shii So Rajan pha Jerusalem hà noh dun, aishii Misiahò pha zab è giu shii riu yi, 6 chiih-è aishii yao, “Na Hamangkhung-aphuii pha Dufuii arone, nawai shii buzam chiih mage bo,” Jigigam shii yao, Hamangkhung-aphuii è na Chiang shii awai hamangkhliiethék shii yung ruii phro,

ithek è nashii awaithek wadthék è khoh ruii phro,

jiè naro laikham shii de lubaothék shii akham yi phro.

7 Isu è chang, “Jishii jigigam shii de yao, ‘Nawai Hamangkhung-aphuii Ithong shii achai rabo.’”

8 Chiihphado ibuii è Isu shii bajo giu phiing hà noh srane ithek ro bajobothék nane sohjambling pha zab nuruiithék riig yi. 9 Ibuii è yao, “Na è gu shii lagiungniing ne misiasia arone.” “Zab hùthék gu na shii phi ruii phro.”

10 Chiihphado Isu è chang, “Dun dun bo, Sakhathong! Jigigam shii yao, ‘Nawai Ithong, Hamangkhung-aphuii shii ilab rek ne misiasia bie bo!’”

11 Chiihphado ibuii è Isu shii thoh marui; chiih-è hamangkhliiethék wuii srane aishii nong phi.

*Isu è awai blia Galili hà jao**(Mrg 1:14-15; Lug 4:14-15)*

12 Isu è Jon ne phatthég hà chab muui rone yoi mage shii, ai Galili hà wuii dun. 13 Ai Nazareth hà arai, jimagunde, Zebulun nane Naphthali pha soh Galili khabang pha Khaphernaum thawun hà rai pha wuii dun. 14 Ji ne chaig Aijaya miyao marui pha ji izai rey yi pha rek ro:

15 “Zebulun pha soh nane Naphthali pha soh,

khamuii pha lumuii hà, gai ithua pha Jordan pha,

Gaibranthek pha soh, Galili!

16 Igiia hà rai pha bran de

bajoboh muchuang ji doh ruii phro.

Hanyie yi iy pha igiia soh shii rai pho shii ne

muchuang khilieng ruii phro.”

17 Jipha ishak è Isu awai mua ji jao ne yua: “Nawaithek layog re-è khed bo, nyeliieshii hamangkhung pha Sajathua ne inui sha ro!”

*Isu è ù uapho wi shii ho**(Mrg 1:16-20; Lug 5:1-11)*

18 Isu è Galili pha khabang ring shii lua mage shii, ai è ù uapho khui-inothék nyi shii doh, Simon (Phithar rone ho) chiih-è ai ikhuii Andrew yi,



chiug re-è ù zum ramuii. <sup>19</sup> Isu è ithek shii yao, “Gu rog shii wuii bo, gu è nasa shii bran zum pha yua phi pha ro.” <sup>20</sup> Khthiie isa de awai sa ro chiugthek thiichiith thoh marui srane ai idoh wuii dun.

<sup>21</sup> Ai ji è wuii dun shii Zebedi ro dufuiithek Jems nane Jon khuiinothek nyi shii doh. Ai de run shii awaisa aphuii Zebedi rog shii chiugthek saro ne rai iang. Isu è ithek shii de ho, <sup>22</sup> chiih-è khthiie ithek de awaisa ro run nane aphuii shii thoh marui, chiih-è ai rog shii wuii dun.

*Isu ro muyuathek nane gangthek  
(Lug 6:17-19)*

<sup>23</sup> Isu è zab pha Galili hà wuii ne, Jewish misiahòthek shii yua, Sajathua pha chiang re-è Mua Wie ji yao, ne hanyie shii miiriie nane radthek um pha bran shii gang rek phi. <sup>24</sup> Ji è rek phi pha airo muathek chiang ne Syria pha zab soh shii yoi dun. Ji-è hanyie radpho, zab pha miiriie è diigpho nane nyie arek muluii pho shii: Ibuiithek um pha bran; chiih-è lai khi-ègthek, chiih-è siugpho zab aishii nothog, chiih-è ai è ithek shii gang phi. <sup>25</sup> Galili re-è chiih-è thawunthek sua re-è, chiih-è Jerusalem, Juda, Jordan pha gai soh phothek de bajo ibrogthek de idoh luagieng.

## 5

*Phiing shii yua pha miyao*

<sup>1</sup> Isu è ibrogthek shii riig srane phiingduii hà wuii dun, thiisa hà ai ne dug dun. Ai samoythek ne aishii shan ne khrab dun, <sup>2</sup> chiih-è ai jao ne ithek shii yua:

*Zai sangthek  
(Lug 6:20-23)*

- <sup>3</sup> “Hanyie è ithek ne ragung shii dusho rone thieg pho ne sang ruii phro; hamangkhung pha Sajathua ne ithek ro rey ruii phro!”
- <sup>4</sup> “Hanyie è duhug rek pho ne sang ro; Hamangkhung-aphuii è nathek shii ne ichad phi ruii phro!”
- <sup>5</sup> Hanyie jum pho ne sang ruii phro; nathek shii ne Hamangkhung-aphuii è nyie sbang rek pha ji choi ruii phro!
- <sup>6</sup> Hanyie è Hamangkhung-aphuii è chiid pha zab re-è boh yang pha ji rek pho ne sang ruii phro; “Hamangkhung-aphuii è chodang pha ley phi ruii phro!”
- <sup>7</sup> “Hanyie è gai shii bushun rek pho ne sang ruii phro; Hamangkhung-aphuii è nathek shii bushun rek ruii phro!”
- <sup>8</sup> “Hanyie lubu igang um pho ne sang ruii phro; nathek ne Hamangkhung-aphuii shii doh ruii phro!”
- <sup>9</sup> “Hanyie è liijiing pha blia rek pho ne sang ruii phro; Hamangkhung-aphuii è nathek shii de awai ani rone ho ruii phro!”
- <sup>10</sup> “Hanyie è Hamangkhung-aphuii è nyie chiid pha ji rek pha chiang re-è diigkhui pho ne sang ruii phro; hamangkhung pha Sajathua ne nathek ro rey ruii phro!”
- <sup>11</sup> “Nathek hanyie shii bran è makhakriing ne nathek shii diigkhui phi chiih-è zab awie pha khlamthek shuang yao ruii mage shii nathek ne sang ro; nyieliieshii nathek ne guro samoythek ro.”

<sup>12</sup> Ji-è sang ne lised bo, chiìh-è bajoboh lasen ne hamangkhung hà nathek shii ruijong phi ro. Ji duiine nathek è ibi sieng pha chaigthek shii de ithek è diigkhui rek.

*Suruii nane muchuang*  
(Mrg 9:50; Lug 14:34-35)

<sup>13</sup> “Nathek ne zab tharothamang ro log pha suruii duiine ro; Jishii, suruii phieng ji shan dun arone, suruii phieng rab din pha lumuii ne oi sha ro. Ji ne bliã adunmey pha rey ruii phro, ji è hì ne fen muui srane brantheke è dia ruii phro.

<sup>14</sup> “Nathek ne zab pha sohjambling pha muchuang duiine ro. Phiingduii shii rung pha rajan ne a-ug mua. <sup>15</sup> Hanyie magunde muchuangthek pha ichuang ne sugong bucho shii aruii phro; ji pha chiang shii ai è ichuang shii ne bunthruak hà ruii ne, hanyie hò shiiì doh yi ne zab shii chuangphi ro. <sup>16</sup> Ji duiine nathek ro muchuang de brantheke ibi shii chuang phi chid phro, ji-è nathek ne nathek è rek pha wie bliatheke riig srane hamangkhung hà nathek aphuii shii chiong ruii phro.

*Iphey chiang yua*

<sup>17</sup> “Gu ne Moses ro Iphey nane chaigthek ro muyuathek shii chui pha wuii rone anow rabo. Gu ne nathek rog shii chui pha awuii ro, jishii nathek muyuathek shii izai rey yi pha wuii ro. <sup>18</sup> Nowkhlei hamangkhung nane sohnyiak nya-um ba shii ne Iphey shii zab zey ne um pha igam iu è iu jia de chiìh-è ji pha manatheke ajong shii ne nathek rog shii ruang arek mua phro.

\* <sup>19</sup> Ji-è chiìhphado, hanyie è iu è iu muyungthek anuii ji duiine gaithek shii yua pha anuii pha rek pho ne, hamangkhung pha Sajathua shii de zab è iu rey dun phro. Chiìh-è hanyie è Iphey ji nuii ne gai shii de ji duiine yua pho shii ne hamangkhung Sajathua shii boh rey ruii phro. <sup>20</sup> Gu nathek shii yao, chiìhphado, ithek ne Iphey yua pha masdothek nane pharisitheke è Hamangkhung-aphuii è nyie chiid pha ji rek phi pha ji re-è izai migi rek arone, hamangkhung pha Sajathua shii akhud mua phro.

*Lijieg pha chiang è yua*  
(Lug 12:57-59)

<sup>21</sup> “Nathek ne yoijong brantheke è buyo yao pha ji ne, ‘Sgoh arek rabo, hanyie magunde ji rek pho shii ne chua ruii phro, limiang shii jong han chid phro. <sup>22</sup> Jishii thuh gu è nathek shii yao: Nathek è nawaithek khuiino shii lijieg† noh arone chai ruii phro, nathek è nawaithek khuiino shii adunmey ro è yao arone!’ Limiang moe hà noh ruii phro, chiìh-è nathek è nawaithek khuiino shii gun-achid pha bran bi-ìe rone yao arone ithek shii de thumuluii pha bai hà dun pha buii ro. <sup>23</sup> Ji-è khuchung magunde nathek è Hamangkhung-aphuii sraibao shii lasen zid pha rek ramuii shii nathek ikhuii shii nyie shuang um bamuii rone nowkhlei arone, <sup>24</sup> nawaithek ro lasen ji yi thiichiih sraibao ibi shii ruii srane, khthiie wuii ne nawaithek ikhuii rog shii lijiing rek bi rai bo, chiìh-è chiìhphado idoh wuii ne nathek ro lasen ji Hamangkhung-aphuii shii phi bo. <sup>25</sup> Yang ne nathek shii hanyie magunde na shuang rek ne limiang moe hà noh dun arone nawaithek rek

**5:12** 5:12: 2Phal 36:16; Blk 7:52      **5:13** 5:13: Mrg 9:50; Lug 14:34,35      **5:14** 5:14: Jon 8:12; 9:5

**5:15** 5:15: Mrg 4:21; Lug 8:16; 11:33      **5:16** 5:16: 1Phth 2:12      **5:18** 5:18: Lug 16:17      \* **5:18** 5:18: zab iudohhè pha manatheke; dinne zab hi yua phane zai thog ruii.      **5:21** 5:21: Mul 20:13; Iphy 5:17      † **5:22** 5:22: nathek lijieg arone; giak jigizey shii um nyie miyao oi pha lijieg arone.

mua pha ji rek srane chua bsa hà anow ba pha ibi shii lumuii hà nawaithek miyao ò rai pha rek bo. Ji asi shii ne ai è nathek shii chua pho hà noh srane, chiih-è chua pho è magashaig shii phi mua, chiih-è magashaig thek è phathek hà chab mua. <sup>26</sup> Gu nathek shii yao, nathek è zab bang aphì sbo shii ne nathek ne sa phathek hà raidun phro.

### *Siulao pha chiang shii yua*

<sup>27</sup> “Nathek de yoi hì ne yaojong, ‘Siulao arek rabo.’ <sup>28</sup> Jishii thuh gu nathek shii yao: Hanyie è hò-amuii shii awie pha riig srane bimi ji shii ong arone ai lubu iliing shii hò-amuii rog siulao rekjong ro. <sup>29</sup> Ji-è nathek phazoi pha mieg è nathek shii layog riig noh arone, khia srane fen muii bo! Naro siu zab shii thumuluii pha bai hà fen yi pha ji re-è ne siu pha ibam jia oidun pha ji wieliak phro. <sup>30</sup> Nathek ro phazoi wad è nathek shii layog rek noh arone, laig srane fen muii bo! Nathek ro zab siu shii thumuluii hà dun yi pha rek pha ji re-è ne wad jia oi pha ji wieliak ba phro.

### *Che rai pha chiang è yua*

*(Mth 19:9; Mrg 10:11-12; Lug 16:18)*

<sup>31</sup> “Hi de yao jong, hanyiejia è awai yiy shii che shii bimi shii ne che pha siog zey ne phi bo. <sup>32</sup> Jishii gu è nathek shii yao: Gey è awai yiy shii che arone, bimi yi siulao pha nyie ichiig oi pha aishii che muii arone, chiih-è ji pha bimi è gai shii gey magunde siulao ne ai è rek yi ro; chiih-è bimi ji è hanyie shii gey ji pha bufuii de siulao rek ro.

### *Suruathek chiang yua*

<sup>33</sup> “Nathek de buyo pha brantheke miyao marui ji yoi jong, ‘nawaithek sbang achui rabo, jishii nathek è Ithong shii rek phi pha nyie surua thak pha ji rek bo.’ <sup>34</sup> Jishii thuh gu è nathek shii yao: Nathek è sbang rek shii surua athak rabo. Hamangkhung pha de surua athak rabo, nyieliieshii jine Hamangkhung-aphui ro biang ro; <sup>35</sup> sohnyiak pha de athak rabo, nyieliieshii ji pha sohnyiak de airo lai thung pha ithua ro; Jerusalem è de athak rabo, nyieliieshii ji de boh Saja ro rajan ro.” <sup>36</sup> Nawaithek khrug pha de surua athak rabo, nyieliieshii nathek ne nawaithek khaziang jia shii de imo dinne isei arab mua phro. <sup>37</sup> Oh arone oh rone yao bo, Asi arone asi rone yao bie bo—Hì è muna yao arone Awie Jia è thog ruii phro.

### *Rog din pha chiang è yua*

*(Lug 6:29-30)*

<sup>38</sup> Nathek è hì yao pha ji ne yoijong, mieg chiang mieg yie bo, chiih-è shinyin chiang shinyin yie bo. <sup>39</sup> Jishii thuh gu nathek shii yao: “Hanyie magunde nashii ichiig rek noh pha ji shii idoh arog rabo. Hanyiejia è na phazoi pha mizia hà phey arone, aishii ne naro phawig pha mizia shii de phey yi bo. <sup>40</sup> Chiih-è hanyie è nathek phadiig shii riao pha limiang moe hà noh dun arone, nathek rugud de aishii nya riao yi bo. <sup>41</sup> Hanyie è nathek shii ai miihan han ne labiang jia thog pha bangchiie lua yi pha noh dun arone, labiang nyi thog pha han phi bo. <sup>42</sup> Hanyiejia magunde nathek shii nyie magunde lia ruii arone, aishii ne phi muii bo; hanyiejia è nyie chui yang ne de, aishii chui phi bo.

*Suangphothek shii miie bo*  
(Lug 6:27,28,32,36)

<sup>43</sup> “Nathek ne yoi hi ne yaojong pha ji ne, ‘nawai ijakthek shii miie mage bo, nawaithek mak shii khijai mage bo.’ <sup>44</sup> Jishii gu nathek shii yao: nawaithek ro shuangthek shii miie srane nathek shii hanyie è diigkhui pho shii sia bo, <sup>45</sup> jiè ne nathek ne hamangkhang pha Aphuii anithek rey mua ruii phro. Nyieliieshii ai è hasiang ne awie pha nane wie branthek shii chuang phi, chiih-è hanyie wie rek ne de hanyie è awie pha rek ne de haphie phi. <sup>46</sup> Nathek è nawaithek miie pha ji shii miie bie arone nyie rek ne Hamangkhang-aphuii è nathek shii lasen phi chid phlei? Muthan mijin thanpho rangde ji rek! <sup>47</sup> Chiih-è nathek ne nawaithek ijakthek shii yao bie arone nathek è nyie rek ge lei? Jine migi arek pho de ji rek. <sup>48</sup> Hamangkhang hà Aphuii ne zab shii khriig rek pha duine—Nathek ne khriig rek bo.

## 6

*Muthan pha Chiang è yua*

<sup>1</sup> “Nowbthan bo, nathek è rek pha giang blia ne branthek shii doh yi pha hong ne arek rabo. Nathek ji è hong ne rek arone, hamangkhang hà Aphuii re-è nyie de lasen amua ruii phro.”

<sup>2</sup> “Ji-è khuchung magunde nathek è dusho bran shii nyiemagunde phi mage shii, Lawasdaithek è misiasia pha hòtek nane lumuiithek shii rek pha duine, doh yi pha arek chid rabo. Nathek ne jithek rek pha ji re-è branthek è nathek shii chiong yi pha ji rek ro.” Gu è nathek shii yao: Itek ne awaithek è rek pha Chiang ne lasen ley mua jong ro. <sup>3</sup> Khuchung magunde nathek è dushothek shii nong phi arone, nathek ne nawaithek ijakthek shii de ji athieg yi rabo. <sup>4</sup> Chiihphado hi ne ug pha miyao ro. Chiih-è na è nyie ug ne rek pha ji ne na Aphuii, hanyie è riig srane lasen phi ruii phro.

*Misia Chiang yua*  
(Lug 11:2-4)

<sup>5</sup> “Nathek è sia mage shii, lawasdaithek duine asia rabo! Itek ne misiasia pha hòtek nane lumuii pha iring hà riu ne sia pha ji ne miie, jiè zab ne nathek shii doh mua. Gu è nathek shii yao: ‘Itek ne zab ley mua ro.’ <sup>6</sup> Jishii nathek è sia mage shii, nawaithek ùgud hà dun ne, habin bin muii bo, chiih-è nawaithek Aphuii shii sia mage bo, hanyie ne adoh ro. Chiih-è Aphuii hanyie ne nathek è ug ne nyie rek pha ji riig srane, nathek shii lasen phi ruii phro.”

<sup>7</sup> Nathek è sia mage shii, migi-arekpho è rek pha duine, asi pha miyaogamthek ayao rabo, nyieliieshii ithek bajo phiang sia pha ji è ithek shii ne hamangkhang-aphuiithek è ithek misia yoi phi rone now ro. <sup>8</sup> Itek duine arek rabo. Nathek pha Aphuii è nathek nyie chiid pha ji è nathek è aishii alia ba pha ibi shii thiegjong ro. <sup>9</sup> Hi ne, chiihphado, Nathek khi-èrek ne sia chiid pha ji ro:

<Hamangkhang pha gathek Aphuii:

Naro ibeng So ne ilab rey bo;

<sup>10</sup> naro Sajathua ne thog yi bo;

hamangkhang hà um pha naro yang ji ne ichiih sohnyiak shii de rey yi bo.

11 Sudoh inai gathek chiid pha michie ji phi bo.\*

12 Gathek shii ithek è rek pha ichiigtheek shii khungphi pha duine, gathek è rek pha ichiigtheek shii de khung phi bo.

13 Gathek shii buii achai yi rabo, chiih-è, gathek shii Awie Jia† è ragia rek phi bo.>

14 “Nathek è gai è nathek shii rek pha ichiigtheek shii khung phi arone, hamangkhang hà um pha Aphuii de nathek shii de khung phi ruii phro.

15 Jishii nathek è gai shii akhung phi arone, nathek Aphuii de nathek ichiigtheek shii de akhung phi ruii phro.

### *Minyie chiang yua*

16 “Chiih-è nathek minyie nyie shii, lawasdaithek duine nathek mizia shii duhug rek ne adoh yi rabo. Itheek ne ji è rek pha ji è brantheek è nathek ne minyie nyie ramuii rone thieg yi pha ji rek ro. Gu è nathek shii izai yao, ithek ne awaithek è rek pha lasen ley muajong ro. 17 Khuchung magunde nathek è minyie nyie pha wuii shii mieg mi ne khaziangtheek chug ne wuii bo, 18 jiè gai brantheek è nathek ne minyie nyie ramuii rone athieg phro—nathek Aphuii, hanyie ne adoh pha ji, ne thieg bie ro. Chiih-è nathek Aphuii, hanyie nathek ro ug ne rek pha ji riig ne nathek shii lasen phi ruii phro.”

### *Hamangkhang hà bukho*

(Lug 12:33-34)

19 “Khi hà phu-ungtheek nane thakhsem è chie pha nane riaopho è chuakbraig ne godun pha sohnyiak shii nawai bangnuruii khrab nè aruii rabo. 20 Ji pha chiang è ne nawai shii hamangkhang hà nuruii khrab mage bo, thiisa hà ne phu-ung nane thagsemtheek de achie mua phro, chiih-è riaophothek de riao ne ayie mua phro. 21 Nyielièshii, nathek ro nuruii khi hà um pha ji hà nathek lubu de idang sha hà um ruii phro.”

### *Siu pha muchuang*

(Lug 11:34-36)

22 “Mieg ne siu pha muchuang duine ro. Nathek mieg wie arone, nathek siu shii de muchuang è ley ruii phro; 23 Jishii nathek ro mieg awie arone, nathek siuthek de igiia hà rey ruii phro. Ji-è, nathek shii muchuang um pha ji igiia arone, ji pha igiia um pha ji ne buii rey dun!”

### *Hamangkhang-aphuii nane nuruiitheek*

(Lug 16:13; 12:22-31)

24 “Hanyie magunde ithong nyi ro khiao arey mua phro; ai ne jia shii ne khiijai chiih-è, gai shii miie; ai ne jia shii ilab rek ruii phro, jia shii ibid arek phro. Ji-è nathek de Hamangkhang-aphuii nane bang pha blia ne ò shii arek mua phro.”

25 Ji-è, hìtheek ne gu è nathek shii yao pha ji ro; nathek è ichiuh sieng ne rai shii nyie chie niing, dinne, nathek siu shii yung guii pha ji now ne samdiig arek chid rabo. Michie re-è ne sieng pha ji boh ba asi bey? Yung ji è de siu ji boh asi bey? 26 Fuiitheek shii riig mage bo: ithek è iriie de ahai, yamiing de achiig, iwoi de thazan hà akhrab jimagunde hamangkhang pha Aphuii è ithek shii phi ne gayiig rek ro! Nathek ne jithek pha fuii è de bajo boh brantheek asi bey? 27 Nathek ji pha chiang shii samdiig ne lujia phiang sieng

\* 6:11 6:11: Gathek ne chiid; chiih-è Sudoh pha, chiih-è Thimiang pha. † 6:13 6:13: giak jigi shii chodo Chiih-è naro ne sajathua ro, chiih-è blu ro, chiih-è biisiie ne idang nane idang ro. Amen.  
6:14 6:14,15: Mrg 11:25,26

ne rai mua bey?‡ 28 Yung Chiang è nyie rek ne samdiig phlei? Jabiing pha ibuathek sieng pha ji shii riig mage bo; ithek ne blia de arek, awaithek guii pha yungthek de arab ro. 29 Jishii, gu è nathek shii yao, Solomon Saja de awairo bajo nurui um magunde ibuathek re-è jia duine khie pha yungthek aguii mua ro. 30 Sudoh ichiuh um pha saing ne, thimiang ne oi phro, ji ne bai shii fu ruii phro—Jipha jabiing pha saing shii ne Hamangkhung-aphuii è guii phi ro. Ji re-è de bajo wie nathek shii nyie rek ne aguii phi phlei? Nathek ro migi lujia ro! 31 Ji-è guro michie ne khi è mua ruii phlei? Dinne guro niing pha khi re-è thog ruii phlei? Chiih-è nyie guii chid? Ji now ne samdiig arek chid rabo. 32 (Migi oi pho ne zab hi pha Chiang è idang samdiig ro.) Naro hamangkhung pha Aphuii è nathek è hithek pha manathek chiid pha ji ne thiegjong ro. 33 Hithek now pha Chiang shii ne Hamangkhung-aphuii pha Sajathua nane nathek è ai nyie chiid pha ji samdiig bo, ji è rek arone ai è gai zab manathek de phi ruii phro. 34 Ji-è, thimiang pha Chiang now ne samdiig arek chiid rabo, thimiang pha samdiig ji ne thimiang hà awailum ne cho pha samdiigthek um ruii phro, inai jiajia pha diigthek ne um ro. Ichiuh shii ne jijia inai pha samdiigthek yie ne achodo chid rabo.

## 7

### *Gai shii chua*

(Lug 6:37,38,41,42)

1 Gaithek shii achua rabo, jiè Hamangkhung-aphuii de nathek shii achua ruii phro, 2 Hamangkhung-aphuii de nathek shii ithek è gai shii chua pha duine chua ruii phro. Chiih-è, ai è nathek shii de ithek è khi pha Iphey yie ne chua pha duine ji pha Iphey yie ne chua ruii phro.

3 Chiihphado, nathek ne nyie rek ne nawaithek mieg shii hingbang um pha ji ariig pha nawaithek khuiithek pha mieg shii ididuii iphen um pha ji hiog ne yao phlei? 4 Nawaithek mieg rangde hingbang um shii khi-èrek ne nawai ikhuii ro iphen khia phi pha yao mua phlei? 5 Lawasdai nathek! Igobi nawaithek mieg è hingbang ji khia bi bo, chiihphado nawaithek khuiithek ro iphen khia pha mieg sang doh mua ruii phro.

6 Nyie so um pha ji ne choi shii apho rabo—Ithek è nathek shii idoh jo ruii phro. Mukho khie ne wak moe shii afen rabo—Ithek è ji pha mukho shii ne ithek lai lui hà dia ruii phro.

### *Lia, Sow, Chokh*

(Lug 11:9-13)

7 Lia bo, choi ruii phro, sow bo, nathek ne doh ruii phro, chokh bo, nathek shii habin hong ruii phro. 8 Nyieliieshii, hanyie è lia arone phi ruii phro, hanyie è sow arone doh ruii phro, hanyie è chokh arone aishii habin hong ruii phro. 9 Nawaithek dufuii è iweb lia shii lubao phi pha aphuii ne nathek duchoi hanyie um lei? 10 Chiih-è, ai è ù lia shii nathek ne pham phi habey? 11 Awie pha aphuii nathek ne nawaithek anithek shii wie phi pha ji shii thieg ro. Chiihphado ji re-è de hamangkhung hà Aphuii ne nathek è aishii lia pha wie manathek ji phi pha ji ne khama muna thieg ro!

12 Nathek è ithek shii khi-èrek yie pha now pha duine ithek rog shii nathek è rek bo: Moses ro Iphey nane chaigthek muyua marui pha ji ne hi ro.

‡ 6:27 6:27: lujia sieng ba bo; dinne lujia phiang sieng ba bo. 6:29 6:29: 1Saj 10:4-7; 2Phal 9:3-6  
7:2 7:2: Mrg 4:24 7:12 7:12: Lug 6:31

*Khog gak*  
(Lug 13:24)

<sup>13</sup> Khog gak ji è iliing khud bo, nyieliieshii thumuluii pha gak ne sey ro chiih-è ji pha lumuii è dumuii rek pha ji ne ihà ro, chiih-è hanyie ji hà lua pho ne bajo ro. <sup>14</sup> Jishii chai pha gak ne khog ro, ji ne bajo diig hà dumuii re, chiih-è thiisa hà ne bran iujia doh ro.

*Hingmuii nane iwoi*  
(Lug 6:43-44)

<sup>15</sup> “Biidiie pha chaigtek re-è ragia rek iang bo, ithek ne fuang hà ne shiishai duiine mia ne nathek shii wuii ruii phro, Jishii izai bucho hà ne ithek ne shaliieythek duiine ro. <sup>16</sup> Nathek ne ithek è nyie rek pha ji è thieg ruii phro. Migem muiithek è angurtek awoi ruii phro, chiih-è migemgmuii è de hingphemthek awoi ruii phro. <sup>17</sup> Hingmuii phia ne iwoi wie woi ruii phro, jimagunde zia pha hingmuii ne wie awoi mua ruii phro. <sup>18</sup> Hing phia ne iwoi awie pha awoi ruii phro, chiih-è zia pha hingmuii ne iwoi wie awoi phro. <sup>19</sup> Iwoi wie awoi pha zab hingmuii ne chieeg srane bai hà fen ruii phro. <sup>20</sup> Ji-è chiihphado nathek ne biidiie pha chaigtek è nyie rek pha ji è thieg ruii phro.”

*Gu ne nathek shii khuchung de athieg ro*  
(Lug 13:25-27)

<sup>21</sup> “Hanyie è gu shii Ithong, Ithong, rone ho pho zabjia ne hamangkhung pha Sajathua hà akhud mua ruii phro, jimagunde hanyie è hamangkhung hà Aphuii è ithek shii nyie rek bo è yang pha ji rek pho è khud bie ruii phro. <sup>22</sup> Chua pha Inai thog ruii shii, bajo è gu shii yao ruii phro, Ithong, Ithong! ‘Na ibeng è gathek de Hamangkhung-aphuii pha mua ji yao phi, na ibeng è gathek de ibuiithek shii khia ne bajo buangtek rek phi!’ <sup>23</sup> Chiihphado gu nathek shii yao ruii, ‘gu khuchung de nathek shii athieg, Nathek awie pha branthek, gu è dundun bo!’”

*Hò rungpho nyi*  
(Lug 6:47-49)

<sup>24</sup> “Ji-è chiihphado, hanyie è gu miyaogamtek yoi ne nuii pho ne khua bran hanyie è awai hò lubao lakhung shii rung pha ji duiine ro. <sup>25</sup> Haphie phie mage ne, khobohthek lakhung shii khed mage ne, chiih-è hasam gidieg boh sam ne ji pha hò shii reng mage ro, jimagunde ji ne achuak ro, nyieliieshii ji ne lubao lakhung shii rung ro.”

<sup>26</sup> “Jishii, hanyie è gu miyaogamtek ji yoi srane anuii pho ne bi-è hanyie è awai hò balimuang shii rung pha ji duiine ro. <sup>27</sup> Haphie phie ne khoboh khed mage ne, ji pha hò shii hasam gidieg boh sam ne ji pha hò reng mage shii, chiih-è chuakdun. Chiih-è ji ne buii è chuakdun ro!”

*Isu pha riichai*

<sup>28</sup> Isu è jithek yao ched dang shii, ibrog ne ai miyao ji è wiengphleg dun. <sup>29</sup> Ai ne Iphey yua pha masdothek duiine asi ro, ji phachiang shii, riichai rog shii yua dun ro.

## 8

*Isu è bran jia shii gang phi  
(Mrg 1:40-45; Lug 5:12-16)*

1 Isu yi phiingduii è thazam dun thog shii, bajo ibrogthek ai rog shii luagieng. 2 Chiihphado hà è riie pha ji aishii wuii ne, lagiung niing srane yao, “Masdo! Na è rek pha yang arone, gu shii so nyarab mua phi phro.”\*

3 Isu è awai wad phia srane aishii khoh. “Gu è rek phi pha yang muui ro” Ai è yao! “So rey bo!” Khthiie ji pha bran ne gang dun. 4 Chiihphado Isu aishii yao, “Yoi bo! Hanyie shii de ayao rabo, jimagunde miang phabi hà wuii srane aishii riig yi bo, chiihphado na wie rey ge rone zab shii khagi rek ne, Moses muyung pha khlem ji zid phi bo.”

*Isu Roman pha dumuii ro khiao shii gangphi  
(Lug 7:1-10)*

5 Isu è Khaphernaum hà khud mage shii, Roman pha dumuii jia è aishii si srane nong phi pha khung ne yao: 6 “Masdo, guro khiao rad ne hò hà biang shii thieng ne, asid mua dang pha bajo diig muui ro.”

7 “Gu ne aishii wuii srane gang phi ruii phro,” Isu è yao.

8 Oh asi masdo! Jipha dumuii è Isu shii chang, yung bie bo, gu nashii gu hò hà wuii yi sbo de asi ro, chiih-è gu khiao ne wie rey ruii phro. 9 “Gu è lakhung shii de boh dumuii riichai um ro, chiih-è gu bucho shii siphahithek um ro. Gu è hanyie shii yung wuii bo! Chiih-è wuii; chiih-è, hanyie jia shii thawuii! Bo è yung chiih-è ai thawuii, chiih-è gu è gui khiao shii yung, hì rek bo! Chiih-è ai rek phi.”

10 Isu è ji yoi mage shii, ai ne anomuluii pha rey ne ai rog shii luagieng pha brantheek shii yao. Gu è nathek shii yao, gu è Israel hà hì duuii pha migi adoh ba ro. 11 Gu è izai yao, bajo thek ne bichiu nane hakhoi è wuii srane Abraham, Isakh nane Jackhob rog shii hamangkhang pha Sajathua pha michie shii dug ruii phro. 12 Jishii, hanyie nathek ne Sajathua hà um pho shii ne igiia hà fen ruii phro, thiisa hà ithek ne shiinyintheek khriieg ne cho ruii phro. 13 Chiihphado Isu è dumuii shii yao. “Hò dun sha bo, chiih-è na è nyie migi rek pha ji ne nashii rek ruii phro.”

Chiih-è ji pha ishak shii dumuii ro khiao ne gang dun.

*Isu è bran bajo shii gang phi*

14 Isu è Phithar hò hà wuii dun, chiih-è thiisa hà ai è Phithar ro khiing ne hakhangzia ne rad ne rai iang pha doh. 15 Ai è ai wad kho, ji pha hakhang zia pha ji ne thoh dun, chiih-è sieng srane chie niing.

16 Habjuang rey mage shii, brantheek è hanyie shii ibuiithek um pha ithek bajo shii Isu hà noh ne wuii thog, Isu è awie pha ragungthek shii miyaogam rog shii khia ne hanyie radpho shii gang phi. 17 Ai ji rek pha ji è Aijaya chaig è yao marui pha ji ne izai rey yi, “Ai ne gethek ro radtheek shii awai yi ne miiriithek han phi.”

*Isu ro luagiengphothek?*

18 Isu è ibrog ne aishii shan dun pha ji doh mage shii, ai è awai samoythek shii khabang pha yoyo ithua hà dun bo è yung. 19 Iphey yua pha masdo

\* 8:2 8:2: gu shii so rab bo: hipha miie è ne bran hanyie shii magunde izia-kho rab muui phro. 8:4 8:4: Lew 14:1-32 8:11 8:11: Lug 13:29 8:12 8:12: Mth 22:13; 25:30; Lug 13:28 8:17 8:17: Aij 53:4



aishii wuii thog. “Masdo” Ai è yao, “Na khi hà wuii magunde gune narog wuii pha ideb ro.”

<sup>20</sup> Isu è aishii yao, “Shaliithek shii ne ichothek um, chiih-è fuiithek shii ne irung um, jimagunde, Bran Dufuii shii ne thieng ne thung pha ithua de oi ro.”

<sup>21</sup> Gaibrán, hanyie yi samoy ro, ai è yao “Masdo, igobi gu shii gui aphuii shii wieng pha dun yi bo.”

<sup>22</sup> “Gu rog shii luagieng bo,” Isu è chang, “chiih-è awaithek iy-iy è awai iy pha ji shii wieng yi bo.”

### *Isu è boh hasam shii them yi*

<sup>23</sup> Isu run shii in dun, chiih-è awai samoythek rog shii wuii dun. <sup>24</sup> Humblo shii hasam boh sam ne khabang shii reng mage, chiih-è run ne buii è zem sha pha rey dun, jimagunde Isu men dun. <sup>25</sup> Samoythek è aishii wuii srane aishii chun. “Ithong wo gathek shii ragia rek phi bo!” Itek è yao. “Gathek ne iy sha bsa ro!”

<sup>26</sup> “Nathek ne nyama nyie rek ne rum phlei? Isu è chang, nathek shii ne migi iujia bie ara ro!” Chiihphado ai sieng srane ji pha hasamthek nane gasathek shii yung ne them yi. Chiih-è thiisa hà ne boh them dun.

<sup>27</sup> Zab ne wiengphleg dun. “Hì ne khi-èrek pha bran ga?” Itek è yao. “Hasamthek nane gasathek rangde ai miyao nuii dun ro!”

### *Isu è ibuii um pha bran nyi shii gang phi*

*(Mrg 5:1-20; Lug 8:26-39)*

<sup>28</sup> Isu è khabang khlei pha ithua Gadara soh hà wuii thog mage shii, bran nyi ne wiengmuang è wuii ruii pha ai è si iang. Jipha branthek ne ibuiithek um srane bajo buii ro jiè hanyie de ji pha lumuii hà lua pha chua oi. <sup>29</sup> Khthiie ithek è ziak, “Gathek rog shii na nyie yang lei? Hamangkhang-aphuii pha Dufuii! Na ne gathek shii khriig pha ishak ibi hà lago phi pha wuii ne bey?”

<sup>30</sup> Thiichiih è muna ruang asi pha ji shii wak brog ram ne um. <sup>31</sup> Ji-è, ji pha ibuiithek Isu shii khung ne yao, “Na è gathek shii khia pha rek arone, gathek shii ji pha wak brog hà thoh ge bo!”

<sup>32</sup> “Dun bo” Isu è ithek shii yao; jiè ithek thoh srane wakthek hà dun dun. Zab ibrog ne sak miang hà ran srane khabang shii wo ne zem dun.

<sup>33</sup> Wakthek gayiig pha bran ji è ran srane thawun hà wuii dun, ibuiithek rog pha branthek shii nyie rek phi zab phaluii yao mage. <sup>34</sup> Ji-è, ji pha thawun pha branthek Isu shii si pha wuii dun; chiih-è ithek è aishii doh mage shii, ithek soh shii thoh ne dun bo ne khung ne yao.

## 9

### *Isu è slemriie pha bran shii gangphi*

*(Mrg 2:1-12; Lug 5:17-26)*

<sup>1</sup> Isu run shii in srane khabang pha thrang awairo thawun hà idoh dundun,\* <sup>2</sup> Thiisa hà giak bran è slemriie pha bran jia shii awai biang rog shii thieng ne noh thog. Isu è ithek ro migi um pha ji riig mage shii, ai è slemriie pha bran ji shii yao, “lububo rek bo, gu dufuii! Na layogthek ne khungjong phi ro.”

\* 9:1 9:1: awairo thawun: khapernaum (riig 4:13)

<sup>3</sup> Chiihphado Iphey yua pha masdothek è awaithek chung yao rai, “Hi pha bran ne makhakriing yao ramuii ro!”

<sup>4</sup> Isu ne ithek munow rai pha ji thieg, jiè ai yao, nathek ne nyie rek ne awie pha thek now phlei?

<sup>5</sup> Naro layogthek ne khung jong phi ro è yao pha ji wie ba asi jai ne lua mage bo è yao pha ji wie bey? <sup>6</sup> Gu nathek shii khagi rek, chiihphado, ji pha Bran Dufuii shii ne ichiih sohnyiak shii layog khung phi pha riichai um ro. Ji-è ai è slemriie pha bran shii yao, jai ne, nawai lawio chiing ne, chiih-è hò dun bo!

<sup>7</sup> Jipha bran jai fad srane awai hò hà dun dun. <sup>8</sup> Bran è ji doh mage shii, ithek ne zab rum dun, chiih-è bran shii de riichai phi pha Chiang è Hamangkhang-aphuii shii chiong bo.

*Isu è Methiu shii ho*

*(Mrg 2:13-17; Lug 5:27-32)*

<sup>9</sup> Isu è ji pha ithua thoh marui ne ai ibi lua shii, Methiu, beng pha mijin than pha ji awai ophis shii dug ne rai iang pha doh, ai è aishii yao “Gu idoh shii luagieng bo.”

Methiu jai fad srane ai idoh luagieng.

<sup>10</sup> Isu è Methiu hò<sup>†</sup> hà michie chie ramuii shii, gai mijin thanphothek nane iu riingthek de wuii thog srane Isu nane ai samoythek rog shii thiibliie hà dug gieng. <sup>11</sup> Giak Pharisithek è ji riig srane ai samoythek shii sai, Nyie rek ne masdo ne hi è rek pha branthek rog shii chiegieng phlei?

<sup>12</sup> Isu è ithek shii yoi srane chang, “Branthek hanyie gang pho ne mapho achid phro, chiih-è radpho è chiid bie phro. <sup>13</sup> Dun srane jigigam shii nyie yao pha miyaosiu shii ji sow bo: Gu ne bushun chid phro, miiram ua ne khlem pha ji ne achid ro! Gu ne ilab rek pha bran shii ho pha awuii ro, jishii iu riingthek shii ho pha wuii ro.”

*Minyie nyie pha Chiang è musai*

*(Mrg 2:18-22; Lug 5:33-39)*

<sup>14</sup> Chiihphado Jon khowo ro samoythek Isu shii wuii thog, ne sai, “Gathek nane Pharisithek ne idang minyie nyie” Jishii naro samoythek khuchung de minyie anyie ji ne nyie lei?

<sup>15</sup> Isu è chang, phiyiy shii wuii pha biwenthek yi phiyiybufuii ithek rog um ba shii ne duhug rek phrone luthong bey? Khuchungde asi phro! Jishii phiyiybufuii ithek noh dun pha inai thog ruii phro, chiihphado ithek minyie nyie ruii phro.

<sup>16</sup> Hanyie è de rugud høg shii yung iwo ithileg miak ne aphiug ruii phro, nyieliieshii, yung thilek iwo ji è re srane rugud ne lahuuak icho rey dun phro. <sup>17</sup> Dinne Hanyie è de phuii nyiu shii chabjong pha phuii sukhug shii achab phro, nyieliieshii ji pha sukhug pha bia ne chuidun phro, chiih-è phuii ne noidun chiih-è phuii sukhug ne awie pha reydu phro. “Jipha Chiang shii phuii nyiu shii ne phuii sukhug iwo hà chab chiid phro.” Chiih-è isa ne wie ruiidun phro.

*Dumuii dimi nane Isu yung khoh pha hò-amuii*

*(Mrg 5:21-43; Lug 8:40-56)*

<sup>18</sup> Isu è ji yao ramuii shii, Jewish pha dumuii è aishii wuii thog ne lagiungniing, srane yao, “Gu ro dimi ne iyjong dun ro, Jishii, thawuii srane nawai wad è aishii khoh mage bo chiih-è ai ne sieng ruii phro.”

<sup>19</sup> Ji-è Isu jai srane ai idoh luagieng, chiih-è airo samoythek de ai rog shii wuii gieng.

<sup>20</sup> Idam snanyi è diig rek ne grab noi ne riie pha hò-amuii jia è idoh wuii srane Isu yung jiu shii khoh mage. <sup>21</sup> Ai è awai shii yao, “Gu è airo yung shii khoh bie nede, gu ne gang rey dun phro.”

<sup>22</sup> Isu è idoh rai ne hò-amuii shii riig, srane yao, lububo rek bo, “Gu dimi wo! Naro migi ji è nawai shii wie rek ge ro.” “Ji è yao pha ishak shii hò-amuii ji ne wie rey dun.”

<sup>23</sup> Chiihphado Isu ne dumuii hò hà wuii dun. Iy pha ben khuang pho nane brantheck choh ne rai iang pha doh mage shii, <sup>24</sup> ai è yao, zab ne fuang dun mage bo! “Bimi ne a-iy ba ro—Ai ne men bie ro!” Chiihphado ithek zab aishii siak. <sup>25</sup> Khthiie dang shii brantheck fuang dun ched mage shii Isu è bimi ji pha ùgud hà wuii srane bimi ji pha wad shii chaing mage, chiih-è bimi ji de sieng khlei ruii. <sup>26</sup> Mua ji ne zab pha soh shii yoi thogdun.

### *Isu è miegthi pha bran nyi shii gang phi*

<sup>27</sup> Isu è ji pha ithua thoh marui, chiih-è ai luaramuii shii miegthi pha bran nyi è jao ne ai idoh luagieng, “Gasa shii bushun rek phi bo, Dawid pha dufuii wo!” Ithek è ziaak. <sup>28</sup> Isu è hò bucho khud mage shii, miegthi pha bran nyi aishii wuii thog, chiih-è ai è ithek shii sai, “Gu è nasa shii gang rek ruii phrone nasa migi rek ne bey?”

“Oh masdo” Isa è chang.

<sup>29</sup> “Chiihphado Isu ne ithek mieg shii khoh srane yao, nasa è migi rek pha ji è hì è rey mage bo!” <sup>30</sup> Chiih-è ithek ro mieg ne dinne wie rey ge. “Isu è isa shii gang è yao, ji ne hanyie shii ayao rabo.”

<sup>31</sup> Jishii ithek ne dun srane Isu chiang pha mua ne zab soh hà yao phi.

### *Isu è ayao mua pha bran jia shii gang phi*

<sup>32</sup> Brantheck dun dun shii, giak bran è Isu hà hanyie miyao ayao mua pha bran noh thog ruii, nyieliieshii aishii ibuii um. <sup>33</sup> Jishii, khthiie dang shii ibuii fuang khia mage ne, bran ji ne jao ne yao, zab pha brantheck ne wieng dun, “Gathek è hì duiine rek pha blia ne Israel hà de khuchung de adoh ba ro!” ziaak ne yao.

<sup>34</sup> Jishii Pharisithek è chang, “Hi ne ibuiithek shii gieng pha sakhathong è Isu shii blu phi ara ro.”

### *Isu è brantheck shii bushun now*

<sup>35</sup> Isu è thawuntheck nane thiigtheck hà shan ne lua. Ai è Jewtheck misiahòtheck shii wuii ne yua, Sajathua chiang pha Mua Wie ji yua, chiih-è, miiriie nane radtheck pha brantheck shii gang phi. <sup>36</sup> Ai ibrog ji doh mage shii, ai lubu hà ithek shii bushun now dun, nyieliieshii, ithek ne samdiig nane nong-oi pha rey dun. Brogpho oi pha shiishai duiine rey dun. <sup>37</sup> Ji-è ai è ne awai samoythek shii yao, “Yamiing ne bajo um habuii shii, raig riug pho ne iujia bie ro.” <sup>38</sup> Ji è yamiing pha blia pho shii thoh ruii pha. “Yamiing pha muspho shii sia mage bo.”

## 10

*Samoy snanyi shii ho ne riichai phi*  
(Mrg 3:13-19; Lug 6:12-16)

<sup>1</sup> Isu è awai samoy snanyi shii ò ho srane ibuii ragungthek khia pha nane ichua miiriie nane radthek shii gang phi pha riichai phi. <sup>2</sup> Hi ne guaphasamoythek snanyi pha ibeng ro: igobi Simon (Phithar ro è ho), chiih-è ai ikhuii Andrew; Zebedi pha dufuii Jems nane ai ikhuii Jon; <sup>3</sup> Philip nane Bartholomew; Thomas nane mijin thanpha Methiu; Alphayus pha dufuii Jems nane Thadaeus; <sup>4</sup> Soh shii miie pha Simon nane Isu shii zum yi pha Judas Iskharioth ithek ro.

*Samoythek snanyi ro blia*  
(Mrg 6:7-13; Lug 9:1-6)

<sup>5</sup> Isu è ji pha samoy snanyi shii miyao yua ne fuang thoh ge: Gai bran pha soh shii nane Samaria thawunthek shii awuii rabo. <sup>6</sup> Jiphachiang shii, nathek ne Israel pha bran, ro shiishai san dun pha thiig shii wuii bo. <sup>7</sup> Wuii srane yua bo, hamangkung pha Sajathua ne inui sha ro! <sup>8</sup> Radpho shii gang phi bo, iypho shii chai hà yi bo, hiariie è radpho shii gang phi bo, chiih-è, ibuii thek shii khia phi bo. Nathek è igong apho pha mua, jiè nathek ne gai shii igong ayie pha phi muui bo. <sup>9</sup> Nathek ne san liiman nane thama pha bangthek ahan rabo. <sup>10</sup> Lumuii hà lua shii chayem pha biia de ayie rabo, chiih-è, lai ne gua pha phadiig nane lakhiathek nane thagin de ahan rabo. Bliaphothek è nyie chiid pha ji shii ne phi ruii phro.

<sup>11</sup> Nathek è thawun nane thiig hà wuii mage shii, nathek shii wie ho pha yang pho shii sow bo. Chiih-è, nathek è ji pha ithua adung sapho shii ne ai rog shii rai bo. <sup>12</sup> Khuchung, nathek è hò illing hà wuii shii, yao bo, liijjing ne nathek rog shii um bo. <sup>13</sup> Jipha hò bran è nathek shii wie ho arone, nathek pha liijjing nane salamthek ne rai yi bo; chiih-è, ithek è nathek shii wie aho arone, chiihphado nawaithek ro salamthek ji idoh yi bo. <sup>14</sup> Chiih-è, giak hò hà nane thawun hà nathek shii wie aho arone, chiihphado ji pha ithua thoh srane nawaithek laikham pha nyiakphlab kham ne thoh marui bo. <sup>15</sup> Gu è nathek shii izai yao, Chua pha inai shii Hamangkung-aphuii è ji pha thiigthek è ne Sodom nane Gomorah pha branthek shii lamuna bushun rek ruii phro!

*Diigchiao thog ruii*  
(Mrg 13:9-13; Lug 21:12-17)

<sup>16</sup> Yoi bo! Gu è nathek shii shiishai duiine choishaluii um pha duchoi shii thoh ramuii ro. Nathek ne pham duiine briak rek ne, pharo duiine zum rek bo. <sup>17</sup> Riig bthan bo. Hanyie è nathek shii zum ne limiang moe hà noh dun ne chiih-è nathek shii ne misiahòthek hà chia ruii phro. <sup>18</sup> Gu Chiang è nathek shii chua pha bohkhophothek nane sajathek moe noh ruii phro, chiih-è Mua Wie ji nathek shii nane gai bran shii yao bo. <sup>19</sup> Khuchung ithek è nathek shii noh ne chuajan noh shii, na khi-èrek ne yao chiih-è nyie yao chid pha ji shii samdiig arek chid rabo; ishak thog mage shii, nathek nyie yao pha ji ne phi ruii phro. <sup>20</sup> Nathek è nyie yao pha miyaogamthek jine nathek re-è asi phro; jithek ne Aphuii pha ragung è nathek è yao ruii phro.

21 “Branthek awaithek khuiino shii ua muui pha ithek shii phi muui phro chiih-è Aphuii è awaithek aniphiing shii duine rek phro, Aniphiing de awaithek pha Aphuii-amuii shii gidieg rek ne iy yi pha phi muui phro.” 22 Zab è nathek shii gu Chiang è khiijai ruii phro, Jishii, hanyie è iidohhè thog pha kho pho ne ragia rey ruii phro. 23 Ithek shii thawun jia hà diigkhui ruii shii, gai hà yo marui bo. Gu è nathek shii izai yang dang. “Bran dufuii awuii sapho shii ne Israel pha zab thawun blia ne ajong ba phro.” 24 “Samoy ne awai masdo è boh asi ro; khiao ne awai Ithong è boh asi ro. 25 Ji-è, samoy ne Masdo duine rek pha ji ne chodang pha rek bo, khiao de awai Ithong duine rek bo. Haliingpha khrug shii Ibuli rone ho arone, ji pha haliingpho branthek shii bajo buii ibeng ho phro.

*Hanyie shii rum chid phlei?*

*(Lug 12:2-7)*

26 “Ji-è branthek shii arumchid rabo. Thuh shii nyie kheb pha ji ne hong ruii phro, chiih-è ug pha ji ne thieg ruii phro. 27 Gu è igiia shii nyie yao pha ji ne inai shii yao din bo, chiih-è nathek è nyie ug ne yoi pha ji hòtek lakhung è yao dun. 28 Hanyie è siu shii ua ne jimagunde ragung shii a-ua mua pho shii arum rabo; ji pha Chiang shii, Hamangkhung-aphuii shii rum bo, hanyie ne siu nane ragung shii thumuluii hà mua maphi phro. 29 Nathek sikhi jia è fuiishiiraithek nyi nyapheg mua phro, thuh de Jishii, Aphuii è achid sapho ne ji pha fuiishiirai jia de nyiak shii achihi mua phro. 30 Nathek shii de, ji duine nathek khrug shii um pha khaziangthek de zab tham ne ruiijong ro. 31 Ji-è, arum chid rabo; nathek ne ji pha fuiishiiraithek è de bajo igong pha branthek ro!”

*Isu shii nuui pha nane Isu shii snai*

*(Lug 12:8-9)*

32 Hanyie è ithek ne gu è rey phrone hong yao arone, hamangkhung pha Aphuii moe shii gu è ji duine rek phi pha ro. 33 Jishii, hanyie gu shii hong ne snai arone, aishii de gu hamangkhung pha Aphuii moe shii snai ruii phro.

*Lijjiing asi jishii khamriie*

*(Lug 12:51-53; 14:26-27)*

34 Gu è ichiih sohjambling shii lijiing yie ne wuii pha ji anow rabo. Asi, gu ne lijiing yie ne wuii pha asi ro, jishii khamriie yi ne wuii ruii phro. 35 Gu ne dufuii è aphuii shii mak rek yi pha ji rab wuii phro, dimi è amuii shii mak rek yi, shami è khiing shii mak rek yi pha ji rab pha wuii. 36 Naro bajo awie pha mak ne nawai haliing è rey ruii phro.

37 “Hanyie gu shii è de muna awaithek aphuii dinne amuii shii miie pho ne” Guro samoythek rek pha adunmey phro; hanyie è awaithek dufuii dimi shii gu è de muna miie pho ne guro samoythek rek pha adunmey phro. 38 Hanyie è awai bai ji han ne gu idoh aluagieng pho ne guro samoythek rek pha adunmey phro. 39 Hanyie è awai siu sieng pha ragia rek arone, mua ruii phro; Jishii hanyie gu Chiang è awai chai shii mua muui arone mua ruii phro.

*Lasenthek*  
(Mrg 9:41)

<sup>40</sup> Hanyie è nathek shii wie ho ai ne gu shii de wie ho ruii ro, chiih-è hanyie gu shii wie ho pho ne gu shii thoh ge pha ji shii wie ho ro. <sup>41</sup> Hanyie è Hamangkhung-aphuii pha muapho shii wie ho, nyieliieshii ai ne Hamangkhung-aphuii pha muapho ro, nathek shii mua pha lasen ne aishii de mua ruii phro. Chiih-è hanyie è bran wie shii wieho nyieliieshii ai de wie, aishii de ithek lasen ji mua ruii phro. <sup>42</sup> Nathek de hì izai thieg mage bo, nyieliieshii ai ne guro samoy rone hanyie è guro iu samoythek jia shii de kho choi phi ne niing yi, hamblo shii lasen mua ruii phro.

## 11

*Jon khowo ro muaphothek*  
(Lug 7:18-35)

<sup>1</sup> Isu è awai samoythek snanyi shii jithek yua ched mage shii, ai ji pha ithua thoh ne thiichiih inui pha thawun shii yua ne yao pha wuii dun.

<sup>2</sup> Jon khowo pha phatheg hà Isu è rek ramuii pha jithek yoi mage shii, ai è gai samoythek aishii thoh ge, <sup>3</sup> “Gathek shii yao bo, ithek è Isu shii sai, na ne Jon è yao pha jia wuii ruii phro è yao marui pha ji bey? Din ne gathek ne gai wuii ruii pha ji shii khan habey?” <sup>4</sup> Isu è chang, “Idoh dun srane nathek è nyie yoi nyie doh pha ji Jon shii yao phi bo: <sup>5</sup> Miegthi de mieg doh mua ro; laikhi-èg de lua mua ro; hanyie thek hà miiriethék è diig rek ne radpho shii de sang rab\* ge ro; khohphang de yoi dun ro, chiih-è iypho de chai hà yi din phiro; chiih-è, Mua wie ne dusho pho shii de yua dun ro. <sup>6</sup> Hanyie è gu shii izai now pho ne khama sang pha um phro!”

<sup>7</sup> Jon ro samoythek è thoh ne dun dun shii, Isu è ibrog shii ai chang yao: “Nathek è balimuang hà Jon shii wuii dun shii, nathek nyie riig pha luthong phlei?” Hasam shii saing irab mia pha ji riig wuii ne bey? <sup>8</sup> Nathek ne nyie riig pha wuii dun phlei? Bran yi yungthek ichia guii pha ji riig wuii ne bey? Bran hanyie ne ji duiine guii pho ne boh hòthek hà rai phro! <sup>9</sup> Gu shii yao riig bo, nathek nyie riig pha wuii dun phlei? Chaig shii bey? Ji ne izai ro, Jishii nathek è chaig è de boh shii doh marui.

<sup>10</sup> Jon ne jigigam shii yao marui pha jia ji ro; Hamangkhung-aphuii è yao: “Gune guii muapho nathek ibi hà thoh srane nathek lumuii rab iang yi; <sup>11</sup> gu nathek shii yao Jon ne hanyie è idang sieng ne rai pho è de boh ba ro. Jishii hanyie yi hamangkhung pha Sajathua shii lujia um nede ai ne Jon è boh ba ro. <sup>12</sup> Jon è awai mua yua pha ishak è yie dang ne sudoh thog dang pha hamangkhung pha Sajathua ne bajo diig è mak jo<sup>†</sup> muii ro. Chiih-è bangchiie pha bran è zum pha bidiang mua ro.” <sup>13</sup> Jon pha ishak è chiih-è zab pha chaigthek nane Iphey yua pha masdo è yie dang ne Sajathua chang shii yaojong ro; <sup>14</sup> Jishii, nathek è ithek mua ji yoi yang arone, Jon ne Elija ro, hanyie wuii ruii pha ji shii ne chaigjong ro. <sup>15</sup> Nathek shii khohthek um arone, chiihphado, yoi mage bo!

<sup>16</sup> “Thuh, gu ne duchung pha branthek shii khi-èrek ò pha lei?” Ithek ne aniphiing duiine bajarai hà dug ne rai muii ro. Ibrog jia è gai shii ziak, <sup>17</sup> <Gathek è phiyiy thiiibiing boi shii, nathek è asiu phi! Gathek è phiyiy

**10:40** 10:40: Lug 10:16; Jon 13:20; Mrg 9:37; Lug 9:48    **11:5** 11:5: Aij 35:5,6; Aij 61:1    \* **11:5** 11:5: sang rabriig 8:2    **11:10** 11:10: Mal 3:1    **11:12** 11:12,13: Lug 16:16    † **11:12** 11:12: diig è mak jo; dinne jine mak thog ruii.    **11:14** 11:14: Mal 4:5; Mth 17:10-13; Mrg 9:11-13

ibai bai habuii shii, jimagunde nathek è achoh phi ro!> <sup>18</sup> Jon wuii thog shii, ai è minyie nyie ne phuui de aniing, chiih-è zab yao, aishii ne ibuii um ro, <sup>19</sup> Jishii, Bran dufuii wuii thog shii ai ne chie ne niing, chiih-è yao, hi pha bran shii Riig mage bo! Ai ne sgow ne niingpho ro, mijin thanphothek nane iriing iu pho thek pha ijak ro! “Hamangkhung-aphuii khani ne blia è izai chak rone doh yi.”

*Migi anowpho pha thawunthek  
(Lug 10:13-15)*

<sup>20</sup> Isu è thawunthek pha branthek shii awairo bajo buangthek rek phi shii ithek ne awaithek layog è akhid phi ne, jiè Isu è ji pha thawunpho shii giung: <sup>21</sup> Chorijin! Nathek shii khama diig ro, nathek khama diig ro, Bethsaida! Buangthek yi nathek shii rek phi pha ji ne Thaire nane Sidon shii rek phi arone, branthek ne khuchung è de awaithek layogthek è thadoh khidjong rone doh yi pha thiilo guui ne siphie shun ne rajjong ro! <sup>22</sup> Gu nathek shii yao chua pha inai shii Hamangkhung-aphuii è bushun yi nathek è muna ne Thaire nane Sidon shii doh yi phro. <sup>23</sup> Chiih-è nathek shii, Khaphernaum! Nathek ne nawaithek shii hamangkhung hà chiing pha yang muui bey? Nathek shii ne buzam Thumluii hà fen ruii phro! Buangthek ne Sodom hà rek phi arone, sudoh thog pha idang now ne rai dun iwa! <sup>24</sup> Nathek è id mua chua pha inai shii ne Hamangkhung-aphuii è ithek shii ne “Sodom pho shii muna bushun rek ruii phro!”

<sup>25</sup> Jipha ishak shii Isu è yao, “Aphuii, hamangkhung nane sohnyiak pha Ithong! Gu Nashii laso phi, nyieliieshii na è khua pho è ug ne ruii pha ji a-id pho shii doh yi. <sup>26</sup> Ji chak, Aphuii! Hi ne na è yang pha ji rey yi ro.

<sup>27</sup> “Gu Aphuii è gu shii zab manathek phi jong ro. Hanyie è dufuii shii athieg ro, Aphuii jijia è thieg bie ro, chiih-è hanyie de Aphuii shii athieg ro, dufuii ne thieg hanyie è dong yi pha gua ne ruii pha ji è thieg bie ro.

<sup>28</sup> “Gu shii wuii bo, hanyie zab yi miihanthek ley han ne jid dun pho, nane gu shii wuii mage bo! Gu è nathek shii thung phi ruii phro. <sup>29</sup> Guro jakhokh ji yi ne nawai lakhung shii ruii bo chiih-è gu è nui bo, nyieliieshii gu ragung shii neb nane jum; chiih-è nathek de thung pha mua ruii phro. <sup>30</sup> Gu è nathek shii phi ruii pha jakhokh ne wie bie ro, gu miihan phi pha ji ne thoh bie ro.”

## 12

*Jewthek Thung pha inai chiang shii musai  
(Mrg 2:23-28; Lug 6:1-5)*

<sup>1</sup> Iujia ishak idoh shii, Isu è Jewthek Thung pha inai shii phiug raig è dong ne lua ramuii. Ai ro samoythek ne chi-iy, jiè ithek ne phiug nyiu ji jao ne chiig ne igam ji chie. <sup>2</sup> Pharisithek è ji doh ne Isu shii yao, “Riig mage bo, na samoythek è Thung pha Inai hi è rek pha ji è gethek Iphey shii gidieg rek muui ro!”

<sup>3</sup> Isu è ithek shii yao din, “Nathek de Dawid nane ai branthek è chi-iyiy shii nyie rek pha jigigam ji ne atham riig bey? <sup>4</sup> Dawid nane ai branthek ne Hamangkhung-aphuii hò bucho shii wuii srane Hamangkhung-aphuii ro

hò shii zid pha iwebthek chie pha phi. Ji ne Iphey shii gidieg ro, nyieliieshii, ji pha iweb ne phabithek chie mua bie ro. <sup>5</sup> Chiih-è, zab Thung pha inai shii phabithek è Misiahò hà wuii srane Thung pha inai Iphey ji chui maphi nede ithek shii ichiig aphi rone nathek ne Moses ro Iphey ji atham bey. <sup>6</sup> Gu è nathek shii yao, Misiahò hì è de boh jia ichiuh nyiemagunde um ba ro. <sup>7</sup> Jigiam shii zey ne um ro, 'mìram khlemthek pha ji asi jishii gu ne bushun ji chiid ro, nathek è hì pha miyao ne nyie yao phlei ne wie gua dun arone' nathek de hanyie ichiig oi pha branthek shii anin iwa; <sup>8</sup> nyieliieshii, bran dufuii hì ne Thung pha inai pha Ithong de ro."

### *Wad shii slemriie pha bran jia*

<sup>9</sup> Isu è ji pha ithua thoh marui ne Jewthek misiahò hà wuii dun. <sup>10</sup> Thiichiih shii wad shii slemriie pha bran jia um iang. Giak branthek ne Isu awai mirek pha ichiig nin pha branthek khan ne um. Ji-è, ithek ne Isu shii sai, "Thung pha inai shii gang phi pha ji ne Iphey pha shuang asi bey?"

<sup>11</sup> Isu è ithek shii yao din, "Nathek de Thung pha inai shii nawaithek shiishai jia yi nyahiung hà chiihdun arone, ji pha shiishai shii khoh ne fuang akhia phi ne bey? <sup>12</sup> Ji-è, bran ne shiishai ji è de bajo boh ro! Gethek Iphey ne Thung pha Inai shii branthek shii nyanong mua." <sup>13</sup> Ji è yao ched dang Isu è wad slemriie riie pha bran ji shii yao, "Na wad phiang phia mage bo."

Ai è de wad phia mage shii ji pha slemriie pha ji ne gai pha wad duine wie rey dun. <sup>14</sup> Ji è rek pha doh mage ne Pharisithek ne dun dun chiih-è Isu shii ua pha phak rai.

### *Hamangkhung-aphuii è gua pha khiao*

<sup>15</sup> Isu è khinrin ne aishii gidieg rek pha ji yoi mage shii, ji pha ithua thoh ne dun dun; chiih-è bran ibrogthek de ai idoh luangieng. Ai è zab radthek shii gang phi srane <sup>16</sup> gaithek shii ai Chiang ji ayao rabo ne yung. <sup>17</sup> Ai è jithek rek phi pha ji è Hamangkhung-aphuii è Aijaya chaig è yao marui pha miyao ji izai rey yi pha ji rek ro:

<sup>18</sup> "Ichiuh hì ne gu mugua ne ruii pha khiao ji ro,  
hanyie shii gu ne bajo bushun rek ne bajo nyu pha ji ro.

Gu ne gui ragung ai lakhung shii phi,  
chiih-è ai ne Sothtek shii guro chua miyao yao phi ruii phro.

<sup>19</sup> Ai ne akhiinaing noh chiih-è, aziak noh phro,  
chiih-è, lumuii hà òh-òh aziak phro.

<sup>20</sup> Ai ne khi-èg shii de ajo phro,  
dinne ichuang shii de a-ua phro.

Ai ne izai ji ayang sapho shii ai ne athodang pha rek ne rai phi phro,

<sup>21</sup> chiih-è zab branthek ne ai lakhung shii luthong ruii phro."

### *Isu nane sakhathong*

<sup>22</sup> Chiihphado shii giak branthek è Isu hà ibuii um ne miegthi nane miyao ayao mua pha bran jia noh ne wuii thog ruii. Isu è ji pha bran shii gang phi, Ji-è ai ne miyao yao muadun chiih-è, mieg de doh muadun. <sup>23</sup> Thiichiih pha ibrogthek ne Isu è nyie rek pha ji riig ne zab wieng dun. Ithek è sai, "Hì ne Dawid pha Dufuii rey mua ne bey?"

<sup>24</sup> Pharisithek è ji yoi mage shii, ithek è chang, "Ai è ibuiithek shii khia bie phi, nyieliieshii ithek ro bohkhoh pha Sakhathong è aishii blu phi ro."



<sup>25</sup> Isu ne ithek è nyie now pha ji thieg, jiè ai ithek shii yao, “Khi pha soh magunde yoh che ne ibrog nyi rek ne yo che ne awaithek chung gui rai pho ne muna phiang arai mua phro.” Chiih-è, khi pha thawun nane halingpho yi ibrog yoh che srane awaithek chung gui rai pho ne muadun phro. <sup>26</sup> Ji-è ibrog jia gai Sakhathong pha Sajathua shii mak rek rai arone, hi pha miyaosiu è ne ibrog che jong chiih-è jog mua ruii phro. <sup>27</sup> Nathek è yao nyieliieshii gushii ne Sakhathong è ji rek pha blu phi ne ibuiithek khia yi, wie. Chiihphado, naro samoythek shii ibuii khia pha blu hanyie miphi lei? Naro samoythek awaithek è rek pha ji è ithek ne asi pha rek rone khagi rek. <sup>28</sup> Asi, hi ne sakhathong asi ro, jimagunde Hamangkhung-aphuii pha ragung ro, hanyie è gu shii blu phi ne ibuiithek khia yi, ji è ne Hamangkhung-aphuii pha Sajathua ne nathek lakhung shii wuii rone khagi rek phi.

<sup>29</sup> “Hanyie è de bran gang ro hò chuak ne aishii nyie um pha ji ayie mua phro, igobi bran biigang shii joi bi chid: Chiihphado ai ne hò goh mua phro.

<sup>30</sup> “Hanyie thek guro asi pho ne gu shii izai gidieg rek noh phro; hanyie è gu rog shii anong pho ne khrab pha ji è izai dayiingdayang rey dun. <sup>31</sup> Chiih-è jiè gu nathek shii yao brantheek shii layog nane buii yao\* pha jithek shii nya khung phi phro; Jishii hanyie è Ragung So shii buii yao pha ji shii ne khuchung de akhung phi phro. <sup>32</sup> Hanyie è Bran Dufuii shii gidieg rek pha ji ne nya khung phi phro; Jishii, hanyie è Ragung So shii gidieg rek pha ji shii ne khuchung de akhung phi phro—Sudoh nane idang gu de.

### *Hingmuii nane iwoi* (Lug 6:43-45)

<sup>33</sup> “Iwoi wie woi yi pha ne nathek shii hingmuii gang um chid phro; nashii hingmuii jia um arone, nashii ne iwoi de awie pha um ruii phro. Hingmuii ne iwoi khie woi ruii pha ji è thieg ruii phro. <sup>34</sup> Phamtheek nathek! Awie pha nathek ne khi-èrek ne miyao wie ji yao mua dun ga? Sem ne lubu è nyie now pha ji yao ruii phro. <sup>35</sup> Bran wie è nyie wie mana ruii pha jithek khia ne wie phi ruii phro. Awie pha bran ne awie pha mana ruii pha jithek khia ne phi ruii phro.

<sup>36</sup> “Nathek ne izai now ne rai iang bo! Chua pha ishak thog ruii shii nathek è khama jia pha adunmey pha miyaogam yao muii pha igam tham ne phi chid phro. <sup>37</sup> Nawaithek miyaogam yao pha ji è nathek shii chua ruii phro—Nathek yi ichiig um ba oi ba ji yaothiak phi pha ro.”

### *Buang pha blia rek yi pha nak* (Mrg 8:11-12; Lug 11:29-32)

<sup>38</sup> Chiihphado shii giak Iphey yua pha masdothek nane Pharisithek è yao ruii, “Masdo, gathek ne na mirek pha buang pha blia riig yang muii ro.”

<sup>39</sup> “Duchung pha brantheek ne khama awie nane Hamangkhung-aphuii shii athieg pha brantheek ara!” Isu è yao. “Nathek è gu shii buang pha blia rek phi bo ne lia ne bey? Asi! Nathek shii Jona chaig mirek maruii pha buang pha blia ji phi bie phro.” <sup>40</sup> Jona è ù boh bucho shii inai da-um nane ibiu da-um rai dun pha duiine Bran Dufuii de inai da-um nane ibiu da-um sohnyiik bucho hà rai dun phro. <sup>41</sup> Chua pha inai shii ne Ninewe brantheek riu srane nathek shii nin ruii phro, nyieliieshii nathek ne Jona è mua yao mage pha ji

**12:30** 12:30: Mrg 9:40 \* **12:31** 12:31: Itheek è Awie manathek ayao ro; dinne Itheek awai pha yao ne Hamangkhung-aphuii shii gidieg yao ro. **12:32** 12:32: Lug 12:10 **12:34** 12:34: Mth 3:7; 23:33; Lug 3:7; Mth 15:18; Lug 6:45 **12:38** 12:38: Mth 16:1; Mrg 8:11; Lug 11:16 **12:39** 12:39: Mth 16:4; Mrg 8:12 **12:40** 12:40: Jna 1:17 **12:41** 12:41: Jna 3:5

yoi ne awaithek layogthek khid jong ro; chiih-è, gu è nathek shii yao, ichiih shii ne Jona è de boh jia um ro. <sup>42</sup> Chua pha inaithek shii Sheba sajamuii de riu srane nathek shii nin ruii phro, nyieliieshii ai de bajo ruang pha soh è wuii ne Solomon Saja ro khua muyua ji yoi marui ro. Chiih-è gu ne nathek shii izai yao ichiih shii Solomon è de boh jia um ro!

*Awie pha ragung idoh khid  
(Lug 11:24-26)*

<sup>43</sup> “Khuchung magunde awie pha ragung bran è khia ne dun dun shii, ithek soh igoh shii lua srane thung pha ithua sow.” Ithek jia de adoh sharuii arone, <sup>44</sup> ai ne awai shii yao, “Gu ne gui hò hà idoh dun pha ro.” Ji-è ai ne idoh hò dun srane riig ne isoloi; so nane zab khriig rek ne ruii iang pha doh. <sup>45</sup> Chiihphado ai ne fuang wuii srane ai rog shii awai è de bajo buii ragung miley yi, ne ithek dun srane thiichiih rai ruii phro. Ji-è rey ched mage shii, ji pha bran ne igobi è de awiedang pha rey ruii phro. Duchung awie pha branthek shii de hi duine ro.

*Isu pha Amuii nane khuiithek  
(Mrg 3:31-35; Lug 8:19-21)*

<sup>46</sup> Isu è branthek shii miyao yao bamuii shii ai amuii nane ai ikhuithek thiichiih wuii thog. Ithek ne fuang hà riu srane, aishii shii mulo pha sai. <sup>47</sup> Ji-è thiichiih pha bran jia è aishii yao, “Riig bo, na amuii nane na khuiino ne fuang hà riu muii ro, chiih-è ithek ne narog shii mulo yang muii ro.”

<sup>48</sup> Isu è chang, “Hanyie ne gu amuii lei? Hanyie ne gu khuiinothek?” <sup>49</sup> Chiihphado ai è awai samoythek shii hìog ne yao, “Riig bo, ichiih ne gu amuii nane gu khuiinothek um ro! <sup>50</sup> Hanyie è hamangkhung hà um pha gu Aphuii è aishii nyie rek phi bo yang pha ji rek phi pho ne gu khuiinothek, gu bumuiithek chiih-è gu amuii ro.”

## 13

*Iriie jiie pha najang  
(Mrg 4:9; Lug 8:4-8)*

<sup>1</sup> Jipha inai shii Isu è hò thoh marui ne khabang ring hà wuii dun, thiisa hà ai dug srane yua. <sup>2</sup> Ibrog khrab dun pha ji ne bajo boh habuii ne ai run hà dun ne raidun chiih-è branthek ne bajo leyphiing dun pha ji è ai ne run hà in srane thog dun. Ji shii ibrog yi iring hà riu. <sup>3</sup> Ai è najangthek è ithek shii bajo manathek è yuaphi.

“Luang jia bran jia yi iriie wey pha wuii dun. <sup>4</sup> Ai è raig shii iriie yi dayiingdayang rek marui, giak yi lumuii hà chiih dun, chiih-è fuithek wuii srane zab chiing ne chie muii. <sup>5</sup> Giak yi lubao sarong shii chiih dun, ji ne nyiak iujia bie habuii ne, iriie ji khthiie sieng thog, nyieliieshii nyiak ne muna jam oi ro. <sup>6</sup> Jishii hasiang thog mage shii, misieng nyiu ne shud dun; chiih-è nyieliieshii iriing ijam dab pha acho, jiè misieng ne khthiie gowdun. <sup>7</sup> Giak iriie ne migem biing shii chiih dun. Jipha misieng ne siang jimagunde shii ne giao dun. <sup>8</sup> Jishii giak iriiethek yi nyiak wie shii chiihdun, chiih-è misiengthek ne iwoi woi: giak ne biiriie wieng jia thog pha iwoithek woi, giak ne biiriie sariig thog pha, chiih-è giak ne biiriie sa-uom thog pha woi ruii.”

<sup>9</sup> Isu è yao ched, chiihphado “Nathek shii yoi pha khothek um arone yoi bo!”

*Najangthek pha miyaosiu*

<sup>10</sup> Chiihphado samoythek è Isu shii wuii srane aishii sai, “Na ne branthek shii yua shii nyie rek ne najang è yua phlei?”

<sup>11</sup> Isu è chang, “Hamangkhung pha Sajathua pha miyao ug ne ruii pha ji è nathek shii phijong ro. Jishii ithek shii asi ro.” <sup>12</sup> Hanyie shii ùjia um pho shii ne muna phi ruii phro, jiè aishii ne chodang pha um ruii phro; jimagunde hanyie shii nyie oi pho shii ne ùjia um ne de yie dun phro. <sup>13</sup> Gu è najangthek è yao pha Chiang ji ne ithek shii riig yi, jimagunde adoh phi; chiih-è ithek ne yoi, jimagunde ithek ne ayoi chiih-è agao phi ro. <sup>14</sup> Ji-è Aijaya chaig è ithek shii yao marui ro;

Hì pha branthek ne yoi pha ne yoi, jimagunde de agao phi ro;  
ithek ne riig pha ne riig, jimagunde adoh phi ro,

<sup>15</sup> nyieliieshii, ithek khanithek ne blan ro,  
chiih-è ithek ne awaithek khothek ne chiiig muii  
Chiih-è awaithek mieng ne siemuii ro.

Asi arone, ithek mieng de doh ruii,  
ithek khoh de yoi ruii phro,  
chiih-è, ithek khanithek de gao ruii phro.

Chiih-è, ithek de gu shii khid ruii, Hamangkhung-aphuii shii yao  
chiih-è gu ne ithek nyagang mua.

<sup>16</sup> “Nathek ne khama wie ro! Nathek miengthek ne doh dun ro, chiih-è nathek khow ne yoi ro.” <sup>17</sup> Gu è nathek shii izai yao, chaigthek nane Hamangkhung-aphuii pha branthek è ithek duiine bajo doh pha now shii jimagunde adoh mua phi. Nathek è nyie yoi pha ji yoi pha now shii ayoi phi.

*Isu è iriie weypho pha najang pha miyaosiu yaophi  
(Mrg 4:13-20; Lug 8:11-15)*

<sup>18</sup> Yoi bo, chiihphado wey pha najang pha miyaosiu ne yoi mage bo;  
<sup>19</sup> Hanyie è Sajathua pha mua ji yoi ne agao pho ne iriiethek ne lumuii shii chiih pha ji duiine ro. Awie pha jia è wuii srane ithek shii nyie wey pha ji ne zab riao ne yiedun; <sup>20</sup> chiih-è, lubao sarong shii chiih pha iriiethek ji ne hanyie thek è mua ji bajo wie lised ne khthiie yoi dun. <sup>21</sup> Jishii, hi ne ithek bucho hà akhud mua, chiih-è ishak phiang thog pha arai mua. Ji-è ji pha mua Chiang è diig nane diigchiaog thog mage shii, ithek ne khthiie thoh muii phro. <sup>22</sup> Migembiing shii chiih pha iriie ne hi ro, hanyie thek è mua ji yoi, jimagunde ichiih pha chai Chiang shii samdiig srane bukho rek pha ji miie ne mua shii giao dun, chiih-è ithek ne iwoi awoi mua. <sup>23</sup> Chiih-è nyiak wie shii chiih pha iriie ne hi duiine ro, hanyie è mua ji yoi ne guadun: ithek ne iwoi woi ruii, “giak ne biiriie wieng jia thog pha woi ruii, giak ne biiriie sariig thog pha, giak ne biiriie sa-uom thog pha woi ruii.”

*Saingthek pha najang*

<sup>24</sup> Isu è ithek shii gai najang yao, “Hamangkhung pha Sajathua hi duiine ro” bran jia è awai raig shii iriie wie hai marui. <sup>25</sup> Biu jia, zab men ched dun shii, mak è wuii srane phiug duchoi shii saingthek wey marui ne dun dun.

<sup>26</sup> Misiengthek yi sieng ne igam jao ne rey ramuii shii, chiihphado saingthek sieng mage. <sup>27</sup> Jipha khiao è dun srane masdo shii yao, “masdo!” Na ne nawai raig shii ne iriie wie ji hai marui, saingthek ne khi-è thog ruii phlei? <sup>28</sup> “Hì ne giak shuang pho miihai iwa!” Ai è chang. Na ne gathek shii wuii ne sieg muui bo ne yang bey, “ithek è chang? <sup>29</sup> Asi, ai è chang, nyeliieshii, nathek è saing ji sieg mage shii ithek rog pha phiugthek de siegdun phro. <sup>30</sup> Ji-è phiug nane saing shii ne yamiing rey pha ishak thog dang pha ò sieng yi bo. Chiihphado gu yamiing rekpho shii yao ne igobi ji pha saingthek sieg yi pha ro, ithek shii pho ne bai hà ziao muui, chiih-è phiug shii khrab srane gu haphuii shii chab muui phro.”

*Danaro iriie pha najang yao*  
(Mrg 4:30-32; Lug 13:18-19)

<sup>31</sup> Isu è ithek shii gai najang è yao: “Hamangkhung pha Sajathua ne hi duine ro! Bran jia è danaro iriie yie srane awai raig shii wey. <sup>32</sup> Hì ne zab pha iriiethek è ìu ro, jimagunde ji sieng mage shii, hì ne zab pha misieng è boh rey dun. Hì ne hingmuui rey, jiè fuithek wuii ne ji pha idiphak shii irungthek rok.”

*Phiia pha najang*

<sup>33</sup> Isu è gai najang è yao bamuii: “Hamangkhung pha Sajathua ne ji duiine ro! Hò-amuii è phiia yie srane siiriie sawi muhab shii abog sapho shii ne lua ne raidun.”

*Isu ne najangthek è yao*

<sup>34</sup> Isu è ibrogthek shii hùthek zab yao pha ne najang yao; ai ithek shii najang è ayao pha ne nyie de ayao phi. <sup>35</sup> Ai è ji è rek pha ji è chaig è nyie yao marui pha jithek izai rey yi, “Gu è nathek shii yao ruii shii, najang yao ruii phro; Gu ne nathek shii sohjambling zen pha ishak è athieg pha miyaothek yao ruii phro.”

*Isu è saingthek pha najang yao phi*

<sup>36</sup> Isu è bran ibrogthek shii thoh marui ne iliing hà dun dun, ai samoythek è aishii wuii srane yao, “Saing raig pha najang Chiang ji nyie yao phlei ne gathek shii yao riig bo.”

<sup>37</sup> Isu è chang, “Bran hanyie è iriie hai marui pha ji ne Bran Dufuii ji ro; <sup>38</sup> Raig ji ne sohjambling ro; iriie wie ji ne hanyie Sajathua pha bran ithek ro ro. Saingthek ne hanyie awie pha jia jithek ro, <sup>39</sup> chiih-è hanyie è saingthek hai pha mak ji ne ibuii ji ro. Yamiing jong pha ishak ji ro, chiih-è, yamiing pha bliapho ne hamangkhliie ro. <sup>40</sup> Saingthek shii khrab ne bai hà fu muui pha duine, jong pha ishak shii de ji duiine rey ruii phro; <sup>41</sup> Bran Dufuii è airo Sajathua è fuang pho hanyie è branthek shii layog rek yi ne chiih-è hanyie è awie pha blia rek pho shii khrab pha thoh ge. <sup>42</sup> Itek shii bai hòì boh shii fen muui phro, ithek ne choh ne sinyin khriig ruii phro. <sup>43</sup> Chiihphado Hamangkhung-aphuii pha branthek ne Aphuii Sajathua hà hasiang duiine chuang ruii phro. Hanyie thek khothek um pho ne yoi mage bo!

*Nuruii ug ne ruii pha najang*

<sup>44</sup> “Hamangkhung pha Sajathua ne hi duiine ro.” Bran jia è raig shii nuruii ug ne ruii pha ji doh. Ai è dinne chaig, chiih-è bajo sang ne dun ne awaishii

nyie um pha manathek zab chongjai rek muui srane ji pha idoh wuii srane ji pha raig phev.

<sup>45</sup> “Hamangkhang pha Sajathua ne hì duine ro, bran jia è wie rishang sow.” <sup>46</sup> Ai è igong um pha rishang jia doh mage shii, ai ne dun srane awai shii nyie um pha ji liu srane ji pha rishang shii phev ro.

### *Chiug pha najang*

<sup>47</sup> Hamangkhang pha Sajathua ne hì duine ro, giak ù ua pho è kho shii chiug mua ne ichua ichua ù zum. <sup>48</sup> Jipha chiug ley mage shii, ithek iring shii khia srane dug ne ù gua: wie ji ne sikhen hà chab muui chiih-è wie pha ji shii ne awie pha ji è gua ne fen muui, <sup>49</sup> hì ne jong pha ishak shii hì duine rey ruii phro: “hamangkhliethek wuii srane awie pha brantheke shii wie pha brantheke duchoi è khrab muui phro. <sup>50</sup> Chiih-è ithek shii ne bai hang shii fen muui phro, thiisa hà ithek ne choh ne shinyin khriieg ruii phro.

### *Iwo nane ihèg pha zai*

<sup>51</sup> “Nathek ne hì pha miyao ji gaojong bey?” Isu è ithek shii sai. “Um,” ithek è chang.

<sup>52</sup> Ji-è, ai è chang, “chiihphado, hì pha miyaosiu ne Iphey yua pha masdo hanyie è hamangkhang pha Sajathua pha samoy rey dun pho ne, hò muspho hanyie è awai haphuii è iwo nane ihèg manathek yi pha ji duine ro.”

### *Nazareth hà Isu shii snai* (Mrg 6:1-6; Lug 4:16-30)

<sup>53</sup> Isu è najang jithek yao ched dang shii, ai è ji pha ithua thoh muui. <sup>54</sup> Chiih-è awai hò hà idoh dun. Ai è Jewthek misiahò shii yuaphi. Chiih-è hanyie è aishii yoi pho ne wieng dun. “Aishii hì pha khani khi è mua phlei?” Itheke è yao. “Chiih-è hì pha buangthek nyie lei?” <sup>55</sup> Ai ne zao rek pha dufuii ji asi bey? Ai amuii ne Mery ji asi bey? Ai khuiithek ne Jems, Joseph, Simon nane Judas thek asi bey? <sup>56</sup> Ai bumuiithek ne ichiih shii rai pha jithek asi bey? Ai ne ji pha manathek ne khi è mua dun phlei? <sup>57</sup> Chiih-è ithek è aishii snai muui. Isu è ithek shii yao, “Chaig shii ne gai pha ithua thek hà ilab rek phi phro, chiih-è, awai hò pha bajarai nane awai halliingthek è ilab arek phi phro.”

<sup>58</sup> Nyieliieshii, ithek ne aishii lubu è migi arek phi. Ji-è, thiichiih shii ai è buangthek pha blia bajo arek phi.

## 14

### *Khowo phi pha Jon iy dun* (Mrg 6:14-29; Lug 9:7-9)

<sup>1</sup> Herod è Galili shii khothek ne rai pha ishak shii, Isu chiang shii yoi, <sup>2</sup> “Ai ne izai Jon khowo, hanyie ne chai idoh thog dinne bey,” Ai è awai dumuiithek shii yao. “Ji-è ai ne ji pha blu um ne buangthek rek ara ro.”

<sup>3</sup> Herod è Jon shii zum pha yungjong. Chiih-è Ai è shiirnai phang srane phatheg chab muui ro. Ai jithek rek pha ji ne ai ikhuii ro Philip pha yiy Herodias pha chiang ro. <sup>4</sup> Nyieliieshii, Jon è Herod shii yao, “Herodias shii yiy rek pha ji è adunmey phro!” <sup>5</sup> Herod è Jon shii ua muui pha now, jinagunde ai Jewishthek bran è rum nyieliieshii, Jewish thek è Jon ne chaig rone yao dun.

<sup>6</sup> Herod giak pha inai shii Herodias pha dimi è zab pha ibrog moe shii gasiu siu phi. Herod ne sang dun. <sup>7</sup> Ji-è, ai è dimi shii sbang rek, “ai è surua thak Na è nyie lia pha ji phi ruui phro!”

<sup>8</sup> Ai amuii pha miyao nuui ne ai è aishii lia, “Gu shii Jon khrug ne ichiuh shiikhiia shii giong ne phi mage bo!”

<sup>9</sup> Saja ne zo dun, jimagunde nyieliieshii ai è awai è biwenthek moe shii sbang rek pha ji è ai è bimi è lia pha ji rek phi. <sup>10</sup> Ji-è, Jon khrug ne phat heg bucho hà tham yi. <sup>11</sup> Khrug ji ne shiikhiia shii giong srane bimi shii phi muui, ai è amuii shii yie ne phi muui. <sup>12</sup> Jon pha samoythek wuii thog, ai siu shii han dun, chiih-è wieng muui; chiihphado ithek ne wuii srane Isu shii yao phi.

### *Isu è itham guui pha brantheek shii chie*

<sup>13</sup> Isu è Jon Chiang muathek yoi mage shii, ai run shii in srane awailum liijiing ithua hà wuii dun. Brantheek de ji pha Chiang yoi, jiè ithek awaithek thawunthek thoh srane ai idoh lai è luagieng. <sup>14</sup> Isu run è fuang lung ne, ai boh ibrog riig mage shii, ai lubu ne nathek shii bushun now dun, chiih-è hanyie radpho shii ai è gang phi.

<sup>15</sup> Jipha habjuang airo samoythek wuii thog srane yao, “Gethek ne bajo chia sha dun ro, chiih-è ichiuh pha ithua ne liijiing ro. Brantheek shii thiigthek hà thoh ne awai chie pha phog yi haro!”

<sup>16</sup> Ithek shii atoh ge rabo, Isu è chang, “ithek shii nawaithek è chie pha phi mage bo!”

<sup>17</sup> “Ichiuh gethek shii ne iweb guui nane ù nyi um bie ro, ithek è chang.”

<sup>18</sup> Isu è ithek shii yao din, “Jithek ne ichiuh gu moe shii yie mage bo.” <sup>19</sup> Ai è brantheek shii saing lakhung shii dug pha yung; chiihphado ai è iweb guui nane ù nyi ji yie srane hamangkhang hà hù ne riig ne, Hamangkhang-aphuii shii laso phi. Ai è iweb ji phed srane samoythek shii phi. Chiih-è samoythek è brantheek shii phi. <sup>20</sup> Zab brantheek è lumuiidang pha chie. Chiihphado nyie khe pha ji yi siridthek snanyi ley chiing. <sup>21</sup> Hanyie chie pho ne hò-aphuii ne itham guui ro chiih-è hò-amuii nane anphiing shii ne atham ro.

### *Isu è kho lakhung shii lua*

*(Mrg 6:45-52; Jon 6:15-21)*

<sup>22</sup> Chiihphado Isu è samoythek shii run shii in yi srane ibi khabang thrang pha ithua wuii yi. <sup>23</sup> Brantheek dun ge pha idoh, ai awailum ne phiingdui hà sia pha wuii dun. Habjuang rey mage shii, Isu ne thiisa ji rey dun.

<sup>24</sup> Jipha ishak shii ne run ne khabang è ruang rey dun. Khasua è laludun, nyieliieshii hasam ibi è sam ruui.

<sup>25</sup> Hamiang riang uom nane riig rey pha ishak shii Isu è kho lakhung è lua ne samoythek moe shii wuii thog. <sup>26</sup> Ithek è aishii kho lakhung shii lua pha doh mage shii, ithek ne rum dun, “Hi ne ibuii ro.” Ithek è yao, chiih-è rum ne ziak.

<sup>27</sup> Isu è ithek shii jog yao mage, “Lububo rek bo!” Ai è yao, “Hi ne gu ro, nathek ne arum rabo!”

<sup>28</sup> Chiihphado Phithar è de yao, Ithong wo! Ji ne izai na chak arone, gu shii de kho lakhung shii lua ne na hà wuii yi bo.

<sup>29</sup> “Thawuii bo!” Isu è chang, ji-è, Phithar de run è fuang lung srane jao ne kho lakhung shii lua ne Isu shii wuii. <sup>30</sup> Jishii ai hasam gang ji riig ne ai ne rum chiih-è kho shii zem pha rekdun.

“Phithar è ziak ne yao,” “Ithong wo gu shii ragia rek phi bo.”

<sup>31</sup> Isu è jog aishii wuii srane aishii kho ne yao, “Nashii ne migi ìujia um ara? Na ne nyie rek pha than phlei?”

<sup>32</sup> Isa nyi manyie run bucho shii in ne chiih-è hasam de them dun.

<sup>33</sup> Chiiphado run shii um pha samoythek è Isu shii misiasia, “Na ne izai Hamangkhung-aphuii pha dufuii chak ro!” ithek è ziak.

### *Isu Genesareth shii radpho shii gangphi*

<sup>34</sup> Ithek ne khabang ji hiia ne Genesareth pha soh hà wuii thog, <sup>35</sup> Thiichiih pha brantheke è Isu shii thieg. Ji-è ithek è zab soh pha radpho thoh ge srane ithek shii Isu hà noh thog ruii. <sup>36</sup> Ithek è aishii khung ne yao, “Hanyie radpho ne naro rugud ijiu shii khoh yi bo,” zab hanyie è khoh pho ne gang dun ro.

## 15

### *Blangthek muyua*

*(Mrg 7:1-13)*

<sup>1</sup> Chiiphado giak Pharisithek nane Iphey yua pha masdo Jerusalem è Isu shii wuii ne aishii sai, <sup>2</sup> “Nyie rek ne naro samoythek ne gathek ro blangthek muyua marui anuii pha rek phlei? Ithek ne michie chie pha ibi shii wadthek wie è achun pha chie!”

<sup>3</sup> Isu è chang, “Chiuh-è nyie rek ne nathek ne Hamangkhung-aphuii muyung anuii pha nawaithek muyua ji nuii ne rai?” <sup>4</sup> Hamangkhung-aphuii è yao, nawai aphuii amuii shii ilab rek bo, chiih-è hanyie magunde awairo aphuii amuii shii muchocho arone aishii ne ua muui bo. <sup>5</sup> Hanyie bran shii awai aphuii amuii nong mua sbo nyie magunde um shii, jimagunde ai è yao hi ne Hamangkhung-aphuii ro ro. Nathek ne yua, <sup>6</sup> ai ne awai aphuii shii ilab arek chid phro. Ji duiine nathek ne nawaithek muyua Chiang ji nuii yi pha Hamangkhung-aphuii\* muyua ji shii thoh muui. <sup>7</sup> Lawasdai nathek! Aijaya è khi-èrek ne nathek Chiang chaig pha ji ne dunmey dang ro!

<sup>8</sup> Hamangkhung-aphuii è yao, Hi thek pha bran ne gu shii awaithek ro miyaogamthek è ilab rek.

Jimagunde izai nathek lubu shii ne gu è bajo ruang um ro.

<sup>9</sup> Hi ne ithek è gu shii misiasia pha ji è adunmey ro, nyieliieshii, ithek ne bran murab pha Iphey shii guro Iphey duiine yua phro!

### *Bran shii zea rab pha manathek*

*(Mrg 7:14-23)*

<sup>10</sup> Chiiphado Isu è ibrogthek shii ho srane ithek shii yao, “Yoi ne gua bo!”

<sup>11</sup> Bran sem è bucho dun pha ji ne bran shii zea arab ro; “ji pha Chiang shii nyie fuang khia pha ji è aishii zea rab ruii phro.” <sup>12</sup> Chiiphado samoythek è aishii wuii srane yao, “Pharisithek è de na miyao ji yoi ne lubu hà lijieg dun pha ji nawai de thieg chak bey?” <sup>13</sup> Isu è ithek shii chang ne yao din, “Hamangkhung hà Aphuii miihai asi pha misieng ne sieg ne fen muui phro.”

<sup>14</sup> “Ithek shii now ne arum chid rabo! ithek ne miegthi pho ro miegthi pha dumuiithek ro; khuchung magunde miegthi pha bran jia è miegthi pha bran gai shii chaing ne lua noh arone nyimanyi nyahiung hà chiih dun phro.”

<sup>15</sup> Phithar è yao ruii, “Hi yao pha ji ne yao phi bo.” <sup>16</sup> Isu è ithek shii yao,

\* **15:4** 15:4: Mul 20:12; Iphy 5:16; Mul 21:17; Lew 20:9 **15:6** 15:6: nathek ro aphuii; giak jigizey shii um nathek ro aphuii dinne amuii. **15:8** 15:8,9: Aij 29:13 (LXX) **15:14** 15:14: Lug 6:39

“Nathek thuh de gaithek è de khua asi ara. <sup>17</sup> Nathek ne agao ba bey? Nyie magunde bran sem bucho dun pha ji è lui hà dun srane siu è khia dun. <sup>18</sup> Jishii, nyie sem è fuang khia ruii pha ji ne lubu è khia ruii phro. Jithek è bran shii zea rab ruii phro. <sup>19</sup> Ai lubu è awie pha munowthek khia ruii phro, ji pha munow è aishii sgoh, siulao pha, biwo blia rek pha, mugoh pha, khlam yao pha, gai shii buii rek pha, <sup>20</sup> Hi thek pha manathek bran shii zea rab phro. Jimagunde nathek miyao duine wad achun pha michie chie pha ji è bran shii zea arab phro.”

### *Hò-amuii jia pha migi*

<sup>21</sup> Isu ne ji pha ithua thoh marui ne Thaire nane Sidon pha rajan pha soh hà wuii dun. <sup>22</sup> Thiichiih rai pha Gananithek hò-amuii jia è aishii wuii thog ruii, “Dawid pha Dufuii!” Ai è choh ne yao. “Gu shii bushun now phi bo! Masdo gu dimi ne ibuii um chiih-è awie dang pha rai muui ro.”

<sup>23</sup> Jishii Isu ne ji pha hò-amuii shii nyie miyaogam ayao, airo samoythek è aishii wuii srane khung ne yao, “Jipha hò-amuii shii dun gey bo! Ai ne gethek idoh lua ne bajo roh ruii phro!”

<sup>24</sup> Isu è ithek shii chang ne yao, “gu shii ne Israel pha shiishai san dun pha ji so pha thoh bie ro.”

<sup>25</sup> Ji è yao mage shii ji pha hò-amuii è Isu lai moe shii bam srane yao, “Masdo gusa shii nong phi bo!”

<sup>26</sup> Isu è chang, “Aniphiiing ro michie ne yie srane choi shii fen ne phi mua pha ji adunmey phro.”

<sup>27</sup> “Jine izai ro, masdo,” ai è chang! “Jishii, choi de Ithong chie ne thiibliie è chiih dun pha ji è nya chie mua phro.”

<sup>28</sup> Ji-è, Isu ne aishii chang ne yao, “Na ne migi bajo um pha hò-amuii ro! Na è nyie yang pha ji ne na shii rek ruii phi phro.” Ji è yao dang shii bimi ji ne gang dun.

### *Isu è bran bajo shii gang phi*

<sup>29</sup> Isu è thiichiih thoh ne Galili pha khabang ring è wuii dun. Ai è phiingduii jia shii khrog ne dug dun. <sup>30</sup> Boh ibrogthek è ai moe shii, lai alua mua pho, miegthi pho, lai khi-èg pho, ayao mua pho, chiih-è, gai radpho shii noh ne Isu lai shii ruii phi ne, ai è ithek shii gang phi. <sup>31</sup> Bi-iethek de yao din, laikhi-èg de wiedun, lai alua mua pho de lua mua dun, miegthi pho mieg doh dun pha ji doh mage ne zab thiichiih um pha branthek wiengphleg ne Israel pha Hamangkhang-aphuii shii chiong.

### *Isu è itham wi pha branthek shii chie noh*

<sup>32</sup> Isu è awai samoythek shii ho srane yao, “Gu ne ichiih pha branthek shii bajo bushun now muui ro, nyieliieshii, ithek de gu rog shii inai da-um rey sha pha rai gieng dun ro, thuh shii ithek shii chie pha nyie de oi sha ro. Gu ne nathek shii nyie de achie yi pha dun ge pha anow ro, yang ne ithek ne lumuyi hà chi-iy ne thud pha de um phro.”

<sup>33</sup> Samoythek è Isu shii sai, “Gethek ne khi-èrek ne ichiih balimuang shii um pha ibrog shii phi ne chie mua mage phlei?”

<sup>34</sup> Isu è ithek shii sai, “Nathek shii iweb khama um ga?”

Ithek è chang, “Iweb miley chiih-è ù lujia um bie ro.”

<sup>35</sup> Isu è ji pha ibrogthek shii nyaliag shii dug pha yung. <sup>36</sup> Chiihphado ai è iweb miley nane ù jithek chiing srane Hamangkhang-aphuii shii laso phi



srane phed ne samoythek shii phi, samoythek è brantheek shii phi ne chie yi.  
<sup>37</sup> Itheek zab è ji lumuii dang pha chie. Chiih-è led marui pha ji ne samoythek è sirid miley chiing. <sup>38</sup> Thiichiih um shii chie pha brantheek ne itham Sawi um dun ro, hò-amuii nane aniphiing shii atham ro.

<sup>39</sup> Chiihphado Isu è brantheek shii dun ge yi, awai de run in srane Magadan pha soh hà wuii dun.

## 16

### *Buang pha ji nak* (Mrg 8:11-13; Lug 12:54-56)

<sup>1</sup> Giak Pharisitheek nane Sadusitheek Isu shii chai pha aishii wuii thog, “Ji-è Hamangkhung-aphuii è aishii khagi rek rone doh yi pha, itheek è aishii buang rek bo ne lia.” <sup>2</sup> Jishii Isu chang, “khuchung magunde hasiang yem ramuii shii natheek è yao, getheek shii inai ne wie è rey pha um ro, nyieliieshii, hamang ne shaig ro.” <sup>3</sup> Chiih-è hamiang riang natheek ne yao ruii, “Hi ne haphie phie pha rek muui ro, nyieliieshii, hamang ne shaig nane igiia ro. Natheek è hamang hà riig ne nyathieg mua, jishii natheek ne hi pha ishak pha cheb chiang shii ayao mua ro.” <sup>4</sup> Duchung pha brantheek ne khama pha awie nane Hamangkhung-aphuii shii athieg dang ara! Natheek è gu shii buang ji lia ne bey? Asi! Natheek shii ne Jona ro buang ji ne phijong pha ji bie ro!

Ji-è itheek aishii thoh marui ne dun dun.

### *Pharisitheek nane Sadusitheek pha phiia* (Mrg 8:14-21)

<sup>5</sup> Samoythek khabang è hiia ne kho thrang wuii thog mage shii, itheek ne iweb yie pha blengdun. <sup>6</sup> Isu è itheek shii yao, “gayiig bo” “Pharisitheek nane Sadusitheek phiia pha gidieg è ragia rek bo.”

<sup>7</sup> Itheek awaitheek chung jao ne yao rai, “Ai è hi yao pha ji è, nyieliieshii getheek è iweb bia ne ayie pha ji ara ro.”

<sup>8</sup> Isu itheek nyie yao pha ji thieg, jiè ai è itheek shii sai, natheek ne iweb ayie pha chiang è nyie rek ne yao rai phlei? Natheek shii migi lujia um ro! <sup>9</sup> Natheek ne thuh de agao bey, gu è iweb guui phed ne itham guui brantheek shii chie noh pha ji ne natheek anow bey? Natheek è sirid khama iweb chab phlei? <sup>10</sup> Chiih-è, itham wi shii phi ne chie yi pha iweb miley jine nyie lei? Natheek è srid khama chab phlei? <sup>11</sup> Ji ne gu ne iweb chiang ne ayao rone natheek ne khi è agao lei? Pharisitheek nane Sadusitheek pha phiia è nawaitheek shii ragia rek bo.

<sup>12</sup> Chiihphado samoythek è gao ai ne itheek iweb shii phiia lua pha chiang awaitheek shii ragia rek bo ne phriie pha asi jimagunde Pharisitheek nane Sadusitheek pha muyua ji è ro.

### *Phithar è Isu shii yaothiak* (Mrg 8:27-30; Lug 9:18-21)

<sup>13</sup> Isu ne Khaisaria Philipi pha inui soh hà wuii dun, thiichiih shii Isu è awai samoythek shii sai, “Brantheek è Bran Dufuii shii hanyie rone è yao lei?”

<sup>14</sup> “Giak è ne Jon khowo rone yao,” natheek è chang, giaktheek è Elija rone è yao, “giak è Jerimia nane gai chaig rone yao ro.”

<sup>15</sup> “Nathek khi è now lei? Ai ithek shii sai. Nathek gushii hanyie ro è yao phlei?”

<sup>16</sup> Simon Phithar è chang, “Na ne Masi ro, chiih-è isieng Hamangkhung-aphuii pha Dufuii ro.”

<sup>17</sup> “Nashii ne wie ro, Jon pha dufuii Simon!” Isu è chang, Hì pha izai ne bran è thog pha asi ro, jimagunde hì ne na shii guro hamangkhung pha Aphuii è miang phi ro.

<sup>18</sup> Ji è gu ne na shii yao, Phithar: na ne lubao ro, chiih-è hì pha lubao phing shii gu ne gui ro charch rung ruii phro, chiih-è iy pha ji shii ayang mua phro. <sup>19</sup> Gune nathek shii hamangkhung pha Sajathua pha ziuwad phi ne ruii phro; “Na è sohnyiak shii nyie lem pha ji è hamangkhung hà de lem ruii phro, chiih-è, na è sohkhang shii nyie rek yi pha ji è hamangkhung hà de phi ne rek yi phro.”

<sup>20</sup> “Ai è awai samoythek shii ai ne Masi rone hanyie shii de ayao rabo è gak marui.”

*Isu è awaishii diigchiao ne awai iy pha miyao ji yao*

*(Mrg 8:13—9:1; Lug 9:22-27)*

<sup>21</sup> Jipha ishak è ne Isu ne awai samoythek shii hong ne yao phi, “Gu ne Jerusalem hà wuii chid phro, thiisa hà wuii srane dukthothek boh phabithek, Iphey yua pho masdothek, wad re-è bajo diigchiao mua ruii phro. Gu shii ua muui phro, jimagunde gune da-um shii idoh hòi ruii phro.”

<sup>22</sup> Phithar è Isu shii thekhlei hà noh srane giung. Phithar è yao, “Ithong wo! Na shii ne hì è rek pha ji ne Hamangkhung-aphuii è khuchung de arey yi phro.”

<sup>23</sup> Isu è shan srane riig ne Phithar shii yao, “Sakhathong! Gu moe è ruang dun dun bo! Na ne gu lumuii shii gak pha rek ramuii ro, nyieliieshii, na miyao hithek ne Hamangkhung-aphuii è thog ruii pha asi ro, hì ne bran munow ne yao ro.”

<sup>24</sup> Chiih-è, Isu è awai samoythek shii yao din, “Hanyie è gu rog lua pha now arone, ai ne awaishii bia chid phro,” chiih-è, awairo bai ji han ne idoh lua chid phro. <sup>25</sup> Nyieliieshii, hanyie awai chai shii ragia rek pha now arone, ji pha chai ne san dun phro. Jishii, hanyie chai ne gu Chiang è san yi arone, aishii mua ruii phro. <sup>26</sup> Bran hanyie zab sohjambling mua srane awai chai san muui pha ji è aishii nyie magunde phua pha um bey? Ai ne nyie de amua phro, san dun pha chai ji mua din pha nathek shii nyie phi pha de oi ro. <sup>27</sup> Nyieliieshii, Bran Dufuii ne awai Aphuii pha biisiie shii hamangkhlie rog shii wuii ruii phro, chiih-è ai zab shii ithek blia ji duine lasen phi ruii phro. <sup>28</sup> “Gu è nathek shii izai yao dang phro, ichiih um pha giak branthek ne Bran Dufuii ji saja duine wuii din ruii pha adoh sapho shii ne a-iy phro.”

## 17

*Isu ne laidun*

*(Mrg 9:2-13; Lug 9:28-36)*

<sup>1</sup> Dariig pha idoh Isu è Phithar nane khuiinotek nyi Jems nane Jon de noh srane phiung giu jia hà wuii dun, thiisa hà ne awaithek ji bie ro <sup>2</sup> ithek è riig dang phiichiih shii Isu ne laidun: Ai mizia ne hasiang duine khliengchuang

pha doh ruii. Chiih-è, airo yung ne khijen imo ne wud dun. <sup>3</sup> Chiihphado ji pha samoy uom è Moses nane Elija ne Isu rog mulo pha doh. <sup>4</sup> Phithar è ji doh ne Isu shii yao, “Ithong wo! Gathek ne ichiih um iang pha ji ne bajo wie ara! Na è yang arone, gu ne ichiih shii haliig uom rab phi; jia ne na ro; jia ne Moses ro, jia ne Elija ro.”

<sup>5</sup> Ai è yao ramuii shii khliengchuang pha sakhamiing è ithek shii thab ne jiangdun, chiih-è ji pha sakhamiing è goh jia è yao ruii, “Hi ne guro bushun pha Dufuii ro, aishii ne gu bajo sang muui ro, ai miyao yoi bo!”

<sup>6</sup> Samoythek è ji è goh yoi mage shii, ithek ne bajo rum dun ne awaithek miziathek ne nyiak hà jiangdun. <sup>7</sup> Isu è ithek moe shii dun thog srane awai wad è khoh, “Arum chid rabo, jai sha mage bo.” <sup>8</sup> Ji-è, ithek è hù ne riig shii thiichiih shii hanyie de oi pha Isu awai jijia um bie.

<sup>9</sup> Ithek phiing ji è thazam dun thog shii, Isu è samoythek shii gak ne yao, “Nathek è nyie doh pha ji ne Bran Dufuii iy ne dinne ahòì sapho shii ne hanyie shii de ayao bì rabo.”

<sup>10</sup> Chiihphado samoythek è Isu shii sai, “Nyierék ne Iphey yua pha masdothek è Elija ne igobi wuii ruii phro è yao phlei?”

<sup>11</sup> Isu è ithek shii chang, “Ji ne izai chak ro, Elija ne ibi wuii ruii ro, ai ne zab khriig saro iang phro. <sup>12</sup> Jishii gu ne nathek shii yao Elija ne wuii thog jong ro, branthek è aishii athieg phi ro, aishii ne nathek è khi è yang pha ji rek phi ro. Aishii duiine Bran Dufuii shii de buii rek ruii phro.”

<sup>13</sup> Chiihphado samoythek de ji pha miyao ne Jon Khowo pha Chiang è yao ramuii rone gao dun.

*Isu è ibuii um pha bufuii jia shii gangphi  
(Mrg 9:14-29; Lug 9:37-43)*

<sup>14</sup> Ithek è bran ibrog um pha ji shii thog din shii, bran jia è Isu shii wuii srane lagiungniing, <sup>15</sup> ne yao, “Masdo! Gu dufuii shii bushun now phi bo! Aishii ne siug pha miiriie um ro. Jipha miiriie è bajo sam srane aishii bai kho hà blebbleb chiih yi ro. <sup>16</sup> Gu è na samoythek shii noh ne wuii shii, ithek è aishii gang arek mua phi ro.”

<sup>17</sup> Isu è chang, “Nathek ne migi oi pho nane adunmey pha bran ara! Gu ne nathek rog shii khama chia ne rai gieng phlei? Gu ne nathek rog shii khama khan dam? Jipha bufuii ne ichiih gu moe shii noh mage bo!” <sup>18</sup> Isu è ibuii ragung shii giung mage, ibuii ragung de bufuii ji è fuang khiadun. Chiih-è ji pha ishak dang shii bufuii ji de gangdun.

<sup>19</sup> Ji-è, samoythek ne Isu shii ug ne wuii srane sai, “Gathek ne nyie rek ne ibuii ragung ji agieng mua lei?”

<sup>20</sup> Isu è chang, “Hi ne nyieliieshii nathek migi ne acho ba ne ji mirey ro. Gu è nathek shii izai yao dang phro, nathek migi ne danaro pha iriie jia duiine um arone, ithek è phiingduui hi shii thiisa hà dun bo è yao nede ji ne nyadun dun phro. Nathek ne nyie magunde nyarek mua phro!” <sup>21</sup> Jishii hi è rek ne khia mua pha ji è misia nane minyie è rek mua bie phro; gai è ne arek mua phro.

*Isu è awai iy pha ji din ne yao  
(Mrg 9:30-32; Lug 9:43-45)*

<sup>22</sup> Samoythek è zab Galili shii khrab ne dun thog mage shii, Isu è ithek shii yao, “Bran Dufuii shii ne brantheek shii phi pha rek mua phro, <sup>23</sup> ithek è aishii ne ua mua phro; Jishii da-um pha idoh shii ai ne chai hòi ruii phro.”

Samoythek ne bajo zodun.

### *Misiahò Chiang è mijin*

<sup>24</sup> Isu nane airo samoythek Khaphernaum shii wuii thog mage shii, Misiahò pha mijin thanpho è Phithar shii wuii ne sai, “Na ro masdo de Misiahò pha mijin phi chak ne bey?”

<sup>25</sup> Phithar è chang, “Than chak.”

Phithar è hò bucho wuii thog mage shii, Isu è ibi yaodun, “Simon, na ro munow ne nyie ga? Hanyie è soh pha sajathek bliia rek ne chiih-è mijin phi phlei? Soh pho mijin ba asi pha gai sohphothek mijin ba?”

<sup>26</sup> Phithar è chang, “Ji ne gai sohphothek mijin ro.”

Isu è chang, “Wie ro,” Jipha miyaosiu è gethek sohphothek ne athan chid. <sup>27</sup> Jishii, gethek ne hì pha bran shii lijieg yi pha ayang ro. Ji-è khabang shii wuii srane akhiiriie ria mage bo. Naro akhiiriie shii igobi fog ruii pha ù yie ne chiih-è ai sem shii sikhi jia doh ruii ne gu chiang nane na chiang pha Misiahò pha mijin ji cho yi phro. Yie srane gethek ro muthantheek mijin ishak shii phi.

## 18

### *Hanyie ne zab è boh ga?*

*(Mrg 9:33-37; Lug 9:46-48)*

<sup>1</sup> Jipha ishak shii samoythek è Isu shii wuii ne sai, “Hanyie ne hamangkhang pha Sajathua shii boh um ga?”

<sup>2</sup> Ji-è, Isu è ani shii ho, ne ithek ibi shii riu yi, <sup>3</sup> “ne yao,” “Gu ne nathek shii yao nathek ne anphiing duine arey sapho shii ne hamangkhang Sajathua shii akhud mua phro. <sup>4</sup> Hamangkhang pha Sajathua shii zab è boh rey pha ne hanyie è awaishii jum rek ne hì pha ani duine rey yi pha ji ro. <sup>5</sup> Chiih-è, hanyie è gu ibeng è ani jia shii wieho arone, gu shii de wieho ro.

### *Layog shii chuajan*

*(Mrg 9:42-48; Lug 17:1-2)*

<sup>6</sup> “Hanyie magunde, nathek è gu shii migi rek pha ji shii ùjia de san yi, ji pha bran shii ne rathok yua shii phang srane khamuii jam hà zem yi pha ji wie liag phro.” <sup>7</sup> Sohjambling ne bajo diig um phro, nyieliieshii, thiichiih ne brantheek ro migi san pha manathek um ro! Jithek ne idang rey ruii phro—Jishii hanyie chiang è ji rey yi pho shii ne bajo buii rey ruii phro.

<sup>8</sup> Nawaithek wad nane lai è nathek è migi shii san yi arone, jithek ne tham ne fen muui bo! Ji ne wad nyi nane lai nyi um ne idang pha bai hà fen yi pha ji è ne wad lai jia oi pha chai sieng pha ithua hà khud pha ji wie liak phro.

<sup>9</sup> Nawaithek mieg è nawaithek migi shii san noh arone, ji pha mieg ne yog srane fen muui bo. Miege nyi um srane thumuluii pha bai hà fen yi pha ji è ne mieg jia oi pha idang pha chai ithua hà khud pha ji wie liak phro.

### *Shiishai sandun pha najang*

*(Lug 15:3-7)*

<sup>10</sup> Riig bo nathek ne ìuthek shii de snai arek rabo. Gu è nathek shii yao phro, aniphiing pha hamangkhiie ne idang hamangkhang pha Aphuii moe shii rai muiiro. \* <sup>11</sup> Nyieliieshii, Bran Dufuii ne san dun pha jithek shii ragia rek pha wuii.

<sup>12</sup> “Hanyie shii shiishai weing jia um pha bran ne shiishai jia san dun shii nyie rek phi phro inow ga?” Ai ne sadigey è digey jithek shii phiingduii shii saing chie yi pha thoh marui srane san dun pha shiishai jia shii sow pha wuii dun phro. <sup>13</sup> Gu è nathek shii yao dang phro, ai è ji doh mage shii ai ne asan pha shiishai sadige è dige um pha ji è de bajo muna sandun pha jia ji shii sang ba phro. <sup>14</sup> Ji duiine nathek ro †hamangkhang hà Aphuii ne ididuii jia de san yi pha ayang ro.

### *Layog rek pha khuino*

<sup>15</sup> Nathek khuino è na shii gidieg shii layog rek arone, aishii‡ wuii srane ai mirek pha ichiig ji riig yi bo. Jishii ug ne nawaisa chung rek bo. Ai è na shii nuii phi arone, na è na khuino shii yang ne idoh nohge ro. <sup>16</sup> Jishii ai è na shii ayoi arone, na rog shii gai jia nyi noh bo, Ji-è jigigam shii yao pha duiine nyi è muna pha khagi ji è zab ichiig ne ji chak rone rek yi bo. <sup>17</sup> Chiuh-è ai è nathek shii ayoi phi arone, chiihphado zab pha jithek ne charch hà yao nuii bo. Idohhè shii, ai è charch shii ayoi arone, aishii ne migi arek pho nane mijin than pho duiine noh bo.

### *Gak pha nane rek yi pha*

<sup>18</sup> Ji-è, gu ne nathek zab shii yao, “Nathek è sohnyiak shii nyie gak muii pha ji è hamangkhang hà de gak ruii phro, chiih-è, nathek è sohnyiak shii nyie rek yi pha ji è hamangkhang hà de rek yi phro.”

<sup>19</sup> Gu ne nathek shii dinne yao phro: khuchung magunde nasa è sohnyiak shii lubu ò rek srane nyie Chiang shii sia arone, ji ne hamangkhang pha gu Aphuii è nasa shii rek ruii phi phro. <sup>20</sup> “Chiuh-è gu ibeng è bran nyi uom ò khrab pha ji shii ne, gu ne nathek rog um gieng ro.”

### *Khiao shii akhung phi pha najang*

<sup>21</sup> Chiuhphado Phithar Isu shii wuii srane sai, “Ithong wo!” Gu ikhuii è athodang pha gu shii layog rek muii arone, gu ne aishii khama chiieng khung phi chid phiiga? Milechiieng khung phi habey?

<sup>22</sup> Isu è chang, “Miley chiieng duii jia asi pha, jishii samiley chiieng pha mileychiieng§ khungphi chid phro.” <sup>23</sup> Nyieliieshii, hamangkhang pha Sajathua ne hi duiine ro. Luangjia ishak shii saja jia è awai khiaothek muruii pha sasab rek pha phak. <sup>24</sup> Ai è ji sasab reg ne riig shii khiao jia ne bang itham phi pha um. <sup>25</sup> Khiao shii ne ji pha muruii phi mua sbo acho ro, jiè airo muruii ji phi mua yi pha Saja è awaishii, ai yiy, ai anithek chiih-è, aishii nyie um pha jithek rog khiao rek pha chong liu muii bo ne yung. <sup>26</sup> Khiao ji è saja ji pha lai moe shii wuii srane lagiung niing ne yao, “Gu shii ìujia khan bi bo, gu ne nashii zab rang din pha ro.” <sup>27</sup> Saja ji è aishii bushun now ne ai muruiithek ne ayie pha tho muii ne dun ge yi.

\* **18:10** 18:10: Giak jigi shii ne verse 11 chodo Chiuh-è Bran Dufuii ne sandun pho shii ragia rek wuii (riig Lug 19:10). **18:11** 18:11: Lug 19:10 † **18:14** 18:14: Naro; ò jigi um guro. **18:15** 18:15: Lug 17:3 ‡ **18:15** 18:15: Giak jigi shii ne nathek shii Mak arek ro. **18:16** 18:16: Iphy 19:15

**18:18** 18:18: Mth 16:19; Jon 20:23 **18:21** 18:21,22: Lug 17:3,4 **18:22** 18:22: Igo 4:24 § **18:22** 18:22: Samiley ishak miley; dinne samiley è miley ishak.

<sup>28</sup> Chiihphado è ji pha bran de awai khiao ijiak hanyie shii bang mua pha um pha ji shii lia pha wuii dun. Ai è awai ijak ji shii zum srane bang chiie dun pha ji phi bone khang. Ai è yao, “Na è gu bang chiie dun pha ji jog phi mage bo!” <sup>29</sup> Ijak khiao ji è aishii khung ne yao, “Gu rog shii jum rek bo! Gu è nashii bang ji zab rang din phro!” <sup>30</sup> Jishii ai è anuii, ji pha Chiang shii, airo muruii idoh aphi sapho shii ne aishii ne phat heg hà chabmuui. <sup>31</sup> Ji è rek pha ji ne gai khiaothek è doh mage ne bajo zo ne wuii srane saja ji shii zab yao phi. <sup>32</sup> Jipha saja è khiao ji shii ho srane giung, “Adunmey pha khiao! Na è gu shii khung ne lia pha ji è gu ne guro zab bang ji ne ayie pha thojong. <sup>33</sup> Gu è khi-èrek ne nashii bushun rek pha duiine na de nawai khiao ijakthek shii bushun rek chid phro. <sup>34</sup> Ji-è, ji pha saja ne bajo lijeg dun, ai muruii ji aphi sapho shii ne lago phi pha phat heg hà chab muui.”

<sup>35</sup> Isu è yao ched, “Ji duiine ithek è nawaithek khiuino shii lubu akhung phi arone Hamangkhang hà um pha gu Aphuii de, ji duiine ithek shii khiuino ruii phro.”

## 19

### *Isu è yiygey che pha Chiang shii yua (Mrg 10:1-12)*

<sup>1</sup> Isu è ji nyayao ched dang shii, ai Galili thoh marui ne Juda pha sothug, Jordan khabang thrang hà wuii dun. <sup>2</sup> Bran ibrogthek idoh luagieng, Isu è thiichihih shii brantheke shii gang phi.

<sup>3</sup> Giak Pharisitheke ne Isu moe shii wuii thog srane aishii musai sai ne ibong shii phang yi pha bidiang, “Gey è awai lum ne ichiig phi srane awai yiy shii che muui pha ji ne Iphey shii rek yi ne bey?” <sup>4</sup> Isu è chang, “Jao pha ji è Rabpho è bran shii bufuii bimi rab phrone yao pha jigigam ji atham ba bey?” <sup>5</sup> Chiih-è Hamangkhang-aphuii è yao, “Hi pha Chiang è bufuii ne awai aphuii amuii thoh marui ne awai yiy rog shii dog dun phro, chiih-è isa ne ò rey dun phro. <sup>6</sup> Ji-è, ithek ne nyi asi pha jia ro. Ji-è, bran ne Hamangkhang-aphuii è dog phi pha ji ache rabo.” <sup>7</sup> Pharisitheke è aishii sai, “chiihphado, Moses pha Iphey shii gey è che pha siog zey ne awai yiy shii che muui bo è nyie rek ne yao phlei?”

<sup>8</sup> Isu è chang, “Moses è nawaithek yiy shii che pha yung pha ji ne nyieliieshii nathek shii yua pha ne bajo diig ro, Jishii, rab pha ishak shii ne ji duiine asi ro. <sup>9</sup> Gu ne nathek shii izai yao dang phro, chiihphado, bran è awai yiy shii siulao arek pha gai Chiang è che muui arone, ai è gai bimi yiy din magunde, ji pha gey ne siulao rey dun phro.”

<sup>10</sup> Ai samoythek è aishii yao, “Gey nane yiy duchoi pha miyao ne hi arone, ayiy-agey chid pha ji wie liag ba phro.”

<sup>11</sup> Isu è chang, “Hi pha muyua ne zab shii adunmey phro. Jishii Hamangkhang-aphuii è hanyie shii phi jipho ro bie phro. <sup>12</sup> Brantheke ne ayiy-agey rai pha miyao ne bajo yoyo Chiang um dun ro, giak ne ayiy-agey pha giakdun; chiih-è giak ne brantheke è de rab yi, giak ne hamangkhang pha Sajathua pha Chiang è ayiy-agey rai ro. Hi pha muyua ne hanyie è nuii pho ne ji rek yi bo.”

### *Isu è aniphiing shii khirzey phi (Mrg 10:13-16; Lug 18:15-17)*

<sup>13</sup> Giak bran è aniphiing shii wad khoh ne sia yi pha Isu shii noh ne wuii thog, Jishii, samoythek è ji pha brantheek shii giung. <sup>14</sup> Isu è yao, “Aniphiing shii agak pha gu hà wuii yi bo, nyieliieshii, hamangkhung pha Sajathua ne hìtek duine rekpho ro ro.” <sup>15</sup> Ai è ithek lakhung shii wadthek ruii srane dundun.

*Bukho filiao bran*  
(*Mrg 10:17-31; Lug 18:18-30*)

<sup>16</sup> Luang jia shii, bran jia Isu shii wuii, “Masdo,” Ai è sai, “Gu ne idang pha chai mua pha nyie wie blia rek chid phlei?” <sup>17</sup> “Na ne nyie yi wie rone sai phlei?” Isu è chang. Thiichihih shii nyie wie ne jia bie ro. Idang pha chai shii khud pha yang arone muyungthek nuii bo.

<sup>18</sup> Ai è sai, “Nyie muyungthek lei?”

Isu è chang, “Sgoh arek rabo, siulao arek rabo, mugo agow rabo, chiih-è khlam anin rabo, <sup>19</sup> chiih-è, nawai aphuii amuii shii ilab rek bo, nawai hadung-haluii shii nawai shii duine bushun rek bo.”

<sup>20</sup> Filiao ji è chang, “Gu ne ji pha zab muyungthek nuiijong ro. Gu ne gai ne nyie rek chid ba pha um ga?”

<sup>21</sup> Isu è aishii yao din, “Na ne nawai shii isiie bajowie rek pha yang arone, dun srane nawai shii um pha ji chong rek srane bang jithek yi dushothek shii phi muui bo, chiih-è nane hamangkhung hà bajo bukho rey ruii phro; chiihphado thawuii ne gu idoh luagieng bo.”

<sup>22</sup> Filiao è ji yoi mage shii, zo ne dundun, nyieliieshii ai ne bajo bukho ro. <sup>23</sup> Chiihphado Isu è awai samoythek shii yao, “Gu ne nathek shii yao: bukho brantheek ne hamangkhung pha Sajathua hà khud pha ji shii ne bajo diig ro. <sup>24</sup> Gu è dinne yao, ùd è simen cho shii khud pha ji shii ne bukho bran è Hamangkhung-aphuii pha Sajathua shii khud pha ji muna diig ba ro.”

<sup>25</sup> Samoythek è ji yoi mage shii, zab wieng dun. Chiihphado hanyie ne ragia rey mua phlei? Itek è sai.

<sup>26</sup> Isu è ithek shii miang riig srane yao, “Hi ne bran è arek mua phro, jimagunde Hamangkhung-aphuii ne zab rek mua phro.”

<sup>27</sup> Chiihphado Phithar è yao mage, “Riig bo,” Ai è yao, “gathek ne zab thoh muui ne na idoh luagieng. Gathek shii ne nyie mua ruii phlei?”

<sup>28</sup> Isu è ithek shii yao, “Gu ne nathek shii izai yao Bran Dufuii ji è ishak iwo shii saja biang hà dug mage shii, Israel pha iiriing snanyi shii bohkhoh pha guro samoythek snanyi ithek ne bukho biang shii dug ruii phro.” <sup>29</sup> Chiih-è, hanyie è awai khuiinothek, bumuiithek, aphuii, amuii nane anithek, raigthek gu Chiang è thoh muui pho ne wieng chiieng mua ruii phro, chiih-è, idang pha chai phi ruii phro. <sup>30</sup> Jishii, thuh bajo hanyie thek ne ibi um pho ne idoh rey ruii phro, chiih-è, bajo hanyie thek thuh shii idoh um pho ne ibi rey ruii phro.

## 20

*Angur raig shii bliapho*

<sup>1</sup> Hamangkhung pha Sajathua ne hì duine ro, luangjia shii bran jia è hamiang riang ai raig shii blia rek pha nung pha wuii dun. <sup>2</sup> Ai è ithek shii idang inai jia shii riinang ne liiman sikhi jia phi pha nuii, chiih-è ithek shii

**19:18** 19:18: Mul 20:13; Iphy 5:17; Mul 20:14; Iphy 5:18; Mul 20:15; Iphy 5:19; Mul 20:16; Iphy 5:20

**19:19** 19:19: Mul 20:12; Iphy 5:16; Lew 19:18 **19:28** 19:28: Mth 25:31; Lug 22:30 **19:30** 19:30:

Mth 20:16; Lug 13:30

ai raig hà blia rek pha thoh ge. <sup>3</sup> Ai è hamiang dige rey pha ishak shii bajarai ithua hà wuii dun, chiuh-è bran giak ne nyie blia arek pha riu pha doh. <sup>4</sup> Ji-è, ai ne ithek shii yao, “Nathek ne wuii srane raig rek bo, chiuh-è gu ne nathek shii riinang wie phi pha ro.” <sup>5</sup> Ji-è, ithek wuii dun. Chiuhphado snanyi ishak shii nane dinne uom ishak shii ai è ji duiine rek. <sup>6</sup> Guii ishak nyarey sha pha rey mage shii ai ne bajarai ithua hà wuii dun, chiuh-è thiichii shii giak brantheke ne blia oi pha riu ne rai bamuii pha doh. Ai è ithek shii de yao, nathek ne ichiuh shii zab inai ne thaluu nyie rek pha rai phlei? <sup>7</sup> Asi, gathek shii ne hanyie è de riinang hà anoh phi ro. Ai è ithek shii yao, “Wie, nathek de raig hà wuii srane raig rek bo.” Ai è ithek shii yao.

<sup>8</sup> “Habjuang rey mage shii, raig muspho è awai khoboi shii yao, ‘iidohhè è nung pha brapho è yie dang ne igobi è brapho pha bliapho shii ho ne riinang phi mage bo.’” <sup>9</sup> Hanyie è ishak guii è rek phothek shii liiman sikhi jia phi. <sup>10</sup> Ji-è, igobi brapho shii phi shapha thog mage shii ithek ne ji è huak pha phi ruii phrone now habuii shii ithek shii de liiman sikhi jia jia phi bie. <sup>11</sup> Itheke è awaithek bang yie srane mushiyluwoi ne gidieg yao ne raig muspho shii wuii ne sai. <sup>12</sup> Hithek pha bran ne hanyie iidohhè brapho ne ishak jia thog pha rek bie ro, ithek è yao gathek ne inai biak dang pha hasiang è de shud ne raig rek—thuh na ne gathek shii phi pha duiine ithek shii de o phi ro! <sup>13</sup> Yoi bo, Ijaktheke, muspho è ithek è jia shii yao, “Gu ne nathek shii akhinrin ro! Nathek zab shii inai jia pha riinang ne liiman sikhi jia phi pha yao phro. <sup>14</sup> Nawaithek ro riinang ji yie ne hò dun bo. Gu ne iidohhè brapho shii de nathek shii khama phi pha ji phi pha yang muui ro. <sup>15</sup> Gu ne gui bang ji shii gui è nyie rek yang pha ji rek pha ne rangsua asi bey? Din ne gu è zab shii o rek pha ji è nathek ne miegriie rek ne bey?”

<sup>16</sup> Isu è yao ched, “Hanyiethek ne idoh um pho ne ibi rey dun phro, chiuh-è, hanyiethek ne ibi um pho ne idoh rey ruii phro.”

*Isu è awai iy pha chiang uom chiieng yao*  
(Mrg 10:32-34; Lug 18:31-34)

<sup>17</sup> Isu è Jerusalem wuiiramuii shii, ithek wuiiramuii shii ai è awai samoy snanyi shii thekhei pha ithua hà noh srane ug ne yao. <sup>18</sup> “Yoi bo! Ai è ithek shii yao, gethek ne Jerusalem hà wuiiramuii ro, thiisa hà ne Bran Dufuii shii boh phabithek nane Iphhey yua pha masdothek shii phi muui phro. Itheke è aishii ua muui pha nin muui phro, <sup>19</sup> Chiuh-è, gai brantheke wad shii phi muui phro, hanyie è aishii ne makhakriing ne aishii zuang ne bai hà zun ne ua muui phro; jimagunde ai ne da-uom shii idoh hòi ne chai shii sieng ruii phro.”

*Amuii jia è khung*  
(Mrg 10:35-45)

<sup>20</sup> Chiuhphado Zebedi ai yiy de awai dufuii nyi rog Isu shii wuii srane bam, chiuh-è haro rek phi bone aishii lia ro.

<sup>21</sup> Isu è aishii sai, “Na ne nyie chiid muui ga?”

Ai è chang, “Na ne guro dufuii nyi hì shii ne na è saja rey mage shii na phazoi nane na phawig shii dug yi pha rone sbang rek bo.”

<sup>22</sup> Na ne nawai è nyie lia pha ji ne athieg pha lia ara, Isu è dufuiitheke shii chang. Nathek de gu è diig gog niing ruii pha ji nyaniing mua ne bey?

Niing mua, ithek è chang.



<sup>23</sup> Isu è ithek shii yao, “Zai nathek de guro gog duhug ji ne nyaniing mua phro,” “Jimagunde gu ne nasa shii guro phazoi nane phawig shii dug yi pha ji ne rangsua oi ro. Hì pha ithua ne guro Aphuii è hanyie shii saro phi jithek ro ro.”

<sup>24</sup> Gai samoythek sua è ji pha Chiang yoi mage shii, ithek ne khuiino nyi shii lijieg dun.

<sup>25</sup> Ji-è, Isu ne ithek shii ò ho srane yao, “Gai Bran pha bohkhoh phothek ne ithek shii blu rek ruii phro, chiih-è, dumuiithek shii Sajathuathek um ruii phro. <sup>26</sup> Chiih, ithek chung ne hì duine rek pha ji ne adunmey phro. Nathek hanyie è boh rek pha yang arone, ai ne gai khiao rek bi chid phro; <sup>27</sup> Chiih-è, nathek hanyie è ibi rey yi pha yang arone, ai ne khiao rek bi chid phro, <sup>28</sup> Bran Dufuii ne aishii blia rek yi pha awuii ro, jishii bajo branthek shii blia rek ne awai chai phi srane phek wuii phro.”

*Isu è miegthi pha bran nyi shii gangphi*  
(Mrg 10:46-52; Lug 18:35-43)

<sup>29</sup> Isu nane samoythek è Jerikho thoh ne dun ramuii shii bran ibrog de ithek idoh shii luagieng. <sup>30</sup> Miegthi pha bran nyi ne lumuii shii dug ne yoi shii Isu ne thiichihih shii dong ne luaramuii pha yoi mage ne ithek jao ne ziak, “Dawid Saja pha Dufuii wo! Gasa shii bushun rek phi bo!” Masdo!

<sup>31</sup> Ibrog è ithek shii aro yi pha giung, jimagunde ithek ne lamuna gang ziak, “Dawid Saja pha Dufuii wo! Masdo! Gasa shii bushun now phi bo!”

<sup>32</sup> Isu è thiichihih thung srane isa shii ho. “Gu è nasa shii nyie rek phi bone yang ga?” Ai è isa shii sai.

<sup>33</sup> Isa è chang, “Masdo! Gasa ne gasa mieg ji doh din yi pha rek phi bo yang ro!”

<sup>34</sup> Isu è isa shii bushun rek srane isa mieg shii khoh phi; khthiie isa ne doh mua dun, chiih-è isa de ai idoh luagieng.

## 21

*Jerusalem hà branthek bajo sang ne Isu shii ho*  
(Mrg 11:1-11; Lug 19:28-40; Jon 12:12-19)

<sup>1</sup> Isu nane ai samoythek ne Jerusalem moe shii wuii thog, ithek ne Bethphach ithua Sumarothek Phiing shii wuii thog. Thiichihih shii Isu è awai samoy nyi shii hì pha miyao rog <sup>2</sup> shii ibi hà thoh ge: Ithek è ibi hà um pha thiig hà wuii dun bo: “Chiih-è thiisa hà nasa è awai iduii rog phiing ne ruii iang pha bambao doh ruii phro. Ji sey srane gu hà noh ruii bo. <sup>3</sup> Chiih-è hanyie è nyie yao ruii arone, aishii yao bo, ‘Masdo è chiid \* muoi ro’; chiih-è chiiphado ai è nasa shii bambao jithek jog phi ne thoh ge phro.”

<sup>4</sup> Hì thek rey ruii pha ne chaig miyao ji izaì rey yi phro:

<sup>5</sup> “Jion rajan shii yao bo,

Riig bo, nathek saja ne nathek shii wuiiramuii ro!

Ai ne bajo jum rek ne bambao lakhung shii in ne wuiiramuii chiih-è bambao duui pha bambao lakhung shii ro.”

<sup>6</sup> Ji-è, samoy de wuii dun, chiih-è, Isu è ithek shii khi-èrek bo è yao pha ji rek. <sup>7</sup> Ithek è bambao nane bambao duui ji noh thog ruii. Ithek è awaithek yungthek gophi, Isu de ji pha lakhung shii in dun. <sup>8</sup> Boh bran ibrogthek è ai lumuii shii awaithek yung wiao phi, giak è hingmuii irab che ne wiao phi.

<sup>9</sup> Bran ibrog ne Isu ro ibi idoh shii luagieng, chiih-è, Isu idoh shii lua pho è jao ne ziak, “Dawid Saja pha Dufuui shii chiong bo! Hanyie yi Ithong ibeng è wuii pha ji shii ne Hamangkhang-aphuui è khirzey phi ro! Hamangkhang-aphuui shii chiong bo!”

<sup>10</sup> Isu è Jerusalem shii khud mage shii, ji pha rajan shii bajo pho ne sam diig ne sai. “Ai ne hanyie ga?” Brantheek è sai.

<sup>11</sup> “Hi ne Galili pha Nazareth chaig Isu ji ro!” Bran ibrog è chang.

*Isu è Misiahò hà wuii dun*

*(Mrg 11:15-19; Lug 19:45-48; Jon 2:13-22)*

<sup>12</sup> Isu ne Misiahò hà wuii srane hanyie thek è thiichiih shii chongjai rekpho shii fuang gieng muui. Ai è bang gieng pha thiibliethek nane pharo chong rek pha murothek reng ne fen maphi. <sup>13</sup> Chiih-è ithek shii yao, “Hamangkhang-aphuui è yao pha jigigam shii zey ne um ro, ‘guro Misiahò ne misiasia pha hò ro.’ Jishii ithek è mugo pho ug pha ithua rab muui ro!”

<sup>14</sup> Miegthi pho nane laikhi-èg pho è Misiahò hà ai moe shii wuii thog ruii. Ai è ithek shii gang phi. <sup>15</sup> Boh phabithek nane Iphey yua pha masdothek ne ai è wiengphleg pha bliathek nane aniphiing è Misiahò shii Dawid Saja Dufuui boh rone è yao ramuii pha ji doh ne bajo lijieg dun. <sup>16</sup> Ji-è, ithek ne Isu shii sai, “Na de ithek è nyie yao ramuii pha ji yoi chak bey?”

Isu è chang, “Gu de yoi chak ro.” “Nathek ne hi pha jigigam ji atham riig bey? Nathek ne aniphiing nane aniphiing shii wie è chiong pha yua jong.”

<sup>17</sup> Isu è ithek shii thoh marui ne Bethany rajan hà wuii thog ne ji pha habiu thiichiih men marui.

*Isu è iphemhingmuui shii thamiie*

*(Mrg 11:12-14,20-24)*

<sup>18</sup> Jipha thimiang riang duiine shii Isu è rajan hà wuiiramuii shii, Isu ne chi-iy ruii. <sup>19</sup> Ai è iphem hingmuui jia lumuii moe shii um pha doh ne ji pha iphem hingmuui shii wuii dun, jimagunde ji shii nyie de oi pha irabthek um bie iang, ji-è, ai ne hingmuui ji shii yao, “Na ne khuchung de iwoi awoi sha phro!” Ji è yaodang pha ji shii ji pha iphem hingmuui ne gow dun.

<sup>20</sup> Samoythek è ji doh mage ne zab wiengphleg dun. Ithek è sai, “Khi è rek ne ji pha iphem hingmuui ne ribjia gow dun phlei?”

<sup>21</sup> Isu è chang, “Gu ne nathek yao, nathek ne migi now ne iujia de athan arone, nathek de gu è hi pha iphem hingmuui shii rek pha duiine nyarek mua phro. Hi jia asi pha yi nathek ne hi pha phiing shii nyayao mua.” “Hùg ne khamuii hà chiih dun bo è yao ne de ji nyarey dun. <sup>22</sup> Nathek è migi now arone, nawaithek è sia ne nyie lia pha ji phi ruii phro.”

*Isu shii riichai um pha Chiang è musai*

*(Mrg 11:27-33; Lug 20:1-8)*

<sup>23</sup> Isu idoh Misiahò shii thog srane jao ne yao; chiih-è ai è yua pha duiine, boh phabithek nane dukthothek aishii wuii srane sai, “Na shii nyie rangsua um ne hithek rek phlei? Na shii ne hithek rek pha rangsua ne hanyie è phi lei?”

<sup>24</sup> Isu è ithek shii chang, “Gu de nathek shii musai jia sai phro, nathek è gu musai ji chang phi arone, Gu de nathek shii hithek rek pha rangsua ne khi è mua pha ji yao phi phro. <sup>25</sup> Jon è khowo phi pha rangsua ne khi è thog

phlei? Ji ne Hamangkhung-aphuii re-è phi nebey asi pha yi tharothamang re-è phi ne bey?”

Ithek ne awaithek chung jao ne khiinaing rai, gethek ne khi è yao sha pha lei? Gethek è Hamangkhung-aphuii re-è phi rone chang arone, ai ne gethek shii yao ruii phro, “Ji arone, nathek ne Jon shii nyie rek ne migi anow ga? <sup>26</sup> Jimagunde, gethek ne tharothamang re-è phi rone yao arone, branthek è gethek shii nyie rek pha ji rum muui ro, nyieliieshii, branthek ne Jon ne chaig rone thieg noh dun ro.” <sup>27</sup> Ji-è, ithek è Isu shii chang, “Gathek ne athieg ro!”

Chiih-è ai de ithek shii yao, “Gu de nathek shii hithek rek pha rangsua khi-è mua pha ji ayao phi.”

### *Dufuii nyi pha najang*

<sup>28</sup> Thuh, shii nathek ne nyie now ga? Luangjia shii bran jia shii dufuii nyi um. Aphuii è Dufuii chai shii wuii srane yao, gu Dufuii! Sudoh inai na raig hà wuii srane blii rek mage bo. <sup>29</sup> Dufuii chai ji è chang, “Gu ne arek yang ro! Jishii, idoh awai lubu lai ne raig rek pha wuii dun. <sup>30</sup> Chiihphado, aphuii ji-è, dufuii jia shii wuii srane ji è rek ne yao, dufuii jiè chang, ‘Oh, Masdo’ rone chang jishii ai ne raig rek pha awuii. <sup>31</sup> Isa nyi hanyie è awai aphuii è yang pha ji rek phi lei?”

Ithek è chang, “Dufuii chai,” ji è rek phi ro.

Ji-è, Isu ithek shii yao, gu ne nathek shii yao: mijin thanpho nane siulao rek pho ne Hamangkhung-aphuii pha Sajathua shii nathek ibi dun ruii phro. <sup>32</sup> Jon khowo phi pha ji è nathek shii lumuii izai ji yao habuii shii nathek è aishii migi anow phi; Jishii, mijin thanphothek nane siulao pho è aishii migi now dun. Nathek hi doh pha rangde nawaithek khani lai ne aishii migi anow ro.

### *Raig shii khanpho pha najang* (*Mrg 12:1-12; Lug 20:9-19*)

<sup>33</sup> Isu è yao, “Gai najang de nuui mage bo.” Luangjia shii sohmuspho è awai raig shii angurgmuithek hai ne muthua gun srane angur phuii rey yi pha angur chui pha icho jia jog, chiih-è, ji khan pha hallig jia rung. Chiih-è, ai è raig rekpho shii chei marui ne thoh ne awai lumuii hà luadun.

<sup>34</sup> Angur ji khrab pha ishak thog ruii shii, ai è awai khiaothekek shii raigkhan pho shii awai Chiang yie pha thoh ge. <sup>35</sup> Yamiing khanpho è ai khiaothekek shii zum srane giak shii ne zuang muui, jia shii ua muui, jia shii lubao chao maphi. <sup>36</sup> Jipha idoh è bran è gai khiaothekek ibi è de bajo khiao shii thoh ge, jithek shii de raig khan pho è ibi pho thek duiine rek phi. <sup>37</sup> Idohhè awai dufuii shii ithek hà thoh ge. Ai è yao, Zai ithek ne guro dufuii shii ne ilab rek. <sup>38</sup> Jishii, raig cheipho è dufuii shii doh mage shii, ithek ne awaithek chung yao rai, hi ne muspho ro dufuii ji ro. Thawuii bo, cho gethek ne aishii ua muui haro, chiih-è airo nuruii ne gethek mua ruii phro! <sup>39</sup> Ji-è, ithek ne aishii zum srane raig ji è fuang fen muui ne chiih-è ua maphi.

<sup>40</sup> Isu è ithek shii sai, “Jipha raig muspho thog ruii shii, ji pha muspho è jithek pha raig cheipho shii nyie rek ruii phlei?”

<sup>41</sup> Ithek è Isu shii chang, “Jipha muspho è ithek shii ua mua ne ji pha angur raig ne fuang pha raigkhanpho shii phi muui phro, ji ne ishak thog shii gui mathang khriig phi pha gai raigkhan pho so ne khan yi phro.”

<sup>42</sup> Isu è ithek shii yao, Nathek ne jigigam shii nyie yao pha ji atham bey?

Rungpho è lubao shii Adunmey rone snai muui pha ji ne  
zab è de bajo miigak lubao rey dun ro.

Hì ne Ithong è rek phi ro;

Hì ne khama khie doh pha blia ro!

<sup>43</sup> Isu è yao din, “Ji-è, gune nathek shii yao phro,” “Hamangkhung-aphuii ro Sajathua ne nathek è riao srane hanyie bran è iwoithek wie woi pha ji shii phi muui phro.”†

<sup>44</sup> Hanyie è ji pha lubao lakhung shii chiih arone, ji pha lubao è aishii ne dum dum khiia thiak dun phro; chiih-è, hanyie lakhung shii ji pha lubao chiih ruui nede, ji pha bran ne lubao ji è doh ne nyiak phlab rey dun phro.

<sup>45</sup> Boh phabithek nane Pharisithek ne Isu è najangthek yao pha ji ne ithek Chiang yao phrone thieg dun. <sup>46</sup> Ji-è, ithek ne Isu shii zum pha rek, Jishii, Isu ne chaig rone now pha bran ibrog um pha ji shii rum dun.

## 22

### *Phiyiy michie pha najang*

*(Lug 14:15-24)*

<sup>1</sup> Isu è dinne najangthek è brantheke shii yao. <sup>2</sup> Hamangkhung pha Sajathua ne hì duine ro: Luang jia shii, saja jia è awuii dufuii pha phiyiy michie saro phi. <sup>3</sup> Ai è awai khiaothek shii phiyiy hà wuii yi pha biwenthek ho pha thoh ge, jimagunde ithek ne awuii yang phi. <sup>4</sup> Ji-è, ai è gai khiaothek shii hì pha mua rog biwenthek hà thoh ge: Thuh shii gu michie ne ideb sha ro; Guro rawoithek nane igong um pha suwuiiduiithek ua jong muui ro, chiih-è zab ne ideb sha ro. Phiyiy pha michie shii wuii mage bo! <sup>5</sup> Jishii, ho pha biwenthek ne ji anuii pha awaithek pha chongjai hà wuii dun; jia yi awai raig hà wuii marui, gai jia è awai chongjai hà wuii marui, <sup>6</sup> giak è ai khiao shii zum srane zuang ne ua muui. <sup>7</sup> Jipha saja ne bajo lijieg dun, ji-è, ai ne awai siphahithek thoh ne hanyiethek è rek jipho shii ua ne ithek rajantheke de zab ziao muui. <sup>8</sup> Chiihphado, ai è awai khiaothek shii ho srane ithek shii yao, guro phiyiy michie ne ideb sha ro, jishii gu è ho pha bran ji shii phi mua sapho asi ro; <sup>9</sup> thuh shii boh lumuiithek hà wuii ne khama pha bran ithek è doh pha ji shii ho mage. <sup>10</sup> Ji-è, khiaothek è fuang wuii srane lumuiithek hà khama pha bran doh muui pha ji, wie awie miapho shii khrab ne, chiih-è, phiyiy hò shii bran è zab ley ched dun.

<sup>11</sup> Saja ji è bucho awuii ne biwenthek ji shii riig ne, chiih-è ai ne bran jia ne phiyiy yungthek aguii pha doh ro. <sup>12</sup> Saja ji è sai, “Gu ijak wo! Na ne phiyiy yung aguii pha ichiih shii nyie rek ne wuii phlei?” Jishii bran ji è nyie de ayao phi. <sup>13</sup> Chiihphado Saja ji è awai khiaothek shii yao, “Aishii ne lai nane wad joi mua bo, chiih-è fuang pha igiia hà fen muui bo. Thiisa hà ai ne choh ne shinyin khriieg ruui phro.”

<sup>14</sup> Isu è yao ched, “Bajo shii ho, jimagunde gua pha ji ne iujia bie ro.”

### *Mijintheke phi pha Chiang è musai*

*(Mrg 12:13-17; Lug 20:20-26)*

<sup>15</sup> Pharisithek dun srane musaithek rog Isu shii phang pha phak rai. <sup>16</sup> Ji-è ithek è awaithek ro samoythek nane Herod ro brantheke shii ai hà thoh ge.

† **21:43** 21:43: giak jigizey shii ne lao 44: hanyie bran è iwoithek wie woi pha ji shii phi mua phro (riig Lug 20:18)    **22:13** 22:13: Mth 8:12; 25:30; Lug 13:28

“Masdo,” ithek è yao, “Gathek ne thieg nane izai yao. Na ne Hamangkhung-aphui ro yang pha izai ji yua phi, gai munow shii ne nyie de samadiig ro, nyieliieshii nane gathek shii boh lu ariig ro. <sup>17</sup> Gathek shii yao bo, chiihphado, nane nyie now ga? Roman saja shii mijin than pha ji ne gethek Iphey shii gidieg ba, asi ba?”

<sup>18</sup> Isu, ithek ro awie pha muphak ji thieg, chiihphado ai yao, “Nathek lawasda! Nathek gushii nyie um ne ibongbong phlei? <sup>19</sup> Mijin shii phi pha sikhi ji gushii riig yi bo!”

Ithek è sikhi ji aishii yi ne phi, <sup>20</sup> chiih-è ithek shii sai, “Hithek ne hanyie mizia nane ibeng lei?”

<sup>21</sup> Ithek è chang. “Bisui ro.”

Ji-è Isu è ithek shii yao, “Wie, chiihphado, nyie Bisui ro ji Bisui shii phi mage bo, chiih-è nyie Hamangkhung-aphui ro ji ne Hamangkhung-aphui shii phi mage bo.”

<sup>22</sup> Ithek ji yoi mage shii, ithek ne wiengphleg dun; chiih-è ithek aishii thoh marui ne dun dun.

*Iy ne hòi din pha Chiang è musai*  
(Mrg 12:18-27; Lug 20:27-40)

<sup>23</sup> Jipha ò inai shii giak Sadusithek Isu shii wuii ne iy pha bran ne ahòì din phrone yao. <sup>24</sup> “Masdo,” ithek è yao, “Moses è yao hò-aphuii hanyie è ani agiak pha iy dun arone, awai khuiino misiungmuii shii yiy chid srane ani giak pha ji ne iy dun pha hò-aphuii ro ani rey bo. <sup>25</sup> Thuh shii, khuiino miley ichiih shii rai. Abam ji è yiy srane ani oi pha iy dun, jiè misiungmuii jine ikhuii shii thoh marui. <sup>26</sup> Ji duiine din pha ikhuii shii de irey, chiih-è uom pha khuiino shii irey, chiih-è mileynoi pha khuiino shii de irey dun. <sup>27</sup> Idohhè shii zab irey dun. Jipha hò-amuii de iy dun. <sup>28</sup> Thuh shii, iy pha ji è chai hòi inai shii, ai ne hanyie yiy rey phlei? Ithek zab è aishii yiy.”

<sup>29</sup> Isu è ithek shii chang, “Nathek ne khama adunmey pho ro nyieliieshii ithek ne jigigam nane Hamangkhung-aphui ro blu athieg ara ro. <sup>30</sup> Chiih-è iy pha ji chai sieng mage shii, ithek ne hamangkhiithek duiine chiih-è ayiy rai phro. <sup>31</sup> Thuh shii, iy pha ji chai sieng ruii pha Chiang shii: Hamangkhung-aphuii è ithek shii nyie yao pha ji ne nathek atham riig bey? Ai è yao, <sup>32</sup> ‘Gu ne Abraham ro Hamangkhung-aphuii, Isakh ro Hamangkhung-aphuii, chiih-è Jakhob ro Hamangkhung-aphuii ro.’ Ai ne isieng Hamangkhung-aphuii ro, chiih-è iy pha Hamangkhung-aphuii ro asi ro.”

<sup>33</sup> Iphiing è ji yoi mage shii, nathek ne ai muyua jishii wiengphleg dun.

*Boh muyung*  
(Mrg 12:28-34; Lug 10:25-28)

<sup>34</sup> Isu è Sadusithek shii aro yiedang pha rek muii rone pharisithek è yoi mage shii, nathek ò wuii, <sup>35</sup> chiih-è nathek è jia, Iphey yua pha Masdo jia yi, musai rog aishii phang yi pha bidiang. <sup>36</sup> “Masdo,” Ai è sai, “Iphey shii zab è boh muyung nyie lei?”

<sup>37</sup> Isu è chang, nawai Ithong Hamangkhung-aphuii shii nawai lubu è miie bo, nawairo zab ragung rog è miie bo, chiih-è nawairo zab khani rog è miie bo. <sup>38</sup> Jine zab è boh nane zab è mugak muyung ro. <sup>39</sup> Din pha zab è boh muyung hi ro: Nawai shii miie pha duiine nawai hadung-haluii pho shii

miie bo. <sup>40</sup> Moses ro Iphey nane chaigtek muyua jine hì pha muyung nyi è luthong phro.

*Masaiya chiang musai*  
(Mrg 12:35-37; Lug 20:41-44)

<sup>41</sup> Giak Pharisithek ò shii khrab mage shii, Isu è ithek shii sai, <sup>42</sup> “Masi chiang shii nathek nyie now lei? Ai ne hanyie ro riing lei?”

“Ai ne Dawid ro riing ro,” ithek è chang.

<sup>43</sup> “Chiihphado, nyie,” Isu è sai, Dawid shii Ithong ho phane Dawid shii ragung è thoh ne bey? Dawid è yao,

<sup>44</sup> Ithong è gu Ithong shii yao:

Gu è na shuangtek shii naro lai iliing hà aruii sapho shii ne

Ichiuh gu phazoi shii dug bo.

<sup>45</sup> “Chiihphado, Dawid è aishii ‘Ithong,’ rone ho arone, nyie khi-èrek Masaiya ne airo riing rey mua phlei?”

<sup>46</sup> Hanyie jia è de Isu musai ji achang mua, chiih-è ji pha idoh è hanyie de aishii musaisai pha lubu boh arek mua.

## 23

*Isu è Masdothek nane Pharisithek shuang shii phriie*  
(Mrg 12:38-39; Lug 11:43,46; 20:45-46)

<sup>1</sup> BH Chiihphado Isu è bran ibrog nane awai samoytek shii yao, <sup>2</sup> Iphey yua pha masdothek nane pharisithek ne Moses pha Iphey yua ne rai pha riichai phi ne ruii ro. <sup>3</sup> Ji-è, nathek ne ithek muyua jithek nuui ne rek bo; jishii, ithek mirek jithek nui ne arek rabo, jimagunde, ithek ne nyie yua pha ji ne awaithek ne arek ro. <sup>4</sup> Itek ne brantheck pha phadung shii miihan ahan mua pha han yi srane awaithek ne wad lujia de miihan shii khoeh ne anong gieng ro. <sup>5</sup> Itek ne awaithek shii brantheck shii doh yi pha rek ne rai ro. Itek ne awaithek shii doh yi pha yung shii jigigam zey ne khrug nane phaliing shii miak phro! ithek ro yung khama boh ji doh yi! Chiih-è ithek ro rugud pha mirgong ji bajo phiang guui rone riig yi!\* <sup>6</sup> ithek ne michie chie pha ishak shii de ithua wie gua ne dug, Jewthek misiahòthek shii de ong ne ruii pha biangtek shii dug; <sup>7</sup> ithek ne brantheck è ithek shii bajaraithek hà ilab phi ne masdo rone ho pha ji wie now. <sup>8</sup> Nawaithek chung ne Masdo Nyieliieshii ithek ne khuiinotek ro chiih-è ithek masdo ne jia bie ro. <sup>9</sup> Chiih-è, ithek ne ichiih sohnyiak shii hanyie shii de aphuii aho rabo, nyieliieshii, nathek ro Aphuii ne hamang pha Aphuii jia bie ro. <sup>10</sup> Chiih-è, nawaithek chung dumuii de aho rabo, nyieliieshii, ithek ne ò bie ro, chiih-è, nathek pha dumuii ne Masi bie ro. <sup>11</sup> Nathek duchoi shii hanyie ne zab è boh rek pha now arone, zab ro khiao rek bi bo. <sup>12</sup> Hanyie è awaishii boh rek ne rai arone aishii ne ù rey yi phro, chiih-è, hanyie ne ù rek ne rai arone, aishii ne boh rey yi phro.

*Isu è nathek ro lawasdaithek shii nin*  
(Mrg 12:40; Lug 11:39-42,44,52; 20:47)

<sup>13</sup> Iphey yua pha masdothek nane Pharisithek wo! Nathek shii ne khama buii thog ruii ro, Lawas dai nathek wo! Nathek è hamangkhang pha

Sajathua pha habin ne brantheek pha mizia shii kheb muui ro. Chiih-è, nawaithek de ji pha bucho shii akhud, brantheek shii de ji pha bucho shii akhud yi. †

<sup>14</sup> Iphey yua pha masdothek nane Pharisithek wo! Nathek ne khama buii mua ruui phro! Lawas dai pho nathek wo! Nathek ne misiungtheek shii lai dia ne ithek hò wuii srane ithek manathek riao ne yie maphi ro. Ji è rek nede ithek ne bajo phiang sia pha doh yi ro. Jiphachiang è ithek shii ne zab è awie lago phi ruui phro! <sup>15</sup> Iphey yua pha masdothek nane Pharisithek! Lawas dai nathek! Nathek shii khama buii thog ruui phro! Nathek è ja shii yang ne noh pha, khamuiithek hiià ne zab pha thiingtheek hà wuii phro, chiih-è nathek è ji rek mua dun nede, nawai è ji pha bran shii nawaithek rog shii thumuluii hà dun sbo dinne de nyichiieng rek yi ro.

<sup>16</sup> “Miegthi dumuii nathek wo! Nathek ne khama buii mua ruui phro. Nathek è yua ne rai,” Hanyie è Misiahò pha ibeng è surua thak arone ai ne ji pha surua è achun din phro, jimagunde hanyie è Misiahò san ibeng è surua thak arone ji pha surua è awaishii chun din phro. <sup>17</sup> Miegthi bi-ie nathek! Khi pha muna yi bajo so ba ga? San ba asi pha san shii so pha Misiahò ji bey? <sup>18</sup> Nathek è hò de yau ne ruui ro, “Hanyie è sraibao pha ithua pha ibeng è surua thak arone, ai ne ji pha surua è achun din phro; Jishii, ai è sraibao pha ithua shii zud pha lasen ibeng è surua thak arone, ai ne ji pha surua è chun din phro.” <sup>19</sup> Nathek ne khama pha miegthi pho ga? Khi pha muna yi bajo chid pha muna ga? Sraibao shii zid pha lasen ba bey? Asi pha yi lasen shii so rab pha sraibao ji bey? <sup>20</sup> Ji-è, khuchung magunde, bran ja è sraibao pha ibeng è surua thak arone, ai ne sraibao pha ithua phi pha lasen ibeng è de surua thakjong ro; <sup>21</sup> chiih-è, khuchung magunde ai è Misiahò pha ibeng è surua thak arone, ai ne thiichiih rai pha Hamangkhung-aphuii ibeng è surua thakjong ro. <sup>22</sup> Chiih-è, khuchung magunde giak è hamangkhung pha ibeng è surua thak arone, ai ne Hamangkhung-aphuii hanyie è ji pha biang boh pha dug pha ibeng è de surua thak ro.

<sup>23</sup> Iphey yua pha masdothek nane Pharisithek! Lawas dai thek wo! Nathek shii khama buii thog ruui pha um ro! Nathek ne iwoikhabua, phadina, buzo, wieng ji è biiriie sua yie ne Hamangkhung-aphuii shii phi magunde ithek ne Iphey shii bajo chid pha muyua, ji ne wie che pha, bushun rek pha, isiie rek pha muyuathek rone anuii ro. Ji-è ithek ne gai shii de asnai pha nyi-minyie shii nui ne rek chid phro. <sup>24</sup> Miegthi dumuiithek wo! Nathek ne nawaithek gog è mujo chiing muui, jishii nathek ne yua phiang suduii shii ne min muui!

<sup>25</sup> Nathek shii ne khama diig phro, Iphey yua pha masdothek nane Pharisithek wo! Lawas dai nathek! Nathek ne nawaithek gogtheek nane shiikhiiathek ne fuang hà sud, jimagunde iliing hà ne mak rek pha nane iwed è ley ro. <sup>26</sup> Miegthi Pharisithek wo! Gog bucho hà nyie um pha ji sud bi bo, chiiphado fuang pha ji è nyasow dun phro!

<sup>27</sup> Nathek shii ne khama diig thog ruui phro! Iphey yua pha masdothek nane Pharisithek wo! Lawas dai nathek wo! Nathek ne wieng shii chun shun pha duuine ro, fuang hà ne bajo khie doh jimagunde iliing hà ne izaingtheek

† 23:13 23:13: Giak jigi shii ne 14 de chodo ro, Nathek shii ne khama diig phro, Iphey pha masdo nane pharisithek! Lawas dai nathek! nathek e misiungmuithek ro hò shii riao srane phua yie ne misia phiang sia ro! Nyieliieshii ai pha Chiang re-è nathek shii ne bajo buii rey ro! (riig Mrg 12:40).

nane ishongthek um ro. <sup>28</sup> Ji duine, fuang hà nathek ne zab shii wie dong phi, Jishii iliing hà ne ley Lawas dai nane layogthek um ro.

*Isu è nathek shii diigkhui pha thogruii pha miyao yao  
(Lug 11:47-51)*

<sup>29</sup> Khinyama diig thog ruui phro! Iphey yua pha masdothek nane Pharisithek wo! Lawas dai pho nathek wo! Nathek ne chaigthek shii wiengthek khie rab phi, chiih-è, hanyie è wie sieng pho shii now yi pha wieng shii wie midong shii chia ne rab phi; <sup>30</sup> chiih-è, ithek ne yao, gathek de guithek blangthek sieng pha ishak shii sieng arone gathek ne ithek duine chaigthek shii a-ua phro. <sup>31</sup> Nathek ne nawaithek shii chaigthek shii ua pho pha riingthek rone nuui muui ro! <sup>32</sup> Chiihphado nawaithek blangthek mujau marui pha ji jong pha rek bo! <sup>33</sup> Nathek phamthek nane phamthek pha anithek wo! Nathek ne thumuluii dun yi pha nin pha ji è khi-èrek ne yo mua pha luthong phlei? <sup>34</sup> Ji-è gu ne nathek shii yao dang phro, gu è nathek shii chaigthek nane khua pha bran nane masdothek thoh ruui phro; nathek è ithek giak shii ua muui phro, giak shii zun muui phro, chiih-è, giak shii Jewthek misiahòthek shii zuang srane nathek shii thawun hà gieng muui phro. <sup>35</sup> Jiphachiang è ichiig oi pha Abel shii ua muui pha ji yie ne nathek è Berachiah pha dufuui Zekharia hanyie shii Misiahò nane sraibao pha duchoi shii ua muui nathek ne khama sgoh rek pha ji ne lago ne nathek lakhung shii chiih ruui phro. <sup>36</sup> Gu ne nathek shii izai yao dang phro: jithek sgow pha zab lago ne duchung pha branthek lakhung shii chiih ruui phro!

*Isu è Jerusalem shii miie  
(Lug 13:34-35)*

<sup>37</sup> Jerusalem, Jerusalem! Nathek è chaigthek ua muui chiih-è Hamangkhang-aphuui è nathek shii thoh pha muapho shii de lubao chao nyia muui! Khemuui è awai iduiithek shii awai iyig hà phiig pha duine gu khama chiieng gu ne nathek branthek shii gu wad è giak phi pha yang, Jishii nathek gu shii arek yi ro! <sup>38</sup> Ji-è, nathek ro Misiahò thoh muui ne isoloi rey ruui phro. <sup>39</sup> Thuh è thiwing, gu nathek shii izai yao phro: Hanyie yi Ithong ibeng è wuii pho aishii ne Hamangkhang-aphuui è khirzey phi bo, ji ayao sapho shii ne sudoh nathek ne gu shii khuchung de adoh phro.

## 24

*Isu è Misiahò ji chuak ruui phro è yao  
(Mrg 13:1-2; Lug 21:5-6)*

<sup>1</sup> Isu è Misiahò ji thoh ne dundun, airo samoythek aishii wuii thog ne Misiahò ji shii riig yi. <sup>2</sup> Ai è yao, “Ji chak ro, nathek ne zab hì shii wie riig bo. Gu ne nathek shii hì yao: lubao jia de ichiuh pha ithua shii khim ne arai phro; jithek zab shii ne buzam chiih ruui phro.”

*Dügthek nane diigchiaotheck  
(Mrg 13:3-13; Lug 21:7-19)*

<sup>3</sup> Isu è sumaro phiing shii dugdun, airo samoythek ne ug ne aishii wuii thog ruui. Ithek è sai, “Gathek shii yao phi bo, hùtek ne khuchung rey ruui phlei, chiih-è, hì ne na wuii ruui pha ishak nane idam jong sha rone doh yi pha nyie rey ruui phlei.”



<sup>4</sup> Isu è chang, nawaithek shii ragia rek bo. Chiih-è nathek shii hanyie è de khinrin arek yi rabo. <sup>5</sup> Bajo brantheke ne gu Chiang è wuii ne yao phro, gu ne Masi ji ro! Chiih-è ithek bajo bran shii khinrin ruii. <sup>6</sup> Nathek è inui shii maktheke rek pha gow yoi ruii phro, chiih-è ruang hà maktheke rey pha muatheke yoi ruii phro; jimagunde diig anow chid rabo. Jitheke ne rey chid phro, Jishii ji pha miyaosiu è ne jong pha ishake thog ruii rone ayao ro. <sup>7</sup> Sohnyiak chung ne mak rek rai phro, chiih-è, Sajathua chung de mak jo rai phro. Jipha ishake shii ne zab hà nokhoniisai nane sajidtheke de sham ruii phro. <sup>8</sup> Jitheke ne ani giak pha igobi pha miirrie duine ro.

<sup>9</sup> Jipha idoh è de ithek shii zum ne lago phi srane ua muui pha phi muui phro. Zab brantheke gu Chiang è nathek shii khiijai ruii phro. <sup>10</sup> Bajo brantheke è ji pha ishake shii awaitheke migi ji thoh muui phro. Itheke ne awaitheke chung khinrin, chiih-è, awaitheke chung khiijai rai phro. <sup>11</sup> Khlam pha chaigtheke bajo khia khlei ne brantheke shii khinrin ruii phro. <sup>12</sup> Hì duine awie pha ji shiyy ruii ne brantheke ro miie ne chie rek muui phro. <sup>13</sup> Jishii, hanyie è iidohhè thog dang pha rai pho ne ragia rey ruii phro. <sup>14</sup> Sajathua pha Mua Wie hì ne zab sohkhung pha zab brantheke khagi rek yi pha yua phro: chiih-è jong pha ishake thog ruii phro.

*Zianakhuruii pha midong*  
(Mrg 13:14-23; Lug 21:20-24)

<sup>15</sup> “Chaig Daniel miyao yao ithek ne Zianakhuruii midong doh ruii phro. Ji ne ithua so shii riu ruii phro.” (Tham pho shii zey bo: hì pha miyaosiu ne wie thieng yi ro!)

<sup>16</sup> “Chiihphado hanyie Juda shii um pho ne phiingtheke hà ran ruii phro. <sup>17</sup> Bran hanyie yi shaphiing hà um iang pha ji è hò è awai manatheke yie pha de thazam alung rabo. <sup>18</sup> Bran hanyie ne raig hà um iang pha ji è hò dun ne awai yungtheke yie pha awuii rabo. <sup>19</sup> Jitheke pha ishake shii ne ani wiig pha nane ani lu um pha hò-amuiitheke ne khama diig rey ruii phro! <sup>20</sup> Nathek ne hakhangshak shii chiih-è Jewish Thung pha Inai ayao ched sapho Hamangkhung-aphuii shii sia mage bo. <sup>21</sup> Jipha diig ishake ne soh jao pha è yie dang ne sudoh thog dang pha diig reyjong pha ji è de awiedang pha diig ji thog ruii phro. Ji duine dinne khuchung de arey phro. <sup>22</sup> Jishii, Hamangkhung-aphuii è ji pha inatheke ne dum rekjong ro. Jipha inai dum arek arone hanyie de asieng mua phro. Ji ne nyieliieshii gua pha awai brantheke Chiang è Hamangkhung-aphuii è ji pha inai ne dum rek ruii phro.

<sup>23</sup> “Chiihphado, hanyie è nathek shii yao” Riig mage bo, ichiih shii Masi um ro chiih-è thiisa hà ai um rone yao ruii magunde ji migi arek rabo. <sup>24</sup> Chiih-è biidiie Masitheke nane biidiie chaigtheke dong ruii phro; rek mua arone, ithek ne boh buangtheke nane wieng pha blia rek ne Hamangkhung-aphuii mugua pha bran shii khinrin ruii phro. <sup>25</sup> Yoi bo! Gu nathek shii hì ne ishake athog bà pha ibi shii yao.

<sup>26</sup> “Din ne, bran è nathek shii yao ruii, riig bo, ai ne bali shii um ro—Thiisa awuii rabo; dinne ithek yao ruii, riig bo, ai ne ichiih hà ug muui ro—Migi arek rabo. <sup>27</sup> Chiih-è haliao yi zab hamang pha bichiu è hayang thog dang pha bliak pha duine Bran Dufuii wuii ruii phro.

<sup>28</sup> “Khi hà siu iy um, ji hà ne biichiing khrab ruii phro.

*Bran dufuii wuii ruii*  
(Mrg 13:24-27; Lug 21:25-28)

<sup>29</sup> “Khthiie jithek pha diig inai idoh, hasiang ne igiia rey dun, habie ne achuang sha phro, chiih-è dadiang ne hamangkhang re-è chiih dun phro, chiih-è hamangkhang pha bluthek ne awai ithua è gieng muui phro. <sup>30</sup> Bran Dufuii pha cheb ne hamang hà dong ruii phro; chiih-è Bran Dufuii yi hamangkhang pha sakhamiingthek è blu nane bajoboh biisiie rog shii wuii ruii shii zab pha sohnyiak pha zab brantheek ne ji riig ne cho ruii phro. <sup>31</sup> Chiih-è ben rone, ai ne awairo hamangkhlitethek shii sohnyiak pha iju wi shii thoh ne, ithek è ai mugua pha bran shii ne soh jia jong pha ji è gai soh thog pha khrab ruii phro.

*Iphem hingmuui pha muyua*  
(Mrg 13:28-31; Lug 21:29-33)

<sup>32</sup> “Iphem hingmuui è nathek shii muyua yua yi bo. Idiphaktek yi irey nane inyi rey mage shii, chiih-è jao ne irab rey khlei ruii shii, nathek ne haluadam ne inui rone thieg. <sup>33</sup> Ji duiine, nathek è jithek zab riig mage shii, jao sha pha ishak ne deb rey ne inui sha rone nathek ne thieg.\* <sup>34</sup> Now bo thuh shii sieng pha brantheek iy pha ibi shii jithek zab rey ruii phro. <sup>35</sup> Hamangkhang nane sohnyiak ne san dun phro, jimagunde gu miyaogamthek ne khuchung de asan phro.

*Hanyie magunde ishak nane inai athieg*  
(Mrg 13:32-37; Lug 17:26-30,34-36)

<sup>36</sup> “Hanyie è de athieg phro, khi-èrek ne, khuchung inai nane ishak thog ruii—Hamangkhlie de athieg dinne Dufuii† è de athieg mua phro, Aphuii ji jia è thieg bie ro. <sup>37</sup> Bran Dufuii wuii ruii pha ji ne Noah pha ishak shii nyie rey pha ji duiine ro. <sup>38</sup> Khokhed pha inai ibi shii brantheek ne chie niing ne rai, hò-aphuii hò-amuii ne yiygey rai, Noah yi run hà khrog pha inai thog pha; <sup>39</sup> Khokhed ne zab shii shaodun pha ji thog dang pha nyie rey pha ji ne thuh de nathek ne athan ba ro. Ji-è Bran Dufuii wuii shii de ji duiine rey ruii phro. <sup>40</sup> Jipha ishak shii ne bran nyi ne raig shii blia ò rek phro: jia shii ne noh dun, gai shii ne thoh marui. <sup>41</sup> Hò-amuii nyi ne rathak ò shii shui rai: jia shii ne noh dun, gai shii ne thoh marui.

<sup>42</sup> “Nawai shii gayiig rek bo, jiè nyieliieshii nathek ne nawaithek Ithong khuchung pha inai wuii ruii pha ji ne athieg phro. <sup>43</sup> Hò muspho è mugopho khuchung wuii ruii pha ishak thieg arone, nane nyayao mua ai ne sieng ne rai srane hò ji ne mugopho è agow yi phro. <sup>44</sup> Ji-è chiihphado, nathek de idang saro ne rai bo, nyieliieshii Bran Dufuii ne nathek è aishii aluthong pha ishak shii wuii ruii phro.

*Migi nane migi oi pha khiao*  
(Lug 12:41-48)

<sup>45</sup> “Hanyie, chiihphado hì ne izai nane khua khiao bey? Hì ne jia ro ai masdo è gai khiaothek shii dumuii phi shii nathek ro michie yi khriig ishak shii phi yi pha. <sup>46</sup> Ai hò dun shii ai ji è rek ne rai pha Muspho è doh arone ji pha khiao shii ne khama sang ruii phro. <sup>47</sup> Zai, Gu nathek shii yao, muspho

**24:29** 24:29: Aij 13:10; Jol 2:10,31; 3:15; Dng 6:12; Aij 13:10; Ezkh 32:7; Jol 2:10; 3:15; Aij 34:4; Dng 6:13 **24:30** 24:30: Dan 7:13; Zekh 12:10-14; Dng 1:7 \* **24:33** 24:33: ishak ne noi sha ro, jao pha ji shii saro bo; dinne ai ne noi sha, wuii shapha saro bo. † **24:36** 24:36: giak jigizey shii ne oi ro Dufuii de oi. **24:37** 24:37: Igo 6:5-8 **24:39** 24:39 Igo 7:6-24 **24:43** 24:43,44 Lug 12:39,40

è ji pha khiao shii ne awairo zab nuruiithek pha dumuii rab muui phro. <sup>48</sup> Jishii ai ne awie pha khiao arone, ai è awai shii yao muspho wuii pha ne ishak bajo athog sha ruui. <sup>49</sup> Chiuh-è ai ne awai ijak khiaothek shii jao ne zuang ne gui ne phuiithiig pho rog chie niing. <sup>50</sup> Chiuhphado ji pha khiao ro muspho yi khiao è aishii aluthong inai nane ai athieg pha ishak shii idoh dun ruui phro. <sup>51</sup> Muspho è aishii zuang srane aishii ne lawasdaithek rog shii phi muui.‡ Thisa hà ai ne cho ne shiinyeng khriieg ruui phro.

## 25

### *Hò-amuii miliao sua pha najang*

<sup>1</sup> “Jipha ishak shii hamangkhang pha Sajathua ne hì duine phro. Luangjia hò-amuii miliao sua hanyie è awaithek ro ichuangthek pha thiillie yi ne phiyibufuii shii si pha wuii dun. <sup>2</sup> Ithek è guui yi bi-ìe, chiuh-è guui yi khua ro. <sup>3</sup> Bi-ìethek yi awaithek ro ichuangthek ne yi jishii awaithek ro yo thiillie ne ayie ro, <sup>4</sup> jishii khuathek ne awaithek ichuangthek pha thiillie ne chab pha ji shii ley chab ne yi. <sup>5</sup> Phiyibufuii ne chia ne wuii thog, jiè hò-amuiithek ne jiiing ne men dun.

<sup>6</sup> “Hi ne habiu duchoi reyjong mage shii, ziak mage, ‘Ichiuh ne phiyibufuii um ro! Thawuii ne aishii si bo!’ <sup>7</sup> Hò-amuii sua sieng srane awaithek ro muchuangthek rab. <sup>8</sup> Chiuhphado bi-ìe jithek è khuapho shii yao, nathek ro thiillie gathek shii de iujia phi bo, nyieliieshii gathek ichuangthek ne nyia sha pha rek ro. <sup>9</sup> Asi, zai, khuathek è chang, ‘ichiuh ne nathek nane gathek shii achoh phro. Nawaithek ne haphuii hà wuii ne pheg mage bo.’ <sup>10</sup> Ji-è bi-ìe hò-amuiithek ne thiillie pheg pha wuii dun; chiuh-è ithek wuii dun shii, phiyibufuii thog. Ithek guui hanyie è saro ne wuii pho ne ai rog phiyiy pha michie hà wuii gieng, chiuh-è habin ne kheb dun.

<sup>11</sup> “Idoh shii gai hò-amuiithek de thog. ‘Masdo! Gathek shii de iliing wuii yi bo!’ ithek ne ho. <sup>12</sup> Zai asi! Gu nathek shii athieg ro, Phiyibufuii ji è chang.”

<sup>13</sup> Chiuh-è Isu è yao ched, nawaithek shii ragia rek bo, chiuhphado nyieliieshii nathek ji pha inai nane ji pha ishak shii athieg phro.

### *Khiaothek uom pha najang* (Lug 19:11-27)

<sup>14</sup> Jipha ishak shii hamangkhang pha Sajathua ne ji duine phro. Luangjia bran hanyie yi awai hò thoh ne awai lumuii hà lua sha pha rek shii; ai è awai khiaothek shii ho srane nuruii shii dumuii phi marui. <sup>15</sup> Ai è zab shii khi-èrek mua pha ji phi marui: ai è jia shii san sikhi itham guui phi, din pha jishii itham nyi, chiuh-è din pha jishii itham jia phi. Chiuhphado ai ne awai lumuii hà wuii dun. <sup>16</sup> Khiao hanyie è itham guui sikhi mua pha ji ne wuii srane blia rek ne dinne itham guui wiangphi. <sup>17</sup> Ji duine khiao hanyie è itham nyi sikhi mua pha ji itham nyi wiangphi. <sup>18</sup> Jishii khiao hanyie è itham jia sikhi mua pha ji è wuii srane nyiak shii icho jog ne awai muspho ro bang ne ug muui.

<sup>19</sup> Bajo ishak pha idoh khiaothek ro muspho yi idoh dun thog ne ithek rog shii sasab rek rai. <sup>20</sup> Khiao hanyie è itham guui sikhi mua pha ji è wuii srane chiuh-è yo itham guui ji de phimuii. Na è gu shii ne itham sikhi phi, Masdo, ai è yao. Riig bo! Ichiuh yo itham guui ji gu miwiang phi ro. <sup>21</sup> Wie rek, nane

‡ 24:51 24:51 aishii ne dumdum che muui; dinne aishii ne fuang hà fen muui. 25:1 25:1: Lug 12:35  
25:11 25:11,12: Lug 13:25 25:14 25:14-30: Lug 19:11-27

wie nane isiie khiao! Ai muspho è yao. Na ne sasab nane bang lujia shii isiie rek, jiè gu ne nashii muna blia shii dumuii rek yi pha ro. Thawuii ne guro sang shii yigieng bo! <sup>22</sup> Chiihphado khiao hanyie shii itham nyi sikhi phi pha ji è wuii srane yao, na è gushii itham nyi sikhi phi, masdo. Riig bo! Ichihih pha yo itham nyi sikhi ji gu wiang ro. <sup>23</sup> Wie rek, na wie nane isiie khiao! Muspho è yao. Na ne sasab nane bang lujia shii isiie rek, jiè gu ne nashii blia muna shii dumuii ruii phro. Thawuii ne guro sang shii yigieng bo! <sup>24</sup> Chiihphado khiao hanyie è itham jia sikhi mua pha ji è wuii srane yao, Masdo, gune thieg nane bran sua; nane na è ahai pha ji yamiing shii de chiig, chiih-è nane na è ahai pha ji hà de iriie khrab. <sup>25</sup> Gu ne rumdun, jiè gu è wuii srane naro bang yi nyiak hà ugmuii. Riig bo! Ichihih ne naro ji um ro. <sup>26</sup> Na ne awie nane shkhadajo pha khiao ro! Airo muspho è yao. Na ne thieg, gu ne khi hà yamiing ahai ji hà chiig, chiih-è khi hà igam ashiiy ji hà chiing ne bey? <sup>27</sup> Wie, chiihphado, nane gu bang ne bang chab bsa hà chab phi chid, chiih-è gu idoh dun din shii gui bang zab chodo ne idoh mua din. <sup>28</sup> Thuh, bang ai è yi srane hanyie shii itham sua sikhi um pha ji shii phi muii phro. <sup>29</sup> Chiih-è zab pha bran hanyie shii lu um, aishii ne muna phi din, chiih-è aishii ne cho sapho um ruii; jishii hanyie shii nyie de oi dangpho shii ne lujia um pha ji de yi muii phro. <sup>30</sup> Ji-è ji pha adunmey pha khiao—aishii ne fuang pha igiia hà fen muii bo; thiisa hà ai ne cho ne shinyin khriieg ruii phro.

### *Idohhè pha chua*

<sup>31</sup> Bran Dufuii yi Saja duine wuii ruii shii chiih-è zab hamangkhiiethek ne ai rog shii phro, ai ne awai biisiie biang shii dug ruii phro, <sup>32</sup> Chiih-è zab sohthek pha branthek ne ai ibi shii khrab ruii phro. Chiihphado ai è ithek shii ibrog nyi shii chemuii phro, brogpho è Shiishai shii siphintheck è chemuii pha duine phro. <sup>33</sup> Ai è giang bran shii ne awai phazoi hà ruii chiih-è gaithek shii ne phawig hà ruii muii phro. <sup>34</sup> Chiihphado Saja è awairo phazoi pha bran shii yao ruii phro, thawuii bo, nathek shii ne gu Aphuii è khirzey phi ro! Thawuii ne nyie yi soh rab pha ji è nathek shii saro phi pha Sajathua ji shii ong bo. <sup>35</sup> Gu chi-iyiy shii nathek è chie pha phi, gu gahang-hang shii nathek è gu shii niing pha phi; gu ne biwen shii nathek è gu shii ne nawaithek hòthek hà ho phi. <sup>36</sup> Gu ne ikhilen shii nathek è gu shii guii phi; gu rad shii nathek è gu shii gayiig phi, phatheg hà um shii nathek è gu shii si wuii.

<sup>37</sup> Giangthek è ne aishii chang ruii, khuchung, Ithong, gathek ne na chi-iyiy shii chie pha phi phlei? Din ne gahang-hang shii niing pha phi phlei? <sup>38</sup> Khuchung gathek ne na biwen shii hò hà ho phlei, din ne ikhilen shii na shii guii phi phlei? <sup>39</sup> Khuchung shii gathek ne na rad ne phatheg hà rai pha ji doh ne wuii phlei? <sup>40</sup> Saja è chang ruii, gu nathek shii yao, nathek è khuchung magundè guro dusho khuiinothek jia shii nong rek phi arone na è gushii rek phi ro.

<sup>41</sup> Chiihphado ai è awai phawig pha bran shii yao ruii, gu è dun dun bo, ithek zab ne Hamangkhung-aphuii ro thamiie pha iliing shii ro! Ibuii nane airo hamangkhliie shii saro pha idang pha bai shii fen muii phro! <sup>42</sup> Gu chi-iyiy shii nathek è achie yi, gahang-hang shii nathek è gu shii niing pha aphi; <sup>43</sup> Gu ne biwen shii nathek è nawaithek hò hà aho, ikhilen shii nathek è yung

aguii phi; gu rad shii chiih-è phat heg hà chab shii nathek è gu shii gayiig arek phi. <sup>44</sup> Chiihphado ithek è aishii chang ruii, khuchung, Ithong, gathek è na chi-iyii chiih-è gahanghang chiih-è biwen chiih-è ikhilen, chiih-è rad chiih-è phat heg hà doh phliie chiih-è na shii anong phi bey? <sup>45</sup> Saja è chang ruii, gu nathek shii yao, nathek è dushoduii jia shii anong phi, jiè nathek è gu shii de anongphi. <sup>46</sup> Chiihphado jine idang pha lago thog ruii phro, Jishii giangthek ne idang pha chai hà dun ruii phro.

## 26

### *Ithek Isu shii shuang rek*

(Mrg 14:1-2; Lug 22:1-2; Jon 11:45-53)

<sup>1</sup> Isu è jithek yua ched dang shii, Isu è awai samoythek shii yao.

<sup>2</sup> Nathek ne thieg, “Danyi pha idoh shii, ne Hiadun pha idoh ro, chiih-è, Bran Dufuii shii bai shii zun pha phi muui phro.”

<sup>3</sup> Ji-è, boh phabithek nane dukhothek ne Khaiaphas boh phabithek ro boh hò shii ò si rai. <sup>4</sup> Chiih-è, Isu shii ug ne zum srane ua mua pha phak rai.

<sup>5</sup> Ithek è yao, “Gethek ne hi ne sai pha idoh shii arek pha um ro, branthek ne shuang rek ruii phro.”

### *Bethany hà Isu shii thiiie thoi phi*

(Mrg 14:3-9; Jon 12:1-8)

<sup>6</sup> Isu yi Bethany hà hiarii pha Simon hò shii um. <sup>7</sup> Isu è michie chie ramuii shii, hò-amuii jia ne bajo igong chiid pha rem now pha ji jariie shii chab ne wuii thog. Ai è ai khrug shii thoi phi. <sup>8</sup> Samoythek è ji doh mage ne lijieg dun. Ithek è yao, “Hithek ne thaluu nyie rek muui phlei? <sup>9</sup> Hi pha rem now pha ji ne igong bajo shii chongliu srane ji pha bang ne dusho shii phi muui arone wie phro!”

<sup>10</sup> Isu è ithek miyao rai ji thieg ne, jiè ithek shii yao, nathek ne hi pha hò-amuii shii nyie um ne diig phi phlei? Hi ne ai è gu shii wie jia nane khie pha blia rek phi ro. <sup>11</sup> Dusho ne nathek rog shii idang um gieng phro, Jishii, nathek ne gu rog shii idang oi gieng phro. <sup>12</sup> Ai è nyie rek pha ji ne gu siu shii sumaro thoi phi ne gu wieng pha ji khriig rekjong phi ro. <sup>13</sup> Thuh shii, gu ne nathek shii izai yao dang phro, “Sohjambing shii hanyie magunde hi pha mua yao shii ai mirek phi pha ji de aishii nowkhlei pha yao ruii phro.”

### *Judas è Isu shii zum yi pha nuii*

(Mrg 14:10-11; Lug 22:3-6)

<sup>14</sup> Chiihphado Samoy snanyi è jia—Judas Iskharioth beng phaji yi boh phabithek shii wuii ne sai, <sup>15</sup> chiih-è sai, gu è Isu shii zum yi arone, nathek ne gu shii nyie phi phlei? Ithek è liiman sikhi sa-uom tham ne aishii phi. <sup>16</sup> Chiihphado è Judas ne Isu shii ithek shii zum ne phi pha chua wie mua yi pha riig ne rai.

### *Isu è awai samoythek rog shii hiadun pha michie chie*

<sup>17</sup> Igobi pha, Hiadun pha ji shii phia ajiie pha iweb chie shii, samoythek è Isu shii wuii srane sai, gathek shii naro Hiadun pha ji chie pha iweb ne khi hà wuii srane saro pha yang lei?

<sup>18</sup> “Ai è ithek shii yao, Jipha rajan hà bran jia shii wuii” srane “aishii yao mage bo: masdo è yao ramuii ro; guro ishak ne thog sha ro; gu nane guro

samoythek è Hiiadun pha ji ne na hò shii sai pha ro.” <sup>19</sup> Samoythek è Isu è khi è yao pha ji rek ne Hiiadun pha michie sai pha saro phi.

<sup>20</sup> Habjuang rey mage shii, Isu nane Samoy snanyi ne chie pha dug. <sup>21</sup> Chie pha ishak shii Isu è Yao, “Gu ne nathek shii yao, nathek è jia ne gu shii zum yi phro.”

<sup>22</sup> Samoythek ne bajo zo ne aishii jia jia rek ne sai ruii, izai “Ithong wo! Ji ne gu asi bey?”

<sup>23</sup> Isu è chang, “Hanyie è ichiuh gu rog shii awai iweb jo gieng pha jia è gu shii zum yi phro. <sup>24</sup> Jigigam shii yao pha duiine Bran Dufuii ne iy dun phro, Jishii, Bran dufuii shii zum yi pha bran ji shii ne khama buii thog ruii phro! Jipa bran ne agiak liag arone wie liag phro!”

<sup>25</sup> Zum yi, pha Judas è yao ruii. “Zai Masdo, ji ne gu shii yao pha asi bey?” Ai è sai.

Isu è chang, “Nawai è yaodun ro.”

### *Ithong ro michie*

*(Mrg 14:22-26; Lug 22:14-20; 1Khor 11:23-25)*

<sup>26</sup> Ithek è chie ramuii shii, Isu è iweb idum chiing srane laso phi pha sia srane phed ne awai samoythek shii phi. Ai è yao, “Hi choi ne chie mage bo; hi ne guro siu ji ro.”

<sup>27</sup> Chiuh-è, ai è gog ji chiing srane Hamangkhung-aphuii shii laso phi ne ithek shii phi. Ai è yao, <sup>28</sup> “Hi ne gu ifai ro, hanyie Hamangkhung-aphuii è shiinyie nab phi pha ji ro, chiuh-è gu ifai è noi ne layogthek shii khung phi phro. <sup>29</sup> Gu ne nathek shii yao, gu ne hi pha phuii ne Aphuii pha Sajathua pha inai shii phuii iwo aniing ba sapho shii ne dinne khuchung de aniing din sha phro.”

<sup>30</sup> Chiuhphado ithek ne ibai bai ne sumaro phiing hà wuii dun.

### *Isu è Phithar è snai pha ji shii chaig*

*(Mrg 14:27-31; Lug 22:31-34; Jon 13:36-38)*

<sup>31</sup> Chiuhphado Isu è ithek shii yao, sudoh ibiu dang shii ithek zab yo ne gu shii ji thoh marui phro, ji rey pha ji è jigigam shii yao pha duiine ro, Hamangkhung-aphuii ne brogpho shii ua muui phro, chiuh-è shiishai ibrog ji ne dayiingdayang dun dun phro. <sup>32</sup> Jishii, Gu ne chai shii hòì din mage shii gu ne ithek ibi shii Galili hà wuii dun phro.

<sup>33</sup> Phithar è yao srane Isu shii yao, “zab è na shii thoh marui magunde gu ne na shii khuchung de athodang phro!”

<sup>34</sup> Isu è Phithar shii yao, “Gu ne na shii izai yao dang phro, Khephuii a-ìo ba pha ibi shii na è gu shii athieg rone uom chiing yao bi ruii phro.”

<sup>35</sup> Phithar è chang, “Gu ne narog iy pha um dun nede gu ne hò è rek ne khuchung de ayao phro!”

Gai samoythek de ji è yao gieng.

### *Isu è Gethsemane hà sia*

*(Mrg 14:32-42; Lug 22:39-46)*

<sup>36</sup> Chiuhphado Isu ne awai samoythek rog shii Gethsemane beng pha ithua hà wuii dun, chiuh-è, ai è ithek shii yao, “Gu è sia pha wuii dun shii nathek ne ichiuh shii rai iang bo.” <sup>37</sup> Ai è Phithar nane Zebedi pha dufuii nyi shii noh ne wuii dun. Thiisa hà aishii bajo duhug nane diig now pha ishak thogruii.

38 Chiìh-è ai è ithek shii yao, “Guro lubu pha bajo duhug ne gune choi muii ro. Ichiih shii rai ne gu rog shii athodang pha sieng ne rai bo.”

39 Ai ne lujia thithe wuii srane awai mizia ne nyiak hà bam ne sia, “Gu Aphuii wo! Rek mua arone diig rek pha gog hì chiing maphi bo! Jishii gu munow ji asi pha yi nawai munow ji rek bo.”

40 Chiìhphado ai samoy uom shii idoh dun ne riig shii samoy uom ne men dun pha doh ruii; chiìh-è ai è Phithar shii yao, “Nathek uom ne ishak jia thog bie pha de gu rog riig ne arai mua bey? 41 Wie riig bo, chiìh-è, chuajan hà achiih yi pha sia mage bo. Ragung è ne rek yang habuii shii, siu è arek mua phi ro.”

42 Isu ne din ne de wuii dinne sia, “Gu Aphuii wo! Diig pha gog hì ne gu è aniing sapho shii ne achiing mua phi arone nawai munow ji rek mage bo.”

43 Ai è idoh dun thog shii samoythek ne men ne um iang; ithek ne awaithek mieng ayang mua pha rey dun.

44 Din ne Isu è ithek shii thoh marui srane wuii dinne uom chiieng rey sha pha ibi pha miyaogamthek duiine yao ne sia. 45 Chiìh-è, ai è samoythek shii dun ne yao, “Nathek ne tuh de men nane thung ne rai ba mua bey? Riig mage bo! Bran Dufuii shii zum ne layogpho ro blu shii phi muii pha ishak thog sharuii ro. 46 Sieng sha mage bo, cho gethek dun sha rai. Riig bo, gu shii zum yi pha bran um ro!”

### *Isu shii zum*

*(Mrg 14:43-50; Lug 22:47-53; Jon 18:3-12)*

47 Isu ji è yao ramuii shii samoy snanyi shii um pha Judas thiichiih wuii thog. Ai rog shii boh phabithek nane dukthothek mutho pha bran ibrog ne miang rog khamriie nane muchangthek han ne wuii thog. 48 Zum yi pha bran è branthek shii phrai ne yao ruii, “gu è khi pha bran shii khichiug pha ji ne nathek chiid pha ji ro, aishii zum bo!”

49 Judas è Isu shii miang wuii srane, Masdo! Na rog shii “liijiing um bo è yao srane aishii khichiug phi.”

50 Isu è chang, “Gu ijak wo! Na ne ichiih nyie rek pha um phaji ne jog rek mage?”\*

Ji è yao ched dang mage shii ithek è Isu shii zum ne phang muii. 51 Isu rog um pha bran jia è awai khamriie khia srane Boh Phabi pha khiao jia ro khoh wiagthiak maphi. 52 “Nawai khamriie ne irung shii chab din muii bo, zab hanyie è khamriie khia pho ne khamriie è iy ruii phro, Isu è aishii yao. 53 Na ne athieg bey? Gu ne Aphuii shii nong yi pha nya ho mua phro, ai è khthiie snanyi armingthek hamangkhlhie nyathoh phi phro. 54 Jishii ji rek arone, jigigam shii nyie rey pha yao pha ji ne khi-èrek ne izai rey mage phlei?”

55 Chiìhphado Isu è bran ibrogthek shii yao, “Nathek ne gu ne Iphey shii adunmey pha blia rek pha duiine gu shii sudoh zum pha ji è khamriie nane miichangthek han ne wuii chid ne bey? Inai tham ne gu ne nathek moe shii Misiahò hà yua ne rai habuii shii nathek è gu shii azum. 56 Jishii, hithek rek pha ji è chaigthek è jigigam shii zey marui pha jithek izai rey yi pha ji rek phro.”

Ji è yao ched dang shii samoythek ne aishii thoh marui ne zab yodun.

\* 26:50 26:50: hipha Chiang ne jog rek bo, ijak! dinne na ichiih nyie rek ne, ijak? 26:55 26:55: Lug 19:47; 21:37

*Isu shii limiang moe shii noh thog**(Mrg 14:53-65; Lug 22:54,55,63-71; Jon 18:13-14,19-24)*

<sup>57</sup> Hanyie è Isu shii zum pho è Isu shii ji hà ne Khaiaphas hò hà noh dun Iphay yua pha masdothek nane dukthothek ò khrab ne dug. <sup>58</sup> Phithar de ruang è ug ne Kho Phabi biang thog dang pha luagieng. Ai de biang bucho wuii srane khi-èrek ruii pha jithek riig pha sandrithek rog wuii ne dug gieng. <sup>59</sup> Boh Phabithek nane zab pha limiangthek è Isu shii nin ne ua muui pha lumuii so; <sup>60</sup> Jishii Bran bajo è wuii ne khlam ne yao magunde ithek è nyie amua phi. Idohhè shii bran nyi è riu <sup>61</sup> srane yao, “Hi pha bran è yao muui ro, ‘gune Hamangkhung-aphuii pha Misiahò ji ne chuak ne da-um shii idoh nya rung din phi phro.”

<sup>62</sup> Boh phabi ji è riu srane Isu shii yao, “Na shii nin pha miyao ji chang pha nyie miyao oi bey?” <sup>63</sup> Jishii Isu è arodang pha raidun. Jipha idoh è ji pha boh phabi è aishii yao din, “Isieng rai pha Hamangkhung-aphuii ibeng gu nashii surua phi phro: Na ne Masi, Hamangkhung-aphuii pha Dufuii arone, gathek shii izai yao mage bo.”

<sup>64</sup> Isu è ai chang, “Nawai è yao dun ro. Jishii, gune nathek shii izai yao dang phro: sudoh pha ishak è thiwing ne nathek è Bran Dufuii ne Bohblu pha phazoi moe shii dug ne hamangkhung pha sakhamiing lakhung shii wuii ruii pha doh phro!”

<sup>65</sup> Ji è yao mage shii ji pha Boh phabi ne airo yungthek shii ji srane yao, hì ne Hamangkhung-aphuii biwo ro! Gethek ne gai nyie miyao doh pha achid sha phro! Nawaithek è de ai ro makhakriing pha miyao ji yoi jong! <sup>66</sup> Nathek ne nyie now muui ga?

Ithek è chang, ai ne ichiig ro, jiè ai ne iy chid phro.

<sup>67</sup> Ji-è, ithek è ai mizia shii chan cho srane aishii zuang; chiih-è, hanyie thek è aishii phay pho è yao, <sup>68</sup> “Hì ne na shii hanyie muzuang ley ne, gathek shii chaig, Masaiya, yao riig bo!”

*Phithar è Isu shii snai**(Mrg 14:66-72; Lug 22:56-62; Jon 18:15—18:25-27)*

<sup>69</sup> Phithar ne fuang sibiang ji pha fuang shii dug ne rai shii Kho Phabi pha khiaomuii jia wuii srane aishii sai, “Na de Galili pha Isu rog um gieng pha bran ji ro.”

<sup>70</sup> Jishii, ai è brantheke moe shii khlam ne yao. Ai è chang, “Nathek ne nyie yao ramuii pha ji ne gu ne agao phi ro,” <sup>71</sup> chiih-è, ji pha sibiang shii khud muui pha ji è fuang khiadun. Gai khiaomuii è de aishii doh mage shii thiichiih um pha brantheke shii yao, “Ai de Nazareth pha Isu rog shii um pha ji ro.”

<sup>72</sup> Phithar è dinne snai ne chang, “Gu ne surua thak ne yao dang phro, ji pha bran shii gu ne athieg dang ro!”

<sup>73</sup> Jipha lujia idoh shii thiichiih riu ne rai pha brantheke è Phithar shii wuii thog. Ithek è aishii yao, “Na de ithek pha è jia ro. Nawai è nyie khi è yao pha ji è id dun ro!”

<sup>74</sup> Phithar è yao din, “Gu ne surua thak ne yao dang phro, gu ne izai yao ramuii ro! Gu è khlam yao arone, Hamangkhung-aphuii è gu shii lago phi ruii phro. Gune ji pha bran shii athieg chak ro!”



Ji è yao ched dang shii khephuii è ìo ruii, <sup>75</sup> chiih-è, Phithar è de Isu è nyie yao pha ji nowkhlei ruii: “Khe a-ìo ba pha ibi shii na ne gu shii athieg rone uom chiieng snai ruii phro.” Ai è fuang dun srane khiwegkho ne cho.

## 27

### *Isu shii Philath hà noh dun*

(*Mrg 15:1; Lug 23:1-2; Jon 18:28-32*)

<sup>1</sup> Hamiang riang shii boh phabithek nane dukhothek è Isu shii ua muui airo gidieg phak rai. <sup>2</sup> Ithek è aishii shiirnaithek è joi ne noh srane Roman pha badri Philath shii phi muui.

### *Judas iy dun*

(*Blk 1:18-19*)

<sup>3</sup> Zum yi pha Judas è Isu shii nin muui pha yoi mage shii, lubukhid ne liiman sikhithek sa-uom ji idoh yie srane boh phabithek nane dukhothek shii phi muui. <sup>4</sup> “Gu è ichiig oi pha bran shii zum yi pha ji è layog rekjong muui ro!” Ai è yao.

“Gathek ne ji pha chiang shii nyie rek ne gayiig chid phlei?” Ithek è chang. “Hi ne nawai blia ro!”

<sup>5</sup> Judas è sikhithek thiichihih Misiahò shii fen marui ne dun dun; chiih-phado dun srane zun ne iy dun.

<sup>6</sup> Boh phabithek è sikhithek chiieng srane yao, “Hi ne ifai pha bang ro, chiih-è hi ne Misiahò pha bang rog shii ruii pha ji ne gethek Iphey shii gidieg rey dun phro.” <sup>7</sup> Bajo nung rai ne ithek è ji pha bangthek è fuang pha brantheek shii wieng pha, Jarai rab pha raig jia pheng pha phak rai. <sup>8</sup> Ji buii ne thuh pha inai shii ji pha raig ne “Ifai pha Raig” Rone beng ne ruii.

<sup>9</sup> Chiihphado chaig Jerimia miyao marui pha ji izai reythog: “Ithek è liiman sikhithek sa-uom, Israel pha brantheek è aishii phi pha nuirai pha bang ji yie, <sup>10</sup> ne Ithong è gu shii yung pha duine ji pha bang è jarai rab pha raig pheng muui.”

### *Philath è Isu shii musai sai*

(*Mrg 15:2-5; Lug 23:3-5; Jon 18:33-38*)

<sup>11</sup> Isu ne hanyie è aishii musai sai pha Roman Badri moe shii riu. “Na ne Jewthek pha saja bey?” Ai è sai.

“Nawai è yao muui ro,” Isu è chang. <sup>12</sup> Jishii ai è boh phabithek nane dukhothek pha chiang ne nyie de achang phi.

<sup>13</sup> Ji-è, Philath è aishii yao, “Na ne ithek è nashii they ramuii pha jithek ayoi bey?”

<sup>14</sup> Jishii Isu è miyaogam jia de chang pha anuii phi, ji è rek pha ji è Badri ne bajo anomuluii pha rey dun.

### *Isu iy yi pha yaothiak*

(*Mrg 15:6-15; Lug 23:13-25; Jon 18:39—19:16*)

<sup>15</sup> Hiidun pha Sai pha ji shii ne Roman badri ne lajia ne idang ibrog è lia pha phathegpho jia shii thoh phi. <sup>16</sup> Jipha ishak shii zab è thieg pha phathegpho Isu Barabas beng pha ji de um ro. <sup>17</sup> Ji-è ibrog khrab thog mage shii, Philath è ithek shii sai, “Nathek è gu ne hanyie shii thoh yi pha yang lei? Isu Barabas shii thoh pha ba asi pha Masi beng pha Isu shii thoh

haba?” <sup>18</sup> Jewishthek pha riichai è Isu shii ne aishii phi muui rone wie è thieg nyieliieshii ithek ne miegriie ro.

<sup>19</sup> Philath è chua pha hò shii dug bamuui shii, ai yiy è aishii mua jia thoh ge: “Ichiig oi pha bran rog shii nyie de arek rabo, nyieliieshii, dibi gu ibang shii ai Chiang pha sasab ne bajo diig rek pha bang muui ro.”

<sup>20</sup> Boh phabithek nane dukhothek è ibrog shii nyu ne Philath shii Barabas shii thoh ne Isu shii ua mua pha lia yi. <sup>21</sup> Jishii, Philath bran ibrog thek shii sai, “Nathek è nyi hì è, gu ithek pha hanyie shii thoh yi pha now phlei?”

Ithek è chang, “Barabas!”

<sup>22</sup> Philath è ithek shii sai din, “Masi beng pha Isu shii gu è nyie rek pha lei?”

“Aishii ne bai hà zun muui bo!” ithek è chang.

<sup>23</sup> Jishii Philath è sai din, “Ai è nyie suruui rek muui ga?”

Ji-è ithek ne bajo boh boh rek ne ziak, “Aishii ne bai shii zun muui bo!”

<sup>24</sup> Philath è nyieliieshii ò ji athem pha um rone doh mage shii, ai è kho yi srane, ibrog moe shii wad chun, chiuh-è yao, “Hì pha Bran iy pha gaja ne gu asi phro! Hì ne nawaithek mirek ro!”

<sup>25</sup> Zab ibrog è chang, “Ai iy pha gaja gathek nane gathek pha aniphiing shii chiuh yi bo!”

<sup>26</sup> Philath è Barabas shii nathek shii thoh muui; chiuh-è, ai è Isu shii zuang yi ne aishii bai hà zun yi pha phi muui.

### *Siphahithek è Isu shii siakjo*

*(Mrg 15:16-20; Jon 19:2-3)*

<sup>27</sup> Philath pha siphahithek è Isu shii Badri boh hò bucho noh dun srane zab iphiing ai moe shii khrab thog ruii. <sup>28</sup> Ithek è airo yungthek than maphi ne gai yung shaig jia guui phi. <sup>29</sup> Chiuh-è, ithek è migem phang è rago jia rab ne ai khrug shii thung phi, chiuh-è ai phazoi shii thagin jia khox yi; ji è rek srane ai ibi shii bam ne aishii siakjo noh. Ithek è aishii yao, “Jewthek pha saja phiang sieng bo!” <sup>30</sup> Ithek è aishii chan cho ne muchang yie srane ai khrug shii thab. <sup>31</sup> Ithek è ai siakjo pha jong mage shii ithek è yung shaig ji than din srane awai yung ji guui din phi. Ji è rek ched ne ithek è aishii bai shii zun pha noh dun.

### *Isu shii bai shii zun*

*(Mrg 15:21-32; Lug 23:26-43; Jon 19:17-27)*

<sup>32</sup> Ithek è fuang wuiiramuii shii Simon beng pha bran Syrene è wuii ruii pha jia shii si iang. Ji-è, siphahithek è aishii de Isu bai ji bangchiie nuang ba yi. <sup>33</sup> Ithek ne “Golgotha beng pha ithua shii wuii thog, ji pha Golgotha pha miyaosiu ne gadong um pha ithua rone è yao pha ro.” <sup>34</sup> Thiichiuh shii ithek è Isu shii ikhow lao pha phuii phi, jishii ai è chai mage shii ji aniing.

<sup>35</sup> Ithek aishii bai hà zun maphi ne ai yungthek ne miiran riig ne awaithek chung thang rai. <sup>36</sup> Jipha idoh è ithek de thiichiuh riu ne riig ne rai. <sup>37</sup> Isu khrug lakhung shii “Hì ne Jewthek pha saja Isu ji rone” ithek è aishii shuang rek ji zey ne miak phi. <sup>38</sup> Chiuh-è, ithek è Isu rog shii awie pha bran nyi shii bai hà zun muui. Jia ne ai phazoi moe shii, jia ne ai phawig moe shii.

<sup>39</sup> Thiichiuh è dong ne lua pho thek è awaithek khrug hù ne Isu shii awie dang pha siakjo ne riig. <sup>40</sup> “Na ne Misiahò ji mua srane da-um shii nyarung

din phrone yao! Na ne Hamangkhung-aphuui pha Dufuui chak arone, nawai shii de ragia rek mage ne bai ji è thazam lung ne dun mage bo!”

<sup>41</sup> Ji duiine phabi boh thek nane Iphey yua pha Masdothek nane dukhothek de aishii siakjo phi: <sup>42</sup> “Ai è gai shii ne ragia rek habuui shii awai shii ne ragia arek mua ara! Ai ne Israel pha saja ji asi bey? Thuh ai è bai è thazam lung ne dun mua arone gathek de aishii migi rek pha ro! <sup>43</sup> Ai ne Hamangkhung-aphuui shii luthong ne awai shii Hamangkhung-aphuui pha Dufuui rone è yao mua ro. Ji izai arone, Hamangkhung-aphuui è aishii ragia rek pha now bey ne cho gethek de riig sharai!”

<sup>44</sup> Ai rog bai shii zun gieng pha awie bran è aishii ji duiine siakjo dun.

### *Isu iy dun*

*(Mrg 15:33-41; Lug 23:44-49; Jon 19:28-30)*

<sup>45</sup> Hanai duchoi rey pha ishak shii zab soh shii igiia rey ne thab dun, ji pha igiia ne ishak uom thog dang pha thab dun. <sup>46</sup> Habjuang ishak uom rey ramuui shii Isu è boh ziak, “Eli, Eli, lama sabakhthani?” Jipha miyaosiu ne, “Guro Hamangkhung-aphuui! Guro Hamangkhung-aphuui! Na ne gu shii nyie rek ne thoh muui phlei?”

<sup>47</sup> Thiichihih riu pha giak brantheck è yao, “Ai ne Elija shii ho ramuui ro!”

<sup>48</sup> Ithek è jia è ran srane yung neb jia yie srane phuui bisieng shii wo ne muchang shii jiang ne aishii phi ne niing yi pha rek.

<sup>49</sup> Jishii gaithek è yao, “Khan bi, Elija è wuii ne aishii ragia rek phi pha ji riig bi bo!”

<sup>50</sup> Isu è dinne boh ziak ne idoh hè pha misey sey marui.

<sup>51</sup> Misiahò shii theg pha yung de ijuang è yie dang ne ikhiing thog dang pha zedun. Sohnyiak de shamdun, shakthek de chuidun, <sup>52</sup> wiengthek de hong dun, chiih-è, Hamangkhung-aphuui pha brantheck iy dun pho thek de hòi ne chai sieng. <sup>53</sup> Ithek de wieng ji thoh muui ne, ithek Isu iy ne hòi din pha idoh è ithek de Rajan So hà wuii dun. Thiisa hà ithek shii bran bajo è doh.

<sup>54</sup> Arming pha dumuui nane siphaihithek hanyie è Isu shii riig ne rai pho è sajiid sham pha nane nyie thek rey pha doh ne zab rum ne yao, “Ai ne izai Hamangkhung-aphuui pha Aphuui ro Dufuui chak ara!”

<sup>55</sup> Thiichihih shii bajo hò-amuiithek um, ithek ne ruang è riig ne rai. Hanyie yi Galili è Isu shii nong phi pha wuii gieng pho ro. <sup>56</sup> Ithek ne Mery Magdalene, Jems nane Joseph pha amuii Mery, nane Zebedi pha yiy ji ro.

### *Isu shii wieng muui*

*(Mrg 15:42-47; Lug 23:50-56; Jon 19:38-42)*

<sup>57</sup> Habjuang rey mage shii, Arimathea è bukho bran jia wuii thog ruii; ai beng ne Joseph ro, chiih-è, ai de Isu ro samoy jia ro. <sup>58</sup> Ai è Philath moe shii wuii srane Isu siu ji lia. Philath è Joseph shii siu ji phi ge pha yung. <sup>59</sup> Ji è, Joseph è ji yie srane, yung iwo jia è jiang phi, <sup>60</sup> chiih-è, awai wieng shii wieng muui, ji pha ne shakgang shii inai lujia pha ibi shii jog pha wieng ji ro. Ai è ji pha wieng habin shii lubao boh jia è kheb marui ne dun dun. <sup>61</sup> Mery Magdalene nane gai Mery yi wieng ji hà dug.

### *Wieng shii riu pha sandri*

<sup>62</sup> Jipha thimiàng ne Jew Thung pha Inai ro, boh phabithek nane Pharisithek Philath shii wuii ne si <sup>63</sup> srane yao, “Masdo, gathek ne khlam ji a-iy ba pha ibi shii yao pha miyao ji ne now muui ro, ai è yao, ‘Gu ne da-um shii hòi din ruii phro.’ <sup>64</sup> Ji è ji pha inai thog dang pha wieng ji shii ne wie thiàngang pha yung mage bo, ji arone, ai samoythek wuii ne ai siu ji agow mua phro, chiih-è brantheke shii ai ne iy pha è hòi din rone ayao mua phro. Hì pha khlam ne igobi pha è de bajo awie pha rey ruii phro.”

<sup>65</sup> Philath è ithek shii yao, “Thiàngangpho yie ne, wuii ne nawaithek è khi-èrek mua pha ji rek ne khan yi bo.”

<sup>66</sup> Ji è ithek de thiichihih thoh ne wieng hà wuii dun srane wieng ji ahong yi pha lubao shii wie bin ne sandrithek shii khan ne rai yi ne dundun.

## 28

### *Hò din*

*(Mrg 16:1-10; Lug 24:1-12; Jon 20:1-10)*

<sup>1</sup> Jew Thung pha Inai idoh, Deobari hamiàng hasiang chiu mage shii, Mery Magdalene nane gai Mery ne wieng ji riig pha wuii dun, <sup>2</sup> Humblo thiichihih shii sajid boh jia sham ruii; Ithong pha hamangkhliee jia hamangkhang re-è thiichihih shii wuii thog ne, lubao ji hong ne thiichihih shii dug dun. <sup>3</sup> Ai ro dong pha ji ne muchuang duiine ro, chiih-è airo yungthek ne hayun duiine imo ro. <sup>4</sup> Sandrithek ne rum ne sham ne iy pha brantheke duiine rey dun.

<sup>5</sup> Hamangkhliee ji è hò-amuii shii yao. “Nathek ne arum rabo,” Ai è yao, “Gu ne thieg muui ro nasa ne hanyie shii bai hà zun ne ua muui pha Isu shii sow ramuii ro. <sup>6</sup> Ai ne ichiih shii oi ro; ai ne awai yao pha duiine hòi jong ro. Ichiih aishii ruii pha ji shii wuii ne riig bo. <sup>7</sup> Thuh shii jog dun ne, ai samoythek shii yao bo, chiih-è ai ne iy pha ji è hòi ro, thiisa hà ai ne ithek ibi hà Galili hà dun ramuii ro; thiisa hà nathek ne aishii doh ruii phro! Chiih-è gu nathek shii nyie yao pha ji now bo.”

<sup>8</sup> Ji-è, ithek de wieng ji jog thoh ne dun shii, rum pha de rum ne sang pha ji è ran srane ai samoythek shii yao.

<sup>9</sup> Humblo shii Isu è ithek shii si ne yao, “Liijiing nathek rog shii um bo.” Ithek è ai moe shii wuii srane ai lai shii khoh srane aishii misiasia. <sup>10</sup> Isu è ithek shii yao, “Nathek ne arum rabo. Dun ne gu khuiinothek shii Galili hà wuii iang pha yao mage bo, thiisa hà ithek è gu shii doh ruii phro.”

### *Sandrithek pha mua*

<sup>11</sup> Hò-amuiithek ne awaithek lumuii hà dun ramuii shii, thiichihih wieng thiàngang pha giak sandrithek de idoh rajan hà dun srane boh phabi shii nyie rey pha ji zab yao phi. <sup>12</sup> Boh phabithek è dukhothek shii si srane nung rai; ithek è sandrithek shii bang bajo phi <sup>13</sup> srane yao, “Nathek ne hi è yao chid phro, airo samoythek è gathek men pha habiu shii wuii ne ai siu ji gow ne yie dun. <sup>14</sup> Badri è ji yao ruii arone, ithek mirek asi rone gathek è aishii nya-nyiu ne yao phi phro, ji-è, nathek ne arum rabo.”

<sup>15</sup> Sandrithek è bang ji yie srane ithek shii nyie rek bo è yao pha ji rek phi. Chiih-è ji pha mua ne ji pha idoh è yie dang ne sudoh thog pha Jewishthek ro mua ji duiine shiidyun ro.

### *Isu ne samoythek moe shii dong khlei*

*(Mrg 16:14-18; Lug 24:36-49; Jon 20:19-23; Blk 1:6-8)*

<sup>16</sup> Samoy snajia thek ne Isu awai è wuii bo ne è yao marui pha Galili phiingduii hà wuii dun. <sup>17</sup> Ithek è aishii doh mage shii ithek è aishii misiasia. Giak è than pho de um, <sup>18</sup> Isu è ithek moe inui wuii srane ithek shii yao, “Gu shii ne hamangkhang hà nane sohnyiak pha riichai phi jong ro. <sup>19</sup> Ji-è, wuii srane zab pha ithua hà zab brantheek shii gu samoy rab phi bo: ithek shii Aphuii ibeng è, Dufuii ibeng, chiih-è Ragung So ibeng è khowo phi bo, <sup>20</sup> chiih-è, gu è nathek shii yungjong pha jithek zab shii nuii yi pha yua phi bo. Gu ne nathek rog shii iidohhè thog pha um ruii phro.”

## MARG Ro Muawie Yaophi

*Marg chaig pha jigigam hì ne Hamangkhung-aphuii pha Dufuii Isu pha Muawie ji zey ne um ro.* Isu ne riichai um ne bliathek rek pha rone zey pha jigigam ro. Ai riichai jine ai miyaogamthek yua pha jithek è thieg ruii phrone zey ne um ro. Ai blu è ibuii khia pha jithek ro, chiih-è layogthek khung phi pha è thieg dun rone zey ro. Isu è yao, Ai ne Hamangkhung-aphuii ro Dufuii ro, chiih-è ai ne branthek ro layog ruang rek phi pha wuii ro. Jithek yao pha jigigam zey ne um ro.

*Marg* ne Isu è bliathek rek pha ji zey dang ne ruii phi. Jon khowo phi pha ji sieng ne Hamangkhung-aphuii pha Mua ji yao ne khowo phi ne rai pha jigigam chiih-è Isu shii ibuii è chuajan noh pha miyao ji lujia zey srane sia ne blia rek pha jigigamthek zey ne um ro. Inai bajo re pha idoh è ai samoythek ne bajo wie gua dun. Jishii, aishii mak rek pho ne bajo lijieg dun pha jigigam zey ne um ro. Idoh pha jigigam ne Isu è sohnyiak shii diigchiao rek ne sieng marui pha jigigam ji zey ne um ro.

Jipha diigchiao ne Isu è bai shii zun ne iy dun pha ji zey ne um ro. Chiih-è, ai ne chai hòì din pha ji de zey ne um ro *Marg*

### **Iliing shii um pha ji**

Muawie jao pha (1:1-13)

Isu ne Galili hà hong ne blia rek (1:14—9:50)

Galili re-è Jerusalem (10:1-52)

Idohhè pha habda nane Jerusalem moe shii (11:1—15:47)

Isu hòì din (16:1-8)

Khia pha nane Hamangkhung hà dun pha hòì din (16:9-20)

*Khowo phi pha Jon è yua*

(*Mth 3:1-12; Lug 3:1-18; Jon 1:19-28*)

1 Hì pha Mua Wie ne Hamangkhung-aphuii pha Dufuii Isu Masi Chiang ro.\* 2 Hì ne Aijaya chaig è zey pha ji duiine jao ne re ramuii ro:

“Hamangkhung-aphuii è yao, naro lumuii hong yi pha,  
‘gune guro muapho na è ibi thoh ruii phro.’

3 Bijjujia ne balimuang hà ziaak ne rai ro,

Itthong wuii pha lumuii ne khriig rab ne rai iang bo,  
ai lua pha lumuii ne miang rab iang bo!”

4 Chiih-è Jon ne balimuang hà khia, khowo phi ne yua. †Ai è branthek shii yao, “Nawaithek layogthek re-è idoh khid srane khowo yi mage bo,” “chiih-è Hamangkhung-aphuii è nathek ro layog shii khung phi ruii phro.” 5 Judea pho thek chiih-è zab Jerusalem pha rajan pho thek de Jon shii riig pha chiih-è ai miyao yoi pha wuii thog. Hanyie è layog arek sha pha rone yao pho shii ai è Jordan kho shii khowo phi.

6 Jon ne ùd pha iman è rab pha yungthek guui, ai rinyie shii ne shukhug pha rathang ring ro. Ai ne muroma chiih-è jabiing chumud chie ne rai ro.

\* 1:1 1:1: Giak jigi shii oi ro Hamangkhung-aphuii pha the Dufuii. 1:2 1:2: Mal 3:1 1:3 1:3: Aij 40:3 (LXX) † 1:4 1:4: Jon ne balimuang shii khia, khowo phi ne yua; giak jigi shii um Jon khowo ne balimuang shii khia ne yua. 1:6 1:6: 2Saj 1:8

<sup>7</sup> Jon è brantheek shii yao, gu è de bajo boh rek pha gai jia wuiiramui ro. Ai ne bajoboh ro, gu ne airo khiao duiine bam ne ai lakhia ithang de athan mua phi ruii phro. <sup>8</sup> Gu ne nathek shii kho è khowo phi bie, jishii, ai ne nathek shii Hamangkhung-aphuii ro Ragung So è khowo phi ruii phro.

*Khowo nane Isu shii chuajan*

*(Mth 3:13—4:11; Lug 3:21-22; 4:1-13)*

<sup>9</sup> Achia dang pha idoh shii, Isu ne Nazareth beng pha ithua è Galili thiig hà wuii thog srane Jordan kho shii Jon wad re-è khowo yi. <sup>10</sup> Isu è khowo yi srane fuang khia mage shii, hamangkhung ne hong pha doh, chiih-è, Ragung ne fuii pharo duiine thazam aishii khey thog. <sup>11</sup> Chiih-è hamangkhung è goh jia yao ruii, “Na ne guro bushun pha Dufuii ro, na shii gu ne bajo miie ro.”

<sup>12</sup> Jipha Hamangkhung-aphuii pha Ragung è Isu shii balimuang hà noh dun. <sup>13</sup> Thiisa hà aishii ne, Sakhathong è inai sawi chuajan ne rai dun ro. Ai ne balimuang pha miiramtheek rog shii rai ne de, jishii hamangkhliie è aishii nong phi ro.

*Û uapho wi shii Isu è ho*

*(Mth 4:12-22; Lug 4:14-15; 5:1-11)*

<sup>14</sup> Jon zum ne phatheg chab pha iidohhè, Isu ne Galili thiig hà dun thog din ro, thiisa hà ai ne Hamangkhung-aphuii pha Mua Wie ji yao ne rai: <sup>15</sup> “Hamangkhung-aphuii pha Sajathua ishak ji thog sha ruii ro, ji-è, nathek ne layog arek sha pha thadoh khid ne Mua Wie hi shii migi rek mage bo.”

<sup>16</sup> Ji è yao srane Isu è Galili beng pha khabang iring hà wuii thog mage shii, Isu è ù ua pha nyi shii doh. Simon chiih-è ikhuii Andrew ne chiug mua ne rai pha doh ro. <sup>17</sup> Isu è isa shii yao, “Thawuii ne gu rog shii luagieng bo, chiih-è nasa shii sudoh è thiwing brantheek shii zum pha yua phi pha ro.”

<sup>18</sup> Khthiie ithek ne awaithek ro chiug thoh srane ai rog shii luagieng.

<sup>19</sup> Ìujia thithe hà lua mage shii Isu è Zebedi pha dufuii Jems chiih-è Jon ne awai sa run shii chiug mua pha saro ne rai iang pha doh ruii phro. <sup>20</sup> Isu è isa shii doh ne ho mage shii, isa de awai sa aphuii Zebedi shii run lakhung pha brantheek rog shii thoh marui ne Isu rog shii luagieng dun.

*Bran jia rog shii ne ibuii ragung um*

*(Lug 4:31-37)*

<sup>21</sup> Isu nane samoytheek ne Khaphernaum beng pha thawun hà wuii dun. Chiihphado thimiang Jewtheek Thung pha Inai shii, Isu ne Misiahò hà wuii srane ithek shii yua. <sup>22</sup> Itheek ne Isu muyua ji nuii ne zab wiengphleg dun, nyieliishii, Isu ne Iphey yua pha masdo duiine asi pha riichai um ne yua dun ro.

<sup>23</sup> Hamblo shii awie pha ragung è jiang pha jia è Hamangkhung-aphuii ro Misiahò shii wuii thog srane ziaak ne yao, <sup>24</sup> “Na ne gu rog shii nyie blia um lei? Nazareth pha Isu, na ne gu shii diig phi pha wuii ne bey? Na ne hanyie lei? Ji gune thieg muui ro, nane Hamangkhung-aphuii pha So muapho ro.”

<sup>25</sup> Ji-è rek mage shii, Isu è giung ne yao, “Airo pha bucho è fuang khia mage bo!”

<sup>26</sup> Ji è yao mage shii, ibuii ragung ne sham ne khrif srane ziaak ne ji pha bucho è fuang khia dun ro. <sup>27</sup> Wiengphleg pha blia rek mage ne ithek ne awaithek chung yao rai, Hi pha muyua ne nyie lei? Hi ne miyao iwo yua ne bey? Aishii ne riichai um ara ro, ibuii ragungtheek de ai miyao nuii dun ro.

<sup>28</sup> Isu è rek pha blia miyao jine ne rib jia shii Galili thiig hà yoi thog dun ro.

*Isu è bajothek shii gang phi*  
(Mth 8:14-17; Lug 4:38-41)

<sup>29</sup> Isu ne Jems chiih-è Jon, chiih-è gai samoythek rog shii Jewthek ro Jewthek misiahò thoh srane Simon chiih-è Andrew hò hà wuii thog dun.  
<sup>30</sup> Thiisa hà Simon ro khiing ne hakhang zia ne rad wuii. Isu è thiichiih shii thog dang mage shii ithek è aishii yao. <sup>31</sup> Isu ne ai moe shii wuii srane aishii wad è sasey è chaing srane riu yi. Ji è rek mage shii hakhang zia pha ji ne gang re dun ro. Chiihphado ai ne ithek shii chie niing pha rab ne phi.

<sup>32</sup> Jipha habjuang hasiang yem ched pha idoh shii ithek è radpho shii chiih-è ibuiithek ragung è jiang pho thek shii Isu moe hà noh ne wuii thog ruii. <sup>33</sup> Chiih-è, thiigpho de zab habin moe shii wuii thog ne riig. <sup>34</sup> Thiichiih shii Isu è ithek shii yoyo pha miiriie è rad pho thek shii gang rek phi, chiih-è, ibuiithek ragung shii de zab khia phi. Isu è ibuiithek ragung thek shii aro yi ro, nyieliieshii ibuii ragungthek ne Isu ne hanyieliie shii thiejong ro.

*Isu è Galili thiig hà miyao yua*  
(Lug 4:42-44)

<sup>35</sup> Jipha thimiang pha hamiang riang shii Isu ne sieng srane liijiing ithua hà sia pha wuii dun ro. <sup>36</sup> Ji è wuii pha idoh shii, Simon chiih-è gaithek de aishii so pha wuii dun. Ithek è ai thog mage shii, <sup>37</sup> ithek è aishii yao, ithek ne na shii sow ramuii ro.

<sup>38</sup> Ji è yao magunde, Isu è ithek shii yao din, “Gethek ne zab pha gai thiigthek hà de wuii chid phro. Chiih-è gune è rek ne yua chid phro, nyieliie shii, gune ichiih shii hì è rek pha ji wuii ro.”

<sup>39</sup> Ji-è, Isu ne Galili pha ithua hà lua srane Jewthek ro Jewthek misiahò shii yua ne zab pha ibuiithek shii de khia phi.

*Bran jia shii gang phi*  
(Mth 8:1-4; Lug 5:12-16)

<sup>40</sup> Awiedang pha hia è rad pha jia yi Isu moe shii wuii thog ne yao, na è wie<sup>‡</sup> rek pha now arone, hì pha hia riie pha ji ne wie nyarek mua phi.

<sup>41</sup> Isu è bushun now<sup>§</sup> ne awai wad è aishii khoh srane yao, “Gune wie rek phi pha yang muui ro.” Ji-è, Isu è yao, wie re mage bo, <sup>42</sup> Ji è yao mage shii ji pha hia ne wie redun. <sup>43</sup> Ji è rek pha idoh shii Isu è aishii gang è yao srane thoh ge: <sup>44</sup> Chiih-è hì pha blia rek phi pha ji ne hanyie shii de ayao rabo. Ji è rek pha Chiang ne chiih-è Moses è phi pha jigigam duiine khlem yi srane miiriie ji wie re pha Chiang è phabi moe shii wuii ne khlem jithek zid mage bo. Ji è rek arone, ithek è na miiriie ne wie redun rone nyathieg ruii phro.

<sup>45</sup> Isu è ji è yao magunde, ithek ji yao rone yao muui. Ji è rek mage shii ithek ne Isu moe shii bajo wuii thog, ji-è, ai ne ithek ro thiig jishii awuii mua din pha re dun. Ji è re mage ne Isu ne liijiing um pha ithua hà ug ne rai dun ro. Ji hà ug ne rai magunde, ithek ne athodang pha ai moe shii wuii thog.

## 2

*Isu è slemriie pha jia shii gang rek phi*  
(Mth 9:1-8; Lug 5:17-26)

---

**1:39** 1:39: Mth 4:23; 9:35    ‡ **1:40** 1:40 Wie sia ne gang phi    § **1:41** 1:41: Bushun; Giak jigi shii ne um roLijieg.    **1:44** 1:44: Lew 14:1-32



<sup>1</sup> Isu ne inai lujia idoh, Khaphernaum beng pha thiig hà awai hò shii dun thog din ne ji pha muathek shii yoi dun. <sup>2</sup> Ji è yoi mage ne ithek bajo wuii thog mage ne hò iliing hà ithua oi sha chiuh-è habin moe shii de dug pha biang de oi dang pha re dun. Ai è ithek shii Hamangkhung-aphuui miyao ji yua. <sup>3</sup> Bran wi è slemriie pha ji shii oh srane Isu moe hà nohthog. <sup>4</sup> Bran bajo um pha ji è ithek wi ne Isu moe shii noh ne awuii mua ro. Ji-è, ithek ne Isu khrug lakhung pha hò mugoh ji hong srane aishii lawiao rog shii Isu ibi shii zun mage. <sup>5</sup> Bran wi ji è bajo migi rek pha doh mage ne Isu è slemriie ne rad pha ji shii yao, gu ani wo! Na layog ne gu è khungjong phi ro.

<sup>6</sup> Ji è yao magunde, Iphey yua pha masdothek è awaithek lubu hà ug ne now, <sup>7</sup> nyie khi-èrek ne ai ne hò è rek ne yao mua phlei? Hì ne makhakriing rek pha miyao ro, nyieliieshii, layog shii khung mua phi phane Hamangkhung-aphuui bie ro.

<sup>8</sup> Ithek è nyie now pha ji ne Isu ne ibi thieg dun ro. Ji-è, Isu è din ne ithek shii yao, nyie rek ne nathek ne ji è now phlei? <sup>9</sup> Slem riie pha ji shii hò è sai pha, naro layogthek ne khung jong phi ro è yao pha ji wie bey, asi pha jiiè srane nawai lawio chiing ne lua mage bo è yao muui pha ji ne wie bey? <sup>10</sup> Bran Dufuii hìne sohnyiak shii layog khung phi pha riichai um ara rone izaì doh yi ro, gu nathek shii khagi rek ruii phro. Ji-è ai è slem rad pha ji shii yao, <sup>11</sup> “Gu na shii yao, sieng srane nawai lawio ji chiing ne nawai hò hà dun mage bo.”

<sup>12</sup> Ithek è riig dang pha ji shii, ai ne sieng ne awai lawio chiing srane awai hò hà dun dun ro. Ji è rek mage shii, ithek ne rum ne Hamangkhung-aphuui shii yao, na shii laso ro! “Hì è rek pha blia ne gathek khuchung de adoh ba ro.”

*Isu è Lewi shii ho*  
(Mth 9:9-13; Lug 5:27-32)

<sup>13</sup> Isu è dinne Galili pha khabang iring shii wuii thog mage shii ibrogthek ne Isu moe shii wuii thog. Ji-è, thiichiih shii Isu è ithek shii yua pha jao din. <sup>14</sup> Ji è rek ched ne Isu lua ramuii shii, mijin than pha jia awai mijin than pha ophis shii dug ne rai pha doh, ji pha Lewi ne Alphayus pha dufuii ro. Isu è aishii ho, “Na de gu rog shii luagieng bo.” Ji è yao mage ne ji pha bran è jiiè srane Isu rog shii luagieng ro.

<sup>15</sup> Ji è rek ched pha idoh shii Isu è ji pha Lewi pha hò hà wuii\* srane michie chie ramuii shii gai mijin than pha layog pho thek de Isu nane ai samoythek rog shii wuii ne thiibliie shii dug srane michie chie gieng. <sup>16</sup> Iphey yua pha Pharisithek è Isu ne layog pho chiuh-è mijin than pho rog shii michie chie pha doh mage ne ithek è Isu pha samoythek shii sai, nyie rek ne ai ne ji è rek pha thek rog shii michie chie gieng phlei?

<sup>17</sup> Isu è ithek miyao ji yoi ne chang, hanyie arad pho ne ma pho shii achid phro, jishii, hanyie thek yi radpho ne, mapho shii chiid ruii phro, Gune ilab pho shii ho pha awuii ro, jishii gune layogthek shii ho pha wuii phro.

*Minyie nyie pha chiang è miyao sai*  
(Mth 9:14-17; Lug 5:33-39)

<sup>18</sup> Sai pha inai jia shii Jon khowo phi pha samoythek chiuh-è Pharisithek ne minyie nyi ne rai habuii ne, ithek è Isu shii wuii srane sai, “Jon chiuh-è Pharisithek pha samoythek ne minyie nyi habuii shii na samoythek ne nyie rek ne minyie anyie ga?”

\* 2:15 2:15: Lewi hò hà; chiuh-è airo hà (jine Isu hò hà ro) hò.

<sup>19</sup> Isu è chang, nathek ne inow bey, phiyiy shii wuii pha biwenthek ne michie achie pha nyadun ge ne bey? Khuchung de ji arek phro! Phiyiy pha bufuii um shii ne ithek ne anyie chid. <sup>20</sup> Jishii, ji pha idoh thog ramuii ro, phiyiy pha bufuii ne ithek rog è ruang noh dun phro. Chiihphado ithek ne minyienyie ruii phro.

<sup>21</sup> Hanyie è de yung thileg iwo jine phadiig høg shii miak ne aphioq phro. Nyieliieshii yung thileg iwo ji è ri srane phadiig høg jine boh ji dun phro. <sup>22</sup> Hanyie è de jariie høg shii ne phuui nyiu giog ne achab phro, nyieliieshii phuui nyiu bow mage ne ji pha jariie ne chui srane phuui ne zab noi dun phro. Ji-è phuui nyiu ne jariie iwo shii chab chid.

### *Jewthek Thung pha Inai pha musai sai*

*(Mth 12:1-8; Lug 6:1-5)*

<sup>23</sup> Jewish Thung pha Inai shii, Isu chiih-è ai samoythek ne phiug raig è dong srane lua ramuii shii, ithek è phiug iwoi ji chiig mage. <sup>24</sup> Ji-è Pharisithek è Isu shii yao, “Riig mage, naro samoythek è Jew Thung pha Inai shii hi rek phane gethek ro Iphey shii gidieg rek ro!”

<sup>25</sup> Isu è ithek shii chang ne sai, “Nathek ne atham riig bey? Dawid Saja ai chi-iyiy mage shii nyie rek phlei? <sup>26</sup> Ai è Hamangkhung-aphuui pha hò hà wuii srane Hamangkhung-aphuui shii zid pha iweb ji chie maphi, ai ji è rek pha idoh ne Abiathar Phabi giu de um ro. Gathek ro Iphey ji riig arone, ji pha iweb ne phabithek è chie mua bie, jishii, Dawid Saja è chie srane awaithek shii de phi ne chie yi.”

<sup>27</sup> Isu è miyao jong srane, “Jewthek Thung pha Inai ne bran shii wie re yi pha Chiang è rab phi ro, Jewthek Thung pha Inai pha Chiang è bran arab ro. <sup>28</sup> Ji-è, Bran Dufuii ne Jewthek Thung pha Inai ro Ithong de ro.”

## 3

### *Wad slemriie ne rad pha jia*

*(Mth 12:9-14; Lug 6:6-11)*

<sup>1</sup> Ji-è rek ched mage shii, Isu ne Jewthek misiahò hà idoh dun shii, thiisa hà wad shii slemriie pha jia um. <sup>2</sup> Thiisa hà giak thek è Isu shii ichiig they pha khan ne rai iang ro. Ji-è, ithek ne Isu moe shii wuii ne, Jewthek Thung pha Inai shii gang rek phi bey ne, ji riig pha khan ne rai. <sup>3</sup> Isu è wad shii slemriie pha jishii yao, “Gu moe shii wuii mage bo!” Ji è yao ched ne, Isu è ithek shii sai, <sup>4</sup> Jew Thung pha Inai gethek thiigpha Iphey è gethek shii nyie rek bo ne zey lei? Nong phi pha zey bey? Asi buii rek phi bo è zey bey? Chiih-è brantheke ro chai shii ragia rek phi ne bey? Asi pha chai shii mua muui ne bey?

Ji è sai mage ne, ji pha brantheke ne nyie de ayao muluii pha re dun phro. <sup>5</sup> Isu è ithek ne lubu siie now ne rai pha thiieg ne bajo zo dun, ji-è, ai ne lijeg srane ithek shii shan srane riig mage ne wad zi ne rad pha ji shii yao, “Na wad ne gu shii phia mage bo,” ai è wad phia mage shii, ji pha wad ne gang re dun. <sup>6</sup> Ji è re mage ne ji pha Pharisithek ne Jewthek misiahò ji thoh srane Herod ro brantheke rog shii dug srane Isu shii ua pha phak rai.

### *Khabang iring hà ibrog um*

<sup>7</sup> Isu chiih-è ai samoythek ne Galili pha khabang iring è luaramuii shii, ibrogthek de ithek rog shii luagieng. Jipha brantheke ne Galili, Judea,

<sup>8</sup> Jerusalem, Idumia thiig hà rai pho, Jordan ithua: bichiu hà rai pho, Thaire chiih-è Sidon pha rajan hà rai pho ro. Ithek zab è Isu moe shii wuii thog, nyieliieshii ithek è Isu è rek pha bliá jithek yoi dun ro. <sup>9</sup> Isu ne thiichiih shii Ibrog ne bajo iphiing um pha ji è Isu ne awai samoythek shii run jia shii khriig sow ne ruii iang pha yung, nyieliieshii ji pha ibrogthek è Isu shii wuii srane zig mage inow ne yung. <sup>10</sup> Isu è bajo branthek shii gang rek phi, jiè hanyie rad aishii khoh pha aishii reng ne ai moe shii wuii thog dun. <sup>11</sup> Chiih-è, khuchung magunde aishii, ibuii ragungthek è jiang pha è Isu shii doh ne, Isu ibi shii thud srane zia ne yao, nane Hamangkhung-aphuii pha Dufuii ro.

<sup>12</sup> Ji-è Isu è ibuii ragung shii giung, hì pha miyao ne hanyie shii de ayao dang rabo.

*Isu è samoy snanyi shii ho*  
(Mth 10:1-4; Lug 6:12-16)

<sup>13</sup> Ji è rek pha idoh shii, Isu ne phiing hà wuii srane ai è chiid pho thek shii awai moe hà ho, chiih-è ithek de ai moe shii wuii thog. <sup>14</sup> Thiichiih shii, Isu è snanyi shii awai guaphasamoy rek pha gua. Ithek shii Isu è samoy rone beng ne ruii. Isu è yao, “Gune nathek shii gu rog luagieng pha gua ro. Ji-è gune ithek shii de gu miyao ji yao pha gai hà de wuii yi pha ro. <sup>15</sup> Nathek shii ibuii ragungthek khia pha riichai um ruii phro.”

<sup>16</sup> Ai samoy snanyi ne Simon (Isu è aishii Phithar beng ne ruii phro); <sup>17</sup> Jems nane ai ikhuii Jon, Zebedi pha dufuii (Isu è isa shii Boanerges beng ne ruii, ji pha ibeng ne hakhliing pha bran rone ibeng phi). <sup>18</sup> Andrew, Philip, Bortholomeu, Methiu. Thomas, Jems Alphayus pha dufuii, Thadaeu, Simon thiig shii dumuii rek pha ji ro, <sup>19</sup> Chiih-è, Judas Iskharioth hanyie è Isu shii zum yi pha samoy ji ro.

*Isu nane Sakhathong*  
(Mth 12:22-32; Lug 11:14-23; 12:10)

<sup>20</sup> Ji è rek pha idoh è, Isu ne dinne hò hà dun thog, dinne ji è rek pha ibrog boh è wuii thog mage ne Isu chiih-è airo samoythek ne michie chie pha de ajo dang pha re dun ro. <sup>21</sup> Ai haliingpho è ji yoi mage ne Isu shii idoh noh pha wuii thog dun. Nyieliieshii, ithek è bajo yao ramuii, Ai ne biu dun ro.

<sup>22</sup> Jerusalem è wuii pha Iphey yua pha masdothek è yao, “Aishii ne sakhathong um ro, ji pha sakhathong ne ibuii boh ji ro, jiè ai ne ibuii shii fuang khia yi pha blu phi ro.”

<sup>23</sup> Ji-è Isu ithek shii ho srane ithek shii najang è shan ne yao phro: Khi è rek ne sakhathong è sakhathong shii khia mua mage phlei? <sup>24</sup> Soh chung gui rai ne che dun arone, ji pha thiig ne idang adung mua pha rai dun phro. <sup>25</sup> Haliing chung adung pha gui rai arone, ji pha haliing ne idang adung pha che dun phro. <sup>26</sup> Ji-è sakhathong pha sajathua pho chung de gui rai arone, ji pha sakhathong thek de adung rai phro, chiih-è ji pha sajathua ne idang arai mua phro.

<sup>27</sup> “Hanyie de gang bran shii zum ne ajoi sapho shii ne, ji pha gang hò hà mogo agow mua phro.”

<sup>28</sup> Gu nathek shii izai yao phro, branthek pha zab layogthek, chiih-è khama pha Hamangkhung-aphuii shii buii yao pha thek ne nyakhung phi

phro. \* <sup>29</sup> Jishii, hanyie è Ragung gang shii awie pha gidieg rek pho shii ne khuchung de akhung phi phro. Nyieliieshii, ai ne idang rai pha layog rek phro. <sup>30</sup> Isu ji yao pha ne, ithek è aishii ne ibuii ragung um rone yao phi ne ji miyao phi ro.

*Isu pha amuii chiih-è airo khuiinothek wuii thog phro*  
(Mth 12:46-50; Lug 8:19-21)

<sup>31</sup> Ji è re pha idoh è, Isu pha amuii chiih-è ikhuiithek wuii thog ruii phro. Ithek ne sibiang hà riu srane Isu shii si pha rone mua thoh ge phro. <sup>32</sup> Isu moe shii dug pha ibrogthek è Isu shii yao, riig mage bo! Na amuii chiih-è na khuiinothek chiih-è na bumuiithek ne na shii si pha sibiang hà riu ne khan ramuii ro.

<sup>33</sup> Isu è ithek shii chang, “Hanyie ne gu amuii lei? Hanyie ne gu ikhuii lei?” <sup>34</sup> Isu è khama jia ai moe shii dug pho shii riig srane yao, “Riig mage bo, gu amuii ne hìthek ro, chiih-è gu khuiinothek hì ro. <sup>35</sup> Gu amuiithek, gu khuiinothek chiih-è gu bumuii ne hanyiethek è Hamangkhung-aphuii è nyie chiid pha ji rek pho ji ro.”

## 4

*Jiiepho pha najang*  
(Mth 13:1-9; Lug 8:4-8)

<sup>1</sup> Dinne Isu è Galili pha khabang iring hà rai srane yua ramuii shii, ai moe shii boh ibrogthek wuii thog ne shan ne ley mage ne ai ne run jia shii khrog ne in dun ro. Run jine kho è fuang hà um, chiih-è ithek ne kho iring shii riu yi. <sup>2</sup> Chiihphado ai è najang è shan ne miyaothek yua ne ithek shii yao:

<sup>3</sup> “Yoi mage bo! Luangjia shii bran jia è miiriie ne miiriie jiie pha wuii dun. <sup>4</sup> Ai è ji pha miiriie ne raig shii jiie mage shii, giak ne lumuii hà chiih dun. Jipha miiriie ne fuiithek è wuii srane zab chiing ne chie muii. <sup>5</sup> Giak miiriie ne lubao surong pha nyak shii chiih dun. Jipha miiriie ne kthiie sieng shii. Thiisa hà nyak ne jam asi pha ji è <sup>6</sup> hasiang siang mage shii, misieng ne zab goh ne iy dun; nyieliieshii, ji pha misieng ne iriing jam adab mua pha ji è iy dun ro. <sup>7</sup> Giak miiriie ne migem um pha jabiing hà chiih dun ro, ji pha miiriie ne siengthog mage shii, migem muiithek yang ne sieng dun pha ji è iwoi awoi mua pha re dun. <sup>8</sup> Chiih-è giak miiriie ne nyiak wie hà chiih ne, ji pha miiriie ne wie sieng ne, iwoi wie woithog ruii, giak ne phriie sa-um woithog ruii, giak ne briie sariig woithog ruii phro, chiih-è, giak ne briie wiengjia woi thog ro.”

<sup>9</sup> Din ne Isu è yao, “Hanyie shii yoi pha khothek um arone, yoi mage bo!”

*Najang shan ne yao pha miyao siu ji sai*  
(Mth 13:10-17; Lug 8:9-10)

<sup>10</sup> Isu yi awai ji shii, ai miyao yoi pho thek chiih-è samoythek è aishii wuii srane najang shan ne yao pha miyao siu ji sai, <sup>11</sup> Isu è ithek shii chang, “Nathek shii ne Hamangkhung-aphuii ro Sajathua pha miyao ug ne ruii pha ji phijong ro.” Jishii fuang hà riu pha yogai ne najang pha miyao siu ji nuii phro, <sup>12</sup> ji-è,

Ithek ne riig phane riig shii,

Thuh de adoh ro;

ithek ne yoi phane yoi shii,

\* **3:28** 3:28: awie manathek ithek è yao; din ne awie nathek ne Hamangkhung-aphuii shii buii yao pha de um ro. **3:29** 3:29: Lug 12:10 **4:1** 4:1: Lug 5:1-3 **4:12** 4:12: Aij 6:9,10 (LXX)

thuh de agao ro.

Chiih-è ithek ne ji rek arone, ithek ne Hamangkhung-aphuii shii khid phro, chiih-è, Hamangkhung-aphuii è ithek layogthek shii de khung phi ro.

*Isu è najang ji pha miyao siu yao*  
(Mth 13:18-23; Lug 8:11-15)

<sup>13</sup> Chiih-è Isu ithek shii sai, nathek hì pha najang shan ne yao pha miyao agao ba bey? Chiihphado, nyie khi-èrek ne gai pha najang è shan ne yao pha miyao ji ithek thieg mua yi phlei? <sup>14</sup> Jipha miiriie jiie pha ne Hamangkhung-aphuii pha mua ji jiie ro. <sup>15</sup> Giak ne lumuii shii chiih pha miiriie ne ji duine ro, ithek ne jipha mua nuii ched dang shii ibuii è wuii srane jipha mua ne ithek è yie dun. <sup>16</sup> Giak bran ne lubao lakhung shii chiih pha miiriie duine ro. Mua jine ithek bajo lised rek ne nuii gieng phro. <sup>17</sup> Jishii, ji pha mua ne ithek lubu iliing hà athog ba shii, mua phi pha Chiang è, ithek shii diigchiaothek thog mage shii ithek ne jithek shii zab thoh din muui ro. <sup>18</sup> Giak brantheek ne migem biing hà jiie pha miiriie duine ro. Ithek ne ji pha mua ne nuii habuii shii, <sup>19</sup> Jishii awaithek sieng pha Chiang è rum ne, bukho re yi pha miie ne, ichua ichua chiid pha ji thek è ji pha mua shii ne yang dun ne sennyia muui srane ji pha mua ne iwoi awoi mua pha iy dun ro. <sup>20</sup> Jishii, giak miiriie ne nyiak wie hà chiih pha duine ro. Ithek ne mua ji nuii srane lubu hà ruii, chiih-è, iwoithek de wie woi ruii phro. Giak ne briie sa-uom woi ruii phro, giak ne briie so-riig woi ruii phro, chiih-è giak ne briie wieng jia thog pha woi ruii phro.

*Bai ichuang ne shiikhiiakhjam bucho hà*  
(Lug 8:16-18)

<sup>21</sup> Isu è dinne yao din, “Hanyie è ichuang yie srane shiikhiiakhjam chiih-è biang bucho hà ruii ne bey? Jine ithek è bunthruak lakhung hà aruii ne bey? <sup>22</sup> Nyie ug ne ruii pha ji ne fuang khia yi phro, nyie thieg ne ruii pha ji ne hong yi ruii. <sup>23</sup> Nathek shii khothek um arone yoi mage bo!”

<sup>24</sup> Isu è de ithek shii yao, “Nathek è nyie yoi pha ji shii isiie rek mage bo, nathek è ithek shii khi-èrek ne chua pha ji duine, Hamangkhung-aphuii è de nathek shii ji duine chua ruii phro, jishii, ai ne jiè de boh huak ne chua ruii phro. <sup>25</sup> Bran hanyie shii um iang phane, aishii dinne de bajo phi ruii phro, chiih-è, hanyie shii oi iang pha ji shii ne, aishii iujia um iang pha ji de yie dun phro.”

*Iriie sieng pha najang shan ne yao*

<sup>26</sup> Isu dinne yao, Hamangkhung-aphuii pha Sajathua ne hì duine ro, bran jia è awai raig shii iriie jiie marui. <sup>27</sup> Ai ne habiu shii men dun, chiih-è inai shii ne lakhung sieng, chiih-è iriie jithek ne awailum ne sieng khlei ruii, jishii, ji pha iriie ne khi-èrek ne sieng ruii pha ji ne thuh de athieg mua ro. <sup>28</sup> Jine nyiak è rek ne sieng yi srane iwoithek de woi ruii phro; igobi ne iliung liung srane irab nyiu ne sieng bi ruii phro, chiih-è, imabuiithek bua ne iwoi woi ruii phro. <sup>29</sup> Iwoi jithek men pha ishak thog mage shii, ji pha bran è awairo barai rog shii riug pha jao, nyieliieshii yamiing pha ishak ne thog ro.

*Danaro pha iwoi è najang shan ne yao*  
(Mth 13:31,32,34; Lug 13:18-19)

<sup>30</sup> Isu è sai, “Hamangkhang-aphuii pha Sajathua ne imia rone gethek ne yao nyie rek ne yao phlei?” Isu è sai. Nathek shii nyie najang è yi ne yao pha lei? <sup>31</sup> Hi ne ji duiine ro, bran jia è sohjangbling shii zab è ididuii thanaro iriie ji yi srane raig shii jiie pha wuii dun. <sup>32</sup> Ji è jiie marui pha idoh è ji pha misiang ne zab è de boh re ne sieng mage shii ji pha idiphak pha ilem shii fuiithek wuii ne irungthek rak ro.

<sup>33</sup> Isu è branthek shii awai bajo najang è hì duiine awai mua ji yua; ai ne ithek shii khama gao mua pha rek ne yao phi ro. <sup>34</sup> Ai ne khuchung magunde najang è ayao phane nyie de ayao dang ro, jishii ai ne awai samoy rog shii ji pha najang pha miyao siuthek ne wie rek ne yao phi ne gao yi ro.

*Isu è hasamkhanoi shii gak*  
(Mth 8:23-27; Lug 8:22-25)

<sup>35</sup> Jipha habjuang shii, Isu è awai samoythek shii yao, “Cho gethek ne khabang iring thrang hà wuii sha rai haro.” <sup>36</sup> Ji-è ithek ne run moe pha ibrogthek shii thoh marui ne Isu injong pha run shii khud ne in dun, jiè rek pha ji shii gai runthek de bajo um ro. <sup>37</sup> Humblo shii hasam boh sam mage, chiih-è khasao ne run lakhung shii jao thog. <sup>38</sup> Isu ne run pha idoh hà dun srane awai khruh shii tharo rone athan dang pha men dun. Samoythek è Isu shii chun ne ho, “Masdo, gathek iy sha pha rek muui pha ji ne na athieg bey?”

<sup>39</sup> Isu è jai srane ji pha hasam nane khasao shii yung, ji è giung dang shii ji pha hasam ne them dun. Thiichiih ne bajo liijiing rey dun. <sup>40</sup> Chiihphado, Isu è awai samoy shii yao, “Nathek ne nyie rek ne rum phlei? Thuh de nathek ne migi oi ba bey?”

<sup>41</sup> Jishii ithek ne Isu blia ji doh mage ne bajo rum dun chiih-è awaithek chung yao rai, “Hì ne hanyie lei? Hasam nane khajaothek de ai miyao nuii dun ro!”

## 5

*Isu è awie pha ragung um pha bran jia shii gang phi*  
(Mth 8:24-34; Lug 8:26-39)

<sup>1</sup> Isu nane ai samoythek ne dinne Gerasa pha soh thug um pha Galili khabang iring pha ithua shii thog dun. <sup>2</sup> Thiichiih thog ne Isu run è fuang nya lung dang shii, thiichiih pha wieng muang hà rai pha bran jia si iang. Jipha bran shii ne awie ragung è jiang ne um. <sup>3</sup> Ai ne idang wieng muang hà rai, hanyie de aishii zum ne chiih-è ajoi mua ro, <sup>4</sup> aishii shiirnai thang è lai wad joi magunde, shiirnai ne biethiak ne lai è dia srane dumrim rek muui. Ai ne bajo gang pha ji è hanyie de aishii azum mua ro. <sup>5</sup> Inai de, habiu de, ai ne wieng pha duchoi shii lua ne rai, chiih-è phiingthek hà shan ne lua srane ziak ne awai shii lubao è giao.

<sup>6</sup> Ai è Isu wuii ruii pha doh mage ne, Isu moe shii ran srane bam ne khung srane gang goh è yao, <sup>7</sup> “Zab è giu pha Hamangkhang-aphuii ro Dufuii, Isu! Na ne gu shii nyie blia um ga? Hamangkhang-aphuii Chiang è na gu shii diig aphi rabo!” <sup>8</sup> Ai è ji yao ruii pha ji ne nyielieshii Isu è ji pha awie ragung shii fuang khia mage bo è yao.

<sup>9</sup> Ji-è, Isu de aishii sai, “Na beng nyie beng phlei!”

Jipha bran è Isu shii chang, “Gu beng ne ibrog ro, nyieliieshii, gu iliing shii awie ragung ne bajo um ro.” <sup>10</sup> Ji è chang srane ai è Isu shii khung ne yao, awie ragung shii ji pha thiig è ruang athoh ge rabo.

<sup>11</sup> Thiichiih inui pha phiing shii wak brogpho è wak ibrog jia ram ne rai iang pha doh. <sup>12</sup> Awie ragung è Isu shii khung srane yao, “Gathek shii ne ji pha wak ibrogthek bucho shii thoh mage bo.” <sup>13</sup> Ji è yao mage ne, Isu è jithek pha awie ragung shii ji pha wak ibrog shii thoh ge. Jipha itham nyi um pha wak ibrog ne khabang hà rei ne ran srane khabang hà biung ne zem dun ro.

<sup>14</sup> Wak brogpho è jithek re pha doh mage ne ran srane thiigpho chiih-è raigpho shii de zab yao mage, ji è yao mage ne ithek de nyie re dun pha ji riig pha thiichiih shii wuii thog. <sup>15</sup> Ithek è Isu moe shii wuii thog mage shii bajo ibuii ibrog è jiang pha bran jine yung wie guui srane khani wie re ne Isu moe shii dug ne rai pha doh, jiè ithek ne ji riig srane rum dun. <sup>16</sup> Hanyie thek è ibuiithek jiang pha chiih-è wak ibrogthek shii nyie rek phi pha ji raigpho è ithek shii yao iang.

<sup>17</sup> Ji-è, thiichiih pha ithek è Isu shii wad khung srane ji pha ithua thoh ne dun bo ne yao.

<sup>18</sup> Isu è run iliing hà khud ramuii shii ibuiithek è jiang pha bran ji de Isu shii yao, “Gu shii de nathek rog shii dun gieng yi bo.” <sup>19</sup> Ji è yao magunde, Isu è aishii yao din, “Asi, nane idoh nawai hò hà dun srane nawai haliing pho shii Hamangkhang-aphuii è na shii khama bushun rek phi pha ji yao mage bo.”

<sup>20</sup> Ji è yao mage ne ji pha bran ne dun srane thiig sua shan ne lua srane Isu è nyie rek phi pha jithek shii zab yao phi. Ji yoi ne ithek de zab wieng dun.

*Jairus dimi nane hò-amuii shii Isu è gang phi  
(Mth 9:18-26; Lug 8:40-56)*

<sup>21</sup> Isu è khabang khlei pha ithua hà wuii din mage shii, thiisa hà de bran bajo wuii thog. <sup>22</sup> Jairus chiih-è thiigpho Jewthek ro Jewthek misiahò pha dumuiithek Isu moe shii wuii thog. <sup>23</sup> Jairus è Isu shii doh mage ne khungdang ne yao, “Gu dimi duiine bajo rad muui ro, na ne wuii srane wad è aishii kho phi bo, chiihphado, ai ne gang dinne sieng ruii phro.”

<sup>24</sup> Ji è yao mage ne Isu è ji pha bran rog shii wuii dun. Gai thek de Isu rog shii bajo wuii gieng pha ji è Isu moe shii ne zab ley dun.

<sup>25</sup> Thiisa hà dam snanyi è grab rek ne rad pha bimi jia um iang, <sup>26</sup> Jipha bimi ne bajo maphothek shii wuii ne riig yi ne de, chiih-è bajo bang phi ne mathek rek ne de awie phi. Ai ne wie re khlei pha asi pha bajo muna rad khlei dun. <sup>27</sup> Isu è rek pha bliathek yoi mage ne bimi jine ibrog um pha Isu moe shii wuii thog. <sup>28</sup> Awai è awai shii yao, “Gu è ai yung shii kho mage arone, gu ne gang re ruii phro.”

<sup>29</sup> Bimi jiè Isu yung shii kho mage shii, ai grab rek pha ji ne them dun. Ji-è ai ne awaishii than ruii, ai rad ne diig rek pha ji ne them dun ro. <sup>30</sup> Isu è ai ro gang yi pha blu ne khia dun rone thieg, jiè Isu ne ithek shii shan ne riig srane sai, gu yung shii hanyie mukho mage lei?

<sup>31</sup> Ai samoythek è chang, “Nyama pha bran na moe shii ley dun pha ji ne nawai de thieg; jiè na ne nyie rek ne sai phlei?”

<sup>32</sup> Ji è yao magunde, Isu ne ithek shii athodang pha ai yung shii hanyie mukho ji sow ne riig dun. <sup>33</sup> Bimi ji è aishii nyie rek phi pha ji now ne sham ne rum srane Isu lai luii shii wuii ne lagiung niing ne khung ne izai yao.

<sup>34</sup> Isu è ji pha bimi shii yao, “Gu dimi, naro migi è naro rad pha ji ne gang jong ro, jiè nane sang ne dun bo. Na è diig ne rad pha ji de gang dun bo.”

<sup>35</sup> Isu è jithek pha miyao yao ramuii shii, Jairuis hò è muaphothek wuii thog srane Jairus shii yao, “Na dimi ne iy jong dun ro, nyie rek ne Masdo shii nyama diig phi phlei?”

<sup>36</sup> Isu è ithek nyie yao\* pha ji ayoi pha rek srane, Jairus shii yao, “Na ne arum chid rabo, migi now mage bo.” <sup>37</sup> Ji è yao srane Isu è gaithek shii anoh pha, Phithar, Jems chiih-è ikhuii Jon shii noh srane thiisa hà wuii dun. <sup>38</sup> Ithek Jairus hò hà thog shii, Isu è yoi, ithek ne anomuluii pha ziaak ne cho ramuii ro. <sup>39</sup> Isu-è iliing hà wuii srane ithek shii yao, “Nathek ne nyie rek ne anomuluii pha rey phlei? Chiih-è nathek nyie rek muui ne choh phlei? Ani ne a-iy ba ro, ai ne men bie ramuii ro.”

<sup>40</sup> Ji è yao mage ne ithek ne Isu shii siak, jiè Isu ne ithek shii fuang hà thoh maruii srane ani ji pha aphuii chiih-è amuii chiih-è awai samoy uom shii noh ne ani men pha ùgud bucho hà khud dun. <sup>41</sup> Ai è bimi shii awai wad è giak srane yao, “Thalitha, khoum” jine “Bimi duui rone ho pha ji ro, gu è na shii sieng mage bo è yao ramuii ro!”

<sup>42</sup> Bimi ji è siengfad srane lua mage, (ai yi dam snanyi rey sha pha bimi ro), ji è rek mage shii, thiichihi um pho thek ne ji riig ne wiengdun. <sup>43</sup> Jishii, Isu è ithek shii ji pha miyao ne hanyie shii de ayao rabo ne yao srane yung ne ji pha bimi shii chie pha phi ne chie yi pha yung phro.

## 6

### *Nazareth hà Isu shii snai pha jigigam (Mth 13:53-58; Lug 4:16-30)*

<sup>1</sup> Ji è rek marui ne Isu ne ji pha ithua thoh srane awai samoythek shii noh ne awai thiig pha hò hà dun marui. <sup>2</sup> Jewthek Thung pha Inai shii, ai è Hamangkhung-aphuii ro Jewthek misiahò hà wuii srane jao ne yua. Ai miyao nuui pho thek de bajo um, ithek ji pha miyao yoi mage ne, zab wiengphleg dun. Ithek è awaithek chung sai rai, “Ai ne buangthek ne khi-è id ne yao dun phlei? Aishii ne khi-èrek pha khani zen ne ruii phlei?” “Ai ne hiitek wieng pha blia ne khi re-è mua phlei?” <sup>3</sup> Hi pha bufuii ne Mery pha dufuii chiih-è Jems, Joseph, Judas chiih-è Simon thek pha khuiino, zao rab ne rai pha ji asi bey? Ai bumuii ne ichiih shii rai pha ji asi bey?” Ji è yao srane thiichihi pho thek è aishii snai mua phro.

<sup>4</sup> Isu è ithek shii yao, “chaig pho shii ne awai hò, awai thiig, awai bran, awai haliing pho thek è wie anow phro, jishii gai thek ne aishii wie now ruii phro.”

<sup>5</sup> Ji-è ai ne thiichihi shii nyie bliathek de arek mua phi, wad riie ne rad pho shii kho ne gang phi bie marui. <sup>6</sup> Ai ne bajo buangthek arek mua, nyieliieshi, ithek è aishii migi arek phi ro.

### *Isu è samoy snanyi shii ithek ro thiig hà thoh ge (Mth 10:5-15; Lug 9:1-6)*

Chiihphado Isu è thiichihi inui shii um pha thiigthek hà wuii srane ithek shii miyao ji yua ne rai phro. <sup>7</sup> Ai è awai samoy snanyi thek shii ho srane nyi nyi rek ne thiig jithek hà thoh ge phro. Ai è ithek shii ibuii ragiung thek shii khia pha riichai phi srane thoh ge. <sup>8</sup> Chiih-è ithek shii yao, “Nathek rog

\* 5:36 5:36: isiie arek ro; dinne nuuihiia. 6:4 6:4: Jon 4:44 6:8 6:8-11: Lug 10:4-11



shii thagin yi bie ne nyie de ayie chiid rabo, iweb, bang chab pha shukhug biia, chiih-è, michie pheg ne chie pha bang thek de ayie chiid pha lua bo. <sup>9</sup> Lakhia ne khia bo, jishii, lai ne guii pha phadiigthek ne ahan chid rabo.”

<sup>10</sup> Ai è dinne ithek shii yao, “Hanyie è, ithek shii wie ho ne hò hà rai yi arone, nathek ne ji pha thiig athoh sapho shii ne ji pha hò shii rai bo. <sup>11</sup> Chiih-è nathek ne khi pha thiig shii wuii thog shii, ji pha thiigpho è nathek miyao nuii ne ithek shii ho ne arai yi arone, ithek ne ji pha thiig thoh ne dun juang shii, nawai thek lakhia pha nyiakphlab thiichiih kham ne fen srane dun marui bo. Ji rek phane ithek shii diig thog yi pha phriie marui phro.”

<sup>12</sup> Ji è yung ched ne ai samoythek è thiigthek hà miyao ji yua ne ithek layog rek pha ji è thadoh dun yi pha wuii dun. <sup>13</sup> Itek è ibuii ragung jiang pho thek shii khia phi, chiih-è, rad pho thek shii de thiiie è shun srane gang phi phro.

*Khowo phi pha Jon iy dun*  
(Mth 4:1-12; Lug 9:7-9)

<sup>14</sup> Ji è rek ched mage shii Herod Saja \* è jithek rek pha zab yoi dun, nyieliieshii, Isu pha beng ne bajo boh re dun. Chiih-è giak è shii yao shii, “Ai ne khowo phi pha Jon ji idoh hòì ne dun thog din ara! Ji-è aishii ne buangthek rek pha blu de um ro.”

<sup>15</sup> Giak è yao, “Ai ne Elija ro.”

Giak ne, “Ai ne buyo pha chaig pho duiine ro.”

<sup>16</sup> Herod Saja è ji pha miyao nuii srane yao, “Ai ne khowo phi pha Jon ji bey! Ai khrug shii ne tham jong muui bidey ne, dinne ai ne hòì dinne bey!”

<sup>17</sup> Herod awai è yung ne Jon shii zum ne, shiirnai rek ne phang ne phatgeg iliing hà chab muui phro. Ji è rek phane Herodias muyung ne rek yi ro, ai ne ikhunii Philip pha yiy shii Herod awai yi din dun. <sup>18</sup> Jon è Herod Saja shii athodang pha yao ne rai, “Na ne nawai khuii pha yiy ji yi phane Iphey shii zen oi ro.”

<sup>19</sup> Ji è yao pha idoh è Herodia Sajamuii (Herod pha yiy) ne bajo lijeg srane Jon shii ua yang pha now, jishii, thaluii shii ne a-ua mua phi, nyieliieshii Herod Saja um niing ro. <sup>20</sup> Herod Saja ne Jon shii bajo rum, nyieliieshii, Herod Saja è Jon ne bajo wie chiih-è bajo gang bran rone thieg dun. Ji-è ai ne Jon shii wie gayiig ne ruii, ai ne Jon miyaothek è lubu shii lijiing oi magunde, ji pha miyaothek ne bajo wie now ne nuii ne rai dun.

<sup>21</sup> Ji è rek magunde, Herodia Sajamuii è inai jia shii zo mua ne, ji pha inai ne Herod Saja giak pha inai ro, Herod Saja è dumuii boh pho, shii è arming pha boh thek chiih-è Galili thiig pha wegthek shii ho ne michie phi ramuii shii, <sup>22</sup> Herodia† dimi è iliing hà wuii ne gasiu siu srane Herod Saja chiih-è ai biwenthek shii bajo lubo rek phi, ji-è, Herod Saja è awai dimi shii sai, “Na ne nyie chiid pha now lei? Chiih-è nane gu shii nyie lia magunde, gu ne nyaphi ruii phro.” <sup>23</sup> Ai è surua thok srane yao, “Na è nyie lia magunde, gu, na shii ji phi ruii phro, guro Sajathua ji khuyo lia na de nyaphi ruii phro.”

<sup>24</sup> Dimi ji è fuang hà wuii srane ai amuii Herodia shii sai, “Gu ne nyie lia chiid phlei?”

Ai amuii è yao, “Khowo phi pha Jon ro khrug lia mage bo.”

---

6:11 6:11: Blk 13:51    6:13 6:13: Jms 5:14    6:14 6:14,15: Mth 16:14; Mrg 8:28; Lug 9:19    \* 6:14 6:14: Saja Herod: Herod Anthiphas, Galili shii bohkhoh.    6:17 6:17,18: Lug 3:19,20    † 6:22 6:22: Herodias ro dimi; giak jigi shii ne umHerodias ro dimi.

<sup>25</sup> Ji-è ai dimi ne khthiie iliing wuii din srane Herod Saja shii lia, “Gu ne na shii Jon khrug lia phro, Jon khowo phi pha khrug tham ne phandua shii giong ne thuh shii phi-dang mage bo.”

<sup>26</sup> Jipha miyao è Herod Saja ne bajo zo dun, jishii ai dimi shii agak mua, nyieliieshii, ai è biwenthek moe shii surua thak jong muui ro. <sup>27</sup> Ji-è ai ne Jon khrug tham pha awai sandrithek shii thoh ge phro. Ji è yung mage ne ji pha sandri thek ne phat heg duchoi hà wuii srane Jon ro khrug tham mey phro. <sup>28</sup> Chiih-è ji pha Jon khrug ne phandua lakhung shii giong srane awai dimi shii phi ro, ai dimi ji è choi srane ai amuii shii yi ne phi din phro. <sup>29</sup> Jon pha samoy pho è ji pha mua yoi mage ne wuii srane iy pha siu ji yi ne wieng mua phro.

*Isu è itham guii pha bran shii michie phi ne chie yi phro  
(Mth 14:13-21; Lug 9:10-17; Jon 6:1-14)*

<sup>30</sup> Ji phado samoythek ne Isu shii dun thog srane ithek è nyie thek rek ne yua marui pha jithek yao phi. <sup>31</sup> Thiichiih shii de ithek è Isu chiih-è ai samoythek shii chie pha de uhug oi dang pha wuii ruii mage. Ji-è Isu ne awai samoythek shii yao, “Cho! Gethek ne liijiing pha ithua hà dun sharai haro, chiihphado gethek de iujia ne thung pha mua ruii phro.” <sup>32</sup> Ji-è ithek ne liijiing um pha ithua hà thog yi pha run shii in ne wuii dun.

<sup>33</sup> Ji è rek magunde, Isu chiih-è samoythek ne ithek moe è yo pha rek muui rone ibi than dun, chiih-è, Isu ne hanyie ga ji thieg muui pha ji è, ithek ne gai thiig è dong ne lua pha lumuii è ran srane Isu chiih-è ai samoythek wuii thog pha ibi hà rai iang phro. <sup>34</sup> Isu run è fuang lung mage shii, thiichiih shii bajo ibrog um iang mage ne ai lubu ne iy dang pha bushun now dun phro, nyieliieshii, ithek ne brogpho oi pha shiishai duine um iang, jiè ai ne, ithek shii bajo miyao jao ne yua. <sup>35</sup> Ji è rek ne rai shii, bajo chia dun pha ji è habjuang re sha pha rek mage ne, ai samoythek è ai moe shii wuii srane yao, “Gethek ne bajo chia jong dun ro, ichiih shii ne thiigthek de inui oi pha ithua ro. <sup>36</sup> Ithek shii thoh sha mage bo, chiihphado, awaithek è thiigthek chiih-è raighò sow srane awai thek chie niing pha nya phog mua phro.”

<sup>37</sup> Isu è yao, “Nathek ne ithek shii chie pha phi mage bo.”

Ithek è Isu shii sai, “Gathek è bajarai hà wuii srane liiman simedthek<sup>‡</sup> wieng nyi pha iweb phog ne phi ne chie yi pha yang bey?”

<sup>38</sup> Ji-è Isu ne ithek shii sai, “Nathek shii khama iweb um lei ne riig mage bo.” Samoythek è ithek shii sai nathek shii iweb khama um lei, ithek è yao gathek shii ne iweb guii chiih-è ù nyi um bie ro. Ji-è ithek è Isu shii yao, “Iweb guii chiih-è ù nyi um ro.”

<sup>39</sup> Ji è yao mage ne Isu è awai samoythek shii yung, “zab thek shii ibrog yo rek ne saing lakhung shii dug yi bo.” <sup>40</sup> Ji-è ithek ne ibrog yo rek srane dug iang yi, giak ibrog shii ne wieng jia, chiih-è giak ibrog shii ne saguii rek srane dug dun ro. <sup>41</sup> Chiih-è, Isu è iweb guii chiih-è ù nyi ji yi srane hamangkhang hà mau ne Hamangkhang-aphuii shii laso phi. Chiih-è, iweb ji chiiing ne phed srane awai samoythek shii phi ne ithek shii thang yi. Chiih-è, ù shii de thang yi. <sup>42</sup> Ji-è ithek ne lumuii dang pha chie dun. <sup>43</sup> Chiihphado samoythek ne led pha iweb chiih-è ù thek sirid snanyi ley dang pha khrab gieng phro. <sup>44</sup> Thiichiih chie noh pho ne itham guii ro.

**6:34** 6:34: Ssb 27:17; 1Saj 22:17; 2Phal 18:16; Ezkh 34:5; Mth 9:36 † **6:37** 6:37: Hayang pha ised Hayang pha ismed jia ne idang pha blia rekpho ro riinang ro (riig bo Mth 20:2).

*Isu è kho lakhung shii lua*  
(Mth 14:22-33; Jon 6:15-21)

<sup>45</sup> Luangjia shii, Isu è thiichihih wuii pha ibrogthek dun ge yi shii, awai samoythek shii de run shii in ne Bethsaida pha khabang thrang hà wuii iang pha thoh ge. <sup>46</sup> Ithek shii wie dun bo ne yao ched shii Isu awai de phiing hà sia pha wuii dun. <sup>47</sup> Jipha habjuang re mage shii, run ne khabang pha duchoi hà thog ne um dun, Isu ne awai ji khabang thrang hà rai ramuii shii, <sup>48</sup> Isu è awai samoythek shii run iliing hà bajo diigchiao rek ramuii pha doh ruii, nyieliieshii, Hasamkhanoi khed ramuii pha ji è ithek run ne shao thiwie pha rek dun. Ji-è Isu ne hamiang riang shii kho lakhung è lua ne samoythek moe hà wuii ruii, <sup>49</sup> Isu ithek moe thog pha re ramuii shii Isu è kho lakhung shii lua mage ne ithek ne zab rum ne ziak ne yao, “Ai ne ibuii ro!” <sup>50</sup> Ithek è aishii doh mage ne zab rum dun phro.

Isu è ithek shii yao, “Arum chiid pha lubu boh now mage bo! Hi ne gu ro!” <sup>51</sup> Ji è yao srane awai de samoythek rog run shii in mage shii Hasam de awai lum ne them dun. Ji è rek mage ne samoythek ne zab wiengphleg ne wieng dun. <sup>52</sup> Nyieliieshii ithek ne Isu è itham guii bran shii iweb chihih-è ù phi ne chie yi pha miyao siu ne agao mua pha diig ne rai dun.

*Isu è Genesareth hà bajo bran shii gang rek phi*  
(Mth 15:1-9)

<sup>53</sup> Ithek ne khabang ji hiia ne Genesareth beng pha soh shii wuii thog, thiichihih shii ithek è run ne phang ne ruii marui srane lung dun. <sup>54</sup> Ithek ne run è nyalung dang shii, ithek è Isu shii ibi thieg dun. <sup>55</sup> Ji è ithek ne thiig hà ran srane zab shii yao iang, chihih-è, khama rad pho um phane Isu khi shii um pha ji shii noh ne wuii thog srane biang shii thieng yi. <sup>56</sup> Isu è khama pha thiig raig chihih-è bajarai hà wuii thog nede, ithek è khama rad pho um pha chihih-è chongjai rek pha ithua shii noh srane ai yung shii lujia magunde khoh yi pha ithek shii khung ne lia phro. Hanyie è ai yung khoh mua pho ne zab gang dun phro.

## 7

*Blangthek shii zen pha iphey yua*  
(Mth 15:1-9)

<sup>1</sup> Pharisithek chihih-è Iphey yua pha masdothek ne Jerusalem è wuii srane Isu moe shii khrab ne riu thog ruii. <sup>2</sup> Ithek è ai samoythek ne Iphey shii zen pha duiine arek pha, wad achun pha michie chie pha doh ruii.

<sup>3</sup> (Nyieliieshii, Pharisithek chihih-è Jewthek ne riingthek è zen pha Iphey ji rek ne rai. Ithek ne wad achun bi sapho ne michie achie. <sup>4</sup> Chihih-è, bajarai\* è yi pha nyie magunde asud sapho shii ne achie bi pha rai. Chihih-è, gai khama pha Iphey awaithek pha riingthek muyua marui jithek ne athoh dang pha rek ne rai, jithek pha Iphey ne gog, jarai, blow, skhong chihih-è biangthek† sud pha Iphey ji ro.)

<sup>5</sup> Ji-è Pharisithek chihih-è Iphey yua pha masdothek è Isu shii sai, “Na thek ne nyi rek ne boyo riingthek mizen marui pha Iphey ji anuii pha rek phlei? Iphey ji nuui ne wad chun ne chie pha asi pha wad zia è michie chie khlei ne bey?”

\* 7:4 7:4: Nyie magunde bajarai è thog pha ji shi ne ithek è igobi asid sapho shii ne; Din ne nyie magunde ithek bajarai è athog sbo shii ne ithek ne igobi awaithek shii sud bi. † 7:4 7:4: Giak jigi shii ne oi roChihih-è biangthek ro.

<sup>6</sup> Isu è ithek shii chang, Aijaya è chaig ne nathek shii lawasdai ro è zey pha ji izai chak ara ro! Ai è zeyjong pha ji duiine: Hi pha brantheek è Hamangkhung-aphuii shii yao, gathek ne miyaogamtheek rog na shii ilab rek,

jishii, ithek ro lubu ne gu è bajo ruang ro.

<sup>7</sup> Itheek è gu shii sia pha ji ne thaluii ro, nyieliieshii, ithek è, jine, Hamangkhung-aphuii pha Iphey shii yua pha khalo shii, ithek ne bran murab pha Iphey ji yi Hamangkhung-aphuii murab rone yua ne rai ro!

<sup>8</sup> “Nathek ne Hamangkhung-aphuii pha muyungtheek ne the hà ruii muii srane bran muyua pha jithek rek ne rai phro.”

<sup>9</sup> Isu è athodang pha yao ramuii shii, “Nawai theek è Iphey shii nyieliieshii Hamangkhung-aphuii ro Iphey shii snai yi pha rek phro.” <sup>10</sup> Moses muyung pha Iphey ne, nawaithek pha aphuii chiih-è amuii shii ilab rek bo, chiih-è, hanyie è aphuii amuii shii awie pha yao arone, aishii ne ua muii bo.

<sup>11</sup> Jishii, ithek ne, nawaithek pha aphuii-amuii shii anong phi pha ithek ne jine Hamangkhung-aphuii rone yao phro, <sup>12</sup> Ji-è thuh shii ne nathek è awaithek aphuii-amuii shii anong yi ara ro. <sup>13</sup> Hi duiine, ithek muyua hi dun thog pha hìne Hamangkhung-aphuii pha miyaogam shii snai yi phro. Ji asi bie pha ji duiine ithek è gai bliathek de bajo rek ne rai.

### *Manathek è bran shii zia rab phro*

*(Mth 15:10-20)*

<sup>14</sup> Din ne Isu è ibrogtheek shii ho din srane yao, nathek de gu miyao nuii ne id mage bo. <sup>15</sup> Nyie magunde, fuang è bucho dun phane Iphey shii zea<sup>‡</sup> azen ro. Zia rab phane bucho è fuang khia ruii pha ji è zea rab ruii phro. [

<sup>16</sup> Nathek shii nuii pha khoh um arone, nuii mage bo.]

<sup>17</sup> Isu ibrog jiè thoh srane hò hà dun thog shii, samoytheek è aishii sai, najang yao pha ji gathek ne a-ìd mua ro, gathek shii yao riig bo, <sup>18</sup> “Nathek ne athieg bey? Nathek ne gai è de bajo athieg dang pho ro! Isu è ithek shii yao, ichiih shii ne bran bucho è zea re phro, fuang è zia are mua phro.

<sup>19</sup> Nyieliieshii, jithek ne lubu hà adun pha luui bucho hà dun srane fuang khia din dun phro.” Isu è yao pha ji ne, zab pha michie ne nyachie mua phrone yao ro.

<sup>20</sup> Ai è yao din, “Bran è fuang nyie khia ruii pha ji è zea rab ruii phro.

<sup>21</sup> Chiih-è lubu iliing hà awie pha now pha ji ne fuang de khia ruii phro. Jithek è biwo re pha lumuii hà noh dun phro, jithek ne mugo pha, ua, sugoh rek pha ro, <sup>22</sup> siulao rai pha, hanyie shii now bie pha chiih-è, biidiie yao pha, wie è arek pha gidieg rek pha, gai shii buii yao pha, nyigodog, minyiagachi, chiih-è bi-ìe blia rek pha miyao ro. <sup>23</sup> Hi-theek zab awie pha muna ne lubu iliing è khia khlei ne ji shii zea rab phro.”

### *Hò-amuii jia ro migi*

*(Mth 15:21-28)*

<sup>24</sup> Ji è yao ched ne Isu è ithek shii thoh marui srane Thaire beng pha rajan moe hà wuii dun. Ji hà wuii thog mage shii ai ne hò jia shii khud srane ithek è athieg yi pha ug ne rai dun. Ji è rai dun magunde, ai ne thiichiih shii ug ne arai mua. <sup>25</sup> Ibuii ragung jiang pha bimi jia pha amuii è Isu wuii thog pha ji yoi mage ne khthiie wuii srane Isu lai luui shii bam ne yao. <sup>26</sup> Jipha hò-amuii

<sup>7:6</sup> 7:6,7; Aij 29:13    <sup>7:10</sup> 7:10; Mul 20:12; Iphy 5:16; Mul 21:17; Lew 20:9    <sup>‡</sup> <sup>7:15</sup> 7:15; Giak shii ne 16 chodo ro: Yoi bo, chiihphado, nathek shii khoh um arone! (riig bo 4:23).

ne Jew asi ro, ai ne Phoenixhia du-ùà Syria pha thiig hà giak pha bimì ro. Ai è Isu shii wad khung ne yao, “Gu dimi shii ibuii ragung è jiang pha ji ne na ne khia maphi bo.” <sup>27</sup> Isu è chang, “Igo bi ani phiing shii yem ne chie yi bo. Aniphiing pha michie yi srane choi shii yem muui pha ji dunmey ne bey?”

<sup>28</sup> Ai è Isu shii chang, “Masdo” “Na miyao jine izai chak ro, jishii aniphiing pha michie thiibliie è nyiak hà chiih dun pha ji ne choi de nyachie mua phro.”

<sup>29</sup> Ji-è, Isu è aishii yao, “Na ne khthiie hò dun din mage bo, hì pha miyao Chiang è, na dimi pha ibuii ragung jine khia jong ne rai iang pha doh ruii phro.”

<sup>30</sup> Ji è yao mage ne ji pha hò-amuii ne hò dun ne riig shii, ibuii ragung ne izai ai dimi è khia jong dun pha doh ruii phro.

### *Isu è bi-ìe jia shii gang phi*

<sup>31</sup> Ji è rek ched marui ne Isu ne Thaire thiig shii thoh din marui ne Sidon pha thiig è dong srane Galili khabang iring shii wuii thog. Chiih-è sua thawunthek rone beng pha ithua è dong ne lua. <sup>32</sup> Ji hà lua shii giak thek è bi-ìe jia noh ne wuii thog ruii. Ithek è aishii wad è khoh pha Isu shii khung ne yao. <sup>33</sup> Ji-è Isu ne ji pha bran shii awai ji noh dun srane awai wad è khothek shii khoh srane chan cho phi, chiih-è, ji pha bran ri shii de khoh mage. <sup>34</sup> Ji è rek srane Isu è hamangkhang hà riig srane lubu è wie now srane ji pha bran shii yao, “*Ephphatha*,” Hi ne hong mage bo! Iyao pha miyao siu ji ro.

<sup>35</sup> Ji è rekdang pha ji shii ji pha bran ro ikhuui è yoi dang dun, chiih-è, ai sem gliog pha de wie re dang ne agliog pha yao dun. <sup>36</sup> Ji è rek ched pha idoh è Isu ne thiichiih um pho thek shii ji rek pha ji ne hanyie shii de ayao dang yi pha rek phro. Isu è khama nyuak doh ne ruii, ji è de muna ithek ne yao maphi. <sup>37</sup> Hanyie thek è jithek rek pha ji yoi mage ne zab ne bajo nyu-dang dun ro. Ithek ne awaithek chung yao rai, “Ai ne hì thek rek phane khi-è mua dun phlei? Ai ne khoh ayoi pho shii de yoi yi dun, sem ayao mua pho de yao mua yi dun!”

## 8

### *Isu è itham wi pha bran shii michie phi* (*Mth 15:32-39*)

<sup>1</sup> Din shii de ithek ne Isu miyao nuui pha bajo wuii thog ne rai dun. Chiihphado thiichiih shii ithek chie pha nyie de oi, jiè Isu ne samoythek shii ho srane yao, <sup>2</sup> “Gu ne hìthek pho shii bajo bushun now mua ro, nyieliieshii ithek de gu rog shii rai ne inai da-uom re sharo, jiè chie pha nyie de oi pha re dun ro. <sup>3</sup> Gu è ithek shii nyie magunde aphì achie yi pha lui isloi hò dun din gey arone, yang ne lumuii hà chi-iy ne khriang ne re mage phro, nyieliieshii giak ne bajo ruang è wuii pha de um phro.”

<sup>4</sup> Ai samoythek è sai, “Ichihi balimuang shii ne ithek nyama shii chie yi pha michie ne khi-è yi mage phlei?”

<sup>5</sup> Isu è sai, “Nathek shii iweb khama um lei?” Ithek è yao, “Sudoh ne iweb miley um bie ro.”

<sup>6</sup> Ai è ithek shii nyiaklieg shii dug pha yung. Chiih-è iweb miley ji yi srane Hamangkhang-aphuii shii laso phi, chiih-è iweb ji phed srane awai samoythek shii phi ne zab shii thang yi. Samoythek de ji è rek phi. <sup>7</sup> Chiih-è, ithek shii ù de ùjia um bie. Isu è ji de yi srane Hamangkhang-aphuii shii laso phi srane, awai samoythek shii phi ne thang yi. <sup>8-9</sup> Itham wi branthek

de lumuidang pha iweb chiih-è ù chie phro, chiih-è, ikhe de sirid miley ley um ba dun phro. <sup>10</sup> Ji è rek ched ne Isu è ithek shii dun ge yi, khthiie ithek ne run jia mua srane ai samoythek rog shii in ne Dalmanutha pha thiig hà wuii dun.

*Pharisithek è buang pha blia rek phi bo ne yung*

*(Mth 16:1-4)*

<sup>11</sup> Inai jia shii de Pharisithek ne wuii srane Isu shii khnaing, nyieliieshii, ithek è aishii chai pha now. Ithek è chai hi ne Hamangkhung-aphuii è chua phi rone doh yi pha Pharisithek è aishii buang pha blia rek mage bo è yung.

<sup>12</sup> Ji è yung magunde, Isu è lubu iliing hà zud ne khran srane ithek shii yao, “Thuh pha brantheek ne nyie now ne wieng rek yi pha yao phlei? Gu nathek shii izai yao phro, hi è rek pha blia ne gu nathek shii aphii phro.”

<sup>13</sup> Ai è ithek shii thiichiih thoh marui srane run hà in dinne, khabang thrang pha ithua hà dun marui.

*Pharisithek nane Herod ro phiia*

*(Mth 16:5-12)*

<sup>14</sup> Samoythek ne run hà iweb de dau ne chie pha ne bia ne ayie pha wuii dun. Thiichiih shii iweb ne jia um dang bie. <sup>15</sup> Ji è rek srane Isu è ithek shii phriie ne yao, “Pharisithek phiia nane Herod pha phiia è nathek ne gayiig ne rai iang bo.”

<sup>16</sup> Ithek ne awaithek chung yao rai, “Ai è hi yao pha ne gethek è iweb ayie pha chang è yao phro.”

<sup>17</sup> Isu è, ithek nyie yao ramuii pha jine thiegyong muii ne ithek shii sai, “Nathek ne iweb oi pha chang è nyie yao rai phlei? Nathek ne thuh de athieg agao ba bey? Nathek khani ne thuh de adau ba bey? <sup>18</sup> Nathek mieg ne um shii ariig lie ara? Nathek khoh ne um shii ayoi lie ba ara? Nathek ne anow bey? <sup>19</sup> Gu è iweb guii um iang pha ji shii phed srane itham guii pha brantheek shii phi ne chie noh chiih-è nathek led pha iweb ne khama ley sirid chiing phlei?”

Ithek è chang, “Snanyi iweb sirid chang ro.”

<sup>20</sup> Ai è ithek shii sai din, “Chiiphado ithek de gu è iweb miley phed ne itham wi shii phi ne chie yi pha ji è led pha sirid khama ley pha chang gieng phlei?”

“Ithek è chang, sirid miley led phro.”

<sup>21</sup> Din ne de ithek shii sai din, “Nathek ne thuh de agao ba bey?”

*Isu è Bethsaida shii miegthi pha jia shii gang phi*

<sup>22</sup> Ithek ne Bethsaida hà wuii thog shii, ithek è miegthi pha jia ne Isu moe shii noh srane Isu shii khung ne yao, “Iujia khoh mage bo” <sup>23</sup> Isu è miegthi pha bran wad chaing srane thiichiih pha thiig è fuang noh srane ai mieg shii chan cho srane wad è khoh ne aishii sai, “Na mieg ne doh sha bey?”

<sup>24</sup> Chiiphado hù ne riig srane yao, “Oh, gune brantheek shii doh sha ruii ro, jishii ithek ne hingmuii duiine lua pha doh muii ro.”

<sup>25</sup> Isu è dinne ai mieg shii wad è khoh, chiiphado ai mieg ne idoh thog din ruii ne ai mieg ne wuangwuang doh din dun. <sup>26</sup> Chiiphado Isu è, aishii yao, “Hò hà dun bo chiih-è ji pha thiig hà dinne awuii sha rabo.”

*Phithar è Isu chiang yaothieg  
(Mth 16:13-20; Lug 9:18-21)*

<sup>27</sup> Chiihphado è Isu chiih-è ai samoythek ne ji pha ithua thoh srane Khaesarea Philiphi beng pha thiig moe hà wuii dun. Lumuii hà lua ramuii shii, Isu è ithek shii sai, “Nathek de yao riig bo, ithek è, gu shii hanyie rone yao lei?”

<sup>28</sup> Ithek è chang, “Giak è na shii ne Jon khowo phi pha ji rone yao muui ro, chiih-è, giak ne, na shii ne Elija rone yao muui ro, chiih-è, giak ne, na shii ne chaig rone yao muui ro.”

<sup>29</sup> Ai è ithek shii sai din, “Jishii ithek ne gu hanyie leine now ga?” Phithar è chang, “Na ne Masi ro.”

<sup>30</sup> Ji-è, Isu ne ithek shii yung, “Gu chiang pha miyao ne hanyie shii de ayao rabo.”

*Isu è awairo diigchiao nane awai iy pha chiang ji yao  
(Mth 16:21-28; Lug 9:22-27)*

<sup>31</sup> Chiihphado shii Isu è awai samoythek shii yua pha jao din phro, “Bran Dufuii ne bajo riie ne chiih-è dukthothek è de, Phabi boh thek è de, chiih-è, Iphay pha masdothek è de srag muui phro. Aishii ne ithek è ua muui phro, jishii, ai ne iy ne da-uom shii chai hòi din ruii phro.” <sup>32</sup> Hi pha miyao ne Isu è ithek shii sang yao dang phro, ji-è, Phithar è de thekhei hà noh srane aishii jao ne giung. <sup>33</sup> Jishii Isu è idoh awai samoy shii rei ne riig srane, Phithar shii giung, “Na gu moe è ruang dun mage bo, ibuui,” Ai è yao. “Na munowthek ne Hamangkhung-aphuii è asi ro jishii na munow jine bran è ro!”

<sup>34</sup> Chiihphado Isu è ibrogthek shii chiih-è awai samoythek shii awai hà ho, “Hanyiemagunde gu rog shii wuii arone, ai ne awai shii bia bi srane, awai bai han ne, gu rog shii wuii gieng bo. <sup>35</sup> Chiih-è hanyie è awai chai shii ragia rek yang pha now arone awai chai ne mua ruii phro, jishii hanyie magunde awai chai gu chiang shii chiih-è mua yao pha chiang è iy arone jine ragia re phro. <sup>36</sup> Bran hanyie è de sohjambling pha zab mua srane jishii awai chai shii mua muui arone nyie magunde mua bey? Amua phro! <sup>37</sup> Hi ne bajo chia dun phro, ithek shii ne Hamangkhung-aphuii è chai phev pha igong phi pha de siok pha oi ro. <sup>38</sup> Brantheck è awie pha inai chiih-è biidiie pha hamangkhung aphuii ro yua pha inai shii gu muyua shii chiih-è gu shii wo arone, Bran Dufuii yi awai Aphuii ro biisie ro gang hamangkhliie rog wuii ruii shii ithek shii de wo phro.”

## 9

<sup>1</sup> Chiih-è de ai yao ramuii, “Gu nathek shii yao, ichiih um pha giak brantheck weg are ba shii Sajathua pha Hamangkhung-aphuii ne awai blu rog shii wuii ruii pha ji doh ruii phro.”

*Lai pha miyao  
(Mth 17:1-13; Lug 9:28-36)*

<sup>2</sup> Dariig pha idoh shii Isu è awai rog shii Phithar, Jems, chiih-è Jon, chiih-è ithek shii laziung phiing giu hà awai ji bsa hà noh dun. Ithek è aishii riig ramuii shii, Isu ne lai dun ro, <sup>3</sup> chiih-è, airo yung ne imo re srane khlieng chuang ne ichiih sohjambling pho ne hanyie de acham mua sapho rey dun phro. <sup>4</sup> Chiihphado shii samoy uom è Elija chiih-è Moses ne Isu rog shii mulo

pha doh ro. <sup>5</sup> Phithar è Isu shii yao, “Masdo, gethek ne ichiuh shii um pha ji ne bajo wie ro! Gethek ne ichiuh shii haliig uom rab ne, jia yi na shii rab phi, jia yi Moses shii rab phi, chiih-è jia yi Elija shii rab phi haro.” <sup>6</sup> Ai nane gai ijathek rum ne nyie yao chiid pha ji ne athieg ro.

<sup>7</sup> Chiihphado è sakhamiing thab srane chiih-è ragia rog shii cheg dun phro, chiih-è goh yi sakhamiing è yoi ruii phro, “Hi ne guro bushun pha Dufuii ro, chiih-è aishii nuii bo.” <sup>8</sup> Ithek è khthiie shan ne riig shii, jishii nyie de adoh pha, Isu um pha doh bie phro.

<sup>9</sup> Ithek Phiing è thazam nya dun thog shii, Isu è ithek shii yung, “Sudoh shii nathek è nyie doh pha ji ne bran Dufuii ji iy ne ahòì sapho shii ne, nathek ne hanyie shii de ayao rabo.”

<sup>10</sup> Ithek è ai muyong ji nuii ne rai, jishii awaithek chung ji pha miyao jao ne mulo rai, “Hi ne iy pha ji è nyie khi-èrek ne hòì din phlei?” <sup>11</sup> Chiih-è ithek è Isu shii sai, “Nyie rek ne Iphey yua pho masdothek è Elija ne ibi wuii ruii phro è yao phlei?”\*

<sup>12</sup> Isu è ithek shii chang pha ji ne, Elija ne zai zab khriig rek pha chang shii ibi wuii ro. Thuh jigigam shii nyie rek ne Bran Dufuii ne bajo diig re ne snai muii phlei? <sup>13</sup> Jine gu nathek shii yao phro, “Elija wuii thog jong ne chiih-è, branthek è aishii nyie rek yang pha jí rek phro, jigigam è de ai chang shii yao phro.”

*Isu è ibuii ragung um pha bufuii jia shii gang phi  
(Mth 17:14-21; Lug 9:37-43)*

<sup>14</sup> Ithek è gai samoythek rog shii dog mage shii, ithek è bran ibrogthek ne chiih-è Iphey yua pha masdo giak ne ithek rog shii khnaing noh phro. <sup>15</sup> Branthek è Isu shii doh mage shii, ithek ne bajo nyu ne, chiih-è aishii ran sra ilab phi. <sup>16</sup> Isu è awai samoythek shii sai, “Jiphachiang è nathek nyie khnaing rai phlei?”

<sup>17</sup> Bran jia yi ibrog re-è chang, “Masdo, gune guro dufuii na shii noh phro, nyieliieshii aishii ne ibuii ragung um ne ayao mua ro. <sup>18</sup> Ibuii ragung, aishii bangchiie rek mage shii ai ne nyiak hà thud ne, chiih-è ai sem è imamiung khia ne, chiih-è shiinyin de khreig srane, zab gangwieng ne rai dun phro, gu è na samoythek shii ibuii ragung khia phi bo è yao shii ithek ne akhia mua phi ro.”

<sup>19</sup> Isu è ithek shii yao, “Nathek ne migi anow pho bey? Gune nathek rog shii khama phiang rai mua gieng phlei? Gune nathek rog shii khama phiang zud mua phlei? Jipha bufuii shii gu moe hà noh mage bo!” <sup>20</sup> Ithek è aishii Isu moe hà noh.

Ragung è khthiie Isu shii doh mage ne ai è bufuii shii ne sham ba yi, chiihphado nyiak shii fen srane shan ne sem è imamiung khia phro. <sup>21</sup> Isu è ai aphuii shii sai. “Ai è rek pha ji ne khama re lei?”

Ai è chang, “Ai mirek hì ne iu è rek ro. <sup>22</sup> Idang aishii ne ibuii ragung è bai hà chiih-è kho hà fen ne ua muui pha rek phro. Na è rek mua arone! Gathek shii bushun rek ne chiih-è gathek nong phi bo.”

<sup>23</sup> Um, Isu è yao, “Nathek è nawaithek shii rek mua arone! Bran hanyie shii migi um pho ne zab nya re mua ruii phro.”

<sup>24</sup> Ai aphuii è khthiie ziak srane yao, “Gune migi um ro, jishii akhriig ba ro, muna um yi pha gu shii nung phi bo!”



<sup>25</sup> Isu è riig shii bran ibrogthek ne ai moe shii nui wuiiramuii, jìè ai è awie pha ragung shii yung mage. Ai è yao, “Khohphang chiih-è sem ayao mua pha ragung wo! Gu nathek shii yung phro bufuii è fuang khia srane, chiih-è, dinne bufuii shii awuii dang sha rabo!”

<sup>26</sup> Ragung è ziak mage, bufuii jine awie dang pha thud sra driedrie sham ne chiih-è fuang khia dun. Bufuii jine bi-iy duiine doh dun ro, chiih-è zab è yao, “Hi pha bufuii ne iy dun ro!” <sup>27</sup> Jishii Isu è bufuii shii sieng yi pha awai wad è khoh srane ne noh ne nong phi phro. Chiih-è ai ne riu mua dun.

<sup>28</sup> Isu è hò bucho hà wuii dun pha idoh shii, ai samoythek è aishii ug ne sai, “Nyie rek ne gathek è ragung shii akhia mua lei?”

<sup>29</sup> Isu è chang; Hi è rek ne fuang khia pha ne misia è rek-mua bie phro, gai è rek mua pha nyie de oi ro.

*Isu è awai iy pha miyao ji yao din  
(Mth 17:22-23; Lug 9:43b-45)*

<sup>30</sup> Isu na awai samoythek thiichiih pha ithua thoh srane Galili è wuii dun. Isu è ai khi hà um lei ne athieg yi pha now phro, <sup>31</sup> nyieliieshii ai ne awai samoythek shii yua ramuii: “Bran Dufuii shii ne zum ne hanyie è aishii ua ji pha bran wad shii phi muui phro. Da-uom pha idoh shii hòi din phro, ai ne chai shii sieng din ruii phro.”

<sup>32</sup> Ji è yao magunde, samoythek è ji pha miyao ne agao pha rek ne rai dun, chiih-è, dinne sai pha de rum dun.

*Zab è hanyie bo lei?  
(Mth 18:1-5; Lug 9:46-48)*

<sup>33</sup> Din ne ithek Khaphernaum hà thog srane hò iliing hà khud ne dug shii, Isu è awai samoythek shii sai, “Nathek lumuii hà nyie Chiang è khnaing rai phlei?”

<sup>34</sup> Ji sai magunde, ithek ne nyie de achang phi, nyieliieshii ithek ne lumuii hà zab è hanyie boh um lei ne sai srane khnaing rai phro. <sup>35</sup> Isu è dug srane awai samoy snanyi shii ho srane yao, “Hanyie yi zab è bajo mugak rek yang arone, ai ne zab è lu rek ne gai khiao rek bi bo.” <sup>36</sup> Ji è yao srane, ani jia shii ho srane ithek moe shii noh ne riu yi. Chiih-è ani-shii wad è giak srane yao, <sup>37</sup> “Hanyie magunde, gu beng è hì pha ani shii ho arone, ai ne gu shii de ho ruii phro, chiih-è, hanyie è gu shii ho arone, ai ne hanyie è gu shii thoh ge pha ji shii de ho phro.”

*Hanyie è gethek shii gidieg arek pho ne gethek ro ro  
(Lug 9:49-50)*

<sup>38</sup> Jon è aishii yao, “Masdo, na beng è ibuii ragung khia ne gieng pha bran jia doh ro, jishii, gathek è aishii gak ne thoh marui phro, nyieliieshii, ai ne gethek rog pha bran asi ro.”

<sup>39</sup> Isu è ithek shii yao, “Aishii agak chid rabo” nyieliieshii, hanyie gu beng è buang ji rek phi pha ne, dinne gu shii awie pha miyao ayao ruii phro. <sup>40</sup> Hanyie è gethek shii buii arek pha bran ne gethek ro ro. <sup>41</sup> Gu ne, nathek shii izai yao dang phro, “Hanyie magunde ithek shii gu Chiang è kho magunde phi ne niing yi arone, aishii de ji pha lasen ne mua ruii phro.”

*Chuajanthek shii layog*  
(Mth 18:6-9; Lug 17:1-2)

<sup>42</sup> “Hanyie magunde, ichiig oi pha branthek shii mua yi arone, ji pha bran shii ne yua shii rathak boh bang srane khamuii hà fen muui pha ji wie ba phro.” <sup>43</sup> Ji-è ithek wad è migi shii la-lu-lu rey yi arone, ji pha wad ne thamthiak muui, <sup>44</sup> wad nyi um ne thumuluii hà, idang bai shud ne rai pha ithua hà dun pha ji shii ne wad oi pha chai hà dun pha ji wie phro. <sup>45</sup> Chiih-è, nathek lai è ithek migi shii san pha rek ruii arone, ji pha lai shii ne thamthiak ne fen muui bo.† [ <sup>46</sup> Nyieliieshii, lai nyi um srane thumuluii hà fen yi pha ji è ne, lai oi pha chai hà khud pha ji wie ba phro.] <sup>47</sup> Chiih-è, nathek mieg è nathek migi shii la-lu-lu rek noh arone, ji pha mieg ne yog muui bo. Nyieliieshii, mieg nyi um srane thumuluii hà fen yi pha ji re-è ne mieg jia oi ne Hamangkhung-aphuii pha Sajathua pha ithua hà khud muui pha ji wie liak phro, <sup>48</sup> nyieliieshii, bsa thumuluii pha phuyunthek ne khuchung de a-iy phro, chiih-è, shud pha bai ji de khuchung de anyia phro.

<sup>49</sup> “Nyieliieshii, zab pha branthek shii khlem pha ji shii suruii lao srane gang rek pha duine bai è shud ne sang ruii phro.”

<sup>50</sup> Suruii ne wie ro; jishii ji pha suruii yi apieng pha re dun arone, dinne ji pha suruii ne khi-èrek ne phieng rab mua phlei?

“Ji-è suruii phieng duine nawaithek chung de wie rek ne rai bo, chiih-è, nawaithek chung de liijiing rek ne rai bo.”

## 10

*Isu è yiygey che rai pha chang yao*  
(Mth 9:1-12; Lug 16:8)

<sup>1</sup> Chiihphado è Isu ne ji pha ithua thoh srane Judea pha du-ua hà wuii dun, chiih-è, Jordan pha gashad hiia ne wuiidun. Thiichiih shii de bran ibrogthek khrab ne wuii thog din ruii, jishii ai è nathek shii idang yao pha duine yua din phi.

<sup>2</sup> Thiichiih shii giak Pharisithek ne ai moe shii wuii thog srane, aishii chai pha bidiang ne sai, “Gathek shii yao riig bo, gethek Iphey shii ne, gey è awai yiy shii nyache mua phrone um bey?”

<sup>3</sup> Isu è ithek shii de miyao jia sai din srane chang, “Moses è nathek shii nyie Iphey phi marui phlei?”

<sup>4</sup> ItheK è aishii chang, “Moses è ne hì è zen marui phro, gey è yiy shii che yang pha now arone, che pha jigigam zey srane yiy shii thoh ge bo.”

<sup>5</sup> Isu è ithek shii yao, “Moses è hì pha Iphey ne nathek chang zey ro, nyieliieshii, ithek shii yua pha ne bajo diig ro. <sup>6</sup> Jishii jigigam shii zey pha duine, soh rab pha inai shii Hamangkhung-aphuii è bufuii chiih-è bimi rab ne ruii phro. <sup>7</sup> ‘Jiphachiang è bufuii ne awai amuii nane aphuii shii thoh marui ne yiy rog dog ne rai dun phro,\* <sup>8</sup> chiih-è, isa ne siu jia re dun phro.’ Ji-è, isa ne bran nyi asi pha, jia re dun phro. <sup>9</sup> Ji-è, branthek ne Hamangkhung-aphuii è miak phi pha ji ne yo arek mua phro.”

**9:43** 9:43: Mth 5:30 † **9:45** 9:45: Giak jigi shii 46 chodo ro: Thiisa hà ne ithek shii bisia è chie shii khuchung de a-iy ruii phro, chiih-è bai ithek shii hùb pha ji ne unchungde anyia phro (riig bo 48).

**9:47** 9:47: Mth 5:29 **9:48** 9:48: Aij 66:24 **9:50** 9:50: Mth 5:13; Lug 14:34,35 **10:4** 10:4: Iphy 24:1-4; Mth 5:31 **10:6** 10:6: Igo 1:27; 5:2 **10:7** 10:7,8: Igo 2:24 \* **10:7** 10:7: Giak jigi shii zey ro chiih-è awai iy rog shii ò rek ro.

<sup>10</sup> Ithek è awaithek hò iliing hà dun thog din mage shii, samoythek è Isu shii ji pha miyao sai din. <sup>11</sup> Ai è ithek shii yao, “Gey è yiy shii thoh srane gai shii yi din arone, din pha yiy ji Chiang è layog re dun phro.” <sup>12</sup> Ji duiine, yiy de gey shii thoh srane gai shii gey dun arone, ai ne din pha gey Chiang è layog re dun phro.

*Isu è aniphiing shii khirzey phi*  
(Mth 19:13-15; Lug 18:15-17)

<sup>13</sup> Brantheck è aniphiing shii wad khoh ne khirzey phi yi pha Isu moe hà noh thog ruii phro, jishii, samoy è brantheck shii giung. <sup>14</sup> Isu è ji rek pha doh mage ne, lijeg srane awai samoythek shii yao, aniphiing shii gu moe hà wuii yi bo, ithek shii agak rabo, nyeliieshii, Hamangkhung-aphuii ro Sajathua ne ithek duiine pho thek ro ro. <sup>15</sup> Gu è nathek shii izai yao phro, “Hanyie è aniphiing duiine Hamangkhung-aphuii Sajathua achoi sapho shii ne khuchung de ji pha ithua adun mua phro.” <sup>16</sup> Chiiphado shii ai è aniphiing shii awai wad è giak srane zab shii wad chaing ne khirzey phi ruii phro.

*Bukho bran jia*  
(Mth 19:16-30; Lug 18:18-30)

<sup>17</sup> Isu yi awai mirek ji duiine jao ramuii shii, bran jia è ran srane ai ibi shii lagiung niing ne chiieh-è aishii sai, “Wie Masdo, gu ne idang pha chai mua pha nyie rek chid phlei?”

<sup>18</sup> Isu è aishii sai, “Na ne nyie rek ne gu shii wie rone ho phlei?” Hanyie de wie oi ro, wie ne Hamangkhung-aphuii bie ro. <sup>19</sup> Na ne muyungthek ne thieg: bran shii ne sgoh arek rabo, chiieh-è, siulao arek rabo chiieh-è, mugo agow rabo; chiieh-è, gai bran Chiang shii biidiie akhlam rabo; chiieh-è gai ro mana shii biidiie khlam ne ayie rabo Chiieh-è aphuii nane amuii shii ilab rek bo.

<sup>20</sup> Bran ji è yao, “Masdo” “Hi pha muyungthek ne gu ne filiao ba è nuii phro.”

<sup>21</sup> Isu è aishii miang riig srane aishii miie ne yao, “Din ne mana jia chiid dang pha um ba ro. Dun srane na shii nyie um pha ji liu srane bang yi dushothek shii phi muii bo, chiieh-è nane hamang-khung hà bukho re ruii phro; chiiphado è na gu rog shii lua gieng bo.” <sup>22</sup> Jipha bran è ji yoi mage shii, ai mizia ne miung srane, chiieh-è ai ne duhug è rey dun, nyeliieshii ai ne bajo bukho ro.

<sup>23</sup> Isu è awai samoythek shii shan srane riig ne chiieh-è ithek shii yao, “Bukho brantheck ne Hamangkhung-aphuii ro Sajathua shii khud phane bajo diig ro.”

<sup>24</sup> Jipha miyaogamthek re-è samoythek ne wiengphleg dun, jishii, Isu è nyayao lumao dun ro, gu aniphiing wo, Hamangkhung-aphuii Sajathua shii khud phane bajo diig ro! <sup>25</sup> Bukhothek ne Hamangkhung-aphuii pha Sajathua re pha ji shii ne yuaphiang stuh simen cho è khud pha ji wie ba ro.

<sup>26</sup> Hi è ne samoythek ne zab bajo wieng ne awaithek chung sai rai, “Chiiphado hanyie shii ragia re phlei?”

<sup>27</sup> Isu è ithek shii miang riig srane chang, “Hì nè brantheck è are mua phro, jishii, Hamangkhung-aphuii è ne re muui ruii phro. Hamangkhung-aphuii è ne zab nya re muui ruii phro.”

<sup>28</sup> Chiihphado Phithar è yao mage, “Riig mage bo! Gathek ne zab thoh muui srane narog shii lua giang.”

<sup>29</sup> “Um,” Isu è ithek shii yao, “Gu è nathek shii yao, hanyie magunde mua Chiang è hò dinne khuiino dinne bumuii dinne aphuii ne amuii dinne ani dinne raig thoh arone, <sup>30</sup> ai ne hì pha ishak shii de bajo mua ruii phro. Aishii ne hòthek, khuiino thek, bumuiithek, amuiithek anithek chiih-è raigthek ne wieng chieng mua din ruii phro, chiih-è diigchiao de mua ruii phro; chiih-è din pha damzi thog shii ai ne idang pha chai mua ruii phro. <sup>31</sup> Jishii thuh ne hanyie giu ithua shii um pho ne luii ithua hà re ruii phro, chiih-è thuh bajo hanyie yi luii ithua hà um pho ne giu ithua hà re ruii phro.”

*Isu è awai iy pha Chiang shii uomchieng yao*  
(Mth 20:17-19; Lug 18:31-34)

<sup>32</sup> Isu chiih-è ai samoythek è Jerusalem hà wuii pha lumuii è lua ramuii shii. Isu ne ithek è ibi lua ramuii shii, samoythek ne samdiig dun ro; chiih-è, brantheck hanyie è ai idoh luagiengpho thek ne zab rum dun phro. Din ne de Isu ne samoy snanyi shii yoh ithua hà noh srane aishii nyie re ruii pha jithek yao phro. <sup>33</sup> Ai è ithek shii yao, “Yoi bo, gethek ne Jerusalem hà wuiiramuii ro, thiisa hà Bran Dufuii shii ne zum srane Phabi wegthek shii chiih-è Iphey yua pha masdothek shii phi muui phro. Ithek è aishii iy yi pha the srane migi arek pho shii phi ruii phro, <sup>34</sup> ithek è aishii makhakriing ne chan cho ne, chia ne, chiih-è ua muui phro; jishii ai ne inai da-uom shii ne chai hà hòi din ruii phro.”

*Jems nane Jon è lia*  
(Mth 20:20-28)

<sup>35</sup> Chiihphado è Zebedi pha dufuii, Jems chiih-è Jon è Isu moe shii wuii srane yao, “Masdo, nyie magunde gasa shii rek phi bo è now ro.”

<sup>36</sup> Isu è isa shii sai, “jine nyie lei?”

<sup>37</sup> Ai è chang, “Na è nawai bran shii khoh mage shii, gasa shii de narog dug yi bo è now ro, jia shii na phazoi hà, jia shii na phawig hà dug yi bo.”

<sup>38</sup> Isu è isa shii yao, “Nasa nyie lia pha ji ne nasa ne athieg mua ro. Nasa de gu è niing pha gog riie ji nyaniing mua ne bey? Chiih-è gu miyi pha khowo riie duine nasa de khowo riie nyayie mua ne bey?”

<sup>39</sup> Ai è chang, “Gasa de nyayie mau.”

Isu è isa shii yao, izai nasa de gu è niing pha gog riie de nyaniing mua phro, chiih-è gu miyi pha khowo riie de nyawo mua phro. <sup>40</sup> Jishii, nasa shii gu phawig chiih-è phazoi hà dug yi pha rangsua ne gu shii oi ro. Hì pha ithua ne Hamangkhung-aphuii è hanyie shii rab ne ruii phi pha ji shii phi ruii phro.

<sup>41</sup> Gai samoythek sua è ji yoi mage shii, ithek ne Jems chiih-è Jon shii lijieg dun. <sup>42</sup> Chiih-è Isu ithek zab shii ò ho srane yao, “Nathek ne ji pha bran shii thieng, hanyie shii ithek shii blu rek pha migi-arekpho ro bohkhohthek phi muui phro, chiih-è dumuiithek shii ne zab riichai um ro. <sup>43</sup> Hì è rek pha ji ne ithek duchoi shii arek rabo. Nathek è hanyie magunde boh rek yang pha now arone, ai ne gai ro khiao rek bi bo, <sup>44</sup> chiih-è nathek è hanyie magunde

ibi re yang pha now arone, ai ne zab pha khiao rek bi phi bo. <sup>45</sup> Bran Dufuii rang de bliia rek yi pha awuii ro; ai ne ithek shii nong phi pha wuii phro, ai ne awai chai phi srane bran bajo shii thoh phi pha wuii phro.”

*Isu è miegthi pha Barthimaeus shii gang phi*

*(Mth 20:19-34; Lug 18:35-43)*

<sup>46</sup> ItheK ne Jerikho hà wuii thog ne Isu è samoythek nane bran ibrog rog shii jipha ithua è fuang thoh ne wuiiramuii shii, Thimaeyus pha dufuii Barthimaeus miegthi pha nane chayem jia lumuii shii dug ne rai iang doh ro. <sup>47</sup> Jipha bran è jine Isu Nazareth rone yoi mage shii, Isu shii ziaK ne ho, “Isu, Dawid Saja pha Dufuii wo! Gu shii de bushun now phi bo!”

<sup>48</sup> BrantheK è aishii aro rabo ne bajo giung. Jishii, ai ne din è de gang ziaK ne ho mage, “Dawid pha Dufuii wo! Gu shii bushun noh bo!”

<sup>49</sup> Isu è khan srane yao, “Aishii ho mage bo.”

Ji-è, ithek è miegthi pha bran jishii ho ne yao, “Sang srane jai ne wuii mage bo, Isu è na shii ho muui ro.”

<sup>50</sup> Ji è yao mage ne ai ne awai yung de fen marui srane ran ne Isu moe hà wuii thog ruii.

<sup>51</sup> Isu è aishii sai, “Gune na shii nyie rek phi bo è yang lei?” miegthi pha ji è yao.

“Masdo, gu ne dinne mieg doh mua yi pha yang ro.”

<sup>52</sup> Isu è aishii yao, “Dun mage bo, nawai migi ji è nawai shii gang rek jong phi ro.”

Ji è yao mage shii ai ne mieg doh dun ro. Ji-è, chiiphado ai de Isu rog shii lumuii hà luagieng.

## 11

*Jerusalem hà brantheK bajo sang è Isu shii ho*

*(Mth 21:1-11; Lug 19:28-40; Jon 12:12-19)*

<sup>1</sup> Isu chiih-è ai samoythek ne Jerusalem hà wuiiramuii shii, Bethphach chiih-è Bethany beng pha thawun ne ithek è nui bie ro, ithek ne Sumaro um pha phiing hà wuii srane Isu è samoy nyi shii yung ne ibi thoh ge, <sup>2</sup> Isu è isa shii yung ne ibi thoh ge, “Thrang ibi pha thiig hà wuii srane ji pha thiig hà nasa ne khuchung de bran è a-in dang ba pha bambao jia doh ruii phro. Ji shii sey srane ichiuh shii now ruii bo. <sup>3</sup> Ji è rek shii brantheK è sai ruii arone, ithek shii yao mage bo, hìne Masdo\* è chiid muui ro, hìne jog idoh thoh din ruii phro.”

<sup>4</sup> Isu è ji yao ched ne ji pha samoy nyi ne wuii dun. Thiisa hà wuii thog mage shii Isu è nyie ro è yao pha duiine bambao duii jia ne hò habin shii phang srane ruii iang pha doh. Samoy nyi è ji pha bambao duii shii sey ramuii shii <sup>5</sup> thiichiuh riu pha brantheK è isa shii giung, nasa ne hi pha bambao phang ne ruii pha ji nyie rek pha sey ramuii lei?

<sup>6</sup> Ai è ithek shii Isu è khi-èrek ne yua pha ji yao ne chang. Ji nuii ne ji pha brantheK è isa shii ji pha bambao now ne dun ge. <sup>7</sup> Samoy nyi è ji pha bambao shii ne Isu moe shii noh ne dun thog ruii. Thiichiuh noh thog shii ithek è yung thek yie ne bambao lakhung shii go phi shii Isu ne ji pha lakhung hà in dun phro. <sup>8</sup> BrantheK è awaithek yung thek hun srane Isu wuii pha lumuii shii wio phi, chiuh-è, bran giakthek è de iphang che srane Isu wuii pha lumuii shii wio phi. <sup>9</sup> Ibi idoh luagieng pha brantheK è ziaK

\* 11:3 11:3: Masdo; dinne jine sapho. 11:9 11:9: Chng 118:25,26

ne yao, “Hamangkhang-aphuii! Na ne bajo wie ro, hanyie Hamangkhang-aphuii pha ibeng è wuii pha bran jishii ne khirzey phi ara. <sup>10</sup> Hamangkhang-aphuii è Aphuii saja Dawid aphuii pha Sajathua pha ji shii ne khirzey phi phro, Hamangkhang-aphuii na ne bajo wie ro!”

<sup>11</sup> Isu Jerusalem hà wuii thog ne Hamangkhang-aphuii ro Misiahò hà wuii srane zab shan ne riig marui ne Isu chiih-è ai samoythek ne habjuang re dun pha ji è Bethany beng pha ji shii wuii dun ro.

*Isu è iphem hingmuii shii thamiee*  
(Mth 21:18-19)

<sup>12</sup> Jipha thimiang shii, Isu nane ai samoythek ne Bethany è wuiiramuii shii Isu ne bajo chi-iy-iy dun. <sup>13</sup> Ithek ne lujia ruang ba shii Isu è irab bajo um pha Iphem hingmuii jia doh mage, ji-è, Isu ne ji pha Iphem hingmuii shii iwoi sow pha wuii dun. Ji-è rek magunde, ji pha Iphem ne iwoi awoi ro, nyeliieshii, ji pha hingmuii ne iwoi woi pha ishak are ba ro. <sup>14</sup> Ji-è, Isu ne ji pha Iphem hingmuii shii thamiee, “Sudoh è thiwing ne na iwoi ne hanyie è de achie mua phro!”

Ji è yao phane samoythek de yoi.

*Isu è Hamangkhang-aphuii ro Misiahò hà wuii*  
(Mth 21:12-17; Lug 19:45-48; Jon 2:13-22)

<sup>15</sup> Isu nane ai samoythek ne Jerusalem hà wuii thog mage shii, Isu ne Hamangkhang-aphuii ro Misiahò hà wuii srane chongjai rek pha branthek shii giung ne gieng muui srane bang zia rai pha thiibliethek shii de phun ne fen ne chiih-è branthek hanyie è pharo ruii ne chong rek pha muro thek shii srobro rek ne fen maphi. <sup>16</sup> Chiihphado shii, Isu è branthek shii Hamangkhang-aphuii Misiahò shii chongjai rek pha manathek shii hanyie shii de ayie yi ro. <sup>17</sup> Chiih-è, branthek shii yao: “Hamangkhang-aphuii ro jigigam ne hi è zey ne um ro, gu Misiahò ne zab pha branthek è sia pha hò ro, jishii, ithek è ji pha Hamangkhang-aphuii ro Misiahò ne mugo pho si pha hò rab ne ruii mua ro.”

<sup>18</sup> Boh phabithek chiih-è Iphey yua pha masdothek è ji pha miyao yoi mage ne, ithek ne Isu shii ua pha noh, chiihphado è aishii ua pha lumuii sow ne rai. Phabi nane Iphey yua pha masdothek ne Isu shii rum, nyeliieshii bajo branthek ne ai muyua jishii bajo sangdun ro.

<sup>19</sup> Ji è re ched ne habjuang re sha mage ne Isu chiih-è ai samoythek ne ji pha rajan thoh srane dun din phro.

*Iphem hingmuii è miyao gao*  
(Mth 21:20-22)

<sup>20</sup> Din pha thimiang riang, Isu nane ai samoythek ne ji pha lumuii è lua din mage shii, ji pha iphem hingmuii ne iriing è yi dang ne zab goh ne um iang pha doh phro. <sup>21</sup> Diyu nyie re pha ji Phithar ne nowluii srane Isu shii yao, “Masdo, riig mage bo, hi pha iphem hingmuii ne na è thamiee marui pha ji è iy dun ro.”

<sup>22</sup> Isu è ithek shii yao, Hamangkhang-aphuii shii migi rek mage bo. <sup>23</sup> Gu nathek shii izai yao dang phro, hanyie è lubu è migi now srane hi pha phiing shii hùg srane khamuii hà fen bo ne yao na de, jine re dun phro. Jishii, ithek è nyie yao pha ji shii migi now chid phro, chiihphado, re ruii phro, chiih-è ji re pha rek phi phro. <sup>24</sup> Jiphachiang è gu nathek shii izai

yao dang phro, “khuchung magunde, nathek migi è Hamangkhung-aphuii shii sia srane nyie lia magunde, nathek jine mua jong rone migi rek bo, chiihphado, nathek è nyie lia pha ji ne phi ruii phro.” <sup>25-26</sup> Nathek jai srane Hamangkhung-aphuii shii sia pha saro arone, misia sia pha ishak shii nathek shii hanyie magunde gidieg rek ne de aishii khung phi bi bo, chiihphado nathek ro asi pha blia rek pha ji de Hamangkhung-aphuii è khung phi phro.

*Isu shii riichai phi pha chiang è miyao sai  
(Mth 21:23-27; Lug 20:1-8)*

<sup>27</sup> Isu chiih-è ai samoythek dinne Jerusalem shii wuii thog shii, Isu ne Hamangkhung-aphuii ro Misiahò hà wuii ne lua ramuii shii Phabi dukhothek chiih-è Iphey yua pha masdothek chiih-è wegthek è Isu moe shii wuii thog ruii. <sup>28</sup> Chiih-è, aishii sai, “Hi pha blia rek mua pha riichai ne na shii hanyie miphi lei chiih-è hanyie miyao ne rek yi lei?”

<sup>29</sup> Isu è ithek shii chang ne yao, “Gu de nathek shii musai jia sai phro, gu musai ji nathek de chang mua arone gu de nathek shii hi pha riichai ne hanyie miphi pha ji yao phro.” <sup>30</sup> Gu shii de yao mage bo, “Jon è branthek shii khowo phi pha riichai hanyie miphi lei? Jine Hamangkhung-aphuii miphi bey? Asi pha jine bran phi bey?”

<sup>31</sup> Ji sai mage ne ji pha branthek ne awaithek chung khnaing rai srane Isu musai ji chang pha nung rai dun. Ithek ne awaithek chung yao rai, khi-èrek ne chang sha rai phlei? Gethek è hi ne Hamangkhung-aphuii miphi rone chang arone, ai ne gethek shii yao din ruii phro, ji-arone nathek ne Jon shii nyie rek ne izai anow ga? <sup>32</sup> Chiih-è, hi ne bran miphi rone yao arone, branthek è gethek shii gui noh phro. Ji-è ithek ne rum ne ayao mua pha re dun, nyieliieshii branthek ne Jon ne chaig rone thieg jong dun. <sup>33</sup> Ji-è, ji pha branthek ne Isu shii athieg rone chang thog ruii.

Ji-è Isu de ithek shii yao, “Chiihphado gu de nathek shii hi pha riichai è gu shii blia rek pha hanyie miphi ji gu de ayao phro.”

## 12

*Isu è awie pha boh raigpho pha phaluii yao  
(Mth 21:33-36; Lug 20:9-19)*

<sup>1</sup> Isu è ithek shii najang shan ne yao: Luangjia shii bran jia è angur raig hai, chiih-è raig shii shan ne muthua thua srane, angur shii chab ne chui ne ikho rey pha nyahiung chog, chiih-è riigpho shii rai yi pha haliig giu jia rab phro. Chiihphado è angur raig cheipho shii phi srane hò thoh marui ne lua dun. <sup>2</sup> Angur khrab pha ishak thog mage shii, cheipho è awai mathang yamiing yi pha ai è awai khiao shii thoh ge phro. <sup>3</sup> Raig cheipho è khiao ji shii zum srane zuang mage, chiih-è nyie de aphii pha idoh thoh din ge. <sup>4</sup> Chiihphado shii muspho è khiao gai shii thoh ge; raig cheipho è aishii de khrug lakhung shii zuang srane biwo rek ne thoh ge. <sup>5</sup> Jipha muspho è dinne gai khiao thoh ge, chiih-è aishii de ua muui phro; chiih-è ithek gai shii duiine bajo awie pha rek phro, chiih-è giak shii zuang ne giak shii ne ua muui phro. <sup>6</sup> Idoh noi shii jia led dang bie ne thoh ge pha ji ne awai è miie pha awairo dufuii ro, ai è awai dufuii shii cheipho hà thoh ge, ai è yao, guné luthong phro ithek ne gu dufuii shii ne ilab phi phro. <sup>7</sup> Jishii cheipho è awaithek chung yao rai, hi ne muspho ro dufuii ro. Thawuii ne ua rai haro, chiih-è ai

ro nurui thek ne gethek ro rey phro! <sup>8</sup> Ji-è, ithek ne dufuii shii zum srane ua ne chiih-è cheipho è ai siu shii angur raig è fuang fen muui phro.

<sup>9</sup> Isu è sai, “Chiihphado shii, muspho è cheipho shii nyie rek phlei?” Ai ne wuii ne ua srane raig gai cheipho shii phi muui phro. <sup>10</sup> Nathek de hi pha jigigam atham bey?

Rungpho è lubao awie rone snai muui pha ji shii ne zab è de mugak re dun phro.

<sup>11</sup> Jine Ithong mirek ro, jine bajo wie pha mieg shii ro.

<sup>12</sup> Jewish dumuiithek ne Isu shii zum pha bidiang phro, nyieliieshii ithek ne thieg ai miyao najang shan ne ithek gidieg shii yao phrone thieg, jishii ithek ne ibrogthek rum, jiè ithek aishii thoh marui ne rek dun.

*Mijin phi pha chiang shii musai sai*  
(Mth 22:15-22; Lug 20:20-26)

<sup>13</sup> Pharisithek chiih-è Herod pha brantheK yi Isu hà thoh ge srane musai rog shii chua phro. <sup>14</sup> ItheK aishii wuii srane sai, “Masdo, gathek ne thieg nane izai yao phro, nane brantheK è nyie now na de sam-adiig pha yao phro, brantheK ro ilab shii de nyie ilab aphì pha rek ro. Jishii brantheK shii Hamangkhung-aphuii muyang pha chiang shii nane izai yao phro, Gathek shii yua riig bo RomantheK saja dumuii shii mijin phi pha ji ne gethek Iphey shii buii bey? Gathek ne ithek shii nyaphi ne ba asi aphì chiid haba?”

<sup>15</sup> Jishii Isu è ithek ro khua ji è riig srane chang, “Nathek nyie rek ne gu shii chua pha bidiang phlei? Bang shikhi jia yi mage bo, chiih-è gu riig-riig haro.”

<sup>16</sup> ItheK è aishii jia yi ne phi, chiih-è ai è sai, “Hanyie mizia chiih-è hanyie ibeng lei.” ItheK è chang, “Hi ne Roman thek saja dumuii ro ro.”

<sup>17</sup> Isu è ithek shii yao, “Chiihphado, hi ne wie ro, nyie yi saja dumuii è re pha ji ne saja dumuii shii phi muui bo, chiih-è nyie yi Hamangkhung-aphuii è re pha ji ne Hamangkhung-aphuii shii phi muui bo.”

Chiih-è ithek ne Isu shii wiengphleg dun ro.

*Iy pha ji è hòì pha musai ro*  
(Mth 22:23-33; Lug 20:27-40)

<sup>18</sup> Chiihphado shii Sadusithek hanyie è iy pha ji è ahòì phrone yao photheK ne Isu moe shii wuii srane yao, <sup>19</sup> Masdo, Moses è hi pha Iphey ne gathek shii zey phi phro: Bran jia è yiy yi ne, ani agiak pha iy dun, ai ikhuii è ji pha misiung shii yiy ne ani giak arone, ji pha ani ne iy dun pha ro nyare yi bo. <sup>20</sup> Luangjia shii khuiino miley um; zab è khoh ji è yiy yi srane ani agiak pha iy dun. <sup>21</sup> Chiihphado shii din pha ikhuii ji è de ji pha hò-amuii shii yiy, chiih-è ai de ani agiak pha iy dun. Uomchiieng pha khuii shii de ithek shii nyie re pha ji duine re phro, <sup>22</sup> chiih-è chiihphado shii gai thek, zab khuiino miley è ji pha hò-amuii shii yiy srane ani agiak pha iy dun. Zab pha idoh shii ji pha hò-amuii de iy dun. <sup>23</sup> Chiihphado shii, iy pho yi zab hòì pha Inai sieng mage shii, ithek miley è yiy pha hò-amuii ji ne, hanyie ro yiy re phlei?

<sup>24</sup> Isu è ithek shii chang, “Nathek ne asi pha brantheK ara! Nyieliieshii nathek ne hi pha Hamangkhung-aphuii ro jigigam chiih-è ai riichai shii athieg mua phro. <sup>25</sup> Iy pho thek hòì din mage shii, ithek ne, hamangkhliie



duiine re ne hamangkhang hà ne yiy ayiy phro. <sup>26</sup> Iy pho ne hòi ruii phro, ithek ne jabiing hòi pha Moses ro Jigigam ji shii atham bey? Thiichihih shii zey phro Hamangkhang-aphuii è Moses shii yao, ‘Gune Abraham ro Hamangkhang-aphuii ro, Isakh ro Hamangkhang-aphuii ro, chiih-è Jakhob ro Hamangkhang-aphuii ro’ Ai è ji yao shii ne bajo idam ibi hà ithek ne iy jong ro. <sup>27</sup> Hamangkhang-aphuii ne brantheke ro Hamangkhang-aphuii ro, jiè hanyie iy dun magunde thuh de isieng ba ro, jishii iy pho ro asi ro. Nathek ne zab adunmey pha now ro!”

*Zab è boh muyung*  
(Mth 22:34-40; Lug 10:25-28)

<sup>28</sup> Thiichihih shii um pha Iphey yua pha masdo jia è ithek mulo ramuii pha yoi. Ai è Isu yi Sadusithek shii ne wie è chang pha doh, jiè ai ne Isu shii musai sai: “Nyiie muyung ne zab è de mugak ba lei?”

<sup>29</sup> Isu è aishii chang, “Zab è mugak muyung ne hì ro, ‘Israel pho! yoi mage bo, gethek ro Ithong\* Hamangkhang-aphuii ne jia bie ro. <sup>30</sup> Nawai Hamangkhang-aphuii shii nawai lubu è, nawaithek ragung è, nawaithek khani è, nawaithek chua rog shii è miie mage bo.’ <sup>31</sup> Chiih-è nyichiieng pha mugak muyung ne hì ro: ‘Nawaithek ro hadung-haluii pho shii de nawaithek chung miie rai pha duiine miie bo.’ Thiichihih è ne nyi ji è boh gai mugak muyung oi sha ro.”

<sup>32</sup> Iphey yua pha masdo ji è Isu shii yao, masdo! “Wie ro, hì ne izai chak ro, na è yao pha ji ne, Ithong ne Hamangkhang-aphuii bie ro, chiih-è, gai Hamangkhang-aphuii ne oi ro, jishii ai jia bie ro” <sup>33</sup> Chiih-è brantheke ne Hamangkhang-aphuii shii awaithek lubu è awaithek khani è awaithek chua è miie chiid phro, chiih-è awaithek shii miie pha duiine hadung-haluii pho shii de miie chiid phro. Hì pha muyung nyi nuii ne rek pha ne miiram ua ne Hamangkhang-aphuii shii khlem ne zid phi pha ji è de bajo boh muyung ba ro.

<sup>34</sup> Isu è nuii shii ji pha bran miyao ne wie ro, “Na ne Hamangkhang-aphuii ro Sajathua è muna ruang asi sha phro.”

Ji è yao ched mage ne zab ne rum ne Isu shii musai asai mua.

*Masi Chiang pha musai*  
(Mth 24:41-46; Lug 20:41-44)

<sup>35</sup> Isu ne Hamangkhang-aphuii ro Misiahò shii miyao yua ne rai srane brantheke shii musai jia sai ruii, nyie khi-èrek ne Iphey yua pha masdothek ne Masi ne Dawid Saja pha riing rone yao mua phlei? <sup>36</sup> Dawid shii Hamangkhang-aphuii ro Ragung è yao yi phro:

Ithong è gu Ithong shii yao;

Gu è na shuangtheke shii gu lai luii aruii sapho ne

Na ne guro phazoi pha riichai ithua shii dug bo.

<sup>37</sup> Dawid awai de aishii ne Ithong rone ho, jiè nyie khi-èrek ne Masi ne Dawid ro riing re mage phlei?

*Isu è iphey pha gidieg masdothek shii phriie*  
(Mth 23:1-36; Lug 20:45-47)

---

**12:26** 12:26: Mul 3:6    **12:28** 12:28-34: Lug 10:25-28    **12:29** 12:29,30: Iphy 6:4,5    \* **12:29** 12:29: Ithong gethek ro Hamangkhang-aphuii Ithong bie ro; dinnelthong gethek ro Hamangkhang-aphuii, Ithong awaiji.    **12:31** 12:31: Lew 19:18    **12:32** 12:32: Iphy 4:35    **12:33** 12:33: Hos 6:6    **12:36** 12:36: Chng 110:1

Bran ibrogthek ne Isu miyao ji sang ne nuiiramui ro. <sup>38</sup> Isu è ithek shii yua, ai è yao, “Iphey yua pha masdothek è ragia rek ne rai bo, ithek ne yung phiang rog shii lua ne brantheek shii riig yi pha bajarai ithua hà ilab phi yi pha rek phro. <sup>39</sup> Misiahò hà wuii ne de ithek ne mugak biang shii ong ne chiih-è michie-chie pha ithua shii biang wie shii ong ne dug phro. <sup>40</sup> Itheek ne misiung thek phua yi srane chiih-è ithek hò de rio maphi, chiih-è ithek ne brantheek wie rone riig yi pha misia de phiang sia phro. Itheek zab shii ne bajo awie pha re ruii phro!”

*Misiung ro mizid*  
(Lug 21:1-4)

<sup>41</sup> Isu yi Hamangkhung-aphui ro Misiahò pha mizid gam moe shii dug ne rai ramuii shii, ai è bukho brantheek ne bajo bang zid pha doh ruii; <sup>42</sup> chiihphado shii dusho misiungmuii jia wuii ne bang ìujia chab phro. <sup>43</sup> Ji è doh mage ne Isu è awai samoythek shii awai moe shii ho srane yao, “Gune nathek shii izai yao dang phro, hì pha dusho misiung ne mizid pha gam ne bran shii gai re-è ne zab è de bajo muna zid phro. <sup>44</sup> Gai thek ne awaithek shii nyie um pha ji è ìujia yi srane zid bie phro, jishii ai ne dusho magunde awaishii nyie um thith pha ji yi srane zab zid muii phro.”

## 13

*Isu è Hamangkhung-aphui ro Misiahò ji chuak pha yao*  
(Mth 24:1-2; Lug 21:5-6)

<sup>1</sup> Isu ne Hamangkhung-aphui ro Misiahò ji thoh srane dun ramuii shii, ai samoy jia è aishii yao, “Masdo, hì pha lubao chiih-è hòthek ne bajo khie doh muii ro.”

<sup>2</sup> Isu è aishii chang ne yao, “Nathek ne hì pha boh lubao hò ne riig iang bo! Doh jia shii ne hì pha hòthek pha lubaothek ne jia de khim ne arai mua pha zab chuak dun phro.”

*Gu samoythek shii ne diig chiih-è riie rey ruii phro*  
(Mth 24:3-14; Lug 21:7-19)

<sup>3</sup> Isu ne ji pha Hamangkhung-aphui ro Misiahò pha khlei pha sumaro phiing shii dug ne rai shii, Phithar, Jems, Jon chiih-è Andrew ne aishii ug ne wuii thog ruii. <sup>4</sup> Itheek è aishii yao, “Gathek shii yao phi bo, ji pha inai ne khuchung thog ruii phlei? Chiih-è, ji pha inai thog sha ruii rone thieg yi pha gathek è nyie doh shii ji pha inai ne re phlei?”

<sup>5</sup> Isu è ithek shii yao, nathek ne nowbthan ne rai iang bo, chiih-è brantheek è ithek shii akhin-aring yi rabo. <sup>6</sup> Bajo brantheek è ithek shii yao ruii phro, gune ji pha Masi ro! Bran bajo thek ne gu beng è yi ne khinrin ruii phro. <sup>7</sup> Chiih-è, nathek ne mak thek inui thog pha yoi mage shii, chiih-è mak ruang hà thog pha mua yoi mage shii, nathek ne aram chid rabo. Jitheek ne izai re ruii phro, jishii, jine jong pha ishak thog sha rone asi ro. <sup>8</sup> Du-ùà chung de gui rai ruii phro; zab ithua thek chung de gui ruii phro, thiichiih shii zab hà sajid sham ne, chiih-è zab pha chieniing pha thek oi pha diig re ruii phro. Jitheek ne hò-amuii thek è ani giak pha ibi shii riie pha duine diig ruii ro.

<sup>9</sup> Nathek ne nawaithek shii nowbthan srane bujuui ne rai iang bo. Nathek shii de zum ne limiang hò hà noh srane Jewthek misiahòthek shii zuang ruii

phro; nyieliieshii gu shii nuui pha Chiang è nathek shii ne dumuiithek chiih-è saja thek moe shii noh ne ithek ro migi Chiang ji yao yi phro. <sup>10</sup> Ai ne zab pha ibi shii guro miyao wie hìne zab brantheK shii chiih-è zab pha du-ùathek shii yao ched bi phro. <sup>11</sup> Khuchung magunde, nathek shii zum srane limiang moe shii noh dun shii, nathek ne khi-èrek ne yao sha phlei! Inow ne arum chid rabo; nyieliieshii, ji pha idoh shii ne nathek shii yao mua pha lumuii phi ruii phro; nathek è nyie yao pha miyaogam ne ithek miyao pha asi phro, ji ne Hamangkhung-aphuii Ragung è yao gieng phro. <sup>12</sup> Khuiino chung magunde, zum srane ua yi pha phi muui phro, aphuii è ani shii de ji è rek ruii phro, aniphiingtheK de awaithek pha aphuii amuii shii ji è rek ne ua muui phro. <sup>13</sup> Zab brantheK ithek shii gu Chiang è snai ne chiih-è ariiung yang pha rek ruii phro, nyieliieshii ithek è gu shii migi rek phro. Jishii, hanyie è awai migi shii zab pha inai thog dang pha rek pho ne ragia re ruii phro.

*Zeanakhurei pha zia jia*  
(Mth 24:15-28; Lug 21:20-24)

<sup>14</sup> “Nathek ne doh ruii phro, akhie dang pha ibuii jia yi khi hà ai arai pha ji shii riu ruii phro.” Thampho ne hi thieg bo: Hi pha miyao ne nyie yao pha ji ne thieg pha bidiang bo. Chiihphado shii hanyie ne Judea pha ithua hà um lei ne ithek ne phiingtheK hà ran dun phro. <sup>15</sup> Bran hanyie yi awai hòzak hà um pho ne buzam awai hò iliing hà dun ne mana yi pha ishak amua rabo. <sup>16</sup> Bran hanyie ne raig hà um pho ne awaithek yung yi pha idoh hò hà adun rabo. <sup>17</sup> Hò-amuii hanyie ani wiig ne chiih-è ani lu um pho ne ji pha inai shii ne bajo diig phro! <sup>18</sup> Jipha ishak ne hakhanshak shii are yi pha Hamangkhung-aphuii shii sia bo! <sup>19</sup> Hi thek pha diig inai ne, Hamangkhung-aphuii è igobi sohjambling rab dang pha ishak è yi ne thuh thog pha hanyie è athieg ba pha awie dang pha diig ji thog ruii phro. Ji re pha idoh shii ji duine mia pha diig ne dinne are phro. <sup>20</sup> Jishii Hamangkhung-aphuii è diig pha inai shii ne la-ù-ù rek phi phro; ai è ji arek arone, hanyie de asieng mua phro. Jimagunde awai è gua pha brantheK Chiang shii inai la-ù-ù rek phi phro.

<sup>21</sup> Chiihphado è, hanyie magunde nathek shii yao, riig bo, ichiih shii ne Masi um ro! Din ne, riig bo, the jine Masi rone yao na de! Jishii aishii migi arek rabo. <sup>22</sup> Biidiie pha Masi chiih-è biidiie pha chaigtheK ne khia ruii phro. ItheK ne are mua pha bliatheK rek ne chiih-è buangtheK ji rek ne, chiih-è rek mua arone, Hamangkhung-aphuii è gua pha brantheK shii khinrin pha nyiu phro. <sup>23</sup> Gu miyao pha miyao Chiang hi ne nawaithek shii ragia rek ne chiih-è saro bo.

*Bran dufuii wuii din ruii pha jigigam*  
(Mth 24:29-31; Lug 21:29-33)

<sup>24</sup> Diig pha ishak inai pha idoh ne inai ne igiia re dun phro, chiih-è habie de achuang pha re dun phro, <sup>25</sup> DadiangtheK de hamangkhung è thazam chiih ruii phro, chiih-è hamangkhung pha riichaithek de sham ruii phro. <sup>26</sup> Chiihphado Bran Dufuii khia ne, biisiie nane boh blu rog shii sakhamiing shii wuii ruii phro. <sup>27</sup> Ai è hamangkhlietheK shii soh pha iring wi shii thog

pha thoh srane sohnyiak iring jia pha iring è jia pha iring thog pha ithek shii Hamangkhung-aphuui mugua pha bran shii khrab yi phro.

*Iphem hingmuui ro miyao*  
(Mth 24:32-35; Lug 21:29-33)

<sup>28</sup> “Jipha Iphem hingmuui è nathek shii ìd yi phro. Ji pha iphem hingmuui ro idiphak ire re ne chiih-è jum re mage shii irab jao ne nyu ruii phro. Nathek ne thieg phro halua idam ne inui re sharuui rone. <sup>29</sup> Ji duiine, nathek è ji re pha doh mage shii, nathek ne thieg, jao pha ishak inui sha ro. \* <sup>30</sup> Now bo, hithek re mage shii ichiih um pha ithek giak bran ne isieng ba phro. <sup>31</sup> Hamangkhung chiih-è sohnyiak ne san dun phro, jishii gu miyaogamthek ne khuchung de asan phro.”

*Hanyie de ji pha inai chiih-è ijak shii athieg phro*  
(Mth 24:36-44)

<sup>32</sup> “Jishii hì pha inai chiih-è ishak thog pha ji ne hanyie de athieg mua phro Hamangkhliiethek de chiih-è Dufuui de athieg mua phro; ji pha inai thog ruii pha ne Hamangkhung-aphuui awai è thieg bie ro. <sup>33</sup> Wie riig srane nowbthan ne rai iang bo, chiih-è ji pha inai thog ruii phane nathek athieg phro. <sup>34</sup> Jipha inai ne ji duiine phro, Bran jia hanyie è awai khiaothek shii dumuii phi srane chiih-è zab pha khiao shii nyie rek chid pha ji yao ne chiih-è hò khan pha bran shii hò wie riig bo è yao ne awai hò thoh marui ne wuiidun. <sup>35</sup> Chiihphado è, nowbthan bo, nyieliieshii hò pha muspho ne khuchung thog ruii pha ji ne nathek ne athieg phro yangne ne ai ne habjuang shii dun ruii pha de um phro, yangne ai ne habiu duchoi shii de dun ruii pha de um phro, dinne, yangne ai ne hasiang asiang ba ibi shii thog ruii pha de um phro, yangne ai ne hasieng sieng pha idoh shii thog ruii pha de um phro. <sup>36</sup> Ai ne hamblo shii dun thog mage shii nathek ne amen iang rabo. <sup>37</sup> Chiihphado, gu nathek shii nyie yao pha ji ne, gu zab shii yao ne: nowbthan ne rai iang bo ne yao phro.”

## 14

*Branthek è ua pha lumuii sow pha bidiang phro*  
(Mth 26:1-5; Lug 22:1-2; Jon 11:45-53)

<sup>1</sup> Hì ne buii Hiladun Sai pha chiih-è Phiia ajjie pha Iweb chie muui pha danyi ibi shii ro. Boh phabithek chiih-è Iphey yua pha masdothek è ug ne Isu shii zum pha rek phro, chiih-è ua pha rek phro. <sup>2</sup> Ithek è yao rai, “Gethek ne sai pha inai shii arek haro dinne ji è rek mage shii branthek è gethek shii gui noh mage phro.”

*Bethany hà Isu ro khrug shii thiillie shun*  
(Mth 26:6-13; Jon 12:1-8)

<sup>3</sup> Jipha ishak Isu ne Bethany pha ithua hà Simon ro hò shii ro, chiih-è ji pha bran ne bajo awie pha hia è rei phro. Isu chie ramuii shii, hò-amuii jia ne igang iwoi è rab pha bajo rem noh pha thiillie sasia chiih-è bajo igong um pha yi ne wuii thog ruii phro. Jipha hò-amuii è sasia ji chui srane bajo rem noh pha thiillie ne Isu khrug shii shun phi. <sup>4</sup> Giak branthek è aishii riig ne bajo lijieg ne awaithek chung yao rai, “Nyie rek ne nyama igong um pha chiih-è bajo rem noh pha thiillie ne aishii shun ne mua muui phlei? <sup>5</sup> Jipha

\* **13:29** 13:29: ishak noi sha ro, jao pha saro hà bo; dinneai ne noi sha ro, dun pha saro sha bo.

**13:32** 13:32: Mth 24:36    **13:34** 13:34: Lug 12:36-38    **14:1** 14:1: Mul 12:1-27    **14:3** 14:3: Lug 7:37,38

bajo rem noh pha thiillie ne hò-amuii è liu arone idam jia pha riinang\* mua ne ji pha bang ne dushothek shii phi liak pha ji wie phro!" Chiih-è ithek è hò-amuii ji shii awie dang pha giung phro.

<sup>6</sup> Jishii Isu è yao, aishii ji thoh muui bo, nyie rek ne nathek ne aishii afak-afi rek phlei? Ai ne gu shii bajo wie chiih-è khie bliá rekramuii ro. <sup>7</sup> Dusho bran ne nathek rog shii idang um ruii phro, nathek ne ithek shii khuchung magunde yang shii nya nong phi bo. Jishii gune idang nathek rog shii oi phro. <sup>8</sup> Ai è nyie rek mua pha ji rek phi phro; ai è gu siu bajo rem noh pha thiillie shun phi ne ibi shii gu wieng pha ishak khriig rek phi. <sup>9</sup> Thuh, gune nathek shii izai yao dang phro: Zab pha sohjambling shii guro Mua Wie ji yua mage shii, ai è nyie rek phi pha ji ne, aishii nowkhlei yi pha yao ruii phro.

*Judas è Isu shii zum yi pha nuii*  
(Mth 26:14-16; Lug 22:3-6)

<sup>10</sup> Chiihphado, samoy snanyi è jia Judas Iskharioth yi boh phabithek shii wuii ne Isu shii khi-èrek ne zum pha ji ithek shii nung gieng. <sup>11</sup> Ai miyao ji nuii ne phabithek ne nyu dun, chiih-è aishii bang phi pha sbang rek. Ji-è Judas nyie khi-èrek ne Isu shii chua wie mua ne ithek wad shii zum yi pha jao ne sow phro.

*Isu buii hiiadun pha michie chie*  
(Mth 26:17-25; Lug 22:7-14,21-23; Jon 13:21-30)

<sup>12</sup> Phiiia ajiie ba pha iweb Sai pha michie chie pha igobi inai shii, Hiiadun pha michie shii shiishaithek ua shii, samoythek è Isu shii sai, "Gathek shii khihà wuii ne naro buii Hiiadun pha michie ji khriig rek iang bo è yang lei?"

<sup>13</sup> Chiihphado Isu è samoy nyi shii muyung rog shii thoh ge: Rajan hà wuii ne, chiih-è nasa ne kho jariiè han pha bran jia si ruii phro, nasa ne ji pha bran rog shii luagieng ne <sup>14</sup> ai khi pha hò shii khud dun pha hò muspho shii yao bo, Masdo è yao muui ro, gu samoy chiih-è gu dug ne Hiiadun pha michie chie pha ùgud ne khi hà lei? <sup>15</sup> Chiihphado ai è ithek shii ne bajo bo lakhung ikhuno pha ùgud jishii chie pha zab saro ne ruii pha doh ruii phro. Nathek ne thiisa hà michie saro iang bo.

<sup>16</sup> Samoythek è thoh srane, rajan hà wuii thog, chiih-è Isu è ithek shii nyie khi-è yao pha ji duiine zab saro ne um iang pha doh phro; chiih-è nathek è Hiiadun pha ji Sai pha michie saro phro.

<sup>17</sup> Habjuang re sha shii, Isu awairo snanyi samoythek rog shii ji pha ithua hà wuii thog. <sup>18</sup> Ithek è thiibliie hà chie pha dug shii, Isu è ithek-shii yao, "Gu nathek shii yao phro, ichiih gu rog shii chie gieng pha samoy jia è gu shii guro mak pho shii phi muui phro."

<sup>19</sup> Ji-è yao mage ne, samoythek ne zo ne jia pha idoh shii jia è aishii sai, "Ji ne izai gu asi bey?"

<sup>20</sup> Isu è ithek shii chang, "Ai ne samoy snanyi è jia ji phro, hanyie è airo iweb yi guro shiikhiia rog shii wo gieng phro. <sup>21</sup> Bran Dufuii ne jigigam shii zey ne um pha ji duine iy ruii phro. Jishii, hanyie è Bran Dufuii shii guro makpho shii phi pha jine khama awie dang pha re ruii phro. Ji pha bran shii ne khuchung de agiak arone ji wie ba phro!"

*Ithong ro michie*  
(Mth 26:26-30; Lug 22:14-20; 1Khor 11:23-25)

\* 14:5 14:5: liiman bang smed: riig 6:37    14:7 14:7: Iphy 15:11    14:18 14:18: Chng 41:9

<sup>22</sup> Ithek ne chie pha dug mage shii, Isu è iweb jia chiing srane Hamangkhung-aphuii shii sia ne Laso phi ne chiih-è ji srane iweb awai samoythek shii phi. Ai è yao, “Choi mage bo, hine guro siu ro.”

<sup>23</sup> Chiihphado ai è gog shii chiing srane Hamangkhung-aphuii shii Laso phi ne ithek wad shii phi; chiih-è ithek zab ji pha gog è niing phro. <sup>24</sup> Isu è ithek shii yao, “Hi ne guro ifai ro! Guro hi pha ifai ne bame brantheek shii thoi phi phro, guro ifai ne Hamangkhung-aphuii awai shiinyie shii ruii phro.” <sup>25</sup> Gune nathek shii yao phro, “Gu ne hi pha angurphuii ji Hamangkhung-aphuii ro Sajathua pha phuii iwo ji aniing sapho shii khuchung de aniing phro.”

<sup>26</sup> Chiihphado ithek sthun bai srane Sumaromuang pha Phiing hà wuii dun.

*Isu è yao Phithar ne airo samoy asi ro khlam ro*  
(Mth 26:31-35; Lug 22:31-34; Jon 13:36-38)

<sup>27</sup> Isu è ithek shii yao, “Nathek ne gu shii thoh srane yo dun phro, Jigigam shii yao, ‘Hamangkhung-aphuii è brogpho shii ne ua muui phro, chiih-è ai shiishaithek ne dayiingdayang re dun phro.’” <sup>28</sup> Jishii gune dinne chai sieng shii, gune ithek ibi shii Galili hà wuii ruii phro.”

<sup>29</sup> Phithar è Isu shii chang, “Gai è na shii thoh marui ne de gu ne khuchung de na shii athoh phro!”

<sup>30</sup> Isu è Phithar shii yao, “Gu na shii yao, sudoh biu khephuii nyichiieng lo pha ibi shii nane gu shii athieg ro è uomchiieng yao ruii phro.”

<sup>31</sup> Phithar ne din è de lahuuak gang chang, “Gune narog shii iy magunde gune ji è ayao phro!”

Chiih-è, zab samoythek è de ji-duiine yao phro.

*Isu è sia pha ithua jine Gethsemani beng*  
(Mth 26:36-46; Lug 22:39-46)

<sup>32</sup> Ithek ne Gethsemani ho muui pha ithua shii wuii thog srane Isu è awai samoythek shii yao, “Gu siaramuii shii nathek ichiih dug bo” <sup>33</sup> Ai è Phithar, Jems, chiih-è Jon shii awai rog shii noh dun. Aishii ne duhug chiih-è diig thog mage phro, <sup>34</sup> Chiih-è, ai è samoythek shii yao, “Gu lubu pha zo jine bajo boh è gu shii ne achihi iy bsa hà re dun ro. Ji-è nathek ne ichiih rai ne, chiih-è amen pha khriig rek iang bo.”

<sup>35</sup> Ai ithek è luja ruang wuii srane nyialieg hà phieng srane sia, na è re muui arone, aishii ne riie pha ishak ji è awuii yi rabo. <sup>36</sup> Ai è sia “Aphuii” “Gu Aphuii! Na shii ne zab re mua ruii phro. Hi pha riie gog ne gu è yi muui bo. Thuh de gu è nyie yang pha ji asi ro, jishii na è nyie yang pha ji è ro.”

<sup>37</sup> Chiihphado ai è idoh dun ne riig shii samoy uom ne men iang pha doh phro. Ai è Phithar shii yao. Simon Phithar nane men muui bey? Ishak jia de sieng ne arai mua bey? <sup>38</sup> Chiih-è ai è ithek shii yao, “Khriig rek, chiih-è chuajan hà achihi yi pha sia mage bo. Chiih-è ragung ne rek yang, jishii siu ne zia ro.”

<sup>39</sup> Ai din ne wuii dun srane ibi hà yao pha miyaogam ji yao ne sia. <sup>40</sup> Chiihphado ai idoh awai samoythek hà dun shii ithek ne men pha doh iang; ithek ne mieg de ayang mua. Chiih-è aishii nyie yao chiid pha ji ne ithek ne athieg mua ro.

<sup>41</sup> Ai Uomchiieng idoh dun thog shii, ai è samoythek shii yao, “Nathek ne thuh de men ne chiih-è thung bamuii bey? Khriig sha! Riig bo, ishak ne wuiiruii ro ‘Bran Dufuii shii ne layogthek bran pha blu pho wad shii phi muui phro.’ <sup>42</sup> Cho! Sieng srane dun ne, riig mage bo, hanyie gu shii khinrin pha bran ji ne ichiih um ro!”

*Isu shii zum pha ji*

*(Mth 26:47-56; Lug 22:47-53; Jon 18:3-12)*

<sup>43</sup> Isu nyayao bamuii shii, boh Phabithek chiih-è Iphey yua pha masdothek nane dukhothek è thoh ge pha ibrogthek dog ne chiih-è muchang chiih-è khamriiethek yi ne wuii pha ithek rog shii samoy snanyi è jia Judas de wuii thog. <sup>44</sup> Judas è bran ibrogthek shii phriie jong phi phro: “Gu è bran hanyie shii lab phi ne khichiug pha ji ne nathek chiid pha ji ro. Aishii zum srane chui zoi muui bo.”

<sup>45</sup> Achia dang pha Judas wuii thog ruii, Ai è Isu shii wuii srane yao “Masdo!” Chiih-è aishii khichiug. <sup>46</sup> Ji-è ithek ne aishii zum srane chuh kho muui phro. <sup>47</sup> Jishii thiichiuh riu pho jia è ai khamriie khiasrid srane kho Phabi ro khiao pha khoh wiegthiak muui phro. <sup>48</sup> Chiihphado Isu è yao srane ithek shii yao, nathek ne gu shii mugohpho duiine zum pha khamriiethek chiih-è muchiangbang rog shii wuii ne bey? <sup>49</sup> Gune idang ithek rog shii Hamangkhung-aphuii ro Misiahò hà yua shii, gu shii ne nathek è azum. Jishii hi ne jigigam zab re pha rek phro.

<sup>50</sup> Chiihphado ai samoythek ne aishii thoh marui srane yoh dun.

<sup>51</sup> Bran filiao jia ribiu guui srane ai idoh gieng srane ai rog lua shii, ithek è aishii de zum pha bidiang phro. <sup>52</sup> Jishii ai è yung thiichiuh thoh marui srane ikhilen yoh dun.

*Isu ne limiang ibi shii noh thog*

*(Mth 26:57-68; Lug 22:54,55,63-71; Jon 18:13,14,19-24)*

<sup>53</sup> Chiihphado, Isu shii ne boh Phabi, thiig pha dukhothek chiih-è Iphey yua pha masdothek wuii khrab pha hò hà noh dun. <sup>54</sup> Phithar de ruang è lua srane, kho Phabi hò sibiang shii thog. Thiichiuh shii ai de hò riig pha khiaothek rog shii bai ang ne awai shii lua rek ne rai. <sup>55</sup> Boh phabithek chiih-è zab limiangthek è Isu shii ua pha ichiig khagi sow shii, jishii ithek ne nyie de adoh mua ro. <sup>56</sup> Khagi pho è de bajo Isu Chiang shii biidiie yao, jishii ithek miyao jine a-ò ro.

<sup>57</sup> Chiihphado de giak bran è jai srane Isu mak shii khlam ne yao phro, <sup>58</sup> “Gathek è ai è hi è yao pha yoi phro, gune bran murab pha Misiahò hi ne chuak muui srane da-uom pha idoh shii ne bran murab asi pha jia rung ruii phro.” <sup>59</sup> Jishii ithek miyao pha phaluii jine a-ò phi ro.

<sup>60</sup> Kho Phabi jia è aishii ithek zab pha moe shii riu iang yi srane Isu shii musai sai, “Ithek è na shii nin ne the pha ji ne, na shii ne muchang oi bey?”

<sup>61</sup> Jishii Isu è aro pha rai ne, chiih-è nyie jia de miyaogam ayao ro. Din ne Kho Phabi è aishii sai, “Na ne Hamangkhung-aphuii ro khirzey dufuii Masi ji bey?”

<sup>62</sup> Isu è chang, “Gune ji chak ro, nathek de doh ruii phro Bran Dufuii ne Bohblu Hamangkhung-aphuii ro phazoi shii dug ne, chiih-è Hamangkhung è sakhamiing rog shii wuii ruii phro!”

<sup>63</sup> Kho Phabi è ai ro yung ji srane yao, gathek ne dinne muna khagi achid sha phro yao! <sup>64</sup> Ai ne Hamangkhung-aphuii shii makhakriing pha miyao jine ithek de yoi phro, jiè ithek muphak ne nyie lei?

Ithek zab ne aishii mak rek phro, ai ne ichiig um ro jiè ai ne iy chid phro.

<sup>65</sup> Thiichiih pha giak bran è Isu shii chan cho mage, chiih-è ithek è aishii mieg pho srane zuang. Chiih-è ithek è yao, “Na shii hanyie muzuang lei ne id riig bo!” Chiih-è, ragia rek pho è aishii noh srane phay mage phro.

*Phithar è yao gune ai rog shii luapho asi ro*  
(Mth 26:69-75; Lug 22:56-62; Jon 18:15-18,25-27)

<sup>66</sup> Kho Phabi ro khiaomuii ji wuii thog shii Phithar yi bsa hò sbiang shii nyarai ba muui ro. <sup>67</sup> Ai è Phithar yi bai ang ne rai iang pha doh shii, ai Phithar shii miang riig srane yao, Na de Nazareth pha Isu rog pha bran bidey ne.

<sup>68</sup> Jishii Phithar è aishii yao “Hi pha miyao ne izai asi ro, gune aishii athieg ro, ai è chang, na è nyie yao ramuii pha ji ne gune agao mua ro,” chiih-è ai sbiang pha muthua è fuang nyakhia dang shii, khephuii è ò mage.

<sup>69</sup> Jipha khiaomuii ji è aishii thiichiih doh srane riu pho shii jao ne yao din, “Ai de ithek è ne jia ro!” <sup>70</sup> Jishii Phithar è dinne hì ne izai asi rone yao.

Ëujia pha idoh shii ai è Phithar shii ai moe riu ne rai pha ji è dinne Phithar shii de, “Na ne ithek rog pha bran asi rone biidiie ayao mua phro, nyieliieshii na de, Galili pha bran ro.”

<sup>71</sup> Chiihphado Phithar è yao, “Gu surua thak ne izai yao phro! Gu miyao ji izai asi arone Hamangkhung-aphuii ne gu shii ne lago phi phro! Chiih-è na è yao muui pha bran Chiang shii gu athieg ro!”

<sup>72</sup> Chiihphado dang shii khephuii è nyichiieng ò mage phro, chiih-è Phithar ne Isu è aishii yao khe nyichiieng ò pha ibi shii na è gu shii uomchieng khlam ne a-ìd rone yao phrone aishii yao pha ji nowkhlei mage ne, chiih-è ai ne azud mua pha cho dun phro.

## 15

*Philathus moe shii Isu noh thog*  
(Mth 27:1,2,11-14; Lug 23:1-5; Jon 18:28-38)

<sup>1</sup> Hamiang riang shii boh Phabithek è thiig pha dukthek chiih-è Iphey yua pha masdothek chiih-è zab limiangthek ne khthiie si srane phak rai. Ithek è Isu shii shiirnai è zoi srane Philathus moe hà noh ne, ai wad shii phi muui phro. <sup>2</sup> Philathus è Isu shii sai, “Na ne Jewthek pha saja bey?”

Isu è aishii chang, “Na è nyie yao pha ji ne, ji chak ro.”

<sup>3</sup> Jipha boh phabithek ne Isu shii bajo ichua yao ne nin dun. <sup>4</sup> Ji-è, Philathus ne aishii sai din, “Na ne chang pha nyie oi bey? Nuui bo, branthek è na shii awie pha nin pha ji ne ayoi bey?”

<sup>5</sup> Ji è yao magunde, Isu ne miyaogam jia de ayao phi, ji è Philathus de wiengphleg dun ro.

*Isu shii ua yi pha yaothiak*  
(Mth 27:15-26; Lug 23:13-25; Jon 18:39—19:16)

<sup>6</sup> Idang Hiadun pha ji Sai pha itho shii ne Philathus è phattheg shii chab pha hanyie shii magunde bran jia shii branthek è lia pha ji thoh muui phro. <sup>7</sup> Jipha ishak shii Barabas beng pha bran jia yi phattheg hà chab muui phro,



nyieliieshii ai è giak thek gak pha ji shii, gui ne bran ua muui pha Chiang è phatheg hà chab muui phro. <sup>8</sup> Bran ibrog è Philathus shii khrab thog ne idang rek pha duiine phathegpho jia shii thoh bo è yao, <sup>9</sup> Philathus è ithek shii sai, “Gu shii nathek ne Jewthek pha saja shii se ne thoh bo ne yang bey?” <sup>10</sup> Philathus ne thiëg muui, boh phabithek è Isu shii miegriie ne zum srane ai wad shii phi muui phro.

<sup>11</sup> Jishii boh phabithek è ibrogthek shii nyiu ne yao srane Isu Chiang shii, Barabas shii ichad thoh phi bo è Philath shii yao ba yi phro. <sup>12</sup> Philathus è ibrog shii sai, chiihphado gune nathek è Jewthek pha saja rone ho pha bran shii ne nyie rek bo è now lei?

<sup>13</sup> Itek è idoh ziak, “Aishii ne bai shii zun muui bo!”

<sup>14</sup> Philathus è sai, “Jishii ai ne nyie ichiig rek phlei?” Itek ne dinne de gang ziak, “Aishii ne bai shii zun muui bo!”

<sup>15</sup> Philathus è bran ibrogthek wie than yi pha Barabas shii ithek Chiang è thaluu thoh mage phro. Chiihphado ai è Roman siphahithek shii phi ne Isu shii chia yi srane chiih-è bai hà zun ne ua yi pha phi muui phro.

### *Siphahi è Isu shii makhakriing*

*(Mth 27:27-31; Jon 19:2-3)*

<sup>16</sup> Siphahithek è Isu shii badri ro ithua pha muthua iliing hà noh srane, gai ijakthek shii de ò ho phro. <sup>17</sup> Itek è Isu shii yung phiang ishaig guii phi srane migem è rab pha rago ai khrug shii khak phi phro. <sup>18</sup> Itek è wad khung ne aishii yao, “Jewthek pha saja phiang sieng bo!” <sup>19</sup> Itek è ai khrug shii muchang è thab srane, chiih-è ithek è aishii chan è cho phro, chiih-è, ithek lagiung niing srane aishii chiing phro. <sup>20</sup> Itek è aishii makhakriing ched mage shii, ithek è yung phiang than srane awairo yung idoh guii phi phro. Chiihphado ithek è aishii bai hà zun ne ua pha noh dun phro.

### *Isu bai shii zun muui*

*(Mth 27:32-44; Lug 23:26-43; Jon 19:17-27)*

<sup>21</sup> Lumuui hà ithek è Simon beng pha bran shii si, ai yi soh è rajan hà wuiiramui shii, siphahithek è aishii de Isu ro bai nuang pha bangchiie rek phro. (Simon ne Syrene pha bran ro, chiih-è ai ne Alezandar chiih-è Rufus ro Aphuii ro). <sup>22</sup> Itek è Isu shii Golgotha beng pha ithua hà noh dun phro, hì pha miyao ne gadong ithua rone yao phro. <sup>23</sup> Thiisa hà ithek è Isu shii riie pha ji them yi pha angurphuii shii myrrh lao ne phi pha bidiang shii, jishii Isu è niing pha anuii phi ro. <sup>24</sup> Chiihphado ithek è Isu shii sharo rek ne phey srane zun muui phro, chiih-è airo yung yi awaithek chung thang rai phro, chiih-è airo yung idum ji ne hanyie muui lei ne miiran riig ro. <sup>25</sup> Hamiang ishak dige shii, ithek è Isu shii zun muui phro. <sup>26</sup> Ai khrug lakhung shii hì the pha miyao ji zey phro: “Jewthek pha saja ro.” <sup>27</sup> Itek è mugopho nyi shii de Isu rog shii zun muui phro, jia shii Isu phawig hà, chiih-è jia shii Isu phazoi hà. <sup>28</sup> Jigigam shii nyie yao pha ji ne hì re dun phro, Brantheke è Iphey anuii pho mirek shii rek pha duiine aishii de rek phro.

<sup>29</sup> Lumuui shii lua ramuii pha brantheke è khrug sid srane Isu shii gang è makhakriing phro: “Ua! Na ne Hamangkhung-aphuii ro Misiahò shii chuak srane da-uom shii rung din phi pha rek bidey ne! <sup>30</sup> Thuh shii thazam wuii srane nawai shii bai è ragia rek bo!”

<sup>31</sup> Ji duiine, boh Phabithek chiih-è Iphey yua pha masdothek de Isu shii makhakriing srane awaithek chung yao rai, “Ai ne gai thek shii ne ragia rek phi, jishii ai ne awaishii ragia arek-mua ara! <sup>32</sup> Cho Masi shii riig srane, Israel pha saja ne, thuh shii bai è thazam wuii mage arone, chiih-è gathek de aishii migi rek pha ro!”

Chiih-è bran nyi hanyie shii yi Isu rog shii zun muui pha bran è de aishii makhakriing phro.

### *Isu iy pha*

*(Mth 27:45-56; Lug 23:44-49; Jon 19:28-30)*

<sup>33</sup> Hanai duchoi shii zab pha soh ne igiia è chiiieg dun phro, ji pha igiia ne ishak uom re dang dun phro. <sup>34</sup> Ishak uom shii Isu è gang è ziak mage phro, “*Eloi, Eloi, lama sabakhthani?*” Hi pha miyao siu ne, “Hamangkhung-aphuii, Hamangkhung-aphuii, nane gu shii nyie rek ne ji thoh muuii phlei?”

<sup>35</sup> Thiichiih um pha giak branthek è ai miyao ji sang ayoi pha nuui srane chiih-è yao, “Yoi bo, ai ne Elija shii ho ramuii ro!” <sup>36</sup> Thiichiih um pha bran jia è ijuang shii rui duiine rek pha yung è jiang pha muchang phiang rog shii ran srane, phuui chiieng shii wo srane Isu ro sem shii wang ne yao, “Khan rai! Elija è wuii srane aishii bai è thazam noh phi pha de um phro, cho riig haro!”

<sup>37</sup> Gang è ziak srane Isu iy dun phro.

<sup>38</sup> Hamangkhung-aphuii ro Misiahò shii zun ne ruii pha yung de ijuang è yie ne ikhiing thog pha ji dun ro. <sup>39</sup> Arming dumuiithek thiichiih shii hanyie bai ibi shii riu pho ne Isu nyie khi-èrek ne iy dun pha ji doh phro. “Hi pha bran ne izai Hamangkhung-aphuii ro Dufuii chak ro!” Ai è yao.

<sup>40</sup> Giak hò-amuiithek thiisa iujia ruang è riig ne rai phro. Ithek ne Mery Magdalene, ikhuii Jems chiih-è Joseph, ro amuii Mery chiih-è salomethek ro. <sup>41</sup> Ithek ne Isu Galili hà ba shii ai rog luagieng ne nong phi pha branthek ro. Jerusalem è Isu rog shii wuii gieng pha gai hò-amuii de thiichiih shii bajo um phro.

### *Isu shii wieng muui*

*(Mth 27:57-61; Lug 23:50-56; Jon 19:38-42)*

<sup>42-43</sup> Habjuang re mage shii, Joseph Arimathea wuii thog ruii phro. Ai ne limiangthek shii de ilab um pha bran ro. Chiih-è, Hamangkhung-aphuii ro Sajathua ji thog ruii phrone khan ne rai pha bran ji ro. Hi pha inai ne (Jew Thung pha Inai saro pha ibi shii ro), jìè Joseph arum pha Philathus shii wuii srane Isu siu ji lia phro. <sup>44</sup> Philathus è Isu iy jong dun pha mua yoi mage ne wieng dun phro. Ai è awai arming dumuii shii ho ne sai, “Isu iy pha ji ne ishak phiang re sha bey?” <sup>45</sup> Dumuiithek è yao pha idoh, Philathus è Joseph shii yao Isu ro siu ji nya yi dun bo. <sup>46</sup> Joseph è jiang yung pheng srane, siu shii thazam yi ne yung è jiang srane sak è chog pha wieng rab pha ji shii yi ne ruii muui phro. Chiihphado wieng cho shii bajo lubao boh thud ne kheb marui phro. <sup>47</sup> Chiih-è Mery Magdalene chiih-è Joseph ro amuii Mery de Isu siu-iy ji khi hà wieng lei ne sow ne riig wuii phro.

## 16

### *Isu hòì dìn*

*(Mth 28:1-8; Lug 24:1-12; Jon 20:1-10)*

<sup>1</sup> Jew Thung pha Inai jong pha idoh shii, Mery Magdalene, Jems pha amuii Mery, Salome ithek è Isu ro siu shii shun pha thiillie phek srane Isu siu-iy shii shun pha wuii dun. <sup>2</sup> Deobari pha hamiang riang hasiang siang mage shii ithek ne wieng hà wuii dun. <sup>3-4</sup> Lumuii hà lua ramuii shii, ithek ne awaithek chung yao rai, wieng kheb pha lubao ji ne hanyie è hong phi pha lei? (Hi ne bajo boh pha lubao ro.) Ji iyao ne wuii thog mage shii, ithek è riig shii ji pha lubao ne idoh thud ne um iang pha doh. <sup>5</sup> Ji-è ithek ne wieng bucho hà wuii dun, bucho hà wuii thog mage shii, ithek è filiao bran jia ne yung phiang imo guii srane phazoi hà dug ne rai pha doh phro. Ji doh mage shii ithek ne wiengphleg dun phro.

<sup>6</sup> Jipha bran è yao, “Awiengphleg chid rabo, gu ne thieg, nathek ne Nazareth pha Isu bai shii zun ne ua mua pha ji sow wuii phro. Ai ne ichiuh shii oi ro, ai ne chai shii hòijong dun ro, riig bo, ai ruii pha ithua shii nyie de oi ro. <sup>7</sup> Ji-è nathek ne dun srane Isu ro samoythek chiuh-è Phithar shii mua yao mage bo: Isu ne nathek ibi shii Galili hà thog phro, ai è khi-èrek ne yao marui pha ji duiine thiisa hà ithek ne aishii si.”

<sup>8</sup> Ithek ne zab sham ne rum chiuh-è rumdun ne dun dun, chiuh-è ithek ne rum ne ji pha miyaothek hanyie shii de ayao mua pha rai dun.

### *IDOHÈ PHA IHÈG MUAWIE \**

*Isu è Mery Magdalene shii si  
(Mth 28:9-10; Jon 20:11-18)*

[ <sup>9</sup> Isu chai hòi din pha idoh Deubari hamiang shii Mery Magdalene shii igobi dong, hanyie shii Isu è ibuii ragung miley khia phi pha Mery Magdalene shii si pha wuii ruii phro. <sup>10</sup> Mery Magdalene è Isu ro ijakthek zo ne choh ne rai pho moe shii wuii srane yao. <sup>11</sup> Ai è ithek shii yao Isu ne isieng ro chiuh-è gune doh ro, jishii ithek ne ai miyao jishii migi arek ro.

*Isu ne samoy nyi shii dong  
(Lug 24:13-35)*

<sup>12</sup> Jipha idoh, awai samoy nyi soh pha ithua lumuii è lua ramuii shii Isu ne gai mia ne isa shii dong ruii phro. <sup>13</sup> Ji-è isa ne thadoh dun thog ne, Isu ro gai samoythek shii yao, jishii ithek è isa shii migi arek ro.

*Isu ne samoy snajia shii dong  
(Mth 28:16-20; Lug 24:36-49; Jon 20:19-23; Blk 1:6-8)*

<sup>14</sup> Ji-è rek ched pha idoh shii, Isu ne awai samoy snajia yi michie chie ramuii shii dong thog ruii phro. Isu è ji pha samoythek shii giung, nyielieshii nathek ne aishii isieng dohjong pha branthek miyao ji ne lawas dai è migi arek ro. <sup>15</sup> Isu è ithek shii yao, zab pha sohjambling hà wuii mage srane zab branthek shii gu Muawie hi yao mage bo. <sup>16</sup> Hanyie è migi now ne gu beng è khowo yi pho ne lago è ragia re ruii phro; chiuh-è, hanyie thek è migi arek pho ne layog the ruii phro. <sup>17</sup> Gu shii migi now pho ne gu beng è buangthek de rek mua phro; chiuh-è, gu beng è awie pha ibuii ragung shii de khia mua phi phro; chiuh-è, ithek ne nyuak iwo yao ruii phro; <sup>18</sup> chiuh-è, pham chong magunde, miiriin chie na de, ithek ne nyie de achun phi phro; chiuh-è ithek wad ne radshopho shii khoh ne sia phi magunde gang ruii phro.

---

**16:7** 16:7: Mth 26:32; Mrg 14:28 \* **16:8** 16:8: Giak jigi shii nane buyo zey pha ji muawie yi iidohe (9-20) oi ro. **16:15** 16:15: Blk 1:8

*Isu shii Hamangkhung hà noh dun*  
*(Lug 24:50-53; Blk 1:9-11)*

<sup>19</sup> Chiiphado Ithong Isu è ithek shii yao ched ne aishii ne Hamangkhung hà noh dun phro. Thiisa hà Hamangkhung-aphuii phazoi moe shii dug dun phro. <sup>20</sup> Ji-è samoytek ne zab pha ithua hà wuii srane Mua Wie ji yua ne lua, ji-è, Ithong è ithek rog shii rek gieng phro. Ji-è Mua Wie chiih-è buangtek rek pha ji ne izai chak rone khagi re dun ro.]

*GAI IHÈG IDOHHÈ†*

[{9} Hò-amuii ne Phithar nane airo ijak shii wuii dun chiih-è ithek è nyie yao pha sasab ji yi dum jia yao. {10} Jipha idoh shii, Isu awai è awairo samoytek shii bichiu è nugo thogdang pha wuii yi srane idang rai mua pha giawo ji shiyy yi.]

---

**16:19** 16:19: Blk 1:9-11 † **16:20** 16:20: Giak jigi shii nane buyo zey pha ji shii idum iidohhè muawie um ro ji ne (itho 9-20) ji shii ne phiang iidohhè chodo ro

## LUG Ro Muawie Yaophi

Hì pha miyao yi Lug è Isu yi Israel nane zab bran shii ragia rek phi pha sbang rek phi phro. Lug è yao Isu shii ne Ithong pha ragung è “Dushothek shii mua wie yao pha ho phro,” Chiuh-è ai mua ne branthek shii nyie chid pha ji è ley noh phro. Chiuh-è Lug shii lubo pha miyao de zey ne um ro, igobi pha nya hong dang pha jigigam shii Isu wuiiramui ro è yao pha jigigam ro, iidohhè shii pha jigigam shii ne Isu ne hamangkhung hà dun dun pha ji zey ne um ro, Masi pha gang shii migi shii khi-èrek ne huak dun pha ji ne Blia pha jigigam shii de zey ne um ro.

Ichiuh ne ichua nyie ro (ithoh 1-2 nane 9-19) bajo muna chab phane hì pha mua shii doh bie ro, ji è ibai pha hamangkhliie nane brogpho, Isu giak shii wuii pha, Isu yi bufuii ba shii Misiahò hà, chiuh-è wie Samarithan pha najang nane san dun pha Dufuii ji pha Chiang shii phaluii zey ne um ro. Mua ji pha bo gang ne misia shii rey, chiuh-è Ragung So shii, chiuh-è Isu pha blia hò-amuii ro, chiuh-è Hamangkhung-aphuii è layogthek shii khung phi.

### **Iliing shii um pha ji**

*Yaophi (1:1-4)*

Jon khowo phi pha nane Isu ro giak nane lu pha miyao ji ro (1:5; 2:52)

Jon khowo phi pha bliakthek (3:1-20)

Isu ro khowo yie pha nane chuajan (3:21; 4:13)

Isu ne Galili shii hong ne blia rek (4:14; 9:50)

Galili re-è Jerusalem (9:51; 19:27)

Iidohhè pha habda nane Jerusalem moe shii (19:28; 23:56)

Hòì, khia, chiuh-è Ithong Hamangkhung dundun pha ji ro (24:1-53)

### *Yaophi*

<sup>1</sup> Bushun Theophilus:

Bran bajo è gathek duchoi shii nyie rey pha miyaothek ji zey ne phi. <sup>2</sup> Ithek è hì zey pha ne, gathek è nyie yao pha ji ne igobi è hanyie è blia doh ne rai pho è mua ji gathek shii yao phro. <sup>3</sup> Chiuh-è naro ilab, nyieliieshii igobi è nyie zey pha ji ne wie è tham phro. Ji è gu de na shii khriig rek yi pha Chiang jia zey pha now muui ro. <sup>4</sup> Gu hì rek pha ne nathek shii nyie yoijong pha ji izai thieg pha rek phro.

### *Khowo phi pha Jon giak pha miyao ji yao ramuii*

<sup>5</sup> Judea pha Herod saja sieng pha ishak shii, phabi wie rek pha Abija blang Zekharia beng pha phabi jia de um. Ai yiy beng ne Elizabeth ro; ai yi ji de phabithek haliing è giak pha bimi ro. <sup>6</sup> Ai ne Hamangkhung-aphuii mieg moe shii wie sieng ne rai. Chiuh-è Ithong pha Iphey nane muyungthek nuui ne rai. <sup>7</sup> Aishii ani azen, nyieliene Elizabeth ne ani azen phi, chiuh-è Elizabeth nane Zekharia bajo weg reyjong ro.

<sup>8</sup> Nai jia Zekharia yi awai Misiahò shii idang rek pha duiine awai phabi blia rek ne rai. <sup>9</sup> Phabithek è rek pha thiig pha Iphey duiine, sraibao shii bisi ziao pha miiran ne ai beng shii khia dun. Ji è ai misiahò iliing hà wuii dun. <sup>10</sup> Ai è bisi ziao pha ishak shii bran ibrogthek ne fuang hà sia ne rai.

<sup>11</sup> Hamangkhlhie jia è bisi ziao pha sraibao shii ai phazoi moe shii wuii ruii. <sup>12</sup> Zekharìa è aishii doh mage shii, ai ne bizieng srane rum dun. <sup>13</sup> Ji shii hamangkhlhie è aishii yao, Zekharìa, na ne arum chid rabo! Hamangkhang-aphuii è na misia yoijong ro, chiih-è na yi Elizabeth è de dufuii jia giak ruii phro, na ne aishii Jon beng bo. <sup>14</sup> Nathek ne khama lised nane sang ruii phro, chiih-è ai giak mage shii gai branthek de bajo sang ruii phro! <sup>15</sup> Ai ne Ithong miég moe shii bajo boh bran rey ruii phro. Chiih-è ai ne phuii wegthek de aniing phi phro. Nyagiak dang pha idoh aishii ne Ragung So è ley dun phro, <sup>16</sup> Chiih-è Israel pha bajo branthek shii awaithek pha Ithong Hamangkhang-aphuii moe shii idoh noh din ruii phro. <sup>17</sup> Ai ne chaig Elija duiine giang now ne bajo boh riichai Ithong awai pha ibi shii wuii dun phro, ai è aphuii nane aniphiing shii de òjia shii khrab din phi phro; ai è miyao anuii ne chun phothek shii dun giang noh pha lumuii hà idoh rai din yi phro; ai è Ithong pha branthek shii saro phi phro.

<sup>18</sup> Zekharìa è hamangkhlhie shii yao, “Hi thek rey pha gu ne khi è thieg ruii phlei? Gu ne weg sha dun ro; Chiih-è gu yiy de weg rey sha dun ro.”

<sup>19</sup> Hamangkhlhie shii ji è chang, gu ne Gabyiel ro, “Gu ne hanyie è na shii hi thek pha miyao nane mua wie hì yao yi pha thoh pha Hamangkhang-aphuii rog riu muui ro, <sup>20</sup> hì ne ishak khriig rey shii ne izai rey ruii phro, jimagunde na ne hì pha guro mua ji izai anow. Na è migi arek pha ji è na ne miyao de ayao mua phro; nane sudoh è thiwing gu è sbang rek ne ruii pha izai arey sapho shii ne nane bi-je rey ne rai dun phro.”

<sup>21</sup> Ji è rek pha ishak shii, branthek Zekharìa shii khan ne rai. Chiih-è ai Misiahò hà nyama ishak nyie rek ne rai ara inow ne branthek munowthiig dun. <sup>22</sup> Ai fuang khia mage shii, ai ithek shii nyie de miyaogam ayao mua, chiih-è ithek ne thieg ai ne Misiahò hà ibang bang ara, ai nyie de miyaogam jia de ayao muluii pha rey srane jimagunde ai è ithek shii wad è phrai ne yao.

<sup>23</sup> Ji è rek pha ishak shii Misiahò hà airo bliajong sha shii Zecharia awai hò hà idoh dun marui. <sup>24</sup> Iujia pha idoh shii ai yi Elizabeth ne ani wiig, ji è habie guii thogdang pha ji pha hò shii athoh. <sup>25</sup> Elizabeth è yao. Idohò shii Ithong è gu shii nong phi, “Ai è gu ro biwo ji ruang rek phi!”

### *Isu giak sha pha ji yao*

<sup>26</sup> Elizabeth yi ani wiig ne habie riig rey shii Hamangkhang-aphuii è hamangkhlhie Gabyiel shii Galili pha bajarai hà Nazareth beng pha ithua hà thoh ge ro. <sup>27</sup> Ai è ji pha mua yi Joseph è yie pha ro è gang pha bimi jishii yao, ai ne Dawid Saja pha riing ro, ji pha bimi beng yi Mery ro. <sup>28</sup> Hamangkhlhie shii è bimi jishii wuii thog srane yao, lijiing ne narog shii um ro! Ithong ne narog shii um ro chiih-è bajo boh khirzey ne na shii phi ro!

<sup>29</sup> Mery yi hamangkhlhie pha mua ji è bajo diig than dun, chiih-è Mery ne ai miyaogamthek ne nyie ga inow ne wiengphleg dun. <sup>30</sup> Hamangkhlhie è aishii yao, “Mery; arum chid rabo. Hamangkhang-aphuii è na shii bushun rek ro. <sup>31</sup> Na ne ani wiig ruii phro chiih-è dufuii giak ruii phro, chiih-è na aishii Isu beng bo. <sup>32</sup> Ai ne bajo boh phro Chiih-è aishii ne bajo giu pha Hamangkhang-aphuii Dufuii rone ho ruii phro. Ithong Hamangkhang-aphuii è aishii ne awai blang Dawid mirek pha ji duiine saja rab phi phro,

<sup>33</sup> Chiìh-è ai ne Jakhob pha riingthek shii idang pha saja rey ne rai ruii phro, airo boh riichai ne khuchung de ajong phro!”

<sup>34</sup> Mery è hamangkhlìie shii yao, “Gu ne giang bimi ro, ji è, nyie khi-èrek ne hì rey mua phlei?”

<sup>35</sup> Hamangkhlìie è chang, “Ragung so de na shii wuii ruii phro, chiìh-è Hamangkhang-aphuii ro blu de na lakhung shii thog ruii phro. Ji pha Chiang è hì pha ani So shii ne Hamangkhang-aphuii ro dufuii rone ho phro.

<sup>36</sup> Nawairo siang Elizabeth shii no mage bo. Ai è de yao gu ne ani agiak mua sha phro, jimagunde de ai ne bajo miriang habuii shii ani wiig ne habie riig rey sha ro. <sup>37</sup> Ji-è Hamangkhang-aphuii è arek mua pha nyie de oi ro.”

<sup>38</sup> Mery è yao: “Gu ne Ithong pha khiao ro, Na è gu shii nyie yao pha ji rey yi bo.” Chiìh-è hamangkhlìie è aishii thoh marui ne dun dun.

### *Mery è Elizabeth shii si*

<sup>39</sup> Achia dang pha idoh shii Mery è saro srane Judea soh pha phiingdui hà riie ne jog wuii dun. <sup>40</sup> Ai è Zekharia hò hà wuii srane Elizabeth shii salam phi. <sup>41</sup> Elizabeth è Mery è khung ne yao pha ji nyayoi dang mage shii, ani yi ai lui iliing hà sid, chiìh-è Elizabeth ne Ragung So è ley dun, <sup>42</sup> Chiìh-è goh gang è yao, “Na ne zab pha hò-amuii è de bajo khirzey um ro, chiìh-è na giak pha ani ji de bajo khirzey um ro! <sup>43</sup> Ithong pha amuii ne gu shii wuii ruii ne hì thek ne gu shii nyie rek ne rey ruii phlei? <sup>44</sup> Gu è na è khung ne yao pha ji nyayoi dang mage shii, gu iliing shii um pha arone chiung ne sang dun. <sup>45</sup> Ithong pha mua ji ne na shii izai rey ruii phrone yao pha ji shii migi rek pha ji è khama sang phro!”

### *Mery ro chiong pha ibai*

<sup>46</sup> Mery è yao,

“Gu lubu è Ithong shii laso phi muui ro;

<sup>47</sup> Gu luruak ne . lised mua ro nyieliieshii Hamangkhang-aphuii ne garo ragia ro,

<sup>48</sup> Nyieliieshii gu shii ne awairo zum khiao duui rone inow phi ro!

Ji è sudoh è thiwing branthek gu shii sang pha ro è ho ruii phro,

<sup>49</sup> Nyieliieshii boh muna ne bajo blu Hamangkhang-aphuii pha è gu shii rek phi.

Ai beng ne So ro;

<sup>50</sup> Hanyie thek è aishii lab rek arone ithek shii ne blang thog dang pha ai bushun doh yi phro.

<sup>51</sup> Ai awairo blu wad ji è phia srane ithek miphia nane muphak rai jithek ne zab dayiingdayang rek muui phro.

<sup>52</sup> Ai è blu sajathek shii ithek ro ithua è thazam khia muui phro, chiìh-è are-ahopho shii laziung chiing phi ruii phro.

<sup>53</sup> Ai è chi-iyiy pho shii ne wie muna phi ge phro, chiìh-è bukthothek shii ne wad isloi thoh ge phro.

<sup>54</sup> Ai ne gethek achinmoithek shii sbang rek pha ji ne zab rek phi ro, chiìh-è awai khiao Israel shii nong gieng pha wuii phro.

<sup>55</sup> Ai ne idang athodang pha Abraham nane zab airo riingthek shii nowkhlei ro!”

<sup>56</sup> Mery ne Elizabeth rog shii habie uom thog pha rai marui ne awai hò hà dun din dun.

### *Jon khowo phi pha ji giak pha ji*

<sup>57</sup> Elizabeth yi ani giak pha ishak rey mage shii, ai è ani yi dufuii jia giak khlei. <sup>58</sup> Ai ro hadung-haluii nane siangthek è, aishii Ithong è khama buang pha blia wie rek pha ji yoi srane, ithek de zab ai rog shii lubo rek gieng.

<sup>59</sup> Ani ji yi damiley rey sha mage shii, ithek è aishii migiangkheg pha noh ne wuii dun, chiih-è ithek è ani beng yi ai aphuii beng Zekharia duiine beng pha saro. <sup>60</sup> Ji shii ai amuii è yao, “Asi! Ai beng ne Jon ruii chid phro.”

<sup>61</sup> Ithek è aishii yao, “Jishii hì pha ibeng ne na siang hanyie shii de abeng ro!” <sup>62</sup> Ji è ithek è iphuii shii wad è khoh srane sai, hì pha bufuii beng ne nyie ruii pha now lei?

<sup>63</sup> Zekharia è ithek shii zey pha lubao ithileg jia lia srane zey phi, “Hì pha ani beng ne Jon ro.” Ji è ithek ne zab wiengphleg dun! <sup>64</sup> Ji è rek dang pha ji shii Zekharia de miyao yao mua dinne ai Hamangkhung-aphuii shii laso phi pha jao. <sup>65</sup> Ji-è rek mage shii hadung-haluii pho ne zab rum dun, chiih-è ji pha mua ne zab phiingdui um pha Judea soh hà yoi thog dun. <sup>66</sup> Hanyie è ji yoi mage shii ji now srane sai, “Ji pha ani ne nyie rey pha um ga?” Hì ne izai ro Ithong pha blu ne ai rog shii um ro.

### *Zekharia è chaig*

<sup>67</sup> Jon ai aphuii Zekharia yi Ragung So è ley ne, chiih-è Hamangkhung-aphuii mua yao:

<sup>68</sup> Cho gethek ne Ithong, Israel pha Hamangkhung-aphuii shii laso phi sha rai haro!

Ai ne awai bran shii nong phi pha chiih-è sey ne noh phi pha wuii ro.

<sup>69</sup> Ai è gethek shii awai khiao Dawid pha riing è blu Ragia rek pha jia phijong ro.

<sup>70</sup> Ai è buyo è awairo so chaigpho ji è sbang rekjong ro

<sup>71</sup> Ji è ai ne gethek mak pho è,

chiih-è hanyie è gethek shii snai pho pha blu è de ragia rek phi phro.

<sup>72</sup> Ai è yao ai gethek pha achinmoithek shii bushun rek phi phro, chiih-è awai shiinyie ug pha ji de athoh pha nowphi phro,

<sup>73-74</sup> Wie rek ne gethek ro blang Abraham shii shurua thak, ai è gethek shii gethek pha mak pho è ragia rek phi pha sbang rekjong phi ro,

chiih-è gethek shii arum dang pha ai blia rek pha phijong ro,

<sup>75</sup> Ji-è gethek sieng pha ishak shii, ai moe shii idang so nane gieng sieng ne rai chid phro.

<sup>76</sup> “Gu ani, nane, Bajo Giu Hamangkhung-aphuii pha chaig rone è ho ruii phro.

Na ne Ithong pha ibi wuii srane airo lumuii rab iang phro,

<sup>77</sup> Nawai branthek shii yao bo nawaithek layog khungjong arone ragia rey phro.

<sup>78</sup> Gethek Hamangkhung-aphuii ne bushun nane jum ro, ai è ichuang phi ne giawo gethek lakhung shii thog yi phro.

<sup>79</sup> Chiih-è ai è igiia hà iy ne rai pho shii de hamangkhung è khilieng phi ruii phro,

liijiing pha lumuii hà de gethek shii gayiig noh phro.”



<sup>80</sup> Ji pha ani ne sieng ne siu nane ragung ne gang rey dun ro, ai ne Israel pha bran moe khia pha nai athog sapho shii ne balimuang hà rai phro.

## 2

### *Isu giak pha*

(*Mth 1:18-25*)

<sup>1</sup> Ji pha ishak shii Bisiu Augusthus è Roman bukho boh thiig shii bran ibeng zey pha yung. <sup>2</sup> Igobi ji è rek ne bran tham ramuii pha ishak shii, Khuirinius yi Syria pha badri ro. <sup>3</sup> Zab pha brantheke wuii srane awaithek ibeng zey pha awaithek thawun hà wuii dun.

<sup>4</sup> Joseph de Galili pha Nazareth thawun è Judea pha Bethlehem thawun, Dawid saja giak pha ji hà wuii dun. Joseph thiisa hà wuii pha ji ne, nyieliieshii ai de Dawid saja pha riing è giak pha ji muwuii ro. <sup>5</sup> Ai de awai è gang pha Mery rog shii ibeng zey pha wuii dun, ai ne ani wiigjong ro, <sup>6</sup> Chiieh è ithek Bethlehem hà ba shii, aishii ani giak pha ishak thog dun. <sup>7</sup> Ai è dufuii giak bi, chiieh-è aishii yung è jiang srane rogo hà chab ne ruii, thiisa hà ne ai rai pha ùgud de oi ro.

### *Shiishai brogphothek nane hamangkhlie*

<sup>8</sup> Ji pha soh iring jia hà de brogphothek de nyaliak shii habiu hà de awaithek shiishai riig ne rai. <sup>9</sup> Ithong pha hamangkhlie è ithek moe shii dong khlei ruii, chiieh-è Ithong pha biisiie ithek lakhung shii chuang khlei ruii. Itek ne bajo sham ne rum dun, <sup>10</sup> Ji shii hamangkhlie shii è ithek shii yao, “Arum chid rabo! Nathek shii phi pha gu ichiieh mua wie rog shii um ro. Gu ne ichiieh shii zab pha brantheke shii boh lubo phi pha ji yao pha wuii phro. <sup>11</sup> Sudoh pha sud shii Dawid saja pha thiig shii, nathek shii ragia rek phi pha Ithong Masi giakjong ro! <sup>12</sup> Ji thieg yi pha ne, ithek è ani jia yung shii jiang ne rogo iliing shii thieng ne rai pha doh ruii phro.”

<sup>13</sup> Hamblo shii hamangkhang pha boh arming hamangkhlie rog shii wuii thog srane, Hamangkhang-aphuii shii lasothek bai phi:

<sup>14</sup> “Zab è giu pha Hamangkhang-aphuii shii hamangkhang hà biisiie rey bo, sohnyiak hà na è hanyie shii sang pha ji shii de liijiing phi bo!”

<sup>15</sup> Hamangkhlie shii ithek è idoh hamangkhang hà dun marui shii, brogpho awaithek chung yao rai, “Cho gethek de Bethlehem hà wuii srane Ithong è gethek shii yao pha duiine ji rey dun pha ji riig rai.”

<sup>16</sup> Ji è ithek kthiie wuii dun ne Mery nane Joseph shii doh chiieh-è ani yi rogo iliing shii thieng ne um pha doh. <sup>17</sup> Brogphothek è aishii doh mage shii, hamangkhlie shii è ani Chiang shii nyie yao pha ji yao phi. <sup>18</sup> Zab pha brantheke de brogphothek miyao ji yoi ne wiengphleg dun. <sup>19</sup> Mery è jithek pha zab miyao now srane lubu iliing hà wie now din. <sup>20</sup> Brogphothek ne hamangkhlie shii è yao pha ji duiine yoi ne doh pha ji è Hamangkhang-aphuii shii laso bai ne idoh dun din dun.

### *Isu ibeng beng*

<sup>21</sup> Damiley pha idoh shii, ani ro miangkheng pha ishak thog mage shii, aishii Isu beng, nyieliieshii ani awiig ba pha ibi shii hamangkhlie shii è yaojong.

### *Isu shii misiahò shii noh*

<sup>22</sup> Joseph nane Mery shii Moses mizen marui pha Iphey duiine muhui ne sai pha ishak thog mage shii, ithek è aishii Jerusalem hà noh ne Ithong ibi shii phi. <sup>23</sup> Ithong ro Iphey shii zey pha duiine, zab è igobi bufuii giak pha ani ne Ithong shii phi bo. <sup>24</sup> Ithek de Ithong ro Iphey miichiid duiine pharo nyi chiih-è khu-atham ichiung nyi yie srane zidphi.

<sup>25</sup> Ji pha idoh shii thiisa hà Simeon beng pha bran jia Jerusalem shii rai. Ai ne bajo wie nane Hamangkhung-aphuii shii rum ne rai pha bran ro, chiih-è Israel shii ragia rek phi pha ji shii khan ne rai phro. Ragung So de ai rog shii um. <sup>26</sup> Chiih-è aishii ne yaojong ro ai ne Ithong sbang rek pha Masi shii adoh sapho shii ne na a-iy phro. <sup>27</sup> Luruak è Simeon shii Misiahò hà noh ne wuii dun, ji è Iphey shii nyie khi-èrek chid pha ji rek pha ai aphuii ai amuii è Isu shii de Misiahò hà noh ne wuii dun. <sup>28</sup> Simeon è ani ji wad shii giak srane Hamangkhung-aphuii shii laso phi.

<sup>29</sup> Ithong wo, na è nawai sbang ji rek phi, chiih-è na nawai khiao shii liijiing è dun yi bo.

<sup>30</sup> Gui mieg è naro giawo ne doh ge ro.

<sup>31</sup> Na è zab pha brantheek miie shii rab ne ruii phi,

<sup>32</sup> Na ne muchuang de gaibrantheek shii de na è yang pha ji re-è chuang phi, chiih-è nawairo Israel pha brantheek shii de biisiie rek phi.

<sup>33</sup> Simeon è ai pha miyao yao mage ne, ani pha iphuii imuii ne wiengphleg dun. <sup>34</sup> Ji è rek magunde Simeon è ithek shii khirzey phi ne, ai amuii, Mery shii yao, “Hì pha arone Hamangkhung-aphuii è Israel phothek buii rek pha nane giawo rek phi pha guajong ro. Ai ne Hamangkhung-aphuii è cheb jia mua mage ne bajo brantheek è aishii gidieg rek ruii phro. <sup>35</sup> Chiih-è ithek è ug ne now pha ji dong yi srane. Chiih-è duhug ne, khamriie chieg duiine na lubu shii gïao ruii phro.”

<sup>36-37</sup> Asher pha jad Phanuel idimi Ana beng pha chaig weg jia um. Ai ne gey dun ne idam miley rey ba bie shii ai ne idam samiliao è wi reyjong dun.\* Ai ne Misiahò shii athodang; ai ne hanai nane habiu de Hamangkhung-aphuii shii minyie nane misia sia. <sup>38</sup> Ji pha ishak shii ai de thiichihih wuii thog srane Hamangkhung-aphuii shii laso phi chiih-è khuchung Hamangkhung-aphuii è Jerusalem shii chie phi phro è khan pha brantheek shii ani chiang ji yao phi.

### *Nazareth hà idoh dun*

<sup>39</sup> Ithong pha Iphey shii nyie khi-èrek chid pha ji duiine rek ched marui srane, ithek idoh Galili pha Nazareth awairo thawun awaithek hò shii thog ro. <sup>40</sup> Ani yi lasieng ne bugang rey mage srane aishii ne khani de ley um, chiih-è Hamangkhung-aphuii ro khirzeytheek de ai lakhung shii um.

### *Bufuii Isu ne misiahò hà rai dun*

<sup>41</sup> Dam tham ne Hiiadun pha ji Sai pha inai shii Isu iphuii-imuii ne Jerusalem hà wuii dun. <sup>42</sup> Isu ne dam snanyi rey mage shii ithek ne idang duiine buii hiiia dun pha ji sai pha wuii dun. <sup>43</sup> Sai pha jijong ched mage shii ithek ne idoh hò dun pha jao shii, Bufuii Isu ne Jerusalem hà rai dun. Ji-è rek pha ji yi iphuii imuii yi athieg; <sup>44</sup> Iphuii imuii è now shii ai ne brantheek rog shii rek ruii ara, jishii ithek ne hamiang è habzuang thog pha lua srane aishii

**2:22** 2:22-24: Lew 12:6-8    **2:23** 2:23: Mul 13:2,12    **2:32** 2:32: Aij 42:6; 49:6; 52:10    \* **2:36-37** 2:36-37: ne tuh samiliao è wi dam weg reyjong; dinnemisiung ne amlia è wi dam.    **2:39** 2:39: Mth 2:23    **2:41** 2:41: Mul 12:1-27; Iphy 16:1-8

thiichihih ijak nane siangthek rog shii um inow ne soh, <sup>45</sup> ithek è aishii adoh phi, ji è ithek ne aishii soh pha Jerusalem hà idoh wuii din dun. <sup>46</sup> Da-uom rey pha idoh shii aishii ne Misiahò hà Jewish masdothek rog shii dug ne, ithek miyao ji nuui srane musai sai ne rai iang pha doh ruii. <sup>47</sup> Ai miigao ne chang pha ji yoi ramuii phothek ne zab wiengphleg dun. <sup>48</sup> Iphuii-imuii de ai ji è rek ramuii pha ji riig srane, “Nowbuang dun, chiih-è imuii è idufuii shii yao, gu dufuii na è gasa shii diig nyie rek phlei? Na aphuii gasha ne munow thiig srane rum ne na shii soh.”

<sup>49</sup> Ai è isa shii chang, “Nasa gu shii nyie rek ne sow phlei? Nasa ne athieg bey gu ne gui ro aphuii hò shii um chid phro?” <sup>50</sup> Ithek ne ai miichang ji ne agao ro.

<sup>51</sup> Ji è Isu ne ithek ro miyao nuui srane ithek rog shii Nazareth hà idoh dun din gieng. Ai amuii è ji è rek pha jithek zab lubu iliing hà now ne ruii. <sup>52</sup> Hamangkhung-aphuii nane branthek pha haro mua ne. Isu ro siu nane khani ne boh sieng dun.

### 3

#### *Jon khowo phi pha muyua (Mth 3:1-12; Mrg 1:1-8; Jon 1:19-28)*

<sup>1</sup> Thiberius è Bisiu rek ne idam snaguii rey shii; Phonthius Philath yi Judea pha badri ro, chiih-è Galili thiig pha saja yi Herod ro, chiih-è ji pha soh Ithurea nane Thrachonithis pha saja yi Herod ikhuii Philip ro; Chiih-è Abilene pha saja yi Lysanias ro, <sup>2</sup> Chiih-è Anas nane Khaiaphas yi Kho Phabithek ro. Ji pha ishak shii Hamangkhung-aphuii miyaogam yi balimuang hà Zekharia dufuii Jon shii thog. <sup>3</sup> Ji-è Jon ne Jordan Khamuii ring pha zab soh è dong ne lua srane yao; nathek layog è khid ne khowo yi bo, “Chiihphado Hamangkhung-aphuii è ithek layog de khung phi phro.”

<sup>4</sup> Nyieliieshii hi pha miyao ne Aijaya jigigam shii zey ne um ro:

“Bran jia balimuang shii ziak ramuii ro:

‘Ithong pha lumuii khriig rek ramuii ro;

Ai lua pha lumuii miang rab ramuii ro!

<sup>5</sup> Zab pha gaphiek um ne de lim dun phro,

Zab pha phiingdui nane phiingthek lieg rab muii phro.

Zab pha lumuii khi-èg um ne de miang rab dun ro,

Chiih-è khama pha lumuii sua um magunde neb rabjong ro.

<sup>6</sup> Zab pha branthek de Hamangkhung-aphuii ro giawo doh ruii phro!”

<sup>7</sup> Bran brogthek ne Jon è Khowo phi yi pha wuii thog mage shii. Ai è ithek shii yao, “Pham nathek!” “Hamangkhung-aphuii muthoh pha lago ji è nathek ne yoh mua phrone, nathek shii hanyie miyao lei?” <sup>8</sup> Ji-è nathek ne layog è idoh khid rone doh yi pha bliathek rek mage bo. Chiih-è ithek ne Abraham ne ithek blang rone jao ne ayao chid rabo. Gu nathek shii izai yaodang phro, Hamangkhung-aphuii è hi pha lubao yi srane Abraham ro riingthek nyarab mua phro! <sup>9</sup> Thabiu ne hing iriingthek shii che pha khriig rek ne ruijong ro, iwoi wie awoi pha hingmuii shii ne zab che ne bai shii fen muii phro.”

<sup>10</sup> Branthek è aishii sai, “Ji arone, gathek ne nyie rek chid phlei?”

<sup>11</sup> Ai è chang, “Hanyie shii magunde phadiig nyie um arone jia yi oi pho shii phi bo, chiih-è hanyie shii magunde michie um arone gai shii de thang bo.”

<sup>12</sup> Mijin thanphothek de khowo yi pha wuii thog, chiih-è ithek è aishii sai, “Masdo, gathek ne nyie rek chid phlei?”

<sup>13</sup> Ai è ithek shii yao, “Nathek shii chua mua pha ji è huak pha athan rabo.”

<sup>14</sup> Siphahithek è de aishii sai, “Gathek chiang shii de nyie ga? Gathek ne nyie rek chid phlei?”

Ai è ithek shii yao, “Hanyie shii magunde bangchiie bang ayie rabo chiih-è gai shii biidiie athe rabo. Nawai shii nyie mua pha ji shii liingsed bo.”

<sup>15</sup> Branthek è luthong pha ji ne boh rey ruii, chiih-è ithek ne Jon ne yang ne Masi ne bey rone inow. <sup>16</sup> Ji è Jon è zab shii yao, “Gu ne nathek shii kho è khowo phi bie, jishii gu è de bajo boh bran jia wuiiramuii ro. Gu ne ai lakhia thang de se mua sbo asi ro. Ai è nathek shii Ragung So nane bai è khowo phi phro. <sup>17</sup> Chiih-è awai rog shii de dasai um ro, doh jia ai ne phiug shii sai srane igam shii yoi rek srane awai haphuii hà chab ne ruii phro, chiih-è isug shii ne khuchunde anyia pha bai hà fen muui phro.”

<sup>18</sup> Bajo gai pha lumuii è rek srane Jon branthek shii Mua Wie ji yao, chiih-è ithek shii awaithek lumuii è lai bo ne khung ne yao. <sup>19</sup> Ji shii Jon è Herod badri shii giung, nyieliieshii ai è ikhuii ro yiy Herodia shii yie, chiih-è gai awie pha bliathek bajo rek. <sup>20</sup> Ji-è Herod ne din de buii rek ne Jon shii phatheg hà chab muui.

### *Isu è khowo yie*

*(Mth 3:13-17; Mrg 1:9-11)*

<sup>21</sup> Zab pha branthek Khowo yie ched pha idoh shii, Isu è de Khowo yie. Chiih-è ai siaramuii shii, Hamangkhung de hong ruii, <sup>22</sup> Chiih-è Ragung So de thazam ai siu lakhung shii pha ro duine wuii thog. Chiih-è Hamangkhung è yao ruii, “Na ne guro miie pha dufuii ro. Chiih-è gu ne na shii sang muui ro.”

### *Isu ro blang*

*(Mth 1:1-17)*

<sup>23</sup> Isu è awai blia jao pha ishak shii, ai ne dam sa-uom reyjong dun. Ji shii branthek è aishii ne Heli pha dufuii Joseph ro dufuii ro inow bie, <sup>24</sup> chiih-è Melchi ne Mathath ro dufuii, chiih-è Mathath ne Lewi ro dufuii, chiih-è Lewi ne Melchi ro dufuii, chiih-è Melchi ne Janai ro dufuii, chiih-è Janai ne Joseph ro dufuii, <sup>25</sup> chiih-è Joseph ne Mathathias ro dufuii, chiih-è Mathathias ne Amos ro dufuii, chiih-è Amos ne Nahum ro dufuii, chiih-è Nahum ne Esli ro dufuii, chiih-è Esli ne Nagai ro dufuii, <sup>26</sup> chiih-è Nagai ne Math ro dufuii, chiih-è Math ne Mathathias ro dufuii, chiih-è Mathathias ne Semein ro dufuii, chiih-è Semein ne Josekh ro dufuii, chiih-è Josekh ne Joda ro dufuii, <sup>27</sup> chiih-è Hoda ne Jaonan ro dufuii, chiih-è Jaonan Reso ro dufuii, chiih-è Reso ne Zerubabel ro dufuii, chiih-è Zerubabel ne Shealthiel ro dufuii, chiih-è Shealthiel ne Neri ro dufuii, <sup>28</sup> chiih-è Neri ne Melkhi ro dufuii, chiih-è Neru ne Adi ro dufuii, chiih-è Adi ne Khosam ro dufuii, chiih-è Khosam ne Elmadam ro dufuii, chiih-è Elmadam ne Er ro dufuii, <sup>29</sup> chiih-è Er ne Joshua ro dufuii, chiih-è Jousua ne Eliezer ro dufuii, chiih-è Eliezer ne Jorim dufuii, chiih-è Jorim Mathath dufuii, chiih-è Mathath ne Lewi dufuii,

<sup>30</sup> chiih-è Lewi ne Simeon ro dufuii, chiih-è Simeon ne Juda ro dufuii, chiih-è Juda ne Joseph ro dufuii, chiih-è Joseph ne Jonam ro dufuii, chiih-è Jonam ne Eliakhim ro dufuii, <sup>31</sup> chiih-è Eliakhim ne Malea ro dufuii, chiih-è Malea ne Mena ro dufuii, chiih-è Mena ne Mathatha ro dufuii, chiih-è Mathatha ne Nathan ro dufuii, chiih-è Nathan Dawid ro dufuii, <sup>32</sup> chiih-è Dawid ne Jese ro dufuii, chiih-è Jese ne Obed ro dufuii, chiih-è Obed ne Boaz ro dufuii chiih-è Boaz ne Salmon ro dufuii, chiih-è Salmon ne Nohshon ro dufuii, <sup>33</sup> chiih-è Nahshon ne Aminadab ro dufuii, chiih-è Aminadab ne Admin ro dufuii, chiih-è Admin ne Arni ro dufuii, chiih-è Arni ne Hezron ro dufuii, chiih-è Hezron ne Pherez ro dufuii, chiih-è Pherez ne Juda ro dufuii, <sup>34</sup> chiih-è Judah ne Jakhob ro dufuii, chiih-è Jakhob ne Isakh ro dufuii, chiih-è Isakh ne Abraham ro dufuii, chiih-è Abraham ro dufuii, chiih-è Therah ro dufuii, chiih-è Nahor ro dufuii, <sup>35</sup> chiih-è Serug ro dufuii, chiih-è Serug ne Reu ro dufuii, chiih-è Reu ne Pheleg ro dufuii, chiih-è Pheleg ne Eber ro dufuii, chiih-è Eber ne Shelah ro dufuii, <sup>36</sup> chiih-è Shelah ne Khainan ro dufuii, chiih-è Khainan ne Arphazad ro dufuii, chiih-è Arphazad ne Shem ro dufuii, chiih-è Shem ne Naoh ro dufuii, chiih-è Naoh ne Lamekh ro dufuii, <sup>37</sup> chiih-è Lamekh ne Methuselah ro dufuii, chiih-è Methuselah ne Enokh ro dufuii, chiih-è Enokh ne Jared ro dufuii, chiih-è Jared ne Mahalalel ro dufuii, chiih-è Mahalalel ne Khenan ro dufuii, <sup>38</sup> chiih-è Khenan ne Enosh ro dufuii, chiih-è Enosh ne Seth ro dufuii, chiih-è Seth ne Adam ro dufuii, chiih-è Adam ne Hamangkhung-aphuii ro dufuii.

## 4

### *Isu shii chuaajan*

*(Mth 4:1-11; Mrg 1:12-13)*

<sup>1</sup> Isu Jordan è idoh dun ramuii shii Ragung So è ley srane Ragung è aishii balimuang, <sup>2</sup> hà now ne inai sawi thog pha Ibutii è aishii bajo chuaajan phi. Ji pha ishak shii ai nyie de achie dang, jjong mage shii, ai de chi-iy iy.

<sup>3</sup> Ibutii è aishii yao, “Na Hamangkhung-aphuii pha dufuii chak arone, hi pha lubao shii yung ne iweb rey yi mage bo.”

<sup>4</sup> Isu è chang, “Jigigam shii izey ro, ‘Bran ne iweb ji è sieng ne arai bie phro.’”

<sup>5</sup> Ji pha idoh shii de ibuii è aishii lakhung hà noh srane din pha zab sohjambling khoh pha ji riig yi. <sup>6</sup> Ibutii è aishii yao, “Gu na shii hi thek pha zab blu nane zab nuruii na shii phi ruii phro, hi zab ne ithek è gu wad shii phijong ro, chiih-è hanyie shii gua ne ruii pha ji shii nyaphi mua phro. <sup>7</sup> Na è gu shii sia arone hi thek zab ne naro rey phro.”

<sup>8</sup> Isu è aishii chang, “Jigigam shii è yao ro, ‘Nawairo Ithong Hamangkhung-aphuii shii sia bie bo chiih-è airo blia rek bie bo!’”

<sup>9</sup> Ji pha idoh è de ibuii è Isu shii Jerusalem pha Misiahò zab è lakhung pha ithua hà riu yi srane, aishii yao, “Na Hamangkhung-aphuii pha dufuii chak arone ichiih-è buzam nawai è lung mage bo. <sup>10</sup> Jigigam shii è yao ro, Hamangkhung-aphuii è awai hamangkhliie yung srane na shii gayiig rek phi phro. <sup>11</sup> Hi de yao, ‘Itheke è na shii awaithek wad è khoh srane na lai de labao rangde akhiia yi phro.’”

<sup>12</sup> Isu è chang, “Jigigam shii yao ro, ‘Nawai Ithong Hamangkhung-aphuii shii achai rabo.’”

<sup>13</sup> Ibuii è Isu shii chuajan phi ched ne, ishak ùjia thog pha aishii thoh ne dun dun.

*Isu è Galili shii awai blia jao*  
(Mth 4:12-17; Mrg 1:14-15)

<sup>14</sup> Ji pha idoh Isu ne Galili hà idoh dun din, chiih-è Ragung So pha blu de ai rog shii um. Ai mua ji ne ji pha soh hà zab yoi dun. <sup>15</sup> Ai è Jewthek misiahòthek hà de yua, chiih-è zab pha bran è de aishii laso phi.

*Nazareth hà Isu shii snai*  
(Mth 13:53-58; Mrg 6:1-6)

<sup>16</sup> Ji è Isu ne awai giak ne sieng pha Nazareth hà wuii dun, idang duiine Jewish Thung pha Inai shii ai de Jewthek misiahò hà wuii dun. Ai è riu srane jigigam ji tham, <sup>17</sup> Chiih-è ai wad shii chaig Aijaya jigigam ji phi, ai è jigigam ji hong shii hì izey pha ji doh ruii,

<sup>18</sup> “Ithong Ragung ne gu lakhung shii um ro, nyieliieshii ai è dusho shii mua wie yua yi pha gu shii gua ro. Gu shii ne phat heg hà chab ne um pho shii de khia yi pha, chiih-è miegthi pho shii doh din yi pha chiih-è bajo diigkhui muui pho shii de yong ne noh pha yao pha thoh ge ro.

<sup>19</sup> Chiih-è Ithong è awai brantheek shii ragia rek pha ishak thog sha ro è yao pha thoh ge ro.”

<sup>20</sup> Isu è siog ji nim srane, ilkhì rek muui pha wad shii idoh phi srane dug din, Jewthek misiahò zab brantheek ne aishii athodang pha riig ne rai, <sup>21</sup> Ji è ai è ithek shii yao, “Sudoh ichiih tham pha jigigam itho ji ne ithek yoi pha Chiang è zab izai rey ge ro.”

<sup>22</sup> Ithek è ai è yao pha miyaogam wie ji wie nuii ne wiengphleg dun. Ithek è yao, “Ai ne Joseph ro dufuui asi bey?”

<sup>23</sup> Ai è ithek shii yao, “Gune izai thieng chak ro, nathek ne hì pha najang yao pha ji ne gu shii yao phro, ‘Ma pha bran na nawai shii gang phi riig bo.’ Nathek è Khaphernaum hà rek pha yoi pha ji duiine ichiih gui hò thiig shii de rek yi pha yao phro.” <sup>24</sup> Isu è ithek shii yao din, “Gu nathek shii hì yao, chaig shii ne awai hò nane thiig shii wie aho ruii phro. <sup>25</sup> Gu shii yoi mage bo, hì ne chaigtheek ro Elija sieng pha ishak shii Israel hà misiung bajo um, ji pha ishak shii haphie aphe pha idam uom è khuyo thog dang pha zab soh shii diigchiaoh thog. <sup>26</sup> Jishii Elija ne Israel hà hanyie shii de athoh ge ro, jishii Sidon pha soh Zarephath hà rai pha misiung shii thoh bi ge. <sup>27</sup> Chiih-è Elija chaig pha ishak shii de Israel hà rai pha brantheek de thiig ne awie dang pha hia è rad pha thiisa hà bajo um; jimagunde zab pha bran ne wie arey, jishii Syrian pha Naman jia miwie bie ro.”

<sup>28</sup> Misiahò shii brantheek è ji è yao pha ji yoi srane bajo lijieg dun. <sup>29</sup> Chiih-è ithek jai fad srane Isu shii reng ne fuang thawun hà noh srane, awaithek thiig rab pha phiingduui giu hà noh dun. Ithek è ji pha phiingduui è buzam reng pha rek, <sup>30</sup> Ai è bran ibrog duchoi è lua srane awai lumuii hà dun marui.

*Bran jia shii ibuii ragung um*  
(Mrg 1:21-28)

<sup>31</sup> Ji-è Isu Khaphernaum pha thiig Galili hà wuii dun, thiisa hà Jewish Thung pha Inai shii ai è brantheek shii yua. <sup>32</sup> Ithek ai muyua ji nuii srane

wiengphleg dun, nyieliieshii ai ne bajo riichai um ne yao dun. <sup>33</sup> Misiahò shii awie pha ibuii ragung um pha bran jia um, ai è goh gang è ziaak ne yao, <sup>34</sup> “Ah! Na ne gathek shii nyie chid pha um ga, Nazareth pha Isu? Na ichiish shii buii rek pha wuii ne bey? Gu ne thieg na hanyie ga, nane Hamangkhang-aphuii pha So mua yao.”

<sup>35</sup> Isu è ragung shii giung, “Aro rabo chiih-è bran ji è fuang khia bo!” Ibuii ji yi ji pha bran shii buzam nyiak hà ai moe shii thud yi srane aishii nyie de buii arekdang pha khia ne dun dun.

<sup>36</sup> Brantheck ne zab wiengphleg srane awaithek chung yao rai, “Hi ne khi-èrek pha miyaogamtheck lei? Riichai nane blu um ne hi pha bran è awie pha ragung shii giung, chiih-è ithek de fuang khia dun!” <sup>37</sup> Chiih-è Isu ro mua ji ne zab ji pha thiig hà voidun.

*Isu è bajo brantheck shii gang phi*  
(Mth 8:14-17; Mrg 1:29-34)

<sup>38</sup> Isu è Jewtheck misiahò ji thoh marui srane Simon hò hà wuii dun. Simon ro khiing ne bajo hakhangzia ne rad ji è ithek è Isu shii ji pha hò-amuii Chiang yao iang. <sup>39</sup> Ai è wuii srane hò-amuii biang moe shii riu ne hakhang jishii khia bo è giung. Ji-è giung shii hakhangzia pha ji de hò-amuii è khia dun, chiih-è ai kthiie sieng srane ithek shii chie nung pha rab phi.

<sup>40</sup> Hasiang yem ched shii ijaktheck è ichua ichua pha miiriie um pha ijaktheck shii Isu moe hà noh thog ruii, Ai è zab shii wad ruii srane ithek shii gang phi. <sup>41</sup> Ji-è rek mage shii bajo ibuiitheck de bran è khia srane ziaak ne yao, “Na ne Hamangkhang-aphuii ro dufuii chak ro!”

Isu è ibuiitheck shii giung ne, ayaodang yi, nyieliieshii ithek ne thieg Isu ne Masi chak ro.

*Isu è Jewtheck misiahò shii yua*  
(Mrg 1:35-39)

<sup>42</sup> Hanaithung pha ishak shii Isu è thiig thoh ne liijiing ithua hà wuii dun. Brantheck è jao ne aishii sow, chiih-è ithek è aishii doh mage shii, brantheck è aishii ithek è thoh ne adun yi pha bidiang. <sup>43</sup> Ji shii ai è ithek shii yao, “Gu ne Hamangkhang-aphuii pha Sajathua pha Mua Wie ji ne gai bajaraithek hà de yao chid phro, nyieliieshii gu shii Hamangkhang-aphuii è ji è rek pha thoh ge ro.”

<sup>44</sup> Ji-è ai ne ji pha soh Jewish misiahò shii wuii ne yua.

## 5

*Isu è igobi shii ho pha samoytheck*  
(Mth 4:18-22; Mrg 1:16-20)

<sup>1</sup> Nai jia Isu yi Genesareth pha khabang ring shii riu ramuii shii brantheck è Hamangkhang-aphuii ro miyaogam nuii pha ai moe shii zab reng ne wuii thog. <sup>2</sup> Ai è run nyi yi kho ring pha lakhung shii yie ne ruii pha doh; jishii ù ua pho è jithek thoh marui ne chiugtheck bsang ramuii shii, <sup>3</sup> Isu è Simon ro run lakhung shii khurog srane, aishii yao, run jishii kho ring ji è thithe hà nyong yi pha yao. Isu è run iliing shii dug srane bran ibrogtheck shii yua.

<sup>4</sup> Ai è yao ched mage shii, ai è Simon shii yao, “Naro run thithe khajam hà yie srane, chiih-è na nane naro ijak yi naro chiug è ù zum pha mua mage bo.”

<sup>5</sup> Simon è chang, “Masdo, gathek è zab habiu chiug mua shii, jia de azum mua ro. Ji shii na è yao muui arone, gu è chiug nyamui riig.” <sup>6</sup> Ithek è chiug mua mage shii, ù yi bajo phieng srane chiug de ji pha rek dun. <sup>7</sup> Ji è ithek gai pha run hà awaithek ijakthek shii wuii ne ithek shii nong gieng bo è leb ne ho. Ithek è wuii srane run nyi shii ù ley chab ched shii run yi kho iliing hà zem pha rek. <sup>8</sup> Simon Phithar è nyie rey pha ji riig srane, Isu lagiung moe shii bam srane yao, “Ithong, Na gu moe è dun bo! Gu ne bajo layog bran ro!”

<sup>9</sup> Awaithek muzum pha ù ji è ai nane ai rog pha brantheke ne zab wiengphleg dun. <sup>10</sup> Ji duiine Simon ro ijak Jems nane Zebedi pha dufuii Jon de wiengphleg dun. Isu è Simon shii yao, “Arum chid rabo; sudoh è thiwing nane brantheke shii zum ruii phro.”

<sup>11</sup> Ithek è run shii kho ring lakhung hà yie ne, zab manathek thoh marui ne, Isu rog shii luagieng.

*Isu è bran shii gang phi*  
(Mth 8:1-4; Mrg 1:40-45)

<sup>12</sup> Luang jia Isu yi gai pha thiig hà rairamuii shii, thiichihi shii buii saduii rek ne rad pha bran de jia um. Ai è Isu shii doh mage ne, awaitlum ne buzam bam srane Isu shii khung ne yao, “Masdo, na è rek yang arone, na è gu shii so nyarek mua phi phro!”\*

<sup>13</sup> Isu è awai wad phia srane, chihih-è aishii khoh srane. Chang, “Gu è rek pha now ro. So rey dun bo!” Ji è yaodang pha ji shii Miiriie ji de bran è thoh dun. <sup>14</sup> Isu è aishii yao, “Hi pha miyao yi hanyie shii de ayao rabo, jimagunde phabi shii miang wuii ne nawai shii doh yi bo, chihih-è zab pha moe shii wie ge rone doh yi bo, chihih-è Moses muyung pha duiine mizid zid phi bo.”

<sup>15</sup> Ji shii din è de Isu ro mua ji ne lahuak bajo yoi khlei dun, chihih-è bran ibrogthek aishii nuii pha nane miiriethek gang yi pha aishii wuii thog ruii.

<sup>16</sup> Ji shii ai ne liijiing um pha ithua hà sia pha dun dun.

*Isu è slemriie bran shii gang phi*  
(Mth 9:1-8; Mrg 2:1-12)

<sup>17</sup> Nai jia Isu yua ramuii shii, Galili, Judea chihih-è Jerusalem pha thiigthek è wuii pha Pharisithek nane Iphey yua pha masdothek de thiichihi shii dug gieng. Radphothek shii gang rek phi pha Ithong pha blu ne Isu shii um gieng.

<sup>18</sup> Giak brantheke è slem è riie pha bran jia shii lawiao rog shii han ne wuii thog ruii, chihih-è ithek è bidiang ne hò bucho hà noh ne Isu ibi shii ruii pha rek. <sup>19</sup> Jimagunde bran bajo um pha ji è, lumuii amua phi ne ithek è aishii Isu moe shii noh ne awuii mua, ji è ithek zak lakhung hà noh srane saphai hong ne, awai lawiao rog shii buzam bran ibrog um pha duchoi Isu ibi shii ziin phi. <sup>20</sup> Isu è ithek shii bajo migi um pha ji doh mage ne, ai è bran jishii yao, gu ijak “Naro layog ne khungjong phi ro.”

<sup>21</sup> Ji è yao pha ji nuii srane Iphey yao pha masdo nane Pharisithek awaithek chung yao rai, “Makhak-riing yao pha bran hì ne hanyie ga? Layog khung phi pha ne Hamangkhung-aphuii jia bie ro!”

<sup>22</sup> Isu è ithek munow jithek thieg srane ithek shii yao, “Nathek ne hì nyie rek ne now phlei? <sup>23</sup> Hì è rek ne yao pha ji ne wie ba bey? Na layogthek ne khungjong phi ro è yao pha ji wie ba asi pha nawai lawiao chiing ne jai

---

5:5 5:5: Jon 21:3    5:6 5:6: Jon 21:6    \* 5:12 5:12: gu shii so rab bo hì pha miiriie è ne brantheke shii zia rab ruii phro.    5:14 5:14: Lug 14:1-32



ne lua mage bo è yao pha ji wie bey? <sup>24</sup> Gu ne nathek shii Bran Dufuii ne sohnyiak shii layog khung phi pha riichai um pha doh yi.” Ji è ai ne slemriie pha bran jishii yao, “Gu na shii yao, jaì srane, nawai lawiao chiing ne hò hà dun shabo!” <sup>25</sup> Ji pha bran è zab pha bran moe è khthiie jaifad srane, thiichiih wiao pha lawiao yie ne awai hò hà dun srane Hamangkhang-aphuii shii laso phi. <sup>26</sup> Thiichiih um pha brantheek zab wiengphleg ne rum ne Hamangkhang-aphuii shii laso phi ne yao, “Sudoh gathek ne khuchung de adoh ba pha blia de doh ge ro!”

*Isu è Lewi shii ho*  
(Mth 9:9-13; Mrg 2:13-17)

<sup>27</sup> Ji pha idoh, Isu fuang hà wuii dun shii, mijin than pha Lewi beng pha jia yi awai ophis shii dug ne rai pha doh. Isu è aishii yao, “Gu rog shii luagieng bo.” <sup>28</sup> Lewi è jaifad srane, zab thoh marui ne, ai rog shii luagieng.

<sup>29</sup> Ji pha ido Lewi è Isu shii chie noh pha ai hò shii michie boh jia saro, chiih-è ji pha biwenthek ne bajo mijin thanphothek nane Gaibranthek ro, <sup>30</sup> giak Pharisithek nane ithek ro Iphey yua pho masdothek è, Isu ro samoythek shii yao, “Nathek ne mijin thanphothek rog nane gai riingthek rog shii nyie rek ne chie niing phlei?”

<sup>31</sup> Isu è ithek shii chang, “Bran hanyie arad arone ma pho achid phro, jimagunde hanyie rad pho ne ma pho chid phro. <sup>32</sup> Gu ne ichiih shii ilab um pha brantheek shii ho pha awuii ro, jimagunde layogthek shii ho pha wuii phro!”

*Minyie pha Chiang shii Musai Sai*  
(Mth 9:14-17; Mrg 2:18-22)

<sup>33</sup> Giak brantheek è Isu shii yao, “Jon ro samoythek ne blebbleb minyie nyie ne sia phi, chiih-è Pharisithek ro samoythek de ji duiine rek, jishii naro samoythek ne chie niing ne rai.”

<sup>34</sup> Isu è chang, “Phiyiy pha bufuii nya um ba shii ne biwenthek shii michie achie yi pha dun ge pha ji wie nabey? Ji ne awie phro! <sup>35</sup> Ji shii doh jia ne ji è rek pha inai thog ruii phro phie pha bufuii ne noh dun phro, ji pha ido è, ithek ne minyie nyie ruii phro.”

<sup>36</sup> Isu è ithek shii hì pha najang de yao, hanyie magunde yung wo è ithileg ji srane yung ihèg shii miak ne aphiog phro, ai ji è rek arone, airo yung wo ji ne ji dun phro, chiih-è iwo nane ihèg ji a-ò rai phro. <sup>37</sup> Hanyie è de jariie ihèg shii phuii nyu giog ne achab phro, nyieliene phuii nyu ji muna rey mage shii ji pha jariie ne chui srane phuii ne zab noi dun phro. <sup>38</sup> Ji-è phuii nyu ne jariie iwo shii chab chid phro. <sup>39</sup> Chiih-è phuii weg ji niing pha idoh shii ne hanyie de phuii nyu ji aning yang phro. Ai ne yao phro, iweg ji ne wie ba ro.

## 6

*Jewish Thung pha Inai pha Musai Sai*  
(Mth 12:1-8; Mrg 2:23-28)

<sup>1</sup> Jewish Thung pha Inai shii Isu yi phiug raig è dong srane luaramuii shii. Airo samoy pho è raig pha iwoi ji pho srane wad shii nan ne chie. <sup>2</sup> Giak Pharisithek è sai, ithek ne Iphey shii arek rabo ne zen pha duiine Jewish Thung pha Inai shii hì thek ne nyie rek phlei?

<sup>3</sup> Isu è ithek shii chang, “Nathek ne Dawid nane ai brantheke chi-iyiy mage shii nyie rek pha ji atham ba bey? <sup>4</sup> Ai è Hamangkhung-aphuii hò hà wuii srane, Hamangkhung-aphuii shii zud pha iweb ji yie srane chie, chiih-è awai bran shii de phi ne chie yi. Thiichiih shii zud pha iweb ne phabi michie mua bie ro, gai hanyie è ji chie pha ne Iphey shii chun pha rek phro.”

<sup>5</sup> Chiih-è Isu ne iidohhè yao, “Bran Dufuii ne Jewish Thung pha Inai pha Ithong ro.”

*Wad shii slemrie pha bran jia*  
(Mth 12:9-14; Mrg 3:1-6)

<sup>6</sup> Dinpha Jewish Thung pha Inai shii Isu Jewtheke misiahò hà wuii srane ithek shii yua. Thiisa hà wad phazoy shii slemrie pha bran de jia um. <sup>7</sup> Giak Iphey yua pha masdothek nane giak Pharisitheke ne Isu è chun pha blia rek muui rone nin yang mage ne Jewish Thung pha Inai shii gang phi bey ne wie riig ne rai. <sup>8</sup> Ji shii Isu è ithek munow jithek thieg mage ne bran jishii yao, “Jai srane ibi hà wuii mage bo.” Ji pha bran ji è jai srane thiichiih shii riu. <sup>9</sup> Chiihphado Isu è aishii yao, “Gu na shii sai, Jewish Thung pha Inai gethek Iphey shii nyie rek pha zen ga? Nong phi pha ji bey? Asi pha chun phi ji bey? Bran shii ragia rek phi pha ji bey? Asi pha chun phi pha ji bey?” <sup>10</sup> Ai è ithek shii zab shan ne riig srane ji pha bran shii yao, \* “Naro wad phia mage bo.” Ai è ji è rek, chiih-è ai wad de wie rey dun.

<sup>11</sup> Itheke ne ji riig srane bajo lijieg ne Isu shii nyie rek sha pha fuang hà dun ne awaitheke chung nung rai.

*Isu è snanyi shii guaphasamoy gua*  
(Mth 10:1-4; Mrg 3:13-19)

<sup>12</sup> Ji pha ishak shii Isu yi phiingduii hà sia pha wuii ne thiisa hà ji pha habiu zab Hamangkhung-aphuii shii sia ne rai. <sup>13</sup> Hanai rey mage shii ai è awai samoytheke shii awai moe hà ho srane snanyi shii gua, ai è ithek shii guaphasamoytheke ro è beng ne ruui: <sup>14</sup> ithek ne Simon (hanyie shii ai è Phithar ro è de beng) chiih-è ikhuii Andrew shii; Jems nane Jon, Philip nane Bartholomew, <sup>15</sup> Methiu nane Thomas, Alphayus pha dufuii Jems, chiih-è Simon (hanyie shii thiig moe pha bran rone ho muui pha ji), <sup>16</sup> Jems pha dufuii Judas, chiih-è Judas Iskharioth hanyie è khlam rek pha ji theke ro.

*Isu è yua ne gang phi*  
(Mth 4:23-25)

<sup>17</sup> Isu yi awairo guaphasamoytheke rog phiing è thazam dun thog shii, ai yi ilieg pha ithua shii samoytheke ibrog rog shii awairo boh pha samoytheke rog shii riu, ji pha brantheke ne Judea pho chiih-è Jerusalem pho chiih-è Thaire nane Sidon pha khamuii ring pha rajan phothek ro; <sup>18</sup> ithek ne airo miyao yoi pha chiih-è awaitheke ro miirrie ji wie rek yi pha wuii phro. Chiih-è ibuii ragung è diig phi phothek de thiichiih wuii ne gang dun. <sup>19</sup> Zab pha brantheke è aishii khoh pha bidiang, nyieliieshii ai blu fuang khia ne ithek shii gang rek yi pha rek.

*Sang nane duhug*  
(Mth 5:1-12)

<sup>20</sup> Isu è awai samoytheke shii riig srane yao pha, Dusho nathek shii sang um ro,

Hamangkhung-aphuii pha Sajathua ne nathek ro ro!

21 Sang bo nathek ne thiih shii chi-iyiy pho ne,  
 Nathek shii ley phi!  
 Nathek thiih shii cho pho ne;  
 Nathek ne siak ruii phro!

22 Nyieliieshii Bran Dufuii Chiang è nathek shii bran è amiie ruii arone,  
 chiih-è nathek shii snai ruii arone, chiih-è nathek shii makhakriing rek ruii  
 arone, chiih-è nathek shii awie rone yao ruii arone ithek ne sang mage bo!

23 Lised boh ji rey mage shii, lubo ji shii siu bo, nyieliieshii Hamangkhang  
 hà boh lasen ne na shii ruii phi ro. Itek blang è chaigthek shii de ji duiine  
 rek ro.

24 Jishii thiih shii bukho shak pho ne khama thiig rey ruii phro;  
 nawaithek wie sieng pha ne siengjong ro!

25 Thiuh ley um pho nathek shii ne khama thiig rey ruii phro;  
 Nathek ne chi-iyiy ruii phro!

“Thiih shii siak pho nathek ne khama diig phro;  
 Nathek ne duhug rek ne choh ruii phro!

26 “Thiih shii brantheck è nathek shii wie yao ruii arone khama thiig ruii  
 phro; ithek ro blangthek de ji duiine khlam pha chaigpho miyao Chiang è  
 yao ruii.

*Suangthek shii miie bo*  
 (Mth 5:38-48; Mth 7:12)

27 “Jishii gu miyao nuii pho ithek shii yao phro: nawai swangthek shii  
 miie mage bo, na shii awie pha rek pho shii wie rek mage bo, 28 Hanyie è  
 ithek shii muchocho arone, ithek shii khirzey phi bo, chiih-è hanyie è nathek  
 shii gidieg rek arone ithek Chiang sia phi bo. 29 Chiih-è hanyie magunde na  
 mizia jia shii phay arone, dinne de naro yoh pha mizia hà de choi bo; chiih-  
 è naro rugud gaithek yie dun arone naro phadiig de yie yi bo. 30 Hanyie è  
 na shii nyie lia magunde aishii phi bo, chiih-è hanyie è naro nyie yie dun  
 magunde idoh phi pha alia rabo. 31 Na è gaithek shii nawai shii khi-èrek yi  
 pha now pha duiine ithek shii de ji rek phi bo.

32 “Natek shii hanyie è miie jishii nathek è miie bie arone? Khi-èrek ne  
 nathek shii khirzey mua mage phlei? Layog phothek rang de ithek shii miie  
 pho shii ne ithek de miie phi. 33 Chiih-è hanyie nathek è ithek shii wie rek  
 jishii wie rek bie arone, nathek ne khi-èrek ne khirzey mua mage phlei? Jine  
 layogphothek rang de rek! 34 Chiih-è ithek hanyie è idoh mua pha luthong  
 ne jishii chei bie phi arone, khi-èrek ne khirzey mua mage phlei? Nyieliieshii  
 layog pho rang de layog phothek shii chei ne idoh yi din! 35 Asi! Nawaithek  
 mak shii miie bo chiih-è ithek shii wie rek bo; chei phi srane, idoh mua pha  
 aluthong rabo. Chiihphado nathek shii ne boh lasen um ruii phro, chiih-è  
 nathek ne bajo giu pha Hamangkhang-aphuii pha dufuii rey ruii phro. Ai ne  
 laso aphi pho shii nane layog phothek lakhung shii wie phro. 36 Nawaithek  
 Aphuii è bushun rek pha duiine bajo bushun rek bo.

*Gai shii chua*  
 (Mth 7:1-15)

37 “Gaithek shii achua rabo, ji arone Hamangkhang-aphuii è de nathek  
 shii de achua phro, chiih-è khi shii athe rabo, ji arone nathek shii de  
 Hamangkhang-aphuii è athe ruii phro; gai shii khung phi bo, ji arone  
 Hamangkhang-aphuii è na shii de khung phi phro. 38 Gai shii phi bo, ji arone

Hamangkhang-aphuii è na shii de phi ruii phro. Hi ne izai chak ro, na shii ne briie ley pha mua ruii phro, na è nyakhoh mua ne khuchung de amuii ba pha nong ji ne na laluii shii thoi ruii phro, na è gai shii chua pha briie ji è, Hamangkhang-aphuii è na shii de chua ruii phro.”

<sup>39</sup> Isu è ithek shii hi pha najang è yao: “Miegthipho è miegthi shii noh ne alua mua phro; ai è noh ne lua magunde nyimanyi nyahiung hà chiih dun phro. <sup>40</sup> Samoythek ne masdo è boh asi ro, jishii samoythek è zab dab ched mage ne, masdo duiine nyarey mua phro.

<sup>41</sup> “Na nawai mieg shii iphen han srane, nawai khuii ro iphen ji riig ne nyie rek ne yao phlei? <sup>42</sup> Nawai iphen aphan bi pha nyie khi-èrek ne nawai khuiinothek shii yao phiilei? Gu khuiinothek wo! Na mieg shii iphen um pha ji ne gu shii phan yi bo. Lawasdaï nathek! Igobi nane nawai mieg pha iphen ji phan bi bo, chiih-è na ne wie riig mua srane, nawai khuiinothek ro mieg iphen de wie doh ne nyaphan mua phi phro.

### *Hingmuii nane iwoi*

*(Mth 7:16-20; 12:33-35)*

<sup>43</sup> “Hingmuii wie ne awie pha iwoi awoi phro, ji duiine hingmuii awie pha è de iwoi wie awoi phro. <sup>44</sup> Zab pha hingmuii ne iwoi woi ruii pha ji è thieg ruii phro; na ne khuchung magunde migem biing è iphem apho phro, chiih-è khuchung magunde migem biing è angur awoi phro. <sup>45</sup> Bran wie ne lubu liing hà de wie khrab ne fuang hà dun ne wie khia ruii phro; bran awie pho ne lubu liing hà awie pha khrab ne fuang hà de awie pha khia ruii phro. Ji-è lubu hà nyie now lei ne sem hà è de ji yao ruii phro.

### *Hò rung pho nyi*

*(Mth 7:24-27)*

<sup>46</sup> “Gu è nyie yao pha ji ne tuh de arek ba pha rek srane, nathek gu shii ‘Ithong’ Ithong ro è yao ne nyie rek pha ho phlei? <sup>47</sup> Hanyie è gu shii wuii srane gu miyaogamthek nuii ne lubu hà ruii arone ai ne hanyie ga gu nathek shii doh yi phro. <sup>48</sup> Ai ne hanyie è sak shii icho chog ne awai hò rung pha sarong zieg pha duiine ro, khamuii è khed ne jao magunde ji pha hò ne asid phro, nyieliieshii hi ne chuh rung dun. <sup>49</sup> Jishii hanyie è gu miyaogamthek nuii srane jishii alua pho ne hanyie è awai hò rung shii sarong wie azieg pha rung pha duiine ro; kokhed ne ji pha hò shii jao mage shii hò ji ne jog chuak dun, ji è chuak mage ne zab è de awiedang pha chuakbraig dun.”

## 7

### *Isu è Roman dumuii ro khiao shii gang phi*

*(Mth 8:5-15)*

<sup>1</sup> Isu è branthek shii jithek zab yao ched maruii shii, awai ne Khaphernaum hà wuii dun. <sup>2</sup> Roman dumuii è bajo bushun rek pha airo khiao jia um; ji pha bran ye rad ne iy sha pha rek. <sup>3</sup> Dumuii è Isu ro mua ji yoi mage ne, ai è Jewish dukthothek shii ai khiao jishii gang phi pha ho pha thoh ge. <sup>4</sup> Ithek è Isu shii wuii srane wie khung ne yao, “Ji pha bran ne izai naro nong chid pha um ro. <sup>5</sup> Ai ne gathek bran shii miie chiih-è ai awai è gathek shii Jewthek misiahò de rung phi phro.”

<sup>6</sup> Ji-è Isu de ithek rog shii wuii gieng. Ai ji pha hò è ruang asi ba shii dumuii ji awai ijakthek shii thoh ne aishii yao yi, “Masdo, nawai shii diig arek chid

rabo, Na gu hò shii wuii mua pha ne gu shii ne chua oi ro. <sup>7</sup> Ji è gu de na shii wuii mua sapho asi ro, nane yao bie mage bo, ji arone guro khiao ji ne gang dun phro. <sup>8</sup> Gu, è de dumuiithek boh iliing shii pha bran ro, chiih-è gu iliing shii de sandrithek um ro. Gu è jia shii 'Wuii' bo è yung arone, ai de wuii dun phro! Chiih-è gai shii, 'Thawuii!' bo è yao arone ai de thawuii phro; chiih-è gu gui khiao, 'Shii hì rek!' bo è yao arone ai ne rek phi."

<sup>9</sup> Isu è ai miyao ji nuui srane wiengphleg ne idoh rei srane ai rog shii lua pha iphiingthek shii yao, "Gu nathek shii yao, hì duiine pha migi ne thiuh de adoh ba ro, chiih-è Israel shii magunde adoh ba ro!"

<sup>10</sup> Muapho idoh dumuii hò hà dun shii airo khiao yi gang iang pha doh.

### *Isu è misiungmui ro dufuii shii hòì din phi*

<sup>11</sup> Achidang pha idoh\* shii Isu ne samoythek nane bran ibrog dog srane ithek shii gang rek yi ne Nain beng pha thiig hà wuii dun. <sup>12</sup> Ai ne thiig pha gak hà nyathog dang shii, ithek bran iy jia han srane fuang hà noh ne wuiiramuii pha doh. Ji pha bran iy yi misiungmui ro dufuii ji jia ji ro, chiih-è thiig pha bran ibrog de ji pha hò-amuii rog shii wuii gieng. <sup>13</sup> Ithong è hò-amuii shii ji è rey ramuii pha ji riig srane, ai lubu yi ji pha hò-amuii shii bajo bushun now dun, Ji è ai è hò-amuii shii yao, "Acho rabo." <sup>14</sup> Chiihphado ai è wuii srane bran iy han pha ji shii khoh mage, ji è han pha brantheke de thung dun. Jishii Isu è yao, gu na shii yaodang phro, "Filiao bufuii! Sieng mage bo." <sup>15</sup> Iyjong pha bran ji è siangfad ne dug srane miyao jao ne yao, chiih-è ji pha bran shii Isu è imuii shii idoh phi din.

<sup>16</sup> Ji è rek pha ji riig srane zab brantheke yi rum ne Hamangkhung-aphuii shii chiong, "Itheke è yao; getheke duchoi shii chaigphuii boh jia khia thog ro! Hamangkhung-aphuii ne awai bran shii ragia rek pha wuii thog ro!"

<sup>17</sup> Hì pha Isu pha mua ji yi zab pha soh pha ithua iring hà de zab yoi dun.

### *Jon khowo re-è muapho thek*

*(Mth 11:2-9)*

<sup>18</sup> Jishii Jon ro samoythek è jithek pha miyao aishii yao ched shii, ai è bijiu nyi shii ho, <sup>19</sup> Chiih-è Ithong shii sai pha isa shii thoh ge, "Chiih-è Jon è wuiiramuii ro è yao pha ji bey? Asi pha gathek ne gai shii luthong chid habey?"

<sup>20</sup> Ai è Isu shii wuii thog mage shii, isa è yao, "Jon Khowo è gathek shii hì è yao ne sai pha thoh ge ro, Na ne Jon è wuiiramuii ro è yao pha ji na bey? Asi pha gathek ne gai shii luthong habey."

<sup>21</sup> Ji pha ishak shii Isu è brantheke ro rad pha, miiriie theke nane awie pha ragungthek shii gang phi, chiih-è miegthi pha brantheke shii de doh din yi.

<sup>22</sup> Ai è Jon ro muapho shii chang, "Nasa nyie doh nyie yoi pha ji ne, idoh dun srane ne Jon shii yao bo: Miegthi pho de doh dun ro, chiih-è lai khi-èg lua ge ro, chiih-è hanyie yi awie pha diig rek ne hà rad pha bran de so† rab ge ro, chiih-è khohphang pho de yoi ge ro, chiih-è iy pho de hòì dinro, chiih-è Mua Wie ne dushothek shii yao dun ro. <sup>23</sup> Gu shii khlam rone anow pho ne bajo sang dun ro!"

<sup>24</sup> Chiihphado Jon ro muaphothek è thoh marui srane dun din shii, Isu è bran ibrog shii ai Chiang ji jao ne yao: "Nathek è balimuang shii Jon hà wuii shii, nyie shii luthong ne wuii phlei? Nathek yi hasam è saing rab yi thenia

\* **7:11** 7:11: khthiie pha idoh shii; giak jigizey shii ne umji pha inai. **7:22** 7:22: Aij 35:5,6; Aij 61:1

† **7:22** 7:22: sang rab: riig 5:12

thania pha ji riig wuii ne bey? <sup>25</sup> Nathek fuang hà nyie riig pha wuii phlei? Bran yi wie yung guii pha ji riig wuii ne bey? Bran hanyie è ji duiine guii ne sang ne rai pho ne saja hò hà doh ruii phro! <sup>26</sup> Gu shii yao riig bo, nathek fuang hà wuii srane nyie riig wuii phlei? Chaigthek shii riig wuii ne bey? Ji ne izai chak ro, jimagunde ithek ne chaig è de bajo boh jia doh yi. <sup>27</sup> Jigigam shii yao pha ji ne Jon ji chak ro, ‘Hamangkhang-aphuii è yao, gu ne gui mua pho shii naro lumuii hong yi pha na ibi thoh ge phro.’ <sup>28</sup> Isu è yao,” Gu è nathek shii zai yaodang phro, “Jishii idang rai pha bran è de Jon boh ba ro. Jishii Hamangkhang-aphuii pha Sajathua shii lu um ne de ai ne Jon è de boh ba phro.”

<sup>29</sup> Zab pha brantheke è aishii yoi, ithek nane mijin thanphothek dungdang ne Hamangkhang-aphuii ro giang nak ne, ithek de Jon ro khowo yie. <sup>30</sup> Jishii Pharisithek nane Iphey yua pha masdothek è Hamangkhang-aphuii munow pha miyao ji snai srane Jon ro khowo de ayie.

<sup>31</sup> Isu è yao din, “Chiiphado duchung pha brantheke shii, khi-èrek ne chua ne yao sha phlei? Itheke ne khi-èrek pha duiine lei? <sup>32</sup> Itheke ne bajarai pha ithua shii dug ne rai pha aniphiiing duiine ro. Gai ibrog è gai shii ziak srane yao, ‘Gatheke ne phiyiy pha ben nathek shii khuang phi, jishii nathek è asiu! Gatheke è bi-iy ibai bai shii ithek è achoh phi!’ <sup>33</sup> Jon Khowo phi pha ji wuii thog ne, chiuh-è ai ne minyie nyie srane phuii de aniing, chiuh-è ithek è yao, ‘Ai iliing shii ne ibuii um ro!’ <sup>34</sup> Bran Dufuii yi wuii thog mage ne, chiuh-è chie niing shii, ithek è yao, ‘Hi pha bran shii riig bo! Ai ne sugow ne chie niing pha jia ara, chiuh-è ai ne mijin than phothek nane layogthek pha ijak ro è yao!’ <sup>35</sup> Hamangkhang-aphuii pha khani è, hanyie è nuii lei ne ji ne izai chak rone doh yi phro.”

### *Isu ne Simon Pharisi hà um*

<sup>36</sup> Pharisi jia è Isu shii ai hò hà michie chie pha ho, ji è Isu yi ji pha Pharisi hò hà wuii srane michie chie sha pha dug. <sup>37</sup> Ji pha thawun shii layog rek ne sieng pha hò-amuii de jia rai. Ai è Isu ne Pharisithek hò hà michie chieramuii pha yoi, ji è ai ne rem no pha (alabasther) sumaro ley jariie yie ne wuii thog ne, <sup>38</sup> Isu idoh shii riu srane, cho ne awai mieg kho è ai lai shii sad phi. Chiiphado è awai khaziang è ai lai shii go rek phi ne, ai lai shii khichiung ne, chiuh-è sumaro rek ne aishii shun phi. <sup>39</sup> Pharisithek è ji doh srane, awai shii yao, “Hi pha bran ne izai chaigphuii arone, aishii kho pha hò-amuii ji ne hanyie ga ai ne nyathieg mua phro, chiuh-è hi pha hò-amuii yi khi-èrek ne layog è sieng ne rai ji de ai nyathieg mua phro!”

<sup>40</sup> Isu gang è aishii yao, “Simon, gu na shii nyie magunde yao pha um ro.” “Isu è chang, Masdo, Yao mage bo.”

<sup>41</sup> Isu è jao ne yao, “Buyo buyo shii bran nyi è bang chei pho è bang chei phi, jia è aishii liiman pha sikhi wieng guii chei, chiuh-è bran yoh jia ji è saguii chei. <sup>42</sup> Jishii isa è hanyie de idoh arang mua, jimagunde ai è isa ro muruii shii alia pha thoh muii, ji arone, aishii hanyie è bajo miie ruii phlei?”

<sup>43</sup> “Simon è chang,” “Gu munow arone, hanyie shii bajo bang yi pha um shii idoh alia pha thoh muii pha ji è bajo wie now phro.”

Isu è yao, “Na miyao ji ne izai chak ro.” <sup>44</sup> Jishii ai è hò-amuii jishii rei srane riig ne Simon shii yao, “Na hi pha hò-amuii shii doh ramuii bey? Gu ne na hò hà wuii shii, na è gu lai sud pha kho de aphi, Jishii ai è awai miegkho

è gu lai sud phi srane awai khaziang rek ne sad ne go phi. <sup>45</sup> Na è gu shii ne khichiug srane wie aho ro, jimagunde gu nyawuii thog dang ne ai gu lai shii athodang pha khichiug bamuii ro. <sup>46</sup> Na è gu khrug shii sumaro yow è ashun phi, jimagunde ai è gu lai shii wie now pha thiiliie è shun phi. <sup>47</sup> Ji è, gu na shii yao, airo bajo miie pha ji è airo layogthek ne khungjong ge ro è doh yi ro. Jishii layog iujia khung bie pha ne, airo miie pha de iujia bie rone doh yi phro.”

<sup>48</sup> Chiihphado Isu hò-amuii shii yao, “Na layog khungjong phi ro.”

<sup>49</sup> Gaithek thiibliie shii dug pho è awaithek chung yao rai, “Layog shii rang de khung phi pha hì ne hanyie ga?”

<sup>50</sup> Jishii Isu è hò-amuii shii yao, “Naro migi è na shii ragia rek ge ro; na ne lijiing è dun bo.”

## 8

### *Hò-amuiithek yi Isu rog shii nong gieng*

<sup>1</sup> Iujia pha ishak idoh shii Isu è bajarai nane thiig ji hà lua srane, Hamangkhung-aphuii pha Sajathua pha mua wie ji yao. Samoy snanyi de ai rog shii wuii gieng. <sup>2</sup> Chiih-è hanyie shii awie pha ragung nane miiriie è wie rek phi pha hò-amuiithek de ai rog shii um: Mery (hanyie shii Magdalene rone ho), aishii è ibuii ragung de miley dukho fuang khia phi pha ji ro; <sup>3</sup> Joana, ai igey Chuza yi Herod ophis pha dumuii; chiih-è Susana, chiih-è gai pha hò-amuiithek awaithek miwiang è Isu nane samoypho shii nong phi.

### *Iriiejiie pha najang* (Mth 13:1-9; Mrg 4:1-9)

<sup>4</sup> Branthekek yi thawun nane ji pha idoh gai athodang pha Isu shii wuii; chiih-è branthekek yi wuii thog srane bajo iphiing khrab mage shii, Isu è hì pha najang yao:

<sup>5</sup> “Luang jia thiisa hà bran jia um ai yi iriie jiie wuii pha fuang hà wuii dun, ai è iriie yi raig shii jiie marui, giak iriie yi lumuii ring hà chiih dun, ji pha iriie shii ne thum dun, chiih-è fuii è chong ne chie muii. <sup>6</sup> Chiih-è giak miiriie yi labao surong pha ithua hà chiih dun, chiih-è iphiu sieng thog mage shii goh dun, nyieliieshii nyiak yi liing asi. <sup>7</sup> Giak miiriie yi migem biing hà chiih dun, iphiu ne sieng shii chiih-è aishii lam dun. <sup>8</sup> Chiih-è giak miiriie yi nyiak wie shii chiih pha ji è; iphiu sieng srane iwoi de wie woi ruii, iwoi jia jia shii wieng thog pha woi.”

Chiih-è iidohè Isu è yao, chiihphado, yoi mage bo, nathek shii khothek um arone.

### *Ithekek è najang pha miyaosiu ji sai* (Mth 13:10-17; Mrg 4:10-12)

<sup>9</sup> Awairo samoythek è Isu shii sai hì pha najang è shan ne yao pha miyaosiu nyie lei? <sup>10</sup> Chiih-è ai ithek shii chang, nyieliieshii Hamangkhung-aphuii ro Sajathua pha khani ug ne ruii pha ji ne nathek shii phijong ro, chiih-è gaithek shii ne najang è shan ne yao chid phro, nyieliieshii ithek ne riig pha ne riig shii adoh, chiih-è yoi phane yoi shii agao.

### *Isu è jiie pha najang ji miiriig è yao* (Mth 13:18-23; Mrg 4:13-20)

<sup>11</sup> Hì pha najang pha miyao ne hì ro: Miiriie ne Hamangkhung pha miyaogam ro. <sup>12</sup> Miiriie lumuii shii chiih phro è yao pha ji ne hì ro, hanyie è ji ne nuui phane nuui shii; Jimagunde Sakthong è wuii srane ithek lubu è yie ne dun marui, nyieliieshii migi nane ragia ithek shii arey yi pha rek phro. <sup>13</sup> Iriie yi sak lakhung shii chiih phro è yao pha ji ne hì ro, hanyie è mua ji yi nuui srane lised ne yie dun. Jishii ithek iliing shii akhud phi; ithek ne lujia pha migi now bie ne jimagunde thiig pha ishak thog mage shii ithek ne thoh muui. <sup>14</sup> Iriie yi migem biing hà chiih phro è yao pha ji ne hì ro, hanyie è mua ne nuui, jimagunde diig now pha ji è chiih-è bokho rek pha now pha ji è chiih-è awai shii wie sieng pha now pha ji è aishii ne lam dun ro. Chiih-è ai iwoi ne khuchunde amen mua ro. <sup>15</sup> Iriiethék nyiak wie shii chiih pha miyao ji ne hì ro, hanyie thek è mua ji wie nuui ne lubu iliing hà ruui ne, chiih-è ithek iwoi yi awai muspho shii ne zud ne rai.

*Ichuang pha najang*  
(Mrg 4:21-25)

<sup>16</sup> Hanyie magunde ichuang shii siikhiiakhjam è phieng ne aruii ro, chiih-è biang iliing hà de aruii ro. Jishii ichuang yi iliing wuii pho shii sang doh yi pha bunthruak lakhung hà ruui phro.

<sup>17</sup> Nyie ug ne ruui magunde fuang hà doh yi phro, chiih-è nyie magunde cheg ne ruui pha ji ne ichuang hà yi ne doh dun phro.

<sup>18</sup> Chiihphado, ithek khi è nuui pha ji ne “Wie gayiig bo; nyieliieshii hanyie shii lujia um pho shii ne dinne muna phi din ruui phro, jimagunde hanyie shii nyie de oi dang magunde aishii nyie um pha ji de yie muui phro.”

*Isu ro ikhuiithek nane amuii*  
(Mth 12:46-50; Mrg 3:31-35)

<sup>19</sup> Isu ro amuii nane ikhuiithek aishii wuii thog, Jishii ithek è Isu rog shii athog mua gieng, nyieliieshii bran iphiing um. <sup>20</sup> Biju jia è Isu shii yao. “Na amuii nane na khuiithek ne na shii riig yang ne sibiang hà riu ne khan muui ro.”

<sup>21</sup> Isu è ithek zab shii yao, gu amuii nane gu khuiithek ne ji ro, hanyie è Hamangkhung-aphuii pha miyaogam ji nuui srane rek pha ji ro.

*Isu è hasamkhanoi shii them yi*  
(Mth 8:23-27; Mrg 3:31-35)

<sup>22</sup> Nai jia Isu è awai samoythek rog shii run lakhung hà in srane ithek shii yao, “Cho gethek khabang thrang pha ithua hà wuii sharai haro.” Ji è ithek ne jao ne wuii dun, <sup>23</sup> ithek run bucho hà ba shii, Isu ne men dun hamblo shii hasam gashau jia khed thog ruui, chiih-è run ne kho è jao ne ley ramuii, ji è ithek ne zab bajo diig rey dun. <sup>24</sup> Samoythek è wuii srane Isu shii chun ne yao, “Masdo, Masdo, gathek ne iy sha pha rek ro!”

Isu è sieng srane hasam gashau shii giung mage shii, ithek de chiih them dang dun, chiih-è thiichiih shii lijiing rey dun. <sup>25</sup> Chiihphado ai è awai samoythek shii yao, “Nathek ro migi ne khiisa lei?”

Jishii ithek ne wiengphleg ne rum dun, chiih-è awaithek chung yao rai, “Hì pha bran ne hanyie ga? Ai è hasamkhanoi shii de giung mage ne ithek de aishii nuui dang dun!”

*Isu è ibuii um pha bran jia shii gang phi*  
(Mth 8:28-34; Mrg 4:35-41)



<sup>26</sup> Isu nane ai samoythek run è in srane khabang thrang Galili pha soh Gerasa\* hà wuii thog. <sup>27</sup> Isu run è khabang ring hà lung shii, ibuii ragung um pha thawun pha bran jia aishii si, nai bajo è ji pha bran ne yung de aguii pha chiih-è hò hà de arai phi, jimagunde ai ne idang wem muang hà rai. <sup>28</sup> Ai è Isu shii doh mage shii, goh gang è choh srane ai lai shii awalum ne bam srane ziaik ne yao, “Hamangkhung-aphuii pha Bajo Giu pha Dufuii Isu!” Na gu è nyie chid pha um lei? Gu na shii khung ne yao phro, gu shii lago aphi rabo <sup>29</sup> Ai è hì yao pha ji ne nyieliieshii Isu è ibuii ragung shii ai bucho è fuang khia mage bo è giung. Aishii ne ibuii ragung è blebbleb thoh dun, chiih-è ai wad nane lai shii shiirnai rek ne joi srane phat heg hà chab ne ruii magunde ai è shiirnai ji biathiak srane ibuii è balimuang hà noh ne dun marui. <sup>30</sup> Isu è aishii sai, “Na beng nyie ga?” Ai è chang, gu beng ne 'Mob' ", ro, nyieliieshii bajo ibuii yi aishii khuddun. <sup>31</sup> Ibuiithek ji è Isu shii khung srane yao gathek shii jam nyahiung bucho hà athoh rabo.† <sup>32</sup> Thiisa phiingduii moe shii wak brog bajo um iang, ji è gathek shii ne Wakthek iliing shii thoh ge bo è yao ne ibuiithek è Isu shii khung ne yao, chiih ithek shii ai è ji hà thoh ge. <sup>33</sup> ItheK ji pha bran è khia srane wak brogthek shii khud dun. Zab pha wak brogthek ne phiingduii è buzam ran srane khabang shii wo ne iy dun.

<sup>34</sup> Wak brog shii gayiig rek ne rai pha bran ji è nyie rey pha ji doh srane, ji è ai ne bajarai nane raig shii ran srane jithek pha mua yao mage. <sup>35</sup> Branthek è nyie rey pha ji riig wuii dun, chiih-è ithek Isu shii wuii thog mage shii, ibuii fuang khia dun pha bran ji yi khani wie rey srane yung guii ne Isu lai moe shii dug ne rai pha doh, chiih-è ithek ne zab rum dun. <sup>36</sup> Hanyie ji doh pho è branthek shii yao hì pha bran ne khi-èrek ne wie rey ge ara. <sup>37</sup> Chiihphado ji pha soh pha branthek è Isu shii thiichiih-è dun bo è yao, nyieliieshii ithek ne bajo sham ne rum dun. Ji-è Isu run hà in ne dun din dun. <sup>38</sup> Ibuii khia dun pha bran ji è khung ne Isu shii yao, “Gu shii de narog wuii noh bo.” Jishii Isu è yung srane aishii thoh ge, <sup>39</sup> Idoh dun srane nawai hò hà Hamangkhung-aphuii è na shii nyie rek phi pha ji yao bo.

Ji pha bran è zab pha thawun hà wuii srane, Isu è aishii nyie rek phi pha ji yao.

*Jairus ro idimi nane Isu ro rugud khoh pha hò-amuii*  
(Mth 9:18-26; Mrg 5:21-43)

<sup>40</sup> Isu khabang ring pha gai ithua shii idoh thog mage ne, branthek aishii wie è ho, nyieliieshii zab ithek ne aishii khan ne rai. <sup>41</sup> Chiihphado è Jairus beng pha bran jia de thiichiih wuii thog; ai ne thiisa pha Jewthek misiahò pha dumuii ro. Ai awalum ne buzam Isu lai shii bam srane aishii khung ne ai hò hà wuii bo è yao, <sup>42</sup> nyieliieshii airo idimi dam snanyi rey sha pha ji ne iy pha rek.

Isu ai rog shii wuiiramuii shii ai mai pha zab ithua shii bran iphiing khrab thog dun. <sup>43</sup> ItheK duchoi shii hò-amuii jia yi grab rek ne diig ne rai pha dam snanyi rey sha; ai è awai shii nyie um pha ji zab mahpho‡ shii phi srane wie rey yi pha rek shii, Jishii hanyi è de aishii wie arek mua. <sup>44</sup> Ai è ibrog shii

\* **8:26** 8:26: Gerasa; giak jigizey shii ne um Gadara (riig Mth 8:28); gai ne um Gergesa. † **8:31** 8:31: Jam ihiung: ithek ne hì id ibuiithek shii ne iidohhè pha lago pha sohnyiak hà zum ne ruii. ‡ **8:43** 8:43: giak jigizey shii ne hì oi aishii nyie um pha ji ne mahpho shii phi ched muui.

Isu idoh wuii srane airo rugud jiu shii khoh mage, chiih-è airo grab noi pha ji ne limdang dun. <sup>45</sup> Isu è ithek shii sai, “Gu shii hanyie mukhoh lei?”

Zab è yao, gathek ne akhoh ro, chiih-è Phithar è yao, hanyie de akhoh ro, “Masdo, bran ibrog zab ne na shii gung ramuii ro.”

<sup>46</sup> Jishii Isu è yao, “Hanyie lei jia ne gu shii khoh ro, gu ne thieg, blu ne gu è fuang khia dun ro.” <sup>47</sup> Hò-amuii ji è shii riig shii aishii ne thieg dun, ji è ai ne sham srane wuii ne awalum ne Isu lai shii bam. Ai è nyie rek ne khoh chiih-è khi-èrek ne khthiie wie dun pha ji thiichiih ai ibi shii um phothek moe Isu shii yao. <sup>48</sup> Isu è hò-amuii jishii yao, “Gu dimi, nawairo migi è na shii wie rek ge ro, liingsed ne dun bo.”

<sup>49</sup> Isu ji yao ramuii shii, mua yao pha bran jia dumuii hò è wuii thog. Ai è Jairus shii yao, “Naro dimi ne iy dun ro. Masdo shii dinne muna diig aphid rabo.”

<sup>50</sup> Jishii Isu è nuii srane Jairus shii yao, “Arum rabo; migi now bie bo, chiih-è na dimi ne wie rey phro.”

<sup>51</sup> Ai è hò hà wuii thog mage shii, ai è Phithar, Jon, nane James chiih-è ani ro aphuii amuii shii noh ne iliing hà wuii srane gai hanyie shii ai rog shii awuii noh. <sup>52</sup> Thiichiih shii um pha branthek è ani Chiang shii choh ramuii, Isu è yao, “Achoh rabo, ani ne a-iy ro ai ne men bamuii ro!”

<sup>53</sup> Ithek è aishii siak, nyieliishii ithek ne thieg ai ne iyjong ro. <sup>54</sup> Jishii Isu è aishii awai wad shii giak srane ho mage, “Sieng mage bo, gu ani!” <sup>55</sup> Ai ro chai ne khid din srane thiichiih shii siangfad mage, chiih-è aishii chie pha nyie magunde phi mage bo è yao ne Isu è ithek shii yung. <sup>56</sup> Ai ro aphuii amuii ne wiengphleg dun, Jishii Isu è nathek shii yung, ithek shii nyie rey pha ji ne hanyie shii de ayao rabo.

## 9

### *Isu è snanyi samoythek shii thoh ge (Mth 10:5-15; Mrg 6:7-13)*

<sup>1</sup> Isu è snanyi samoythek shii ò ho srane ithek shii ibuii shii khia pha nane miiriie shii gang phi pha blu nane riichai phi. <sup>2</sup> Chiihphado ai è ithek shii Hamangkhang-aphuii pha Sajathua ji yua pha nane radpho shii gang rek pha thoh ge, <sup>3</sup> chiihphado ithek shii yao, “lumuii hà ithek nyie de ayie rabo: Thagieng de ayie, biiathek de ayie, michie de ayie, bang de ayie, chiih-è phadiig lai de ayiedang rabo. <sup>4</sup> Nathek shii khihà wie ho ruii, ji pha hò shii athoh sapho shii ne ithua jia shii rai bo; <sup>5</sup> Khihà magunde branthek è nathek shii wie aho arone, ji pha thawun thoh muii srane nathek lai pha nyiakphlab ji yi kham marui bo, ji ne ithek shii phriie phro.”

<sup>6</sup> Samoythek è thiichiih shii thoh marui srane thiigthek hà lua ne Mua Wie jithek yao ne zab pha branthek shii gang phi.

### *Herod ro anomuluii (Mth 14:1-12; Mrg 6:14-20)*

<sup>7</sup> Herod yi Galili shii bohkhoh pha ji ro, jithek rey pha ji zab yoi srane wiengphleg dun, nyieliene giak branthek è yao Jon Khowo ne idoh hò ne thog ro. <sup>8</sup> Gaithek è yao shii Elija ne dinne dong ro, chiih-è gaithek è yao buyo pha chaigthek ne idoh hò ne thog dinro. <sup>9</sup> Herod è yao, “Jon ro khrug

ne gu è tham sbang yi phro; jimagunde hì è yoi ramuii pha bran ji ne hanyie ga?" Chiuh-è ai ne Isu shii riig pha bidiang.

*Isu è bran itham guii shii chie yi*  
(Mth 14:13-21; Mrg 6:30-44; Jon 6:1-14)

<sup>10</sup> Guaphasamoythek è idoh dun thog srane ithek è nyie rek marui pha ji zab Isu shii yao. Ai è ithek shii awai rog noh srane Bethsaida pha thawun shii wuii thog.

<sup>11</sup> Ibrogthek è ji yoi srane ithek de ai rog shii luagieng. Ai è ithek shii wie ho srane, Hamangkhung-aphuii pha Sajathua ji yao srane hanyie è chid pho shii gang phi.

<sup>12</sup> Hasieng yi jao ne yem sha pha rek shii, airo snanyi Samoythek è aishii wuii srane yao, "Branthek shii thoh ge bo, nyieliieshii ithek ne nyawuii mua ne thiigthek nane raigthek shii shan ne michie nane men pha ithua nya doh mua phro, nyieliieshii hì pha ithua ne hanyie de oi ro."

<sup>13</sup> Jishii Isu è ithek shii yao, "Nawaithek è ithek shii chie pha phi bo." Ithek è chang, "Gathek zab shii ne iweb guii nane ù nyi um bie ro, na è gathek shii hì pha ibrogthek zab pha michie phog wuii bo è now bey?"

<sup>14</sup> (Thiichiih shii ne itham guii thog pha bran um.) Isu è awai samoythek shii yao, "ithek shii ibrog jia jia shii saguii rek ne dug yi bo."

<sup>15</sup> Chiiphado shii samoythek è ji è rek phi, <sup>16</sup> Isu è iweb guii nane ù nyi shii yi srane, Hamangkhung hà riig ne Hamangkhung-aphuii shii laso phi srane phed, chiuh-è awai samoythek shii phi ne branthek shii thang ba yi. <sup>17</sup> Ithek zab cho pha chie ched mage shii, chiuh-è nyie khe pha ji ne samoythek è sirid snanyi chiing.

*Phithar è Isu shii izai chak rog è yaothiak*  
(Mth 16:13-19; Mrg 8:27-29)

<sup>18</sup> Nai jia Isu è awai ji siaramuii shii, samoythek aishii wuii thog ruii. Isu è ithek shii sai, "Branthek è gu shii hanyie ro è yao lei?"

<sup>19</sup> Ithek è chang. "Giak branthek è na shii ne Jon Khowo ro è yao." Giak è na shii ne Elija ro è yao, "Giak è na shii ne buyo pha chaig jia ne hòì ne thog din ro è yao."

<sup>20</sup> Isu è ithek shii sai. "Chiiphado nathek ne gu shii hanyie ro è now ga?" Phithar è chang, "Na ne Hamangkhung-aphuii pha Masi ro."

*Isu è awairo diig nane iy pha Chiang ji yao*  
(Mth 16:20-28; Mrg 8:30; 9:1)

<sup>21</sup> Chiiphado Isu è ithek shii phrie ne giung srane yao, hì pha miyao ne hanyie shii de ayaodang rabo. <sup>22</sup> Ai è de ithek shii yao, "Bran Dufuii ne bajo diig rek srane dukhothek, boh phabithek nane Iphey yua pha masdothek è de snai muui phro. Aishii ne ua muui phro, jimagunde ai ne da-uom pha idoh shii ne hòì dìn ruii phro."

<sup>23</sup> Chiuh-è ai zabithek shii yao, hanyie de gu rog shii wuii pha now arone, ai ne awai shii bia chid phro, chiuh-è zab pha inai shii awairo bai ji han srane gu rog shii luagieng bo. <sup>24</sup> Hanyie è nawai sieng pha ji shii ragia rek pha now arone awairo chai ne san dun phro, jimagunde de hanyie è gu Chiang è awai shii san muui arone ai ne ragia rey ruii. <sup>25</sup> Ai è sohjambling shii mua srane awai shii san muui arone nyie phua mage phlei? Khuchung

magunde arey phro. <sup>26</sup> Bran hanyie yi gu shii wo srane gu miyao wo arone, Bran Dufui de awairo biisiie è wuii ruii shii chiih-è Aphuii pha biisiie nane so hamangkhiithek pha boh lubo è wuii ruii shii aishii de wo ruii phro. <sup>27</sup> Gu nathek shii izai yaodang phro, ichiih um pha giak brantheke de Hamangkhang-aphuii pha Sajathua ji adoh sapho shii ne a-iy ba phro.

*Isu ro siu lai dun*

*(Mth 17:1-8; Mrg 9:2-8)*

<sup>28</sup> Damiley pha idoh shii ai è jithek yao, Isu è Phithar, nane Jon, chiih-è Jems shii ai è noh srane phiingduii lakhung hà sia pha wuii dun. <sup>29</sup> Ai yi siaramuii shii, ai mizia ne yoh lai khlei dun, chiih-è airo yung de khlieng mo chuang dun. <sup>30</sup> Hamblo shii bran nyi yi ai rog shii mulo pha doh. Ai ne Moses nane Elija ro. <sup>31</sup> Hamangkhang pha biisiie è doh yi srane ai ne Jerusalem hà iy ne Hamangkhang-aphuii ro munow ji zab rek pha Isu shii muloramuii. <sup>32</sup> Phithar nane ai ijakthek yi men dun jimagunde ithek siangfad srane Isu shii riig shii biisiie nane bran nyi yi ai rog shii riu ne um pha doh. <sup>33</sup> Bran nyi ji è Isu shii thoh marui ne dun din dun shii, Phithar è aishii yao, “Masdo, Gethek ichiih shii um pha ji ne khama wie ro, gethek ne ichiih shii haliig thek uom rab pha ro, jia yi na shii, jia yi Moses shii, chiih-è jia yi Elija shii.” (Ai è de ji yi izai athieg mua ai è nyie yao pha ji ne.)

<sup>34</sup> Ai ji è yao ramuii shii, sakhamiing thab srane ithek ragia rog shii chiiig muii; chiih-è sakhamiing è aishii thab mage ne airo samoythek ne rum dun. <sup>35</sup> Goh jia yi sakhamiing è yao ruii, “Hi ne guro Dufui ro, gu mugua ne ruii ro, ji è aishii nuii bo!”

<sup>36</sup> Goh ji aro pha rey dun shii, thiisa hà Isu awai ji jia um bie. Samoythek è jithek zab aro pha rai muii srane, chiih-è ji pha ishak shii ithek è nyie doh pha ji hanyie shii de ayao.

*Isu è ibuii ragung thoh muii pha bufuii jia shii gang phi*

*(Mth 17:14-18; Mrg 9:14-27)*

<sup>37</sup> Ji pha thimiang ne Isu nane airo samoy uom yi phiing lakhung è thazam wuii thog shii, bran boh ibrogthek è Isu nane ithek shii si. <sup>38</sup> Bran jia yi ibrog è ziake mage, “Masdo! Gu na shii khung dang phro, gu dufuii shii riig mage bo guro dufuii ji jia bie ro!” <sup>39</sup> Ibuii ragung è aishii khud srane hamblo shii ziake ne awailum ne chiih srane chiihphado sem è imamiung khia; aishii ne bajo duhug phi ne ruii srane diig yi. <sup>40</sup> Gu è na samoythek shii khia phi bo è khung ne yao shii, jishii ithek è ne akhia mua phi ro.

<sup>41</sup> Isu è chang, “Nathek ne migi arek pho nane ichiiig pha brantheke ara! Gu nathek rog shii khama rai dam mage phlei?” Gu khama chiieng nathek shii zud dam phi phlei? Jishii ai è bran jishii yao, “Na dufuii shii tha hà yie mage bo.”

<sup>42</sup> Bufuii ji yi wuii mage shii, ibuii è aishii jog thoh srane aishii ne nyiak lakhung hà thud pha yi. Isu è ibuii ragung shii giung mage shii, ji pha bufuii ne gang rey dun, chiih-è ai aphuii shii idoh phi din muii. <sup>43</sup> Zab pha brantheke Hamangkhang-aphuii pha gang blu ji riig srane wiengphleg dun.

*Isu è awai Iy pha ji dinne yao*

*(Mth 17:22-23; Mrg 9:14-27)*

Awai samoythek shii yao, brantheke è Isu mirek pha jithek zab riig srane wiengphleg bamuii ro. <sup>44</sup> Gu è nathek shii nyie yao pha rek pha ji ne abia

rabo! Bran Dufuii shii ne bran blu shii phi muui ro. <sup>45</sup> Jishii samoythek è ji pha miyao ne agao mua, hì pha miyao yi ithek agao yi pha ithek è ug muui, chiih-è ithek ne rum srane hì pha miyao Chiang asai mua.

*Hanyie yi zab è boh ga*  
(Mth 18:1-5; Mrg 9:33-37)

<sup>46</sup> Hanyie yi zab è boh ga è sai ne samoythek awaithek chung khnaing rai. <sup>47</sup> Isu è ithek nyie now pha ji ne thieg srane, ji è ai è ani jia yi srane awai moe shii riu ba yi, <sup>48</sup> Chiih-è ithek shii yao, “Hanyie magunde hì pha ani shii gu beng è wie ho arone, ai gu shii de wie ho phro, chiih-è hanyie è gu shii wie ho arone, gu shii thoh ge pha ji shii de wie ho ro. Ji è nathek duchoi shii hanyie ai yi zab lu ga ai ne zab è boh ro.”

*Hanyie ithek shii gidieg arek pho ne ithek pha bran ro*  
(Mrg 9:38-40)

<sup>49</sup> Jon è Isu shii yao, “Masdo, gathek è bran de na beng è ibuiithek khiaramuui pha doh ro, chiih-è gathek è arek rabo è gak marui, nyieliieshii ai ne gethek rog pha bran asi ro.”

<sup>50</sup> “Aishii gak pha abidiang rabo,” Isu è Jon nane gai samoythek shii de yao, “Nyieliieshii hanyie è na shii gidieg arek pho ne nathek bran ro.”

*Samarithan thiigpho è Isu shii wie aho*

<sup>51</sup> Isu shii hamangkhung hà noh sha pha nui thog mage shii, Jerusalem hà wuii dang pha awai khani shii phak. <sup>52</sup> Ai è muaphothek shii awai ibi shii thoh srane Samaria thiig hà wuii ne zab khriig rek yi. <sup>53</sup> Jishii thiisa pha branthek è aishii wie aho, nyieliieshii ithek ne thieg ai ne Jerusalem hà wuii bie. <sup>54</sup> Airo samoythek Jems nane Jon è ji riig srane, ithek è yao, “Ithong, na ne ichid bey Hamangkhung è bai shii ho srane ithek shii hùb yi mage habey?”\*

<sup>55</sup> Isu è idoh rei srane ithek shii giung.†

<sup>56</sup> Chiihphado Isu nane samoythek gai thiig hà wuii marui.

*Isu rog shii lua mua pha ne hanyie ga*  
(Mth 8:19-22)

<sup>57</sup> Ithek yi awaithek lumuui hà luaramuui shii, bran jia è Isu shii yao, “Na khi hà lua magunde gu narog shii lua gieng pha ro.” <sup>58</sup> Isu è aishii yao, “Shaliiethek de icho um, chiih-è fuiithek shii de irungthek um, jimagunde Bran Dufuii shii ne thieng ne thung pha ithua de oi ro.”

<sup>59</sup> Isu è gai bran jishii yao, “Gu rog shii luagieng bo,” jimagunde ji pha bran è yao.

“Masdo, igobi gu shii hò hà idoh dun yi ne gu aphuii shii wieng bi yi bo.”

<sup>60</sup> Isu è chang, “Iy-iy shii awai iy-iy è wieng yi bo. Na ne wuii srane Hamangkhung-aphuii ro Sajathua jí yua bi bo.”

<sup>61</sup> Bran jia è de Isu shii yao, “Gu de nathek rog shii luagieng pha ro, Masdo; jimagunde igobi gu shii hò hà gui haliing pho shii de wie rai bo è yao pha thoh ge bo.”

---

**9:46** 9:46: Lug 22:24    **9:48** 9:48: Mth 10:40; Lug 10:16; Jon 13:20    **9:54** 9:54: 2Saj 1:9-16    \* **9:54** 9:54: giak jigizey shii umElija mirek duine.    † **9:55** 9:55: giak jigizey shii ne chodochiih-è yao, “na ne athieg khi è rek pha Ragung è khia na; Bran Dufuii ne tharothamang rai pha jishii srobro rek pha awuii, jishii ithek shii ragia rek phi.”    **9:61** 9:61: 1Saj 19:20

<sup>62</sup> Isu è aishii yao, “Hanyie magunde raig woi pha jakhokh shii wad kho srane idoh hà rai ne riig pho ne Hamangkhung-aphuii pha Sajathua jishii gu ne chid phro.”

## 10

### *Isu è samiley nyi shii fuang hà thoh ge*

<sup>1</sup> Jithek pha idoh shii Ithong è bran samiley nyi\* shii gua srane bijiu nyi nyi rek ne ai ibi shii awai wuii pha rek pha thawun nane ithua shii thoh ge. <sup>2</sup> Ai è ithek shii yao, yamiing ne bajo um ro, jishii khrab pha brapho ne iujia bie ro. Ji-è yamiing khrab pha thoh ge bo è yamiing pha muspho shii sia mage bo. <sup>3</sup> Wuii mage bo, gu ne nathek shii shiishaithek duiine shaluithek duchoi shii thoh ge phro. <sup>4</sup> Chiuh-è nathek bang chab pha biia, chiuh-è chayem pha buii, chiuh-è lakhia de ayie rabo, chiuh-è lumuii hà hanyie shii magunde wad khung ne yao pha athung rabo. <sup>5</sup> Khuchung magungde ithek hò jia shii khud dun arone igobi shii ji pha hò shii ne liijiing um bo è yao bi bo. <sup>6</sup> Chiuh-è thiisa liijiing um pha bran murai arone nathek liijiing khung ne phi pha ji ai rog shii rai dun phro; ji oi arone nathek shii gu miphi pha liijiing ji idoh yie din bo. <sup>7</sup> Chiuh-è nathek ji pha hò shii rai bo, chiuh-è ithek è nathek shii nyie phi pha ji chie ne niing ne rai bo, nyieliene blia rek pho shii ne awai blia pha riinang phi ruii phro. Hò hò lai ne alua rabo. <sup>8</sup> Chiuh-è khuchung magunde ithek bajarai jia hà wuii dun shii ithek è nathek shii wie ho ne nyie phi pha ji chie mage bo, <sup>9</sup> ji pha rajan hà rad pho shii gang phi bo, chiuh-è thiisa pha brantheek shii yao bo; Hamangkhung-aphuii pha Sajathua pha ishah ne nathek shii nui thog sha ruii ro. <sup>10</sup> Khuchung magunde bajarai jia hà wuii thog shii nathek shii wie aho arone nathek ne lumuii hà khia srane yao mage bo, <sup>11</sup> Chiuh-è nawaithek bajarai pha nyiakphlab nathek lai shii mieng ne kham pha ji de nawaithek shii mak rek phro, jishii nowbthan mage bo Hamangkhung-aphuii Sajathua pha ne ithek moe thog sha ruii ro! <sup>12</sup> Gu nathek shii yao, chua pha inai shii ne Hamangkhung-aphuii bushun ne ji pha thawun è wie ne Sodom pha thiig shii bajo rek phi ruii phro.

### *Migi anow pha thawuntheek*

*(Mth 11:20-24)*

<sup>13</sup> Khorazin nane Bethsaida! Hì è rek pha hì ne nathek shii khama duhug rey dun phro, ithek shii rek phi pha buangtheek ne Thaire nane Sidon hà rek phi arone ithek khuchung mujo thulo yung guii srane siphie shun ne awaithek layog è thadoh khidjong ro è doh yijong iwa. <sup>14</sup> Chua pha inai shii Hamangkhung-aphuii è ne ithek è de huak pha bushun ne Thaire nane Sidon shii phi ruii phro. <sup>15</sup> Chiuh-è Khaphernaum pho nathek, nathek ne Hamangkhung hà chiing yi pha now ne bey? Nathek ne thumluii hà fen muui phro!

<sup>16</sup> Isu è awai samoytheek shii yao, hanyie è ithek shii nuii pho ne, gu shii de nuii, hanyie è ithek shii snai arone gu shii de snai phro, chiuh-è hanyie è gu shii snai arone gu shii thoh ge pha ji shii snai phro.

### *Samiley è nyie bran idoh dun thog din*

\* **10:1** 10:1: samle è nyi; giak jigizey shii ne um samle. **10:2** 10:2: Mth 9:37,38 **10:3** 10:3: Mth 10:16 **10:4** 10:4-11: Mth 10:7-14; Mrg 6:8-11; Lug 9:3-5 **10:7** 10:7: 1Khor 9:14; 1Thi 5:18 **10:10** 10:10,11: Blk 13:51 **10:12** 10:12: Igo 19:24-28; Mth 11:24; Mth 10:15 **10:13** 10:13: Aij 23:1-18; Ezkh 26:1—28:26; Jol 3:4-8; Ams 1:9,10; Zekh 9:2-4 **10:15** 10:15: Aij 14:13-15 **10:16** 10:16: Mth 10:40; Mrg 9:37; Lug 9:48; Jon 13:20

17 Samiley è nyi<sup>†</sup> jithek yi bajo lubo srane idoh dun thog. “Chiih-è ithek è Ithong shii yao, ibuiithek de na beng è yung mage shii nui dang dun!”

18 Isu è ithek shii chang, “Sakhatong ne hamangkhung è haliao duiine bliak ne chiih pha doh muui ro. 19 Yoi mage bo, gu è nathek shii riichai phi ro, ji è ithek phamthek, nane ragungphiethék lakhung shii de nyalua mua phro, chiih-è shuang pha bluthek è de nyayang mua phro, chiih-è ithek shii nyie è achun phro. 20 Jishii ibuii ragungthék è ithek miyao nui rone asang chid rabo; ithek beng hamangkhung pha siog hà zey ne um rone jishii sang bo.”

### *Isu è sang*

(Mth 11:25-27; Mrg 13:16-17)

21 Ji pha ishak shii Isu yi Ragung So<sup>‡</sup> è ley srane lubo ne yao, Aphuii, Ithong hamangkhung nane sohnyiak pha! Gu na shii laso phi, nyieliieshii na è khani pho nane id pho è ug ne ruii pha ji ne adab pho shii phi. Aphuii, hi ne na è nyie khi-èrek chid pha ji rey ro.

22 “Gu Aphuii è zab manathek gu shii phijong ro. Chiih-è Dufuii shii hanyie de athieg ro Aphuii mithieg bie ro, chiih-è Aphuii shii de hanyie de athieg Dufuii mithieg bie ro, chiih-è ai è hanyie shii dong phi pha ne Dufuii è gua ne ruii.”

23 Chiihphado Isu è idoh rei srane samoythék shii ug ne yao, “Nathek hì pha muna riig ramuii pha hì ne nathek shii ne khama pha khirzey um ro! 24 Gu nathek shii yao phro chaigthék nane sajathek de nathek è doh pha ji ithek de riig yang jishii ithek ne ariig mua, chiih-è nathek nyie yoi pha ji ne ithek de yoi yang pha now ne de ithek ayoi mua.”

### *Wie Samarithan pha najang*

25 Iphey yao pha masdo jia wuii srane Isu shii ichiig sow pha bidiang. Ai è sai, “Masdo,” “Gu idang pha chai mua pha nyie rek chid phlei?”

26 Isu è aishii chang, “Jigigam shii nyie ro è yao lei? Chiih-è na ithek shii khi-èrek ne yua ne yao phlei?”

27 Ji pha bran è chang, “Hamangkhung-aphuii Ithong shii lubo è miie bo, chiih-è zab nawai ragung è, chiih-è zab pha nawai chua è, chiih-è zab pha nawai khani è; chiih-è ‘nawai shii miie rek pha duiine na hadung-haluii pho shii de miie rek bo.’ ”

28 Isu è ji pha bran jishii chang; “Na ne izai chak ro,” chiih-è “Na de ji duiine rek arone na ne sieng ne rai phro.”

29 Jishii Iphey yao pha masdo a-id pha duiine rek srane, Isu shii sai, “Gu hadung-haluii pho hanyie lei?”

30 Isu è chang, luang jia bran jia yi Jerusalem è buzam Jerikho hà wuiiramuii shii mugo pho è aishii zum srane ai manathek zab pha riao srane ikhlen rek ne iytho dang pha zuang ne thoh marui. 31 Ji-è rek pha ishak shii phabi de ji pha lumuii è luaramuii; jimagunde ai è ji pha bran shii doh mage ne, ai è ai moe pha yoh lumuii è lua marui. 32 Ji duiine lewi jia de ji pha lumuii è luaramuii shii ji pha bran shii riig srane, chiih-è yoh pha ithua è lua marui. 33 Jishii Samarithan jia de ji pha lumuii è lua ne ji pha

<sup>†</sup> 10:17 10:17: Samle è nyi; giak jigizey shii um samle (riig 1 shii) 10:19 10:19: Chng 91:13

<sup>‡</sup> 10:21 10:21: Ragung so re-è; giak jigizey shii um Ragung re-è; gai shii ne awai Ragung um. 10:22 10:22: Jon 3:35; Jon 10:15 10:25 10:25-28: Mth 22:35-40; Mrg 12:28-34 10:27 10:27: Iphy 6:5; Lew 19:18 10:28 10:28: Lew 18:5 10:33 10:33,34: 2Phal 28:15

bran moe shii wuii thog, chiih-è ai è aishii riig mage shii, ai lubu ne bushun now dun. <sup>34</sup> Ai è ji pha bran shii wuii srane thiiliie nane phuui è airo saduii shii shun srane yung rek ne jiang phi; chiihphado è ji pha bran shii awai bambao lakhung hà gow srane thung pha hò hà noh ne, aishii ragia rek phi. <sup>35</sup> Din pha inai shii ji pha bran è liiman pha simed nyi yie srane hò khan pha bran jishii phi marui srane yao. Aishii wie khagi rek bo ai è hò khan pha ji shii yao, chiih-è gu idoh hi pha lumuii hà de ruii shii, na è aishii khama pha phi pha ji gu na shii idoh phi din pha ro.

<sup>36</sup> Idohhè shii Isu è sai, “Na miigao è, ithek uom è hanyie yi mugo bran è zum ne ua mua pha airo hadung-haluii pho duiine hanyie munong phi lei?”

<sup>37</sup> Iphey yao pha masdo è chang, “hanyie è aishii bushun rek phi pha ji ro.” Isu è chang, “Chiihphado, na de, ji duiine rek bo.”

### *Isu è Martha nane Mery shii si wuii*

<sup>38</sup> Isu nane awai samoythek awaithek lumuii è lua ne ji pha thiig hà thog shii, hò-amuii Martha beng pha bimi ji è aishii hò hà wieho. <sup>39</sup> Aishii de Mery beng pha bumuii jia um, hanyie Ithong lai luui shii dug ne miyao nuii pha ji ro.

<sup>40</sup> Martha yi airo blia rek ba pha um pha ji è bajo diig now srane, ai è wuii thog srane yao, “Ithong na ne agayiig bey gu bumuii è zab pha blia ne gu rek bo ne ruii muui ro? Aishii yao ne gu rog shii nong gieng yi bo!”

<sup>41</sup> Ithong è aishii chang, “Martha, Martha! Na ne bajo shii monowthiig ne diig now ara ro, <sup>42</sup> Jishii jia hi ne mugak ro, Mery ne awairo zab è izai ji guajong ro, chiih-è hi ne ai ji è hanyie de ariao mua phro.”

## 11

### *Isu è misia shii yua (Mth 6:9-13; 7:7-11)*

<sup>1</sup> Nai jia Isu yi ithua jia shii misia sia. Ai misia sia ched shii, samoy jia è aishii yao, “Ithong, Jon è awai samoythek shii yua pha duiine, gathek shii de misia sia pha yua bo.”

<sup>2</sup> Isu è ithek shii yao, khuchung magunde nathek sia arone yao bo, Aphuii:

Naro so ibeng ne ilab rey bo,  
chiih-è naro Sajathua ne thog bo.

<sup>3</sup> Gathek shii chid pha michie inai tham ne phi bo.\*

<sup>4</sup> Gathek layog shii khung phi bo,  
gathek de ithek asi pha rek pha ji shii khung phi ro.  
Chiih-è gathek shii nang chua pha apho rabo.

<sup>5</sup> Isu awai samoythek shii yao, yangne nathek hanyie magunde jia è habiu duchoi hà wuii srane nawai ijak shii yao, gu ijak, iweb uom chei phi bo. <sup>6</sup> Gu ro ijak jia thiuh shii gu hò hà wuii thog ro, chiih-è aishii chie yi pha gu shii ne nyie de oi ro! <sup>7</sup> Chiih-è yang ne na ijak è hò iliing è chang mage, gu shii afak-afi arek rabo! Gu ro hò ne binjong muui ro, chiih-è gu ro ani nane gu ne biang hà sha ro. Gu asieng mua sha phro chiih-è gu na shii nyie de apho mua phro, <sup>8</sup> Wie, nyie chiihphado? Gu na shii yao na ijak sieng ne na shii iweb apho magunde na è awo dang pha lia ne rai arone, ji è ai sieng srane na nyie chid pha ji nyaphi ruii phro. <sup>9</sup> Chiih-è gu nathek shii yao: lia bo, ji arone na



mua ruii phro; sow bo ji arone doh ruii phro; habin shii chokh bo ji arone na shii hong ruii phro. <sup>10</sup> Chiih-è hanyie è lia jishii ne phi ruii phro, chiih-è hanyie è sow ji pha bran shii ne doh ruii phro; chok bo, chiih-è habin na shii hong phi phro. <sup>11</sup> Dufuii è ù lia shii pham phi pha aphuii ne nathek è hanyie ga? <sup>12</sup> Chiih-è ai kheri lia shii ragungphie phi ne bey? <sup>13</sup> Nathek awie pho rang de, nawaithek ani shii nyie khi-èrek wie phi chid phro è thieg. Aishii lia pho ne Hamangkhang Aphuii è ji è de muna Ragung So phi ruii phro!

*Isu nane Sakhathong*  
(Mth 12:22-30; Mrg 3:20-27)

<sup>14</sup> Isu è miyao ayao mua pha ibuii shii gieng; Chiihphado è ibuii fuang hà khia mage shii, ji pha bran ne jao ne yao mua. Ji-è thiichiih pha bran ibrogthek de wiengphleg dun, <sup>15</sup> Jishii thiichiih pha giak branthek è yao, “Hì ne Sakhathong ara, ai ne ibuii pha dumuii ara, hanyie è aishii blu phi ne gieng yi pha ji ara.”

<sup>16</sup> Giak è Isu shii ichiig sow pha now, ji è hì thek ne Hamangkhang-aphuii è rey pha blia chak rone gathek shii wiengphleg pha khagi rek bo. <sup>17</sup> Jishii Isu è ithek nyie now pha ji thieg srane, ai è ithek shii yao, hanyie soh shii ibrog yoh che rai ne gidieg rek arone ji pha thiig ne idang rey ne arai mua phro; chiih-è haliing chung mak rek rai arone ji de yoh rey dun phro. <sup>18</sup> Ji-è ibuii awaithek chung zab riichai shii ibrog rek ne gu rai arone, nyie khi-èrek ne hì rai mua phlei? Nathek ne yao, gu è ibuii khia pha hì ne Sakhathong è gu shii blu phi ne ji mikhia ro è yao. <sup>19</sup> Chiihphado gu ibuii shii fuang hà ji è rek ne gieng arone, nathek samoy pho yi khi-èrek ne gieng phlei? Chiih-è nawai samoy pho è hì asi ro è nya doh yi ro! <sup>20</sup> Asi gu è Hamangkhang-aphuii blu è ibuii shii gieng shii, hì è ne nathek shii doh yi phro Hamangkhang-aphuii Sajathua ne ithek shii wuijong ro.

<sup>21</sup> Bran bgang jia yi, awai rog shii miagiang khriig rek srane, awai hò khan ne rai arone, ai hò shii nyie um pha ji ragia rey phro. <sup>22</sup> Jishii ai è muna bran biigang jia è aishii mak jo srane ai è yang mua arone, muspho è luthong muii pha miagiang jithek ne ai è zab han srane awaithek chung ai è nyie goh pha ji thang rai phro. <sup>23</sup> Hanyie magunde gu rog shii asi pho ne izai gu shii gidieg rek ara ro; chiih-è hanyie yi gu rog shii nong ne akhrab gieng arone ai ne izai dayiingdayang rek ara.

*Ibuii ragung yi idoh dun thog din*  
(Mth 12:43-45)

<sup>24</sup> “Khuchung magungde ibuii ragung yi bran è fuang khia srane, igoh soh lakhung shii lua srane thung pha ithua so. Jishii jia de adoh sha arone. Awai è awai shii yao, ‘Gu ne gui hò hà idoh dun din sha pha ro.’ <sup>25</sup> Ji-è ai idoh dun srane riig shii hò ne so nane khriig um iang. <sup>26</sup> Chiihphado ai ne fuang hà wuii srane dinne yoh miley awai è de awiedang pha ragung noh ruii, chiih-è ithek ji hà dun srane rai gieng. Ji è jithek rek ched ne, ji pha bran ne igobi è de lahuak awie pha rey dun.”

*Zai sang*

<sup>27</sup> Isu è jithek yao ramuii shii, bran iphiing iliing è hò-amuii jia è aishii yao, “na shii giak ne na shii ram pha hò-amuii ne bajo khirzey ro!”

<sup>28</sup> Jishii Isu è chang, “Ji-è ne, hanyie è Hamangkhang-aphuii miyaogam yoi ne nuii pho ne khama sang ro!”

*Buang pha miyao ji nak*

*(Mth 12:38-42)*

<sup>29</sup> Bran brog yi Isu moe khrab ramuii shii, ai è yao, duchung pha brantheK ne bajo awiedang ara! Jona ne ithek ne buang pha blia nak ne rai. Jishii Jona ro buang pha blia ji doh bie yi ne gai ne ithek shii adoh yi phro. <sup>30</sup> Ji duiine chaig Jona ne Ninewe pha cheb ro, ji è Bran Dufuii ne duchung pha brantheK ro cheb ro. <sup>31</sup> Chiih-è chua pha inai shii sajamuii Sheba è riu ne ithek shii nin ruii phro, nyieliieshii ai ne Saja Solomon ro muyua wie ji nuui awai soh pha zab lumuii è wuii phro; ji è gu ithek shii yao ichiih shii ne nyie magunde um pha ji ne Solomon è de boh um ba ro. <sup>32</sup> Che pha idoh shii ne Ninewe pha brantheK è riu ne ithek shii the ruii phro, nyieliieshii ithek ne Jona muyua ji nuui srane awaithek layog è khidjong ro: Chiih-è gu ithek shii yao ichiih shii ne nyie magunde um pha ji ne Jona è de boh um ba ro!

*Siu pha muchuang*

*(Mth 5:15; 6:22-23)*

<sup>33</sup> Khuchung magungde muchuang yi siikhiiakhjam bucho hà chab ne ug srane aruii;† ji pha chiang shii muchuang ne bunthruak lakhung shii ruii ro, nyieliieshii hacho wuii pha brantheK shii sang doh yi chid. <sup>34</sup> Nathek mieg yi siu pha muchuang duiine ro. Nathek mieg yi sang doh shii, nathek siu shii de ley muchuang um ro; jimagunde nathek mieg yi awie arone, nathek siu de zab igiia ro. <sup>35</sup> Chiihphado khriig rab bo, nathek shii um pha muchuang ji igiia arey yi rabo! <sup>36</sup> Nathek siu shii muchuang ley um arone, nathek ne igiia rog oi sha phro, ji è zab sang rey dun, muchuang yi na lakhung shii khilieng mage shii na shii de chuang dun.

*Isu è Pharisithek nane iphey yua pha Masdothek shii the*

*(Mth 23:1-36; Mrg 12:38-40)*

<sup>37</sup> Isu ji è yao ched dang shii, Pharisithek è aishii ithek rog shii michie chie pha ho; ji è ai ne iliing hà wuii srane michie chie pha dug. <sup>38</sup> Pharisithek è Isu ne wad achun pha michie chie pha ji riig ne wiengphleg dun.

<sup>39</sup> Ji-è Ithong è ithek shii yao, chiihphado, duchung pha Pharisithek nathek ne gog nane shiikhiia shii ne fuang è wie shud bie ara, jimagunde nathek ne iliing shii ne ley awie pha nane lijieg um ro. <sup>40</sup> Bi-iethek! Hamangkhung-aphuii è fuang shii rab bie ne iliing shii arab bey? <sup>41</sup> Jishii nathek ro shiikhiia nane gog shii nyie um pha ji ne dushothek shii phi bo, chiih-è nathek shii zab so rey phro.

<sup>42</sup> Pharisithek nathek ne khama diig phro! Nathek ne marey pha ishak shii, buzo nane phadina ne jia sua Hamangkhung-aphuii shii phi, jishii nathek ne izai nane Hamangkhung-aphuii shii miie rek pha jithek shii ne snai muui. Gai shii asnai pha, hi ne nathek dab bo.

<sup>43</sup> “Pharisithek nathek ne khama diig phro! Nathek ne Jewthek misiahò hà de ithua wie shii ong ne bajarai hà de ithek shii wad khung ne ilab phi bo è now.” <sup>44</sup> Nathek shii ne khama diig phro! Nathek ne brantheK cheb arek ba pha hanyie è athieg wieng lakhung shii lua pha duiine ro.

<sup>45</sup> Ji-è yao ramuii shii Iphey yao pha masdo jia è Isu shii yao, “Masdo, na nyie yao pha ji ne, na ne gathek shii makhakriing ara!”

<sup>46</sup> Isu è chang, Iphey yao pho nathek shii de khama diig phro! Nyieliieshii nathek ne brantheek phadung shii ithek è ahan mua pha miihan han yi, jishii nawaithek ne ragia rek gieng pha ji pha mahan shii wad rang de akhoh gieng. <sup>47</sup> Nathek shii de khama diig phro! Nyieliieshii nathek è nawaithek riing mu-ua pha chaigtheek shii ne wieng de bajo wie rab phi. <sup>48</sup> Nawaithek ne thieg, nathek riing è nyie suruii rek pha ji de nathek è khriig now, nathek è chaigtheek shii ua muui chiih-è nathek è ithek ro wieng rab phi.

<sup>49</sup> Hi pha Chiang è Hamangkhung-aphuii khani è yao, Gu chaigtheek nane muaphothek shii thoh ge, ithek è giak shii ua srane, chiih-è giak shii diigchiao phi. <sup>50</sup> Sohjambling rab dang pha ishak è yie ne chaigtheek shii ua pha Chiang è duchung pha bran nathek shii ligo phi ruii phro, <sup>51</sup> Abel shii ua pha ji è yi ne sraibao nane So Ithua pha duchoi shii ua muui pha Zekharria ishak thog dang pha. Gu nathek shii yao, nathek Chiang ne duchung pha bran nathek ligo phi pha ro!

<sup>52</sup> Iphey yao pho nathek ne khama diig phro! Nathek ne khani hò pha habin hong pha ziu ne yie ne ruii; chiih-è nawaithek de iliing hà ne awuii, chiih-è ithek ne gai iliing hà wuii pha bidiang pho shii de gak muui.

<sup>53</sup> Isu è ji pha ithua thoh marui srane dun shii, Iphey yao pha masdo nane Pharisithek è aishii bajo awie dang pha rek srane, bajo manathek pha miyao sai. <sup>54</sup> Ai ne suruii yao gua ino ne ithek è ichiig sow ne aishii zum pha bidiang.

## 12

### *Lawasdaithek shii phriie*

*(Mth 10:26-27)*

<sup>1</sup> Itham bran yi òjia shii khrab thog mage shii, ithek ne awaithek chung thum rai dun. Jishii igobi Isu è awai samoy shii yao, Pharisithek ro awie pha muphak ji è nawaithek shii ragia rek bo, gu è yao pha miyao jine ithek ro lubo siie ro. <sup>2</sup> Nyie magunde cheg ne ruii pha ji ne acheg mua phro, chiih-è nyie magunde ug ne ruii pha ji ne thieg dun phro. <sup>3</sup> Chiihphado, nyie magunde na è igiia hà yao ji ne isang moe hà yoi dun phro, chiih-è nyie magunde na è ùgud bin srane ji hà suak ne yao magunde hò lakhung pha zak hà ziaak dun phro.

### *Hanyie shii rum chid*

*(Mth 10:28-31)*

<sup>4</sup> Gu ijaktheek, gu nathek shii yao, hanyie è na siu shii ua bie pha ji shii ne arum rabo jimagunde dinne nyie de buii arek mua phro. <sup>5</sup> Gu nathek shii riig yi hanyie shii rum chid: ua pha idoh, hanyie, shii thumluui hà fen pha blu um pha, Hamangkhung-aphuii shii rum bo. Gu shii migi now bo, nathek rum chid pha ne ai jia ro!

<sup>6</sup> “Adili nyi shii fuisrai guii aliu bey? Thiinh rang de Hamangkhung-aphuii è fuisrai jia shii ableng ba ro.” <sup>7</sup> Nathek khrug pha khaziang rang de zab tham ne ruii phro, ji è nathek ne arum chid rabo. Nathek ne fuui è de bajo igong ro!

### *Nuii pha nane Masi shii snai*

*(Mth 10:32-33; 12:32; 10:19-20)*

<sup>8</sup> Gu ithek shii ji yao hanyie magunde bran moe shii yaodang arone ai ne gu rog è chak ara, ji duiine Bran Dufuii de aishii Hamangkhung-aphuii hamangkhliie moe shii è rek phi phro. <sup>9</sup> Jishii hanyie è brantheek moe shii gu shii snai arone, Bran Dufuii è de Hamangkhung-aphuii hamangkhliie moe shii aishii de snai ruii phro.

<sup>10</sup> Hanyie jia è de Bran Dufuii shii buii miyaogam yao magunde nya khung phi phro; jimagunde hanyie è Ragung So shii buii yao arone, khuchung de akhung phi ruii phro. <sup>11</sup> Khuchung magungde ithek è nathek shii Jewtheek misiahò hà nane bohkhoh pha badri, hà noh pha bidiang magunde, nawaithek shii ragia khi-èrek chid chiih-è nathek nyie yao chid pha ji ne munow adiig chid rabo. <sup>12</sup> Ji è rek pha ishak shii nathek nyie yao chid pha ji ne Ragung So è nyayua ruii phro.

*Bukho jia chiih-è bi-è pha najang*

<sup>13</sup> Bran jia yi ibrog iliing è Isu shii yao, “Masdo” Gu khuii shii yao ne aphuii mutho marui pha nuruii ji gu shii thang sha noh bo.

<sup>14</sup> Isu è aishii chang, “Gu ijak, na sa duchoi shii nuruii thang pha chiih-è che phi pha rangsua ne gu shii hanyie mipphi lei?”

<sup>15</sup> Chiih-è ai zab thek shii yao, nowbthan ne zab pha giichak pha ji è nawaithek shii ragia rek bo; nyieliieshii bran ro izai chai ne awai mana nane bukho è arab ro. Ai khama pha bukho magunde nyie achun phro.

<sup>16</sup> Chiihphado Isu ji pha najang è shan ne yao: Luang jia bukho bran jia ro soh shii wie iwoi rey. <sup>17</sup> Ai jao ne awailum ne now, gu shii ne iwoithek ruii pha ithua de oi, ji è gu ne nyie rek sha? <sup>18</sup> Hi ne gu nyie rek sha; ai è awai shii yao, gu ne thazan yi chuak ne boh jia rung din srane, garo nying nane zab pha mana yi jishii chab ne ruii chid. <sup>19</sup> Chiihphado gu ne gui shii yao, khirzey bran! Na shii ne idam bajo thog pha nyie chid pha de zab mana na shii um, ji è nane bajo idam liijiing è sieng ne, chie ne, niing ne, lubo rek phro! <sup>20</sup> Jishii Hamangkhung-aphuii è aishii yao, na ne bi-è ro! Hi pha habiu shii na ne nawai sieng pha ji ne thoh chid phro; ji è na è nawai shii ruii pha mana hi thek ne hanyie mua phlei? <sup>21</sup> Chiihphado Isu è yao, “Ji duiine ji pha bran de awai shii bajo bukho rab ne ruii jishii Hamangkhung-aphuii mieg moe hà ne bukho asi ro.”

*Hamangkhung-aphuii shii migi now bo*

*(Mth 6:25-34)*

<sup>22</sup> Chiihphado Isu è awai samoytheek shii yao, chiih-è gu nathek shii yao nathek sieng ne rai pha michie chid pha chiih-è nathek siu shii guii pha yungtheek shii sam diig anow chid rabo. <sup>23</sup> Chai ne michie re-è de bajo mugak ba ro, chiih-è siu ne yung è de bajo mugak ba ro. <sup>24</sup> Amiiethek shii riig mage bo: Ithek ne iriiethek de ahai chiih-è yamiing de akhrab; ithek shii chab ne ruii pha ugud nane thazan de oi; jishii Hamangkhung-aphuii è ithek shii phi! Nathek ne fuii è de bajo mugak ba ro! <sup>25</sup> Ji è nathek ne hi thek samdiig srane nawai sieng pha phiang\* nyarek mua ne bey! <sup>26</sup> Nathek ne ididuii shii rang de khriig arek mua shii, nyie um ne nathek gai muna shii sam diig phlei? <sup>27</sup> Riig mage bo nyie khi-èrek ne jabiiing pha ibuathek rang sieng khlei: ithek ne blii de arek chiih-è awaithek ro yung de arab. Ji-è gu nathek shii yao saja Solomon ro khama pha nuruii pha yung khie um magunde jishii ibuathek

nyama khie oi ro. <sup>28</sup> Hi ne saing shii yung guii phi pha Hamangkuhng-aphuii ro hì pha saing ne sudoh ichiih shii um chiih-è thimiang ne shong ne, siphie bai hà fu muui. Ji-è ai ne ithek zab shii ai è de lahuak ne yung aguii phi habey? Nathek shii ne migi lu um bie ara.

<sup>29</sup> Ji-è nathek ne idang ne nyie chie nyie niing pha jithek shii sam adiig chid rabo. <sup>30</sup> (Ichiih sohjambling phothek Hamangkuhng-aphuii shii athieg pho ne hì pha mana shii munowthiig.) Nathek aphuii ne nathek hì è chid phro è thieg phro. <sup>31</sup> Ji phachiang è, airo Sajathua pha ji shii sam diig now bo, chiih-è ai ne na shii jithek phi ruii phro.

*Hamangkuhng hà bukho*  
(Mth 6:19-21)

<sup>32</sup> Arum chid rabo, guro lu ibrog, nathek Aphuii è nyu ne Sajathua ne nathek shii phi ro. <sup>33</sup> Nathek shii nuruii um pha ji zab liu srane ji pha bang yi dusho shii phi bo. Khuchung magunde amua pha nuruii baneb jia nawai shii khriig rab ne ruii bo, chiih-è naro nuruii ne Hamangkuhng hà khrab ne ruii bo, thiisa hà nathek è de lu arek phro, nyieliieshii mugo phothek de ayie mua phro, chiih-è dakhyem è de awie pha arek mua phro. <sup>34</sup> Khi hà nathek ro nuruii um lei ne nathek ro lubu de idang ji hà um phro.

*Gayiig pha khiao jia*

<sup>35</sup> Hanyie magunde wuii ruii shii blia rek pha yung guii ne chiih-è naro ichuangthek chuang ne ruii bo. <sup>36</sup> Khiao duine awai ithong shii phi pha michie è khuchung idoh dun ruii pha ji khan ne habin chokh ruii shii wuii srane kthiie habin hong phi. <sup>37</sup> Khinyama sang phro ithek shii Ithong è idoh dun ne riig shii khiao ithek ne khriig sieng ne rek iang pha doh yi ne! Gu ithek shii yao, ai è awai shungkho than srane ithek shii dug yi pha yao phro, chiih-è ithek shii chie yi phro. <sup>38</sup> Habiü pha duchoi magunde chiih-è idoh hà dun magunde khriig rek iang pha doh arone khama sang phro! <sup>39</sup> Chiih-è nathek hì de khriig thieg bo, mugo pho khuchung wuii ruii pha ishak ji yi hò muspho è thieg arone, ai ne mugo pho shii awai hò amua yi phro. <sup>40</sup> Chiih-è ithek, wie, è saro iang bo, nyieliieshii ithek è aishii aluthong pha ishak shii Bran Dufuii ne wuii ruii phro.

*Migi now pha nane migi anow pha khiao*  
(Mth 24:45-51)

<sup>41</sup> Phithar è sai, "Ithong, hì pha najang yi gathek shii thoh ne yao ne ba, chiih-è zab shii yao ne bey?"

<sup>42</sup> Ithong è chang, chiihphado, hanyie, yi wie nane izai khiao ga? Ai ne chiihphado awai ithong è aishii dumuii rek ne, hò gayiig pha chiih-è gai khiao ithek Chiang pha michie khriig ishak shii dong phi. <sup>43</sup> Ithong hò hà dun thog ne riig shii ji duine rek iang pha doh arone ji pha khiao shii ne bajo sang ruii phro. <sup>44</sup> Ji-è, gu nathek shii yao, ji è rek pha khiao shii ne ithong è awai nuruii shii dumuii rab ne ruii muui phro. <sup>45</sup> Jishii ji pha khiao ji è awai shii yao, airo ithong ne idoh dun pha bajo chia iwa inow srane gai khiao hò-aphuii thek shii nane hò-amuii thek shii zuang srane niing thiig ne rai arone, <sup>46</sup> chiihphado khiaothek è aishii aluthong pha chiih-è ji pha ishak ithek è a-ìd shii nai jia Ithong idoh de thog srane, ji pha khiao jishii ne dumdum<sup>†</sup> tham srane miyao anuii pha rek pho rog shii fen mua. <sup>47</sup> Khiaothek shii masdo è

nyie rek bo ino pha ji id pho ne awaithek shii khriig arek phi arone, jishii ne ithek rog shii bajo zuang phro. <sup>48</sup> Jishii ithong è nyie chiid pha ji khiao hanyie è athieg ba arone, chiih-è thuh midijia zuang sapho rek magunde iu zuang bie yi pha ro. Bajo phi ne ruii pha bran shii bajo chid din ruii phro, bajo phi ne ruii pho shii bajo lia ruii phro.

*Isu ne che rek wuii phro*  
(Mth 10:34-36)

<sup>49</sup> Gu thiwing ne sohnyiak shii bai fuii wuii phro, chiih-è gu miiyang ji ne hùb pha jao ro! <sup>50</sup> Gu shii khowo mua ba pha um, chiih-è gu ji ajong sapho shii ne khama diig shii ro! <sup>51</sup> Gu ichiih sohjambling shii liijjing phi wuii phro ithek inow ne bey? Asi, liijjing asi, gu che pha wuii phro. <sup>52</sup> Sudoh è thiwing haliing shii bran guii yi che ruii phro, bran uom è bran nyie shii gidieg rek ruii phro chiih-è nyi è uom shii gidieg rek ruii phro. <sup>53</sup> Aphuii è dufuii shii gidieg rek ruii phro, chiih-è dufuii è aphuii shii gidieg rek ruii phro; amuii è dimi shii, chiih-è dimi è amuii shii gidieg rek ruii phro; khiing è icho shii chiih-è icho è khiing shii gidieg rek ruii phro.

*Aishii thieg bo*  
(Mth 16:2-3)

<sup>54</sup> Isu è brantheek shii de yao, “Nathek sakhamiing shii hanaiyem bsa è rek ruii pha doh mage shii, nathek ji riig srane yao haphie phie sharuii ro è yao shii haphie phie ruii. <sup>55</sup> Chiih-è nathek khuchung magunde hanai chiu è hasam sam ruii pha than mage shii nathek è yao ijieg rey sha ruii ro, chiih-è ji rey. <sup>56</sup> Lawas dai! Nathek sohnyiak nane hamangkhang shii rang thieg mua shii; ji arone nyie rek ne nathek duchung shii ishak ji agao mua lei?”

*Nawairo gidiegpho è khriig rek bo*

<sup>57</sup> “Nathek nawaithek shii izai ji rek pha nyie rek ne achua lei? <sup>58</sup> Yang ne ithek shii nawaithek gidieg è gui rai pha miyao yie ne wuii ruii arone nawaithek rek mua pha ji rek srane chua bsa hà anow ba pha ibi shii lumuii hà nawaithek miyao ò rai pha rek bo. Ji asi shii ne ai è na thek shii chua pho hà noh srane, chiih-è chua pho è siphahi shii phi mua, chiih-è siphahi thek è phatheg hà chab muii. <sup>59</sup> Gu nathek shii yao, nathek è bang apho sapho shii ne na ne thiisa phatheg hà rai dun phro.”

## 13

*Nawaithek layog nane iy pha ji è khid bo*

<sup>1</sup> Ji pha ishak shii giak bran thiisa hà um pho è Isu shii yao Galilean phothek è Hamangkhang-aphuii shii mizid zid pha ishak shii Philath è ithek shii ua muii. <sup>2</sup> Isu è ithek shii chang, nyieliieshii Galileantheek shii ji è rek ne ua muii shii, nathek è inow ne doh bey? Nathek ne gai Galileantheek è de bajo awie pha layog rek ro? <sup>3</sup> Khuchung magunde de asi phro! Chiih-è gu nathek shii yao phro nawaithek layog è idoh akhid arone, nathek shii rek pha duiine nathek de zab iy ruii phro. <sup>4</sup> Siloam shii miyao heg cho srane bran snamileo iy dun pho jishii nyie khi-èrek now lei? Nathek ne inow bey? Nathek ne Jerusalem pha zab pha bran è buii ro inow bey? <sup>5</sup> Khuchung magunde asi ro! Gu nathek shii yaodang phro nsthek è nawaithek layog è akhid sapho shii ne, ithek shii rek pha duiine nathek zab iy ruii phro.

### *Iwoi awoi pha hing muui pha najang*

<sup>6</sup> Chiiphado shii Isu è ithek shii hì pha najang yao: Luang jia shii bran jia è hing muui shii awai raig shii hai. Ai wuii srane ji pha hing muui shii riig shii nyie de awoi iang. <sup>7</sup> Jishii ai è awai raig riig pha bran jishii yao, riig mage bo, gu dam uom è hì pha hing muui shii iphem iwoi sow wuii shii igam jia de adoh ro, aishii chiiegmuui bo! Nyie rek ne nyiak shii thalui sieng ne rai yi phlei? <sup>8</sup> Jishii raig riig pho è chang Masdo, brai yi bo dinne idam jia gu hì pha hing khiing shii wie jam chog srane rawo phi pha ro. <sup>9</sup> Chiiphado è hì pha hing muui è iwoi wie woi ruii arone wie ro; ji asi arone, na nya chieg muui bo.

### *Jewish Thung pha Inai shii Isu è ukhu-òg hò-amuii jia shii gang phi*

<sup>10</sup> Jewish Thung pha Inai jia shii Isu è jewish misiahò hà yao ramuii. <sup>11</sup> Hò-amuii jia yi awie pha ragung thoh ne dam snamiliao mucho è rad ne ai yi bam srane khuchung de miang arek mua. <sup>12</sup> Isu è aishii doh mage ne, ai è aishii ho, Hò-amuii, nane nawai murad ji è wie rey saro! <sup>13</sup> Ai è awai wad ai lakhung ruii mage shii, ai yi khthiie laziung miang riu srane Hamangkhung-aphuii shii laso phi.

<sup>14</sup> Jewis misiahò pha dumuii ji è Isu ne Jewish Thung pha Inai shii gang phi pha ji riig srane lijieg, ji è ai è yao srane brantheek shii yao, “Gethek shii ne blia rek pha dariig um ro; ji è ji pha naishii wuii ne gang nya rek phi bo, jimagunde Jewish Thung pha Inai shii arek rabo!”

<sup>15</sup> Ithong è ithek shii chang, “Lawas dai ithek! Nathek è hanyie magunde nawaithek rawoi nane bambao shii Jewish Thung pha Inai shii de kho niing yi pha se ne anow bey? <sup>16</sup> Thiichiih shii um pha ji ne Abraham pha riing ro, ibuii è aishii ne dam snamileo è phang ne ruii mua; ji è aishii ne thung pha inai idoh shii gang arek mua ne bey?” <sup>17</sup> Ai muchang ji è airo shuang pho ne awailum ne biwo rey dun, ji pha ishak shii brantheek ne Isu mirek pha buang pha blia jishii riig ne sang dun.

### *Danaro iriie pha najang*

*(Mth 13:31-32; Mrg 4:30-32)*

<sup>18</sup> Isu è sai, “Hamangkhung-aphuii pha Sajathua pha ji ne khi duiine lei? Gu ne nyie è aishii doh ne yao sha pha lei? <sup>19</sup> Hì ne ji duiine ro. Bran jia è danaro iriie yie srane raig shii wey pha duiine ro. Misieng yi sieng srane hing rey, chiih-è fuithek de airo idiphak shii irung rak phro.”

### *Phiia pha najang*

*(Mth 13:33)*

<sup>20</sup> Din ne Isu è sai, Hamangkhung-aphuii pha Sajathua shii gu nyie khi-èrek doh ne yao sha pha lei? <sup>21</sup> Hì ne ji duiine ro. Hò-amuii jia è phiia yi srane jariie boh miih shii lao shii zab phiia rey dun.

### *Habin khog*

*(Mth 7:13,14,21-23)*

<sup>22</sup> Isu thiigtheek shii nane thawuntheek duchoi è wuii srane brantheek shii yao ne Jerusalem hà rai ne wuii pha saro. <sup>23</sup> Bran jia è aishii sai, “Masdo, bran lu shii ragia rey bie habey?”

Isu è ithek shii chang, <sup>24</sup> “Nathek ne wie rek srane habin khog ji è lua pha rek bo, nyieliieshii bajo brantheek ne iliing hà wuii pha bidiang dang ruii phro, jimagunde awuii mua phro. <sup>25</sup> Hò pha Ithong è jai srane habin

bin muui phro; chiihphado nathek è fuang hà riu srane habin shii chokh ne yao ruui phro, ‘Masdo!’ Gathek shii de hò hong phi bo, ai è nathek shii chang ruui, ‘Gu nathek shii athieg ro nathek ne khi è wuii rai lei ne!’<sup>26</sup> Chiihphado nathek è chang ruui, ‘gathek è de narog shii chie niing gieng phro; na è gathek thawun shii gathek shii yua ro!’<sup>27</sup> Jishii de dinne ai yao ruui, gu ne athieg ro nathek khi-è wuii rai lei ne. Ichiih gu è dun bo, zab awie pha bran nathek.<sup>28</sup> Nathek shii ne fuang hà fen mage shii nathek ne Abraham, Isakh, Jakhob, chiih-è zab pha chaigthek shii Hamangkhung-aphuui pha Sajathua pha ji hà doh mage shii nathek ne khama choh srane nawaithek snying khriig ruui phro!<sup>29</sup> Brantheke ne bichiu nane niigo, chiih-è hakhoi nane hayang è wuii srane Hamangkhung-aphuui pha Sajathua shii dug ne michie chie ruui phro.<sup>30</sup> Chiihphado è thiih shii hanyie yi idoh lei ne ji ne ibi rey phro, chiih-è thiih shii hanyie yi ibi lei ne ji ne idoh rey ruui phro.”

*Isu è Jerusalem shii miie  
(Mth 23:37-39)*

<sup>31</sup> Ji-èrek pha ishak shii giak Pharisithek è Isu shii wuii srane aishii yao, “Na ne ichiih-è gai ithua hà dun marui bo, nyieliieshii Herod è na shii ne ua pha rek muui ro.”

<sup>32</sup> Isu è ithek shii chang, wuii srane ji pha sulgud shii yao mage bo: Gu ibuiithek shii fuang khia ne sudoh nane thimiang shii gang rek ba phi phro, chiih-è da-uom shii gui bliajong ba phro:<sup>33</sup> Sudoh, thimiang, chiih-è budoh shii de gu ne lua ba pha um ro; chaig shii ne Jerusalem è gai ithua hà ua pha ji ne arey mua phro.

<sup>34</sup> Jerusalem, Jerusalem! Nathek ne chaigthek shii de ua muui, chiih-è Hamangkhung-aphuui è thoh ge pha muapothek shii de nathek è lubao chao! Gu khama ishak nathek shii de khemuii è awai aniphiing shii iyig iliing hà khrab ne ruui pha duiine nathek ro zab pha bran shii de gui wad ruui ne gung phi pha now shii, jimagunde nathek è gu shii arek yi.<sup>35</sup> Chiih-è nathek ro Misiàhò ne isloi rey dun phro. Gu nathek shii yao, hanyie yi Ithong beng wuii pho ne Hamangkhung pha khirzey phi bo è yao pha ishak athog sapho shii ne nathek gu shii dinne khuchung de adoh phro.

## 14

*Isu è bran riie shii gang phi*

<sup>1</sup> Luang jia Jewsih Thung pha inai shii Isu michie chie pha Pharisithek pha dumuii jia hò hà wuii dun; brantheke è Isu shii bajo wie è riig ne rai.<sup>2</sup> Lai wad phieng ne rad pha bran jia Isu shii wuii thog,<sup>3</sup> chiih-è Isu è Pharisithek shii nane Iphey pha masdothek shii sai, “Jewish thung pha nai shii gethek Iphey shii wie nyarek mua ne ba asi arek mua ne bey?”

<sup>4</sup> Jishii ithek è nyie de ayao, Isu è ji pha bran jishii noh srane aishii gang phi, chiih-è aishii thoh ge.<sup>5</sup> Chiihphado è ai ithek shii yao, “Nathek de nawaithek dufuii magunde chiih-è nathek rawoi magunde Jewish Thung pha Inai shii khabiing hà chiih dun arone nathek khthiie fuang akhia phi habey?”

<sup>6</sup> Jishii ithek è ji è sai pha ji shii nyie de achang muluii.



### *Jum nane ilab*

<sup>7</sup> Isu è riig shii giak biwenthek ne ithua wie shii gua ne dug, ji è ai ji pha najang è nathek zab shii yao: <sup>8</sup> khuchung magungde ithek è nathek shii phiyiy pha michie shii ho ruii arone nathek ithua wie hà gua ne adug bi rabo. Nathek è de bajo mugak pha bran shii de ho pha de um phro, <sup>9</sup> chiih-è nathek shii ho pha bran è wuii srane yao ruii, hì pha ithua hì ne aishii dug yi bo! Chiihphado ji è yao shii nathek ne bajo wo srane zab è ìu pha ithua shii dug chid pha rey ruii phro.

<sup>10</sup> Ji-è khuchung magunde nathek shii ho ruii arone, wuii srane zab è idoh pha ithua shii dug bi bo, ji arone nathek shii ho pha muspho è nathek shii yao ruii, “Gu ijakthek isa lakhung pha ithua wie hà wuii ne dug bo. Chiihphado nathek shii zab pha biwen moe shii ilab rey ruii phro. <sup>11</sup> Hanyie magunde awai shii boh rab arone, jishii ne ìu rab ruii phro, chiih-è hanyie magunde ìu rab ne rai arone, jishii ne boh rab phi phro.”

<sup>12</sup> Chiihphado è Isu è aishii ho pha ji shii yao, “khuchung magunde na è luthua nane michie phi shii, nawaithek ro khuiinothek ijak, siang, hadung-haluu pha bukhothek shii aho rabo ithek de na shii idoh ho dinne phi ruii phro. <sup>13</sup> Khuchung magungde michie phi arone, dusho, khu-òg, laikhi-èg nane miegthi thek shii phi bo, <sup>14</sup> chiih-è ithek shii khirzey mua ruii phro, nyeliieshii ithek ne na shii idoh aphi mua din phro. Bran Wie è iy ne hòi pha naishii Hamangkhung-aphuii è idoh phi ruii phro.”

### *Boh michie pha najang* (Mth 22:1-10)

<sup>15</sup> Bran jia yi thiibliie shii dug srane ji pha miyao ji nuii ramuii shii, ai è Isu shii yao, “Hamangkhung-aphuii pha Sajathua pha michie shii dug pho ne khama sang phro!”

<sup>16</sup> Isu è ji pha bran jishii yao, “Bran jia è michie bajo boh phi ramuii shii ai è bran bajothek shii ho. <sup>17</sup> Michie chie pha ishak rey mage shii, zab khriig rey sha rone biwenthek shii, ‘Thawuii sha bo, è ho pha awai khiaothek shii thoh ge. <sup>18</sup> Jishii ithek zab jao ne jia pha idoh shii jia è wad khung ne yao, igobi pha ji è khiao jishii yao gu ne raig phegjong muii ro, chiih-è gu ne wuii srane raig ji riig pha um ro; chiih-è gu è khung hì nuii dang bo.’ <sup>19</sup> Gai jia è de yao, gu è de rawoi idiib guii phegjong muii ro ji è gu ne ithek shii fuang gieng pha ithek shii khi-èrek ne woi pha ji yua pha um ro; gu è khung ji nuii dang phi bo. <sup>20</sup> Gai jia è de yao, gu ne yiy iwo yie dang ba phro, chiih-è ji pha Chiang è gu de awuii mua phro. <sup>21</sup> Khiao ji è idoh dun srane zab awai ithong shii yao. Ithong ji è bajo lijieg srane awai khiao jishii yao, ‘kththie thawun pha lumuii nane ikhi-èg hà wuii srane dusho shii, phadung khbam shii, miegthi nane laikhi-ègthek shii ho ne noh ruii bo.’ <sup>22</sup> Achia dang shii khiao ji è yao, na muyung ji duiine gu è noh thog ro, jimagunde thiisa hà ne ùgud oi sha ro. <sup>23</sup> Ji-è dinne ithong è khiao jishii yao, ‘Hò ji ley rey yi pha soh pha zab lumuii hà wuii srane branthek shii ho mage bo. <sup>24</sup> Gu nathek shii zab yao ji è rek ne ho phothek shii ne hanyie jia shii de gu michie achai yi phro!’ ”

### *Samoy rek pha igong* (Mth 10:37-38)

<sup>25</sup> Luang jia shii ibrog brantheek è Isu rog shii lua gieng ramuii shii, ai è idoh rei sra ne ithek shii yao, <sup>26</sup> hanyie magunde gu shii wuii pho ne gu è de bajo awai aphuii amuii, yiy duii, khuiinothek, bumuii nane awai shii miie ne rai pho ne guro samoy arey mua phro. <sup>27</sup> Hanyie è magunde ithek è jia yi awairo bai han ne chiihphado gu shii awuii sapho shii ne guro samoy arey mua phro.

<sup>28</sup> Hanyie è magunde hò boh rung pha now arone arung ba pha ibi shii dug srane hì pha blia hì ne khama igong, chiih-è hì pha bang è siog gua asiok gua ji now phi phro. <sup>29</sup> Ai khriig arek mua arone chog ched magunde hò arung mua phro; chiih-è zab nyie rey pha ji ne brantheek è aishii riig srane siak phro. <sup>30</sup> Itheek è yao ruii phro! Hì pha bran è jao phane jao shii ajong mua ara.

<sup>31</sup> Itham ichiig bran um pha saja rog shii itham sua bran um pha saja è mak rek pha wuii arone igobi shii wie dug srane mak rek pha khriig siog pha chua um a-um ji wie phak phi phro. <sup>32</sup> Arey mua arone gai saja awuii ba pha ibi shii awai muaphothek shii thoh ge ne liijiig rek pha miyao ò rai. <sup>33</sup> Ji duiine, Isu è yao, Hanyie magunde nawaithek shii nyie um pha ji athoh sapho shii ne guro samoy arey muui phro.

### *Arem pha suruii*

*(Mth 5:13; Mrg 9:50)*

<sup>34</sup> Suruii ne wie ro, jimagunde airo rem ji shand dun arone, dinne suruii rem arab mua phro. <sup>35</sup> Hì ne nyiak shii de awie chiih-è rawo shii de awie; hì shii ne fen mua. Ji-è, nathek shii nuii pha khothek um arone, nuii mage bo!

## 15

### *San pha Shiishai*

*(Mth 18:12-14)*

<sup>1</sup> Luang jia bajo mijin thanpho nane layog brantheek Isu miyao ji nuii pha wuii thog, <sup>2</sup> Pharisitheek nane Iphey yao pha masdothek jao ne mushiyy, “Hì pha bran ne riing iuthek shii de wie ho chiih-è ithek rog shii de chie!” <sup>3</sup> Isu è ji pha najang è ithek shii yao:

<sup>4</sup> Nathek è hanyie shii magunde wieng jia shiishai um shii, chiih-è jia yi san dun arone ai nyie khi-èrek phlei? Ai ne gai sadigey è digey shii ne ilieg hà thoh marui srane jia san dun pha ji shii adoh sapho shii ne sow ruii phro. <sup>5</sup> Ai è doh mage shii, ai ne bajo sang srane ai è awai baphig shii nuang <sup>6</sup> chiih-è idoh han ne hò hà dun. Chiihphado ai è awai ijak nane awai hadung-haluii pho shii ò ho srane ithek shii yao, gu ne bajo sang ro gu ro san dun pha shiishai ji doh ge ro. Cho gethek ne lubo rek sharai haro! <sup>7</sup> Ji duiine gu nathek shii yao, hanyie jia magunde layog è khid arone sadige è dige ilab rai pho hanyie yi akhid chid pha ji è de huak ne Hamangkhung è ne aishii bajo lubo phro.

### *San dun pha sikhi*

<sup>8</sup> Din ne hò-amuii jia shii hayang sikhi sua um shii, airo hayang sikhi jia yi san dun arone ai nyie khi-èrek phlei? Ai ne muchuang ichuang srane awai hò shii sasriing rek ne big ne adoh sapho shii ne zab pha ithua shii wie è soh phro. <sup>9</sup> Ai è doh mage shii, ai ne awai ijak nane hadung-haluii pho shii

ò ho ne yao, gu ne bajo sang sha ro gu ro sikhi san dun pha ji ne doh ge ro. Cho gethek ne lubo rek sharai haro. <sup>10</sup> Gu nathek shii yao, ji duiine, hanyie magunde zea layog è khid arone Hamangkhung-aphuii pha hamangkhlhie è aishii huak ne sang ruii phro.

### *Dufuii san dun pha ji*

<sup>11</sup> Isu è yao din ramuii, “Luang jia thiisa hà bran jia dufuii nyi um. <sup>12</sup> Iduno ji è aphuii shii yao, ‘Gu chiang pha nuruii thuh gui shii phi sha bo.’ Ji-è ji pha bran ji è nuruii yi ai dufuii nyi pha duchoi shii dong phi. <sup>13</sup> Iù jia pha inai idoh shii ai dufuii iduno ji è awairo nuruii yi liu srane hò thoh marui ne bang rog shii rek dun. Ai gai ruang pha soh hà wuii srane, airo bang ne thaluii rek ne rai bsa hà mua marui. <sup>14</sup> Aishii nyie um pha ji zabjong ched shii, chiihphado è ji pha soh hà diigchiaog thog mage, chiih-è aishii ne nyie de aled dang pha rey dun. <sup>15</sup> Ji è ai ne blia rek sha pha thiig pha bran jia shii wuii thog, bran ji è wakthek riig yi pha raig hà thoh ge. <sup>16</sup> Ai awai è ino gu ne wakthek chie pha skhong pha mabin ji è lui nyalumuii mua, jimagunde de aishii hanyie è de chie pha aphi. <sup>17</sup> Idohhè shii awai khani shii now srane yao, ‘zab pha gu aphuii ro braphothek ne khama chie mua pha ji chie, chiih-è ichiui shii gu ne chi-iyi ne iy sha pha rek ro! <sup>18</sup> Gu ne jai srane gui aphuii shii dun ne yao pha ro, aphuii, gu è Hamangkhung-aphuii nane na shii buii rek muui ro. <sup>19</sup> Gu ne dinne na ro dufuii yao mua sapho ne asi ro; gu shii de naro riinang pha bliapho jia duiine ruii bo.’ ” <sup>20</sup> Ji-è ai jai fad srane jao ne idoh awai aphuii hò hà dun din.

“Ai ne hò è ruang ba shii, ai aphuii è aishii doh mage ne; iphuii lubu ne bajo bushun now dun, chiih-è ai ran srane, awai wad è dufuii shii giak srane, chiih-è khichiug. <sup>21</sup> Dufuii ji è yao ‘Aphuii, gu-è Hamangkhung-aphuii nane na shii buii layog rek muui. Gu shii ne na dufuii yao mua pha ne asi ro.’ <sup>22</sup> ‘Jishii aphuii è awai khiao shii kthiie ho srane!’ Ai è yao! yung wie yie srane aishii guii phi bo. Ai wad bieng shii giinad nad phi srane lai shii e lakhia khia phi bo. <sup>23</sup> Chiihphado è igong swuii jia yie ne ua mage bo, chiih-è gethek ne michie rog shii luboh rek sha rai haro! <sup>24</sup> Hi pha gu ro dufuii ne iy dun shii, jimagunde ai ne hòi din ge ro; ai ne san dun shii, jimagunde thuh ai ne doh ge ro. Chiih-è ithek ne lubo rek pha jao.

<sup>25</sup> “Ji-è rek ramuii pha ishak shii dufuii kho ji yi raig hà. Ai raig è iidoh dun ne, hò hà thog ramuii shii, ai è benkuang pha nane gasiu siu pha yoi. <sup>26</sup> Ji-è ai è awai khiao jia shii ho srane shii sai, nyie rey ramuii lei? <sup>27</sup> ‘Khiao ji è chang’ na ikhuii ne iidoh dun thog ro, ‘chiih-è na aphuii è Igong swuii de jia ua phro, nyieliieshii ai aphuii è aishii ne wie ne mua ge.’

<sup>28</sup> “Ai ro ibam ji è bajo lijieg srane hò bucho hà de adun pha rai muui; ji è ai aphuii è fuang hà wuii srane khung ne hacho hà dun bo è yao. <sup>29</sup> Jishii ai è aphuii shii chang, ‘riig mage bo, gu ne nyama idam shii khiao duiine naro blia rek phi, chiih-è gu na muyungthek shii anuii pha de arek. Na è gu shii nyie phi ga? Gu ijakthek rog shii michie chie pha sphin jia rang de aphi! <sup>30</sup> Jishii hi pha naro dufuii è naro nuruii zab siulao bimi shii mua marui, chiih-è ai iidoh hò hà thog mage shii, na è Igong swuii aishii ua ne phi’ <sup>31</sup> Iphuii è chang, gu Dufuii ‘na ne idang ichiui gu rog shii rai, chiih-è gu shii nyie um pha ji ne zab naro ro. <sup>32</sup> Jishii gethek ne lubo rek ne sang chid phro, nyieliieshii na khuii ne iy dun shii, jimagunde thiih shii ai ne sieng ro; ai ne san dun shii, jimagunde thiih shii ai ne doh ge ro.’ ”

## 16

*Khua khiao*

<sup>1</sup> Isu è awai samoythek shii yao, Luang jia shii thiisa hà bukho bran jia shii airo nuruii riig pha khiao jia um. Chiih-è bukho bran jishii yao naro khiao ne bang ne zab mua ramuii ro, <sup>2</sup> ji è aishii iliing hà ho srane yao, na Chiang gu è yoi ramuii pha ji nyie lei? Na wad shii ruii yi pha zab nuruiithek gui shii iidoh sasab phi dín sha bo, nyieliieshii nane dinne khiao rek mua sapho asi sha ro. <sup>3</sup> Khiao ji è awai shii yao, gu ithong è gu shii ne blia è khia muui sha pha rek, gu ne nyie khi-èrek sha gua? Gu ne nyiak hiungthek chog mua sapho gang de oi, chiih-è gu ne chayem than pha de wo muui. <sup>4</sup> Thiichiih gu ne thieg sha ge gu ne nyie rek chid! Ji-è gu ro blia yie dun pha iidoh shii gu shii hanyie è ai hò hà ho arone, gu ne jishii ijak rek pha ro. <sup>5</sup> Ji-è ai ithong shii muruii um pha zab branthek shii ho. Ai è Igobi jia shii sai. Na è guro ithong shii khama muruii phi pha um ba lei? <sup>6</sup> Ai è chang, sumaro thiiie yow biig wieng jia phi pha um ba ro. Khiao ji è aishii yao; ichiih shii naro sasab um ro, dug srane nawai siog shii saguii zey mage bo. <sup>7</sup> Chiihphado è de ai gai jia shii de sai, chiih-è naro khama phi ba pha um lei? Ai è de chang, phiug thulo itham jia muruii phi pha um ro. Khiao i ji è aishii yao: Naro sasab ichiih shii um ro, wem miliao zey mage bo.

<sup>8</sup> Ji è rek pha Chiang shii ithong è khlam pha khiao è khua rek pha ji shii laso phi; nyieliieshii ichiih sohjambling pha branthek ne awaithek blia shii rey yi pha ne sang hà rai phothek è ne khua ba ro.

<sup>9</sup> Chiih-è de Isu è yao, ji è gu nathek shii yao: Nathek sohjambling pha nuruii rog shii nawaithek ijak rab bo, ji è na shii khia muui magunde, na shii idang pha hò hà wie ho ruii phro. <sup>10</sup> Hanyie magunde iujia nyie shii migi um arone, ai ne boh shii de migi um ruii phro; hanyie magunde iujia shii khlam rek arone, ai ne boh shii de khlam rek phro. <sup>11</sup> Chiihphado è, ithek soh pha nuruii shii rang de isiie è akhoh mua arone, nyie khi-èrek ne ithek shii izai pha nuruii shii khoh yi phlei? <sup>12</sup> Chiih-è na ne gai ro nyie um pha ji shii rang de isiie arey mua arone, na shii nyie um pha ji ne hanyie è phi mage phlei?

<sup>13</sup> “Khiao jia è ithong nyi ro blia arek mua phro; ai ne jia shii miie arone jia shii ne amiie phro; ai ne jia shii isiie rek ne jia shii ne isiie arek phro. Nathek ne Hamangkhung-aphuii pha blia nane bang pha blia shii ò arek mua phro.”

*Isu è yao*

*(Mth 11:12,13; 5:31,32; Mrg 10:11,12)*

<sup>14</sup> Pharisithek è ji zab yoi mage shii, ithek è Isu shii siakjo mage, nyieliieshii ithek ne bang shii miie. <sup>15</sup> Isu è ithek shii yao, nathek ne jia ro bran mieg moe shii ne izai chak ro è doh yi, jimagunde Hamangkhung-aphuii ne nathek lubu ne thieg ro. Nathek shii branthek miphi pha boh phua pha ji ne Hamangkhung-aphuii moe shii ne nyie de aphua phro.

<sup>16</sup> “Moses ro Iphey nane chaigthek mizey ji ne Jon Khowo phi pha ishak shii chun ge ro, ji è mujo Hamangkhung-aphuii pha Sajathua pha Mua Wie ji yao ramuii ro, chiih-è zab gang è ji pha bucho shii khud ramuii.” <sup>17</sup> Jishii Hamangkhung nane sohnyiak san dun magunde, Iphey pha iu miyao ji ne san pha ne diig phro.

18 Bran hanyie magunde awai yiy shii thoh srane gai hò-amuii shii yie arone ai ne siulao rek phro; Chiih-è hò-aphuii è de gey thoh muui pha hò-amuii shii yie arone ai de siulao rek phro.

### *Bukho bran nane Lazaras*

19 “Luang jia thiisa hà bukho bran jia yi yung de bajo igong um pha yungthek guii srane nai tham ne bajo sang ne rai.” 20 Thiisa hà Lazaras beng pha hia è kheg muui pha dusho bran de jia um, aishii ji pha bukho bran habin moe shii noh ne ruii, 21 bukho thiibliie lakhung è idum chiih ruii pha ji chie pha luthong, choi rang de ai hia jishii liak wuii. 22 Dusho bran ji iy dun shii chiih-è hamangkhliethek è noh srane Hamangkhung hà Abraham laluii shii dug ba yi. Bukho bran ji de iy ne wieng muui, 23 chiih-è thumuluii\* ai ne bajo riie pha thumluui bucho hà, ai è laziung hà riig shii bajo ruang hà Lazaras yi Abraham laluii shii um pha doh. 24 Ji-è ai è ho mage, Aphuii Abraham! Gu shii de bushun rek bo chiih-è Lazaras shii thoh ge srane ai wad jiu è kho shii wo srane gu ri shii chen ne chei rek yi bo, nyieliieshii gu ne hi pha bai è bajo shud muui ro!

25 “Jishii Abraham è yao, ‘Now mage bo’ Gu dufuii, na sieng pha iidoh shii ne zab pha wie muna ne na shii phijong ro, ji pha ishak shii awie pha muna ne zab Lazaras shii phi. Jishii ai ne thuh shii ichiih lubo rek ramuii ro, nane hi pha ishak shii riie ramuii ro. 26 Jithek rey magunde, thiisa hà gethek duchoi shii ne Jam ihiung um ro, ji è hanyie è thawin hiiia ne isa wuii yang magunde awuii mua phro, ji è gathek è thiwing ithek moe hà wuii yang magunde awuii mua phro. 27 Bukho bran ji è yao, chiihphado gu na shii wadkhung, aphuii Abraham, Lazarus shii gu khi hà guro khuiino guii um pha guro aphuii hò hà thoh ge bo. 28 Aishii wuii ge yi ne ithek shii phriie srane, hi è diig ne riie pha ithua shii adun yi rabo. 29 Abraham è yao, naro khuiinothek shii ne Moses nane chaigphothek phriie phro; ji è na khuiinothek ne ithek è nyie yao pha ji nuii yi bo. 30 Bukho bran ji è chang, ‘Ji è ne acho ba ro, aphuii Abraham! Jishii i-iy è hòi srane ithek shii wuii arone, chiihphado ithek ne awai mirek pha layog è khid ruii phro.’ 31 Jishii Abraham è yao, ‘Ithek è Moses nane chaigphothek shii rang de anuii arone, ithek ne iy ne hòi ne wuii pha ji shii de anuii phro.’ ”

## 17

### *Layog*

(Mth 18:6-7,21-33; Mrg 9:42)

1 Isu è awai samoythek shii yao, “Branthek ne layog rey pha miyao ne idang yao, jimagunde hanyie è ithek shii ji rey yi pha ne khama diig phro! 2 Hanyie magunde iujia shii awie pha layog rek arone, ji liak shii ne yua shii rathak boh jia phang srane khamuii bucho hà wo muui pha ji wie liak ro. 3 Ji-è na nyie rek pha ji riig mage bo!

“Na khuiino è layogthek rek arone giung bo, chiih-è ai layog è iidoh khid arone, aishii khung phi bo. 4 Ai è inai jia shii miley chiieng layog rek magunde, ai è na shii nyawuii khi ne yao, gu ne layog è khid din pha ro è yao arone, na aishii khung phi bo.”

### *Migi*

<sup>5</sup> Guaphasamoythek è Ithong shii yao, “Gathek ro migi shii boh rab phi bo.”

<sup>6</sup> Ithong è chang, nathek shii danaro iriie nyama de boh migi um arone nathek hì pha mulbery hingmuii shiide nyayao mua phro nawailum iriing è hug dang ne khamuii bucho hà dun ne sieng ne rai bo! chiih-è jì de ai nyanuii phro.

### *Khiao ro blia*

<sup>7</sup> “Yangne hanyie magunde ithek ro khiao jia yi raig chog ne shiishai riig. Ai yi raig è dun thog mage shii, ithek è aishii khthiie hì pha michie chie sha bo è yao habey?” <sup>8</sup> Khuchung magunde de ayao phro! Ji phachiang shii, na è aishii yao, guro michie saro sha phi bo, chiihphado è gu achie aniing ched sapho shii ne na nawairo yung wie guui srane gu shii ragia rek bo; chiihphado è na de chie bo. <sup>9</sup> Khiao è khama pha blia rek magunde airo muyung nuii rone aishii laso aphi phro. <sup>10</sup> Hì duiine na shii de ro; nathek shii nyie yung pha jì zab jì rek ched bie arone, yao bo, gu ne thaluii pha khiao ro; chiih-è gu ne nyie yung pha blia jì rek bie phro.

### *Isu è bran sua shii gang phi*

<sup>11</sup> Isu awai yi Jerusalem hà rai ne wuiiramuii shii, ai è Samaria nane Galili pha sothug è dong ne lua. <sup>12</sup> Ai yi thiig è wuiiramuii shii awiedang hìa è riie pha bran sua shii si. Ithek yi ai è luja ruang hà riu ne um, <sup>13</sup> chiih-è ziak mage, “Isu! Masdo! Gathek shii de bushun rek bo!”

<sup>14</sup> Isu è ithek shii riig srane ithek shii yao, “Nathek phabi shii wuii srane riig yi bo.”

Lumuii hà ithek shii so rab phi ro.\* <sup>15</sup> Ithek jia è riig shii ai ne gang rey sha, ai iidoh dun srane goh gang è ziak ne Hamangkhung-aphuii shii laso phi. <sup>16</sup> Ai awailum ne buzam Isu lai shii bam srane aishii laso phi. Ji pha bran yi Samarithan ro. <sup>17</sup> Isu è yao, “Bran sua ne gang reyjong pha jì è; digey ne khi hà lei? <sup>18</sup> Nyie um ne hì pha fuang pha bran awai jì jia iidoh wuii srane Hamangkhung-aphuii shii laso phi phlei?” <sup>19</sup> Chiih-è Isu aishii yao, “Jai srane dun mage bo; nawai migi è na shii wie rek phi ro.”

### *Hamangkhung pha Sajathua wuii sharuii*

*(Mth 24:23-28,37-41)*

<sup>20</sup> Giak Pharisithek è Isu shii sai Hamangkhung-aphuii pha Sajathua jì ne khuchung thog ruii phlei. Ai è ithek shii chang, “Hamangkhung-aphuii pha riichia ne doh yi ne awuii phro. <sup>21</sup> Hanyie jia è de ayao mua phro, riig bo, hì ne ichiie um ro! Chiih-è, hì ne thiisa hà um ro; nyieliieshii Hamangkhung-aphuii pha Sajathua ne nathek duchoi shii um ro.”†

<sup>22</sup> Chiihphado ai è awai samoythek shii yao, “Ai thog ruii phro” Nathek è Bran Dufuii wuii pha naishii ne luang jia riig yang phro, jishii ithek adoh phro. <sup>23</sup> Thiichiih shii ithek è nathek shii yao ruii phro thiisa hà riig mage bo! chiih-è riig mage bo! Ichiie shii! Jishii nathek wuii srane ariig rabo. <sup>24</sup> Hamangkhung è haliao jia bliak ne soh iring jia è gai iring jia shii thog pha chuang ruii phro, Bran Dufuii ro inai de jì pha iidoh duiine phro. <sup>25</sup> Jishii ai ne igobi jì pha inai shii bajo diig rek srane brantheke è aishii ne snai muii phro. <sup>26</sup> Noah pha ishak jì duiine yi Bran Dufuii pha inaithek de rey ruii

**17:14** 17:14: Lew 14:1-32 \* **17:14** 17:14: So rab bo: Riig bo 5:12 † **17:21** 17:21: Nathek rog shii; din ne nathek duchoi shii, din ne hamblo shii nathek duchoi hà dong ruii phro. **17:26** 17:26: Igo 6:5-8

phro. <sup>27</sup> Noah yi run bucho hà akhud sapho shii ne brantheek chie niing ne yiy gey ne rai, chiih-è kho khed thog srane zab shii ua muui. <sup>28</sup> Hi ne Loth pha iidoh shii duiine phro. Zab pha brantheek chie niing ne, chiih-è phek liu ne, hai rung ne rai. <sup>29</sup> Ji pha ishak shii loth Sodom è khia dun shii, Hamangkhung è bai nane arem pha now pha chiih srane zab brantheek shii Hàb ne ua muui phro. <sup>30</sup> Hi nyie khi-èrek rey pha ji ne Bran Dufuii dong mage shii de rey ruii phro.

<sup>31</sup> Ji pha naishii hanyie magunde hò pha zak lakhung hà um iang arone nawaithek mana yi pha buzam alung rabo; ji duiine hanyie magunde raig hà um arone iidoh hò hà adun rabo! <sup>32</sup> Loth ro yiy shii now mage bo! <sup>33</sup> “Hanyie magunde awai chai shii ragia rek pha bidiang arone ai ne iy phro; hanyie magunde awai chai shii mua muui arone ragia rey ruii phro. <sup>34</sup> Gu nathek shii yao, ji pha habiu shii, bijiui nyi biang jia shii ò men magunde: jia shii ne chiing ne noh dun phro, Gai shii ne thiihchiih thoh marui phro. <sup>35-36</sup> Hò-amuii nyi yi phiug ò sui ne rai magunde: jia shii ne chiing ne noh dun phro, gai jia shii ne iidoh thoh marui phro.” †

<sup>37</sup> Samoythek è aishii sai, “Ithong ji ne khi hà lei?”

Isu è chang, “Khi hà bran iy um lei ne, ji hà biichiingthek de um ruii phro.”

## 18

### *Misiungmuui nane chua pha najang*

<sup>1</sup> Chiihphado Isu è ji pha najang è awai samoythek shii idang sia ne lubu iu arek rabo ne yuaphi. <sup>2</sup> Thawun jia shii Hamangkhung-aphuii shii de arum chiih-è bran shii de ilab aphii pha chua pha jia um. <sup>3</sup> Chiih-è ji pha thawun shii misiungmuui de jia rai, ai è aishii nyawuui lumua ne khung ne yao, guro rangsua jishii gu mak pha gidieg è ragia rek phi bo! <sup>4</sup> Nai phrak jia ne chua pha bran ji è ji pha blia rek pha anuii phi, iidohhè shii awailum ne yao, gu Hamangkhung-aphuii shii arum magunde chiih-è bran shii lab arek magunde, <sup>5</sup> nyieliieshii thiih thog pha hi pha misiungmuui è gu shii diig phi muui, gu airo rangsua ji awai mua yi pha riig chid phi phro. Gu ji arek phi shii ne, ai nyawuui lumua ne iidohhè gu shii jid yi phro!

<sup>6</sup> Chiih-è de Ithong è yao, nuii bo awie pha chua pha bran ji è nyie yao. <sup>7</sup> Ji-è hanyie è aishii nong lia srane hanai nane habiu choh srane lia arone, Hamangkhung-aphuii è awai nyu pha bran shii aphii ne bey? Aishii nong rek phi pha ne chia ne bey? <sup>8</sup> Gu nathek shii yao, ai ne awai nyu pha ji shii ne khthiie chua ne rek phi phro. Jishii Bran Dufuii sohnyiak hà wuii shii migi doh ne bey?

### *Pharisithek nane mijin thanpho pha najang*

<sup>9</sup> Isu hi pha najang yi hanyie è awai shii ne wie ro è yao, chiih-è gaithek shii ne awie ro è yao ne snai ji pha bran shii yao. <sup>10</sup> Luang jia shii bran nyie yi Misiahò hà sia pha wuii dun: jia yi Pharisi, chiih-è gai yi mijin thanpho pha ji ro. <sup>11</sup> Pharisi ji è riu srane awai lubu shii sia,\* gu na shii laso phi, Hamangkhung-aphuii, ji è gu ne agiichak ro, anuii pha de arek, chiih-è ithek

**17:27** 17:27: Igo 7:6-24    **17:28** 17:28,29: Igo 18:20; 19:25    **17:31** 17:31: Mth 24:17,18; Mrg 13:15,16    **17:32** 17:32: Igo 19:26    **17:33** 17:33: Mth 10:39; 16:25; Mrg 8:35; Lug 9:24; Jon 12:25

† **17:35-36** 17:35-36: Giak shii 36 chodo ro: Bran nyi ne raig shii ò blia rek ruii phro: jia shii ne chiing ne noh ruii phro, gai shii ne iidoh thoh maruii phroth (riig Mth 24:40)    \* **18:11** 18:11: awai shii yoh riu rone chiih-è sia; giak jigizey shii ne um jai srane nawai shii sia bo.

gai duiine siulao de arek, gu na shii laso phi, nyieliieshii gu ne mijin thanpho duiine de asi ro. <sup>12</sup> Gu ne habda jia shii danyi minyie nyie phro, chiih-è gu miwiang pha zab ji è de na shii jiasua phi ro.

<sup>13</sup> Jishii mijin thanpho pha ji è ruang hà riu srane mizia Hamangkhung hà de ahù dang pha awai lubutho shii phe srane yao, Hamangkhung-aphuii layog gu shii de bushun rek bo! <sup>14</sup> Isu è yao, gu nathek shii yao, “Ai nyi è hò dun shii Pharisii shii asi pha, mijin thanpho pha ji ne Hamangkhung-aphuii rog shii rangsua rey dun. Ji-è hanyie magunde awai shii boh rek arone aishii ne lu rey ruii phro, chiih-è hanyie magunde awai shii lu rek arone aishii boh rab ruii phro.”

*Isu è aniphiing shii khirzey phi*  
(Mth 19:13-15; Mrg 10:13-16)

<sup>15</sup> Giak brantheek è aniphiing lakhung shii wad ruii ne khirzey phi yi pha Isu shii noh thog. Samoytheek è ithek mirek ji riig srane ithek shii giung, <sup>16</sup> Jishii Isu è aniphiing shii awai moe hà ho srane ithek shii yao, aniphiing shii gu hà wuii yi bo, chiih-è ithek shii agak rabo, nyieliieshii Hamangkhung-aphuii pha boh Sajathua pha ji ne hi è rek pho ro ro. <sup>17</sup> Hi now mage bo! Hanyie-magunde Hamangkhung-aphuii pha boh Sajathua pha ji shii aniphiing duiine acho arone ji pha iliing akhud mua phro.

*Bukho bran*  
(Mth 19:16-30; Mrg 10:17-31)

<sup>18</sup> Jewish pha dumuii jia è Isu shii sai, “Wie Masdo, khuchunde a-iy pha chai mua pha gu nyie rek chid phlei?”

<sup>19</sup> Isu è aishii yao, “Gu shii nyie re ne wie ro è ho phlei?” Hanyie de wie asi ro, arek ne Hamangkhung-aphuii jia bey ro. <sup>20</sup> Na ne muyungtheek thieg, siulao arek rabo; khishii a-ua rabo; mugo agow rabo; chiih-è hanyie shii de biidiie athe rabo; chiih-è aphuii amuii shii ilab rekbo.

<sup>21</sup> Bran ji è chang, “Gu ne filiao mujo è hi thek pha miyao ne nuii ne lua phro.”

<sup>22</sup> Isu è jithek yoi ne, ai è aishii yao, “Thiih de nane blia jia rek chid ba pha um ro. Na shii um pha jithek zab liu srane bang yi dushotheek shii phi muui bo, chiih-è na gu rog shii luagieng bo; ji arone nane Hamangkhung hà bajo bukho rey ruii phro.” <sup>23</sup> Jishii ji pha bran è ji pha miyao yoi mage ne, ai ne bajo duhug rey dun, nyieliieshii ai ne bajo bukho.

<sup>24</sup> Ai bajo duhug rek pha ji Isu è riig srane yao, “Bukho brantheek ne Hamangkhung-aphuii pha Sajathua ji hà khud pha ne khama nang ro! <sup>25</sup> Bukho brantheek è Hamangkhung-aphuii pha Sajathua hà khud pha ji shii ne úd è simen cho shii khud pha ji wie liak ba ro.”

<sup>26</sup> Ai miyao nuii pha brantheek è aishii sai, “Chiihphado, hanyie shii ragia rey phlei?” <sup>27</sup> Isu è chang, “Bran è nyie arey mua pha ji ne Hamangkhung-aphuii è nya rey mua phro.”

<sup>28</sup> Phithar è yao, riig mage bo! gathek ne hòthek thoh srane na iidoh shii lua gieng.

<sup>29</sup> Isu è ithek shii yao, gu nathek shii izai yao, hanyie magunde hò, yiy khuiino, aphuii, amuii, ani thoh srane Hamangkhung-aphuii pha Sajathua pha ji shii sow arone <sup>30</sup> duchung pha idam shii de bajo mua ne dinne thog ruii pha idam shii de idang pha chai mua ruii phro.



*Isu è awai iy pha miyao ji uomchieng yao sha*  
(Mth 20:17-19; Mrg 10:32-34)

<sup>31</sup> Isu è awairo snanyi samoythek shii yoh pha ithua hà noh srane ithek shii yao, “Yoi mage bo! Gethek ne Jerusalem hà wuii sha pha ro, thiisa hà chaigthek è Bran Dufuii Chiang shii zey pha ji ne zab izai rey phro. <sup>32</sup> Aishii ne gai branthek wad shii phi muui chiih-è ai mirek ji nui ne, chiih-è aishii chan cho phro. <sup>33</sup> Ithek è aishii zuang srane ua muui phro, chiih-è da-uom pha iidoh shii ne chai hòì din phro.”

<sup>34</sup> Jishii samoythek è ai nyie yao pha ji yi nyie de athieg mua; miyaogamthek sbang ne ithek è ug dun, ji è Isu è nyie yao pha ji agao muui gieng.

*Isu è miegthi chayem shii gang phi*  
(Mth 20:29-34; Mrg 10:46-52)

<sup>35</sup> Isu yi Jerikho hà wuiiramuii shii, lumuii hà miegthi jia chayem than ne rai iang. <sup>36</sup> Ibrogthek yi ai è rek dun pha yoi srane, ai è sai, “Hì nyielei?”

<sup>37</sup> Ithek è aishii yao, “Nazareth pha Isu rek ramuii ro.”

<sup>38</sup> Chiih-è ai choh srane yao, “Isu, Dawid pha dufuii! gu shii de bushun rek bo!”

<sup>39</sup> Thiichiih ibi shii um pha branthek è aishii giung srane aishii yao aro dang rabo, jimagunde ai è dinne de ji è lahuak bo ziak ne yao, “Dawid pha dufuii! Gu shii bushun rek bo!”

<sup>40</sup> Ji-è Isu thiichiih riu srane yung, ji pha miegthi shii gu moe hà now mage bo. Ai yi nui hà wuii thog mage shii, Isu è aishii sai, <sup>41</sup> “Gu è na shii nyie rek phi bo è now lei?”

Ai è chang, “Masdo,” “Gu dinne doh pha now ro.”

<sup>42</sup> Isu è aishii yao, “Chiiphado doh mage bo! Nawai migi è na shii wie rek ge ro.”

<sup>43</sup> Thiichiih shii ai ne doh muui dang dun, chiih-è ai ne Isu rog shii lua gieng srane Hamangkhung-aphuii shii laso phi. Ibrogthek è ji riig srane ithek de zab Hamangkhung-aphuii shii laso phi.

## 19

*Isu nane Zakhaeus*

<sup>1</sup> Isu yi Jerikho è dong ne wuiiramuii shii. <sup>2</sup> Thiisa hà Zakhaeus beng pha mijin thanpho pha boh bukho jia um. <sup>3</sup> Ai è Isu hanyie lei ne riig pha bidiang, jimagunde ai ne bran dum buii ne Isu shii ariig mua, nyieliieshii bajo ibrog um. <sup>4</sup> Ai yi ji pha lumuii è dong ne wuiiramuii rone, ji è ai ne Isu shii riig pha ibrog è ibi hà ran srane sykhamor hingmuii shii wiu. <sup>5</sup> Isu è ji pha ithua shii wuii thog mage shii, ai laziung riig srane Zakhaeus shii yao, “Knthiie buzam hà lung bo, Zakhaeus, nyieliieshii, sudoh gu ne na hò shii rai pha ro.”

<sup>6</sup> Zakhaeus è kthiie nyiak hà lung srane bajo lubo ne aishii wie ho. <sup>7</sup> Zab pha branthek è ji riig srane jao ne mushiyy, “Hi pha bran ne biwen rek ne layogthek hò shii wuii dun ara!”

<sup>8</sup> Zakhaeus è riu srane Ithong shii yao, “Yoi bo, Masdo! Gu shii nyie um pha ji ne khoyo yie srane gu dushothek shii phi muui pha ro, chiih-è gu hanyie shii magunde nyie khlam ne yie magunde gu iidoh wirang rek ne rang din pha ro.”

<sup>9</sup> Isu è aishii yao, “Sudoh ichiih pha hò shii idang pha giawo thog ro, hì pha bran ai de, Abraham pha riing ro, <sup>10</sup> Bran Dufuii ne shand dun pha ji shii sow pha nane ragia rek wuii phro.”

*San sikhithek pha najang*  
(Mth 25:14-30)

<sup>11</sup> Brantheke yi nyanuii bamuii shii, Isu è athodang pha ji pha najang è dinne ithek shii yao. Ai yi Jerusalem hà thog sharuii, ithek è now shii Hamangkhung-aphuii pha Sajathua ji ne thog sha ruii ro. <sup>12</sup> Ji-è ai è yao, luang jia shii bran boh rek pha jia yi gai ruang pha soh hà saja rey ne iidoh hò hà dun din pha phak. <sup>13</sup> Ai awuii ba pha ibi shii, awai khiao suathek shii ho srane san sikhi ji jia phi srane ithek shii yao, riig bo gu wuii dun pha ishak shii nathek hì pha rog shii Khinyama wiang mua pha ji wiang iang bo. <sup>14</sup> Thiuh shii awai thiig pha brantheke è aishii amiie sha, ji è iidoh aishii yao pha ithek è muaphothek shii thoh ge, gathek ne hì pha bran shii gathek saja rek pha achid sha ro. <sup>15</sup> “Ji pha bran ne saja rek marui srane iidoh dun thog din. Ai è khthiie awai khiao shii yung srane ai moe shii wuii mage bone yao, nyieliieshii ithek è khama wiang lei ne ji riig pha ho ro. <sup>16</sup> Igobi shii jia è wuii thog srane yao, ‘Masdo, gu è na miphi pha san sikhi jia rog shii sua wiang doh ge ro.’ <sup>17</sup> Ai è yao, wie rek ge ro ‘Na ne khiao wie ro! nane lu blia shii rangde bajo isiie rek phi, ji è gu na shii rajan sua shii dumuii khoh yi pha ro.’ <sup>18</sup> Din ne khiao jia è de wuii thog srane yao, ‘Masdo, gu è na miphi pha san sikhi jia rog shii guii wiang doh phi ro.’ <sup>19</sup> Jishii de ai è yao, na shii de rajan guii shii dumuii rek yi phro. <sup>20</sup> Gai khiao jia è de wuii thog srane yao, ‘Masdo, naro san sikhi ne ichiih um ro; gu è yung thilek è pham srane ug ne ruii phi phro. <sup>21</sup> Gu ne na shii rum, nyieliieshii nane bajo nang bran ro. Na ne naro asi pha ji de na è yie muui, chiih-è na è ahai magunde na è riig ne yie muui.’ <sup>22</sup> Ai è aishii yao, nane awie pha khiao ro! Gu ne nawai sem pha miyaogamtheke ji è nawai shii the ruii phro! Gu ne nang ro è nane thieg, chiih-è gu ro asi magunde gu è yie muui, gu miuhai asi magunde gu è riug maphi. <sup>23</sup> Chiihphado na gu ro bang shii nyie rek ne beng hà achab aruii phi lei? Chiihphado gu iidoh dun thog shii gu ne ji pha rog shii phua mua ne iidoh nya yie din. <sup>24</sup> Chiihphado shii ai è hanyie thiichiih riu ne um phothek shii yao, ‘San sikhi ai è yie srane hanyie shii sikhi sua um pha ji shii phi muui bo.’ <sup>25</sup> Jishii ithek è aishii yao, ‘Masdo, aishii ne sikhi sua umjong ro!’ <sup>26</sup> Ai è chang, gu nathek shii yao ‘Hanyie shii um magunde aishii ne dinne phi din ruii phro, jimagunde hanyie shii oi magunde aishii lujia um pha ji de yie din muui phro. <sup>27</sup> Thuh shii, hanyie guro mak phothek è gu shii ithek saja rey bo è achid pho shii de gu moe shii noh srane zab ua muui bo!’”

*Bohlubo rek ne Jerusalem hà thog*  
(Mth 21:1-11; Mrg 11:1-11; Jon 12:12-19)

<sup>28</sup> Isu è ji yao ched pha iidoh shii Isu yi ithek ibi Jerusalem hà wuiiramuii. <sup>29</sup> Ai è sumaro pha phiing Bethphach nane Bethany hà wuii thog mage shii, ai è samoy nyi shii yung srane ibi thoh ge: <sup>30</sup> Ibi pha thiig hà wuii mage bo chiih-è iliing hà wuii thog shii, thiisa hà hanyie de a-in ba pha bambao jia phang ne um pha doh ruii phro. Ji pha bambao shii sey ne isa yie ruii bo.

<sup>31</sup> Nathek shii hanyie magunde ji pha bambao shii nyie rek pha sey phlei ne sai ruii arone nathek è aishii yao bo, hì ne Masdo\* è chid muui ro.

<sup>32</sup> Ithek thiisa hà wuii dun shii Isu è nyie khi-èrek yao lei ne ji duiine mua.

<sup>33</sup> Ithek yi bambao phang ne um pha ji sey ramuii shii, ji pha muspho è ithek shii sai nathek ji nyie rek pha sey phlei? <sup>34</sup> Ithek è chang, "Ithong è chid muui ro," <sup>35</sup> Chiìh-è ithek è bambao shii Isu hà noh ne dun thog. Chiìhphado shii ithek ro yung bambao lakhung shii gow srane Isu shii in pha nong ba yi. <sup>36</sup> Ai è lakhung shii in mage shii, ithek è ibi lumuii hà yung wiao phi iang. <sup>37</sup> Ai Jerusalem hà sumaro um pha phiing buzam hà wuii pha lumuii shii thog mage shii, ai samoythek è zab blia bohthek doh pha ji è Hamangkhung-aphuii laso phi ne chiìh-è aishii goh boh è zìak srane chiong phi: <sup>38</sup> "Hamangkhung-aphuii hanyie yi Ithong beng è wuii pho shii ne khirzey phi bo! Hamangkhung hà lijiing nane Hamangkhung-aphuii ro biisiie rey bo!" <sup>39</sup> Chiìhphado shii ibrog è giak Pharisithek è Isu shii yao. "Masdo," ithek è yao, "Naro samoy shii aro rabo è yung mage bo!" <sup>40</sup> Isu è chang, "Gu nathek shii yao phro ithek è aro pha rai arone, lubaothek awailum ne jao ne zìak ruii phro."

### *Isu Jerusalem shii choh*

<sup>41</sup> Ai ji pha rajan moe hà wuii thog mage shii, chiìh-è ai ji pha rajan shii riig srane choh, <sup>42</sup> ne yao, nathek sudoh shii lijiing ne khama mugak ji thieg arone! Jishii thuh shii nathek ne ariig mua sha phro! <sup>43</sup> Nathek gidiegpho è nathek shii zab pha ithua gung srane nathek lumuii shii de zab bin maphi pha ishak de thog ruii phro. <sup>44</sup> Ithek è nathek shii zab mua muui phro chiìh-è branthek è nathek ro chan muthua shii de chuakbraig srane ji pha ithua shii lubao jia de aruii phro, nyieliieshii Hamangkhung-aphuii è ithek shii ragia rek wuii shii ithek è ishak athieg!

### *Isu Misiahò hà wuii dun*

*(Mth 21:12-17; Mrg 11:15-19; Jon 2:13-22)*

<sup>45</sup> Chiìhphado è Isu Misiahò iliing hà wuii srane chong rek pho shii fuang hà gieng mage, <sup>46</sup> Ithek shii yao, "Hamangkhung-aphuii miyao ji ne ichiìh jigigam shii zey ne um ro, Guro Misiahò ji ne sia pha hò ro è yao phro. Jishii ithek è mugothek ug ne rai pha hò rab muui!" <sup>47</sup> Nai tham ne Misiahò shii yua, phabi wegthek, Iphey yao pha masdothek, chiìh-è dumuii branthek è aishii ua pha now, <sup>48</sup> Jishii ithek è aishii ji è rek pha nyie lumuii adoh phi, nyieliieshii zab bran è miyaogam jia de amuii yi pha airo miyao ji isiie è yoi.

## 20

### *Isu ro riichai Chiang pha mushai*

*(Mth 21:23-27; Mrg 11:27-33)*

<sup>1</sup> Nai jia Isu yi Misiahò shii yua srane Mua Wie yao ramuii shii, boh phabi nane Iphey yao pha masdothek nane dukhothek branthek sha hà ò shii wuii thog ruii <sup>2</sup> chiìh-è ithek è aishii yao, "Gathek shii yao riig, na shii hì pha blia rek pha rangsua hanyie miphi lei?" <sup>3</sup> Isu è ithek shii chang, "Gu de nathek shii mushai sai riig. Yao riig, <sup>4</sup> Jon Khowo phi pha rangsua ne Hamangkhung-aphuii è wuii ne ba asi pha bran è wuii ne ba?"

\* **19:31** 19:31: Masdo shii; dinne ji ne muspho. **19:38** 19:38: Chng 118:26 **19:46** 19:46: Aij 56:7; Jeri 7:11 **19:47** 19:47: Lug 21:37

<sup>5</sup> Awaithek chung jao ne khnaing rai, gethek nyie khi-èrek chang sharai pha lei? Gethek è ai ne Hamangkhung-aphuii è wuii phro è yao arone, ai ne gethek shii yao din ruii, nyie rek ne, ji arone, ithek Jon shii migi arek lei? <sup>6</sup> Jishii Jon ne bran è wuii phro è yao arone ichiuh um pha bran phiing è gethek shii ne labao rek ne chao phro, nyieliishii ithek ne Jon shii ne chaig ro è thieg. <sup>7</sup> Jishii ithek è chang, gathek ne athieg ro Jon ro rangsua ne khi è thog.

<sup>8</sup> Chiuh-è Isu è de ithek shii chang, ji arone, gu de nathek shii ayao phro, Gu è hì pha blia nyie rangsua è rek pha ji.

*Raiphothek pha najang*  
(Mth 21:33-46; Mrg 12:1-12)

<sup>9</sup> Chiuhphado shii Isu è brantheek shii ji pha najang ji yao: Luang jia shii bran jia è raig shii angur hai srane, chiuh-è raig rek pha gai bran shii raig chui marui srane ruang hà wuii dun. <sup>10</sup> Angurtheek khrab pha ishak thog mage shii ai è awai khiao jia shii raig chei phi pho shii airo mathang yamiing yie pha thoh ge. Jishii raig chei pho è khiao jishii ne zuang srane nyie de aphi pha iidoh thoh ge. <sup>11</sup> Ji-è gai khiao jia shii thoh ge; jimagunde raig chei phothek è aishii zuang srane, chiuh-è biwo yao srane aishii de isloi iidoh hà thoh ge. <sup>12</sup> Chiuhphado shii dinne awai khiao yoh jiashii de thoh bage ba, chiuh-è raig chei pha bran è aishii de bajo zuang srane, chiuh-è fuang hà fenmuii. <sup>13</sup> Chiuhphado, angur raig muspho è yao, gu nyie khi-èrek sha phaga? Gu gui ro bushun dufuii shii thoh sha ge phro; ji arone ithek aishii ne ilab phi rek! <sup>14</sup> Jishii raig chei pho è aishii riig mage ne awaithek chung yao rai, hì ne raig ithong pha dufuii ro. Ji-è cho gethek ne aishii ua muii haro, chiuh-è airo nuruii ne gethek ro rey phro! <sup>15</sup> Ji-è ithek aishii angur raig è fuang hà noh srane aishii ua muii.

Isu è sai, ji è rek mage shii ji pha raig muspho è raig chei phothek shii nyie rek phlei? <sup>16</sup> “Ai ne wuii srane ji pha brantheek shii ua muii phro, chiuh-è angur raig yi gai raig chei phothek wad shii phi muii phro.”

Itheek è ji yoi mage shii, ithek è yao, “Ji duine arey dang rabo!”

<sup>17</sup> Isu è ithek shii riig srane sai, “Chiuhphado, hì pha jigigam ne nyie zey phlei? ‘Rung phothek è lubao shii awie ro è snai muii pha ji ne dinne zab è bajo mugak lubao rey din.’ <sup>18</sup> Hanyie magunde ji pha lubao lakhung shii chiuh arone ismed rey dun phro; chiuh-è ji pha lubao è hanyie lakhung shii chiuh magunde, aishii ihab rey dang pha chao dun phro.”

*Mijin phi pha Chiang pha musai*  
(Mth 22:15-22; Mrg 12:13-17)

<sup>19</sup> Iphey yao pha masdothek nane boh phabitheek Isu è ji pha miyao ne ithek shii gidieg rek ne yao phrone thieg ne ji pha ithua shii zum pha bidiang, jimagunde ithek ne brantheek shii rum. <sup>20</sup> Ji-è ithek ne jo mua pha ji riig ne rai. Itheek è giak brantheek shii Lugu phi ne ithek shii bran isiie rone doh yi, chiuh-è ithek è jithek shii Isu shii mushai sai ne ichag sow pha thoh ge, ji è ithek è aishii ne Roman Badri pha blu nane riichai shii phi muii pha rek. <sup>21</sup> Ji pha bujuiiphothek è Isu shii yao, “Masdo, gathek ne thieg na è nyie yua nyie yao pha ji ne izai chak ro, chiuh-è gathek ne thieg nane bran boh iu um ne de achua, jimagunde nane Hamangkhung-aphuii è brantheek shii nyie chid pha izai ji yua. <sup>22</sup> Gathek shii yao riig bo, gathek è Roman Bisu

shii mijin phi pha ji ne Iphey shii zen ne ba, asi azen ba?" <sup>23</sup> Jishii Isu è ithek mirek pha ichiig jishii wie riig srane ithek shii yao, <sup>24</sup> Gu shii liiman pha sikhi jia riig yi mage. Hi shii hanyie midong nane hanyie beng zey ne um lei? Itek è chang, hi ne Bisiu beng zey ne um ro. <sup>25</sup> Ji-è Isu è yao, "Chiihphado, wie, nyie yi Bisiu ro awai shii phi bo, chiih-è nyie yi Hamangkhung-aphuii ro awai shii phi bo." <sup>26</sup> Thiichiih brantheik ibi shii aishii azum mua, ji è ithek aro dang pha rai srane, Isu muchang ji nuii ne wiengphleg dun.

*Iy ne hòì din pha Chiang shii sai*  
(Mth 22:23-33; Mrg 12:18-27)

<sup>27</sup> Chiihphado bran yi iy ne ahòì din phro è yao pha ji shii izai anow pha giak Sadusithek wuii thog srane Isu shii yao, <sup>28</sup> Masdo, Moses è hi è yao ne gathek shii zey ne zen marui: bran jia iy dun shii ai yiy yi ani agiak ba pha thoh marui arone, ji pha misiungmuii shii ne ji pha bran ikhuii è yie ne ani nya giak mua phro ji pha arone iy dun pha bran pha ani rey phro. <sup>29</sup> Luang jia ithek khuiino miley um shii; zab è dukho ji è yiy yie srane ani agiak ba pha iy dun, <sup>30</sup> chiihphado è ji pha hò-amuii shii sulong nyi pha ikhuii è ji pha hò-amuii shii yie din, <sup>31</sup> chiih-è dinne uom pha ji è de ji è rek, ji duiine zab khuiino miley shii de ji è rey dun ne ithek ne ani agiak pha iy dun, <sup>32</sup> iidohe shii ji pha hò-amuii de iy dun. <sup>33</sup> Ji-è iy ne hòì din pha inai thog mage shii, ithek miley è yiejong pha hò-amuii ji ne hanyie ro yiy rey phlei?

<sup>34</sup> Isu è ithek shii chang, "Sieng pha ishak shii ne hò-aphuii hò-amuii ne ayiy agey rai phro, <sup>35</sup> Jishii gieng hò-aphuii hò-amuii dinne thog pha ishak shii iyjong hòì din mage shii ne ayie agey sharai phro. <sup>36</sup> Itek ne hamangkhliie duiine rey dun phro chiih-è khuchung de a-iy mua phro. Itek ne Hamangkhung-aphuii pha dufuii rey sha phro, nyieliishii ithek ne iy pha ji è hòijong ge ro. <sup>37</sup> Chiih-è iy ne hòì din phro è Moses è wie doh yijong ro, jigigam shii de zey ne um ro ai è baihang pha jabiing shii Ithong pha miyao ne Abraham pha Hamangkhung-aphuii, Isakh pha Hamangkhung-aphuii, chiih-è Jakhob pha Hamangkhung-aphuii, shii yao. <sup>38</sup> Ai ne sieng pha Hamangkhung-aphuii ro, iy pha asi ro, ai pha Chiang è zab sieng mua phro."

<sup>39</sup> Iphey yao masdo giak è yao, "Masdo, wie chang ro!" <sup>40</sup> Ji è ithek ne aishii dinne miyao asai mua.

*Masi Chiang mushai sai*  
(Mth 22:41-46; Mrg 12:35-37)

<sup>41</sup> Isu è ithek shii sai, hi ne nyie khi-èrek ne Masi ne Dawid riing ro è yao mua phlei? <sup>42</sup> Dawid awai è sthun jigigam shii yao, Ithong è gui Ithong shii yao: Gui phazoi shii dug bo. <sup>43</sup> Gu è na mak pho shii na lai iliing hà aruii sapho shii ne. <sup>44</sup> Dawid è aishii Ithong ro ho; chiihphado, khi-èrek ne Masi ne Dawid ro riing rey phlei?

*Isu è Iphey yua pha masdothek shii phriie*  
(Mth 23:1-36; Mrg 12:38-40)

<sup>45</sup> Brantheik zab aishii yoi ramuii shii, Isu è awai samoythek shii yao, <sup>46</sup> Iphey yua pha Masdothek è nowbthan ne rai bo, ithek ne yung phiang gui srane lua yang bie ne bajarai hà ithek shii khung ne ilab phi pha ji

shii bajo miie; chiih-è Jewish misiahòthek hà de ithua wie gua ne dug, chiih-è michie chie pha ishak shii de ithua wie shii gua ne dug. <sup>47</sup> Hanyie thek ne misiungthek è phua srane ithek hò shii riao maphi, chiih-è briig yi pha misiathek de bajo phiang sia! Ithek shii ne zab awiedang pha lago phi ruii phro.

## 21

### *Misiung muui pha mizid* (Mrg 12:41-44)

<sup>1</sup> Isu è shan ne riig ramuii shii bukho brantheK de Jewthek misiahò pha mizid japho ji shii lasen chabramuii pha doh, <sup>2</sup> Ai è bajo dusho misiungmuui de thama sikhi ididuii nyi chabramuii pha doh. <sup>3</sup> Ai è yao, gu nathek shii yao phro, ithek gai è de ji pha dusho misiungmuui è bajo chab ba ro. <sup>4</sup> Ithek miphi pha ji ne awaithek bukho rey ched ne khe pha ji è phi phro; jimagunde ai ne dusho magunde awai shii nyie um pha ji zab phi muui phro.

### *Isu è Misiahò chuak pha ji yao* (Mth 24:1-2; Mrg 13:1-2)

<sup>5</sup> Giak samoythek è Misiahò pha Chiang ji yao ramuii, hi pha wie pha lubao nane Hamangkhung-aphuii shii lasen zud pha ji ne khama khie dohramuii ro. Isu è yao. <sup>6</sup> Zab pha nathek dohramuii pha ji ne doh jia ichiih pha ithua shii iphen jia rang de aled pha ishak thog ruii phro; zab shii buzam chuak dun phro.

### *Duhug nane diigchiao* (Mth 24:3-14; Mrg 13:3-13)

<sup>7</sup> Ithek è sai, Masdo, “Hi ne khuchung rey ruii phlei? Chiih-è ji pha ishak thog sha ro è nyie khi-èrek ne doh yi phlei?” <sup>8</sup> Isu è yao, “Nowbthan ne rai bo; nathek shii akhlam yi rabo. Gu beng è bajo brantheK wuii ruii srane yao phro, gu ne ai ro! Chiih-è, Ai ne thog ro, jimagunde ithek miyao anuii rabo. <sup>9</sup> Chiih-è mak rek rai ne gui rai dun pha yoi magunde nathek arum chid rabo, jithek ne igobi rey ruii pha chak ro, jimagunde jithek è jong pha ishak arey pha ro.”

<sup>10</sup> Ai è yao ramuii, thiigpho chung de mak rek rai phro; zab riichai pho awaithek chung de mak rek rai phro. <sup>11</sup> Jishii, sajiib de awiedang pha sam ruii phro, chiih-è chie niing pha oi pha rey ruii phro, chiih-è muathek thog ruii phro, chiih-è hamang è de khuchung de adoh ba pha nane rum pha blia doh ruii phro. <sup>12</sup> Hi thek rey pha ibi shii, gu Chiang è nathek shii zum srane diig phi ruii phro; Nathek shii Jewthek misiahò hà miyao che ne sai ruii phro chiih-è phatheg hà de chab muui phro; nathek shii sajathek nane bohkhohphothek ibi shii noh ruii phro. <sup>13</sup> Jine Mua Wie yao ithek ro pha chua ro. <sup>14</sup> Nawaithek khani shii khriig rek bi ne nawaithek shii khi-èrek ne ragia rek chid pha ji ne munow athiig chid rabo, <sup>15</sup> nyieliieshii gu naro mak phothek è achang mua dang pha miyaogamthek nane khani phi ruii phro. <sup>16</sup> Nathek shii ne nawaithek aphuii amuii, nawaithek khuiinothek, nawaithek siangthangthek, chiih-è nawaithek ijakthek shii phi muui phro; chiih-è nathek giak shii ne ua muui phro. <sup>17</sup> Gu Chiang è nathek shii khiijai pha rek ruii phro. <sup>18</sup> Jishii nathek ro khrug è khaziang iphen jia de ashan yi phro. <sup>19</sup> Chuh è riu bo, ji arone nathek ne ragia rek mua phro.

*Isu è Jerusalem chuak dun pha miyao ji yao  
(Mth 24:15-21; Mrg 13:14-19)*

<sup>20</sup> Nathek Jerusalem shii armingthek shand ne riu pha doh arone nathek ne thieg bo Jerusalem ne jog chuak dun phro. <sup>21</sup> Chiiphado è Judea shii um phothek ne phiingduii hà yoh chid phro, chiih-è hanyie rajan shii um phothek ne ji pha rajan ji thoh chid phro, chiih-è hanyie yi soh è fuang hà um pho ne ji pha rajan iliing hà awuii rabo. <sup>22</sup> Ji ne lago pha inaithek ro, jigigam shii nyie zey pha ji ne izai rey yi phro. <sup>23</sup> Ji pha inai shii ne lui shii ani wiig pha hò-amuii nane ani lu um pha amuiithek ne khama diig rey ruii phro! Chiih-è soh lakhung shii diig thog ruii phro, chiih-è Hamangkhung-aphuii ro lago ne jipha brantheek shii thog ruii phro. <sup>24</sup> Giak shii ne khamrie è ua muui phro, chiih-è giak shii ne zum srane phatheg hà chab ne zab pha soh hà noh dun phro; chiih-è nathek ishak athog sapho shii ne Jerusalem hà Hamangkhung-aphuii shii athieg pha brantheek lai iliing hà ruii muui phro.

*Bran dufuii wuii ruii  
(Mth 24:29,31; Mrg 13:24-27)*

<sup>25</sup> Thiisa hà hasiang, habie nane dadiang de khuchung de arey pha ji rey dun phro. Ichiih sohnyiak pha zab soh ne nyie arek muluii pha khamuiiboh munoi ji è de rum dum phro, chiih-è khamuiiboh mujiiao ji de boh boh rey dun phro. <sup>26</sup> Chiih-è ithek è rum srane sohnyiak shii diig thog ruii pha miyao ji khan srane iytho rey dun phro, hamangkhung pha bluthek pha ithek ro blia de sid dun phro. <sup>27</sup> Chiiphado Bran Dufuii ne bajoboh blu nane biisiie rog sakhamiing è wuii ruii phro. <sup>28</sup> Jithek pha ishak jao ne rey mage shii ithek jaifad srane khrug laziung hù bo, nyieliieshii ithek giawo ne nui sha ro.

*Iphem hingmmuii pha muyua  
(Mth 24:32-35; Mrg 13:28-32)*

<sup>29</sup> Chiiphado Isu è ithek shii ji pha najang è yao, Iphem hingmmuii shii nane gai pha hingmmuiithek shii now mage bo. <sup>30</sup> Nathek è ithek irab jao ne nyiu pha doh mage shii haluadam ne nui rey sha rone ithek ne thieg. <sup>31</sup> Ji duiine, nathek è ji rey pha doh mage shii nathek de thieg iang bo, Hamangkhung-aphuii ro Sajathua ji ne nui thog sha ruii ro. <sup>32</sup> Now bo, hì thek pha zab miyao ne arey sapho shii ne ichiih rai pha brantheek a-iy ba phro. <sup>33</sup> Hamang nane sohnyiak ne san dun phro, jimagunde gu miyaogamthek ne khuchung de ashan phro.

*Riig chid phro*

<sup>34</sup> Nawaithek shii nowbthan ne rai bo, ithek bajo chie niing pha nane hì pha shud nawaithek sieng pha muno diig ne bajo ong ne aruii rabo, chiih-è ji pha ishak ne nathek shii zum pha ji ne hamblo è thog ruii phro. <sup>35</sup> Hi è rek phane zab pha sohnyiak pha brantheek shii thog ruii phro. <sup>36</sup> Nowbthan ne idang sia ne chuh rey ne nyie rey ramuii pha ji è nathek yi ragia rek ne Bran Dufuii ibi shii riu mua pha rek bo.

<sup>37</sup> Isu è ji pha inai ishak phi srane Misiahò shii yua, chiih-è habuzuang rey mage shii ji pha habiu shii sumaro phiing hà rai pha wuii dun. <sup>38</sup> Hamiang rey mage shii brantheek Misiahò hà airo miyaogam ji yoi pha wuii dun.

## 22

*Branthek è Isu shii gidieg rek  
(Mth 26:1-5; Mrg 14:1,2; Jon 11:45-53)*

<sup>1</sup> Sai ne Phiia ajiie pha Iweb chie pha ishak nui thog shii, nyie yi Hiiadun pha ji ro. <sup>2</sup> Khophabi nane Iphey yua pha masdothek ne branthek shii rum, chiih-è ithek ne ug ne Isu shii ua muui pha lumuii mua bidiang.

*Judas è Isu shii zum pha nuii  
(Mth 26:14-16; Mrg 14:10-14)*

<sup>3</sup> Chiihphado sakhathong è Judas iliing shii khud, snanyi Samoythek è jia shii hanyie shii Iskharioth ro è beng muui pha ji ro. <sup>4</sup> Ji-è Judas yi boh phabi shii nane misiahò khan pha dumuiithek shii wuii srane Isu shii nyie khi-èrek ne zum mua ne ithek shii phi mua pha ji yao.

<sup>5</sup> Ithek ne sang ne aishii bang phi pha ro è yao. <sup>6</sup> Judas è ji nuii srane jao ne soh, chiih-è branthek è athieg yi pha chua wie shii Isu shii zum ne ithek shii phi pha rek.

*Isu hiiadun pha ji shii chie pha michie saro  
(Mth 26:17-25; Mrg 14:12-21; Jon 13:21-30)*

<sup>7</sup> Sai ne Phiia ajiie pha iweb chie pha inai thog mage shii Hiiadun pha ji shii chie pha shiishaiduiithek ua. <sup>8</sup> Isu è Phithar nane Jon shii airo Hiiadun pha michie ji khriig rek iang bo è yung ne thoh ge.

<sup>9</sup> Ithek è aishii sai, na è gathek shii khi hà khriig rek bo è yang lei?

<sup>10</sup> Ai è chang, nathek rajan iliing hà wuii thog shii, hò-aphuii jia kho jariie han pha si ruii phro. Ai khi pha hò shii khud lei ne ai iidoh shii khud gieng bo. <sup>11</sup> Chiih-è hò muspha jishii sai bo, Masdo è yao muui ro, ithong nane samoythek Hiiadun pha michie chie pha ùgud khi hà lei? <sup>12</sup> Ai è nathek shii lakhung pha iiguno hà boh wie ùgud jia doh yi phro, thiisa hà zab khriig rek ne ruii pha mua phro. <sup>13</sup> Isu è ithek shii nyie khi-èrek yao lei ne ji duiine doh chiih-è ithek Hiiadun pha michie deb rek iang.

*Ithong ro michie  
(Mth 26:26-30; Mrg 14:23-25)*

<sup>14</sup> Ishak thog mage shii, Isu è awai rog shii boh pha samoythek noh ne thiibliie shii dug. <sup>15</sup> Ai è ithek shii yao, guro diig rey pha ishak athog ba pha ibi shii gu ithek rog shii dug ne Hiiadun pha ji chie pha now ro! <sup>16</sup> Ji-è gu nathek shii yao, Hamangkhung-aphuii ro Sajathua pha miyao ji izai arey sapho shii ne gu dinne achie phro.

<sup>17</sup> Chiihphado Isu è gog ji chiing srane, Hamangkhung-aphuii shii laso phi ne chiih-è yao, “Hi pha gog yie srane nawaithek chung thang ne niing bo.

<sup>18</sup> Gu nathek shii yao phro Hamangkhung-aphuii pha Sajathua pha ji athog sapho shii ne gu hì pha phuii aniing phro.”

<sup>19</sup> Chiihphado ai è iweb dum jia chiing srane Hamangkhung-aphuii shii laso phi ne ji srane, ithek shii phi ne yao, “Nathek shii phi pha iweb hì ne guro siu ro. Gu shii now pha hì rek bo.” <sup>20</sup> Ji duiine iweb pha ido shii ai è ithek shii gog phi ne yao, nathek shii thoi ramuii pha hì pha gog ne Hamangkhung-aphuii ro iwo shiinyie shii guro ifai è cheb rek ne phi phro.\*

<sup>21</sup> “Jishii riig bo! Hanyie è gu shii zum yi pha rek pha ji ne ichiih gu rog



thiibliie shii dug ne um ro! <sup>22</sup> Bran Dufuii ne Hamangkhung-aphuii è yang pha duiine iy phro, jimagunde gu shii zum pho ne khama diig rey ruii phro!”

<sup>23</sup> Chiihphado awaithek chung jao ne sai rai, hi è rek ramuii pha ji ne hanyie lei?”

*Boh Chiang shii khnaing rai*

<sup>24</sup> Chiih-è ithek duchoi shii hanyie boh lei ne sai srane awaithek chung khnaing rai. <sup>25</sup> Isu è ithek shii yao, Hamangkhung-aphuii shii athieg pha sajathek ne brantheK lakhung shii blu rek, chiih-è bohkhohphothek è yao gathek ne brantheK pha ijak ro. <sup>26</sup> Jishii hi duiine nathek ne arek rabo; ji è nathek duchoi shii hanyie boh ji ne zab è iu rey ruii phro, chiih-è dumuii ne khiao rey phro. <sup>27</sup> Chiih-è boh ne hanyie ga, chie ne dug pha ji boh ba, chiih-è michie phi pha ji boh ba? Dug pha jia ji boh ro. Jishii gu ne ithek duchoi shii khiao duine ro. <sup>28</sup> Nathek de gu diigchiao rek shii gu rog shii um gieng; <sup>29</sup> Chiih-è gu aphuii è gu shii bohkhoh pha rangsua phi pha duiine, nathek shii de gu è ji duui pha rangsua phi phro. <sup>30</sup> Nathek de guro Sajathua hà guro thiibliie shii chie niing ne rai ruii phro, chiih-è nathek ne biangtheK shii dug srane Israel pha snanyi jadthek shii bohkhoh ruii phro.

*Phithar è athieg ro è yao pha ji Isu è chaig*  
(Mth 26:31-35; Mrg 14:27-37; Jon 13:36-38)

<sup>31</sup> Simon, Simon! Yoi mage bo! raigpho è phiug shii igam è isug shii yoh rek pha duine ithek shii wie è awie pha ji è yoh rek pha Sakhathong è rangsua muajong ro. <sup>32</sup> Jishii Simon, naro migi è achihi y ne pha, gu na shii siajong phi ro, chiih-è na ne gu shii iidoh khid shii na nawai khuinothek shii migi chuh rek noh bo.

<sup>33</sup> Phithar è chang, “Ithong, gu de narog shii phatheg hà wuii ne narog shii iy gieng pha deb ro!”

<sup>34</sup> Isu è yao, gu na shii yao, Phithar, “Khe a-io ba pha ibi shii na è gu shii athieg ro è uom chiing yao ruii phro.”

*Biia, baneb nane khamriie*

<sup>35</sup> Chiihphado Isu è awai samoythek shii sai, gu è nathek shii biia, baneb nane lakhia ayie yi pha thoh ge pha ishak shii ithek asiok pha rey ne bey? Ithek è chang, gathek shii nyie de diig arey ro. <sup>36</sup> “Jishii thiih” shii ne, Isu è yao, hanyie shii biia nane baneb um phothek yie ruii bo; chiih-è hanyie shii khamriie oi arone nawaithek yung liu srane muduii phek ne yie ne wuii bo.

<sup>37</sup> Ji-è gu nathek shii yao, jigigam shii yao pha duiine, aishii ne mugo pho rog shii luajong muii ro. Gu shii nyie yao pha ji ne izai rey phro, nyieliieshii jigigam shii zey pha ji ne izai thog ruii ro.

<sup>38</sup> Samoy jia è yao, riig mage bo Ithong! Ichiih shii khamriiethek nyi um ro, ai è chang,† ji nyia ne khriig sha phro.

*Isu samaro phiing hà sia*  
(Mth 26:36-46; Mrg 14:32-42)

<sup>39</sup> Isu ji pha rajan shii thoh srane idang awai mirek pha ji duiine sumaro phiing hà wuii dun, chiih-è samoythek de ai rog shii wuii gieng. <sup>40</sup> Ithek ji pha ithua hà thog mage shii, ai è ithek shii yao, “Nathek shii chuajan hà achihi y pha sia bo.”

**22:24** 22:24: Mth 18:1; Mrg 9:34; Lug 9:46    **22:25** 22:25,26: Mth 20:25-27; Mrg 10:42-44    **22:26** 22:26: Mth 23:11; Mrg 9:35    **22:27** 22:27: Jon 13:12-15    **22:30** 22:30: Mth 19:28    **22:35** 22:35: Mth 10:9,10; Mrg 6:8,9; Lug 9:3; 10:4    **22:37** 22:37: Aij 53:12    † **22:38** 22:38: hi khriig; dinne hi nama.

<sup>41</sup> Chiiphado è ai ithek è lubao fen shii nyathog mua sapho ruang hà wuii srane lagiung niing ne sia. <sup>42</sup> Ai è yao, “Aphuii,” Na è yang arone hì pha diig gog ne gu è yie muui bo. Jishii gu miyang è asi ro, na miyang ji rey bo. <sup>43</sup> Hamangkhiie shii jia è wuii thog srane aishii chuh rek phi. <sup>44</sup> Din ne de ai lubu bajo diig now srane bajo gang è siaramuii shii; airo hanyua ne ifai chen pha duiine nyiak lakhung shii chenramuii ro. <sup>45</sup> Ai sia ched srane iidoh dun shii, airo samoythek yi duhug rek srane men pha doh. <sup>46</sup> Ai è ithek shii yao, nathek nyie rek ne men phlei? Nathek sieng srane chuajan hà achihi yì pha sia mage bo.

*Isu shii zum*

*(Mth 26:47-56; Mrg 14:43-50; Jon 18:3-11)*

<sup>47</sup> Isu ji yao ramuii shii snanyi Samoythek è jia Judas beng muui pha ji è bran iphiing shii noh srane, Isu shii wuii ne ai mizia shii khichiug. <sup>48</sup> Jishii Isu è yao, “Judas, nane mizia khichiug srane Bran Dufuii shii zum ne bey?”

<sup>49</sup> Hanyie ai rog shii um pha samoythek è nyie reynamuii pha ji riig srane, ithek è Isu shii sai, “Ithong khamriethek rek ne ithek shii che mage habey?” <sup>50</sup> Chihih-è samoy jia è Kho Phabi pha khiao jia shii airo phazoi pha kho hab chie mage.

<sup>51</sup> Jishii Isu è yao, “Ji khriig sha phro!” Ai è ji pha bran kho shii khoh srane gang phi.

<sup>52</sup> Chiiphado Isu è boh phabi shii chihih-è Jewthek misiahò ragia rek pha dukhothek nane ragia rekpho nane kho thiihchihih aishii sow pha wuiiphothek shii sai, nathek gu shii mugo pho ro è now srane khamriethek nane muchang yie ne wuii ne bey? <sup>53</sup> Gu ne idang nathek rog Misiahò shii rai, jishii nathek è gu shii zum pha abidiang. Igiia pha blu è bokho mage shii, jishii nathek ishak ne hì bey?

*Phithar è Isu athieg ro snai*

*(Mth 26:57,58,69-75; Mrg 14:53,54,66-72; Jon 18:12-18,25-27)*

<sup>54</sup> Ithek è Isu shii zum srane kho phabithek hò hà noh dun shii Phithar de ruang è ai iidoh luangieng. <sup>55</sup> Sibiang pha duchoi shii bai fu srane ithek ang ne rairamuii shii Phithar de ithek rog shii bai anggieng. <sup>56</sup> Khiao bimi jia è ai thiihchihih shii ithek rog shii dug ne rai pha doh mage shii ai è wie riig srane yao, hì pha bran de Isu rog shii um phro.

<sup>57</sup> Jishii Phithar è asi ro è yao, “Hò-amuii jishii yao, gu ne aishii athieg ro!”

<sup>58</sup> Tùjia pha iidoh shii bran jia è Phithar shii riig srane yao, “Na de ai rog shii um phade ne!”

Jishii Phithar è ji pha bran shii chang, “gu asi ro!”

<sup>59</sup> Chihih-è ishak jia rey pha iidoh shii gai bran jia è de sriid è yao, hì pha bran de izai Isu rog shii um chak ro, nyieliieshii ai de Galili ro.

<sup>60</sup> Jishii Phithar è ji pha bran shii chang, na nyie yao ramuii pha ji ne gu athieg ro!

Ai ji nya yao ramuii shii khthiie khe de èo dang phro. <sup>61</sup> Ithong è Phithar shii rei srane wie riig mage shii, Phithar shii Ithong è aishii sudoh biu khe phuii a-lo ba pha ibi shii na gu shii uomchieng athieg ro è yao ruii phro è yao pha ji now khlei. <sup>62</sup> Phithar fuang hà wuii srane bajo khiwegkho ne cho.

*Isu shii zuang srane makhakrieng rek*

*(Mth 26:67-68; Mrg 14:65)*

<sup>63</sup> Isu shii ragia rek pha bran ji è aishii zuang srane ai mirek jithek nui.  
<sup>64</sup> Ithek è ai mieg shii chiege srane aishii sai, na shii hanyie muzuang lei? Than riig bo! <sup>65</sup> Ithek è aishii bajo makhakriing yao.

*Isu shii limiang moe hà noh*  
 (Mth 26:67-68; Mrg 14:65)

<sup>66</sup> Hamiang rey mage shii, dukhothek, boh phabithek nane Iphey yua pha masdothek ò si, chiih-è Isu shii limiang moe hà noh. <sup>67</sup> Ithek è yao, “Gathek shii yao riig bo,” Na ne Masi bey? Ai è chang, gu è nathek shii yao magunde, nathek è gu shii migi anow phro; <sup>68</sup> Chiih-è gu ithek shii musai sai magunde nathek gu shii achang phro. <sup>69</sup> Jishii sudoh è thiwing Bran Dufuii ne Hamangkhung-aphuii ro Bohblu pha ji pha phazoi shii dug ruii phro. <sup>70</sup> Ithek zab è aishii yao, “Chiihphado, na ne Hamangkhung-aphuii ro Dufuii bey?” Ai è ithek shii chang, nathek è yao arone gu ne ji chak ro.

<sup>71</sup> Chiih-è ithek è yao, “Gathek ne na chang shii dinne a-id chid sha, ai è nyie yao pha ji ne gathek è yoi jong.”

## 23

*Isu shii Philath ibi hà noh*  
 (Mth 27:1-2,11-14; Mrg 15:1-5; Jon 18:28-38)

<sup>1</sup> Zab pha ibrog è jai srane Isu shii Philath ibi hà noh ne, <sup>2</sup> ithek è jao ne aishii the, hì pha bran è gathek bran shii asi pha lumuii hà noh ne Bisiuthek shii de mijin athan chid rabo è yao phro chiih-è awai shii Masi, saja ro è yao pha chang è zum phro.

<sup>3</sup> Philath è aishii sai, “Na ne Jewthek pha saja bey?”

Na è ji è yao arone gu ne ji chak ro.

<sup>4</sup> Chiihphado Philath è boh phabi nane bran ibrogthek shii yao, gu ne hì pha bran shii the mua pha nyie ichiig adoh phi ro.

<sup>5</sup> Jishii ithek bajo sriid è yao, ai awairo muyua ji è zab pha Judea pha branthek shii srobros rek. Ai Galili hà jao srane thuh shii ichiuh de wuii thog sha dun ro.

*Isu shii Herod ibi shii thoh ge*

<sup>6</sup> Philath è ji yoi srane, ai è sai, “Hì pha bran yi Galilean chak bey?” <sup>7</sup> Ithek è Isu ne Herod è bohkhoh pha ithua pha ro è thiege mage shii, ithek è aishii Herod hà thoh ge, ji pha ishak shii awai de Jerusalem shii um. <sup>8</sup> Herod è Isu shii riig mage shii bajo sang, nyieliieshii ai è ai chang yoi srane ai Isu shii bajo inai è riig yang. Ai ne luthong ne Isu ro buang pha blia riig yang. <sup>9</sup> Ji-è Herod è Isu shii mushai bajo sai, jimagunde Isu è nyie de achang phi. <sup>10</sup> Kho phabi nane Iphey yua pha masdothek è dinne sriid rek srane Isu shii gidieg rek ne gang è the. <sup>11</sup> Herod nane airo siphahithek è Isu makhakriing srane the yao; chiihphado ithek è aishii yung wie guui phi srane iidoh Philath shii thoh ge. <sup>12</sup> Ji pha iidoh shii Philath nane Herod de ijak rey khlei dun; ji pha inai ibi shii awaisa chung de shuang ro.

*Isu shii iy yi pha yao*  
 (Mth 27:15-26; Mrg 15:6-15; Jon 18:39—19:16)

<sup>13</sup> Philath è kho phabi shii, dumuiithek shii nane branthek shii ò shii ho, <sup>14</sup> chiih-è ithek shii yao, “Ai è branthek shii asi pha lumuii shii noh ne lua phro è yao ne ithek è hì pha bran shii gu hà noh thog. Thiuh, ichiuh shii nawaithek de gu moe shii gu è aishii bujuii shii, chiih-è ithek è aishii the

pha ji è ne ichiig adoh phi ro. <sup>15</sup> Herod è de aishii nyie ichiig adoh phi, ji è ai ne iidoh gathek shii thoh ge. Hì pha bran shii iy yi sapho nyie ichiig oi ro. <sup>16</sup> Ji-è gu aishii zuang srane dun ge yi pha ro.\* <sup>17</sup> Hiiadun pha ishak shii idang Philath è ithek ro phat heg pha bran jia shii thoh.

<sup>18</sup> Zab pha ibrogthek è gang ziak, “Aishii ne ua muui bo è yao! Chiih-è Barabas shii thoh ne gathek shii phi bo!” ( <sup>19</sup> Barabas shii phat heg hà chab pha ji ne ai è rajan shii awie pha blia rek chiih-è bran shii ua, ji è aishii ne phat heg hà chab phro.) <sup>20</sup> Philath è Isu shii sey ne thoh yang srane ji è branthe k shii wie è yao. <sup>21</sup> Jishii de ithek è iidoh ziak dinne yao, “Aishii zun muui bo! Aishii zun muui bo!”

<sup>22</sup> Philath è ithek shii uomchiieng yao sha, jimagunde ai ne nyie buii blia rek mua lei? Gu ne aishii ua sapho nyie ichiig adoh phi ro! Gu aishii zuang srane thoh mua pha ro.

<sup>23</sup> Jishii ithek è bajo gang è ziak srane yao, Isu shii ne zun chid phro. Chiih-è iidohhè ithek miziak ji ne yang ge. <sup>24</sup> Ji-è Philath è ithek è Isu shii zun bo è lia pha ji shii ruii mua. <sup>25</sup> Ai è ithek chid pha bran jishii sey ne thoh phi hanyie è buii rek srane bran shii ua mua pha Chiang è phat heg shii chab mua, chiih-è ai è nawaithek nyie rek yang pha ji rek bo è yao srane Isu shii ithek wad shii phi mua.

### *Isu ne zun muui*

*(Mth 27:32-44; Mrg 15:21-32; Jon 19:17-27)*

<sup>26</sup> Siphahithek è Isu shii noh ramuii shii, Simon beng pha Khyren soh pha rajan è wuii ramuii shii ithek è aishii si. Ithe k è zum srane aishii de bai ji han yi ne Isu iidoh shii lua ba yi. <sup>27</sup> Bran iphiingthek de ai iidoh shii luagieng, ithek duchoi è giak hò-amuii è Isu shii bushun now srane cho ne luagieng. <sup>28</sup> Isu è iidoh rai srane ithek shii yao, “Jerusalem pha hò-amuiithe k! Nathek gu Chiang è achoh chid rabo, jimagunde nawaithek shii nane nawaithek aniphiingthek shii choh bo. <sup>29</sup> Irek pha inai thog ruii phro branthe k è yao ruii, ‘Hanyie hò-amuii è khuchunde ani oi pho ne, hanyie shii khuchunde ani agiak pho ne, chiih-è khuchunde ani niu awang pho ne khama khirzey ro!’ <sup>30</sup> Ji pha ishak shii ne branthe k è phiingthek shii yao ruii phro, ‘Gu lakhung shii chiih mage bo!’ Chiih-è phiingduithe k shii de yao gu shii ‘Ug phi bo!’ <sup>31</sup> Hing isiang ba shii rang de hithek rey hing gow dun pha ishak rey mage ne nyie rey phlei?”

<sup>32</sup> Gai bran layog rek pha nyi shii de Isu rog shii ua pha noh dun. <sup>33</sup> Ithe k Gadong rone beng pha ithua shii thog mage shii, ithek è Isu shii thiichiih zun muui, chiih-è layog rek pha bran nyi shii de jia shii ai phazoi hà zun chiih-è jia shii ai phawik hà zun muui. <sup>34</sup> Isu è yao, “ithe k shii khung phi bo, Aphuii, ithek nyie srane airo yung yi awaithek chung thang rai. <sup>35</sup> Bran the k thiichiih riu ne Jewish dumuii the k è aishii biwo rek pha ji riigramuii, “Ai è gai shii ragia rek phi; ai ne Hamangkhung-aphuii mugua pha Masi chak arone awai shii ragia rek yi bo!”

\* **23:16** 23:16: giak jigizey shii ne lao 17: shii iy yi sbo nyie ichiig oi ro (riig Mrg 15:6) **23:30** 23:30: Hos 10:8; Dng 6:16 **23:34** 23:34: Chng 22:18 † **23:34** 23:34: giak jigizey shii ne oi Isu è yao, “ithe k shii khung bo, Aphuii! ithek ne athieg ro awaithek nyie rek ramuii pha ji shii.” **23:35** 23:35: Chng 22:7

<sup>36</sup> Siphahi jia de aishii biwo rek: ai è de wuii srane aishii igong thoh pha phuii wang, <sup>37</sup> chiih-è yao, “Na ne Jewthek pha saja chak arone nawai shii de ragia rek riig bo!”

<sup>38</sup> Ai lakhung shii hì pha miyaogam zey ne um ro: “Hi ne Jewthek pha saja ro.”

<sup>39</sup> Thiichiih zun pha Layog rek pha bran jia de aishii biwo bajo rek ne yao: na Masi asi bey? Nawai shii de ragia rek bo chiih-è gasa shii de ragia rek mage bo.

<sup>40</sup> Gai jia ji è aishii giung, “Na ne Hamangkhung-aphuii shii arum bey? Na shii de ai mirek ji duiine mua ne bey. <sup>41</sup> Giisa shii mua pha ji ne rangsua chak ro, nyieliieshii giisha nyi mua ne sapho ichiiig rek pha ji mua phro; jimagunde ai ne nyie ichiiig de arek.” <sup>42</sup> Chiih-è ai Isu shii yao, “Isu na Saja rey mage, gu shii de now bo!”

<sup>43</sup> Isu è aishii yao, gu na shii sbang rek phro sudoh na de Hamangkhung hà gu rog shii um ruii phro.

### *Isu iy dun*

*(Mth 27:45-56; Mrg 15:33-41; Jon 19:28-30)*

<sup>44-45</sup> Hi rek pha ishak yi snanyi è uom ishak thog dang pha hasieng asiang pha soh zab biak rey dun; chiih-è Misiahò shii rang pha yungshaig ji de nyi rang ji dun. <sup>46</sup> Isu goh gang è yao, “Aphuii wo! Gu ragung na wad shii ruii phro!” Ai ji è yao srane iy dun.

<sup>47</sup> Arming dumuii è nyie rey pha ji jithek riig srane Hamangkhung-aphuii shii chiong srane, yao, ai ne izai bran wie chak ara ro.

<sup>48</sup> Branthek thiihchiih shii nyie rey pha ji riig pha khrab thog mage shii jithek doh srane ithek duhug rek ne awaithek lubutho phey ne iidoth hò hà dun dun. <sup>49</sup> Khinyama phothek è Isu shii thieg, chiih-è Galili pha hò-amuii hanyie è Isu rog shii luagieng pha ji lua dang ne, ithek de iujia ruang shii riu ne riig ramuii.

### *Isu wieng muii*

*(Mth 27:57-61; Mrg 15:42-47; Jon 19:38-42)*

<sup>50</sup> Thiisa Judea pha Arimathea thawun pha bran Joseph beng pha jia um. Ai yi wie nane ilab um pha bran ro, hanyie è Hamangkhung-aphuii ro Sajathua wuii ruii pha ji khan ne rai. <sup>51</sup> Ai ne limiang pha de dumuii ro, ai ne ithek munung nane ithek bliia shii de anuii phi. <sup>52</sup> Ai è Philath moe shii wuii srane Isu ro siu iy ji lia. <sup>53</sup> Chiihphado ai è siu iy ji thazam yie srane yung wie è jiang srane, sak gang è chog ne hanyie de aruii ba pha wieng jishii ruii. <sup>54</sup> Hì yi sugrbari inai shii ro, chiih-è Jewish Thung pha Inai yi jao sha pha rek ro.

<sup>55</sup> Galili pha hò-amuii hanyie è Isu rog shii luagieng pha ji de wieng shii Isu ro siu iy ji khi-èrek ne ruii lei ne riig pha Joseph rog shii wuii gieng.

<sup>56</sup> Chiihphado è ithek iidoth hò hà dun srane wie no pha nane siie yie ne siu iy jishii shun phi pha saro.

Jewish Thung pha Inai shii Iphey shii yao pha duiine ithek thung ne rai.

## 24

### *Isu dinne hò*

*(Mth 28:1-10; Mrg 16:1-8; Jon 20:1-10)*

<sup>1</sup> Deobari pha hamiang bajo riang hò-amui phiingthek è saro pha sei nane wie no pha ji yie srane wieng hà wuii dun. <sup>2</sup> Ithek shii riig shii wieng cho ji bin pha lubao ne hong dun pha doh. <sup>3</sup> Ji-è ithek iliing hà wuii srane riig shii; jimagunde ithek Ithong Isu ro siu iy ji adoh. <sup>4</sup> Ithek ne thiuhchiih shii ji riig srane ayaomuluii ne riu ramuii shii, hamblo è bran nyi yi yung imo chuang srane ithek moe shii riu thog mage. <sup>5</sup> Bajo rum srane, hò-amuiithek è nyiak lakhung shii bam, bran ji è ithek shii yao, “Nye rek ne nathek ne bran sieng shii iy dun rone sow phlei?” <sup>6</sup> Ai ne ichiih shii oi ro; ai ne hòijong ro. Ai ne Galili hà ba shii ithek shii nyie yao pha ji now mage bo. <sup>7</sup> ‘Bran Dufuii shii ne zum srane layog bran shii phi ne bai shii zun muui phro, chiih-è da-uom shii ne hòi din phro.’ ”

<sup>8</sup> Chiihphado shii hò-amuiithek è ji pha miyao now, <sup>9</sup> wieng è iidoh dun ne, jithek pha miyogamthek ji zab samoy snajia shii nane gaithek shii de yao. <sup>10</sup> Ji pha hò-amuii thek yi Mery Magdalene, Joana, Jems amuii Mery; ithek nane gai hò-amuiithek rog pha ji è boh pha samoythek shii yao. <sup>11</sup> Jishii samoythek è hò-amui phiingthek miyao ji yi thaluii ro è now, chiih-è ithek shii migi arek. <sup>12</sup> Jishii Phithar è jai srane wieng hà ran dun; ai jiing ne riig shii aishii jiang pha yung ji ne um, jimagunde gai ne nyie de oi. Chiihphado ai iidoh hò hà dun srane nyie rey dun ro è wiengphleg dun.\*

### *Emaus shii Lua* (Mrg 16:12-13)

<sup>13</sup> Ji pha ishak shii Isu ro samoy nyi yi Jerusalem è snajia labiang è ruang Emaus hà wuiiramuii shii, <sup>14</sup> chiih-è isa chung jithek rey pha miyao ji yao ramuii. <sup>15</sup> Ai è yao ne muloramuii shii, Isu yi wuii thog srane isa rog shii luagieng; <sup>16</sup> Ai è aishii doh, jimagunde de isa è aishii athieg mua. <sup>17</sup> Isu è isa shii yao. “Nawai sa ji lua srane, nyie mulo raimuii lei?” Ai thiichiih shii mizia duhug rey srane riu dun. <sup>18</sup> Khleophas, beng pha jia ji è, aishii sai, “Na ne ichiih Jerusalem shii biwen wuii ne bey, iujia pha nai ibi nyie rey pha ji ne na athieg ba bey?”

<sup>19</sup> Ai è sai, “Nye rey phiiga?” Ithek è chang, Nazareth pha Isu shii rey pha ji ro. Ji pha bran ji ne chaig ro, ai nyie yao pha nane nyie rek pha ji ne bohblu um rone Hamangkhang-aphuii nane brantheke de yoi. <sup>20</sup> Gathek ro boh phabi nane bohkhoh phothek è aishii ne zum ne ua muui pha phi muui, chiih-è aishii ne bai shii zun muui phro <sup>21</sup> Chiih-è gathek muluthong ne ai ne jia phro Israel shii lam phi pha ji ne! Hi thek zab rey pha ne sudoh da-uom rey sha ro. <sup>22</sup> Gathek ibrog pha giak hò-amuiithek è ithek buzam wieng hà wuii dun shii, gathek shii de wieng ba yi, <sup>23</sup> Jishii airo siu iy adoh. Ithek iidoh dun srane yao ithek è ibang shii hamangkhlhie shii doh phro, hanyie è yao ai ne isieng ro. <sup>24</sup> Gathek è giak ibrogthek è wieng hà wuii srane hò-amuiithek miyao ji duiine riig shii, jimagunde ithek è aishii adoh phi.

<sup>25</sup> Chiihphado Isu è ithek shii yao, “Nathek ne khama bi-ie ro, ithek ne chaigthek miyao jishii zab migi rek pha khama rasey ara ro! <sup>26</sup> Masi ne diig rek srane awairo biisiie shii khud pha mugak asi bey?” <sup>27</sup> Chiih-è Moses mizey pha jigigam ji è jao ne chaigthek mizey pha jigigam ji è yie srane awai shii khi è yao ne zey ne um pha miyao Isu è ithek shii isiie è yua.

**24:6** 24:6,7; Mth 16:21; 17:22,23; 20:18,19; Mrg 8:31; 9:31; 10:33,34; Lug 9:22; 18:31-33 \* **24:12** 24:12: giak jigizy shii ne azey oi 12.

<sup>28</sup> Ithek wuiiramuii pha thiig ji nui thog mage shii, Isu yi ai è ibi wuii pha now; <sup>29</sup> Jishii isa è aishii gak srane, yao, “Ga sa rog shii rai bo, inai jong ne igiia rey shii pha rek ro.” Ji-è ai iliing khud srane isa rog shii raigieng. <sup>30</sup> Ai de chie pha isa rog shii duggieng srane iweb yie khirzey sia; chiiphado è ai iweb ji srane ithek shii de phi. <sup>31</sup> Chiiphado è isa mieg de hong srane Isu shii thiig ge, jimagunde ai ne ithek mieg è ruang rek muui. <sup>32</sup> Ithek chung yao rai, ai è lumuii hà gethek shii jigigam ji wie è yua srane yao shii bai duiine gethek shii ahang bey?

<sup>33</sup> Ai jai srane Jerusalem hà iidoh dun din shii, thiisa hà samoy snajiathek yi ò khrab ne gai rog shii um iang <sup>34</sup> chiih-è yao, “Ithong ne izai hòì dinro! Ai ne Simon shii doh yi!”

<sup>35</sup> Chiih-è isa nyi è lumuii hà nyie rey pha ji nane iweb chie shii khi-èrek ne Ithong shii thiig pha jithek ithek shii wie è yao.

*Isu awai samoy pho shii doh yi*

*(Mth 28:16-20; Mrg 16:14-18; Jon 20:19-23; Blk 1:6-8)*

<sup>36</sup> Ji pha bran nyi è jithek yao ramuii shii, hamblo è Ithong awai yi ithek shii riu thog srane ithek shii yao, “Liijiing ne nathek rog shii um bo.”<sup>†</sup>

<sup>37</sup> Ithek ne rum dun srane, inow ithek ne bi-iy riigramuii. <sup>38</sup> Jishii ai è ithek shii yao, nathek nyie rek ne sham ne rum phlei? Nyie rek ne nathek khani shii è rek ne now phlei? <sup>39</sup> Guro wad nane lai shii riig mage bo, hì ne gui chak ro, gu shii hòg srane riig bo, ji arone nathek thiig ruii phro, bi-iy shii ne ibey nane izaing oi phro, jishii nathek riig bo gu shii ne um ro.

<sup>40</sup> Ai hì è yao srane ithek shii awai wad nane lai shii riig ba yi.<sup>‡</sup> <sup>41</sup> Jimagunde ithek è migi arek mua, ithek ne bajo lubo ne wiengphleg dun shii; ai è ithek shii sai, “Ichihi nathek shii nyie magunde chie pha um bey?” <sup>42</sup> Ithek è aishii ù dau jia phi, <sup>43</sup> Ai è yie srane ithek moe shii chie.

<sup>44</sup> Chiiphado ai è ithek shii yao, “Hì thek zab miyao ne gu nathek rog um ba shii yao mujo phro: Gu Chiang shii Moses pha Iphey shii chaigtek è zey pha ji nane suthun shii zey pha ji ne izai rey ro.” <sup>45</sup> Chiiphado shii ai è ithek shii jigigam pha miyao ji gao yi pha khani hong phi, <sup>46</sup> chiih-è ithek shii yao, “Hì ne nyie zey ga: Masi ne diig rek srane iy ne da-uom shii hòì din phro, <sup>47</sup> Ai ibeng pha mua ji è lubukhied pha nane layog è khung phi pha Jerusalem è jao ne zab riing pha shii yao chid phro. <sup>48</sup> Nathek ne hì pha miyao khagiphothek ro. <sup>49</sup> Chiih-è gu aphuii è gu shii nyie sbang rek pha ji ne gu nathek shii thohge phro. Jishii lakhung è thazam nathek lakhung shii blu athog sapho shii ne rajan shii khan bo.”

*Isu shii Hamangkhung hà noh dun*

*(Mth 16:19-20; Blk 1:9-11)*

<sup>50</sup> Chiiphado shii ai è rajan thoh marui srane Bethany hà noh dun, ai wad laziung phia srane ithek shii khirzey phi. <sup>51</sup> Ai ithek shii khirzey phiramuii shii, chiuh-è aishii ithek è che srane aishii Hamangkhung hà noh dun.<sup>§</sup>

<sup>52</sup> Ithek aishii sia srane bajo lubo rek ne Jerusalem hà iidoh dun din dun.

<sup>53</sup> Chiuh-è Misiahò shii awaithek ro zab ishak yi Hamangkhung-aphuii shii laso phi.

<sup>†</sup> **24:36** 24:36: giak jigizey shii ne azey oi chiuh-è ithek shii yao, “liijiing de nathek rog um bo.”

<sup>‡</sup> **24:40** 24:40: giak jigizey shii ne azey oi 40. **24:49** 24:49: Blk 1:4 **24:50** 24:50,51: Blk 1:9-11

<sup>§</sup> **24:51** 24:51: giak jigizey shii ne azey oi chiuh-è hamangkhung hà chiing pha.

## JON Ro Muawie Yaophi

*Muawie ji ne Jon è Isu ne Hamangkhung-aphuii ro idang pha Miyaogam rey ne rai phrone yao pha ji ro, hanyie “Bran rey srane gethek duchoi shii rai.” (1:14) Jigigam awai è de yao, hì pha muawie zey pha ji ne nyieliieshii Isu ne giawo pha sbang rek, chiih-è Hamangkhung-aphuii pha Dufuii rone zab thampho ne migi rek chid, chiih-è ithek migi ji è ithek shii chai um yi phro (20:31).*

Yao ched pha iidoh shii ji è ne Idang pha Hamangkhung-aphuii Miyaogam ne Isu rog shii um rone doh yi, igobi pha Muawie è Isu ne giawo pha sbang rek chiih-è Hamangkhung-aphuii ro Dufuii chak rone bajo buangthek ji rek phi. Nyie buangthek pha ji ne dong phi pha ji ne ji pha jigigam è yao. Ji pha jigigam è yao nyie è khi-èrek ne giak bran ne Isu shii migi rek ne airo samoythek rey, chiih-è gaithek ne aishii gak ne migi rek pha anuii. Itho 13-17 zey aishii zum pha ibiu shii Isu è awairo samoy rog ò shii sia ne rai pha ji zey, chiih-è ai zun pha iidoh shii ai miyaogamthek saro ne ithek shii lububo rek phi. Idohhè pha itho shii, airo zun pha ji nane hòì din pha ji chiih-è ai hòì pha iidoh shii adong pha ji yao.

Hò-amuii shii siulua shii zum phaluii ji zey (8:1-11) ji yi iliing shii ruii phro nyieliieshii zey pha bran bajo è chiih-è buyo pha zeypho è sad muui, giak è gai ithuathek hà lua.

Jon ne Masi è rey pha lasen idang pha chai ji shii chuh è rek phi, chiih-è thuh jao ramuii pha lasen chiih-è Isu ne lumuii chiih-è izai, chiih-è Jon ne idang inai pha chai kho, iweb, muchuang, brapho chiih-è airo shiishai, chiih-è angurphuii nane iwoi ragung shii chuh rek pha ji duiine ro.

### **Iliing shii um pha ji**

Yaophi (1:1-18)

Jon knowo nane Isu ro igobi pha Samoythek (1:19-51)

Isu è bran moe shii Bliá rek (2:1—12:50)

Idohhè pha inai nane Jerusalem moe (13:1—19:42)

Ithong hòì pha nane khia ruii (20:1-31)

Idohhè: Galili shii gai khia ruii (21:1-25)

### *Chai pha miyaogam*

<sup>1</sup> Soh rab pha ibi shii ne, Miyaogam ne umjong ro; ai ne Hamangkhung-aphuii rog shii um, chiih-è miyao ne Hamangkhung-aphuii ro. <sup>2</sup> Chiih-è Miyaogam ne igobi è Hamangkhung-aphuii rog shii um phro. <sup>3</sup> Hamangkhung-aphuii è zab pha mana ne ai Chiang è rab phro; jiè nyie um pha ji ne ai murab pha rangsua asi pha jia de oi dang phro. <sup>4</sup> Ji-è Miyaogam ne sieng pha ithua ro, chiih-è sieng pha\* ithua ji è bran shii muchuang phi. <sup>5</sup> Chiih-è muchuang è igiia shii khlieng phi, chiih-è igiia ne khuchung de aishii a-ua mua phro.

<sup>6</sup> Hamangkhung-aphuii è awairo muapho shii thoh ge, ji pha bran beng ne Jon ro, <sup>7</sup> Hanyie yi bran shii muchuang Chiang yua phi pha ji ro, jiè zab pha

\* **1:4** 1:4: Miyaogan ne chai ro khrug ro; dinnenie yi chai rog shii miyaogam ò rab. **1:6** 1:6: Mth 3:1; Mrg 1:4; Lug 3:1,2



bran ai miyao ji nuii srane migi rek ruii phro. <sup>8</sup> Awai sbang ne muchuang asi ro, ai ne muchuang Chiang pha miyao ji yao pha wuii phro. <sup>9</sup> Hi ne izai pha muchuang ro—muchuang sohjambling shii wuii srane bran shii Chuang phi phro.

<sup>10</sup> Miyaogam yi sohjambling shii um phro, chiih-è miyao ji è Hamangkhung-aphuii è sohjambling shii rab phro, jishii thuh de sohjambling pho ne aishii athieg ba ro. <sup>11</sup> Ai ne awairo soh hà wuii shii, jishii awairo bran è aishii aho ro. <sup>12</sup> Chiih-è hanyie magungde aishii ho ne migi rek arone, aishii ne Hamangkhung-aphuii ro ani rey yi pha ai è rangsua phi phro. <sup>13</sup> Ithek ne bran pha aphuii è giak pha duiine asi ro, Hamangkhung-aphuii ne nathek ro Aphuii ro; <sup>14</sup> Miyaogam è bran rey srane bajo bushun nane izai rek ne gethek rog shii rai gieng, gethek è airo biisiie riig, airo biisiie ne Aphuii ro Dufuii iphen ro. <sup>15</sup> Jon è choh srane ai Chiang ji yao phro, hi ne ji ro, gu è nathek shii yao pha ji ne, ai ne gu è iidoh wuii ruii phro, jishii ai ne gu è de boh ba ro, nyieliieshii ai ne gu agiak ba pha ibi è um ro.

<sup>16</sup> Ai ro ley bushun ne gethek zab shii khirzey phi phro, chiih-è gethek shii airo khirzey jia jia shii phi. <sup>17</sup> Hamangkhung-aphuii Iphhey ne Moses è phi phro, jishii izai nane bushun ne Isu Masi è phi thog phro. <sup>18</sup> Hanyiejia de Hamangkhung-aphuii shii adoh ba ro. Hanyie yi Hamangkhung-aphuii duii pha Hamangkhung-aphuii Dufuii iphen ji è doh bie ro.

*Jon khowo phi pha mua*  
(Mth 3:1-12; Mrg 1:1,8; Lug 3:1-8)

<sup>19</sup> “Na ne hanyie lei?” Ne sai pha Jewish riichai è Jerusalem pha phabi nane liwithek shii Jon moe hà thohge. <sup>20</sup> Jon è aishii chang pha agak pha jishii sang gang è chang: “Gu ne Masi asi ro.” <sup>21</sup> “Ithek è sai.† Chiihphado na ne hanyie lei?” “Na ne Elija bey?” Jishii Jon è chang, gu ne Elija de asi ro. Chiih-è dinne ai è sai. Chiihphado nane Chaig ji bey? “Ji de ai è chang, gune ji de asi ro.”

<sup>22</sup> Chiihphado ai è aishii yao, “Na gathek shii yao riig bo na ne hanyie lei?” Nyieliieshii na è nawai shii nyie ro è yao lei? Nashii sai yi pha gathek shii thohge pho shii gathek de nyayao mua phro. <sup>23</sup> Jon è aishii chang, Aijaya chaig pha è yie ne gune balimuang jabiing hà è Ithong lua pha lumuii miang rek iang bo è yao ne ziak pha goh ji ro! <sup>24</sup> Pharisithek è hanyie shii thoh ge pha muaphothek re-è, <sup>25</sup> dinne Jon shii sai, “Na ne Masi de asi, chiih-è Elija de asi, chiih-è ji pha Chaig de asi, chiihphado na nyie rek pha khowo phi phlei?”

<sup>26</sup> Jon è chang, “Gune kho è khowo phi bie phro, jishii nathek ne athieg ba ichiih gethek duchoi shii um pha ji ne. <sup>27</sup> Ai ne gu è iidoh wuii ruii phro jishii gune airo lakhia thang de asey mua phro.” <sup>28</sup> Hi pha miyao yi Bethany pha hayang ithua Jordan khamuii hà Jon è khowo phiramuii shii rey phro.

*Hamangkhung-aphuii ro shiishaiduii*

<sup>29</sup> Ji è rek ched pha thimiang shii Jon è Isu yi aishii wuii pha ji doh, ichiih shii ne hanyie sohjambling pha layog shii so rek phi pha Hamangkhung-aphuii pha shiishaiduii um ro. <sup>30</sup> Hi pha bran ne gu iidoh wuii ruii phrone gu è nathek shii yao pha ji ro, jimagungde gu è de ai boh ba ro, nyieliieshii

gu giak pha ibi shii ai ne umjong ro. <sup>31</sup> Gu ne ai hanyie rai lei ne athieg ba ro, jishii gune kho è khowo phi pha wuii bie ne ai Chiang shii Israel pha bran shii thieg yi pha rek phro.

<sup>32</sup> Chiih-è Jon è ji pha miyao ji yao: Gu è ragung yi khua-atham mia srane hamangkhang è thazam khe srane ai lakhung shii jo pha doh phro. <sup>33</sup> Gune thuh de ai ne jia chak rone athieg mua ba ro, jishii hanyie è gu shii kho è khowo phi bo è thoh ge pha Hamangkhang-aphuii è iyao phro, nane ragung yi bran lakhung shii wuii ne jo pha doh ruii phro, ai ne Ragung So è khowo phi phrone yao pha ji ne airo. <sup>34</sup> Jon è yao, “Gu ne aishii doh, chiih-è gu nathek shii yao phro, ai ne Hamangkhang aphuii ro Dufuii chak ro.”

### *Igobi pha Isu ro samoythek*

<sup>35</sup> Ji pha thimiàng inai shii Jon yi dinne awairo samoy nyi rog shii riu ne rai ramuii shii, <sup>36</sup> ai è Isu luaramuii pha ji doh srane. “Ai è yao, the jine Hamangkhang aphuii ro shiishai ro. <sup>37</sup> Chiihphado samoy nyi è ai miyao ji yoi srane Isu rog luagieng. <sup>38</sup> Isu è isa yi ai iidoh shii lua pha ji riig srane iidoh riie ne riig ne sai, isa nyie riig ramuii lai?” Ai è chang, “Na khi hà rai phlei Rabi” (Hi pha miyaogam yi “Masdo” ro è yao.)

<sup>39</sup> Ai è chang, Chiihphado thawuii srane riig bo. (Ji è rek pha ji ne habjuang ishak wi rey shii ro). Ji-è ai de ai rog shii wuii srane ai khi hà rai pha ji riig, ne ji pha inai ne ai rog shii rai marui <sup>40</sup> Ai è jia yi Andrew Simon Phithar ro ikhui ro. <sup>41</sup> Ai è ibam Simon shii nya si dang mage shii ai è Simon shii yao, Gathek è Masi shii doh phro. (Hi pha miyaogam pha miyaosiu ne Masi rone yao ro.) <sup>42</sup> Chiihphado ai è Simon shii Isu hà noh ne wuii dun. Isu è aishii riig srane ne yao, na ne Jon ro dufuii Simon beng ro, jishii na shii ne Khephas ho ro. (Hi pha miyao yi Phithar shii sak ro è yao pha ji duiine ro).

### *Isu è Philip nane Nathanael shii ho*

<sup>43</sup> Ji pha thimiàng duiine Isu Galili hà wuii pha phak ramuii. Ai è Philip shii sai srane yao, “Na gu rog shii wuii gieng bo” <sup>44</sup> (Philip yi Andrew nane Phithar rai muui pha thawun Bethsaida pha ro.) <sup>45</sup> Philip è Nathanael shii sai srane yao, gathek ne aishii mua jong ro, ai Chiang shii Iphey pha siog shii Moses è zey ne um pha duiine, chiih-è chaigphothek è de zey jong. Ji ai ne Nazareth pha Joseph ro Dufuii ji ro.

<sup>46</sup> “Nathanael è aishii sai. Nazareth è de blia wie nyarey mua ne bey?” Philip è chang thawuii ne riig bo.

<sup>47</sup> Isu è Nathanael yi ai moe hà wuiiramuii pha ji riig srane yao, ichiih shii de izai pha Israelthek um ro; aishii ne nyie de biidiie oi dang ro! <sup>48</sup> Nathanael è Isu shii sai nathek khi-èrek ne gu shii thieg phlei? Isu è aishii chang, Philip è na shii aho ba pha ibi ithek iphem muui iliing hà rai ramuii shii doh jong ro.

<sup>49</sup> Nathanael è chang, “Masdo” Na ne Hamangkhang-aphuii ro Dufuii ro! Chiih-è na ne Israel pha Saja ro!

<sup>50</sup> Chiihphado Isu è aishii sai, gu è nathek shii iphem muui bucho hà doh phro è yao pha miyao pha Chiang ne nathek migi now bey? Jishii gu na shii yao ithek hi è de dinne bajo boh blia doh ba ruii phro! <sup>51</sup> Chiih-è ai è ithek shii yao, gu na shii izai yao: Nathek ne hamang hong pha doh srane Bran Dufuii lakhung shii Hamangkhang-aphuii pha hamangkhiie laziung dun ne thazam wuii pha de doh ruii phro.

## 2

*Gaithek shii phiyiy*

<sup>1</sup> Nai danyì pha iidoh shii Galili pha Khana thawun pha shii phiyiy rey ramuii. Thiisa hà Isu ro amuii de um, <sup>2</sup> chiih-è Isu nane airo samoythek shii de phiyiy hà ho. <sup>3</sup> Chiih-è phuii phi ched srane, Isu ro amuii è yao, ithek shii ne phuii aled sha ro. <sup>4</sup> Isu è chang, “Nathek ne gu shii ayao chid rabo gune nyie rek chid,” “Guro ishak ne thuh de athog ba ro.”

<sup>5</sup> Chiihphado Isu ro amuii è airo khiaothek shii yao, “Ai è nyie yung pha ji ne rek phi bo.” <sup>6</sup> Thiisa hà Jew so shud pha jariie ruui pha duuine, thiichiih shii lubao pha kho jariie riig um ro, ji pha jariie ji jia shii ne wieng jia jog nya zan mua pha um. <sup>7</sup> Isu è awai samoythek shii yao, “Hi pha jariie shii kho ley zan mage bo” Ai è zab pha jariie shii kho ley phrid dang pha zan, <sup>8</sup> chiih-è aishii yao, kho giak yi fuang hà thoi srane michie pha ilkhi bran shii phi mage bo. Ai è kho ji yi. <sup>9</sup> Ji-è rek ne yie shii michie rek pha ilkhi jiè chai ne riig shii, kho jine phuii rey dun. Jimagungde ai hì pha phuii khi è khia thog phaji ne athieg (jishii ji pha phuii khi è khia pha ji ne kho chau pha khiao ne thieg); jiè ai è phiyiy bufuii shii noh <sup>10</sup> srane yao, igobi shii zab ne phuii wie phi ne niing, chiih-è biwen è lumuii niing ched pha iidoh shii phuii bsieng ji phi, jishii na ne phuii wie ne thuh de ruui bamuii ro! <sup>11</sup> Isu è hì pha igobi buang ne Galili pha gaithek shii rek srane, airo biisiie doh yi, chiih-è airo samoy de aishii migi now. <sup>12</sup> Ji-è rek ched pha iidoh shii, Isu nane airo amuii, chiih-è airo ikhuii chiih-è airo samoy Khaphernaum hà wuii srane thiisa hà dajiadanyie rai dun.

*Isu Misiahò hà wuii dun*

(Mth 21:12-13; Mrg 11:15-17; Lug 19:45-46)

<sup>13</sup> Hiìadun pha ji Sai pha ishak rey ramuii shii, Isu Jerusalem hà wuii dun. <sup>14</sup> Thiisa Hamangkhung-aphuii Misiahò hà suwuii, shiishai, pharothek, chiih-è bang zia ne thiibliie shii dug ne um iang pha doh. <sup>15</sup> Ji-è ai ne ithang è rab srane Misiahò pha suwuii shiishai pharo nane thiibliie shii phung srane bang smed dayiingdayang rek maphi <sup>16</sup> Chiih-è pharothek liu pha bran shii de yao ichiih è yie srane dun bo, guro Aphuii hò ne chongjai rek pha hò arab ro. <sup>17</sup> Airo samoythek è jigigam shii zey ne um pha ji shii nowkhlei, “Naro hò shii gu è sai pha ji ne, Oh Hamangkhung-aphuii gu shii ne bai duuine hang muii ro.” <sup>18</sup> Chiih-è Jewthek pha dumuii è musai rog shii aishii yao, ithek shii hì rek pha rangsua um rone yao pha nathek gathek shii nyie buang rek ne doh mua yi phlei? <sup>19</sup> Isu è yao, hì pha Misiahò shii chuak bo chiih-è gu da-uom shii nyarung din mua phro. <sup>20</sup> Hì pha Hamangkhung-aphuii Misiahò rung pha ne sawi è riig idam chia chiih-è na ne da-uom shii nyarung mua ne bey? <sup>21</sup> Jishii Isu è yao pha Hamangkhung-aphuii Misiahò jine awai siu shii yao phro. <sup>22</sup> Ji-è ai iy ne hòi mage shii airo samoythek è ji pha miyao nowkhlei, chiih-è ai ji pha jigigam ji now srane Isu è nyie yao pha ji migi rek.

*Isu è bran lubu now thieg*

<sup>23</sup> Hiìadun pha ishak shii Isu ne Jerusalem hà wuii bran è airo buangthek rek pha ji riig srane ai è aishii bajo è migi now. <sup>24</sup> Jishii Isu awai de ithek shii

migi anow, nyieliieshii ai ne ithek ro zab lubu ne thiegjong. <sup>25</sup> Thiichiih shii ai Chiang shii nyie de ayao, nyieliieshii ai ne ai lubu ne id jong.

### 3

#### *Isu nane Nakhodemus*

<sup>1</sup> Thiichiih shii Pharisithek pha ibrog pha ro Jewthek dumuii Nakhodemus beng pha jia um. <sup>2</sup> Habjuang jia shii Nakhodemus è Isu hà wuii srane yao, “Rabi, gathek è na shii thieg jong, chiih-è na shii ne Hamangkhung-aphuii muthoh ge pha masdo ro. Nyieliieshii Hamangkhung-aphuii nathek rog shii oi arone nathek mirek pha buang hì ne arek mua.”

<sup>3</sup> Isu è chang, “Gu nathek shii izai yao: Nathek dinne iwo è agiak sapho shii ne Hamangkhung-aphuii ro Sajathua adoh mua phro.”\*

<sup>4</sup> Nakhodemus è sai, “Bran weg rey ne dinne khi-èrek ne giak mua mage phlei? Chiih-è dinne amuii lui hà khud ne dinne agiak muii phro!” <sup>5</sup> “Din ne Isu è chang, gu na shii izai yao,” Hanyie magunde kho nane Ragung è agiak sapho shii ne Hamangkhung-aphuii pha Sajathua shii akhud mua phro. <sup>6</sup> Bran siu è giak pho ne siu rey phro, chiih-è Ragung è giak pho ne Ragung rey ruii phro. <sup>7</sup> Gu è nathek shii dinne iwo giak chid phro è yao pha ji ne nathek awiengphleg chid rabo.† <sup>8</sup> Hasam yi khi hà sam yang pha ji hà sam phro, chiih-è nathek ai è ro pha ji ne yoi, jimagungde khi è thog chiih-è khi hà dun pha ji ne nathek ne athieg ro, jiè hanyie yi Ragung è giak ji duiine ro. <sup>9</sup> “Nakhodemus è sai, hì khi-èrek mua mage phlei?” <sup>10</sup> Isu è chang, nane Israel pha boh masdo ro, jirang de a-id ba bey? <sup>11</sup> Ji-è gu na shii izai phosro gu nyie thieg ji yao chiih-è nyie doh lei ne ji yao, jishii na ne gu miyao ne anuii. <sup>12</sup> Nathek ne gu è sohjambling pha miyao yao pha rang de nathek è migi arek, jiè Hamangkhung pha miyao yao arone nathek ne khi-èrek ne migi rek mage phlei? <sup>13</sup> Chiih-è hanyie magungde hamangkhung hà adun ba ro, hamangkhung hà wuii phane Bran Dufuii hamangkhung è thazam wuii pha ji bie ro.‡

<sup>14</sup> Chiih-è Moses è jabiing hà pham shii lakhung hà khurog yi pha duiine, Bran Dufuii shii de lakhung hà khurog yi phro. <sup>15</sup> Ji-è hanyie magungde aishii migi rek arone idang pha chai muii ruii phro. <sup>16</sup> Chiih-è Hamangkhung-aphuii è sohjambling shii bajo miie rek ne awairo Dufuii iphen jia ji de phi muii, jiè hanyie magungde aishii migi rek arone ji pho ne khuchung de a-iy phro, jishii idang pha chai mua ruii phro. <sup>17</sup> Hamangkhung-aphuii è dufuii shii sohjambling pho shii the yi pha athoh ge ro, jimagungde ragia rek yi pha thoh ge. <sup>18</sup> Ji-è hanyie è Dufuii shii migi rek arone jishii ne achua ruii phro, chiih-è hanyie è aishii migi arek pho shii ne chua jong ro, nyieliieshii ai è Hamangkhung-aphuii ro Dufuii iphen shii migi arek. <sup>19</sup> Chua pha ji ne hì duiine ro, nyieliieshii muchuang sohjambling hà wuii thog shii, jishii bran è muchuang è ne igiia shii bushun rek, nyieliieshii ithek blia ne awie jiè ithek ne igiia shii miie. <sup>20</sup> Hanyie magungde awie pha blia rek pho ne muchuang shii khiijai ruii phro, chiih-è muchuang hà de awuii phi phro, nyieliieshii ai mirek pha awie blia shii atho yi pha rek. <sup>21</sup> Jishii hanyie è izai è thok pha ji shii rek pho ne, muchuang

\* **3:3** 3:3: dinpha; dinne lakhung re-è. † **3:7** 3:7: dinpha; dinne lakhung re-è. ‡ **3:13** 3:13: 21 ji re-è athohdang pha um ro. **3:14** 3:14: Ssb 21:9

hà wuii ruii phro, nyieliieshii ji pha muchuang è ne ithek è rek pha ji ne Hamangkhung-aphuii shii nuii chak rone doh yi phro.

### *Isu nane Jon*

<sup>22</sup> Chiiphado è Isu nane awairo samoy Judea du-uà hà wuii srane, thiisa hà dajiadanyi khowo phi ne rai. <sup>23</sup> Ji pha ishak Jon de Salim è lumuii ruang asi pha Aenon shii khowo phiramuii, nyieliieshii ji pha ithua shii kho bajo um. Chiuh-è bran de aishii wuii srane khowo yie. <sup>24</sup> (Hi pha miyao yi Jon shii phatheg hà achab ba pha ibi shii ro.) <sup>25</sup> Jon ro samoythek è Jew<sup>S</sup> rog shii Sang shud pha zen pha miyao re-è khnaing rai. <sup>26</sup> Ji-è ai ne Jon shii wuii srane yao, “Masdo, nathek è yao muii pha bran na rog shii um pha bran ne hayang pha Jordan pha thrang um pha ji na ne thieg chak bey? Ai ne thuh shii khowo phiramuii ro, bran de ai hà wuiramuii ro!”

<sup>27</sup> Jon è chang, Hamangkhung-aphuii è aphì sapho shii ne hanyie shii magungde nyie de oi phro. <sup>28</sup> Nawai ne gu è nyie yao pha ji yao pha khagi ro, gune Masi asi ro, jimagungde ai è gu shii ne ai è ibi thoh ge ro. <sup>29</sup> Hanyie shii phiyiy bufuii um, ai ne phiyiy bimi pha ro, jishii phiyiy bufuii ro ijak ne hanyie è riu ne nuii shii phiyiy bufuii gow yoi mage shii bajo sang ruii phro: Hi duiine gu è sang pha ji ne zab rey ge ro. <sup>30</sup> Gune ne iu rey chid chiuh-è ai ne bajo boh rey chid phro.

### *Hanyie hamangkhung è wuii phane zab è boh ro*

<sup>31</sup> Hanyie yi lakhung è wuii lei ai ne zab è boh ro, chiuh-è hanyie yi sohnyiak pha arone, ai ne sohnyiak pha miyao yao ruii phro, jimagungde lakhung è wuii pha ne zab è giu um ro. <sup>32</sup> Chiuh-è ai ne nyie doh ne nyie yoi pha ji yao shii, jimagungde hanyie è airo mua ji ayoi phi ro. <sup>33</sup> Jishii hanyie è ai mua ji yoi arone ai ne Hamangkhung-aphuii è izai rone yaothiakjong ro. <sup>34</sup> Jishii hanyie shii Hamangkhung-aphuii è thoh ge pha ne Hamangkhung-aphuii pha miyaogamthek yao ruii phro, nyieliieshii Hamangkhung-aphuii è awai Ragung aishii zab ley phi srane thoh ge ro. <sup>35</sup> Aphuii è awai Dufuii shii bajo miie rek jiè zab airo blu shii phi muii. <sup>36</sup> Ji-è hanyie yi Dufuii shii migi rek arone, ai ne idang pha chai um ruii phro, chiuh-è hanyie yi bran Dufuii shii migi arek arone ai ne chai amua ruii phro, jishii aishii ne Hamangkhung-aphuii ro lago mua ruii phro.

## 4

### *Isu nane Samarithan pha hò-amuii*

<sup>1</sup> Pharisithek è yoi, Isu ne Jon è de yang ne bajo Khowo phiramuii ro. <sup>2</sup> (Zai, Isu è ne hanyie shii de khowo aphì ro, airo samoythek è phi bie ro.) <sup>3</sup> Nyie yao phaji ne Isu yoi mage shii, ai Judea thoh srane iidoh Galili hà dun din marui; <sup>4</sup> ji duiine ai de Samaria è dong ne dun pha rey.

<sup>5</sup> Chiuh-è ai Samaria pha thiig Sykhar beng pha ithua Jakhob è awai dufuii Joseph shii phi pha raig è lumuii ruang asi pha ji hà wuii thog. <sup>6</sup> Jakhob ro khabang de thiichiih shii um iang, chiuh-è Isu lua srane jid ne thiichiih khabang shii dugdun, ji è rek shii hanai duchoi rey sha. <sup>7</sup> Samarithan pha hò-amuii jia kho chau pha wuii thog shii, Isu è ji pha hò-amuii ji shii yao, “Gu shii de kho niing pha phi bo.” <sup>8</sup> (Ji pha ishak shii airo samoythek yi michie

pheng pha bajarai hà wuii dun.)<sup>9</sup> Chiìh-è hò-amuii è chang, na ne Jew ro, chiìh-è gune Samarithan ro—ji-è na ne gu shii kho niing pha khi è lia mage phlei? (Nyeliishii Jew ne Samarithan è giong pha shiikhiiia nane gog shii agiong ro)<sup>10</sup> Isu è chang, “Hamangkhang-aphuii è nyie phi pha ji na ne ld arone, na shii kho lia pha ji ne hanyie na ne thieg ne, aishii na ne lia ruii phro, chiìh-è ai è na shii chai phi pha kho phi ruii phro.”<sup>11</sup> Hò-amuii è aishii yao, “Masdo,” Na shii ne kho chao pha sikhen de oi, chiìh-è khabang de bajo bucho hà. Ji-è na ne chai phi pha kho khi è mua mage phlei?<sup>12</sup> Hi pha khabang ne gathek ro blang Jakhob è phi marui ro; ai nane airo dufuii chiìh-è airo miiram de ji pha khabang è niing ro. Chiìh-è na ne Jakhob è de boh ba rone yao ne bey?<sup>13</sup> Isu è chang, “Hanyie magungde hi pha kho niing arone dinne gahang-ahang sha phro.”<sup>14</sup> Jishii gu è phi pha kho yi hanyie è niing ai ne dinne gakhang-ahang phro. Gu è aishii phi pha kho jine gasuang duine noi ruii phro, ji pha kho niing arone khuchung de gahang-ahang pha aishii ne idang pha chai phi ruii phro.<sup>15</sup> Chiìh-è ji pha hò-amuii è chang, “Masdo,” Chiìhphado ji pha kho gu shii de phi bo! Chiìh-è khuchung de gahang-ahang sha phro, chiìh-è dinne ichiìh shii kho han phade awuii sha chid phro.<sup>16</sup> Isu è hò-amuii jishii yao, “Chiìhphado na gey shii noh srane iidoh wuii din ruii bo.”<sup>17</sup> Ai è chang, “Gune thuh de gey oi ba ro.” Isu è hò-amuii jishii yao, na è gey oi ba rone yao pha ji ne izai chak ro.<sup>18</sup> Na ne bran guii shii geyjong ro, chiìh-è thuh shii na rog shii um pha bran ji de na ro izai gey asi ro, jiè na miyao ji ne izai chak ro.<sup>19</sup> Hò-amuii è yao, “Masdo” gu riig shii na ne chaig ro.<sup>20</sup> Guro Samarithan blangthek è ne Hamangkhang-aphuii yi phiing shii sia, jimagungde Jewthek nathek miyao ne Hamangkhang-aphuii shii sia pha ithua ne Jerusalem shii ro è yao.<sup>21</sup> Isu è Hò-amuii shii yao, na ne gu shii migi now bo, doh jia shii ji è rek pha ishak thog ruii phro, bran ne phiung lakhung shii de Aphuii shii asia chid phro, chiìh-è Jerusalem shii de asia chid phro.<sup>22</sup> Samarithan nathek è sia pha jishii ne nathek è athieg, chiìh-è Jewthek gathek è sia pha ji shii ne gathek è thieg, nyeliieshii giawo rey phane gathek Jewthek è thog ro.<sup>23</sup> Jishii ishak de thog sha ruii ro, chiìh-è thuh shii de ji rek pha ishak ne umjong ro, chiìh-è bran ne Hamangkhang-aphuii pha ragung pha blu izai Aphuii shii sia mage shii, ai nyie khi è chid pha ji izai misia ji aishii zid ruii phro.<sup>24</sup> Hamangkhang-aphuii ne Ragung ro, chiìh-è Ragung pha blu è bran ne ai duine izai è sia mua ruii phro.<sup>25</sup> Chiìh-è hò-amuii jiè aishii yao, “Gu ne thieg Masi ne wuii ruii, chiìh-è ai wuii thog srane zab miyao yao ruii phro.<sup>26</sup> Isu è chang, gu na rog shii muloramuii pha ji ne ji ro.”<sup>27</sup> Ji-è rekrampuii shii Isu ro samoythek iidoh dun thog, chiìh-è Isu yi hò-amuii rog shii mulo pha ji riig srane bajo wiengphleg dun. Jishii ithek è, na nyie chid phlei? “Hanyie de hò-amuii shii nyie de ayao,” “Chiìh-è ithek nyie rek ne hi pha hò-amuii rog shii mulo phlei ne de asai ro?”

<sup>28</sup> Chiìhphado hò-amuii jiè awairo kho jariiie thiichiih thoh marui srane iidoh thawun hà dun ne bran shii yao,<sup>29</sup> Thawuii ne ji pha bran shii riig bo, gu è nyie rek pha ji ne, ai è zab yao ro. Yang ne Masi ne ai asi bey?<sup>30</sup> Ji-è ai thawun shii thoh srane Isu hà wuii dun.<sup>31</sup> Hanai duchoi rey mage shii samoythek è Isu shii khung ne yao, Masdo, nyie magunde chie bo!<sup>32</sup> Jishii ai è chang, “Gu shii ne ji rek pha michie um ro, nathek ne athieg ba ro.”<sup>33</sup> Ji-è samoythek è awaithek chung yao rai, “Aishii gai è michie yi rey ne bey?”<sup>34</sup> Isu è aishii chang, “Gu michie ne ji ro,” hanyie è gu shii thoh ge pha airo miyao nuii ne lua, chiìh-è ai è phi pha blia ji zab rek phi pha ji ro.<sup>35</sup> Nathek

ne hì è yao? Raig pha ishak ne habie wi um ba ro. Jishii gu nathek shii yao, raig shii wie è riig mage bo, yamiing chiig pha ishak reyjong sha ro. <sup>36</sup> Ji-è yamiing chiig pho ne riinang mua ne idang pha chai iwoi chiig ruii phro, nyieliieshii raig hai pha Ithong nane raig chiig pha bran ne bajo ò shii sang ruii phro. <sup>37</sup> Hi è yao pha miyao ne izai chak ro, bran jia yi hai, chiih-è gai bran yi chiig. <sup>38</sup> Gu è nathek shii khi hà blia arek pha gai è rek pha raig shii yamiing chiig pha thoh ge ruii phro ro, nyieliieshii nathek ne gai è blia rek pha raig è de phua yi. <sup>39</sup> Samarithan thawun pha bajo bran è Isu shii migi rek, nyieliieshii hò-amuii ji è yao, Isu è gu è rek pha ji zab yao. <sup>40</sup> Ji-è Samarithantheke è Isu shii wuii ne khung srane ai rog shii rai bo è yao, jiè Isu ai rog shii inai danyi rai. <sup>41</sup> Isu mua ji è dinne brantheke de aishii migi rek, <sup>42</sup> Chiih-è bran è ji pha hò-amuii jishii yao na miyao ji jia è migi now bie pha asi ro, nyieliieshii gathek è de ai miyao ji yoijong ro, chiih-è gathek ne thieg jong hì ai ne sohjambling shii ragia rek pha izai ji chak ro.

### *Isu è ophis pha dumuii ro dufuii shii gang phi*

<sup>43</sup> Thiisa hà danyi rai maruii pha iidoh, Isu yi ithek shii thoh maruii srane Galili hà wuii dun. <sup>44</sup> Awai è yao, “Chaigntheke shii ne awai soh hà ne khuchung magunde ilab aphì ro.” <sup>45</sup> Ai Galili hà thog mage shii, Galili pho è ilab rek ne ho iang, nyieliieshii Hiidun Sai pha ishak shii Jerusalem hà ai è rek pha blia wie ji ithek è riig. <sup>46</sup> Chiihphado ai è kho è phuii rab muuii pha ithua Galili pha thawun Khana shii iidoh wuii thog mage shii, thiisa hà Khaphernaum pha badri pha dumuii jia ro ani rad ne um iang. <sup>47</sup> Ai è Isu yi Judea è Galili hà wuii thog pha yoi mage shii, Isu shii wuii thog srane yao, Khaphernaum hà wuii ne gu dufuii shii gang rek phi bo, nyieliieshii ai ne iy sha pha rek muuii ro. <sup>48</sup> Isu è aishii yao, “Na ne buangtheke pha blia ariig sapho shii ne migi arek ro.” <sup>49</sup> Ophis pha dumuii jiè chang, “Masdo,” gu dufuii a-iy ba pha ibi shii gu rog wuii gieng bo. <sup>50</sup> Isu è aishii yao, dun sha bo, “Na ro dufuii ne wie rey ge ro!” Chiihphado ji pha bran è Isu miyaogatheke ji migi now srane dun dun. <sup>51</sup> Ji-è rek ne ai dunramuii shii airo khiaothek si ne mua yao iang, “Naro dufuii ne wiejong sha ro!” <sup>52</sup> Chiih-è ji pha bran è aishii sai nyie ishak shii gu dufuii ne wie rey ge phlei? Chiihphado ai è chang, “Diyu ishak jia rey shii airo khrug rak pha ji ne wie rey ge ro.” <sup>53</sup> Chiihphado ai aphuii è nowkhlei, ji pha ishak ne diyu Isu è airo dufuii wie rey sha ro è yao pha ishak ji ro. “Ji-è ai nane airo hòpho zab migi rek dun.” <sup>54</sup> Judea è Galili hà wuii pha iidoh Isu è buang pha blia yi nyi chiieng rek sha ro.

## 5

### *Khabang hà gang phi*

<sup>1</sup> Ji-è rey ched pha iidoh shii, Isu de Jerusalem hà giang sai pha ji shii wuii dun. <sup>2</sup> Chiih-è Jerusalem pha Shiishai Gak moe shii khabang rog shii sibiang guui rab ne um, chiih-è Hebrew è jishii bethzatha ro è yao. <sup>3</sup> Chiih-è Miegthi pha, lai aluii mua pha nane slemriie ne rai pha ji de sibiang shii bajo thieng ne rai. <sup>4</sup> Itheke ne kho sid pha ji khan ne rai, nyieliieshii ai ne Hamangkhangkhlhie wuii ne kho shii nai pha ji khan ne rai. Kho ji nai mage shii hanyie yi igobi lung arone aishii ne nyie miiriie um magungde gang rey dun ro. <sup>5</sup> Chiih-è dam sa-uom è miliao è rad pha bran jia de um. <sup>6</sup> Isu è ai thiichiih shii um pha ji riig srane, chiih-è bajo idam è rad pha ji thieg srane; ai è ji pha bran shii sai, “Na wie rey pha now bey?” <sup>7</sup> Ji pha rad pha bran ji

è yao, “Masdo, gu shii ne hanyie è de khabang ji nai mage shii wo phi pha oi ro, jiè kho ji nai pha ishak shii gu de wo pha rek riig shii, gu è ne ithek bi wo dun ro.” <sup>8</sup> Isu è aishii yao, “Jai srane, Nawai lawiao chiing ne lua mage bo.” <sup>9</sup> Kthiie ji pha bran ji gang rey srane, awai lawiao han srane jao ne lua. Ji-è rek pha inai shii yi Jew Thung pha inai ro. <sup>10</sup> Ji-è Jewthek pha dumuii è gang rey pha bran ji shii yao, “Hi ne Jew Thung pha inai ro, hì pha inai shii na nawai lawio han phaji ne gathek Iphey shii gidieg rek ro.” <sup>11</sup> Ai è aishii chang, “Bran hanyie è gu shii gang rek phi pha ji è yao gui lawiao han ne lua bo è yung ro.”

<sup>12</sup> Ai è ji pha bran jishii yao, “Hi rek bo è yung pha bran ji hanyie lei?”

<sup>13</sup> Jishii wie rey pha bran jiè Isu shii athieg, nyieliieshii ji pha ithua shii bran iphiing um, chiih-è Isu ne ji pha ithua è khia jong dun.

<sup>14</sup> Doh aishii Isu è Misiahò hà si ne, Isu è aishii yao, yoi mage, na ne gang rey sha, jiè sudoh è thiwing na ne dinne layog arek sha rabo, yangne na shii din hì de lamuna awie pha rey mage phro.

<sup>15</sup> Chiiphado ji pha bran è Jewthek dumuii shii wuii srane yao, gu shii gang rek pha bran ne Isu ro. <sup>16</sup> Ithek è Isu shii riig ramuii, nyieliieshii ai è wie rek phi pha ne Jew Thung pha inai shii ro. <sup>17</sup> Isu è aishii chang, “Gu Aphuii ne idang blia rek phro, chiih-è gu de ai blia rek chid phro.”

<sup>18</sup> Hì è yao pha ji è Jew ro dumuii è dinne Isu shii lamuna ua pha surui, nyieliieshii ai è Jew Thung pha inai pha Iphey ji chui bie pha asi pha, Hamangkhung-aphuii shii de awai Aphuii ro è yao, chiih-è dinne awaishii de Hamangkhung-aphuii è ò rab.

### *Dufuii ro riichai*

<sup>19</sup> Ji-è Isu è aishii chang, gu nathek shii izai yao: Dufuii yi awai lum ne nyie de arek mua phro, ai ne Aphuii nyie rek pha ji riig srane rek bie phro, chiih-è Aphuii è nyie rek Dufuii de ji rek bie. <sup>20</sup> Aphuii è Dufuii shii miie rek ne, jiè Aphuii nyie rek pha ji ne Dufuii shii de doh yi phro, chiih-è dinne bajo boh doh ba yi phro, jiè nathek ne wiengphleg ruii phro. <sup>21</sup> Aphuii è iyjong pho shii de hòì din srane chai phi pha ji duiine Dufuii de hanyie shii chid jishii hòì din yi pha ro. <sup>22</sup> Aphuii è hanyie shii de achua phro, ai è chua pha ne awai Dufuii shii zab rangsua phijong ro. <sup>23</sup> Ji-è zab è Aphuii shii ilab rek pha duiine Dufuii shii de ilab rek ruii phro. Chiih-è hanyie è Dufuii shii ilab arek arone aishii thoh ge pha Aphuii shii de ilab arek ro.

<sup>24</sup> Gu nathek shii izai yao, hanyie è gu miyaogamthek yoi ne chiih-è gu shii thoh ge pha jishii de migi rek arone, aishii idang pha chai um ruii phro. Aishii ne achua ruii phro, jimagungde iy pha ji è hòì ne chai hà muajong ro.

<sup>25</sup> Ji-è gu nathek shii izai yao, ji rek pha ishak thog ruii phro, chiih-è ishak ne thogjong ro, chiih-è iy pha ne Hamangkhung-aphuii ro Dufuii gow yoi ruii phro, chiih-è hanyie è yoi jine chai hà thog ruii phro. <sup>26</sup> Aphuii awai yi chai phi pha ithua duiine, Dufuii de chai phi pha ithua rab phro. <sup>27</sup> Chiih-è ai è Dufuii shii gua pha rangsua phi ro, nyieliieshii ai ne Bran Dufuii ro. <sup>28</sup> Hì pha miyao è awiengphleg chid rabo; nyieliieshii hì rek pha ishak de thog ruii phro, iyjong pho de ai muro yoi ruii phro <sup>29</sup> chiih-è ithek ro wieng è de wuii ruii phro: Chiih-è hanyie yi wie blia rek ne hòì pho ne sieng ne rai ruii phro, chiih-è hanyie yi layog rek ne hòì pho ne nin ruii phro.

### *Isu ro khagithek*



<sup>30</sup> “Gune gui riichai è nyie de arek mua phro; Hamangkhung-aphuii è nyie yao pha ji chua bie ro, jiè gu muchua ne izai ro, nyieliieshii gui è nyie rek yang pha ji ne gu asurui ro, jiè gu shii thoh ge pha ai nyie khi è now pha ji rek bie. <sup>31</sup> Guro miyao yi gui è khagi yao arone, gu è nyie yao pha ji ne izai rone anow phro, <sup>32</sup> jishii guro miyao shii khagi yao pha ne yoh jia um ro, chiih-è gune thieg gu Chiang shii nyie yao pha ji ai ne izai chak ro. <sup>33</sup> Jon ne jia ro, nathek hanyie è aishii muaphothek thoh ge, ai è izai pha Chiang shii yao. <sup>34</sup> Hi ne gu shii bran khagi achid phrone anow ro, gu è hì yao bie pha ji ne nathek de ragia rey bo. <sup>35</sup> Jon ne muchuang duiine ro, chiih-è hang ne khlieng, chiih-è nathek de phrak jia shii ne airo muchuang jishii ne wie than. <sup>36</sup> Jishii gune Jon è phi pha khagi è de boh khagi gui phi ruui phro, chiih-è gu nyie rek pha ji ne Aphuii è gu shii rek yi pha ji ro, hì è gu shii yao yi gu shii ne ai è thoh ge ro. <sup>37</sup> Chiih-è gu shii thoh ge pha Aphuii ji è de guro yao phi, jishii nathek è ne ai miyao de ayoì, chiih-è airo mizia de adoh ro. <sup>38</sup> Chiih-è airo mua shii de nathek lubu hà aruii, jiè nathek aishii thoh ge pha jishii de migi arek. <sup>39</sup> Nathek ne jigigam shii ne tham bo, nyieliieshii nathek aishii ne idang pha chai um ro è now, chiih-è hi pha jigigam è de gu Chiang shii yao. <sup>40</sup> Thuh de nathek chai mua yi pha gu shii wuii pha ayang ro. <sup>41</sup> Gu ne bran è chiong pha ji asow ro. <sup>42</sup> Jishii nathek ne khi-èrek pha bran gune thieg, chiih-è gune thieg nathek lubu shii ne Hamangkhung-aphuii pha miie oi ro. <sup>43</sup> Gu ne gui Aphuii ro riichai rog shii wuii ruui phro, jishii nathek è gu shii achoi, chiih-è bran awai riichai rog shii wuii arone nathek aishii choi iwa. <sup>44</sup> Nathek ne gai è chiong mua pha now, jishii nathek ne iphen Hamangkhung-aphuii è chiong jishii ne yang pha abidiang ro. Chiihphado ji è rek arone gu shii khi-èrek ne migi rek mage phlei? <sup>45</sup> Hi anow rabo, gune gu Aphuii ibi shii nathek shii nin wuii, chiih-è nathek shii nin pha ji ne Moses ro, nyieliieshii nathek è aishii bajo luthong phro <sup>46</sup> Nathek ne izai è Moses shii migi rek arone, nathek gu shii de migi rek, nyieliieshii ai è gu Chiang shii zey. <sup>47</sup> Jishii nathek ai mizey jishii migi arek arone, nyie khi-èrek ne ithek gu miyao shii de migi rek mage phlei?”

## 6

### *Isu è bajo ibrog shii chie noh (Mth 14:13-21; Mrg 6:30-44; Lug 9:10-17)*

<sup>1</sup> Ji pha iidoh shii, Isu Galili pha khabang hiia ne wuii dun (ji pha khabang ne Thiberias ro è de yao). <sup>2</sup> Jishii ai è bran rad pha ji shii buangthek pha blia rek ne gang phi pha ji riig srane bran ibrog ai rog shii luangieng. <sup>3</sup> Isu phiing lakhung hà wuii srane awai samoythek rog shii dug. <sup>4</sup> Chiih-è ji pha ishak shii yi Hiìadun Sai pha ishak nui sha ro, <sup>5</sup> Isu è shan ne riig khlei shii bran brog yi ai moe hà wuiiramuii pha doh, ji è ai Philiph shii sai, nyama pha bran shii chie pha michie khi è phég mua phlei? <sup>6</sup> (Nyieliieshii ai è ji sai pha ji ne Philiph shii chai pha sai). Awai ne thieg jong ai ne nyie reg chid.

<sup>7</sup> Ji pha iidoh Philiph è yao, nathek shii Ìujia chie pha iweb zab shii cho phane liiman sikhi wem nyi è huak ne phég chid phro. <sup>8</sup> Chiih-è airo yoh samoy jia, Simon Phithar beng mua pha ai khuii Andrew è yao, <sup>9</sup> “Ichiìh bufuii jia shii iweb guui nane ù nyi um ro. Jishii ji pha iweb nane ù è zab shii achie cho phro.” <sup>10</sup> Ji pha iidoh Isu è ithek shii yao, ithek shii dug yi mage bo. (Chiih-è thiichiih shii saing ire de bajo um.) Ji-è aishii ji pha lakhung shii

dug, thiichiih shii bran itham guii um ro. <sup>11</sup> Chiiphphado shii Isu è iweb ji yi srane Hamangkhung-aphuii shii laso phi srane aishii thang, ji duiine uà jide yi srane ithek shii thang, Chiuh-è ithek khama chie mua pha ji chie, chiuh-è zab pha bran lumuii chie ched. <sup>12</sup> Ai è awai samoy shii yao, “Ikhe pha iweb ji khrab bo; nyieliieshii iweb amua yi rabo. <sup>13</sup> Chiiphphado nathek è branthelek chie ched pha iidoh shii iweb guii è ikhe pha idum-iriim yi sirid snanyi ley pha chiing. <sup>14</sup> Chiuh-è Isu mirek pha buang pha blia rek pha ji riig srane, thiichiih shii um pha bran ji è yao, izai hì ne Chaig ichiih sohjambling shii wuiiramuii pha ji ro!” <sup>15</sup> Isu è thieg ai ne aishii zum srane bangchiie airo Saja rab pha rek, jiè ai dinne phiing hà wuii din marui.

*Isu è kho lakhung shii lua  
(Mth 14:22-33; Mrg 6:45-52)*

<sup>16</sup> Habjuang rey mage shii, Isu ro samoy ne buzam khabang hà wuii dun, <sup>17</sup> Chiuh-è run shii in srane iidoh khabang thrang Khaphernaum hà dun din shii habjuang rey dun, jishii Isu de ai hà athog ba. <sup>18</sup> Ji è rekramuii shii hasam boh sam thog srane kho jishii sam ne jaw mage. <sup>19</sup> Chiuh-è samoy run shii in srane guii riig labiang thog pha ran shii, Isu yi kho lakhung è lua srane ithek hà rai ne wuii ruii, ithek ji riig srane rum dun. <sup>20</sup> Isu è aishii yao, “Arum chid rabo, hì ne gu ro!” <sup>21</sup> Chiiphphado ai è Isu shii sang ne run lakhung hà dug noh, chiuh-è run yi khthiie ai khi hà wuiiramuii pha soh hà thogdun.

*Bran è Isu shii sow*

<sup>22</sup> Ji pha thimiang duiine khabang ring shii rai pha bran brog è riig shii thiisa hà ne run ne ji jia bie. Chiuh-è ai ne thieg Isu ne samoythek rog shii awuii gieng, chiuh-è samoythek de aishii thoh marui ne wuii dun. <sup>23</sup> Chiiphphado shii Thiberias è ran pha run yi thiichiih Ithong è laso phi srane bran brog shii iweb chie noh pha iring ji pha moe shii ran thog. <sup>24</sup> Bran brog è riig shii Isu ne thiichiih shii oi, chiuh-è airo samoythek de thiichiih shii oi, ji è ithek de ji pha run è in srane Isu shii sow pha Khaphernaum hà wuii dun.

*Isu ne chai pha iweb ro*

<sup>25</sup> Chiiphphado è khabang thrang hà Isu shii doh srane, ithek è aishii sai, “Masdo, na ne isa hà khuchung wuii phlei?” <sup>26</sup> Isu è aishii chang, gu nathek shii izai yao dang phro: Nyieliishii nathek è gu shii sow pha ji ne nathek ne thuh de buangthek pha blia ji doh ne sow pha asi ro jimagungde nathek ne iweb chie pha nane nathek shii nyie chid pha ji mua dun pha ji musow ro. <sup>27</sup> Awie pha rey pha michie pha blia arek rabo, ji pha Chiang shii ne, idang chai um pha michie pha blia rek bo. Chiuh-è ji pha michie ne Bran Dufuii è nathek shii phi ruii phro. Nyieliieshii Hamangkhung-aphuii pha Aphuii è, ai lakhung shii cheb che ne bah jong ro. <sup>28</sup> Ji-è ai è aishii sai, “Gathek è Hamangkhung-aphuii munow pha blia jine khi-èrek chid phlei?” <sup>29</sup> Isu è aishii chang, “Hamangkhung-aphuii è nyie now pha ji ne hì ro, nathek ai mutho ge pha ji shii migi rek bo.” <sup>30</sup> Itek è chang, chiiphphado gathek è aishii migi rek pha ithek è gathek shii buang pha blia nyie rek ne doh noh phlei? Na è nyie rek ge phlei? <sup>31</sup> Jigigam shii yao pha duiine gathek blangthek è balimuang shii Hamangkhung è chiuh pha mana chie pha ji duiine ai de gathek shii hamangkhung è iweb phi ruii habey? <sup>32</sup> Isu è yao, “Gu nathek shii izai yao dang phro,” “Mosses è phi pha iweb jine

hamangkhang pha asi ro; hamangkhang è gu Aphuii è phi pha iweb jine isbang ro. <sup>33</sup> Hamangkhang-aphuii è phi pha iweb ji hamangkhang è wuii jong ne sohjambling shii chai phi ro.” <sup>34</sup> Ithek è aishii lia, “Masdo” Ji pha iweb ne gathek shii idang pha phi bo. <sup>35</sup> Isu è chang, “Gu ne chai pha iweb ro.” Ji-è hanyie gu shii wuii ruii pho ne khuchung de chi-iy-iy phro; chiih-è hanyie gu shii mi gi rek pho ne khuchung de gahang-ahang phro. <sup>36</sup> Ji-è gu nathek shii yao dang phro, nathek ne gu shii doh phro, jimagunde nathek gu shii mi gi arek phro. <sup>37</sup> Zab hanyie magungde Aphuii è gu shii phi pha ji ne gu shii wuii ruii phro, ji-è hanyie gu shii wuii ruii pho ne gu aishii khuchung de akhia phro. <sup>38</sup> Nyeliieshii Gune Hamangkhang è thazam wuii pha ne guilum ne asi ro, jimagungde hanyie è gu shii thoh ge pha ai è yang pha ji rek pha wuii ro. <sup>39</sup> Chiih-è hanyie gu shii thoh ge pha ai è yang pha ji ro, ai è gu shii nyie phi pha ji-è asan yi bo ne now ro, jishii gune iidohhè pha inai shii ai zab shii chai hòì yi chid phro. <sup>40</sup> Chiih-è gu Aphuii nyie now pha ji ne hì ro hanyie è Dufuii shii riig ne mi gi rek pho ne idang pha chai mua ruii phro. Chiih-è iidohhè pha inai shii gune aishii hòì ne sieng din yi pha ro. <sup>41</sup> Chiih-è bran è ai Chiang shii yao ramua, nyeliieshii ai è yao, “Gu ne Hamangkhang è thazam wuii pha iweb ro.” <sup>42</sup> Ji-è ithek yao, “Hì pha bran hì ne Joseph ro dufuii Isu ji asi bey? Chiih-è gathek ne airo aphuii amuii shii de thieg, jimagungde ai ne khi-èrek ne hamangkhang è wuii phrone yao mua phlei?” <sup>43</sup> Isu è chang, nathek ne nawaithek chung amulo chid rabo. <sup>44</sup> Hanyie magungde aphuii è gu moe shii anoh sapho shii ne ai ne gu moe shii awuii mua phro. Chiih-è gune aishii iidohhè pha inai shii hòì din yi phro. <sup>45</sup> Chaigtek è de zey, Zab shii Hamangkhang-aphuii è yua ruii phro. Chiih-è hanyie magunde aphuii miyao yoi ne thieg pho ne gu hà wuii ruii phro. <sup>46</sup> Hi pha miyao ne hanyie è aphuii shii adoh ro; jishii hanyie yi Hamangkhang-aphuii ro lei ne, ji jia ai è aphuii shii doh phro. <sup>47</sup> Gu nathek shii izai yao dang phro: Hanyie è mi gi rek arone idang sieng pha chai mua phro. <sup>48</sup> Gune chai pha iweb ro. <sup>49</sup> Naro blangtek ne balimuang shii manna chie, jimagungde ai ne iy dun. <sup>50</sup> Jishii Hamangkhang è thog pha iweb ji ne zai hanyie è chie pho ne a-iy phro. <sup>51</sup> Gune Hamangkhang è wuii thog pha isieng iweb ro. Ji-è hanyie magung de ji pha iweb chie arone idang sieng ne rai ruii phro. Chiih-è gu miphi pha iweb ji ne gu siu ro, gu è ji phi pha ji ne sohjambling pho de sieng mua pha phi phro. <sup>52</sup> Hi pha miyao è awaithek chung khnaing ne lijieg rai ne sai. Hì pha bran ne khi-èrek ne awai siu shii phi ne chie mua yi phlei? <sup>53</sup> Isu è aishii yao, gu nathek shii izai yao dang phro: nathek è bran Dufuii ro siu nane ifai achie aniing sapho shii ne ithek shii chai oi phro. <sup>54</sup> Hanyie è guro siu nane ifai chie niing arone idang sieng pha chai um ruii phro, chiih gu aishii ne iidohhè pha inai shii hòì yi phro. <sup>55</sup> Ji-è guro siu ne michie isbang ji ro, chiih-è guro ifai jine niing pha isbang ji ro. <sup>56</sup> Hanyie è guro siu nane ifai chie niing ne gu rog shii rai pho ne, gu de ai rog shii rai gieng phro. <sup>57</sup> Isieng Aphuii è gu shii thoh ge, ji è ai Chiang gu de sieng mua phro, ji duine hanyie è gu shii chie pho ne gu Chiang è sieng ruii phro. <sup>58</sup> Ji-è Hamangkhang è thazam wuii ruii pha iweb ne hì ro; chiih-è hì pha iweb ne ithek blangtek è chie marui srane iy dun pha ji-duine asi ro. Hanyie magungde hì pha iweb chie arone idang sieng ne rai ruii phro. <sup>59</sup> Ji pha miyao ne Isu è Khaphernaum pha Jewthek misiahò shii yua pha ji yao phro.

### *Idang pha chai pha miyaogamthek*

<sup>60</sup> Airo samoythek è de ji pha miyao ji nuii srane yao, “Hì pha miyao ne bajo diig ro. Chiih-è hi pha miyao ne hanyie nuii mua phlei?” <sup>61</sup> Hanyie è aishii ayao magunde ithek ji pha miyao è khnaing ramuii pha ji ne Isu è thieg, ithek shii yao, “Nathek hi pha miyao ne hinya shii thoh muui pha now bey?” <sup>62</sup> Chiihphado nathek ne Bran Dufuii shii ai igobi khi hà um pha ji hà dun din pha ji doh arone nyie rey phlei? <sup>63</sup> Chai phi pha ji ne Hamangkhung-aphuii ro ragung ro; Chiih-è tharomang blu ne idang blia adunmey phro. Chiih-è gu nathek shii yao pha miyaogamthek jine Hamangkhung-aphuii ro chai sieng pha Ragung ro. <sup>64</sup> Jishii nathek giak ne thuh de migi arek ba ro, (Chiih-è Isu ne igobi è migi arek phrone chiih-è hanyie è aishii zum yi pha bran shii ne thieg muui ro.) <sup>65</sup> Chiih-è ai è yao, “Hì pha Chiang è gu ithek shii yao dang phro, aphuii è abo sapho shii ne hanyie de gu shii awuii mua phro.”

<sup>66</sup> Nyieliieshii ji pha Chiang è Isu ro samoy ne iidoh khid srane hanyie de ai rog shii alua. <sup>67</sup> Ai è awairo suanyi samoythek shii sai, “Nathek gu shii thoh ne dun pha now bey?” <sup>68</sup> Simon Phithar è aishii chang, “Ithong, gathek hanyie shii dun mage phlei? Nyieliieshii idang pha chai phi pha miyaogamthek ne na shii um bie ro. <sup>69</sup> Thuh shii gathek ne migi rek chiih-è gathek ne thieg na ne Hamangkhung-aphuii è thoh ge pha So Jia ji ro.”

<sup>70</sup> Isu è aishii chang, “Gu nathek suanyi shii agua bey? Jimagunde ithek è bran jia ne ibuii ro!” <sup>71</sup> Ai ne Simon Iskharioth pha dufuii ji pha Chiang shii yao phro, Judas de samoythek snanyi è jia magungde aishii zum yi phro.

## 7

### *Isu nane airo khuinothek*

<sup>1</sup> Ji pha iidoh shii Isu Galili hà lua ne rai; ai Judea hà alua yang, nyieliieshii thiisa hà ne Jewthek pha dumuii è aishii ua pha suruii ramuii ro. <sup>2</sup> Haliigthek Sai pha ishak de nui rey sa, <sup>3</sup> ji è Isu ai khuii è aishii yao, “Hì pha ithua thoh srane Judea hà wuii bo, chiihphado nathek ro samoythek ne nathek è rek pha ji doh ruii phro. <sup>4</sup> Ai è awai mirek ji gai shii wie thieg pha now arone hanyie de a-ug mua phro, ithek è hi pha blia rek muui rone zab sohjambling pho na shii thieg yi bo!” ( <sup>5</sup> Ji pha shud shii ne airo ai khuinothek è de aishii migi arek ba ro.)

<sup>6</sup> Isu è aishii yao, “Guro isbang ishak ne thuh de athog ba ro. Nyie ishak magunde nathek rone rangsua ro. <sup>7</sup> Sohjambling pho è ithek shii a khiijai phro, jimagungde ai è gu shii ne khiijai ruii phro, nyieliieshii gune athodang pha ithek mirek pha lumuii awie ro è yao phro. <sup>8</sup> Na ne ji pha Sai pha ji shii wuii bo. Gune ji pha Sai pha ji shii \* awuii ro, nyieliieshii guro rangsua ishak ne athog ba ro.” <sup>9</sup> Ai ji è yao srane ne thiichihi Galili shii raidun.

### *Isu de Haliig Sai pha jishii um*

<sup>10</sup> Ai khuino yè Haliig Sai pha ji hà wuii dun pha iidoh shii, Isu de wuii dun; jimagungde ai yi miang awuii pha ug ne wuii. <sup>11</sup> Jew pha dumuii è Haliig Sai pha ji shii, aishii sow ne sai, “Ai ne khi hà lai?”

<sup>12</sup> Thiichihi iphiing brog shii bran è ai chaing suak ne yao ramuii, giak è yao, “Ai ne bran wie ro,” asi chiih-è giak è yao, “Ai ne bran shii asi pha

lumuii hà lua noh ro.” <sup>13</sup> Jishii hanyie de fuang hà ayao mua, nyieliieshii ithek de Jewthek pha dumuii è bajo rum.

<sup>14</sup> Sai pha ji yi khuyo jong sha pha rek shii, Isu è Hamangkhung-aphuii ro Misiahò hà wuii srane jao ne yua ramuii. <sup>15</sup> Jewthek pha dumuii è ji yoi srane wiengphleg ne yao, “Hi pha bran ne nyie de adab habuii shii khi-èrek ne nyama thieg dun phlei?” <sup>16</sup> Isu è aishii chang, “Gu è nyie yua ramuii pha ji ne gui ro asi ro, jimagungde hi ne gu shii thoh ge pha Hamangkhung-aphuii ro ro. <sup>17</sup> Ji-è hanyie maungde Hamangkhung-aphuii munow ji rek arone, hi pha miyao ne Hamangkhung-aphuii è yao bey ne asi pha gui lum ne yao bey ne ji thieg ruii phro. <sup>18</sup> Bran hanyie yi awai riichai è yao pha ji ne awai shii biisiie shii phua pha bidiang ro. Chiuh-è hanyie è ai mutho ge pha izai jishii biisiie phi arone, ai ne giang ro, chiuh-è aishii ne buii oi ro. <sup>19</sup> Nathek shii Moses è Iphey aphi bey? Jishii nathek è hanyie de airo Iphey jine anuii. Ji è nathek ne gu shii ua pha nyie um ne suruii phlei?” <sup>20</sup> “Na shii ne ibuii um ara!” Bran brog è aishii chang, nathek shii ne ua pha hanyie mirek lei?

<sup>21</sup> Isu è aishii chang, “Gu è buang pha blia jia rek bie shii nathek ne wiengphleg dun.” <sup>22</sup> Moses è nathek ro aniphiing pha migiangkheg bo è yung, (jimagunde ji pha Iphey ne Moses ro asi, jine nathek ro blangthek mujao bi ro.) Ji-è nathek ne Jew Thung pha inai shii de aniphiing ro migiangkheg phro. <sup>23</sup> Jew Thung pha inai shii bufuii ro migiangkheg arone Moses ro Iphey ji achui, jimagungde gu è Jew Thung pha inai shii bran jia shii wie gang rek phi shii ithek nyie rek ne lijieg phlei? <sup>24</sup> Nathek ne lakhung hà riig ne achua rabo, jishii bucho pha izai ji riig ne chua bo.

### *Ai ne Masi bey?*

<sup>25</sup> Jerusalem pha giak bran è yao, “Hi pha bran hi ne rangsuathek è ua pha suruii ramuii pha ji asi bey? <sup>26</sup> Riig mage bo! Ai ne bran moe shii yao ramuii ro, ithek è aishii nyie de gidieg ayao ro. Chiuh-è ithek de ai ne Masi chak rone thiejong ne bey? <sup>27</sup> Jishii Masi wuii ruii shii ne ai khi è wuii ruii pha ji ne hanyie de athieg phro. Chiuh-è gethek ne zab thieg ai khi-è wuii pha ji ne.” <sup>28</sup> Isu yi Hamangkhung-aphuii ro Misiahò hà yua ramuii shii, ai è gang ziak ne yao, gune khi è wuii ruii pha ji ne nathek thieg ne bey? Gune gui riichai è awuii ro. Nyieliieshii hanyie è gu shii thoh ge pha ji ne izai chak ro, chiuh-è aishii ne nathek athieg mua phro, <sup>29</sup> jimagungde gune aishii thieg, nyieliieshii gu shii ne ai muthoh ge ro, “Ji-è gune ai è wuii phro.” <sup>30</sup> Chiuhphado ai yao ramuii pha ishak shii ai è aishii zum pha rek, jimagungde ai hanyie è de aishii azum, nyieliieshii airo ishak ne arey ba. <sup>31</sup> Jishii thiuchiih pha iphiing è bajo bran è aishii migi rek srane yao, “Masi wuii ruii shii ai ne hi pha bran mirek pha buangthek pha blia ji è de bajo rek ba ruii habey?”

### *Isu shii zum pha sandri shii thoh ge*

<sup>32</sup> Pharisithek è iphiing iliing shii Isu chiang suak ne yao ramuii pha ji yoi srane, ithek nane boh phabithek è aishii zum pha sandri shii thoh ge. <sup>33</sup> Isu è yao, gune ichiih nathek rog shii lujia rai bie, chiuh-è gune gu shii thoh ge pha ji hà dun din phro. <sup>34</sup> Nathek ne gu shii sow ruii phro, jimagungde nathek gu shii adoh mua sha phro, nyieliieshii gu khi hà rai pha ji ne nathek ne awuii mua phro. <sup>35</sup> Jewish dumuii awaithek chung yao rai, “Gethek adoh

mua pha khi pha ithua hà dun pha yao phlei? Ai ne gethek ro bran rai pha Grekh rajantheh hà dun ne Grekh shii yua habey? <sup>36</sup> Ai è yao, gethek ne aishii sow magungde aishii adoh phro, chiuh-è ai khi hà rai pha ji ne gethek ne awuii mua phro. Hi pha miyao ji ne nyie yao phlei?”

### *Chai kho phi pha khaduii*

<sup>37</sup> Sai pha iidohhè pha miigak inai shii Isu è thiichiuh riu srane ziaak ne yao, hanyie yi gahanghang arone gu shii wuii srane niing bo. <sup>38</sup> Jigigam shii zey ne um, hanyie è gu shii migi rek arone, chai kho phi pha khaduii ne ai lubu bucho è noi ruii phro. †

<sup>39</sup> Isu è ji yao pha ji ne Ragung Chiang pha miyao yao, hanyie magungde aishii migi rek arone aishii ne mua ruii phro. Ji pha ishak shii ne Ragung ne aphì ba ro, nyieliieshii Isu ne iy ne biisii shii ahòì ba ro.

### *Branthek chung che dun*

<sup>40</sup> Ai miyao ji nuii srane bran ibrog shii um pha giak è yao, “Hi pha bran hi ne izai chaig chak ara!”\*‡

<sup>41</sup> Giak è yao, “Ai ne Masi ro!”

Jishii giak è yao, Masi ne Galili è awuii ruii phro! <sup>42</sup> Jigigam shii yao ne um ro Masi ne Saja Dawid ro riing è rey ruii phro, chiuh-è ai ne Dawid rai mua pha Bethlehem thawun shii giak ruii phro. <sup>43</sup> Ji-è ithek ne Isu Chiang shii ibrog è chedun phro. <sup>44</sup> Giak bran è ai zum pha now, jimagunde hanyie è de aishii azum mua ro.

### *Migi oi pha Jewthek ro riichaithek*

<sup>45</sup> Sandri è iidoh dun thog shii, phabi boh nane Pharisithek è aishii sai, “Nyie rek ne aishii anoh lei?” <sup>46</sup> Sandri è aishii chang, “Hanyie è de ji pha bran duine ayao mua ro” <sup>47</sup> Pharisithek è aishii sai, ithek shii de bajo bi-è rab muui ne bey? <sup>48</sup> Nathek è dumuii nane Pharisithek jia de aishii migi now pha doh bey? <sup>49</sup> Ji pha iphiing è Moses ro Iphey ne athieg, jiè ithek ne Hamangkhung-aphuii ro mucho nud dun ro! <sup>50</sup> Dohbi Isu shii si wuii pha Pharisithek pha bran Nekhodemus de thiichiuh um. Ai è gai shii yao, <sup>51</sup> “Gethek Iphey shii yao pha duine, ai nyie yao pha ji anuii pha chiuh-è ai nyie rek pha aishii riig pha aishii nin mua.”

<sup>52</sup> Ai è chang “Zai chak ro,” “Na de Galili pha bey? Nathek de jigigam shii tham ne riig bo, chiuhphado ithek id ruii, riig hanyie de Galili è awuii§ ruii phro.”

## 8

### *Hò-amuii shii siulao hà zum*

<sup>1</sup> Chiuhphado, zab pha bran awai hò hà dun ched dun, chiuh-è Isu yi sumaro pha phiing hà wuii dun. <sup>2</sup> Ji pha thimiang pha hamiang shii ai iidoh Hamangkhung-aphuii Misiahò hà wuii dun. Zab branthek ne aishii shan ne khrab, chiuh-è ai de dug srane ithek shii jao ne yua. <sup>3</sup> Iphey yua pha Masdo nane Pharisithek è hò-amuii jia shii siulua pha doh ne zum ne thiichiuh noh

**7:37** 7:37: Lew 23:36    **7:38** 7:38: Ezkh 47:1; Zekh 14:8    † **7:38** 7:38: Isu ro miyaoagam 37-38 shii ne zey pha de um ro: “Hanyiemagunde khahanghnag pho ne gu shii wuii ne niing bo. <sup>38</sup> Jigi hii yao pha duine, ‘Chai-phi pha khaphieg ne hanyie è gu shii migi rek aishii thoi ruii phro.’”    ‡ **7:40** 7:40: Chaig: Riig 1:21    **7:42** 7:42: 2Sam 7:12; Mikh 5:2    **7:50** 7:50: Jon 3:1,2    § **7:52** 7:52: chaig hanyie de awuii ro; jigi jia shii ne um chaig ne awuii sha ruii phro.

ne ai moe shii riu ba yi. <sup>4</sup> Ai è Isu shii yao, “Masdo,” Gathek è hì pha hò-amuii shii siulua rek pha ishak shii zum phro. <sup>5</sup> Moses è phi pha gethek ro Iphey shii de yung hì è rek pha hò-amuii shii ne lubao rek ne chao ne ua chid phro, Thuh na ne nyie yao phlei? <sup>6</sup> Aishii nin mua pha ithek è aishii ichiig sow srane yao. Jishii Isu è nyak hà bam srane awai wad bieng rek ne zey.

<sup>7</sup> Thiichiih shii riu pho è aishii musai sai, jishii ai è miang riu srane ithek shii yao, “Ichiiah shii ithek è khuchung de layog arek ba pha um arone igobi ai è hò-amuii shii lubao rek ne chao bo. <sup>8</sup> Chiiphado dinne ai buzam bam srane nyak shii zey. <sup>9</sup> Ithek ji pha miyao yoi srane weg è yi ne filiao de ji jia rek ne Isu shii thoh ne dun ched dun, Jishii ji pha hò-amuii yi Isu moe shii nyariu bamuii. <sup>10</sup> Ai è miang riu srane ji pha hò-amuii shii yao, ai ne giisa hà lai? Ichiiah na shii nin pho ne hanyie de aled sha bey?” <sup>11</sup> Ji pha hò-amuii è chang, Masdo hanyie de oi ro. “Chiiphado Isu è yao ji-arone wie ro,” Gu de nathek shii anin phro. Jishii na de dun bo chiiah-è dinne hì è rek pha layog arek sha rabo.\*

### *Isu ne sohjambling pha muchuang ro*

<sup>12</sup> Isu è Pharisithek shii yao din. Ai è yao, “Gune sohjambling pha muchuang ro,” Ji-è hanyie è gu rog shii luagieng arone ai ne ji pha chai muchuang mua ruii phro, chiiah-è ai ne khuchung de igiia hà alua din sha phro. <sup>13</sup> Pharisithek è aishii yao, na ne thuh shii nawai haro han ne yao ara, ithek è nyie yao pha miyao jine nyie arey ro. <sup>14</sup> Asi, Isu è aishii chang, gui è gui Chiang haro yao magungde, gu miyao jine izai chak ro, nyieliieshii gune khi è wuii chiiah-è gu khi hà dun din ramuii pha ji ne gui thieg chak ro. Nathek ne gu khi è wuii pha ji nane gu khi hà dun ramuii pha ji ne athieg ro. <sup>15</sup> Nathek ne gang tharothamang lumuii duiine chua ara, chiiah-è gune hanyie shii de achua phro. <sup>16</sup> Jishii gu è chua magunde gu ne izai chua ruii phro, nyieliieshii hì pha blia hì ne gui jijia asi ro, chiiah-è gu shii thoh ge pha Aphuii de gu rog shii um ro. <sup>17</sup> Nawaithek ro Iphey shii de zey ne um, khuchung magungde bran nyi è khagi rek arone isa è nyie yao pha ji ne izai rey dun phro. <sup>18</sup> Gune gui khagi rek phro, chiiah-è gu shii thoh ge pha gu Aphuii de gu Chiang shii khagi rek ruii phro. <sup>19</sup> Ithek è aishii sai, na Aphuii ne giisa lei? Ai è ithek shii chang nathek gu shii de athieg ba ro chiiah-è nathek gu Aphuii shii de athieg mua ba ro. Nathek è gu shii thieg arone gu Aphuii shii de thieg jong phro. <sup>20</sup> Isu è Hamangkhung-aphuii ro Misiahò hà yua shii bang zid pha japhothek ruii pha ùgud ji hà yao phro. Chiiah-è thiichiih shii hanyie è de aishii azum, nyieliieshii airo ishak ne athog ba.

### *Gu khi hà dun pha ji hà ne nathek ne awuii mua*

<sup>21</sup> Din ne Isu è aishii yao, “Gune dun dun phro; nathek ne gu shii sow ruii phro, jimagungde nathek ne nawai layog hà iy dun phro. Nathek ne gu khi hà dun pha ji hà ne adun mua phro.” <sup>22</sup> Ji-è Jewthek pha rangsuathek è yao, “Ai è gethek shii ne ai khi hà dun pha ji shii ne adun mua phrone yao dun, jine awai è awaishii ua pha miyao bey?” <sup>23</sup> Isu è chang, Nathek ne ichiiah sohjambling luii pha ro, jimagungde gune lakhung è wuii pha ro, chiiah-è nathek ne sohjambling pha ro, jimagungde gune sohjambling pha

\* **8:11** 8:11: Bajo jigi shii nane buyo zey pha ji shii hipha jigi oi ro (8:1-11); ai ne iidoh hà um ro Jon 21:24; gai ne iidoh hà um ro lug 21:38; jigi ia shii ne iidoh hà um ro Jon 7:36

asi ro. <sup>24</sup> Ji-è gu nathek shii yao nathek ne Nawai layog è iy ruii phro. Chiih-è nathek ne Gune hanyie gu ji rone migi anow arone Nawai layog è iy ruii phro. <sup>25</sup> Ai è aishii sai, “Na ne hanyie lai?” Isu è chang gune igobi è yaojong pha ji ro. <sup>26</sup> Gu ithek shii bajo yao pha de um ro, chiih-è gune ithek shii bajo nin pha miyao de um ro. Gu shii thoh ge pha ji ai ne izai chak ro, gune sohjambling shii nyie yao pha ji ne ai è yoi ne yao bie phro.

<sup>27</sup> Ithek è Isu ne Aphuii pha miyao yao muui rone agao ba ro. <sup>28</sup> Ji-è ai ithek shii yao, na è Bran Dufuii shii lakhung chiing mage shii, ithek de gune ji ro thieg ruii phro; chiihphado gune gui blu è nyie arek rone thieg ruii phro, jishii gune gu Aphuii nyie yua pha ji rek bie phro. <sup>29</sup> Chiihphado hanyie gu shii thoh ge pha ji ne gu rog shii um ro; ai ne gu shii ji atho marui phro, nyieliieshii ai è nyie wie now pha ji ne gu è idang rek phro. <sup>30</sup> Bajo bran è Isu miyao yoi ne migi rek.

### *Izai è sey ne thoh phi*

<sup>31</sup> Ji-è Isu hanyie è aishii migi now pho shii yao, na gu miyao ji nuui arone, ithek ne gu ro izai samoythek chak ro; <sup>32</sup> Na ne izai shii thieg iwa, chiih-è izai ji è ithek shii sey ne thoh phi phro.

<sup>33</sup> Ithek è aishii chang, “Gathek ne Abraham pha riingthek ro,” “Ji-è gathek ne khuchung de gairo khiao arek ba ro, chiihphado khiao akhui phrone yao pha miyao ne nyie yao phlei?” <sup>34</sup> Isu è aishii chang, gu nathek shii izai yao dang phro: hanyie è layog rek pho ne layog pha khiao reyjong dun ro. <sup>35</sup> Khiao ne haliing jia shii idang arai phro, jimagungde dufuii ne idang haliing hà rai phro. <sup>36</sup> Dufuii è nathek shii khiao rek pha ji è lam mua arone izai è nathek ichad ro. <sup>37</sup> Gune ithek shii thieg ithek ne Abraham ro riingthek chak ro, jimagungde ithek ne gu shii ua pha suruii ramuii ro, nyieliieshii ithek ne gu miyao ji anuii ro. <sup>38</sup> Gune Aphuii Chiang è nyie gu shii doh yi pha ji yao bie phro, Chiih-è nathek ne nawaithek Aphuii è nyie yao pha ji rek ara. <sup>39</sup> Ithek è aishii chang, “Abraham ne gathek ro aphuii ro.”

“Isu è aishii chang, nathek ne Abraham ro izai ani chak arone,” na de ai mirek ji duiine rek phro. <sup>40</sup> Zab gu è nyie rek pha ji ne gune Hamangkhung-aphuii è nyie izai yoi pha ji nathek shii de yao pha rek phro. Jishii nathek ne gu shii ne ua pha suruii muui ro, Abraham ne ji arek marui ro! <sup>41</sup> Na ne nawaithek Aphuii è rek marui pha ji duiine rek ara ro.

Chiih-è gune airo izai dufuii chak ro. “Ai è chang gu Aphuii ne Hamangkhung-aphuii awai bie ro.”

<sup>42</sup> Isu è ithek shii yao, Hamangkhung-aphuii ne izai nathek ro Aphuii chak arone, nathek ne gu shii miie phro, nyieliieshii gune Hamangkhung-aphuii è wuii phro, chiih-è thuh gune ichiih shii um ro. Chiih-è gune gui lum ne awuii ro, jishii gu shii ne ai mutho ge ro. <sup>43</sup> Na ne guro miyao nyie rek ne agao lei? Nyieliieshii ithek ne guro mua ji zud ne ayoì mua ro. <sup>44</sup> Na ne nawairo aphuii ibuii pha ani ro, chiih-è ithek ne nawairo aphuii munow ji rek ara ro. Chiih-è ai ne igobi è sgohpho ro chiih-è ai ne izai hà khuchung de alua ro, nyieliieshii aishii ne izai de oi ro. Ithek khlam shii, ai ne awai lum ne rek bie phro, nyieliieshii ai ne khlam pho ro, chiih-è ai ne khlam pha aphuii. <sup>45</sup> Jishii gune nathek izai yao dang phro, jiè nathek ne gu shii migi arek ro. <sup>46</sup> Nathek hanyie è gune layog rek rone khagi rek mua ne bey? Gune izai yao shii, ithek ne gu shii nyie rek ne migi anow lai? <sup>47</sup> Hanyie yi Hamangkhung-aphuii è wuii pha ji ne Hamangkhung-aphuii ro miyaogamthek nuui phro. Nathek ne Hamangkhung-aphuii è asi ara ro, chiih-è jiè ithek ne anuii ro.



### *Isu nane Abraham*

<sup>48</sup> Ithek è Isu shii sai, “Na ne Samarithan rone chiih-è na shii ne ibuii um rone gathek shii yao pha rangsua oi bey?” <sup>49</sup> Isu è ithek shii chang “Gu shii ne ibuii oi ro,” “Chiih-è gune Aphuii shii ilab rek phi” Jishii ithek ne gu shii ne ilab arek phi. <sup>50</sup> Gu ne gui shii ilab rek pha asow ro, jimagungde lasa hà jia um ro ai ne ilab chid phro chiih-è gu haro rek ne chua phi ro. <sup>51</sup> Gune ithek shii izai yao dang phro: Hanyie è gu muyua ji nuii pho ne khuchung de a-iy phro.

<sup>52</sup> Ai è aishii yao, “Gathek ne thieg jong na shii ne ibuii um! Abraham de iyjong, chiih-è chaig pho de iyjong, Jishii ithek è yao hanyie è ithek muyua nuii arone khuchung de a-iy phro.” <sup>53</sup> Gathek ro aphuii Abraham ne iyjong dun, chiih-è na ne Abraham è de bo rone ayao mua phro, chiih-è chaig pho de iyjong dun, jiè nawaishii hanyie ro è now phlei?

<sup>54</sup> Isu è aishii chang, “Gu è gui shii ilab phi arone, ji pha ilab ne nyie adunmey phro. Nathek è Nawai Hamangkhung-aphuii ro è yao mua ne gu shii ilab phi muii pha Aphuii ji ro. <sup>55</sup> Na ne aishii athieg ba ro, jimagungde gune aishii thieg ro, gu de aishii athieg ro è yao arone ithek duiine khlam thek rey dun phro, jimagungde gune aishii thieg, chiih-è gune ai miyaogam nuii ro. <sup>56</sup> Nathek ro aphuii Abraham de gu wuii ruii pha ishak riig ne lubo rek ne rai iang phro; ai è doh mage shii bajo sang rek. <sup>57</sup> Ai è aishii yao, na ne idam sagui de arey ba shii na ne Abraham shii doh ne bey?”

<sup>58</sup> Isu è aishii chang, “Gu nathek shii izai yao dang phro,” “Gu ne Abraham agiak ba pha ibi è gu ro.”

<sup>59</sup> Chiihphado ai è lubao chiing srane aishii chao pha rek, jimagungde ai è ug srane Hamangkhung-aphuii Misiahò thoh ne dun marui.

## 9

### *Nyagiak dang è miegthi pha bran jia shii Isu è gang rek phi*

<sup>1</sup> Isu yi luaramuii shii nyagiak dang ne imiegthi pha bran jia doh. <sup>2</sup> Ai samoy è sai, “Masdo, nyagiak dang ne ai miegthi hì ne hanyie layog mutho lei? Chiih-è hì pha miiriie ne awai layog mutho bey asi pha ai aphuii-amuii layog mutho bey?”

<sup>3</sup> Isu è aishii chang, airo imiegthi hì ne awai layog è de asi ro chiih-è ai aphuii-amuii pha layog de asi ro. Airo imiegthi hì ne Hamangkhung-aphuii ro blu aishii blia rek rone doh yi pha ji mirey ro. <sup>4</sup> Gu shii thoh ge pha airo blia ne inai nya um ba shii gethek ne atho pha rek chid phro, chiih-è hanyie de blia arek mua pha habiu ne thog sharuii ro. <sup>5</sup> Gu ichiih sohjambling shii um ba shii ne gune sohjambling pha muchuang ro. <sup>6</sup> Ai ji è yao pha iidoh shii, Isu è nyiak shii chan cho srane nyiakphlab ji shii nog ne ji pha bran mieg shii sun <sup>7</sup> ne yao, “Wuii srane nawai mizia Siloam khabang shii mi mage bo.” (Hì pha ibeng yi “Tho” ge phro). Ji pha bran è wuii srane mieg mi ne iidoh dun shii mieg jine doh ne dun thog ruii.

<sup>8</sup> Chiihphado è ai hadung-haluii pho è bai doh shii ai chayem thang ne lua pha ishak shii riig pha bran è sai, “hì pha bran hì ne chayem than ne dug ne rai pha ji asi bey?” <sup>9</sup> Giak bran è yao, “ai ne ji chak ro,” jimagungde giak è yao, “ai ne ji asi ro, ai ne ji duiine mia bie ro.” Ji-è ji pha bran awai è yao, “gune ji pha bran chak ro.” <sup>10</sup> Ji pha bran ji è aishii sai, “Khi-èrek ne doh mua ge phlei?” <sup>11</sup> Ai è chang, “Isu beng pha bran jia è nyiak nog ne, gu miegthi

shii sun phi ne gu shii Siloam pha khabang shii wuii ne mizia mi mage bo è yao. Ji-è gune wuii srane ne mi mage shii gune doh mua dun.”

<sup>12</sup> Ai è aishii sai, “ithek ne khi hà lai?”

“Ai è chang,” gune athieg ro.

*Gang rek phi pha ji ne khi-èrek lai ne Pharisithek è sai wuii*

<sup>13</sup> Chiiphado shii ai è mieg doh mua pha bran jishii Pharisithek hà noh dun. <sup>14</sup> Isu è ai miegthi shii nyiak sun ne wie rek phi pha ji yi Jew Thung pha inai shii ro. <sup>15</sup> Chiiphado, Pharisithek è ji pha bran jishii sai din naro miegthi jine khi-èrek ne doh ge phlei? Ai è aishii chang, “Ai è gu miegthi lakhung shii nyiak rek ne sun phi; chiih-è gu mieg mi shii gune doh khlei dun.”

<sup>16</sup> Giak Pharisithek è yao, “Hi pha blia rek pha bran hi ne Hamangkhung-aphuii è asi phro, nyieliieshii ai è Jew Thung pha inai pha Iphey ji anuii.”

Jishii giak è yao, “Layogpho jia ne khi-èrek ne hi è rek pha buangthek pha rek mua mage phlei?” Chiuh-è ai munow jine che dun.

<sup>17</sup> Ji-è Pharisithek è ji pha bran jishii sai din, “Na è yao naro miegthi ne ai mirek ne gang phi, chiih-è na ne aishii nyie now lai?” chiihphado è bran ji è chang,

“Ai ne chaig ro.”

<sup>18</sup> Pharisithek è ai ne miegthi è giak phrone airo aphuii-amuiithek shii aho sapho shii ne migi arek. <sup>19</sup> Chiuh-è ithek sai, “hi pha bran ne naro dufuii bey? Nathek ne ai ne miegthi è giak phrone yao, chiihphado thuh ai ne khi-èrek ne doh mua phlei?” <sup>20</sup> Ai aphuii amuii è yao hi ne gasa ro dufuii chak ro, chiih-è ai ne nyagiak dang ne miegthi chak ro. <sup>21</sup> Jishii gathek ne athieg ai ne thuh shii khi-èrek ne doh mua lai, chiih-è ai miegthi shii de gang hanyie mirek phi pha ji shii de gathek ne athieg ro, jiè awaishii sai mage bo, ai ne boh rey sha ro, chiih-è ai awai è nyachang mua sha phro. <sup>22</sup> Ai aphuii amuii è iyao pha miyao ji ne nyieliieshii ai è Jew ro blu shii rum ne yao, nyieliieshii ithek ò jia rek iang srane hanyie è Isu ne Masi migi rek pho shii ne Jewthek misiahò è khia muui pha rek. <sup>23</sup> Ji-è awaishii sai bo ne ai aphuii ai amuii è yao ai ne bo rey sha ro. <sup>24</sup> Chiuh-è dinne de aishii ho srane sai, “Hamangkhung-aphuii shii biidiie akhlam pha izai yao bo, nyieliieshii gathek ne thieg ithek shii gang rek phi pha bran ji ne layogpho ro. <sup>25</sup> “Ji pha bran è chang, gune athieg ro ai ne layogpho rai bey asi rai bey,” “Chiuh-è gune thieg: Gune miegthi chak chiih-è thuh ne doh sha ge ro.”

<sup>26</sup> “Itek è aishii sai, ai è na shii nyie khi-èrek gang phi phlei?” “Chiuh-è na ro miegthi ji ne ai è khi-èrek ne gang rek phi phlei?”

<sup>27</sup> Ai è chang “Gu è nathek shii yaojong phro,” “Jishii gu miyao ne anuii. Nyie rek ne dinne nuui yang phlei? Na de airo samoythek pho rey yang bey?” <sup>28</sup> Itek è aishii makhakriing srane yao, na de ji pha ijak iwa; jishii gathek ne Moses ro samoythek ro. <sup>29</sup> Gu ne thieg Hamangkhung-aphuii è Moses shii ne miyao yao, chiih-è ji pha bran ne khi è wuii rai lei ne gathek ne lujia de athieg ro. <sup>30</sup> Ji pha bran è chang, jine anomuluii pha ro! Chiuh-è nathek ne ai khi è wuii ji de athieg. Jishii ai è gu shii miegthi doh mua pha gang phi ro! <sup>31</sup> Gu ne thieg Hamangkhung-aphuii ne layogphothek shii anuii jimagungde hanyie è Hamangkhung-aphuii pha miyao ji nuui ne lua pho ne Hamangkhung-aphuii de aishii ilab phi ro chiih-è ai è aishii nyie rek yang pha ji rek phi ro. <sup>32</sup> Sohjambling nyajao dang ne miegthi giak pha ji

shii gang rek phi pha ayoi ba ro. <sup>33</sup> Ji pha bran yi Hamangkhang-aphuii è awuii sapho shii hì pha blia arek mua phro.

<sup>34</sup> Ai è chang, nathek ne layog è giak ne sieng pha bran, “Chiih-è na ne gathek shii yua pha bidiang ne bey?” Chiih-è ithek è aishii Jewthek misiahò fuang khia muui.

### *Ragung shii miegthi*

<sup>35</sup> Nyie rey pha ji yi Isu è yoi mage shii, ai è bran shii doh srane aishii sai, “Na de Bran Dufuii shii migi now bey?”

<sup>36</sup> Bran ji è chang, “Masdo, ji ai ne hanyie lei, jiè gu shii yao riig bo, chiihphado gu de aishii migi rek mua!”

<sup>37</sup> Isu è aishii yao, “Nathek ne aishii doh jong ro, ai ne na rog shii yao ramuii pha jia ji ro.”

<sup>38</sup> Bran ji è yao, “Ithong! Gune migi now phro iyao” Srane Isu moe shii bam ne khung dun.

<sup>39</sup> Isu è yao, gune ichiih sohjambling shii chua pha wuii phro, jiè miegthi pho ne doh ruii phro, chiih-è mieg wie pho ne ithi rey ruii phro.

<sup>40</sup> Thiichiih ai rog shii um pha giak Pharisithek è ji yao pha ji yoi srane aishii sai, “Na miyao jine gathek shii miegthi rone yao pha ji asi bey?”

<sup>41</sup> Isu è chang, nathek ne miegthi arone nathek ne ichiig arey phro, na è mieg doh rone gathek shii yao mage pha ji è nathek ne thuh de ichiig um ba ro.

## 10

### *Shiishai brogpho pha najang*

<sup>1</sup> Isu è yao, gu nathek shii izai yao dang phro: Bran hanyie yi shiishai ruii pha muthua pha gak è awuii pha gai muthua è khurog ne wuii pho ne mugo nane riaopha pha bran ro. <sup>2</sup> Bran hanyie magungde shiishai muthua gak è wuii ruii pho ne shiishai brogpho ro. <sup>3</sup> Chiih-è gak khan pho è aishii gak hong phi srane; awai shiishai shii ibeng è ho mage shii shiishai è muspho ro gow gao dun ne, muspho è jishii fuang hà lua noh phro. <sup>4</sup> Ai è fuang hà noh mage shii, awai yi ibi hà lua, chiih-è shiishai ne ai iidoh hà luagieng, nyieliieshii shiishai è ai gow gao phro. <sup>5</sup> Ai ne gai pha bran rog shii alua pha ai ne ji pha bran è ruang ran marui phro, nyieliieshii ai ne ji pha bran gow ne agao ro. <sup>6</sup> Isu è ji pha najang è yao shii, ji pha miyao jine nyie yao pha ji ne ithek è agao mua.

### *Isu ne wie brogpho ro*

<sup>7</sup> Ji-è Isu è yao, gu nathek shii izai yao phro: Gune shiishai gak ji ro. <sup>8</sup> Chiih-è gu è ibi gai khama wuii pho ne mugo nane riaopho ro, jimagungde shiishai è de ai miyao anuii ro. <sup>9</sup> Gune gak ro, hanyie gu è khud ne iliing wuii ruii arone ji pho ne ragia rey ruii phro. Ai ne iliing gu shii wuii ne chiih-è fuang wuii srane saing rey chie ruii phro. <sup>10</sup> Mugopho ne mugo go pha nane ua pha chiih-è srobro rek pha wuii phro. Gu è wuii pha ji ne nathek shii bajo ley chai mua yi pha wuii phro.

<sup>11</sup> Gune wie shiishai brogpho ro, hanyie è shiishai Chiang shii iy yang pha ji ro. <sup>12</sup> Riinang rek bie ne shiishai pha shiishai brogpho ne, shaliie wuii ruii pha doh mage shii shiishai thoh maruii srane rum ne ran dun phro; jiè shaliie è shiishai shii thak ne dayiingdayang rek ne ruii mua phro.

<sup>13</sup> Riinang pha shiishai brogpho ne ran marui phro, nyieliieshii ai ne riinang pha bran bie ro chiih-è shiishai shii wie ariig ro. <sup>14-15</sup> Gune wie brogpho ro, chiih-è Aphuii de gu shii thieg, chiih-è gu de Aphuii shii thieg, ji duiine gu è gui shiishai shii thieg chiih-è shiishai de gu shii thieg. Chiih-è gune shiishai Chiang shii de nya-iy yang phi phro. <sup>16</sup> Ichiih rugo shii oi pha guro shiishai ne thiisa hà shiishai gaithek de um ba ro. Gune aishii de noh chid phro; ithek de guro gow yoi ruii phro, chiih-è ithek ibrog shii de brogpho jia pha shiishai brog pha shiishai rey ruii phro. <sup>17</sup> Aphuii è gu shii miie, nyieliieshii gune gui chai de phi yang phro jiè gune iidoh mua din ro. <sup>18</sup> Hanyie magungde guro chai ariao mua phro. Gune guilum ne phi mua phro chiih-è gu shii ne phi pha rangsua de gui shii um ro. Chiih-è ji iidoh yi din pha rangsua de gui shii um ro. Hi ne gu Aphuii è gu shii yung ne rek yi ro. <sup>19</sup> Ji pha miyaogamthek ji nuii srane thiichiih pha branthek de dinne yo chedun. <sup>20</sup> Bajo giak bran è yao, “Aishii ne ibuii um ro! Ai ne ibiu ro! Nyie rek ne nathek ai miyao nuii phlei?” <sup>21</sup> Jishii giak è yao, “Ibuii um pha bran ne ji è rek pha miyao ayao mua phro! Nyie khi-èrek ne ibuii è miegthi bran shii mieg doh mua yi phlei?”

### *Isu shii snai muii*

<sup>22</sup> Hakhangshak rey sha shii, Jerusalem hà Hamangkhung-aphuii Misiahò khud pha sai ramuii. <sup>23</sup> Isu yi Hamangkhung-aphuii Misiahò hà Solomon ro ithua sibiang shii luaramuii. <sup>24</sup> Thiichiih shii bran wuii khrab thog ne aishii sai, “Na ne dinne de gathek shii khinyma nowdak ne rai ba yi habey? Gathek shii sang yao mage bo: Na ne Masi bey?”

<sup>25</sup> Isu è chang, “Gu è nathek shii khuchung mujo yaojong ro, jimagungde nathek ne migi anow. Chiih-è nyie blia yi gu è rek pha ji ne Hamangkhung-aphuii pha riichai è gu Chiang shii khagi yao ro; <sup>26</sup> Jishii nathek ne migi anow phro, jiè nathek ne guro shiishai asi ro. <sup>27</sup> Guro shiishai ne guro gow yoi, chiih-è gune aishii de thieg, chiih-è ai ne gu rog luagieng phro. <sup>28</sup> Gune ithek shii idang pha chai phi ruii phro, chiih-è ai ne khuchung de a-iy phro. Hanyie magungde ithek shii gu è ariao mua phro. <sup>29</sup> Guro aphuii è gu shii nyie phi pha ji ne zab è de boh ro, chiih-è hanyie magungde aphuii è wie gayiig pha ji ne ariao mua phro. <sup>30</sup> Aphuii nane gune jia bie ro.”

<sup>31</sup> Chiihphado bran è aishii chao pha lubao chieng. <sup>32</sup> Isu è aishii yao, “Aphuii è gu shii rek bo ne phi pha blia wie ne gu è nathek ibi rek phi; chiih-è nyie blia re-è nathek gu shii lubao è chao pha now phlei?” <sup>33</sup> Ithek è chang, “Gathek de naro blia wie jiè ne na shii lubu achau mayang, jimagungde na è Hamangkhung-aphuii shii biwo yao, na ne bran bie jishii nawaishii Hamangkhung-aphuii rab ro!”

<sup>34</sup> Isu è chang, Hamangkhung-aphuii è nathek ne biidiie pha hamangkhung-aphuiithek rone yao pha ji ne nathek ro Iphey shii de zey ne um ro. <sup>35</sup> Gu ne thieg, Jigi shii yao pha ji ne idang pha izai chak ro; chiih-è hanyie shii airo mua phi jong pha bran shii ne Hamangkhung-aphuii è chad rone ho ro. <sup>36</sup> Gu shii ne Hamangkhung-aphuii è gua srane sohjambling shii thoh ge. Nyie khi-èrek ne, nathek ne gu è Hamangkhung-aphuii ro Dufuii rone yao pha ji ne biwo yao phrone yao ne bey? <sup>37</sup> Gune Hamangkhung-aphuii è yang pha blia ji arek arone, gu shii migi arek rabo. <sup>38</sup> Jishii gu ai è yang pha ji shii rek magunde nathek gu shii migi anow ro, nathek ne gu è rek pha ji è aphuii gu shii um rone chiih-è gune aphuii rog shii um rone nathek ne gu blia shii iujia ne migi rek miidang bo. <sup>39</sup> Ithek è

aishii dinne zum pha rek shii, jishii Isu ithek wad è thua mua ne dun dun.  
<sup>40</sup> Chiiphphado Isu Jordan pha khamuii thrang hà Jon è khowo phi muui pha ithua shii dun ne thiichiih shii rai. <sup>41</sup> Aishii bran bajo wuii thog srane yao. “Jon è ne buangthek pha blia ne arek, jimagungde ai è hì pha bran Chiang shii nyie yao pha ji ne izai chak ro.” <sup>42</sup> Chiìh-è thiichiih shii bran è de aishii bajo migi rek.

## 11

### *Lazaras iy dun*

<sup>1</sup> Lazaras beng pha bran jia Bethany hà rai muui pha ji yi rad. Ji pha thawun Bethany ne Mery nane ai khuii Martha rai muui pha ji ro. <sup>2</sup> (Ji pha Mery beng pha ji ne rem no pha ji è Ithong lai shii shun srane khajiang rek ne sad phi pha ji ro; chiìh-è rad pha ji ne ai buphuii Lazaras ji ro.) <sup>3</sup> Lazaras ro amuii è Isu shii mua thoh ge, “Ithong, naro bushun ijak ne rad muui ro.”

<sup>4</sup> Isu è ji yoi mage shii, ai è yao, “Lazaras murad jine iy sapho asi ro; hì rey pha ji ne Hamangkhung-aphuii shii biisiie doh yi pha ji rey ro. Hì pha blia è Hamangkhung-aphuii pha Dufuii shii bo biisiie mua ruii phro.” <sup>5</sup> Isu è Martha nane ikhuii chiìh-è Lazaras shii miie rek. <sup>6</sup> Ai ne Lazaras rad pha mua ji yoi magungde ai ne thiisa hà danyi rai din marui. <sup>7</sup> Chiìhphado è ai è awai samoy shii yao, “Cho gethek ne Judea hà iidoh dun sha rai haro.”

<sup>8</sup> Chiìhphado shii samoy è yao, “Masdo,” “Iujia inai pha ibi shii ai è nathek shii lubao rek ne chao pha rek; jimagunde thiisa hà dun din pha phak ne bey?” <sup>9</sup> Isu è chang, “Nathek jia shii ishak snanyi oi chak bey? Ji-è hanyie magunde hanai bo hà lua arone khuchung de akham phro, chiìh-è ai ne sohjambling pha muchuang ji doh ruii phro. <sup>10</sup> Jishii ai ne habiu hà lua arone kham dun phro, nyieliieshii aishii ne muchuang oi ro.” <sup>11</sup> Isu è ji è yao srane dinne yao, “Gu ijak Lazaras ne men dun ro, jimagungde gune wuii srane aishii sieng din yi pha ro.” <sup>12</sup> Samoythek è chang, Ithong, “Ai men mua arone, ai ne wie rey din ruii phro.” <sup>13</sup> Ji ne Isu è Lazaras iy dun pha ji yao, jimagungde ithek mugao yi izai men pha ji gao. <sup>14</sup> Isu è ithek shii wie yao, Lazaras ne iyjong dun ro, <sup>15</sup> jishii gu nathek Chiang gune bajo sang ro jìe gune ai rog shii oi ro, jìe nathek ne migi now ruii phro. Ji-è cho gethek ne aishii wuii sha rai haro. <sup>16</sup> Thomas (Iwen rone ho muui pha ji) è awai ijak samoythek shii yao, “Cho gethek de zab Masdo rog shii wuii sha rai, chiìhphado gethek de ai rog shii nya-iy mua gieng!”

### *Isu ne hòi pha nane chai ro*

<sup>17</sup> Isu sha hà wuii thog shii, ai è Lazaras iy ne wieng pha dawì rey sha pha doh. <sup>18</sup> Bethany yi Jerusalem è labiang uom athog ro, <sup>19</sup> JudeantheK Lazaras iy muui pha bumuii Martha nane Mery shii lumuii hà azo yi pha rek phi pha wuii thog ruii. <sup>20</sup> Martha è Isu wuiiramuii pha yoi mage shii, ai Isu shii si pha fuang hà wuii dun, jimagungde Mery ne hò iling hà rai iang. <sup>21</sup> Martha è Isu shii yao, “Ithong, na ne ichiih shii um iang arone, guro buphuii ne a-iy ba iwa!” <sup>22</sup> Jishii gune thieg thuh shii magungde na è Hamangkhung-aphuii shii ai Chiang nyie lia magungde ai ne na shii phi ruii phro.”

<sup>23</sup> Isu è Martha shii yao, “Naro buphuii ne dinne hòi ruii phro.”

<sup>24</sup> Ai è chang, “Gune thieg,” “Ai ne iidohhè pha inai shii ne dinne chai hòi ruii phro.”

<sup>25</sup> Isu è Martha shii yao, gune hòi pha ji nane chai ji ro. Hanyie è gu shii migi rek arone ai ne iy dun magungde ai ne sieng din ruii phro; <sup>26</sup> chiih-è hanyie gu rog rai ne gu shii migi now arone khuchung de a-iy phro. Nathek de jishii migi now bey?

<sup>27</sup> Ai-è chang, Ithong! “Ji chak ro.” “Gune na shii migi rek phro na ne Masi ro, Hamangkhung-aphuii pha Dufuii hanyie è ichiih sohjangbling shii wuiiramuii pha ji ro.”

### *Isu è choh*

<sup>28</sup> Martha è ji yao ched pha iidoh shii, iidoh wuii ne ai ikhuii Mery shii de ug ne ho srane yao, “Masdo ne ichiih shii um ro,” “Chiih-è ai è na shii sai ramuii ro.” <sup>29</sup> Mery è ji yoi mage shii, jai srane aishii si pha khthiie fuang hà wuii dun. <sup>30</sup> (Isu ne ji pha thiig shii athog ba, ai ne Martha è wuii si pha ithua shii ba.) <sup>31</sup> Mery fuang hà khia mage shii aishii nong gieng pha bran de Mery rog fuang khia gieng. Ithek è now shii ai ne wieng hà choh wuii ara è now ro. <sup>32</sup> Mery Isu moe shii wuii thog srane, Isu shii nyadoh dang shii, ai è Isu lai moe shii bam yao, “Ithong,” “Nathek ichiih shii um arone, gu buphuii ne a-iy ba iwa!” <sup>33</sup> Isu è ai cho pha doh, chiih-è aishii riig shii ai rog shii um pha bran de cho ramuii; jiè ai lubu shii thoh ne ai de bajo zodun. <sup>34</sup> Ai è ithek shii sai, “Nathek è aishii khi hà wieng muui phlei?”

Ithek è chang, “Ithong, thawuii ne riig bo.”

<sup>35</sup> Isu è cho. <sup>36</sup> Bran è yao, “Riig mage bo ai ne aishii bajo miie rek ara!”

<sup>37</sup> Jishii giak bran è yao, “Ai ne miegthi pha bran shii Miegthi yi bey? Ai ne Lazaras shii a-iy yi pha de arek mua bey?”

### *Lazaras shii chai hà yi*

<sup>38</sup> Din ne, Isu bajo zo srane wieng hà wuii dun, ji pha wieng pha wog icho shii ne lubao kheb ne um. <sup>39</sup> Isu è yung, “lubao ji hong mage bo!” Iy dun pha bran pha bumuii Martha è chang, “Ithong, thiisa hà ne bajo shong now ruii phro. Ai wieng pha ne dawi rey sha ro!” <sup>40</sup> Isu è aishii yao, “Na ne migi rek arone na ne Hamangkhung-aphuii pha biisiie doh ruii phrone gu è na shii ayao ba bey?” <sup>41</sup> Ai è lubao shii ne reng mage. Isu è laziung hù ne yao, Aphuii, “Gune na shii laso phi, nyieliieshii na è gu shii nuui phi. <sup>42</sup> Gune thieg nathek ne idang gu shii nuui phi, Jishii gune ichiih pha bran Chiang yao phro chiih-è gu shii de na mutho rone ithek de migi rek ruii phro.” <sup>43</sup> Ji pha iidoh shii, ai è gang è ziak srane ho, “Lazaras, fuang hà khia mage bo!” <sup>44</sup> Ai è fuang khia ruii shii, ai wad ai lai ai mizia shii wieng pha yung è jiang ne um. Isu è aishii yao, “Aishii sey mage bo,” “Chiih-è dun yi bo.”

### *Isu shii ua pha phak*

<sup>45</sup> Mery shii wuii pha bran bajo è Isu mirek ji doh ne, ithek aishii migi rek. <sup>46</sup> Jishii giak bran è Pharisithek rog khid din srane, Isu mirek pha miyao ji yao. <sup>47</sup> Ji-è Pharisithek nane boh phabithek laimiang shii si srane yao, “Gathek nyie khi-èrek sha pha lei? Riig mage bo hì pha bajo buangthek pha blià hì pha bran mirek ro!” <sup>48</sup> Gethek è aishii ji riig ne thoh muui arone, zab pha bran ne aishii migi rek dun phro, chiih-è Roman pha riichaithek ne gethek shii buii blià rek srane Misiahò nane gethek bran shii ne mua maphi phro!”

<sup>49</sup> Ithek è jia, ji pha idam shii Kho Phabi Khaiphas beng pha è yao, na ne khama pha bi-è ro! <sup>50</sup> Na hì anow bey na shii ne hì wie liak phro gai pha bran chiih-è, zab pha bran shii mua liak shii ne bran jia iy liak ji wie ba

phro. <sup>51</sup> Hì pha miyao yi ai è awai lum ne ayao; nyieliieshii, ji pha idam shii ai yi Kho Phabi, awai è riig Isu ne Jew pha bran Chiang è iy ruii phro, <sup>52</sup> Chiuh-è Jew shii asi bie pha, jimagungde Hamangkhang-aphuii pha bran shii dayiingdayang rek muui pha siu shii de dinne ò shii khrab pha ro. <sup>53</sup> Ji pha iidoh è Jewish pha riichaithek è Isu shii ua pha nyuak rek. <sup>54</sup> Ji-è Isu Judea hà ug ne lua, chiuh-è ji pha ithua thoh marui srane balimuang moe Ephraim beng pha thawun hà dun srane, thiisa hà samoy rog hà raidun. <sup>55</sup> Chiuh-è Hiladun Sai pha ishak nui rey sha mage shii, brantheek soh re-è Jerusalem hà wuii ne Sai pha ibi shii zen pha muhui sang rek wuii phro. <sup>56</sup> Ai yi Isu shii riig ramuii, chiuh-è ai Misiahò shii khrab, ai è awaithek chung sai rai, “Na nyie ro è now lei? Zai ai ne Sai pha inai shii awuii ruii habey? Asi ai wuii ruii habey?” <sup>57</sup> Phabi bohtheek nane Pharisithek è yung srane ruii hanyie magungde Isu khi hà um pha ji theig arone, gathek shii phosro bo, jiè ithek ne aishii zum mua yi pha ji rek.

## 12

### *Isu è Bethany shii shunphi* (Mth 26:6-13; Mrg 14:3-9)

<sup>1</sup> Hiladun pha dariig ibi, Isu Bethany hà, ai è iy dun pha bran shii hòi phi pha, Lazaras hò hà wuii. <sup>2</sup> Thiisa hà ithek è Isu shii michie saro phi, chiuh-è Martha yi michie chog pha nong gieng; chiuh-è Lazaras ai de Isu rog thiibliie shii dug gieng. <sup>3</sup> Chiuhphado shii Mery è bajo igong rek pha chiuh-è bajo rem now pha thiiliie, sasia khuyo jia yie srane, Isu laishii shunphi, chiuh-è awai khaziang rek ne shadphi. Hò iliing shii ne sumaro ji è zab noh dun. <sup>4</sup> Isu ro samoy è jia, aishii zum pha rek muui pha Judas Iskharoth ji è yao, <sup>5</sup> “Nyie rek ne hì pha sumaro yi wieng uom liiman bang shii liu ne, bang yi dusho shii aphi lei?” <sup>6</sup> Ai è hì yao pha ji ne dusho shii wie rek rone ayao ro, jimagungde ai ne mugo ro. Ai ne bang biia han srane ji è awaishii nong din phro.

<sup>7</sup> Jishii Isu è yao, “Bimi shii awai ji thoh muui bo! Ai ne gu shii wieng pha inai ji rek ne rai yi bo. <sup>8</sup> Na shii ne idang dusho bran um ruii phro, jimagungde ai ne idang gu rog shii oi phro.”

### *Lazaras shii gidieg rek noh*

<sup>9</sup> Isu ne Bethany hà um rone bran bajo è yoi, jiè ithek ne sha hà wuii dun, jimagungde ai ne Isu shii riig bie pha asi pha iy dun pha jishii Isu è hòi din phi pha, Lazaras shii de riig pha wuii. <sup>10</sup> Ji-è boh phabithek è Lazaras shii de bajo ua pha phak, <sup>11</sup> nyieliieshii ai Chiang è bajo Jewtheek è ithek shii snai srane Isu shii migi rekdun.

### *Jerusalem pha brantheek è bajo sang ne Isu shii ho* (Mth 21:1-11; Mrg 11:1-11; Lug 19:28,40)

<sup>12</sup> Din pha inai shii Hiladun Sai pha ji shii wuii pha bajo bran è yoi, Isu yi Jerusalem hà wuiiramuii ro. <sup>13</sup> Ji-è ithek ne iphang yi ne fuang hà aishii si pha wuii dun, chiuh-è ziak srane Hamangkhang-aphuii shii “Chiong, Hamangkhang-aphuii aishii ne khirzey phi bo! hanyie Ithong beng è wuii, chiuh-è Hamangkhang-aphuii Israel pha Saja shii de khirzey phi bo!”

<sup>14</sup> Jigi shii yao pha duiine, Isu è bambao jia doh ne jishii in srane wuii,

<sup>15</sup> “Arum chid rabo, Zion rajan photheek!”

bambao ipheang è in ne,

Nathek Saja ichiuh wuii sha ruii ro.

<sup>16</sup> Ji pha ishah shii airo samoythek è agao, chiuhphado è Isu biisiie shii hòi mage shii, jigigam shii yao pha ji aishii yao ara ithek è now.

<sup>17</sup> Chiuh-è Isu rog shii um pha bran è Isu è Lazaras shii iy ne wieng bucho è hòi din yi pha miyao ji chiuh-è nyie rey pha ji phosro. <sup>18</sup> Ji-è ai ne aishii si wuii, nyieliieshii ai ne ji pha buang rek pha yoi. <sup>19</sup> Ji-è Pharisithek è gai jia shii yao, “Nathek riig mage bo! Gathek rone nyie de zab arey ro! Riigbo, sohjambling pha zab ne aishii luagieng dun ro!”

### *Giak Grekhthek è Isu shii sow*

<sup>20</sup> Sai pha ishah shii Jerusalem hà wuii pha giak Grekhthek de um. <sup>21</sup> Ithek Philip shii wuii sra (ai ne thiisa Bethsaida è Galili) ne yao, “Masdo, gathek Isu shii riig yang muii ro.” <sup>22</sup> Philip è Andrew shii wuii srane yao, chiuhphado shii bran nyi wuii srane Isu shii yao. <sup>23</sup> Isu è isa shii chang, “Bran dufuii ne boh biisiie mua pha ishah ne thog sha ro. <sup>24</sup> Gu nathek shii zai yao: Igam yi nyiak hà chiuh ne Ai a-iy sapho shii ne igam jia rai phro, chiuh-è nyiak hà wieng ne ai iy mage shii, dinne bajo igam rey ruii phro. <sup>25</sup> Hanyie è awai chai shii miie pho ne mua ruii phro, chiuhphado hanyie è ichiuh sohjambling shii awai chai shii mua arone ai ne khuchung de a-iy pha sieng pha ji mua ruii phro. <sup>26</sup> Hanyie gu shii nong pha yang arone gu iidoh shii luagieng bo, nyieliieshii gu khi hà um lei ne guro khiao de ji hà um ruii phro. Chiuh-è hanyie è gu shii nong lei ne gu Aphuii è de aishii ilab rek phi.

### *Isu e awai iy pha Chiang ji yao*

<sup>27</sup> “Thuh guro lubu ne diig rey dun—Chiuh-è gune nyie yao sha pha lei? Gu è yao, Aphuii, hòi pha ishah ne gu shii athog yie habey? Jimagungde jiè gune wuii—Ji-è gune airo diig pha ishah shii wuii mua. <sup>28</sup> Aphuii, na beng pha biisiie yi bo!” Chiuhphado hamangkhung è yao, “Gu è airo biisiie yijong ro, chiuh-è de dinne gu rek ba pha ro.”

<sup>29</sup> “Chiuhphado thiuchiuh shii iphiing riu pha bran è de yoi, chiuhphado giak è yao hòi ne hakhliing ro, chiuh-è gai è yao hòi ne hamangkhliie aishii yao ro!”

<sup>30</sup> Jishii Isu è ithek shii yao, hòi yao pha goh hòi ne gu Chiang asi ro, jishii nathek Chiang shii yao ro. <sup>31</sup> Thuh ne ichiuh sohjambling shii chua pha ishah ro; chiuh-è ichiuh sohjambling pha khohpho shii ne zab fen ruii phro. <sup>32</sup> “Gu shii sohnyiak è chang mage shii, gu zab gui moe hà rai pha ro.” ( <sup>33</sup> Hòi è yao pha ji ne ai khi-è diig rek ne iy pha mua ji yao.) <sup>34</sup> Bran iphiing è chang, “Gathek ro Iphey shii ne gathek shii yao Masi ne khuchung de a-iy pha sieng ne rai phro. Chiuh-è, khi-èrek, mua ne bran dufuii shii lakhung chang pha nathek yao phlei? Ji pha bran dufuii ne hanyie lei?”

<sup>35</sup> Isu è chang, muchuang ne nathek duchoi shii inai iujia rai bie ruii phro. Ji-è nathek shii muchuang nyaum shii nawaithek athodang pha blia rek bo; jiè igiia ne nathek duchoi hà athog yi rabo, chiuh-è hanyie jia è igiia shii luapho ne khi hà luaramuii pha ji athieg ro; chiuh-è hanyie yi igiia shii lua arone ai ne khi hà wuiiramuii pha ji athieg phro. <sup>36</sup> Muchuang nathek duchoi um ba shii nathek ne muchuang shii migi rek bo, ji-arone nathek ne isang pha bran rey ruii phro.

### *Migi arek pha bran*



Isu è ji yao pha iidoh shii, ai dun marui srane ai adoh yi pha ug ne rai muui. <sup>37</sup> Chiih-è ai è ji buangthek ithek moe shii rek magungde ithek è aishii migi arek, <sup>38</sup> Ji-è chaig pha Aijaya è nyie yao pha ji ne izai rey ro:

“Ithong, gathek miyao pha mua ji ne hanyie è migi rek phlei?”

Chiih-è “Ithong, ro blu ne hanyie doh phlei?”

<sup>39</sup> Ji-è ithek ne migi arek mua ro, nyieliieshii Aijaya è din yao,

<sup>40</sup> “Hamangkhang-aphuii è ithek ro miengthek ne kheb muui, chiih-è ithek ro khani ne bin muui, jiè ithek mieng ne ariig mua,

chiih-è ithek ro khani ne agao mua,

chiih-è ithek ne gu hà akhid ro, Hamangkhang-aphuii è yao, gune ithek shii wie rek phi pha.”

<sup>41</sup> Aijaya è hì pha miyao yi Isu ro, biisiie riig srane ai pha miyao ji yao.

<sup>42</sup> Jishii, Jewthek pha dumuii de Isu shii migi rek; jishii nyieliieshii Pharisithek è aishii Jewthek misiahò è khia ge è now ne rum ne lakhung è ayao.

<sup>43</sup> Ithek ne Hamangkhang-aphuii è rek phi pha ji re-è ne tharothamang mirek phi pha ji shii miie ro.

### *Isu ro miyaogamthek ji chua*

<sup>44</sup> Isu è ziak ne yao, “Hanyie gu shii migi rek gu jia shii migi arek jimagungde gu shii thoh ge pha aishii de migi rek. <sup>45</sup> Hanyie gu shii doh gu shii thoh ge pha ji shii de doh ro. <sup>46</sup> Gune sohjambling shii muchuang rey ne wuii ruii phro, ji è hanyie magungde gu shii migi rek arone, ai ne dinne igiia hà arai sha phro. <sup>47</sup> Chiih-è hanyie magungde gu miyao yoi ne anuii magungde gu aishii achua ruii phro. Gu ne ichiih sohjambling shii chua pha awuii ro, jimagungde gune ragia rek pha wuii. <sup>48</sup> Hanyie è gu shii snai ne gu mua ji anuii pha rek arone aishii chua pha ne jijia bie ro. Gu miyao pha miyaogamthek ai iidoh pha inai shii chua ruii phro! <sup>49</sup> Hì ne izai ro, nyieliieshii gu miyao hì ne gui muyung ne ayao ro, jimagungde gu shii thoh ge pha Aphuii è gu shii nyie khi è yao chid pha ji yung phro. <sup>50</sup> Chiih-è gune thieg hì è yung pha hì ne idang pha chai phi ro. Chiih-è gune nyie yao, pha hì ne Hamangkhang-aphuii è gu shii nyie yao yi pha ji yao phro.”

## 13

### *Isu è awai samoythek ro lai sud phi*

<sup>1</sup> Hiidun Sai pha inai ibi shii, Isu ne thieg ai ne sohjambling shii thoh marui srane Aphuii shii dun pha ishak rey sha. Ai è awairo sohjambling pha bran shii ne idang miie rek, chiih-è ai ne iidohhè thog magungde ithek shii bajo miie rek. <sup>2</sup> Isu nane airo samoy yi michie ji hà um shii, Isu shii zum pha now pha ji ne ibuii è khuchung mujo Simon Iskharioth ro dufuii Judas lubu iliing hà khudjong. <sup>3</sup> Isu ne thieg Hamangkhang-aphuii blu ne zab aishii phi ne ruii; chiih-è ai ne thieg ai ne Hamangkhang-aphuii è wuii jiè ai ne Hamangkhang-aphuii hà dun pha ro. <sup>4</sup> Chiihphado shii ai thiibliie è jai srane awai yung yi ne radang rek ne awai rinyie shii riing. <sup>5</sup> Chiihphado shii ai è kharhai shii kho thoi srane awai samoythek lai shii jao ne shudphi srane awai rinyie shii riing pha yung thileg ji rek ne sadphi. <sup>6</sup> Chiih-è ai Simon Phithar shii wuii thog mage shii, ai è Isu shii yao, “Ithong, na ne gathek lai shud phi pha rek ne bey?” <sup>7</sup> Isu è chang, “Nathek ne athieg phro thuh shii

gu nyie rekramuii pha ji ne, jimagungde doh hà nathek thieg ruii phro.”  
<sup>8</sup>Phithar è yao, “Asi khuchung magunde gu ro lai ashud rabo!” Isu è chang, “Gu nathek ro lai ashud phi arone,” “Na ne gu ro idang pha samoythek arey mua phro.”  
<sup>9</sup>Simon Phithar è chang, “Ithong, chiihphado gu lai jia shii ashud bie pha, gu wad nane gu khrug shii de zab shudphi bo!”  
<sup>10</sup>Isu è yao, “Hanyie è sudjong pho ne zab so sha ro chiih-è awaithek lai sud bie srane asud sha chid phro, chiih-è nathek zab ne so sha ro. Bjiu jia ne sang asi ro.”  
<sup>11</sup>(Isu ne khuchung muzo thieg jong hanyie è aishii zum pha rek pha ji ne; ji ne ai nyie um ne yao, “Nyielieshii bran jia ne zea ro jishii gai zab ne so ro.”)  
<sup>12</sup>Chiihphado shii Isu è airo lai shud ched shii, ai è awai yung guii srane awai thiibliie ji hà khid din. Ai è sai, “Thuh shii nathek ne thieg bey gu nyie rek phi pha ji ne?”  
<sup>13</sup>“Nathek è gu shii Masdo nane Ithong ro ho, jimagungde nathek munow ji ne izai chak ro, nyielieshii gune ji chak ro.”  
<sup>14</sup>Nathek Masdo nane Ithong gu è nathek lai shudphi jiè nathek de Nawaithek lai shud rai bo.  
<sup>15</sup>Gu è nathek shii thieg yi pha ji rek chak, nyielieshii gu è thuh shii nyie khi-èrek phi pha ji ne, nathek de rek mua.  
<sup>16</sup>Gu nathek shii izai yao: Khiao ne Ithong è boh asi ro, chiih-è muaphothek ne hanyie è aishii thoh ge pha ji è boh asi ro.  
<sup>17</sup>Nathek ne thuh shii hi pha isbang thieg ne, ji duiine rek arone nathek ne khama sang ruii phro!  
<sup>18</sup>“Chiih-è gu nathek zab chiang shii ayao ro; jimagungde gui è gua pha ji gune thieg ro. Jimagungde jigigam shii nyie yao pha ji ne izai rey pha, ‘Gu rog shii michie thang ne chie gieng pha bran ji ne gu shii gidieg rek din ruii phro.’  
<sup>19</sup>Thuh shii gu hi arey pha ibi shii yao, jiè khuchung magunde ji rey mage shii, nathek ne gu ji chak ro è migi rek ruii phro.”  
<sup>20</sup>Gu ne nathek shii izai yao: Hanyie gu è thoh ge pha ji shii choi arone gu shii de choi ro; chiih-è hanyie gu shii choi arone gu shii thoh ge pha ji shii de choi ro.”

*Isu è awaishii zum pha ji chaig*

*(Mth 26:20-25; Mrg 14:17-21; Lug 22:21-23)*

<sup>21</sup>Isu è ji yao ched pha iidoh shii, ai lubu iliing è diig now srane yao. “Gu nathek shii izai yao phro: Nathek è bran jia ne gu shii liu ruii phro.”  
<sup>22</sup>Chiihphado è samoythek awai chung riig srane, ai è nyie yao pha ji nuii ne zab anomuluii pha rey dun.  
<sup>23</sup>Isu ro samoythek è, ai è miie rek muui pha jia ji ai moe shii dug.  
<sup>24</sup>Simon Phithar è aishii phrai srane sai, “Ji pha bran ji ne hanyie shii yao phlei ne sai bo.”  
<sup>25</sup>Chiih-è samoy ji Isu moe nui hà wuii srane sai “Ithong ji pha bran ji hanyie lei?”  
<sup>26</sup>Isu è chang, “Gu è iweb ji shii jo srane hanyie shii phi ruii, ji pha bran ne airo.” Ai è iweb khuyo ji yie ne, jo srane, Simon Iskharioth ro dufuii Judas shii phi.  
<sup>27</sup>Judas è iweb ji nya choi dang mage shii, ai iliing shii sakhathong khuddun. Isu è aishii yao, “Na nyie rek pha ji ne khthiie rek mage bo!”  
<sup>28</sup>Thiibliie shii dug pho Isu è aishii nyie yao pha ji ne hanyie de khthiie agao ro.  
<sup>29</sup>Judas ne bang biia pha dumuii bran ro, giak samoythek è yao Isu è aishii sai pha inai shii nyie ched pha ji phev pha thoh ge iwa, chiih-è yang ne dusho shii phi pha thoh ge phro.  
<sup>30</sup>Judas è iweb ji choi srane khthiie fuang hà wuii dun, ji ne habiu shii ro.

*Iwo muyung*

<sup>31</sup>Judas fuang wuii dun pha iidoh shii, Isu è yao, Bran Dufuii ro biisiie ne reyge ro; chiih-è ai chiang è Hamangkhung-aphuii ro biisiie ne reyge ro.  
<sup>32</sup>Chiih-è ai chiang è Hamangkhung-aphuii ro biisiie rey ge arone, Hamangkhung-aphuii shii de bran Dufuii pha biisiie chiang è doh yi phro,

chiih-è ai ne khthiie rek phi phro. <sup>33</sup> Gu ani, gune nathek rog shii inai bajo arai sha ro. Na gu shii so ruii phro; gu è Jewish riichaithek shii yao pha duiine gu thuh nathek shii de yao, “Gu khi hà dun pha ji hà ne nathek awuii mua sha phro.” <sup>34</sup> Ji-è gu ne nathek shii iwo muyung phi pha ro: Nawaithek chung miie rek rai bo. Gu è nathek shii miie pha duiine, chiih-è nawaithek chung de miie rai bo. <sup>35</sup> Chiih-è nawaithek chung miie arone, nathek ne gu ro samoy ro è zab thieg ruii phro.

*Isu è Phithar musnai ji shii chaig  
(Mth 26:31-35; Mrg 14:27-31; Lug 22:31-34)*

<sup>36</sup> Simon Phithar è aishii sai, “Ithong na khi hà dun sha phlei?” “Isu è chang; gu dun pha ithua ji hà ne nathek ne thuh shii ne alua mua gieng phro,” Jmagungde doh è nathek de lua ruii phro. <sup>37</sup> Phithar è sai, Ithong, thuh shii gu nyie rek ne na rog shii alua mua phlei? Chiih-è gune na rog shii iy pha de nya saro mua phro! <sup>38</sup> Isu è chang, na ne izai gu rog shii iy pha nya saro gieng ne bey? Gu nathek shii izai yao: Khey a-èò ba pha ibi shii na ne gu shii athieg ro è ne uom chiieng yao ruii phro.

## 14

*Isu ne aphuii shii wuii pha lumuii ro*

<sup>1</sup> Isu è aishii yao, na lubu shii samdiig nane duhug arek ched rabo, Hamangkhang-aphuii shii migi rek mage bo, chiih-è gu shii de migi rek mage bo. <sup>2</sup> Thiisa hà Aphuii hò shii ne ùgdthek bajo um ro, chiih-è gune thiisa hà dun srane nathek ro ithua saro iang pha ro. Thiisa ithua oi arone gu nathek shii ayao phro. <sup>3</sup> Chiih-è dun srane nathek ro ithua saro marui ne, gu iidoh wuii din ne nathek shii gui rog shii noh pha ro, chiih-è gu khi hà rai lei ne nathek de ji hà rai ruii phro. <sup>4</sup> “Gu ne khi pha ithua hà noh dun ramuii pha lumuii ne nathek ne thieg.” <sup>5</sup> Thomas è aishii yao, “Ithong, gune athieg na khi hà dun jiè gathek ne khi-èrek ne ji hà wuii pha lumuii thieg phlei?” <sup>6</sup> Isu è chang, “Gu ne lumuii, chiih-è izai, chiih-è sieng pha ne gu ro, gu è asi sapho shii ne hanyie magungde Aphuii shii awuii mua phro. <sup>7</sup> Ai è aishii yao, thuh shii nathek ne gu shii thieg arone, nathek ne gu Aphuii shii de thieg ruii phro, chiih-è thuh è thiwing nathek è aishii thieg ne nathek ne aishii doh jong ro.” <sup>8</sup> Philip è aishii yao, “Ithong, gathek shii de ji pha Aphuii riig noh bo; ji nyama gathek chid muui ro.” <sup>9</sup> Isu è chang, “Gu nyama pha inai nathek rog shii um; jimagungde nathek ne gu shii athieg ba bey, Philip?” Chiih-è hanyie gu shii doh jong, ai ne Aphuii shii de doh jong ro. Chiih-è, nyie rek ne gathek shii Aphuii doh noh bo è yao phlei? <sup>10</sup> Nathek ne migi arek bey, Philip, gune Aphuii rog shii um, chiih-è Aphuii ne gu rog shii um? Isu è awai samoythek shii yao, gu miyaogamthek na shii yao pha ji ne, gu è ayao ro, chiih-è gu shii um pha Aphuii ji ne awai blia rek ro. <sup>11</sup> Gu ne Aphuii shii um rone chiih-è Aphuii ne gu shii um rone gu hì è yao pha ji ne migi rek bo. Ji asi arone, gu mirek phi pha Chiang ji è migi rek bo. <sup>12</sup> Gu nathek shii izai yao: Hanyie gu shii migi rek arone gu nyie rek pha ji ne ai de rek mua, chiih-è ai ne jiè de huak ne rek mua ruii phro, nyieliieshii gune Aphuii shii dun sha. <sup>13</sup> Chiih-è nathek gu beng shii nyie lia pha ji ne gu nathek shii rek phi, <sup>14</sup> Chiih-è Dufuii Chiang è Aphuii ro biisie doh mua. Nathek gu beng è nyie lia magunde, gu rek phi pha ro.

*Ragung So pha sbang rek*

<sup>15</sup> “Nathek gu shii miie arone, nathek guro muyung ji nuii phro.” <sup>16</sup> Gu è Aphuii shii lia, chiih-è ai è nathek shii yo nongpho phi ruii phro, chiih-è ai ne idang nathek rog shii rai ruii phro. <sup>17</sup> Ai ne Hamangkhung-aphuii ro izai ji doh noh pha Ragung ro, sohjambling de aishii achoi mua, nyieliieshii ne aishii ariig athieg mua phro, jishii nahek ne aishii thieg, nyieliieshii ai ne nathek rog shii rai phro chiih-è nathek iliing hà rog rai jong. <sup>18</sup> Khuchungde gu dun shii, nathek ji atho marui phro; gu ne iidoh wuii din ruii phro. <sup>19</sup> Iùjia ishak pha iidoh shii sohjambling pho ne gu shii adoh mua sha phro, jimagungde nathek ne gu shii nyariig mua; nyieliieshii gune isieng ro, chiih-è nathek de sieng ruii phro. <sup>20</sup> Ishak thog mage shii, nathek ne thieg ruii phro, gune Aphuii rog shii um ro, chiih-è gu nathek rog shii um pha duiine, nathek ne gu rog shii um phro. <sup>21</sup> “Hanyie è guro muyung shii choi ne nuii pho ne gu shii miie rek chak ro. Hanyie è gu shii miie rek arone gu aphuii è aishii miie rek ruii phro; chiih-è gu de aishii miie rek srane gui shii ai lakhung shii thoh phi phro.” <sup>22</sup> Judas è (Judas Iskharaïod asi) yao, “Ithong, chiih-è nawaishii zab sohjambling pho shii asi pha gathek lakhung shii khi-èrek ne thoh ruii phlei?” <sup>23</sup> Isu è aishii chang, hanyie chai gu shii miie rek pho ne gu miyao ji nuii phro. Chiih-è gu Aphuii ne aishii miie rek ruii phro, chiih-è gu aphuii na ne gune ai rog shii rai ruii phro. <sup>24</sup> Hanyie è gu shii miie arek pho ne gu muyua ji de anuii phro. Chiih-è gu nathek nuii pha muyua ji ne gu ro asi ro, ji pha muyua ji ne hanyie è gu shii thoh ge pha Aphuii è thog phro. <sup>25</sup> “Hì pha miyao ji ne gu nathek rog shii nya um pha shii yao phro.” <sup>26</sup> Gu beng shii aphuii è thoh ge pha nongpho, Ragung So, na shii zab yua ne now phi phro, gu è nathek shii yao pha ji ro. <sup>27</sup> “Liijiing ne gu nathek shii thoh marui; gu è nathek shii phi pha lubo ji gui ro ro.” Sohjambling pho nathek shii phi pha ji ne gu nathek shii phi phro. Chiih-è diig now ne duhug arek chid rabo, chiih-è arum ched rabo. <sup>28</sup> Gu è nathek shii yao pha ji ne na ne nuii, “Gu ne thoh ne dun sha, jimagungde gu iidoh nathek shii wuii din ruii phro.” Na gu shii miie rek chak arone gu aphuii hà dun shii ne na lised ruii phro; chiih-è aphuii ne gu è boh ro. <sup>29</sup> Thuh shii hì arey ba pha ibi shii gu ntek shii yao. Chiih-è hì rey mage shii, nathek gu shii migi rek ruii phro. <sup>30</sup> Gu nathek rog shii bajo amulo mua sha phro, nyieliieshii sohjambling shii boh rek pho ne wuii sha ruii ro. Ithek ne gu lakhung rangsua oi phro, <sup>31</sup> Jishii sohjambling pho ne thieg chid phro gune Aphuii shii miie rek, nyieliieshii ai mizen ji ne gu è zab rek phi. Thawuii ne, cho hì pha ithua è dun sha rai haro.

## 15

### *Isu ne isbang iphang ro*

<sup>1</sup> Gu ne izai iphang ro, chiih-è riigpho ne gu Aphuii ro. <sup>2</sup> Ai è Iwoi wie awoi pha ji shii ne zab hidmuii, chiih-è iwoi wie pha idiphak shii ne bsang phi, jiè hì ne sang rey ne iwoi wie woi ro. <sup>3</sup> Gu muyua phi pha miyao jiè nathek shii ne sang rab jong ro. <sup>4</sup> Nathek ne gu shii ò rey ne rai bo, chiih-è gu de nathek rog shii ò rey ne rai pha ro. Chiih-è idiphak ji awailum ne iwoi awoi mua phro ai ne iphang shii ò rai arone iwoi woi mua bie phro; jiduii ne nathek de gu rog ò arai sapho shii ne nathek de iwoi awoi mua phro. <sup>5</sup> Gu ne iphang ro, chiih-è idiphak ne nathek ro, hanyie gu shii ò rai arone, gu de aishii ò rai ruii phro, chiih-è ai ne iwoi bajo woi mua ruii phro; ji è gu è asi shii ne nathek nyie de arek mua phro. <sup>6</sup> Hanyie è gu shii ò arai arone idiphak duiine

fuang hà fen srane, chiih-è gow dun; chiih-è idiphak shii khrab srane bai shii fuii muui phro, chiih-è hùb dun phro. <sup>7</sup> Nathek de gu rog shii ò rai ne, chiih-è gu miyaogamthek de nathek shii ò ne rai arone, nathek nyie ched pha ji lia magunde, nathek shii mua ruui phro. <sup>8</sup> Gu Aphuii pha biisiie ne nathek è iwoi bajo woi pha ji re-è doh yi ro; jiè nathek ne gu ro samoythek rey ro. <sup>9</sup> Gu nathek shii miie ro, aphuii è gu shii miie rek pha duiine, chiih-è nathek guro miie rek pha ji shii ò ne rai bo. <sup>10</sup> Gu è Aphuii muyungthek ji nuui srane airo miie shii ò ne rai pha duiine, nathek de gu muyung ji nuui srane, gu ne airo miie shii rai ro. <sup>11</sup> “Gu nathek shii hì yao pha ji ne gu ro lubo yi nathek rog shii rai yi, chiih-è nathek ro lubo de zab rey mua.” <sup>12</sup> Gu muyung ne hì ro: Gu è nathek shii miie rek pha duiine, nawaithek chung de miie rek bo. <sup>13</sup> Hanyie è awai ijak Chiang shii iy phi pha ji è ne boh miie oi sha ro. <sup>14</sup> Chiih-è nathek ne gu ijak ro nathek ne gu è zen pha ji nuui arone, <sup>15</sup> Gu nathek shii dinne khiao anow sha phro, nyieliieshii Ithong è rek pha ji ne khiao è athieg ro, jiè gu nathek shii ijak ro è ho sha pha ro, nyieliieshii gu Aphuii è nyie nuui pha ji ne zab nathek shii yao ro. <sup>16</sup> Nathek è gu shii agua ro, jimagungde gu è nathek shii gua srane nathek shii iwoi woi yi pha bow phro, chiih-è nathek ro iwoi ne idang rey ne rai bo. Chiih-è Aphuii shii nathek è gu beng shii nyie lia pha ji ne Aphuii è nathek shii phi. <sup>17</sup> Ji-è, gu nathek shii nyie khi è muyung phi pha ji duiine, nawaithek chung miie rek rai bo.

### *Sohjambling pho è aishii gidieg re*

<sup>18</sup> “Ichiia pha sohjambling pho è nathek shii khiijai rek ruui arone, nathek ne è now bo ithek ne gu shii gidieg rek bi phro.” <sup>19</sup> Nathek de sohjambling pha arone, sohjambling pho ne nathek shii awaithek ro duiine miie rek ruui phro. Jishii gu è nathek shii sohjambling è gua jong ro, nathek ne sohjambling re-è asi sha ro, jiè nyieliieshii ne sohjambling pho è nathek shii gidieg rek ruui phro. <sup>20</sup> “Ji-è gu è nyie yao pha ji ne nowkhlei bo; khiao ne awai Ithong è ne boh asi phro.” Chiih-è bran è gu shii diig rek arone, nathek shii de bajo diigchio rek ruui phro; chiih-è ai gu miyao pha miyao ji nuui arone, ithek de nathek shii bajo nuui phi phro. <sup>21</sup> Jishii ithek è nathek shii irek pha ji ne nyieliieshii nathek ne guro habuii ne ji rek ro, nyieliieshii ithek ne gu shii thoh ge pha ji ne athieg ba ro. <sup>22</sup> Gu è awuii ne ithek shii ayao arone ithek shii ne layog athe, jiè thuh shii ithek ichiih pha layog ji è yo pha lumuii oi ro. <sup>23</sup> Hanyie è gu shii khiijai rek arone gu Aphuii shii de khiijai ro. <sup>24</sup> Hanyie è de arek pha blia ji gu è ithek duchoi shii arek phi arone, ithek ne ichiig layog ji ne oi pha habuii shii, ji gu è nyie rek pha ji ne ithek è dohjong, chiih-è ithek è aphuii nane gu shii khiijai rek. <sup>25</sup> Hì ne nyie um rey pha ne lphay shii nyie zey ne um pha ji ne zab izai rey pha ji rek ro: Jimagungde ithek è gu shii khiijai pha ne nyie ichiig de oi ro. <sup>26</sup> Nongpho ne wuii ruui—Jine Ragung ro, hanyie yi Hamangkhang-aphuii Chiang shii izai dong pha chiih-è hanyie ne Aphuii re-è wuii ro. Gu ne gu Aphuii re-è aishii nathek hà thoh ge srane ai ne gu Chiang shii yao ruui phro <sup>27</sup> Chiih-è nathek zab de gu Chiang yao ruui phro, nyieliieshii nathek ne igobi re-è gu rog shii um ro.

## 16

<sup>1</sup> “Gu nathek shii hì è yao pha ji ne, nyieliieshii nathek migi ji atho yi pha ji yao.” <sup>2</sup> Nathek shii Jewthek misiahò è khia mua phro, jimagungde ji re-è rek

pha ishak thog ruii phro, ithek è nathek shii ua srane hì è now phro ithek mirek ji ne Hamangkhung-aphuii ro blia ro. <sup>3</sup> Bran è nathek shii ji rek pha ji ne, nyieliieshii ithek ne Aphuii nane gu shii ne a-id ro. <sup>4</sup> Jishii gu è nathek shii hì yao pha ji ne, nathek shii ji è rek pha airo ishak thog mage shii, gu è nathek shii nyie yao pha nathek ji now ruii phro.

### *Ragung pha blia*

“Gu nathek rog ba shii hì pha miyao hì igobi hà ayao ro— Nyieliieshii gu ne nathek rog shii um ro” <sup>5</sup> Jishii thuh gu shii hanyie è thoh ge ai hà dun sha pha ro, na khi hà dun sha pha lei ne nathek è hanyie de gu shii asiie sha phro. <sup>6</sup> Jishii thuh gu nathek shii hì yao phro, nathek lubu ne ley duhug ro. <sup>7</sup> Jishii gu nathek shii izai yao: Gu ichiuh è dun liak shii ne nathek shii wie ro, chiih-è gu ichiuh re-è adun arone, nongpho ji ne nathek shii awuii ruii phro. Jimagungde gu dun arone, gu è aishii nathek hà thoh ge pha ro. <sup>8</sup> Ai wuii ruii shii, ai è ichiuh sohjambling pha brantheek ne layog miyao ji nane rangsua miyao ji chiih-è Hamangkhung-aphuii ro gua pha miyao shii ne bia dun rone khagi rek ruii phro. <sup>9</sup> Aishii layog ro è yao pha miyao ji ne, nyieliieshii ai ne gu shii migi arek; <sup>10</sup> ithek ne nyie izai Chiang shii ichiig ro, nyieliieshii gune Aphuii shii dun sha, chiih-è gu shii ariig mua sha ruii phro; <sup>11</sup> Chiih-è chua pha ji shii de ichiig rey dun ro, nyieliieshii ichiuh sohjambling shii bohkhothek è khuchung muzo aishii guajong ro. <sup>12</sup> “Gu nathek shii yao pha ne bajo um shii, jimagungde thuh shii nathek ne azud mua ro, <sup>13</sup> khuchung magunde ragung wuii ruii shii Hamangkhung-aphuii pha Chiang izai miyao ji yao ruii phro, ai è nathek zab pha izai hà noh ruii phro, ai ne awai pha rangsua è ayao ro, jimagungde ai ne nyie ai è yoi pha ji chiih-è nyie rey ruii pha ji nathek shii yao ruii phro. <sup>14</sup> Chiih-è ai ne gu shii biisiie phi ruii phro, nyieliieshii gu è nyie yao pha ji yie srane nathek shii yao pha um ro. <sup>15</sup> Gu Aphuii shii um pha ji ne zab guro ro; jiè gu hì yao phro chiih-è gu è nyie yao pha ji yie srane Ragung re-è nathek shii yao ruii phro.”

### *Duhugthek nane sangthek*

<sup>16</sup> “Iùjia pha iidoh shii nathek ne gu shii adoh sha ruii phro, chiih-è Iùjia pha iidoh shii nathek gu shii doh ruii phro.”

<sup>17</sup> Giak samoythek è awaithek chung sai rai, “Hì pha miyaosiu ne nyie ga?” Ai è gethek shii yao Iùjia ishak pha iidoh shii gethek ne aishii adoh ruii phro è yao, chiih-è Iùjia pha iidoh shii gethek aishii doh; chiih-è ai hì de yao, “Nyieliieshii gune Aphuii shii dun sha.” <sup>18</sup> Iùjia pha iidoh pha miyao ji nyie yao phlei? Chiih-è ai nyie yao pha ji gethek ne athieg!

<sup>19</sup> Isu è thieg jong nathek ne aishii sai pha now, jiè ai è ithek shii yao, “Gu è yao, Iùjia pha iidoh shii nathek gu shii adoh sha ruii phro, chiih-è Iùjia pha iidoh ishak nathek gu shii doh ruii phro. Nawaithek chung hì pha miyao Chiang è sai rai ne bey?” <sup>20</sup> Gu nathek shii izai yao: Nathek ne duhug rek ne choh ruii phro, jimagungde sohjambling pho ne sang ruii phro, nathek ne duhug rek ruii phro, jimagungde nathek duhug ji ne sang bsa hà khid ruii phro. <sup>21</sup> Hò-amuii ne ani giak pha rey mage shii, ai bajo duhug rek nyieliieshii airo diig rey pha ne ishak thog sha; jimagunde ai ani giak mage shii, ai ne awairo riie pha ji bia dun, ai ne sang nyieliieshii ani jia ne sohjambling shii giak ge. <sup>22</sup> Ji duine nathek rog shii de um phro, thuh shii nathek ne duhug, jimagungde gu ne nathek shii dinne riig ruii phro, chiih-è nathek lubu ne sang pha ji re-è zan ruii phro, chiih-è ji pha sang pha ji ne nathek è hanyie de ariao mua.

<sup>23</sup> “Gu nathek shii izai yao” “Gu beng è nathek Aphuii shii nyie lia pha ji ne phi ruii phro.” Ji pha inai thog mage shii nathek ne gu shii nyie alia ruii phro. <sup>24</sup> Thuh thog pha nathek è gu beng shii nyie de alia ba ro, lia bo chiih-è na mua ruii phro, chiihphado nathek ro sang ne zab rey ruii phro.

### *Sohjambling shii yang*

<sup>25</sup> “Gu è nathek shii hithek yao pha ne shan ne yao, jimagungde ji re-è rek pha ishak thog ruii phro gu ne nathek shii shan ne ayao sha ruii phro. Jishii miang è Aphuii Chiang shii yao sha ruii phro. <sup>26</sup> Ji pha inai thog mage shii, nathek aishii gu beng è lia ruii phro; jimagungde gu nathek haro è aishii lia phi pha gu ayao, <sup>27</sup> nyieliieshii Aphuii awai è nathek shii miie ro. Ai è nathek shii miie rek nyieliieshii nathek gu shii miie chiih-è gune Aphuii è wuii phrone migi rek. <sup>28</sup> Gu ne Aphuii è wuii thog, gu ichiih sohjambling shii wuii; jiè gune chiih sohjambling hi thoh marui srane gui Aphuii shii dun sha pha ro.” <sup>29</sup> Chiihphado ai samoythek è aishii yao, “Thuh shii na è nyie de ashan pha miang è yao. <sup>30</sup> Gathek ne thieg sha ge ro nane zab thieg; na shii ne gai è nyie sai chid pha oi sha ro, jiè nane Hamangkhung-aphuii è wuii chak phrone gathek shii migi rab phi bo.” <sup>31</sup> Isu è ithek shii chang, thuh shii ne nathek migi rey sha bey? <sup>32</sup> Hi è rek pha ishak thog ruii phro, chiih-è thogjong ro, nathek ne dayiingdayang rey ne hanyie hanyie hò hà dundun phro, chiih-è nathek zab ne gu shii ji thoh muui phro. Jimagungde izai shii gune gui ji asi phro, nyieliieshii Aphuii ne gu rog shii um ro. <sup>33</sup> “Gu nathek shii hi yao pha ji ne nyieliieshii nathek gu rog shii rai srane liijing mua bo. Sohjambling pho è nathek shii diig rek ruii phro. Jishii lubu chuh rek bo! Gu è sohjambling yang ge ro!”

## 17

### *Isu è awai samoythek ro shii sia*

<sup>1</sup> Chiihphado Isu ji yao ched shii, ai Hamangkhung hà riig srane yao, “Aphuii ishak ne thog sha, na dufuii shii biisiie ji phi sha bo, ji arone Dufuii de na shii biisiie ji phi mua.” <sup>2</sup> Na è aishii zab pha bran lakhung shii riichaithek phi, jiè ai ne idang pha chai aishii phi pha nathek zab shii phi mua. <sup>3</sup> Chiih-è idang pha chai hi ro na izai Hamangkhung-aphuii nane na è hanyie shii thoh ge pha Isu Masi shii id pha ji ro, chiih-è hanyie è aishii thoh ge pha Isu Masi shii thieg ro. <sup>4</sup> Gu è naro biisiie ne sohnyiak shii doh noh jong ro, chiih-è na è gu shii phi pha blia ji ne zab rekjong ro. <sup>5</sup> Aphuii! Sohkhung arab ba pha ibi shii guro biisiie ji thuh na um ba shii gu shii phi bo. <sup>6</sup> Na è sohjambling è hanyie gu shii phi pho ithek na shii thieg yi. Itek ne naro ro, chiih-è na è ithek shii ne gu shii phimui. Itek è na miyaogam nuii, <sup>7</sup> Chiih-è thuh shii zab na miphi ji ne na è thog rone ithek è thiegjong ro. <sup>8</sup> Gu è ithek shii mua phi pha ji ne na miphi ro, chiih-è ithek è choi ne; ithek ne thieg hi ne izai chak chiih-è gu ne na è wuii ro, chiih-è ithek ne migi rek gu shii ne na muthoh ge chak ro.

<sup>9</sup> “Gu è ithek shii sia phi. Jimagungde gu sohjambling pho shii sia phane athieg ro jimagungde na è gu shii phi pha ithek shii sia.” <sup>10</sup> Zab gu shii um pha ji ne naro ro, chiih-è zab shii um pha ji ne guro ro; chiih-è guro biisiie ne ithek re-è khlieng ro. <sup>11</sup> Thuh shii gu na hà wuii sha ruii ro; gu ne sohjambling shii arai sha phro, jimagungde ithek ne ichiih sohjambling shii ro. So Aphuii! Gu shii phi muui pha ibeng, na ibeng pha blu è ithek shii ragia ruii bo, chiih-è ginyi jia rek pha duiine ithek shii de jia rek yi bo. <sup>12</sup> Gu ithek

rog um pha ishak shii, gu è ithek shii na è gu shii phi pha ibeng naro blu ibeng è ithek shii ragia rek phi, gu è ithek shii ragia rek phi, chiih-è jia de asan yi ro, hanyie shii san yi pha ji musan bie ro nyieliieshii jigigam shii izai rey yi ro. <sup>13</sup> Chiih-è thuh gu na shii dun ramuii ro, chiih-è ichiih sohjambling shii gu hithek zab yao pha ji ne ithek ro lubu shii ne guro zab lubo ji rek yi ro. <sup>14</sup> Gu è ithek shii ne naro mua ji phijong, chiih-è sohjambling è amiee, nyieliieshii gu ichiih sohjambling pha asi pha duiine, ithek de sohjambling pha asi ro. <sup>15</sup> Gu è na shii ithek shii sohjambling è fuang yie bo è ayao ro, jimagungde gu na shii lia phro ithek shii ne sakthong re-è ragia ruii phi bo. <sup>16</sup> Gu ne sohjambling pha asi pha duiine, ithek de sohjambling pha asi ro. <sup>17</sup> Izai pha miyaosiu ji re-è ithek shii nawailum ne so rek muui bo; naro miyaogam ne izai chak ro. <sup>18</sup> Na è gu shii sohjambling hà thoh ge pha duiine, gu è ithek shii sohjambling hà thoh ge ro. <sup>19</sup> Chiih-è ithek Chiang gu guishii na shii so rek mua, ji duiine ithek zab de na shii, izai è so rek mua. <sup>20</sup> “Gu ithek shii asia doh bie ro, jimagungde hanyie thek airo mua ji nuui ne gu shii migi rek pha ji shii de sia phi ro. <sup>21</sup> Gu è ithek ne jia shii rey bo ne sia. Aphuii! Na gu shii um chiih-è na gu shii um pha duiine ithek ne ginyi shii um bo. Chiih-è ithek ne jia um ne, jiè sohjambling hà na è gu shii thoh ge phrone migi rek. <sup>22</sup> Na è gu shii phi pha biisiie ji gu è ithek shii phi, na nane gu jia rek pha duiine ithek de jia rey bo: <sup>23</sup> Gu ithek shii chiih-è na gu shii ro, jiè ithek ne zab ò jia shii rek mua, jiè ne sohjambling ithek ne thieg mua gu shii ne na muthoh ge chiih-è na gu shii miie pha duiine ithek shii de miie.

<sup>24</sup> “Aphuii! Na è ithek shii ne gu shii phi, chiih-è gu khi hà um ithek shii de gu rog shii um bo è yang muui ro, jiè biisiie na è gu shii phi guro biisiie yi ithek riig mua; chiih-è sohjambling rab pha ibi è na gu shii miie. <sup>25</sup> Giang Aphuii! sohjambling na shii athieg ro, jimagungde gu na shii thieg, ji è thieg yi gu shii na muthoh ge. <sup>26</sup> Gu è ithek shii na shii thieg yi pha rab, chiih-è ne athodang pha ro, chiih-è naro miie gu shii um pha ji ne ithek shii de um, chiih-è gu de ithek shii um mua ro.”

## 18

### *Isu shii zum*

*(Mth 26:47-56; Mrg 14:43-50; Lug 22:47-53)*

<sup>1</sup> Isu è ji è sia ched pha iidoh, Awai samoythek rog Khidron khaphieg thrang hà wuii thog. Thiisa pha ithua shii ne razim um, chiih-è Isu nane airo samoythek ji pha iliing hà wuii dun. <sup>2</sup> Judas, zum pha, de thieg ji pha ithua khi hà, nyieliieshii Isu ne idang ishak thiisa hà awai samoythek shii si. <sup>3</sup> Ji-è Judas ji pha razim shii wuii srane, ibrog Roman siphahithek, chiih-è Misiahò pha sandrithek shii boh phabithek nane Pharisithek è thoh ge; ithek ne migiang chiih-è bai chuangthek nane muchuangthek yi srane wuii. <sup>4</sup> Isu ne awaishii ji rey ramuii pha ji ne zab thieg, jimagunde ai è ibi wuii srane ithek shii sai, “Nathek ne hanyie shii sow phlei?” <sup>5</sup> Ithek è chang, “Nazareth pha Isu shii sow phro. Ai è yao, ji ne gu ro.”

Judas, zum yi muui pha, de ithek rog shii riu ne um. <sup>6</sup> Isu è ithek shii yao mage shii, “Gu ne ji ro,” Ithek iidoh dan srane niak hà chiihdun. <sup>7</sup> Jishii Isu dinne ithek shii sai, “Nathek è sow muui pha ji ne hanyie lei?”

“Nazareth pha Isu shii sow phro,” Ithek è yao.

<sup>8</sup> “Gu nathek shii khuchung mujo yaojong ji ne gu ro.” Isu è yao, “Chiihphado, nathek ne gu shii sow chak arone, nathek gai shii dun yi bo.”



<sup>9</sup> (Ai è ji yao pha ji ne jiè ai nyie yao pha ji ne izai rey yi: “Aphuii, na è ithek gu shii phi pha ji è nyie jia de asan yi ro.”) <sup>10</sup> Simon Phithar, hanyie shii khamriie um, khia srane Boh Phabithek ro khiao airo phazoi pha khoh laigthiak muui. Ji pha khiao beng yi Malchus ro. <sup>11</sup> Isu è Phithar shii yao, “Nawai khamriie yi iidoh awai ithua shii ruii bo! Gu shii ne Aphuii è phi pha diig gog ji ne aning yi phrone nane è now bey?”

### *Isu ne Anas è ibi*

<sup>12</sup> “Chiihphado è Roman pha siphahithek nane yung pha ophispho chiih-è Jewthek pha sandrithek è Isu shii zum, aishii phang muui,” <sup>13</sup> Chiih-è Khaiphas ro ikham Anas hà noh bi dun, nyieliieshii Khaiaphas ai ne ji pha idam shii zab è Kho Phabi ro. <sup>14</sup> Hi ne Khaiaphas ro hanyie è zab pha bran Chiang shii bran jia iy pha ji ne wieliak phro Jewish pha riichaithek shii yua.

### *Phithar è Isu shii snai*

*(Mth 26:69-70; Mrg 14:66-68; Lug 22:55-57)*

<sup>15</sup> “Simon Phithar nane gai samoy de Isu iidoh luagieng, chiih-è gai samoythek è ne Boh Phabithek shii wie thieg, jiè ithek de Isu rog shii Kho Phabi hò sibiang shii wuii dun.” <sup>16</sup> Ji pha ishak shii Phithar yi sibiang pha muthua hà riu ramuii ro. Chiihphado gai samoy jia de iidoh wuii dun, muthua shii bimi shii yao, chiih-è Phithar shii iliing hà noh thog. <sup>17</sup> Muthua shii riu pha bimi ji è Phithar shii yao, na de ji pha bran ro samoy è jia asi bey?

Phithar è chang, “Asi” “Gune ji asi ro.”

<sup>18</sup> Ji rey ramuii shii bajo chiie, jiè khiaothek nane sandrithek è bajuang bai rab srane ithek zab thiichiih shii ang ne, awaithek shii lua rab, jiè Phithar de ithek rog shii wuii srane ithek rog shii riu ne, awaishii lua rab.

### *Kho Phabi è Isu shii musai sai*

*(Mth 26:59-66; Mrg 14:55-64; Lug 22:66-67)*

<sup>19</sup> Kho Phabi è Isu shii samoythek Chiang nane ai muyua pha Chiang Isu shii musai sai. <sup>20</sup> Isu è chang, “Gu è ne idang zab shii hong ne yao; gu muyua ne khi hà zab bran ò wuii pha zab Jewthek misiahò shii nane Misiahò shii yua, gu ne khuchung magunde ug ne ayao.” <sup>21</sup> Nyie, chiihphado, nathek gu shii musai sai phlei? Gu shii nuii pha bran shii musai sai bo. Itek shii sai bo, gu è ithek shii nyie yao— ithek ne thieg gu è nyie yao. <sup>22</sup> Isu è ji yao ramuii shii, sandri jia è aishii phey srane yao, “Khinyama chua è na Kho Phabi shii ji yao phlei!”

<sup>23</sup> Isu è aishii chang, “Gu è nyie magungde asi pha yao arone, ichiih um pha zab shii yao bo ji ne nyie. Jishii gu è nyie yao pha ji ne gu izai yao arone, na gu shii nyie rek ne phey phlei?” <sup>24</sup> Chiihphado Anas aishii ne, joi bamuii shii Kho Phabi Khaiaphas hà thoh ge.

### *Phithar è Isu shii dinne snai din*

*(Mth 26:71-75; Mrg 14:69-72; Lug 22:58-62)*

<sup>25</sup> Phithar awai shii lua ne thiisa hà riu bamuii. Ji-è gai è aishii yao, “Na de ji pha bran ro samoythek è jia asi bey?” “Jimagungde Phithar è Snai, Yao,” “Asi, gu asi ro,” Ai è yao. <sup>26</sup> Kho Phabi jia ro khiaothek shii Phithar è khoh laig muui pha airo siangthang pha bran ji è yao, “Gu è na shii razim hà ariig bey?”

<sup>27</sup> Din ne Phithar è aishii Snai “asi” iyao shii khey loh.

*Isu shii Philath moe hà no h*

*(Mth 27:1-2,11-14; Mrg 15:1-5; Lug 23:1-5)*

<sup>28</sup> Hamiang riang Isu shii Khaiaphas hò è badri ro hòboh hà noh dun. Jimagungde Jewthek pha riichaithek ne hòboh iliing hà awuii, nyieliieshii ithek ne awaithek shii so ruui pha now, jiè ithek ne Hiiadun pha michie nya chie mua. <sup>29</sup> Ji-è Philath fuang hà aishii wuii srane sai, “Nathek hi pha bran shii nyie nin phlei?”

<sup>30</sup> Ithek è chang, “Ai nyie suruii oi arone gathek ne na hà anoh iwa.”

<sup>31</sup> Philath è aishii yao, “Ji-è nawaithek aishii noh srane nawaithek ro Iphey ji duiine rek pha bidiang bo.” Ithek è chang, gathek shii ne hanyie shii de ua pha yung ne oi ro, <sup>32</sup> (Hi è rey pha ji ne Isu ro miyao ne izai rey yi, airo miyaogam ji ai khi-èrek iy pha ji ne zab doh yi.) <sup>33</sup> Philath awai ithua hà iidoh dun din srane Isu shii ho. Chiih-è ai è sai, “Na ne Jewthek pha saja bey?”

<sup>34</sup> Isu è chang, “hì pha musai yi nawai lum ne sai ne ba asi pha gu Chiang yi gai è na shii yao ne ba?” <sup>35</sup> Philath è chang, “Na ne gu shii Jewthek ro è now bey? Hi ne nawai bran chiih-è kho phabi è gu wad shii phi muui ro. Na è nyie rek phlei?” <sup>36</sup> Isu è yao, “Gu ro Sajathua ne ichiih sohjambling pha asi ro; chiih-è guro Sajathua ne ichiih sohjambling pha arone,” Guro samoythek è Jewthek pha riichaithek shii aphì yi gui shii pha mak rek noh, guro Sajathua ne ichiih sohjambling shii asi ro!

<sup>37</sup> Philath è aishii sai, “Ji arone nane saja bey?”

Isu è chang, na è gu shii saja ro è yao arone ji ro. Gu ne giak ne sohjambling shii wuii pha ji ne airo nyie izai Chiang ji yao pha wuii ro. Hanyie ne izai è wuii arone gu shii yoi.

<sup>38</sup> Philath è sai, “Izai ji ne nyieliieshii?”

*Isu shii ua yi pha nin*

*(Mth 27:15-31; Mrg 15:6-30; Lug 23:13-25)*

Chiihphado Philath fuang hà dun din srane bran shii yao, “Gu ne aishii ua muui pha yaothiak pha Chiang nyie de adoh phi ro.” <sup>39</sup> Jishii nathek ro mizen duiine Hiiadun pha inai shii gu shii phat heg bran jia shii idang khia ne thoh. Ji-è nathek ne gu shii nawaithek ro Jewthek Saja shii thoh muui bo è now bey?

<sup>40</sup> Ithek è aishii ziaK srane chang, “Asi, aishii asi! Gathek ne Barabas shii chid pha ro” (Barabas ne sgoH pha bran ro.)

## 19

<sup>1</sup> Chiihphado Philath è Isu shii noh srane aishii zuang. <sup>2</sup> Chiih-è sandrithek è migem idiphak è rab pha rago ai khrug shii khakphi, chiihphado iphi yung de guii phi <sup>3</sup> Chiih-è aishii wuii srane yao, “Jewthek pha Saja phiang sieng ne rai bo!” Chiih-è ithek è wuii srane aishii pheY.

<sup>4</sup> Jishii dinne Philath fuang hà wuii sra ne ithek shii yao, “Riig bo, gu è aishii nathek hà noh ne riig yi gune aishii iy pha nin sapho nyie de atho phi ro.” <sup>5</sup> Ji-è Isu ro khrug shii mikhimthek pha rago khak srane, iphi yung de guii phi srane fuang hà wuii thog. Chiih-è Philath è ithek shii yao, “Riig bo! Hì pha bran ne ichiih shii um ro.”

<sup>6</sup> “Chiihphado è boh phabithek nane Misiahò pha sandrithek aishii ji riig srane, ithek è ziaK, aishii bai zun muui bo! Aishii bai zun mua bo!”

Philath è ithek shii yao, “Nawaithek è aishii noh srane, Nawaithek bai shii zun muui bo. Gu ne aishii iy pha nin sapho Chiang nyie atho phi ro.”

<sup>7</sup> Chiiphado shii iphiing è iidoh chang din, “Gathek Iphey shii yao ai ne iy sapho ro, nyieliieshii ai ne awai shii yao ai ne Hamangkhang-aphuii pha Dufuii rone yao” <sup>8</sup> Philath è ji yoimage shii, ai ne din ne de muna rundun. <sup>9</sup> Chihih-è ai dinne awairo bohò hà iidoh dun srane Isu shii sai, “Na khi è wuii phlei?”

Jimagunde Isu è achang. <sup>10</sup> Philath è aishii yao, “Na gu shii ayao habey? Now bo, gu na shii thoh pha riichai de um chihih-è bai shii zun pha riichai de um ro.”

<sup>11</sup> Isu è chang, “Na è gu lakhung shii riichai rek pha ji ne nyieliieshii Hamangkhang-aphuii è na shii phi. Ji-è bran hanyie è gu shii na wad shii phi muii pha ji ne awie pha layog ichiig shii phi muii.” <sup>12</sup> Philath è ji yoi shii, ai è Isu shii thoh muii pha bidiang ne lumuii sow, jimagunde ibrog è iidoh ziak din, “Na è aishii thoh muii arone, ji pha miyaosiu è na ne Bisiu ro ijak asi ara, chihih-è hanyie magunde saja rone yao arone ai ne Bisiu shii gidieg Ichiig rek ra!”

<sup>13</sup> Philath è ji pha miyaogamthek yoi mage shii, ai è Isu shii fuang hà noh srane chuathek Ithua rone ho muii pha ithua shii dug. “Lubao è rab pha ithua” Shii noh srane dug ba yi. (Hebrew è Gabatha ro è yao). <sup>14</sup> Hi ne Hiiadun pha inai ibi pha inai duchoi shii ro, Philath è bran shii yao, “Nathek ro saja ne ichiuh shii um ro!”

<sup>15</sup> Jishii ai è iidoh ziak srane yao, “Aishii ua muii bo! Aishii ua muii bo! Chihih-è aishii bai hà zan muii bo!” Philath è ithek shii sai, “Nathek nawaithek ro Saja shii ne, gu shii bai zan muii bo è now bey?” Chiiphado shii boh phabithek è chang, “Gathek shii saja um bie pha ji ne Bisiu ji ro!”

<sup>16</sup> Chiiphado Philath è Isu shii ithek shii phi srane bai shii zun yi.

### *Isu shii bai hà zun muii*

*(Mth 27:32-44; Mrg 15:21-32; Lug 23:36-43)*

“Ji-è ithek Isu shii noh dun.” <sup>17</sup> Ai awairo bai han srane fuang wuii dun, chihih-è Gadongzaing rone beng muii pha ithua shii thog (Hebrew è ji pha ithua shii Golgatha, ro è yao) <sup>18</sup> Thiisa ithek è aishii bai hà zun muii; chihih-è thiichihih shii ithek è gai bran nyi shii de ai moe shii bai hà zun muii, jia shii ai phawig pha bai hà zun chihih-è jia shii airo phazoi pha bai hà zun muii. <sup>19</sup> “Philath è zey srane ai zun pha bai shii miak phi.” Jewthek pha Saja, Nazareth pha “Isu,” <sup>20</sup> Bajo bran è tham, nyieliieshii Isu bai hà zun pha ithua ji yi rajan è muna ruang asi ro; chihih-è ji thiichihih shii nyie zey pha ji ne Hebriu, lathin chihih-è Grekh ro. <sup>21</sup> Boh phabithek è Philath shii yao, “Jewthek pha Saja ro è azey rabo,” ji phachiang, “Hi pha bran è yao, gu ne Jewthek pha Saja ro yao pha ji zey bo.” <sup>22</sup> Philath è chang, “Gu è nyie khi è zey pha ji ne zey ne um yi bo.” <sup>23</sup> Isu shii bai hà zun ched pha iidoh shii sandri è Isu ro yung yi srane iliang wi ji srane zab pha sandrithek shii jia jia phi, chihih-è ai lakhung è yi ne lui thog pha wad è phuii pha phadiig phiang ji de yi. <sup>24</sup> Jishii sandrithek è yao rai, “Cho hi pha yung yi aji pha; hanyie shii mua lei ne siog shii zey srane fen ne chiing rai haro. Hi è rey pha ji ne jigigam shii nyie zey ne um pha ji izai rey yi pha ji rek ro”

“Itek è gu yung shii siog fen ne riig,

chihih-è gu yung shii liug.”

Chihih-è sandri è de ji è rek.

<sup>25</sup> Airo amuii, ro ikhuii, Khlophas ro yiy Mery Magdalene yi Isu shii zun pha bai moe shii riu. <sup>26</sup> Isu è awai amuii nane awai samoy hanyie shii ai

è miie pha ji yi thiichiiah shii riu pha doh; jiè ai è awai amuii shii yao, “Hi ne naro Dufuii ro.” <sup>27</sup> Chiiphado è awai samoy shii yao, “Hi ne nathek ro amuii ro. Ji pha iidoh è samoy è ji pha hò-amuii shii noh srane awai hò shii rai noh ro.”

### *Isu iy dun*

(*Mth 27:45-56; Mrg 15:33-41; Lug 23:44-49*)

<sup>28</sup> “Zab pha blia rey sha pha ji ne Isu è thieg; jigigam shii nyie zey ne um pha ji ne izai rey ro, ai è yao, gu gahanghang muui ro.” <sup>29</sup> Thiichiiah shii awie pha phuii dieg ley jia um, jimagungde ithek è jog rek ne lao ne, yung è jiang pha muchang shii mam srane ai sem shii ruii phi. <sup>30</sup> Isu è ji pha phuii bisieng ji niing srane yao, “Hi ne jong sha ro!”

Chiiphado è ai khrug jiing srane iy dun.

### *Isu ro siu khia*

<sup>31</sup> Chiiphado shii Jewish pha riichaithek è zun muui pha bran ro lai jo pha Philath shii lia. Chiiah-è siu ji bai è thazam yi pha lia. Ithek è ji khung pha ji ne nyieliieshii sugrubar ro, chiiah-è ji pha thimiang shii ne Jewthek Thung pha Inai pha inai ro chiiah-è Jewthek Thung pha Inai pha ji ne bajo so ro. <sup>32</sup> Isu moe shii zun muui pha bran nyi ro yi sandrithek è wuii srane laithek thab bi muui. <sup>33</sup> Jishii ithek Isu ro lai de thab pha wuii shii, ithek è adoh ba pha ibi shii iyjong dun pha doh, jiè ithek è airo laishii ne athab. <sup>34</sup> Sandri jia è awai jiong rek ne Isu siu shii giao mage shii ifai nane kho noi khlei ruii. (<sup>35</sup> Bran jia è ji è rek pha ji riig srane yao, ithek de aishii migi rek bo. Ai è nyie yao pha ji ne izai yao chak ro; chiiah-è ai è thieg yi ai izai yao chak.) <sup>36</sup> Ji ne ai ne izaing jia rang de ajo, nyieliieshii jigigam shii nyie zey pha ji izai rey yi ro. <sup>37</sup> “Chiiah-è gai shii jigigam de yao, ithek è hanyie shii giao pha ji ne, bran ne aishii riig ruii phro.”

### *Isu shii wieng muui*

(*Mth 27:57-61; Mrg 15:42-47; Lug 23:50-56*)

<sup>38</sup> Ji-è rek ched pha iidoh shii, Arimathea thawun hà rai pha Joseph, è Philath shii Isu ro siu ji lia wuii. (Joseph de Isu ro samoy ro, jimagunde ai ne ug, nyieliieshii Jewish pha riichaithek shii rum.) Philath è Joseph shii yao, na ai siu iy ji nya yi bo, jiè Joseph Isu ro siu iy ji yi pha wuii. <sup>39</sup> Nekhodemus, hanyie yi igobi pha habiu Isu shii riig wuii, Joseph rog shii wuii ne, Myre nane aloes lao pha chun sa-uom yie, wuii thog. <sup>40</sup> Chiiah-è bran nyi è Isu ro siu ji yi srane yung imo rek ne jiang ne chiiah-è miinow rek ne shun ne Jewish Iphey è zen pha ji duine rek ne wieng muui pha sharo haro. <sup>41</sup> Thiichiiah Isu shii iy yi muui pha ithua shii razim jia um chiiah-è thiichiiah shii hanyie de awieng ba pha wieng iwo jia um. <sup>42</sup> Hi ne Jewthek Thung pha Inai ibi shii ro, chiiah-è wieng ne nui shii ro, jiè ithek è Isu ro siu ji thiichiiah shii ruii maruii.

## 20

### *Wieng isloi*

(*Mth 28:1-8; Mrg 16:1-8; Lug 24:1-12*)

<sup>1</sup> Deobari pha inai hamiang shii, la igia ba shii, Mery Magdalene è wieng shii wuii srane riig khlei shii wieng cho shii kheb pha lubao ne hòg ne um. <sup>2</sup> Chiiah-è Simon Phithar nane gai samoy hanyie shii Isu miie rek muui pha samoy shii ran srane yao, “Ithong shii ne ithek è wieng è noh dun ro, chiiah-è aishii khi hà ruii rai lei ne, gathek ne athieg mua ro!” <sup>3</sup> Chiiah-è Phithar nane

gai samoy de wieng hà wuii dun. <sup>4</sup> Chiìh-è bijiù nyi yi ran srane, jimagunde gai samoy yi Phithar è chiàng ran srane wieng shii thog bi. <sup>5</sup> Jishii ai iliing hà awuii ba shii, ai è jiing srane ne riig shii aishii jiang pha yung imo ji ne doh. <sup>6</sup> Idoh shii Simon Phithar de wuii thog, chiìh-è ai de miang wieng hà wuii dun, ai de thiichiih shii yung imo um pha ji doh. <sup>7</sup> Chiìh-è Isu ro khrug shii jiang pha yung ji yi siu shii jiang muui pha rog shii um pha adoh. Jimagunde awai yo è jiang dun. <sup>8</sup> Chiìhphado è wieng ibi wuii thog pha gai samoy, de iliing hà wuii srane, aishii riig ne migi rek. <sup>9</sup> (Jishii ai ne thuh de iy ne hòì dìn phro è yao pha ji ne athieg ba ro.) <sup>10</sup> Chiìhphado samoythek iidoh hò hà dun dìn marui.

*Isu è Mery Magdalene shii si*  
(Mth 28:9-10; Mrg 16:9-11)

<sup>11</sup> Mery yi wieng moe shii cho srane riu ne rai ramuii shii, ai nya cho ba muui shii, ai è wieng shii bam srane riig shii <sup>12</sup> hamangkhlìe nyi yi yung imo guii srane, Isu ro siu iy ruui pha ji shii jia yi ai khrug moe hà chiìh-è jia yi ai lai moe hà riu ne rai. <sup>13</sup> “Ai è hò-amuii ji de sai, nyie rek ne cho phlei?”

“Hò-amuii jiè chang, ai è guro Ithong ne noh dun ro, chiìh-è gune athieg ro ai è khi hà noh dun rai lei ne!”

<sup>14</sup> Ji-è yao ched pha iidoh shii ai rei ne riig shii Isu thiisa hà riu ne um; jimagungde ai ne ji Isu ro è athieg mua. <sup>15</sup> “Isu è hò-amuii ji shii de sai, hò-amuii nathek nyie rek muui ne cho phlei? Chiìh-è ithek so ramuii pha ji ne hanyie lei?”

Hò-amuii jiè now shii ai ne razim muspho ara è now, jiè hò-amuii jiè yao, “Nathek aishii è yi dun arone Masdo, gu shii yao bo nathek è khi hà han ne ruui muui, ji arone gu ne wuii srane aishii yi dìn pha ro.”

<sup>16</sup> Isu è hò-amuii ji shii yao, “Mery!”

Ai è aishii rei srane Hebriu nyuak è yao, “Robboni” (Hi è yao pha ji ne “Masdo” ro è yao).

<sup>17</sup> Jishii Isu è hò-amuii shii yao, “Gu shii akhoh rabo,” “Nyeliieshii gu thuh de iidoh lakhung hà Aphuii shii awuii ba ro. Jimagungde gu khuiithek shii wuii srane yao bo, gu ne gui Aphuii nathek ro chiìh-è guro Hamangkhang-aphuii chiìh-è nathek ro Hamangkhang-aphuii shii khid ramuii ro.”

<sup>18</sup> “Ji-è Mery magdalene è wuii srane samoythek shii yao, ai è Ithong shii doh ne ai è aishii nyie yao pha ji ne nathek shii yao phro.”

*Isu è awai samoythek shii dong*  
(Mth 28:16-20; Mrg 16:14-18; Lùg 24:36-39)

<sup>19</sup> Ji-è iy pha ji yi Deobari habjuang shii ro, chiìh-è samoy ò jia shii khrab srane habin bin ne rai ramuii, nyeliieshii ithek ne Jewish pha riichaithek shii bajo rum. Chiìhphado ji è rekramuii shii Isu ai moe shii wuii thog ne riu mage. Ai è yao, “liijiing ne nathek rog shii um ro.” <sup>20</sup> Ji-è yao ched pha iidoh shii, ai è awai wad chiìh-è awai siu ithek shii riig ba yi. Chiìh-è samoy è Ithong shii riig srane sang dun. <sup>21</sup> Isu è dinne aishii yao, “liijiing ne nathek rog shii umbo, nyeliieshii gu shii ne aphuii muthoh ge ro, jiè gu nathek shii de thoh ge ro.” <sup>22</sup> Chiìh-è ai ithek shii misey rek ne thud srane ithek shii yao, “Ragung so shii nathek yi bo. <sup>23</sup> Chiìh-è nathek è bran ro layog khung phi arone, nathek ro layog khung ge ro; chiìh-è nathek gairo layog de akhung phi arone, ai è de nathek ro layog akhung phi phro.”

*Isu nane Thomas*

<sup>24</sup> Snanyi è bijiu jia Thomas (Iwen ro è ho) yi Isu wuii marui pha ishak shii ai yi thiichiih shii oi iang. <sup>25</sup> Chiih-è gai samoy è aishii yao, “Gathek è Ithong shii doh jong ro!” Thomas è aishii yao, “Gu ai wad shii sharo rek ne phey muui pha icho shii gu wadbieng rek ne hòg ne chiih-è siu shii wad è awiang ne ariig sapho shii ne gune migi anow phro.” <sup>26</sup> Damiley pha iidoh shii dinne samoy habin bin muui ne rai ramuii shii, Thomas de ai rog shii um. Habin ne bin muui, jimagunde Isu ai moe shii wuii srane riu ne aishii yao, “liijiing ne nathek rog shii um bo.” <sup>27</sup> Chiih-è ai Thomas shii yao, “Na wad bieng ichiih shii ruii mage bo, chiih-è gu wad shii riig mage bo; chiih-è nawai wad miang rek srane guro siu riie shii wiang mage bo, chiih-è athan pha, migi rek mage bo!” <sup>28</sup> Chiihphado è Thomas è chang, “Gu Ithong chiih-è gu ro Hamangkhang-aphuii!” <sup>29</sup> Isu è aishii yao, “Nyeliieshii na è gu riigjong pha ji re-è migi rek ne bey? Jimagunde hanyie è gu shii ariig pha migi rek arone ai ne bajo sang ruii phro!”

### *Hì pha jigigam pha miyao*

<sup>30</sup> Awai samoy um pha ji shii Isu è bajo buangthek pha blia rek phi pha ji ne bajo ne ichiih siog shii azey ro. <sup>31</sup> Chiih-è ichiih shii zey pha ji ne nyeliieshii Isu ne Masi chak ro, chiih-è Hamangkhang-aphuii ro dufuii ro è migi rek yi pha, chiih-è nathek ro migi aishii rek pha jiè nathek ne chai mua ruii phro.

## 21

### *Isu samoy miley shii dong*

<sup>1</sup> Ji-è rek pha iidoh shii, Thiberias pha khabang shii Isu awai samoythek shii dong thog. Ji hi è rey phro. <sup>2</sup> Simon Phithar, Thomas (iwen ro è ho muui pha ji), Nathanael (jia yi Galili Khana pha ro), Zebedi ro dufuiithek, chiih-è Isu ro gai samoy nyi ò shii um. <sup>3</sup> Simon Phithar è gai shii yao, “Gu ne ù ua sha wuii pha ro.” “Ithek è aishii yao,” Gathek de nathek rog shii wuii gieng pha ro. Ji-è yao rai srane ai run shii in ne wuii dun, jimagunde ai ji pha habiu shii nyie jia rang de azum mua. <sup>4</sup> Hasieng siang mage shii, Isu yi kho ring shii wuii ne riu, jishii samoy è ai ne Isu ro è athieg mua ro. <sup>5</sup> Chiihphado è ai è ithek shii sai, “filiaothek bran nathek nyie magungde zum mua bey?” Ai è chang, “Nyie de amua ro.” <sup>6</sup> “Ai è ithek shii yao,” Nathek ro chiug run pha phazoi hà moa mage bo, ji arone ù mua ruii phro. Ji-è ai è chiug moa mage shii thado ari mua din, nyeliieshii chiug shii ne ù bajo um dun. <sup>7</sup> Chiih-è Isu è miie rek muui pha samoy è Phithar shii yao, “Hì ne Ithong chak ro!” Phithar è Ithong chak ro è yoi mage ne, ai awai yung fie srane (awai yung than muui) chiih-è kho iliing hà lung dun. <sup>8</sup> Chiihphado è gai samoy de run è iring hà wuii srane chiug ley ù ji ri gieng, nyeliieshii ai yi ji pha soh è giia wieng jia nyama pha de asi pha ji um iang. <sup>9</sup> Ai è kho ring hà yie thog mage shii ai è bai fu ne ù chiih-è iweb ziao ne ruii pha doh. <sup>10</sup> Chiihphado he Isu aishii yao, “Bsa hà nathek muzum pha giak ù thayi mage bo.” <sup>11</sup> Simon è wuii srane chiug ley ù ji khia wuii, jimagunde ù yi wieng jia è saguii è uom um, jimagunde bajo ù tho magunde chiug ne iujia rang de aji dang. <sup>12</sup> Isu è aishii yao, “Nathek de thawuii ne chie bo.” Jishii samoy è hanyie de aishii asai mua, “Nathek hanyie lei?” Nyeliieshii ai ne thog, ai ne Ithong chak ro. <sup>13</sup> Chiihphado shii Isu è wuii srane, iweb phi chiih-è ù de phi. <sup>14</sup> Isu è jiè rek ne awai samoy shii dong thog ruii pha ji yi iy ne hòi din pha iidoh shii uomchieng pha ji ro.

### *Isu nane Phithar*

<sup>15</sup> Ai chie ched pha iidoh shii, Isu è Simon Phithar shii yao, “Jon ro dufuii Simon, na ne gu shii gai è rek pha ji è de muna gu shii miie rek ne bey?” Ai è chang, “Oh Ithong,” “Na ne thieg gu è na shii miie rek.” Isu è aishii yao, “Gu ro shiishaiduii shii wie riig bo.” <sup>16</sup> Din ne Isu è aishii yao, “Jon ro dufuii Simon, na ne gu shii miie rek ne bey?” “Ai è chang, Oh, Ithong.” “Na ne thieg gu ne na shii bushun rek.” Isu è aishii yao, “Ji arone guro shiishai shii wie riig bo.” <sup>17</sup> Uomchiieng Isu è aishii sai sha, “Jon ro dufuii Simon, na ne gu shii miie rek ne bey?” Jimagungde Phithar de duhug rey sha dun nyieliieshii uomchiieng aishii sai sha dun, “Na ne gu shii miie rek ne bey?” Ji-è ai yao, “Ithong chiih-è zab thieg; gune na shii miie rek!” Isu è aishii yao, “Guro shiishai shii wie riig bo.” <sup>18</sup> Gu na shii izai yao: Na filiao ba shii na khi hà wuii yang pha ji hà saro bo, jimagungde na weg rey mage shii wad phiang rek srane na è awuii yang bsa hà wuii noh phro. <sup>19</sup> (Isu è hì iyao pha ji ne, Phithar iy srane Hamangkhung pha aphuii ro biisiie rek mua ruii pha ji yao phro.) Chiihphado shii Isu è aishii yao, “Gurog iidoh shii luagieng bo!”

### *Isu nane gai samoy*

<sup>20</sup> Phithar è iidoh rei srane riig shii, Isu è miie rek muui pha—Gai samoy jia Isu rog shii michie chie pha dug muui pha ji è sai “Ithong, Na shii zum yi pha rek pha ji ne hanyie lei?” Ji è sai muui pha ji doh. <sup>21</sup> Phithar è aishii riig srane, ai è Isu shii sai, “Ithong hì pha bran shii nyie khi-èrek pha lei?” <sup>22</sup> Isu è aishii chang, “Gu din wuii ruii pha ji thog pha sieng ne rai yi arone na shii nyie rey muui ga? Gurog iidoh lua bo!” <sup>23</sup> Ji-è ji pha phosro ji ne zab pha Isu ro samoy shii thog dun, hì pha samoy ne a-iy phro. Jishii Isu è ne ai a-iy phro è ayao; “Ai è yao,” Gu awuii sapho shii gu nathek shii rai yi pha now arone, “Ji ne nathek shii nyie ga?” <sup>24</sup> Ji-è yao ne, ji yao pha ji chiih-è ji zey pha ji pha samoy jia ro; chiih-è gathek ne thieg ai nyie yao pha ji ne izai chak ro.

### *Jong sha*

<sup>25</sup> Din ne de Isu è rek pha blia ne bajo um ba, ji zab jijia zey arone hì chiih pha siog ne ichiih sohjambling shii ruii pha ithua oi phro.

## Gua Pha Samoythek Ro BLIATHEK Yaophi

*Guaphasamoythek ro Bli* rek pha jigigam hi ne *Lug pha Muawie ji è jao pha jigigam ji ro*. Hi pha jigigam ne Isu pha migiphothek è khi-èrek ne Ragung So mua srane Isu pha Mua Wie ji Jerusalem thiig shii, Judea nane Samaria thiig shii, chiih è, zab sohnyiak shii yao muui pha jigigam ji ro. (1:8) Hi pha phaluii ne Isu blia ne, Jewish pha brantheek è jao bi srane sohjambling pha zab brantheek shii de migi now pha blia pha phaluii zey ne um ro. Hi zey pha bran è Isu shii izai now pho ne Roman Bisu shii awie pha rey yi pha blia asi pha, hi ne Jewishtheek shii zen ne giang rey yi pha blia rone zey pha phaluii ro.

*Bliathek* Hi pha jigigam ne uomrang shii thang ne zey ne um ro. Hi ne Isu pha Mua Wie ji yao srane charch reykhlei ruui pha jigigam zey ne um ro. (1) Isu pha blia ne Jerusalem è jao pha nane Isu hamangkhliie dun dun pha jigigam zey ne um ro; (2) Phalesthin pha gai ithua hà de jao thog pha jigigam zey ne um ro; (3) chiih è, Meditheranean sohjambling nane Rom hà de yao thog pha jigigam zey ne um ro.

Hi pha *Bliathek* ne Ragung So ne Isu shii izai now phothek shii Ragung So mua pha inai shii thog srane bliathek rek pha jigigam zey ne um ro. Chiih è, charch nane charch pha dumuiitheek shii athodang pha ragia rek phi pha thek de zey ne um ro. Ibi reyjong pha bliathek dinne yao srane Isu shii izai now phothek shii blu rek phi, chiih è, charchtheek dog ne rai pha jigigamtheek zey ne um ro.

### **Iliing shii um pha ji**

Khagi saro phi (1:1-26)

a. Isu Masi ro idohhè pha muyung nane sbang (1:1-14)

b. Judas ro blang (1:15-26)

Jerusalem shii khagi (2:1; 8:3)

Judea nane Samaria shii khagi (8:4; 12:25)

Phaul ro bliathek (13:1; 28:31)

a. Bli rek pho ro igobi pha mulua (13:1; 14:28)

b. Jerusalem shii muley (15:1-35)

c. Nyichiieng pha blia pho ro mulua (15:36; 18:22)

d. Uomchiieng pha bliapho ro mulua (18:23; 21:16)

e. Phaul ne Jerusalem, gaesarea, chiih-è Rom hà phathegpho ro, (21:17; 28:31)

<sup>1</sup> Gu ijak Theophilus:

Igobi pha guro jigigam ne Isu è awai bliathek rek ne jao pha inai ji nane awai miyao yua pha inai ji jao pha ji è <sup>2</sup> yiedang ne awai yi hamangkhung dun din dun pha inai thog dang pha jigigam ji zey ne um ro. Isu awai è guaphasamoy shii ai hamangkhung adun ba pha ibi shii Ragung So um ne yua marui. <sup>3</sup> Ai iy ched ne inai sawi liing shii hanyie è migi anow pho shii bajo si noh srane ai ne hòi din rone doh yi. Ji pha brantheek de aishii si srane ai rog shii Hamangkhung-aphuii pha Sajathua Chiang pha miyaothek de yao ne rai. <sup>4</sup> Chiih-è ithek ò rai ramuii shii, Isu è ithek shii hi pha muyung phi: "Jerusalem thoh ne khi hà de awuii dang rabo, jimagunde gu Aphuii miyao marui pha lasen ji mua yi pha khan ne rai iang bo. <sup>5</sup> Jon è nathek shii kho è



khowo phi magunde, ùjia pha inai idoh è, nathek shii Ragung So è wo ruii phro.”

### *Isu shii hamangkhung noh dun*

<sup>6</sup> Guaphasamoy ne Isu rog si mage shii samoythek è Isu shii sai, “Ithong, na è sudoh phashud shii Sajathua pha ji ne Israelthek shii idoh phi din habey?”

<sup>7</sup> Isu è ithek shii yao, “Ji pha inai ne gu Aphuii awai riichai è dashab rek ne ruiijong ro, ji-è, ji pha inai ne khuchung thog ruii phane nathek ne athieg chid phro. <sup>8</sup> Jimagunde, khuchung shii nathek è Ragung So mua ruii arone nathek ne blu um ne gu shii izai rone yao pha Jerusalem shii, Judea pho shii nane Samaria pho shii, chiih è zab pha sohnyiak pho shii khagi rek ruii phro.” <sup>9</sup> Ji è yao ched marui ne samoythek riig dang pha ji shii Isu ne hamangkhung hà riie ne dun dun. Chiih è, Isu shii ne sakhmiing jiang ne sand dun.

<sup>10</sup> Samoythek è athodang pha hamangkhung hà hùii ne riig ramuii shii bran nyi ne yung imo guii srane hamblo shii ithek moe riu khlei ruii <sup>11</sup> srane yao, “GalileantheK, nyie rek ne thuh de nathek ne ichiih shii riu srane hamangkhung hà hùii ne riig ne rai phlei? Hi pha Isu ne khi è rek ne hamangkhung hà dun dun pha ji duine dinne thadoh wuii din ruii pha doh ruii phro.”

### *Judas chiang samoy gua*

<sup>12</sup> Ji è yao pha yoi marui ne guaphasamoy ne Somarothek Phiing ji thoh marui srane Jerusalem, thiig bow è ùjia ruang pha ithua hà dun thog din.

<sup>13</sup> Ithek rajan hà thog dang shii ithek ne awaithek rai pha ùgud hà dun dun. Ithek ne, Phithar, Jon, Jems nane Andrew, Philip nane Thomas, Bartholomew nane Methiu, Jems Alphayus pha dufuii, Simon, thiig shii ilkhi rek pha, chiih è Judas Jems pha dufuii. <sup>14</sup> Ithek ne athodang pha khrab srane hò-amuiithek nane Isu pha amuii Mery nane Isu pha ikhuiithek rog shii sia ne rai gieng.

<sup>15</sup> Inai ùjia rey pha idoh shii hanyie thek è Isu shii migiphothek ne weingjia è ichiig brantheK maley dug shii, Phithar è jai srane yao, <sup>16</sup> “Gu ijaktheK wo,” Ai è yao, “Jigigam shii nyie zey pha ji ne izai rey ruii phro, nyieliieshii Dawid Saja shii Ragung So è Isu shii zum yi pha Judas chiang chaig ne zey, ne ruii pha ji ne izai reyjong ro. <sup>17</sup> Judas de gethek rog shii um pha bran ro. Ai de gethek rog shii bliá rek gieng pha gua pha bran ro.”

(<sup>18</sup> Bang rog shii Judas ne awie pha bliá rek ne raig phég ne ruii. Ji pha raig shii awai zun ne iy dun srane iy pha siu de zab shongphleg ne chiih dun. <sup>19</sup> Ji è rek ne iy pha mua ne Jerusalem phothek de yoi dun. Ji-è ji pha raig ne awaithek pha nyuak è Akheldama beng ne ruii. Ji pha ibeng ne “Ifai pha raig rone beng ne ruii ro.”)

<sup>20</sup> Sthun siog shii zey ne um,

“Yangne ai hò ne suloi rey dun phro;

yangne ji pha hò shii ne hanyie de arai phi phro.”

Chiih è, hi de zey ne um ro,

Yangne bran gai è ai bliá rek maphi phro.

<sup>21-22</sup> Ji zey pha duine ai chiang è bran jia Isu hòi din pha miyao yao ne lua pha gethek rog shii dog gieng chid phro. Ai ne gethek rog shii um gieng ne Isu è gethek rog luagieng pha zab khagi pha è jia gua chid phro. Ai ne Jon è

khowo phi pha mua yao pha è yie dang ne Isu shii hamangkhung noh dun pha thek thieng pha bran gua chid phro.

<sup>23</sup> Ji yao ched ne ithek è Joseph, hanyie shii ithek è Barsabas rone ho, chiih è shak shii, Justus de ho pha bran nane Mathias rone ho pha bran nyi shii gua phi. <sup>24-25</sup> Ji è gua ched srane ithek è Ithong shii sia ne sai, na ne brantheke pha munow zab thieng pha Aphuii ro, ji-è, gathek shii yua phi bo, hanyie yi Judas è thoh marui ne awai ithua shii dun dun pha ithua shii gua ne samoy rek yi pha um ga? Ji è sia ched srane ithek è miiran riig shii, ji pha miiran ne Mathias pha ibeng khia khlei ruii, <sup>26</sup> Ji-è, ithek è Mathias shii Judas pha ithua shii guaphasamoy snajia rog shii gua ne ruii phi.

## 2

### *Ragung So thog ruii*

<sup>1</sup> “Phentekhos thogmage shii, migipho ne ithua jia shii khrab srane rai iang.” <sup>2</sup> Hamblo shii, hamang è thiichiih shii hasam sam pha duiine boh rone ithek rai iang pha hò jishii ne zab ley dun. <sup>3</sup> Ji è rek mage ne miyaogam ne bai duiine kheythog srane thiichiih shii um pha brantheke shii jiang thog ruii. <sup>4</sup> Itheke ne Ragung So è zab than dun srane gai bran pha miyaogamtheke de yao thog ruii. Ji ne Ragung So pha blu miyao yao yi.

<sup>5</sup> Itheke ne Jerusalem hà rai pha Jewtheke ro, hanyie theke yi giang rek ne rai pha bran ro, chiih è zab soh pha sohjambling è wuii thog pha brantheke ro. <sup>6</sup> Roh pha ji yoi mage ne bajo brantheke wuii thog ruii, ithek ne bajo wiengphleg dun, nyieliieshii, ithek è hanyie thiichiih wuii thog pha brantheke pha nyuaktheke yao pha yoi ruii. <sup>7</sup> Anomuluii pha wiengphleg dang ne ziak srane yao rai, “Hi pha brantheke ne Galilea pha duiine yao ramuii ro, <sup>8</sup> Ji ne khi è rek ne, Itheke ne gethek thiig pha nyuaktheke yao ramuii pha yoi dun ro. <sup>9</sup> Gethek ne Pharthia, Media nane Elam; Mesophothamia; Judea nane khaphadosia, Phonthus nane Asia, <sup>10</sup> chiih è, Phrygia nane Phamphyllia, chiih è, Egyph nane libya pha thiig duchoi Syrene ithua moe pha thiig pho ro. Gethek giak ne Rom pho ro, <sup>11</sup> Jewtheke nane Gaibrantheke, hanyietheke yi Judaism shii dun pho, chiih è giak ne Khrede nane Arabia pho, jimagunde, gethek zab è gathek pha nyuak è Hamangkhung-aphuii è bajo boh bliatheke rek phi phajitheke yao pha yoi ramuii ro.” <sup>12</sup> Buang ne anomuluii pha awaitheke chung sai rai, “Hi ne nyie rey phiiga?”

<sup>13</sup> Jimagunde giak è ne migiphotheke shii siakjo srane yao, “Hi theke pha brantheke ne phuii niing ne thiig ara ro!”

### *Phithar ro mua*

<sup>14</sup> Jishii, Phithar ne guaphasamoy snajia rog shii jao srane brantheke shii ziak ne yao mage: “Jerusalem shii rai pho gu ijak Jewtheke wo! Gu miyao hi nuii mage bo! Hi ne nyie rey pha ji nathek shii yao riig haro.” <sup>15</sup> Nathek munow duiine hithek pha brantheke phuii athiig ro, nyieliieshii thuh ne hamiang ishak dige ba ro. <sup>16</sup> Hithek rey phane Joel chaig pha bran miyao ji duiine ro:

<sup>17</sup> “Hamangkhung-aphuii è yao”

Ishak jong sha pha rey shii gu è nyie rek phi pha um ga gu è zab bran shii Ragung phi ruii phro.

Na dufuii, dimitheke de gu mua hi yao ruii phro;  
na filiaothek de chaig ruii phro, chiih è,  
wegtheke de ibangtheke bang ruii phro.

18 Gu khiaothek, nane gu kheaomuiithek,  
gu è Ragung phi ruii  
ne gu mua hi yao ruii phro.

19 Gune hamang luii hà de buangthek pha  
bliathek rek ruii phro, sohnyiak bucho hà de anomuluii pha blia rek phi  
phro.

Thiichiih shii ne ifai, ne, bai hòi ne bai mukham de bo thab ruii phro.

20 Ithong pha boh nane lubo inai thog ba,  
pha ibi shii ne hanai de giia rey ruii phro,  
habie de ifai duine shaig rey ruii phro.

21 Ji pha ishak shii ne, Hanyie è Ithong shii nong rek yi pha ho arone, aishii  
ne ragia rek phi phro.

22 Hi pha miyaogamthek yoi mage bo, gu ijak Israelith pho wo! Nazareth  
pha Isu ne riichai so um pha bran rone doh pha ne Hamangkhung-aphuii  
è buangthek nane anomuluii pha bliathek rek pha è doh dun ro. Hithek  
rey pha ne nawaithek duchoi shii rey pha ji è nawaithek de thiegjong.

23 Hamangkhung-aphuii pha munow duine Isu shii ne nathek shii phi srane  
layog pha branthek pha muyung ji nuui ne zun ne ua maphi ro. 24 Jimagunde  
Hamangkhung-aphuii è Isu shii awai blu è hòi din yi dun ro, nyieliieshii, iy  
pha riichai ne Isu shii phathek rek ne achab mua phro. 25 Nyieliene, Dawid  
è ai Chiang yao jong ro,

Gu è, Hamangkhung-aphuii ne, gu ibi shii idang um pha doh jong ro,  
Ai ne gu moe shii um pha ji è gune diig arey phro.

26 Ji-è, gune bajo sang pha è ley dun ro,  
gu miyaogamthek ne jong pha lubo yao dun ro.

Chiih-è gune, iy pha bran habuii shii,  
dinne sieng pha luthong mua din ro,

27 nyieliieshii, na è gu shii iy pha sohjambling hà athoh phro;  
Na è nawai khiao isiie shii wieng shii ashong yi phro.

28 Na è gu shii ne idang chai um pha lumuii doh yi jong ro,  
Na ro rog shii um pha ji è gune bajo sang din ruii phro.

29 Gu ijakthek wo! Yoi bo, gune nathek shii bajo thieg pha gethek blang  
Dawid Saja. Ai iy dun ne wieng pha wieng de sudoh ichiih shii um ba ro.

30 Ai ne chaig pha bran ro, chiih è, Hamangkhung-aphuii è ai rog shii sbang  
rek pha ji ne thieg muui ro: Hamangkhung-aphuii è Dawid riing è saja rek  
pha sbang jia rek marui, na riing è Dawid duine Saja jia khia khlei ruii phro.

31 Dawid Saja ne Hamangkhung-aphuii mirek jithek doh marui, jiè ai è Isu  
Masi hòi din pha miyao ji yao marui,

Aishii ne iy pha sohjambling ji è ajoj mua ro;

Ai iy pha siu ne wieng bucho shii ashong dun ro.

32 Hamangkhung-aphuii è Isu ne hòi din phi, ji pha blia ne gethek è khagi  
rek jong dun. 33 Aishii ne Hamangkhung-aphuii, awai Aphuii è hòi din yi ne  
awai phawig moe shii dug yi jong ro, jiè ai ne Aphuii è khi è rek ne sbang  
ruii pha duine Ragung So mua dun ro. Nathek è nyie doh ne yoi pha ji ne  
ai lasen ro, ai è gethek shii thoi phi ro. 34 Hi ne Dawid Saja è hamangkhung  
dun ne rek pha asi pha yi ai è yao,

Ithong è gu Ithong shii yao:

Gu phawig moe shii dug bo!

35 Gu è naro suang pho shii na lai luii shii arek sapho shii ne gu phawig moe  
shii dug ne rai yi phro.

<sup>36</sup> “Israel pha brantheke wo! Hi ne thiege mage bo, natheke è zun ne ua pha Isu hi ne Hamangkhung-aphuii è getheke Ithong nane Masi rab phi ro.”

<sup>37</sup> Brantheke è ji yao pha yoi ne zab diig now srane Phithar nane gai guaphasamoy shii wuii ne sai, “Khuiinotheke wo! Ji arone, gatheke ne nyie rek chid phiiga?”

<sup>38</sup> Phithar è itheke shii yao, “Natheke de nawaitheke layog rek pha blia ji thoh srane Isu Masi beng è khowo yi bo! Chiihphado, natheke layog de khung phi srane Hamangkhung-aphuii pha lasen Ragung So mua ruii phro.

<sup>39</sup> Nyieliieshii, Hamangkhung-aphuii pha sbang ne natheke shii de, chiih-è natheke pha aniphiiing shii de, chiih è, bajo ruang photheke shii de, hanyie shii Hamangkhung-aphuii è awai rog shii rai pha ho pho shii de rek ne ruiijong ro.”

<sup>40</sup> Phithar è brantheke shii bajo gai miyaogamtheke è de yie ne yua, “Layog rek pho shii diig thog ruii pha ji è nawaitheke shii ragia rek iang bo!” <sup>41</sup> Ji è yao mage shii, bran giak è ne ji pha mua ne izai now gieng ne khowo phi yi, chiih è, ji phado shii itham uom pha brantheke de ji pha ibrog shii dog gieng dun. <sup>42</sup> Itheke ne ishak phi ne guaphasamoy miyao nuii. Chiih-è, ò si rai pha wuii gieng srane sia pha michietheke thang ne chie srane sia ne rai gieng.

### *Migiphotheke ro chai*

<sup>43</sup> Guaphasamoy è bajo wieng pha bliatheke nane anomuluii pha bliatheke rek mage ne brantheke ne zab rum dun. <sup>44</sup> Migipho ne awaitheke chung shii athohdang pha ò wuii srane sia ne awaitheke shii nyie um pha ji awaitheke chung thang rai. <sup>45</sup> Awaitheke pha nuruii, soh raig um pha theke chong liu srane bang jitheke ne khinyama jia chid pha ji thang rai. <sup>46</sup> Inai tham ne itheke ne Misiahò hà ò si rai, chiih è, awai hò hà jum rek ne sang ne michietheke chie ne rai. <sup>47</sup> Hamangkhung-aphuii shii laso phi ne awaitheke chung de wie now pha ji lubo rek rai. Ji pha Ithong è inai tham ne hanyie ragia rey jong pho ne itheke rog dog phi.

## 3

### *Chayem ro laikhi-èg gangdun*

<sup>1</sup> Inai jia pha habjuang ishak uom shii, Phithar nane Jon ne Misiahò hà sia pha ishak shii wuii dun. <sup>2</sup> Thiichiih shii bajo khie gak jia um pha moe shii giak dang pha è laikhi-èg pha bran jia idang thiichiih shii noh ne dug yi srane Misiahò bucho wuii pha brantheke shii bang lia pha khan ne rai pha jia um iang. <sup>3</sup> Ji pha bran è Phithar nane Jon shii iliing wuiiramuii pha doh mage ne bang phi bo ne lia. <sup>4</sup> Itheke ne aishii miang è riig chiih-è Phithar è aishii yao, “Gasa shii riig mage bo!” <sup>5</sup> Ji-è, ji pha bran ne bang iujia mua pha luthong ne isa shii riig. <sup>6</sup> Ji è riig magungde Phithar è aishii yao, “Gu shii ne bang iujia de oi ro, jimagunde, gu shii nyie um pha ji na shii phi ruii phro: Nazareth pha Isu Masi beng è gu na shii yung phro, na ne jai srane lua mage bo!” <sup>7</sup> Ji è yung srane Phithar è phawig wad è nong ne aishii chaing ne riu yi. Ji è yao dang pha ji shii ji pha bran pha lai nane laikhimiegetheke ne gang rey dang dun ro. <sup>8</sup> Ai ne biung srane awai lai è riu mage ne shan ne lua mua dun. Ji è rey ched mage ne ji pha bran de itheke rog shii Misiahò hà wuii gieng ne lua ne, biung ne Hamangkhung-aphuii shii laso phi. <sup>9</sup> Brantheke è ai ne lua ne Hamangkhung-aphuii shii laso phi pha doh, <sup>10</sup> ai ji è rek pha ji ne thiichiih pha brantheke è doh ne thiege srane, ai ne bajo khie pha gak shii

um pha chayem bran rone ithek è thieg dun ne aishii nyie rey pha ji riig ne zab wiengphleg dun ne anomuluii pha rey dun.

*Misiahò shii Phithar miyao pha mua.*

<sup>11</sup> Bran ji è Phithar nane Jon shii kho ne Solomon è rab pha ithua shii riu mage shii, brantheke ne wiengphleg ne ithek moe shii riig pha ran thog. <sup>12</sup> Phithar è brantheke shii doh mage ne brantheke shii yao, gu ijaktheke wo! Natheke ne nyie rek ne wiengphleg dun phlei? Chiih è, nyie rek ne gatheke shii mieg rua riig phlei? Natheke ne hi pha bran lua mua phi phane gatheke è chid pha blu um ne rek mua è now bey? <sup>13</sup> Abraham ro Hamangkhung-aphuii, Isakh nane Jakhob getheke ro blang Hamangkhung-aphuii è awai khiao Isu shii hi so biisiie phi ne ruiijong ro. Jimagunde, natheke è aishii ne thiig pha riichaitheke wad shii phi muui, chiih-è, natheke è aishii athieg rone Philathus moe shii de snai srane Philathus è aishii doh pha rek de adoh yi ro. <sup>14</sup> Ai ne so nane wie pha bran habuii shii, natheke è aishii snai muui, natheke è ai Chiang shii brantheke uapho pha bran ji shii haro han ne Philathus shii lia ne thoh yi. <sup>15</sup> Hanyie è chai shii dumuii rek pha bran shii ne natheke è ua muui. Jimagunde, Hamangkhung-aphuii è aishii hòi din yi. Gatheke ne ji pha blia pha khagi ro. <sup>16</sup> Ji pha ibeng è sudoh hi pha blu phi ne laikhi-èg pha bran hi ne gang dun ro. Natheke è nyie riig ne thiig phane ai beng shii izai now ne ji mirey ro; Hi ne Isu shii migi now mage ne ji mugang yi ro, Ji ne nawaitheke de nyariig mua phro.

<sup>17</sup> “Ji-è, gu khuiinotheke wo! Gune thiig muui ro natheke nane natheke pha ilkhi rek photheke è Isu shii nyie rek pha ji ne athieg pha rek muui ro.” <sup>18</sup> Buyo shii Hamangkhung-aphuii è zab chaig photheke shii yao jong ne ruii, Masi ne diig rek chid phro, ji izai rey yi pha ai è ji rek phi ro. <sup>19</sup> Natheke de zo srane Hamangkhung-aphuii shii khid din mage bo, chiihphado, natheke ro layogtheke de khung phi phro. <sup>20</sup> Natheke de ji rek arone, Ragung So pha ishak ne Ithong è thog ruii phro, chiih è, ai è Isu shii doh ruii phro. Ai ne Masi ro! Ai ne natheke Chiang gua jong ne ruii ro. <sup>21</sup> Ji è, Hamangkhung-aphuii è buyo buyo shii rai pha awai chaig gang pho shii yao marui pha duine, ai ne ichiih soh khung shii zab wo rey ne athog ba sapho shii ne hamangkhung hà rai chid phro. <sup>22</sup> Moses è yao marui, Ithong, natheke pha Hamangkhung-aphuii è gu shii khi-è rek ne thoh pha ji duine natheke shii awai chaig jia doh ruii phro, ai ne nawaitheke pha bran phro. Natheke ne ai è nyie yao phajitheke zab nuii ne rek yi pha yao phro. <sup>23</sup> Hanyie theke è ji pha chaig miyao anuii pho ne Hamangkhung-aphuii pha brantheke è yo che ne iy yi phro. <sup>24</sup> Chiih è zab pha chaigpho è yao muui ro, chiih-è Samuel è lua ne, chiih-è hanyie ai è idoh wuii photheke è de sudoh nyie rey pha ji yao ro. <sup>25</sup> Hamangkhung-aphuii è chaigpho shii yao ne sbang phi phane natheke Chiang phi phro, chiih-è, natheke è nawaitheke pha riingtheke shii Hamangkhung-aphuii shii zen pha shiinyie ji sudoh thang jong ro. Ai è Abraham shii yao pha duine, “Gu ne, na riingtheke è, sohnyiak pha brantheke shii, khirzey phi ruii phro. <sup>26</sup> Ji-è, Hamangkhung-aphuii ne gua pha awai khiao jia doh bi ne natheke shii khirzey phi yi srane naitheke shii nawaitheke layog lumuii è thadoh dun yi phro.”

<sup>1</sup> Phithar nane Jon ne brantheek shii jithek yao ramuii shii, phabithek, Misiahò pha sandrithek pha ilkhi pha ophispho nane Sadusithek wuii thog. <sup>2</sup> Ithek ne guaphasamoy nyi è Isu ne iy ne hòì din phro izey pha ji duiine hòì jong ro è yao ne yua pha ji doh ne bajo lubu hòì ne lijieg dun. <sup>3</sup> Ji-è, ithek ne ithek shii zum srane hamiang arey ba sapho ne phatheg hà chab ne ruii muui. Nyieliieshii, ji pha doh ne biak jong dun ro. <sup>4</sup> Ji è rek magungde, khinyama pha bran è ji pha mua yoi pha ne ji migi now dun, ji è, ji pha idoh shii brantheek ne itham guui huak ne um dun.

<sup>5</sup> Ji pha thimiang duii shii, Jewish pha dumuiithek, dukhothek nane Ipheythek yua pho Jerusalem shii khrab ne wuii thog ruii. <sup>6</sup> Ithek ne Kho Phabi Anas nane khaiaphas, Jon, Alezendar, chiih-è Kho Phabi pha gai haliingpho shii si pha wuii dun. <sup>7</sup> Ithek è guaphasamoy shii limiang moe shii riu yi srane sai, Nasa ne hi rek phane khi-è mua phlei? Khi-è rek pha riichai mua ne um lei? Chiih è, hanyie beng è yie ne ji rek mua phiiga?

<sup>8</sup> Phithar è Ragung So mua ne ithek shii chang, brantheek shii dumuiithek nane dukhothek wo: <sup>9</sup> Nathek è gathek shii sudoh hì pha laikhi-èg pha bran shii khi-è rek ne gang phi pha blia wie pha chiang è miyao sai arone, <sup>10</sup> nathek de sudoh shii thieg dang bo, chiih-è, Israel pho de sudoh shii thieg dang bo, hì pha bran ne gang ne riu mua pha ne Nazareth pha Isu Masi, hanyie shii nathek è zun ne ua maphi habuii shii Hamangkhung-aphuii è hòì din yi pha ibeng re-è rey ro. <sup>11</sup> Isu è jigigam shii zey pha duiine ro, “Khi pha lubao shii chan hò khimphothek è snai muui pha ji ne bajo chid pha lubao rey dun ro.”

<sup>12</sup> “Giawo ne awaiji shii um bie ro; Hamangkhung-aphuii è gethek shii ragia rek pha ichiù sohjangbling shii hanyie shii de aphi ne arui ro.”

<sup>13</sup> Thiichiih um pha limiangthek ne Phithar nane Jon è chua mua ne yao pha ji doh mage ne bajo wiengphleg dun, nyieliieshii, ithek ne jigi azey pha bran ro. Ithek è ithek ne Isu rog shii rai gieng pha bran rone thieg dun. <sup>14</sup> Jimagunde, ithek shii nyie de ayao mua pha rai dun, nyieliieshii, gang pha bran ji ne isa rog shii riu ne rai ne um iang. <sup>15</sup> Ji-è, ithek è isa shii ji pha limiang ùgud thoh ne fuang wuii ge srane awaithek chung phak ne sai rai, <sup>16</sup> “Gethek ne hi pha bran nyi shii ne nyie rek sha pha um ga?” “Jerusalem pha zab brantheek è bajo wiengphleg pha blia hì ne isa mirek rone thiegjong dun ro, gethek ne hì pha blia ne asi rone ayao mua phro. <sup>17</sup> Jishii, hì pha mua ne hanyie de ayoi yi pha gethek ne isa shii Isu beng è khuchung magungde ayao yi pha gak ne ruii pha um ro.”

<sup>18</sup> Ji è phak ched ne ithek è isa shii thadoh ho din srane yao, khuchung magungde nathek ne Isu beng yao ne ayua dang rabo. <sup>19</sup> Ji è gak magungde, Phithar nane Jon è ithek shii chang, “Nathek ne nawaithek lubu shii nowbthan ne chua mage bo, Hamangkhung-aphuii moe shii nyie miyao ji ne izai bey? Nathek miyao ji nuii ne rek shii wie pha um bey? Asi, Hamangkhung-aphuii miyao ji nuii ne rek shii wie pha um bey? <sup>20</sup> Ji è, gathek ne gui thek è nyie doh, nyie yoi phajithek ayao pha arai mua phro.” <sup>21</sup> Jithek nuii srane limiangthek è ithek shii wie phriie srane sey ne thoh ge. Limiangthek ne isa shii lago ne aphi mua pha um, nyieliieshii, brantheek ne Hamangkhung-aphuii è nyie rek phi phajithek shii bajo sang ne Hamangkhung-aphuii shii laso phi dun. <sup>22</sup> Hanyie shii wieng dang pha gang phi pha bran ji ne idam sawi sieng jong ro.

*Migiphothek ro misia shii lububo rey yi*

<sup>23</sup> Phithar nane Jon ne sey ne thoh dang shii, awaisa pha ijakthek rai pha ithua hà dun thog srane boh phabithek nane thiig pha dukhothek è nyie yao phajithek yao phi. <sup>24</sup> Ithek è jithek yoi mage ne awaithek chung khrab srane Hamangkhung-aphuii shii sia: hamangkhung, sohnyiak, kho nane thiichihih shii nyie um phajithek rab pha Masdo wo! <sup>25</sup> Ragung So è gathek blang pha Dawid, nawai khiao è yao ne ruii, ai GaibrantheK ne nyie rek ne lijieg phlei? Nyie rek ne brantheK awaithek shii adunmey pha rek phlei?

<sup>26</sup> Sohnyiak pha Sajathek ne awaithek saro ne nung rai dun, chihih è, bohkhohphothek ne awaithek chung khrab srane Ithong nane airo Masi shii gidieg rek noh.

<sup>27</sup> Ji duiine Herod nane Phonthius Philath ne GaibrantheK nane Israel pho rog shii dog srane Isu shii, na ro khiao so, hanyie shii na è Masi rab pha ji shii gidieg rek dun ro. <sup>28</sup> Ithek ne ò khrab srane nawai riichai nane nawai è khi-è rey pha phak jong pha ji rek pha surui ramuii ro. <sup>29</sup> Ji-è, Ithong wo! Ithek è phriie pha ji riig srane, nawai khiao gathek shii na mua ji yao pha lububo phi bo. <sup>30</sup> “Nawai wad yie srane nawai khiao so Isu beng è rad pho shii gang yi pha, anomuluiitheK pha nane buangtheK pha bliathek rek mua yi pha chua phi mage bo.”

<sup>31</sup> Ithek è ji sia pha jong ched mage shii ithek dug ne sia pha ithua ne sham dang dun, ithek zab ne Ragung So è ley dun, chihih-è jao ne boh now ne Hamangkhung-aphuii pha mua ji yao dun.

### *Migiphothek è awaithek nuruii thang*

<sup>32</sup> Ji pha migipho ne ò jia now ne rai bie dun. Zab è awaithek khinyama pha nuruii um ne de awaithek hanyie hanyie ro ayao dang pha awaithek chung thang rai. <sup>33</sup> Ji pha guaphasamoy ne bohblu um dang ne Isu hòi din pha mua ji yao ne rai phi ne Hamangkhung-aphuii è ithek shii bajo khirzey phi dun. <sup>34</sup> Ji pha phrag shii ne nyie de chid phane oi sha, hanyie shii raig um ne de, hò um ne de zab chong rek ne khinyama pha bang mua pha ji ne thiichihih yi ne phi. <sup>35</sup> Chihih è, jithek ne guaphasamoy shii zid phi; ji pha bang ne samoytheK è awaithek shii nyie khi è chid pha ji riig srane thang rai.

<sup>36</sup> Chihih è jine Joseph ro, hanyie yi Khaiphrus hà giak pha Lewithe ro guaphasamoy è Barnabas beng pha jia ro, (ji pha ibeng ne “Hanyie è luthong phi pha bran rone ibeng pha bran ro”), <sup>37</sup> Awai raig ithua chong rek muui srane bang mua pha ji ne guaphasamoy shii phi muui.

## 5

### *Ananias nane Saphira*

<sup>1</sup> Jishii, thiichihih shii Ananias beng pha bran jia de awai yiy Saphira rog shii awai ro nuruii chong rek muui. <sup>2</sup> Jishii, awai yiy rog shii phak srane ji pha bang ne giak ne ug ne ruii marui ne guaphasamoy shii phi thog. <sup>3</sup> Ji è rek shii Phithar è sai, “Ananias, na ne nyie rek ne Sakhathong è yang yi ne na nuruii è mua pha bang khuyo ug srane Ragung So moe shii khlam phlei? <sup>4</sup> Ji pha nuruii ne chong arek ba pha ibi de nawai ro chag, chihih-è, chong rek ched ne mua pha bang de nawai ro chag ro. Na ne ji nyie now ne rek phlei? Na ne bran shii khlam pha asi pha yi Hamangkhung-aphuii shii khlam ro.” <sup>5</sup> Ananias è ji è yao pha nya yoi dang mage shii thud ne iy dun;

chiuh-è, thiichiih um phothek de ji yoi ne rum dun. <sup>6</sup> Filiaothek wuii srane iy pha siu shii yung jiang srane fuang noh ne wieng muui.

<sup>7</sup> Ji è rey ched ne ishak uom pha idoh è nyie rey dun pha ji athieg pha ai yiy de thiichiih wuii thog ruii. <sup>8</sup> Phithar è aishii de sai, “Na ne gu shii izai yao mage bo, hi pha bang ne na gey nasa è chong rek ne nyie mua pha ji chag bey?”

Ai è chang, “Hi ne ji chag bie ro,” “Zab pha bang ne hinya jia bie ro.”

<sup>9</sup> Ji è, Phithar ne aishii yao din, “Na gey nasa ne nyie rek ne Ithong pha Ragung shii chai ne riig phlei? Na gey shii wieng pho ne thuh de habin shii thog ne riu ba muui ro, ithek è na shii de wieng pha noh dun phro!” <sup>10</sup> Ji è yao dang pha ji shii ai de Phithar lai luii shii thud ne iy dun. Filiaothek è biisa wuii srane ai iy dun pha ji de doh mage ne fuang noh ne ai gey moe shii chog ne wieng muui. <sup>11</sup> Ji è rey pha mua yoi mage ne chiiphado shii charchthek hanyie è ji doh pho ne bajo rum ne rai dun.

### *Buangthek nane anomuluiithek*

<sup>12</sup> Guaphasamoythek buangthek nane anomuluiithek dang pha bliathek ne branthek moe shii bajo rek ruii. Migiphothek ne Solomon murung marui pha hò bucho hà si ne rai. <sup>13</sup> Branthek è ithek Chiang khinyama dog yao mua magungde, fuang pha bran brog ne hanyie de ithek rog shii adog mua gieng.

<sup>14</sup> Jimagunde, inai tham ne bran bajo bajo dog dun bajo hò-aphuii, hò-amuii hanyie thek è Ithong shii Migiphothek mudog gieng. <sup>15</sup> Guaphasamoy è nyie thek rek pha ji doh ne branthek ne Phithar lua mage shii Phithar pha ragia è doh yi pha rad pho shii noh srane lumuii hà lawiao wiao ne thiang yi. <sup>16</sup> Jerusalem bajarai pha bran brogthek de bran rad pho nane ibuii ragung è jiang pho shii noh ne bajo wuii thog ruii. Itek de gang dun.

### *Guaphasamoy shii diig phi*

<sup>17</sup> Ji è rek mage ne, boh phabi jia nane airo ijakthek, Sadusithek pha ijakthek è guaphasamoy shii bajo miegriie dun; ji-è, ithek ne diig phi pha nung ne yao rai. <sup>18</sup> Itek è guaphasamoythek shii zum srane phattheg chab muui. <sup>19</sup> Jimagunde, ji pha ibuii shii Ithong pha Hamangkhung pha hamangkhliie thek phattheg ji pha habin hong phi ne guaphasamoythek shii fuang dun yi pha rek phi ne yao, <sup>20</sup> “Fuang dun mage ne Misiahò hà wuii srane hi pha iwo chai mua pha ji branthek shii yao mage bo.” <sup>21</sup> Guaphasamoythek de ji nuii ne dun dun. Chiih è, hamiang hanai chiu shii, Misiahò hà wuii srane yua din.

Kho Phabi nane ai ijakthek è Jewish pha dukthothek shii limiang jung yi pha ho ne maley rek. Maley rek ched ne ithek è ji pha phattheg bucho shii chab pha guaphasamoythek shii ithek moe shii noh mage bo ne yung ne thoh ge. <sup>22</sup> Jimagunde, phattheg pha sandrithek è thiisa thogmage shii guaphasamoythek ne phattheg bucho hà um iang pha adoh. Ji è ithek ne limiang shii idoh dun din srane phosro, <sup>23</sup> “Gathek ne phattheg pha moe thog shii, phattheg pha habin ne chuh è bin ne um iang. Thiichiih pha sandrithek wie riu ne um iang ro. Jimagunde, gathek è habin hong ne bucho wuii thog ne riig shii hanyie de bucho shii oi iang ro!” <sup>24</sup> Boh phabithek nane phattheg pha sandri pha ophispho è ji yoi mage ne guaphasamoythek ne nyie rey dun lei è now ne anomuluii pha rey dun. <sup>25</sup> Ji è rek shii bran jia wuii thog srane ithek shii yao, “Hanyie shii nathek è zum srane phattheg chab muui pha ji ne Misiahò hà branthek shii yua din ramuii ro!” <sup>26</sup> Ji è, ophispho jia



è awai bran pho noh ne guaphasamoythek shii idoh noh thog din. Ithek è guaphasamoythek shii bangchiie è anoh mua, nyieliieshii brantheke bajo um dun pha ji è yang ne brantheke è ithek shii lubao chao mage è now dun.

<sup>27</sup> Ithek è guaphasamoythek shii bucho hà noh srane limiang moe shii riu ba yi, chiih-è, Kho Phabi è ithek shii sai, <sup>28</sup> “Gathek è nathek shii ji pha bran beng yao ne ayua rabo phriie ne ruijong habuii shii, riig mage bo, nathek è nyie rek din phiiga! Nathek ne Jerusalem pho shii mua hi zab yao muui ro, chiih-è nathek ne ai iy pha gaja ne gathek shii the yang muui bey!”

<sup>29</sup> Phithar nane gai guaphasamoythek è chang, “Bran miyao asi pha yi Hamangkhung-aphuii miyao nuui chid phro. <sup>30</sup> Nathek è sharo è hing bai shii phe y srane zun ne ua muui pha Isu shii gethek pha blangtheke pha Hamangkhung-aphuii è hòì din phi ro. <sup>31</sup> Hamangkhung-aphuii è aishii hòì din phi srane awai phawig moe shii dumuii nane ragia rek pha bran rab ne rui ro, nyieliieshii, Israel pho shii awaithek layog lumuii è thadoh riie ne dun yi ne layog khung phi phro. <sup>32</sup> Gethek ne jithek rey phane riig pho ro, gathek nane Ragung So, hanyie thek ne Hamangkhung-aphuii pha lasen ne hanyie è ai miyao nuui phi phajithek ne ji rey pha miyao thieg mua ro.”

<sup>33</sup> Limiangtheke è ji chang pha yoi mage ne bajo lijieng srane guaphasamoythek shii ua muui pha now. <sup>34</sup> Jimagunde, brantheke è bajo wie now pha, Gamaliel beng ne Iphey yua pha bran jia thiichiih pha limiang duchoi shii jai mage, ai è guaphasamoythek shii fuang noh bi bo è yung. <sup>35</sup> Chiih è, limiang shii yao, “Gu ijak Israel pho wo! Nathek ne hithek pha bran shii nyie rek pha now pha ji ne wie nowbthan ne rek bo. <sup>36</sup> Nathek è now luui bey! Buyo shii Theudas beng pha bran jia khia khlei ne awaishii bajo boh pha bran ro è yao, chiih-è, brantheke de ai rog shii wieng wi dog gieng. Jimagunde aishii ne ua muui, airo samoythek de zab yo dun ne ai mulua pha lumuii ji sand dun. <sup>37</sup> Ji phadoh è de Galili pha Judas yi sathang tham pha ishak shii khia srane bajo brantheke de ai rog shii dog gieng dun, jimagunde, aishii de ua maphi, airo samoythek de zab yo dun. <sup>38</sup> Ji-è, gang nathek shii yao phro, hà è rek pha miyao shii ne hithek pha bran shii diig phi pha anow rabo. Ithek shii thoh muui bo! Ithek mirek ji yi bran munow pha è dong arone, awailum ne nya sand dun phro, <sup>39</sup> Jimagunde, hi ne Hamangkhung-aphuii è dun ruui arone, nathek ne ithek shii ayang mua phro. Nathek ne nawaithek shii Hamangkhung-aphuii rog shii gidieg suang rek pha nyadoh ruui phro!”

Limiang è Gamaliel pha miyao nuuidun. <sup>40</sup> Guaphasamoythek shii iliing ho srane chia ne zuang bi ne Isu beng ayao yi sha pha phriie ne thoh ge. <sup>41</sup> Guaphasamoythek ne limiang thoh ne fuang dun thog shii bajo sang dun, nyieliieshii, Isu Chiang è diig rek phane Hamangkhung-aphuii è ithek ne bajo san dun. <sup>42</sup> Inai tham ne Misiahò nane brantheke hò bucho hà de ithek ne athodang pha Isu Masi pha Mua Wie ji yao yua ne rai dun ro.

## 6

### *Miley nongphothek*

<sup>1</sup> Ìujia idoh shii, samoythek ne bajo rey ne dog mage shii Grekh yao pho Jewtheke nane buyo è Jewtheke yao ne ruui pho chung gui rai dun. Grekh yao pho Jewtheke è yao, ithek misiungtheke shii ne miithan ne athang pha snai muui ro. <sup>2</sup> Ji è yao mage ne, guaphasamoythek snanyi è zab migiphothek shii ho ne maley jung srane yao, “Gethek ne Hamangkhung-aphuii miyaogam ji snai srane bang kho phane awie ro. <sup>3</sup> Ji-è, khuiinothek wo! Nathek ne

hanyie shii Ragung So um ne wie thieg pho shii ilkhi rab pha mile gua srane ji pha blia rek yi pha phi mage bo. <sup>4</sup> Gethek ne, gethek shii sia pha nane miyao yua pha blia shii ishak zab phi ne rek chid phro.”

<sup>5</sup> Ji pha bran brogthek ne guaphasamoythek muyua ji wie than ne ji rek yi pha ilkhithek gua ne ruii phi. Jithek ne Sthephen, hanyie shii bajo migi nane Ragung So um pha bran, chiih-è, philiph, Phrochorus, Nikhanor, Thimon, Pharmenas nane Nikholaus Anthioch pha Gaibran, hanyie è Isu shii migi anow ba pha ibi shii Judaism shii migi now pha bran ro. <sup>6</sup> Ji pha bran mile shii guaphasamoythek moe shii noh thog ruii, ji-è, guaphasamoythek è ithek khrug lakhung shii wadthek khoh ne sia ne thoh ge.

<sup>7</sup> Ji è rek ne Hamangkhung-aphuii miyaogam ne athodang pha shiie thog dun. Jerusalem shii samoythek ne bajo dog thog dun, chiih-è, Phabithek de migi now thog dun.

### *Sthephen shii zum*

<sup>8</sup> Sthephen ne, Hamangkhung-aphuii è khirzey bajo phi ne blu ley um srane boh buangthek ne anomuluithek pha bliathek ne branthek duchoi shii rek. <sup>9</sup> Ji è rek ne rai magungde, thiichiih shii Jewthek misiahò pha sey ne thoh pha branthek è aishii gidieg rek noh dun (hì ne ho pha duiine). Ithek ne Syrene nane Alezendria pha Jewthek ro. Ithek nane Khilisia, Asia ithua hà rai pha Jewthek è wuii srane Sthephen shii khnaing noh. <sup>10</sup> Ji è khnaing noh magungde, Ragung è Sthephen shii yao, ley pha khani phi ne yao yi. Ji è, idang ai è yao shii ithek ne asi rone anin mua phi. <sup>11</sup> Ji-è, ithek ne Gaibranthek shii lasen phi srane aishii layog nin yi, “Gathek è ai ne Moses nane Hamangkhung-aphuii shii adunmey pha miyao yao ne rai pha yoi muui ro!” <sup>12</sup> Ji è rek ne ithek è branthek shii, thiig pha dukhothek shii, chiih-è, Iphey yua pho shii bajo hòi ne lijeg ba yi, ji-è, ithek ne Sthephen shii zum srane limiang moe shii noh thog dun. <sup>13</sup> Thiichiih shii, ithek è giak branthek shii ho srane khlam yao ne aishii nin yi. Ji pha branthek è khlam ne yao, “Hi pha bran ne idang Hamangkhung-aphuii Misiahò pha Iphey nane Moses pha Iphey ji shii adunmey pha miyao yao ne rai muui ro. <sup>14</sup> Gathek è ai è Nazareth pha Isu ne Hamangkhung-aphuii Misiahò hì ne chuak srane, Moses è nyie zen marui pha Ipheythek ne zab laimuii phrone yao pha yoi muui ro!” <sup>15</sup> Limiang moe shii dug pha branthek pha mieg ne Sthephen shii athodang pha isiie riig mage shii ai mizia ne hamangkhliie pha mizia duiine doh dun.

## 7

### *Sthephen miyao*

<sup>1</sup> Kho Phabi jia è Sthephen shii sai, “Hì ne izai chak bey?”

<sup>2</sup> Sthephen è chang, “Aphuiithek nane khuiinothek wo! Gu miyao hì nuii bi bo! Buyo shii gethek blang pha Abraham è Haran soh hà rai pha adun ba shii Hamangkhung-aphuii pha biisiie ne” Mesophothamia ithua shii khia khlei ne aishii yao, <sup>3</sup> “nawai haliing pho nane thiig soh thoh marui ne gu è na shii khi pha soh hà yao phi pha ji shii dun ne rai bo.” <sup>4</sup> Ji è yao mage ne ai è awai thiig soh thoh marui ne Haran hà rai pha dun dun. Abraham pha aphuii iy ched ne Hamangkhung-aphuii è aishii ji pha soh thoh ne dun din yi srane sudoh nathek rai ramuii pha ji rey yi phro. <sup>5</sup> Hamangkhung-aphuii è Abraham shii ji pha thiig shii dun thog magungde ji pha soh ne iujia de aishii phi ne aruii. Jimagunde Hamangkhung-aphuii è aishii nane ai

riingthek shii phi pha sbang rek ne ruii phi. Ji pha sbang rek pha idoh shii ne Abraham shii ani oi pha idoh shii rek phro. <sup>6</sup> Hi ne Hamangkhung-aphuii è aishii yao pha miyao ro: Na blangthek ne gai soh hà rai ruii phro, thiisa hà ithek ne khiao rek ne awie dang pha khui yi pha idam wieng wi thog pha rek ne rai dun phro. <sup>7</sup> Jimagunde, jithek pho shii de guro chua ruii phro, “Ji-è, na blangthek ne ji pha soh è fuang khia ne dun srane hi pha ithua shii gu shii sia din ruii phro.” <sup>8</sup> Ji è yao ched ne Hamangkhung-aphuii è Abraham shii shiinyie duiine doh yi pha miagiangkheg ne rai bo ne zen marui. Ji-è, Abraham ne Isakh shii giak ne damiley thogmage shii miagiangkheg phi, Isakh de Jakhob shii miagiangkheg phi, Jakhob de awai dufuii snanyi shii miagiangkheg phi. Jithek ne gethek pha blangthek mirek ne rai dun ro.

<sup>9</sup> Jakhob pha dufuii gaithek ne awaithek khuii Joseph shii gidieg rek ne Egyph hà khiao rek yi pha chong rek muui. Jishii, Hamangkhung-aphuii ne ai rog shii um dun pha ji è <sup>10</sup> khinyama pha diig thog ruii ne de aishii ne diig ji è ragia rek phi. Joseph ne Egyph pha Saja moe shii noh thog magungde, Hamangkhung-aphuii è aishii bajo wie than pha nane wie yaolie pha khani phi ne yao yi. Ji-è, saja ji ne Joseph nane ai sathiing shii Egyph pha badri rab ne ruii dun. <sup>11</sup> Ji è rek shii, doh jia shii Egyph nane Khanon soh hà nokhonosai rey bajo diig thog dun. Chihi è bajo diigchio rey dun, ji nokhonosai rey mage shii gethek pha blangthek ne chie pha nyie de oi pha rey dun. <sup>12</sup> Thiisa hà wuii phane Jakhob è Egyph hà nyin bajo um rone yoi mage shii, awai dufuii, gethek pha blangthek shii nyin yie pha thoh ge. Jithek wuii phane igobi ba ro. <sup>13</sup> Din ne wuii phane, Joseph è awai khuiinothek shii ai ne ithek khuii Joseph rone yao mage ne Egyph pha Saja de Joseph pha haliing pho shii thieg dun, <sup>14</sup> Ji-è, Joseph è awai aphuii Jakhob shii awai haliing pho, bran samiley è guui shii Egyph hà wuii ruii bo è yao ne mua thoh ge. <sup>15</sup> Ji è ho mage ne, Jakhob è Egyph soh hà wuii ne rai dun ne awai nane awai dufuiithek thiichiih shii iy dun. <sup>16</sup> ItheK iy pha siuthek ne Shechem beng pha ithua, Abraham è Hamor pha haliing è bang phi ne phek pha wieng ithua hà wieng muui.

<sup>17</sup> Hamangkhung-aphuii è Abraham shii sbang rek pha ji izai rey sha pha idoh thog mage shii Egyph thiig hà gethek bran ne bajo rey ne sieng dun. <sup>18</sup> Ji è rey mage shii Joseph shii athieg pha Saja jia è Egyph thiig shii bohkhoh pha rey ruii. <sup>19</sup> Ai è gethek pha blangthek shii gidieg rek ne bajo buii phi ne rai noh. Gethek blangthek pha anithek shii de hò è fuang khia muui srane iy yi. <sup>20</sup> Ji è rek pha ishak shii Moses ne bajo khie ani rey ne giak thog ruii. Aishii ne imuii è habie uom thog pha hò bucho shii ug ne ram phi. <sup>21</sup> Chihi è, aishii hò è fuang khia ne fen muui shii Egyph pha saja pha dimi è awai dufuii rab srane sieng yi. <sup>22</sup> Aishii ne Egyph pha miyaogamthek zab yua ne sieng noh pha ji è ai ne khani, nyie blia magungde bajo boh rek pha bran rey ne sieng dun.

<sup>23</sup> Moses ne idam sawi rey ne sieng mage shii, ai è awai ijak Israelthek shii gai è diig phi pha ji thieg yi pha lumuii sow ne rai. <sup>24</sup> Ji è sow ne rai shii, ai è Egyph pha bran jia ne Israelith jia shii thaluii buii rek ne rai iang pha doh ruii, ji è, ai ne wuii srane aishii nong ne Egyphthek shii idoh rog wuii ne ua maphi. ( <sup>25</sup> Ai è ji rek phane è now ne rek phro, yang ne awai branthek è gua ruii phro, aishii ne Hamangkhung-aphuii è ithek shii diig rek ne rai pha ji è fuang khia yi pha blia boh phro, jishii ithek ne ji agao ro.) <sup>26</sup> Ji pha thimiang duiine è rey mage shii, ai è Israelith pha bran nyi

ne awaisa chung gui rai pha doh ruii, ji-è, ai ne isa shii agui yi pha wuii srane yua, gu ijak Israelith nyi wo! Nasa ne nyie rek muii ne hì iguii rai phlei? <sup>27</sup> Jishii, hanyie è gai jia shii thaluu diig phiramuii pha ji è Moses shii reng srane sai, “Nashii ne gu shii chua pha bohkhoh hanyie miirab ne phi lei?” <sup>28</sup> Na ne diyo shii Egyph bran shii ua pha duiine gu shii de ua pha now bey? <sup>29</sup> Ji yao pha yoi mage ne Moses ne Egyph thiig thoh ne yo srane Midian soh hà rai dun. Thiisa hà aishii dufuii nyi giak ruii. <sup>30</sup> “Dam sawi hiià mage shii, hamangkhlie jia è Moses shii Sinai pha phiing boh moe pha jabiingsing shii bai boh jia hòì ne si phi. <sup>31</sup> Moses ne ji doh mage ne bajo wieng dun, ji magungde, ai è ji wie doh yi pha nui wuii. Ji è wuii mage shii ai è Ithong miyaogam yoi ruii: <sup>32</sup> ‘Gune nathek blangthek, Abraham, Isakh, nane Jakhob pha Hamangkhang-aphuii ro.’ Ji è yao mage ne Moses ne bajo sham ne ariig mua pha rum dun. <sup>33</sup> Ithong è aishii yao, ‘Na lakhia than mage bo, na khishii riu pha ithua ne ithua so ro. <sup>34</sup> Gu è gu brantheke ne Egyph thiig hà bajo duhug rek ne rai pha doh muii ro. Gune ithek muchohthek jithek yoi mage ne ithek shii duhug ji è ruang rey yi pha wuii phro. Na ne gu moe shii wuii mage bo; gu na shii Egyph thiig hà wuii yi pha thoh ge pha ro.’

<sup>35</sup> “Moses ne, Israel pho è snai pha bran ji ro. ‘Branthek è gethek shii che phi pha bohkhoh bow phane aishii hanyie è bow lei?’ Isai pha bran ji ro. Ai ne Hamangkhang-aphuii è brantheke shii khothek bow srane bai hòì pha jabiingsing shii khia pha hamangkhlie pha nong pha yie srane brantheke shii duhug rek ne rai pha ji è fuang khia phi pha bran ji ro. <sup>36</sup> Ai è brantheke shii Egyph thiig è fuang khia noh, Egyph thiig nane khamuii shaig, chiìh-è, balimuang hà idam sawi thog dang pha buangthek pha bliathek rek phro. <sup>37</sup> Moses ne ji pha bran ro, hanyie è Israel pho shii yao, ‘Gu shii khi-è rek ne thoh pha duiine Hamangkhang-aphuii è chaig phuii jia thoh ruii phro, ai ne nawaithek haliing pha bran phro.’ <sup>38</sup> Ai ne balimuang hà Israel pho rog shii rai pha bran ji ro, ai ne gethek blangthek rog nane Sinai Phiing boh shii hamangkhang pha hamangkhlie rog shii yao pha bran ji ro. Ai è Hamangkhang-aphuii pha sieng pha mua mua ne sudoh gethek shii thog yi pha bran ji ro.

<sup>39</sup> “Jishii, gethek pha blangthek è ai miyao anuii pha rai dun. Aishii reng muii srane Egyph hà dun din pha now din. <sup>40</sup> Ji è now ne ithek è Aron shii yao, ‘Cho! Gethek ne gai pha hamangkhang-aphuii rab srane gethek shii lumuii wie noh yi pha um. Nyieliieshii, gethek ne gethek shii Egyph è fuang khia ne dun noh pha Moses ne nyie rey dun pha ji ne athieg mua shaphi ro!’

<sup>41</sup> Ji è yung ne ithek è suwuiiduii mia pha jangbang jia rab srane muramthek ua ne zid phi ne ithek è nyie rab pha ji bajo wie doh yi pha sai ne rai. <sup>42</sup> Ji è chaig pha jigigam shii zey pha duiine Hamangkhang-aphuii ne ithek è ruang dun dun ro. Ithek ne hamang pha dadiangthek shii sia ne rai dun:

“Israel pha brantheke wo! Balimuang hà idam sawi  
thog dang pha muramthek ua ne zid  
pha ji ne gu shii zid pha asi ro.”

<sup>43</sup> Ji ne nawaithek miìhan pha jangbang Molekh ro, chiìh-è,  
Rephan jangbang mia pha jangbang, ithek pha dadiang jangbang ro;  
ithek ne nathek è sia pha jangbang rab pha ji ro. Ji-è,

Gune nathek shii Babylon thiig è ruang thog dang khia muii phro.

<sup>44</sup> Gethek pha blangthek ne balimuang shii Hamangkhang-aphuii um pha shiinyie Haliig um phro. Ji pha haliig ne Moses shii khi è yung pha ji rab ne ruii phro. <sup>45</sup> Ji pha shiinyie haliig ne gethek pha blangthek è awaithek

aphuiithek è khi è rek ne mua lei ne ji athodang pha awaithek rog han ne Joshua rog shii Hamangkhung-aphuii è khi pha soh brantek shii fuang khia muui ne phi pha soh hà khud dun. Chiih-è ji ne thiisa hà Dawid sieng pha idoh thog dang pha raidun. <sup>46</sup> Dawid è Hamangkhung-aphuii haro han phi ne Hamangkhung-aphuii shii Jakhob pha Hamangkhung-aphuii rai yi pha ithua rab pha jia lia, <sup>47</sup> Jishii, ji pha hò ne Solomon murung mua bie.

<sup>48</sup> “Ji è rung phi magungde; bajo giu hà rai pha Hamangkhung-aphuii ne bran miirab phi pha hò ji shii arai phi. Chaigtheke miyao duiine,

<sup>49</sup> “Hamangkhung ne gu dug pha ithua ro, chiih-è,  
Sohnyiak ne gu lai è thum pha ithua ro.”

Na ne gu shii nyie khi-è rek pha hò rung phi pha now ga?

Gu rai pha ithua ne khi hà um ga?

<sup>50</sup> Hìtheke ne zab gu miirab phi jithek asi bey?

<sup>51</sup> Stephen è athodang pha yao, “Nathek ne khinyama jia lawasdai pha bran lei?” “Nathek ne khinyama shii um phlei? Nathek ne Hamangkhung-aphuii pha mua ji nuui pha khoh ne khinyama jia khophang um ga? Nathek ne nawaithek pha blangtheke duiine ara! Nathek de Ragung So shii snai mua ara! <sup>52</sup> Buyo shii de chaig shii nathek pha riingtheke è diig phi ne aruii bey? Itheke è Hamangkhung-aphuii pha muaphotheke hanyie è giang khiao jia wuii ruii pha mua yao phajitheke shii ua maphi ro. Sdoh de ithek ne aishii layog nin srane ua maphi ro. <sup>53</sup> Nathek ne Hamangkhung-aphuii pha Iphey yi hamangkhlietheke shii phi ne thoh ge ne mua habuii shii, nathek ne ji ne anuii ro!”

### *Stephen shii lubao chao ne ua*

<sup>54</sup> Limiang brogtheke è Stephen miyao ji nuui ne bajo lijieg ne sinyintheke thak dun. <sup>55</sup> Ji è rek magungde, Stephen ne Ragung So è ley dun srane hamangkhung hà hùii ne riig mage shii Hamangkhung-aphuii pha biisiie doh ruii, chiih-è, Isu ne ai phawig moe shii riu ne rai iang pha doh ruii. <sup>56</sup> Ai è yao, “Riig mage bo! Gune hamangkhung hong pha doh muui ro, chiih-è, Bran Dufuii ji ne Hamangkhung-aphuii pha phawig moe shii riu ne rai pha doh muui ro.”

<sup>57</sup> Ji è yao mage shii thiichiih um pha limiangtheke ne ziake ne choh srane awaithek khohtheke wad è cheg muui. Chiih-è, zab brantek ai moe shii ran ruii. <sup>58</sup> Aishii ji pha thiig è fuang fen srane lubao è chao mage. Ji riig pho è ithek yung ji yie srane Saul beng pha bufuii filiao jia shii phi ne riig yi. <sup>59</sup> Itheke ne lubao athodang pha chao mage ne Stephen ne Ithong shii ziake ne ho, “Ithong Isu, gu Ragung yie muui bo!” <sup>60</sup> Ai è bam srane ziake ne yao, “Ithong! Hì pha layog ne ithek shii gidieg arey yi rabo!” Ai è ji yao srane iy dun.

## 8

<sup>1</sup> Ji ua muui phane Saul è de nuui.

### *Saul è charchpho shii diig phi*

Ji pha inai è Jerusalem pha charchphothek ne diig phi pha ji è bajo duhug rek ne rai dun. Thiichiih ga charchphothek shii thoh marui ne charch pha migiphothek ne zab rum ne Judea nane Samaria soh ithua hà yo ched dun.

<sup>2</sup> Thiichiih shii giak bran è bajo migi now pho um ne Stephen siu ji yie srane wieng phi ne bajo zo ne choh.

<sup>3</sup> Ji è rek magungde, Saul ne charchthek shii buii rek pha lumuii sow ne rai. Ai ne hò-hò hà wuii srane migipho, hò-aphuii um ne de, hò-amuii um ne de zab shii fuang khia srane phatheg chab maphi.

### *Samaria hà de muawie yao*

<sup>4</sup> Khinyama jia pha migipho ne yoh yoh che dun pha ji è sohsoh hà wuii dun srane ji pha mua yao ne rai. <sup>5</sup> Philip ne Samaria pha rajan boh hà wuii dun srane Masi pha Mua ji thiichiih pha branthek shii yao. <sup>6</sup> Thiisa pha bran brogthek de ai miyao pha mua nane buangthek pha bliathek rek pha doh mage ne ai moe shii wuii srane bajo nuui gieng. <sup>7</sup> Ibuii ragungthek de zab gang ziak ne bran bucho è fuang khia dun, chiih-è, Slem riie pha branthek nane lai wad khi-èk pha branthek de gang dun. <sup>8</sup> Ji-è, ji pha rajan shii ne bajo boh lubo thog dun.

<sup>9</sup> Simon beng pha bran jia de thiichiih shii rai ne um iang. Ai de awai misia è Samarithan pho shii anomuluii pha bliathek rek ne yao, ai de bajo boh pha bran ji ro. <sup>10</sup> Ji è rek mage ne ji pha rajan pha zab limiang bran brogthek ne aishii wie nuui ne ai rog shii rai dun. Ithek è yao, “Ai ne Hamangkhung-aphuii pha blu è thieg ro, ‘Bajo bohblu um rone thieg pha ji ro.’ ” <sup>11</sup> Ithek ne aishii nyie rek ne wie now dun, nyieliieshii, ai ne thiichiih shii bajo ibi è awai jadu è bajo wieng pha bliathek rek ne rai dun. <sup>12</sup> Ji è rek ne rai magungde, branthek è Philip è Hamangkhung-aphuii pha Sajathua pha mua wie nane Isu Masi pha mua ji yao mage shii ithek ne migi now magey shii, hò-aphuii um ne de, hò-amuii um ne de, zab khowo yie dun. <sup>13</sup> Simon awai de ji pha mua izai now ne khowo yie srane Philip rog rai gieng. Ai ne Philip rog shii rai gieng shii Philip mirek pha buangthek pha bliathek doh mage ne awai de bajo wieng dun.

<sup>14</sup> Jerusalem pha guaphasamoy è Samaria pho de Hamangkhung-aphuii pha miyaogam ji shii migi now pha yoi mage shii ithek è Phithar nane Jon shii thiisa thoh ge. <sup>15</sup> Ai è thiisa hà thogmage shii, isa ne migiphothek shii Ragung So mua yi pha sia phi. <sup>16</sup> Nyieliieshii, ithek ne Ithong Isu beng è khowo yie bie ne Ragung So amua ba pha rai ro. <sup>17</sup> Ji-è, Phithar nane Jon è awai so wad ithek Khurug shii kho srane sia mage shii ithek de Ragung So mua dun.

<sup>18</sup> Simon è guaphasamoy ne migipho shii wad kho ne sia phi shii Ragung So ne migipho shii phi pha doh dun. Ji-è, ai de bang yie srane Phithar nane Jon shii zud ne yao, <sup>19</sup> chiih-è yao, “Gu shii de hi pha blu phi mage bo, ji arone, gu de hanyie shii wad khoh mage shii ai de Ragung So mua ruui phro.”

<sup>20</sup> Jishii, Phithar è aishii chang din, “na nane naro bang hi ne thumuluii hà dun dun bo, Na ne Hamangkhung-aphuii pha lasen ne bang è phieg mua pha now bey! <sup>21</sup> Na ne gathek rog shii nyie blia rek pha oi ro, nyieliieshii, na ne Hamangkhung-aphuii mieg moe shii giang adoh phi ro. <sup>22</sup> Hi è rek ne buii now pha è idoh riie srane Ithong shii sia mage bo, ji-arone, Ithong è ji è now pha layog è khung phi phro. <sup>23</sup> Gu è na ne bajo miegriie ne layog pha phatheg pho rone doh muui ro.”

<sup>24</sup> Simon è Phithar nane Jon shii yao, “Nasa è nyie yao pha ji è gu shii achun yi pha nasa ne Ithong shii sia mage bo.”

<sup>25</sup> Ithek ne awai sai shii Ithong è nyie rek phi phajithek yao phi, chiih-è Mua Wie de yao marui srane Phithar nane Jon ne Jerusalem hà dun din dun. Tthek ne lumuii hà dun ramuii shii lumuii pha Samaria thiigthek hà de Mua Wie ji yao marui.

### *Philiph nane Ethiopiathek ophis blia*

<sup>26</sup> Ithong pha hamangkhlhie è philiph shii yao, “Saro srane Jerusalem è Gaza dong pha hayang lumuii hà wuii mage bo.” (Ji pha lumuii ne thuh ne hanyie de alua sha ro.) <sup>27-28</sup> Ji è yao mage ne Philiph ne saro ne wuii dun. Ji è wuiiramuii shii Ethiopian, hanyie yi Ethiopia pha bisiumuii pha bang kho yi pha dumuii jia de Jerusalem hà Hamangkhang-aphuii shii misia sia ched ne awai stuh garuii shii in srane Ethiopia dun din ramuii pha doh ruii. Awaiji buiine chaigpho Aijaya mizey pha jigigam ji tham pha doh iang. <sup>29</sup> Ragung So è Philiph shii yao, “Wuii srane ji pha miihan han pha stuh moe shii luagieng bo.” <sup>30</sup> Philiph è ran srane ji pha dumuii moe shii wuiithogmage shii ji pha dumuii ne Aijaya chaig mizey marui pha jigigam ji tham pha yoi ruii. Philiph è aishii sai mage, “Na ne nawai è nyie tham pha ji ne gao chak bey?”

<sup>31</sup> Ji pha dumuii è chang, “Hanyie è gu shii ayao phi arone, khi è rek ne gao mua phlei?” Ji è yao srane ji pha bran è Philiph shii stuh lakhung khrog ne in yi. <sup>32</sup> Ai mutham pha Aijaya jigigam ne:

“Ai ne ua ne zid pha shiishai duiine ro,

ai ne imantheke guui phi shii aro pha shiishaiduii duiine ro.

Ai ne miyaogam jia de ayao dang phi ro.

<sup>33</sup> Aishii ne biwo rek muui ro, wie chua pha miyao de aishii khiijai.

Hanyie de ai riing pha chiang shii ayao mua ro

nyieliieshii ichiuh sohnyiak shii ai chai pha ishak ne jong dun ro.”

<sup>34</sup> Ji pha dumuii è Philiph shii yao, “Gu shii yao phi bo, hi pha miyao ne chaigpho è hanyie shii yao phlei? Hi ne awaishii yao nebey? Asi pha gai bran shii yao nebey?” <sup>35</sup> Ji-è, Philiph è aishii ji pha jigigam è jao srane Isu pha Mua Wie ji de yao phi. <sup>36</sup> Ji è yao ne lumuii hà luaramuii shii ithek ne kho um pha ithua jia shii thog ruii. Dumuii ji è Philiph shii yao, ichiuh ne kho um haga! Gu shii nyie rek ne khowo apho ba lei? <sup>37</sup> Philiph è aishii yao, “na è nawai è izai now dun arone, gu de na shii khowo phi phro.” Ai è chang, gune Isu Masi ne Hamangkhang-aphuii pha Dufuii rone migi now chak ro.

<sup>38</sup> Ji pha dumuii è Sthuii shii gak ne riu yi srane kho moe hà wuii thog ne Philiph è aishii khowo phi. <sup>39</sup> Ai kho è fuang khia dang shii Ragung So è Philiph shii noh dun. Ji pha dumuii ne Philiph shii dinne athodang pha noh dun. Jimagunde, ai ne bajo sang ne hò hà dun-dun. <sup>40</sup> Philiph ne awaishii Azothus ithua hà thog ne rai pha doh dun. Ji-è, ai ne Khaesarea hà wuii dun. Lumuii hà khinyama jia pha bajarathek um pha ji shii Mua Wie ji yao marui.

## 9

### *Saul lai dun*

<sup>1</sup> Ji è rekramuii shii, Saul ne Ithong shii migipho shii ua pha noh. Ai ne Kho Phabi shii wuii dun ne <sup>2</sup> Damaskhus pha Jewish misiahòthek shii wuii thog shii aishii thieg yi pha jigigam jia lia. Nyieliieshii, thiisa hà Ithong lumuii shii lua ne migipho doh arone, hò-aphuii hò-amuii um ne de zab zum srane idoh Jerusalem hà noh pha now ne lia.

<sup>3</sup> Ji-è, Saul ne Damaskhus pha rajan moe shii wuii thog mage shii, hamblo shii Hamang è Haliao jia ai moe shii bliak ruii. <sup>4</sup> Ai ne ji bliak pha doh mage ne nyiak hà thud dun. Thiichiuh shii ai è miyaogam jia rone aishii yao pha yoi ruii, “Saul, Saul! Na ne nyie rek ne gu shii diig phi phlei?”

<sup>5</sup> Saul è sai din, “Ithong, na ne hanyie lei?” Ji pha goh ro pha ji è yao, “Gune Isu ro, hanyie shii na ne diig phiramuii pha ji ro.” <sup>6</sup> “Jishii, jai srane ji pha rajan hà wuii mage bo, thiisa hà na ne nyie rek chid pha ji ne na shii yao phi phro.”

<sup>7</sup> Saul rog wuii gieng pha brantheke ne dong ne goh jia de ayao dang pha rai dun. Itheke de ji pha miyaogam ne yoi habuii shii, hanyie miyao ruii ji ne adoh phi. <sup>8</sup> Saul ne nyiak è sieng srane awai mieg yang ne riig mage shii mieg ne adoh pha rey dun. Ji-è, ai rog wuii gieng pha brantheke è wad chaing srane Damaskhus hà noh dun. <sup>9</sup> Inai da-uom thog dang pha ai ne Miegthi ne rai dun; ji pha da-uom liing shii ai è nyie de achie aniing dang pha rai dun.

<sup>10</sup> Thiisa Damaskhus hà Ananias beng pha migipho jia um iang. Ai ne Ithong è miyao jia yao ne ho pha ibang jia bang ruii, “Ananias!”

Ai è chang, “Ithong, gune ichiuh shii um ro.”

<sup>11</sup> Ithong è aishii yao, “Saro srane miang Judas pha hò liing hà wuii mage ne Tharsus è wuii thog pha Sual beng pha bran um bey ne sai mage bo. Ai de sia mage shii ibang jia bang ramuii ro, <sup>12</sup> Ananias beng pha bran jia è de aishii wad kho ne sia phi shii mieg doh din yi ne pha ibang bang ramuii ro.”

<sup>13</sup> Ananias è chang, “Ithong wo! Ji pha bran è Jerusalem pha naro brantheke shii bajo diig phi phane brantheke è gu shii yao jong ro. <sup>14</sup> Ai ne ichiuh Damaskhus hà wuii phane boh phabitheke è blu rek pha jigigam yie ne na shii misia sia pho shii zum pha wuii phro.”

<sup>15</sup> Ithong è aishii yao din, “Wuii mage bo, nyieliieshii, aishii ne gu è gu blia rek pha, gu beng ne Gaibrantheke nane sajatheke, chiih-è, Israel photheke shii thieg yi pha gua jong ro. <sup>16</sup> Aishii gu chiang è diig rek chid pha miyao ne gu è aishii doh yi phro.”

<sup>17</sup> Ji-è, Ananias ne wuii srane ji pha hò shii khud srane Saul shii wad kho ne khirzey phi. Ai è Saul shii Yao, “Gu khuii Saul wo! Ithong Isu awai mutho ge ro. Hanyie è na shii ichiuh wuii pha lumuii hà si pha ji ro. Ai è gu shii thoge phane na mieg ne doh din yi pha thoh pha nane na shii Ragung So mua yi pha thoh ge ro.” <sup>18</sup> Ji è rek dang shii Saul mieg è ù khug duiine jia chiih dun ne mieg ne sang doh din ruii. Ji-è ai ne jai srane khowo yie mua. <sup>19</sup> Khowo yie ched ne michie chie mage shii awai siu shii gang thog din ruii pha than.

### *Saul è Damaskhus hà mua yao*

Saul ne Damaskhus hà migipho rog inai iujia rai marui. <sup>20</sup> Ai ne Jewtheke misiahòtheke hà wuii dang srane Isu ne Hamangkhung-aphuii pha dufuii ji ro è yao phi.

<sup>21</sup> Brantheke ne ai miyao ji yoi ne bajo anomuluii pha rey ne awaitheke chung yao rai, “Hi pha bran ne Jerusalem hà Isu shii sia pho shii ua ne rai pha ji asi bey? Ai ne ichiuh shii wuii phade ji pha brantheke shii zum ne Bohphabi shii noh ruii pha wuii pha ji asi bey?”

<sup>22</sup> Jishii, Saul pha miyao ne bajo blu um ne yao dun pha ji è Isu ne Masi ji rone izai id yi ne Damaskhus hà rai pha Jewtheke ne aishii nyie achang mua pha rey dun.

<sup>23</sup> Ji è rek ne inai bajo rai mage shii, Jewtheke ne maley dug srane Saul shii ua pha phak rai. <sup>24</sup> Jishii, itheke muphak ji ne gai bran è aishii yao phi. Inai habiu rey dun ne de itheke ne athodang pha ji pha rajan gak shii aishii zum ne ua pha khan ne rai. <sup>25</sup> Jishii, habiu jia shii Saul pha samoytheke è aishii noh ne sirid bucho chab muui srane muthua è dun ge yi.



### *Saul ne Jerusalem hà thog*

<sup>26</sup> Saul ne Jerusalem hà dun srane samoythek rog dog pha rek. Ji è rek magunde, samoythek ne ai de samoy rey dun rone izai anow pha yi aishii riig ne zab rum dun. <sup>27</sup> Jishii, Barnabas è wuii srane aishii guaphasamoy moe shii noh thog ruii. Ai è ithek shii, Ithong è khi è rek ne miyaogam rone yao pha ji zab yao phi. Ji jia asi pha yi ai è khi è rek ne boh noh srane Damaskhus hà Isu beng è yao marui phajithek de yao phi. <sup>28</sup> Sual è ithek rog shii rai srane Jerusalem pha ithuathæk hà wuii srane Ithong beng è bajo boh rek ne yao ne rai. <sup>29</sup> Ai è Grekh yao pha Jewthek shii de yao ne khnaing noh shii ithek è aishii ua pha rek dun. <sup>30</sup> Migipho è ji thieg mage ne Sual shii Khaesarea hà noh srane Tharsus hà thoh ge.

<sup>31</sup> Ji è rek pha idoh shii ne Judea, Galili nane Samaria pha charchthek ne liijjing um dun. Ragung So è ithek shii chuh rek phi ne ithek rog shii bajo migiphothek rey ne dog dun ne Ithong shii bajo ilab rek ne rai dun.

### *Phithar è Lyda nane Jopha hà wuii thog*

<sup>32</sup> Phithar ne ithuathæk hà lua ne rai. Ishak jia shii ai ne Hamangkhang-aphuii pha brantheek shii thiisa pha Lyda hà wuii dun. <sup>33</sup> Thiisa hà ai è Aeneas, slemriie ne idam mileo rey sha pha biang shii thiang ne rai pha bran jia doh ruii. <sup>34</sup> Phithar è ji pha bran shii yao, “Aeneas, Isu Masi è na shii gang phi ro. Jai srane nawai lawio jiang ne dun mage bo.” Ji è yao dang shii, Aeneas ne jai mua dun. <sup>35</sup> Lyda nane Sharon hà rai pha brantheek de aishii riig ne Ithong shii migi now dun.

<sup>36</sup> Jopha thiig hà Thabitha beng pha hò-amuii jia de Migi now ne um. (Grekh è ai ibeng ne Dorkhas ne “Dichiih rone ho”) ai ne idang brantheek shii wie rek ne dushothek nong phi ne rai. <sup>37</sup> Doh jia shii ne, ji pha hò-amuii ne rad ne iy dun. Ai ro iy pha siu ne brantheek è kho è sud phi srane lakhung pha ùgd hà ruii muii. <sup>38</sup> Ji pha Jopha ne Lyda è bajo ruang asi pha ji è migipho è Phithar ne Lyda hà um rone yoi mage shii, ithek è bran nyi shii mua yua ne thoh ge, “Na ne gathek moe shii jog wuii mage bo.” <sup>39</sup> Ji è, Phithar ne saro srane ithek shii wuii dun. Ai ne thiisa wuii thog shii, aishii ne ji pha ùgd hà noh dun. Ji pha ùgd hà wuii thog shii misiungmuiithek è ai moe wuii ne Dorkhas è awai a-iy ba shii rab marui pha phadiig nane yugudthek ro! Hiòg ne riig yi srane choh. <sup>40</sup> Phithar è ithek shii zab fuang dun yi srane bam ne sia phi; chiih-è, iy pha siu shii riig srane ho, “Thabitha, siang mage bo!” Thabitha è mieg yang ne riig mage shii, Phithar um iang pha doh ruii. Ji-è, Thabitha de sieng ne dug mage. <sup>41</sup> Phithar è Thabitha shii wad chaing ne riu yi srane migipho nane misiungmuiithek shii bucho ho ne hòi din pha ji riig yi. <sup>42</sup> Ji pha mua ne zab Jopha ithua hà yoi dun. Ji-è, brantheek Ithong shii migi now dun. <sup>43</sup> Phithar ne Jopha hà sukhug rab ne rai pha bran Simon pha hò shii inai bajo thog pha rai marui.

## 10

### *Phithar nane Khornelius si rai*

<sup>1</sup> Thiisa hà Khornelius beng pha bran jia Khaesarea hà um. Hanyie shii ne Roman arming regimen pha dumuii rone ho pha “Ji ne Ithalian Regimen ro.” <sup>2</sup> Ai ne bajo giang rek ne rai pha bran ro; ai nane ai pha haliing phothek ne Hamangkhang-aphuii shii misia sia ne rai pha haliing ro. Ai ne Jewish pha dusho brantheek shii bajo nong phi ne Hamangkhang-aphuii shii athodang pha sia ne rai. <sup>3</sup> Inai jia pha habjuang ishak uom rey shii ai è ibang jia bang

ruii, ai è ji pha ibang shii doh, Hamangkhung-aphuui pha hamangkhliie jia wuii srane aishii yao, “Khornelius!”

<sup>4</sup> Ai è hamangkhliie shii wie riig mage ne rum ne sai, “Masdo! Hi ne nyie ga?”

Hamangkhliie è aishii yao, “Hamangkhung-aphuui è na misia nane na è brantheek shii bushun rek pha blia jithek bajo wie than ne na shii chang phi pha rekramuui ro. <sup>5</sup> Na, ne nawai bran shii thoh ne Jopha hà um pha Simon Phithar beng pha bran shii wuii yi bo. <sup>6</sup> Ai ne sukhug rab pha Simon hò shii biwen rek ne rai muui ro. Ji pha ithua ne khamuui ring hà ro.” <sup>7</sup> Ji è yao ched marui ne hamangkhliie ne dun din dun. Khornelius è awai khiao nyi nane giang rek pha awai siphahi wie jia shii ho. <sup>8</sup> Ai è ithek shii nyie rey dun pha ji yao srane Jopha hà wuii ge.

<sup>9</sup> Ji pha thimiang duine rey mage shii ithek ne Jopha moe thog pha wuiiramuii shii, Phithar ne hanai duchoi pha ishak shii ji pha hò shaphiing lakhung hà sia pha wuii dun. <sup>10</sup> Ai ne chi-iyiy ne nyie magungde chie yang dun, jishii, michie ne wo jao ne dao ramuui; jishii ai de ibang jia bang ruii. <sup>11</sup> Ai è Hamangkhung hong srane bajo boh pha yung thilek jia Hamangkhung è thazam riu srane sohnyiak pha iring wi hà jo pha doh ruii. <sup>12</sup> Ji pha bucho shii jabiing nane hò pha muramtheek, lia ne lua pha muramtheek, jabiing pha fuiithek um pha doh ruii, <sup>13</sup> chiih è, goh jia rone yao ruii, “Phithar! Sieng srane hithek ua ne chie mage bo!”

<sup>14</sup> Jishii, Phithar è yao din, “Ithong wo! Gune achie ro, gune khuchung de achie lo pha zea achie ba riig ro.”

<sup>15</sup> Goh è aishii yao din ruii, “Hamangkhung-aphuui è so rone yao phajithek ne zea rone anin din rabo.” <sup>16</sup> Ji è rey phane uomchieng rey yi srane manathek ne Hamangkhung hà yie din dun.

<sup>17</sup> Phithar ne ji pha ibang ne nyie bang rone! è now ne anomuluui pha rai ramuui shii, Khornelius mutho ge pha brantheek è Simon hò thieg ne ji pha hò gak shii wuii thog ne riu ne rai ruii. <sup>18</sup> Ithek è hò pho shii fuang ho srane sai “Ichihih shii Simon Phithar beng pha biwen jia um bey?”

<sup>19</sup> Ji è rek magungde, Phithar ne awai ibang ji gao yi pha now ne rai ramuui shii, Ragung è aishii yao, “Nuii mage bo! Bsa hà bran uom ne na shii sow ramuui ro. <sup>20</sup> Ji-è, na ne saro srane buzam hà dun mage bo, na ne ithek rog shii awuii yang pha arek rabo, nyieliieshii, ithek shii gu mutho ge ro.” <sup>21</sup> Ji è yao mage ne Phithar de buzam dun srane ji pha brantheek shii yao, “Nathek è sow pha bran ne gu ro. Nathek ne nyie rek pha wuii phlei?”

<sup>22</sup> Ithek è chang, “Gathek shii ne Khornelius dumuii mutho ge ro, ai ne Hamangkhung-aphuui shii sia ne bajo wie pha bran ro, chiih-è, Jewishtheek de aishii bajo ilab phi pha bran ro. Hamangkhliie è aishii yao ne na shii awai hò hà ho yi pha thoh ge phro. Nyieliieshii, ai de na miyao nuii mua gieng pha yang dun ro.” <sup>23</sup> Ji-è, Phithar ne ithek shii bucho ho srane ji pha ibi thuchihih shii men bo è yao.

Ji pha thimiang duine rey mage shii Phithar è saro srane ithek rog shii wuii gieng; chiih-è Jopha pha migipho giak de ithek rog shii wuii gieng. <sup>24</sup> Ji pha inai shii ithek ne Khornelius è awai brantheek nane nui ijaktheek rog khan ne rai iang pha Khaesarea ithua shii wuii thog ruii. <sup>25</sup> Phithar è bucho khud pha rekramuui shii Khornelius è wuii ne khung ne ai lai moe shii bam. <sup>26</sup> Jishii, Phithar è aishii jai yi srane yao, “Gu de bran bie ro.” <sup>27</sup> Phithar è Khornelius shii athodang pha yao ne hò bucho wuii mage shii brantheek de

bajo khrab ne rai iang pha doh ruii ne athodang pha yao. <sup>28</sup> Phithar è ithek shii yao, “Nathek de thieg iwa! Jew jia shii awai giang rek pha Chiang è GaibrantheK rog shii wuii ne arai yi ro.” Jimagunde, Hamangkhung-aphuii è gu shii ne nyie shii magungde zea azen rone è yao ruii pha doh yi ro. <sup>29</sup> Ji-è, na è gu shii ho pha bran thoh ge shii, gu de nyie de ayao dang pha wuii gieng phro. Gu na shii sai phro, “Na ne nyie rek pha gu shii ho phlei?”

<sup>30</sup> Khornelius è yao, “Gune inai uom pha ishak ibi hà gui hò shii habjuang rey pha ishak shii sia ne rai ramuii shii, hamblo shii bran jia ne yung khlieng chuang pha jia guii srane gu ibi shii riu ne yao pha doh ruii <sup>31</sup> chiih-è yao: ‘Khornelius! Hamangkhung-aphuii è na misia nane na mirek pha bushun bliathek yoi ne doh dun ro. <sup>32</sup> Ji-è, na ne Jopha hà brantheK thoh ne Simon Phithar beng pha bran ji shii ho mage bo, ai ne Jopha pha khamuii ring pha ithua hà.’ Sukhug rab pha Simon hò shii biwen wuii ne rai muui ro.” <sup>33</sup> Ji-è, gune na shii ho pha bran thoh ge ro. Na de gu mua ji nuii ne ichiih shii bajo wie wuii thog ruii ro. “Gethek ne Hamangkhung-aphuii moe shii Ithong è na shii nyie yao yi pha ji nuii pha khan ne rai ramuii ro!”

### *Phithar re-è miyao*

<sup>34</sup> Phithar è jao ne yao, “Gune, sudoh shii gao sha ro, Hamangkhung-aphuii ne zab brantheK shii ò wie rek ne ruii ara. <sup>35</sup> Hanyie è aishii sia, chiih-è, giang bliathek rek arone, aishii dun mey ro, ji pha bran ne khi pha iriing è giak ruii ne de ji ariig pha wie rek dun ara. <sup>36</sup> Nathek de thieg iwa! Ai è Israel pho shii mua thoh phane Isu Masi, zab pha Ithong pha, Liijiang pha Mua Wie ji yao bo ne thoh pha ji ro. <sup>37</sup> Nawaithek de thieg iwa! Galili hà è jao dang ne Jon è khowo yie yi pha yao pha mua thog dang pha Israel pha soh shii bajo boh bliathek thieg iwa. <sup>38</sup> Nathek de Nazareth pha Isu shii Hamangkhung-aphuii è khi-è rek ne Ragung So nane blu phi pha ji thieg iwa. Ai ne soh soh hà wuii srane wie bliathek rek phi ne ibuii ragung pha blu è jiang pho shii gang phi, nyieliieshii, Hamangkhung-aphuii ai rog shii um dun. <sup>39</sup> Gathek ne Israel pha soh nane Jerusalem shii ai mirek marui pha bliathek ne doh gieng phro. BrantheK è aishii sharo phey srane bai shii zun ne ua muui ro. <sup>40</sup> Jishii, Hamangkhung-aphuii è aishii inai da-uom shii idoh hòi din yi ne doh yi ro. <sup>41</sup> Ji è rek magungde, ai ne zab bran shii asi pha, hanyie shii ai riig pho shii ne Hamangkhung-aphuii è gua jong pha brantheK shii si yi phro, ji ne gathek ro, hanyie è ai rog shii ai hòi din pha idoh shii chie niing gieng pho ro. <sup>42</sup> Ai è gathek shii hi pha muawie ne brantheK shii yao bo ne yung marui. Chiih è, Hamangkhung-aphuii è aishii iy ne sieng yi pha chua pha gua ne ruii pha ji rone thieg yi pha rek bo ne yung marui. <sup>43</sup> Zab chaigpho è de ai Chiang yao jong marui ro, hanyie è aishii migi noh arone, ai beng pha blu è ai layog ne khung phi phro.”

### *GaibrantheK de Ragung So mua ruii*

<sup>44</sup> Phithar è ji yao ramuii shii, Ragung So ne thiichiih ai moe nuii rai pho lakhung shii wuii thog ruii. <sup>45</sup> Jopha è Phithar rog wuii gieng pha Jewish migipho ne Hamangkhung-aphuii è GaibrantheK shii de awai lasen Ragung So thoi phi pha ji doh ne bajo anomuluii pha rey dun. <sup>46</sup> Nyieliieshii, ithek è khuchung de ayoi ba pha nyuak yao ne Hamangkhung-aphuii shii bajo laso phi pha doh dun. Phithar è ithek shii yao, <sup>47</sup> “Gethek duiine ithek de Ragung So mua ge ro. Ji è rek mage ne Phithar è sai, ithek shii kho è khowo ayie yi pha hanyie gak mua phlei?” <sup>48</sup> Ji è sai srane ai è ji pha brantheK shii Isu Masi

beng è khowo yie yi. Ji è rek phi ne brantheke è aishii ithek rog shii inai lujia rai gieng pha yao.

## 11

### *Phithar è Jerusalem pha charch shii phosro rek*

<sup>1</sup> Judea soh hà rai pha guaphasamoy nane gai migiphothek è Gaibrantheke de Hamangkhung-aphuii pha miyaogam mua dun ro è yoi. <sup>2</sup> Phithar è Jerusalem hà dun thog shii, Gaibrantheke shii miangangkheg shii wie now pho è aishii gidieg rek ne yao, <sup>3</sup> “Na ne miang alaig pha Gaibrantheke hò shii biwen rek ne rai marui. Chiuh è, ithek rog shii chie niing marui ara!” <sup>4</sup> Ji-è Phithar ne ithek shii thiisa hà ibi è jao ne nyie rey dun phajitheke zab yao phi:

<sup>5</sup> “Gune Jopha pha rajan hà sia ramuii shii, ibang jia bang ruii” Hamangkhung pha iring wi è thazam riie ne yung thilek jia ichiuh soh shii chiuh thog pha doh ruii. Ji ne gu moe shii chiuh ne khak dun pha doh ruii. <sup>6</sup> Gu è ji pha bucho shii wie riig mage shii, hò nane jabiing pha muramtheke, lia ne lua pha muramtheke, jabiing pha fuitheke doh ruii. <sup>7</sup> Ji è riig mage shii gu è miyaogam jia yoi ruii, Phithar, sieng mage ne hithek ua ne chie mage bo! <sup>8</sup> Ji è yao magungde, gu è yao din, Ithong wo! Gune achie ro, Iphey shii izea zen pha khuchung de gu sem è amin ba riig ro. <sup>9</sup> Din ne Hamangkhung è yao din ruii, Hamangkhung-aphuii è so zen jong phi phane zea rone anin din rabo. <sup>10</sup> Ji rey phane, uomchieng rey srane zab pha manatheke Hamangkhung hà yie din dun. <sup>11</sup> Ji è rey ched dang shii Khaesarea è thoh pha bran uom ne gu rai pha hò shii wuii thog ruii. <sup>12</sup> Ragung è gu shii akhijaii pha ithek rog shii wuii gieng pha yao ruii. Ichiuh um pha gu ijak migi noh pho riig de gu rog shii Khaesarea hà wuii gieng ne Khornelius hò shii ò wuii dun. <sup>13</sup> Ai è gathek shii, khi è rek ne Hamangkhung-aphuii pha hamangkhiie jia è ai hò moe shii riu ne yao pha ji yao phi, Jopha hà bran Tho ne Simon Phithar beng pha bran shii sow yi bo. <sup>14</sup> “Ai ne na nane na ro haliing pho shii ragia rey pha miyaogamtheke yao phi phro!” <sup>15</sup> Ji duine gu è jao ne yao ramuii shii, igobi gethek shii phi pha duine ithek shii de Ragung So phi pha doh ruii. <sup>16</sup> Ji è rek mage ne gune Ithong muyung pha miyao ji nowkhlei ruii: Jon ne kho è khowo phi bie phro, jishii, jimagunde nathek shii ne Ragung So è khowo mua ruii phro! <sup>17</sup> Hi è rek phane izai chak ro, Hamangkhung-aphuii ne Gaibrantheke shii de gethek è Ithong Isu Masi shii migi now mage ne lasen mua pha ji duine ò rek ne mua dun ro; ji arone, Hamangkhung-aphuii shii gak mua pha bran ne! Gune hanyie ga.

<sup>18</sup> Itheke è ji yoi mage ne Phithar shii makhak-riing arek sha pha Hamangkhung-aphuii shii laso phi ne yao, “Ji arone, Hamangkhung-aphuii è Gaibrantheke shii de awaitheke layog è thado riie ne dun yi srane idang sieng pha chua phi ara!”

### *Anthioch pha charch*

<sup>19</sup> Migipho hanyietheke è Stephen shii ua ne diig phi pha bliatheke è rum ne phoenisia, Khyphrus nane Anthioch hà yo ne rai dun pho è mua ji Jewtheke shii yao ne rai bie. <sup>20</sup> Jishii, giak migiphothek ne Khyphrus nane Khyrene è Anthioch hà wuii srane Gaibrantheke shii de Ithong Isu pha Mua Wie ji yao phi. <sup>21</sup> Ithong pha blu ne ithek rog shii um gieng ne bran bajothek de migi now gieng srane Ithong shii dun ruii. <sup>22</sup> Ji pha mua ne Jerusalem pha charch hà yoi thogmage ne Jerusalem pho è Barnabas shii Anthioch hà

thoh ge. <sup>23</sup> Ai è thiisa thog ne Hamangkhung-aphuii è ithek shii khinyama khirzey phi ne ruii pha ji riig srane bajo sang ne ithek shii yao, Ithong shii nawaithek è isie nane izai now ne rai bo. <sup>24</sup> Barnabas ne bajo wie pha bran ro. Ragung So è ley ne migi now pha bran ro. Ithong shii bajo brantheke migi now yi pha bran ro.

<sup>25</sup> Ji è yua marui ne Barnabas ne Tharsus hà Saul shii riig pha wuii dun. <sup>26</sup> Ai è Saul shii doh mage ne, ai è Saul shii Anthioch hà noh ne wuii noh ne ji pha idam ne Anthioch charch pha brantheke shii si ne yua ne rai. Masipho rone beng phane Anthioch charch shii beng ne jao bi.

<sup>27</sup> Ji pha ishak shii Jerusalem è chaig phothek de Anthioch shii wuii thog ruii. <sup>28</sup> Ji pha chaig phuii jia ne Agbus beng ro. Ai ne Luruak pha blu è riu srane yao, "Ichihih sohnyiak shii bajo chi-iy pha thog ramuii ro" (Ji pha diig cheo ne Khlaudius bisiu sieng pha ishak shii thog dun ro). <sup>29</sup> Samoythek è awaithek chung nung ne bang khinyama than mua pha ji than ne Judea hà rai pha migipho shii ren ge. <sup>30</sup> Ithek è ji è than srane bang ji ne Judea pha charch pha dukhothek shii Barnabas nane Saul wad è ren ge.

## 12

### *Bajo diig phi*

<sup>1</sup> Ji pha ishak shii ne Herod Saja ne charch pha migipho shii diig phi. <sup>2</sup> Ai è Jems, Jon pha ikhuii shii khamrii è wieg ne ua muii. <sup>3</sup> Ai è ji è rek phane Jewthek shii sang pha blia rek phi pha ji è, ai ne ibi wuii srane Phithar shii zum iang. (Ji rek pha ishak ne sai ne phiia ajie pha iweb chie pha inai shii rek phro.) <sup>4</sup> Phithar shii zum ched srane phatæg hà chab muii. Thiisa hà aishii ne ibrog wi rek ne wi wi dog pha Sandrithek shii phi ne riig yi. Herod è aishii ne Hiia dun pha ji sai inai shii limiangthek moe shii miyao sai pha noh. <sup>5</sup> Ji-è, Phithar shii ne phatæg hà chab ne ruii muii, jimagunde, charch pha brantheke è snak rek ne Hamangkhung-aphuii shii sia mage.

### *Phithar shii phatæg è khia*

<sup>6</sup> Herod è brantheke moe shii anoh ba pha ibi pha habiu shii, Phithar ne Sandri nyi duchoi shii men ne rai ramuii shii, aishii ne shiirnai nyi è joi srane Sandrithek de phatæg pha habin shii riu ne riig ba yi. <sup>7</sup> Hamblo shii, Ithong pha khliie jia è thiichihih phatæg pha ùgud shii khlieng chuang ne riu thogmage. Ji pha hamangkhliie è Phithar phaliing shii chong ne ho ne yao, "Khthiie sieng mage bo!" Ji è yao dang pha ji shii shiirnai ne Phithar wadthek è awailum ne sey ne chihih dun. <sup>8</sup> Hamangkhliie è yao, "Nawai rathang ring ne lakhiathek khia mage bo." Phithar de ji rek phi. Chihih è, hamangkhliie è yao din, "Nawai yung guii ne gu rog shii dun gieng bo." <sup>9</sup> Phithar de ai rog shii phatæg è fuang dun gieng, nyie de athieg pha rek gieng. Jimagunde, yangne hamangkhliie shii ji mirek ne izai phro è now ne rek gieng. Jitheke rek phane ai ne ibang bang ramuii ro è now ne rai. <sup>10</sup> Ai ne igobi pha Sandrithek Chihih è dinpha Sandri hà thog dun. Chihih è ji pha idoh pha gak shii chihih-è, idohhè ne ji pha rajan hà khud pha gak moe shii thog dun. Ji pha gak ne awailum ne hong phi. Ai ne fuang hà dun srane buzam pha lumuii jia hà luaramuii shii, ji pha hamangkhliie ne hamblo shii Phithar shii ji thoh marui ne sand dun.

<sup>11</sup> Ji è rey pha idoh Phithar è ai rog shii nyie rey dun pha ji than mage ne yao, "Gune thiegsha ro, hithek ne izai ro! Ithong è awai hamangkhliie shii

thoh ne gu shii Herod Saja pha blu nane Jewishthek pha bran è nyie now ne rek pha ji è thiigang phi ro.”

<sup>12</sup> Ji pha ishak than mage ne ai ne Mery, Jon Marg pha Amuii pha hò, bran brog khrab ne sia ne rai iang pha hò hà wuii thog dun. <sup>13</sup> Phithar è habin shii pheu ne ho mage shii, Rhoda beng pha khiao jia wuii thog ne chang ruii. <sup>14</sup> Ai è Phithar pha goh yoi mage ne bajo sang ne hò ahong bi phi pha iliang ran srane yao, Phithar ne fuang hà riu ne um ro. <sup>15</sup> Ithek è aishii yao, “Na ne ibiu ara!” Jimagunde, ai è ithek shii hi ne izai rone athodang pha yao. Ji-è, ithek de aishii chang, “Ji ne ai ro hamanghliie ro.”

<sup>16</sup> Ji è rek ne rai magungde, Phithar è athodang pha habin pheu ne ho. Idohhè shii ithek è habin ji hong ne riig mage shii, ithek è Phithar shii doh mage ne bajo wieng dun. <sup>17</sup> Ai è ithek shii aro yi pha wad è phrie ne yao. Chiih è, Ithong è aishii khi è rek ne phatgeg bucho è fuang noh phi phajithek zab yao phi. “Hi pha miyao ne Jems nane zab pha migipho shii de yao mage bo!” Ji-è yao marui ne ai ne ji pha ithua thoh marui ne gai ithua hà wuii dun.

<sup>18</sup> Ji pha thimiang riang rey din mage shii, thiisa hà Phithar shii nyie rey dun phlei è now ne zab Sandrithek ne bajo anomuluii pha rai dun. <sup>19</sup> Herod Saja è aishii sow yi pha yung, jishii, ithek è aishii adoh mua phi. Ji-è, Herod ne Sandrithek shii miyao sai srane ua muuii pha yao.

Ji è rek ched marui ne Herod ne Judea thoh srane Khaesarea hà inai luja rai pha wuii dun.

### *Herod iy dun*

<sup>20</sup> Herod Saja ne Thyre nane Sidon pha branthek shii bajo lijie dun. Ithek ne ò dog srane aishii riig pha wuii dun. Igobi shii ithek ne Blasthus, hanyie yi bohkhoh hò pha dumuii shii wuii srane ithek shii nong phi ne yao. Ji phado è ithek ne Herod Saja shii wuii srane lijiing rek phi pha lia, nyieliieshii, ithek soh shii ne chie niing phane ji pha Saja soh è yie bie phro.

<sup>21</sup> Gua pha inai shii Herod ne awai bohkhoh sungkho guui srane awai bohkhoh biang shii dug ne branthek shii miyao jia yao. <sup>22</sup> Branthek ziak ne yao, “Hi ne bran miyao asi pha jangbang miyao ro!” <sup>23</sup> Ji è rek dang pha ji shii, Ithong pha jishii è Herod shii thab ne thud yi, nyieliieshii, ai ne Hamangkhung-aphuii shii ilab aphi. Ai ne phuyunthek è chie ne iy dun.

<sup>24</sup> Ji è rek pha ishak shii de Hamangkhung-aphuii pha miyaogam ne athodang pha soh soh hà yoi ne rai dun.

<sup>25</sup> Barnabas nane Saul de awai sa shii boh pha bliathek rek ched marui ne Jon Marg shii noh ne Jerusalem è idoh dun thog din.

## 13

### *Barnabas nane Saul shii gua thoh*

<sup>1</sup> Anthioch pha charch hà de giak chaigthek nane masdothek um iang: Ithek ne Barnabas, Simeon (Isiie beng pha), Khyrene pha Lusius, Manaen (hanyie shii Badri Herod rog shii noh pha bran) nane Saul ro. <sup>2</sup> Ithek ne Hamangkhung-aphuii pha blia rek ne minyie nyie ne rai shii, Ragung So è ithek shii yao, “Gu blia rek pha Barnabas nane Saul hanyie shii gu è ho pha ji shii gua ne yo che mage bo.”

<sup>3</sup> Ithek è minyie nyie ne sia srane awaithek wad isa khrug shii khirzey phi ne thoh ge.

### *Khyphrus hà*

<sup>4</sup> Ragung So è wuii yi pha ji è Barnabas nane Saul ne Seleusia hà wuii thog srane dinne Khyphrus pha gachung rai ne run è in ne wuii din dun. <sup>5</sup> Ithek ne Salamis hà thogmage shii, isa è Hamangkhung-aphuii miyaogam ji Jewthek misiahò shii yao phi. Jon Marg de isa bliathek rek nong gieng ne um iang.

<sup>6</sup> Ithek ne Phaphos pha kho gachungthek dong ne wuii din shii, ithek è Bar-Jesus beng pha jadu rek pha bran, hanyie è awaishii chaigpho rone yao pha bran jia si ruii. <sup>7</sup> Ai ne ji pha gachung pha badri Sergius Phaulus, hanyie yi bajo khani um pha bran ijak ro. Ji pha badri è Barnabas nane Saul shii awai moe shii ho. Nyieliieshii, ai de Hamangkhung-aphuii pha miyaogam ji nuii pha now. <sup>8</sup> Jishii, isa shii ne Jadupho Elymas (Hi ne Grekh è beng pha ibeng ro) hanyie è badri ji shii migi now pha ji è ruang rek ne isa shii gidieg rek now. <sup>9</sup> Saul ne Phaul de beng shii Ragung So è ley dun rone thieg muui pha ji è gidieg rek now pha jaduphuii shii wie riig srane yao, <sup>10</sup> “Ibuii dufuii! Na ne zab wiethek pha suang ro, chiih-è, na ne zab khlam rek pha ji ro! Nane Ithong pha izai ji idang khlam rek ne rai pharek pha ji ro! <sup>11</sup> Ithong pha wad na shii kho ruii phro; na ne hanai pha muchuang ne inai lujia thog pha adoh phro.”

Ji è yao dang pha ji shii, Elymas pha mieg kham shii ne igiia è cheg dun. Ji è rey mage ne aishii chaing ne lua noh pha bran sow. <sup>12</sup> Badri è jithek rey pha doh mage ne bajo migi now dun. Nyieliieshii ai ne Ithong pha miyao ji yua pha ji è bajo anomuluii pha rey dun.

### *Anthioch nane Phisidia hà*

<sup>13</sup> Phaul nane ai ijakthek ne Phaphos è Pherga pha phamphylia rajan shii run è in ne wuii thog ruii shii, thiichiih shii Jon Marg è ithek shii thoh marui ne Jerusalem hà dun din dun. <sup>14</sup> Ithek ne Pherga è de wuii dinne Anthioch pha Phisidia hà wuii thog srane Jewish Thung pha Inai shii ithek ne Jewthek misiahò hà wuii srane dug dun. <sup>15</sup> Moses pha Iphey nane chaigpho mizey marui pha jigigam jithek tham ched shii Jewthek misiahò pha dumuii è mua jia thoh: “Khuinothek wo! Nathek shii mua nane chua gang pha miyao yao pha um arone, branthek shii yao mage bo.” <sup>16</sup> Phaul è jai srane wad è phriie ne jao pha yao:

“Gu ijak Israelthek nane zab pha Gaibrantek wo!” Hanyie è Hamangkhung-aphuii shii sia pho wo! Gu miyao hi nuii mage bo! <sup>17</sup> Israel pha bran ro Hamangkhung-aphuii gethek blangthek shii gua ne chiih-è gu Egyph hà fuang pha bran duiine rai pha ishak shii boh soh pha bajo bran rab jong ro. Hamangkhung-aphuii pha blu è ithek shii Egyph è de fuang khia ne noh phi ro, <sup>18</sup> Chiih è, idam sawi thog dang pha ai ne zud ne ithek rog shii balimuang hà rai gieng. <sup>19</sup> Ai è Khanon pha soh mile pho shii mua ne awai branthek shii ji pha soh pha Ithong rab ne ruii phi. <sup>20</sup> Hithek zab rey phane idam wieng wi è saguii (450) chia dun ro.

“Hi pha idoh è ai ne chaig Samuel sieng pha doh thog dang pha chua ne rai gieng. <sup>21</sup> Chiih è, ithek è saja zen yi pha lia mage shii, Hamangkhung-aphuii è Khish pha dufuii, Benjamin pha jad è giak pha Sual shii ithek saja rey ne idam sawi koh yi. <sup>22</sup> Hamangkhung-aphuii è aishii thoh din srane Dawid shii saja rab din phi. Hi ne ai Chiang è Hamangkhung-aphuii miyao: ‘Gune Jese pha dufuii Dawid ne gu è chid pha bran ji doh muui ro, gu è nyie rek bo ne phi pha ji rek phi pha bran jia ji ro.’ <sup>23</sup> Hi ne Isu ro, Dawid pha riing, hanyie shii Hamangkhung-aphuii è Israel pha branthek shii ragia rek

ne sbang rek phi pha bran ji ro. <sup>24</sup> Isu è awai blia arek ba pha ibi shii, Jon è Israel pha brantheek shii awaithek layog è idoh khid mage bo ne khowo yie mage pha yua ne rai iang. <sup>25</sup> Chiih è, Jon è awai bliathek rek ched sha pha rey mage shii, brantheek shii sai, ‘Nathek ne gu shii hanyie rone now lei? Gune nathek è khan pha bran ji asi ro. Jishii, nuui mage bo! Ai ne gu idoh shii wuiiramuii ro, gune ai lakhia de ai lai è athan mua phi phro.’

<sup>26</sup> “Gu ijak Israeltheek wo, Abraham pha riingtheek nane zab pha Gaibrantheek ichiih shii hanyie è Hamangkhung-aphuii shii sia photheek: Giawo hì mua ne gethek Chiang thoh dun ro! <sup>27</sup> Jerusalem shii rai pho nane thiichiih shii dumuii rek photheek ne ai ne giawo rek pha ji rone athieg ro, chiih-è, ithek ne chaigtheek pha miyaogamtheek ne Jewish Thung pha Inai shii idang tham ne rai magungde jithek pha miyao agao ro. Jishii, ithek è Isu shii layog nin ne chaigtheek miyaogamtheek ji izai rey yi dun ro. <sup>28</sup> Ithek è Isu shii ua mua pha nyie ichiih chun pha adoh habuii shii ithek è Philath shii aishii ua yi pha lia. <sup>29</sup> Jigigam shii zey pha duiine ithek è zab rek ched pha idoh shii ithek è bai è thazam khia srane lubao cho pha wieng shii wieng muui. <sup>30</sup> Jishii, Hamangkhung-aphuii è aishii hòi din yi srane <sup>31</sup> bajo inai thog dang pha hanyiethek ne ai rog shii Galili è Jerusalem thog pha luangieng pho shii dong ne doh yi. Ithek ne sudoh Israel pho shii khagi re mua ro. <sup>32-33</sup> Gathek de ichiih shii ji pha Mua Wie yie ne wuii ro: Hamangkhung-aphuii è gethek pha blangtheek shii rek pha rone sbang rek marui pha ji sudoh Isu hòi din yi ne ithek riingtheek è gethek shii rek jong phi ro. Sthun shii zey pha duiine, “Na ne guro Dufuii ro; sudoh gune na Aphuii rey jong ro.”

<sup>34</sup> Hì ne Hamangkhung-aphuii miyao ro, ai ne iy pha è de hòi dinne airo iy pha siu ne wieng shii ashong phro:

“Gu è Dawid shii sbang rek pha ji duiine

Gune na shii giang pha nane izai khirzey jithek phi ruii phro.”

<sup>35</sup> Gai shii de zey pha duiine,

“Na ne nawai khiao isiie shii khuchung magungde wieng shii shong pha api phro.”

<sup>36</sup> Dawid ne awai ishak shii Hamangkhung-aphuii pha bliathek rek marui ne iy dun. Ai iy ne awai blangtheek rog shii wieng phi, chiih-è, airo iy pha siu ne wieng shii shong dun. <sup>37</sup> Jishii, Hanyie shii Hamangkhung-aphuii è hòi din yi pha ji shii ji arey ro. <sup>38-39</sup> Gu ijak Israel thek wo! Isu è gethek layogtheek khung pha mua ne nathek shii yao ro; chiih-è, hanyie aishii migipho ne Moses pha Iphey è de layog ruang arek mua phi pha layogtheek ruang rek phi ro. <sup>40</sup> Chaigtheek miyao ji nathek shii arey yi pha nowbthan ne rai bo:

<sup>41</sup> “Lawas dai pho wo! Anomuluii pha iy dun bo!”

“Sudoh gu è nyie rekramuii pha ji ne

hanyie bran è nathek shii yao magungde

nathek ne migi anow ro!”

<sup>42</sup> Phaul nane Barnabas ne Jewtheek misiahò ji thoh ne dun ramuii shii, brantheek è isa shii din pha Jewish Thung pha Inai shii wuii ne ji pha miyaothek wie yao din bo ne ho gieng. <sup>43</sup> Brantheek è maley ji thoh ne dun ched shii, Phaul nane Barnabas rog de Jewtheek nane Judaism hà lai dun pha Gaibrantheek de luangieng. Guaphasamoy è ithek shii yao marui, chiih-è, ithek shii Hamangkhung-aphuii pha bushun shii athodang pha sieng ne rai bo ne yao marui.



<sup>44</sup> Din pha Jewish Thung pha Inai shii zab brantheke ne bajrai jia shii Ithong pha miyaogam nuui pha wuii thog ruui. <sup>45</sup> Jewtheke è ji pha bran brog um pha doh mage ne mieg riie srane aishii khnaing ne makhak-riing rek noh. <sup>46</sup> Jishii, Phaul nane Barnabas è gang rek ne yao din “Hamangkhung-aphuii pha miyaogam ne igobi nathek shii yao bi chid phro.” Jishii, nathek è hì ne snai muui ne nawaithek shii idang chai rey pha ji shii wie anow phi pha ji è gathek ne nathek shii thoh marui ne Gaibrantheke shii wuii dun phro. <sup>47</sup> Hamangkhung-aphuii è gethek shii hì pha Iphey phi ne ruui:

“Gu è na shii ne Gaibrantheke pha muchuang rab jong ro”

“Ji-è, sohjambling pho de zab ragia nyarey mua phro.”

<sup>48</sup> Gaibrantheke è ji yoi mage shii bajo sang ne Ithong pha miyaogam ji shii bajo laso phi; chiih-è, hanyie shii idang sieng pha migipho rey dun.

<sup>49</sup> Ithong pha miyaogam ne ji pha ithua shii de zab yoi ched dun. <sup>50</sup> Jishii, Jewtheke è ji pha rajan shii kho pha hò-aphuiitheke nane hò-amuiitheke, hanyiethek ne giangtheke shii hòi ne lijieg yi. Itheke è Phaul nane Barnabas shii diig phi srane ithek ithua ji è fuang khia maphi. <sup>51</sup> Guaphasamoytheke è awaithek lai pha nyiakphlab kham srane ithek shii gidieg rek marui ne Ikhonium hà wuii dun. <sup>52</sup> Anthioch shii migiphotheke ne bajo lubo nane Ragung So um dun.

## 14

### *Ikhonium hà*

<sup>1</sup> Ikhonium hà de ji è rey dun: Phaul nane Barnabas ne Jewtheke misiahò hà wuii srane bajo boh ji yao mage ne Jewtheke nane Gaibrantheke de bajo migipho rey dun. <sup>2</sup> Ji è rey magungde, Jewtheke, hanyie è migi anow pho ne, Gaibrantheke shii hòi noh ne migipho shii buii rek dun. <sup>3</sup> Guaphasamoy ne thiichiih shii inai bajo rai marui ne ithek è Ithong pha miyao ne bajo gang è yao ne, hanyie ai pha bushun ne izai rone doh yi pha ithek shii blu phi ne buangtheke nane anomuluiitheke pha bliatheke rek mua pha blu phi ne doh yi. <sup>4</sup> Ji pha rajan pho ne che dun: Giak ne Jewtheke rog dog dun, giak ne guaphasamoy rog dog dun.

<sup>5</sup> Chiih è, giak Gaibrantheke nane Jewtheke ne ilkhi rek pho rog shii dog srane guaphasamoy shii buii rek ne lubao chao pha nung rai.

<sup>6</sup> Guaphasamoy è ji thieg mage ne ithek ne Lysthra nane Derbe pha rajan pha Lykhoania ithua nane thiichiih nui um pha soh hà yo dun. <sup>7</sup> Thiisa hà de ithek è Mua Wie ji yua marui.

### *Lysthra nane Derbe hà*

<sup>8</sup> Lysthra hà giak dang bchiih è alua mua pha laikhi-èk bran jia um iang. <sup>9</sup> Ai de thiichiih shii Phaul miyaogamtheke ji nuui ne dug ne rai gieng. Phaul è ji doh mage ne aishii gang mua phi pha izai rek, ji-è, Phaul è aishii wie riig <sup>10</sup> srane gang rek ne yao, “Nawai lai è miang riu mage bo!” Ji pha bran de luang jia biung srane jao ne lua dun. <sup>11</sup> Bran brog è Phaul è nyie rek phi pha ji doh mage ne Lykhanaonian nyuak è ziak ne yao, “hamangkhung-aphuii ne bran rey srane ichiih gethek shii wuii thog ro!” <sup>12</sup> Itheke è Barnabas shii Zeus beng ne ruui, chiih-è, Phaul ne Hermes beng ne ruui, nyieliieshii Phaul ne miyao yao pha kho ji ro. <sup>13</sup> Misiahò ne ji pha bajrai pha fuang hà um pha jangbang Jew pha phabi è zid pha suwuiiphuii nane awaithek ibuatheke yie ne gak shii wuii thog ruui. Nyieliieshii, ithek ne guaphasamoy shii khlem pha now dun.

<sup>14</sup> Barnabas nane Phaul è ithek ne isa shii nyie rek phi sha pha surui ramuui pha ji yoi mage ne awai sa yung ji srane bran brog duchoi hà ran srane ziaik ne yao, <sup>15</sup> “Nathek ne gasa shii nyie rek pha saro phlei? Gasa de bran bie ro. Gasa ne ichiuh ithek shii sohnyiak pha thaluu è rai ne isieng Hamangkhung-aphuui, hanyie è hamangkhung hì, soh hì, khamuui hìthek, chiuh-è zab zen phi pha ji shii dun din yi pha Mua Wie ji yao pha wuii bie phro. <sup>16</sup> Buyo shii ne, ai è awai brantheek shii awaithek lumuui shii lua yi dun. <sup>17</sup> Jishii, ai-è, ai um rone doh yi pha wie bliathek rek phi: Ai ne hamang è haphie de ishak shii phie yi, chiuh-è, misiengtheek de ishak shii sieng yi, ai è ithek shii chie pha phi srane sang pha phi ne ruui.” <sup>18</sup> Jithek pha miyaogamtheek è guaphasamoy ne brantheek shii suwuii ua ne azid yi pha rek ne gak mua bie.

<sup>19</sup> Giak Jewtheek ne Anthioch pha Phisidia nane Ikhonium è de thiichiih wuii thog mage; ithek ne bran brog yi awaithek hà yang srane Phaul shii lubao chao srane ji pha bajrai è fuang hà khia muui, nyieliieshii ithek è ai ne iyjong dun ara è now ne fen muui. <sup>20</sup> Ji è rek magungde, migiphothek è ai moe shii shan ne riu mage shii ai ne sieng din srane ji pha bajrai hà dun din dun. Ji pha thimiang duine è rey mage shii ai nane Barnabas ne Derbe hà wuii dun.

### *Anthioch nane Syria hà dun thog din*

<sup>21</sup> Phaul nane Barnabas è Derbe hà Mua Wie ji yao mage ne bajo samoytheek mua dun. Ji è rek ched marui ne isa ne Lysthra, Ikhonium nane Anthioch pha Phisidia hà wuii dun. <sup>22</sup> Ai è migiphothek shii chuh rek phi ne chiuh-è ithek shii lububo rek phi ne migi now ne izai now ne athoh pha rai yi pha yao phi. Ai è yao, “Gethek ne Hamangkhung-aphuui pha zab riichai hà khud phane bajo diig hà chid phro.” <sup>23</sup> Ai è khinyama pha charchtheek um pha shii ne charch pha dukhothek ne sia ne minyie de nyie srane hanyie shii isiie now pho shii Ithong pha blia rek yi pha boh ne thoh marui.

<sup>24</sup> Phisidia pha soh dong ne wuii ched marui ne isa ne Phamphylia hà wuii thog dun. <sup>25</sup> Thiisa hà isa è ji pha mua ne Pherga hà yao marui srane Athalia hà wuii dun. <sup>26</sup> Chiuh è, isa ne thiisa è de dinne run shii in ne Anthioch hà, khi hà ithek è Hamangkhung-aphuui pha bushun è blia phi pha ji rek ched yi pha ithua hà dun thog din. <sup>27</sup> Ai Anthioch dun thogmage shii, isa è charch pha brantheek shii khrab ne Hamangkhung-aphuui è isa rog shii nyie rek gieng nane khi-è rek ne Gaibranthek de migi now yi pha lumuui hong phajithek yao phi. <sup>28</sup> Chiuh è, isa de thiichiih shii migipho rog shii inai bajo rai marui.

## 15

### *Jerusalem shii limiang jung*

<sup>1</sup> Judea è Anthioch shii wuii ruui pha bran giak è migiphothek shii yua, “Moses mizen marui pha Iphey duine miang-akheg sapho shii ne nathek ne ragia arey phro.” <sup>2</sup> Phaul nane Barnabas ne ji pha Chiang è ithek rog shii bajo khnaing noh, ji pha Chiang ithek ne Phaul nane Barnabas chiuh-è, Anthioch shii um pha Gaibranthek de ji pha miyao che ne riig yi pha Jerusalem hà rai pha guaphasamoy nane dukhothek shii wuii ge pha nung rai.

<sup>3</sup> Charch phothek è ithek shii ji hà wuii pha thoh ge, ji è wuii dun shii, Phoenisia nane Samaria hà de Gaibranthek shii de khi-è rek ne Hamangkhung-aphuui shii migi now dun pha ji phosro phi; ji pha mua è

migipho shii bajo sang thog dun. <sup>4</sup> Ithek è Jerusalem hà wuiithogmage shii, ithek è Hamangkhung-aphuii è khi-è rek ne ithek rog shii bliá rek phi pha ji yao phi pha charch pho, guaphasamoy, nane dukthothek è wie wuii yi, chiih-è ithek è yao. <sup>5</sup> Jishii, giak migipho, hanyiethék ne Pharisithék rog dog dun pho è wuii srane yao, “Gaibranthék de miangiangkheg chid ne Moses pha Iphey ji nuui ne rai pha yao chid phro.”

<sup>6</sup> Guaphasamoy nane dukthothék ò maley jung srane ji pha miyao ji che ne yao. <sup>7</sup> Bajo phiang khnaing rai pha idoh è Phithar è jai srane yao, “Gu khuiinothék wo! Nawaithek de thieg iwa, gu shii de Hamangkhung-aphuii è buyo è nathek duchoi Gaibranthék è ashii Mua Wie hì yao phi pha gua ne ruii phro. Ji-è, ithek de yoi ne migi now dun phro. <sup>8</sup> Chiih è, Hamangkhung-aphuii, hanyie è branthék muno thieg pha ji è Gaibranthék shii de gua ne gethek shii phi pha duiine Ragung So phi ne ruiijong ro. <sup>9</sup> Ai è gethek nane ithek duchoi shii nyie yoi pha rabjong ro; ai è ithek layogthék shii de khung jong phi ro, nyieliieshii, ithek de aishii migi now dun. <sup>10</sup> Ji-è, nathek ne nyie rek ne Hamangkhung-aphuii è chai yi ne migipho shii khuchung de gethek nane gethek riingthék è de ahan mua pha diig phi ne han yi pha now nebey? <sup>11</sup> Asi! Gethek è migi now mage shii Ithong Isu pha bushun è ithek shii mua dun pha duiine gethek shii de ragia rey dun ro.”

<sup>12</sup> Barnabas nane Phaul è Hamangkhung-aphuii è buangthék nane anomuluii pha bliathek ne Gaibranthék shii rek phi pha phosro ji yao pha yoi ne zab aro pha rey dun. <sup>13</sup> Ithek è ji yao ched mage shii, Jems de yao ruii: “Gu khuiinothék wo! Gu miyao de nuui mage bo!” <sup>14</sup> Khi è rek ne Hamangkhung-aphuii è igobi Gaibranthék shii de awai branthék duchoi è yie srane khagi rek phi pha ji Simon è yao jong pha duiine izai chak ro.

<sup>15</sup> Chaigpbothék miyaogamthék ne hithék shii izai dunmey ro. Jigigam shii zey pha duiine ro,

<sup>16</sup> “Ithong è yao muui ro, hì phado è gune wuii din ruii phro,”

Chiih-è Dawid khoh pha riichai ne rab din phi phro.

Gune chui dun pha ji ne

rab phi ne gang rek din phi phro.

<sup>17</sup> Ji-è, khinyama pha branthék um phane gu shii wuii ruii phro,

Gaibranthék, hanyie shii gu è ho pho ne guro bran ro.

<sup>18</sup> “Ji-è, Ithong è yao, buyo shii ai miirab ne hì thieg yi phane hì ro.”

<sup>19</sup> Jems è athodang pha yao, “Hi ne gu munow ro, gethek ne Gaibranthék de hanyie Hamangkhung-aphuii shii idoh dun din ramuii pho shii diig aphi chid phro. <sup>20</sup> Hi è rek pha Chiang ne, gethek ne ithek shii jangbang shii sud ne izea nin jong pha khinyama chie pha um phajithek achie yi pha, chiih-è, siulao rek pha ji è ruang rai yi pha, chiih-è, yua rib ne ua pha ibey nane ifai achie yi pha jigigam jia zey ne thoh chid phro. <sup>21</sup> Nyieliieshii, Moses pha Iphey ne Jewthék misiahòthék shii Jewish Thung pha Inai shii buyo è tham ne rai ramuii ro, chiih-è, ai miyaogamthék ne khinyama bajrai um pha jihà de yao ne rai jong ro.”

### *Gaibran migipho shii jigigam*

<sup>22</sup> Ji-è, guaphasamoy nane dukthothék è charch pho rog dog srane giak bran shii gua srane Anthioch hà Phaul nane Barnabas rog shii thoh ge pha nung rai. Ithék è hanyie shii migipho è bajo ilab phi pha bran nyi, Judas Barsabas beng pha nane Silas shii gua <sup>23</sup> srane ithek shii zey pha jigigam ji phi ne thoh ge:

“Gathek ne guaphasamoy nane dukthothek è hanyie Anthioch, nathek pha khiinothek è, Syria nane Khilisia hà rai pha Gaibrantek pha è giak pha khiinothek shii salam yao ne thoh ge ro. <sup>24</sup> Gathek è yoi muui ro, gathek è che ne wuii dun pha giak bran è ithek shii ithek miyao è diig nane duhog rek yi dun ro; ithek shii ne gathek muyung asi ro. <sup>25</sup> Ji-è, gathek ne ò si rai srane zab è nung ne giak muaphothek shii gua ne ithek shii thoh ge ro. Itek ne gethek wie ijak Barnabas nane Phaul wuii pha ro <sup>26</sup> hanyiethek è awaisa chai ne Ithong Isu Masi pha blia shii iy dang yi pha phi muui pha rog shii wuii ruii phro. <sup>27</sup> Gathek è nathek shii Judas nane Silas shii thoh ne yao yi, hanyie è nathek shii jigigam shii zey pha duiine yao ruii ro. <sup>28</sup> Ragung So nane gathek zab ne nathek shii gai miihan ahan yi pha zey pha Ipheythek phi bie phro: <sup>29</sup> Jangbangthek shii zud pha michie achie rabo; chiih-è ifai de achie rabo, chiih-è yua rib ne ua pha ibey de achie rabo; siulao pha lumuii è ruang rai bo; nathek è ji pha Ipheythek shii wie nuii ne rek ne rai arone, nathek ne wie rey ruii phro. Hi nawaithek wie pha ji ro.”

<sup>30</sup> Ji pha hamangkhiiethek ne thoh ne Anthioch hà wuii thog dun. Thiisa hà zab migipho khrab pha ji shii ji pha jigigam ithek shii phi. <sup>31</sup> Brantek è ji tham mage shii, ji pha boh rek yi pha mua è ithek shii bajo sang yi ro. <sup>32</sup> Judas nane Silas, hanyie ne chaigpho rone ho pha nyi è de ithek shii bajo ishak thog dang pha yao ne lububo rek phi ne chiih-è gang rek phi. <sup>33</sup> Thiisa hà lujia ishak thog pha rai marui ne migipho è isa shii liijiing rek srane thoge ne hanyie è ithek pha ji hà thog din. <sup>34</sup> Jishii, Silas ne thiichiih rai pha phak dun.

<sup>35</sup> Phaul nane Barnabas de Anthioch hà ishak lujia thog pha rai marui srane Gaibrantek shii de Ithong pha miyaogam ji yua ne yao marui.

### *Phaul nane Barnabas chedun*

<sup>36</sup> Ishak lujia rey pha idoh shii Phaul è Barnabas shii yao, “Cho ginyi ne idoh dun srane ginyi è khinyama pha bajaraithek shii dong ne miyaogam yao ne yua marui pha khiinothek shii wuii dinne riig sharai, chiih-è, ithek ne khi-è rek ne sieng ramuii ga ji riig wuii sharai haro.” <sup>37</sup> Barnabas ne Jon Marg shii de isa rog shii noh ruii pha now, <sup>38</sup> jimagunde, Phaul ne ji rek phane wie anow, nyieliieshii, ai ne isa rog shii blia ajong ched ba shii Phamphylia hà isa shii thoh marui ne idoh dun din dun. <sup>39</sup> Ji è rek mage shii, thiichiih shii isa chung khnaing riie ne che dun: Barnabas è Jon Marg shii noh ne Khyphrus hà rai ne run shii in ne dun dun, <sup>40</sup> Phaul de Silas shii gua srane ji pha ithua thoh marui ne dun dun, migipho è Ithong pha bushun lia srane thoh ge. <sup>41</sup> Ai ne Syria nane Khilisia dong ne lua srane charchtek shii gang rek marui.

## 16

### *Thimothi è Phaul nane Silas rog shii wuii gieng*

<sup>1</sup> Phaul ne Derbe nane Lysthra, ji hà Masipho pha Timothy beng pha bran jia um iang pha ithua hà luajong. Ai amuii ne migipho pha bran ro, chiih-è, Jewish è giak pha bran, iphuii ne Grekh pha bran ro. <sup>2</sup> Lysthra nane Ikhonum pha migipho ne Thimothi shii bajo wie chiong. <sup>3</sup> Phaul è Thimothi shii ai rog noh ruii pha now ne ai è aishii miangiangkheg phi. Ai è ji rek phi phane, nyieliieshii, jithek hà rai pha Jewthek ne Thimothi iphuii ne Grekh rone thieg dun. <sup>4</sup> Itek jithek pha bajrai dong ne lua srane migipho shii

Jerusalem shii guaphasamoy nane dukhothek è nung ne Iphey rab pha ji yao phi, chiih-è, ithek shii ji pha Iphey nuui ne rai pha yao marui. <sup>5</sup> Ji-è, charchthek ne migi now phane bajo gang rey dun, chiih-è, migipho de inai tham ne bajo rey dun.

### *Throas hà: Phaul è ibang bang*

<sup>6</sup> Itek ne Phrygia nane Galathia pha ithuathek è lua ne rai dun, nyielieshii, Ragung So è ithek shii Asia du-ùa pha mua ayao yi. <sup>7</sup> Itek è Mysia pha soththug thogmage shii, ithek è Bithynia du-ùa hà wuii dun pha saro shii, Isu ro Ragung è ithek shii awuii yi. <sup>8</sup> Ji-è, ithek ne ji nuui ne Mysia hà dong srane Thoas hà wuii dun. <sup>9</sup> Ji pha habiu dang shii, Phaul è ibang jia bang ruii, Mesidonia pha bran jia è riu srane aishii khung ne yao ruii, “Mesidonia hà wuii srane gathek shii de nong rek phi bo!” <sup>10</sup> Phaul è ji pha ibang nyabang ched dang shii Mesidonia hà wuii pha surui dun, nyielieshii, gathek è nung jong ro, Hamangkhung-aphuii è gathek shii thiisa hà ji pha brantheek shii de Mua Wie ji yao yi pha ho phro.

### *Philipi hà: Lydia ne lai dun*

<sup>11</sup> Gathek ne Thoas è run shii in ne Samothrase hà thog dang pha miang wuii dun. Chiih è, ji pha thimiang duine Neapholis hà thog dun. <sup>12</sup> Thiisa è de gathek ne Philipi pha soh khung ithua è Mesidonia pha rajan pha jila, hi ne Roman pho rai pha ithua hà wuii thog dun. Gathek ne thiichiih shii de inai bajo rai marui. <sup>13</sup> Jewish Thung pha Inai shii gathek ne ji pha rajan è fuang khia ne kho ring hà wuii dun, gathek è hi è now ne wuii dun, thiisa hà Jewthek khrab ne sia pha ithua um iwa. Gathek è dug srane thiichiih wuii pha hò-amuii phiing shii de mulo marui. <sup>14</sup> Thiichiih shii hò-amuii jia nuui gieng phane Thyathira pha Lydia, yung chong rek pha hò-amuii ji ro. Ai ne Hamangkhung-aphuii shii sia ne rai pha hò-amuii ro, ji-è, Hamangkhung-aphuii è aishii hong phi ne Phaul è nyie yao ramuii pha ji wie nuui yi. <sup>15</sup> Ai nane ai haliing photoek khowo yie ched mage shii ai è gathek shii awai hò hà ho, “Nathek è gu shii de Ithong pha izai migi now pha bran è now arone, thawuii ne gu hò shii rai mage bo.” Chiih-è ai è gathek shii khung ne wuii yi.

### *Philipi pha phatæg hà*

<sup>16</sup> Inai jia shii gathek ne sia pha ithua shii wuii thog mage shii, gathek è ibuii ragung um ne phariang pha miyao yao pha khiao jia si ruii. Ai ne phariang pha miyao yao ne Ithongthek shii bang bajo wiang phi. <sup>17</sup> Ai de Phaul nane gathek rog shii luagieng ne ziak ne yao, “Hiitek pha bran ne bajo giu pha Hamangkhung-aphuii pha khiaotheek ro! Itek nathek shii nathek khi è rek ne ragia mua ruii pha ji yao ramuii ro!” <sup>18</sup> Ai è ji è rek ne rai phane inai bajo rey sha dun, Phaul è zo ne idoh riie srane ji pha ragung shii giung ne yao, “Isu Masi beng è na shii giung dang phro, ji pha bimì è na ne fuang khia mage bo!” Ji è giung dang pha ji shii ji pha ragung de fuang khia dun. <sup>19</sup> Ji pha kheaò è ji pha Ithong è ithek bang rab pha jo oi pha rey dun pha thieg mage shii, ithek è Phaul nane Silas shii zum srane brantheek um pha ithua shii blu rek pho shii phi muui. <sup>20</sup> Itek è Roman pha dumuii moe shii noh srane yao, “Hiitek pha bran ne Jewthek ro, ithek è gethek pha rajan shii diig rekramuii ro. <sup>21</sup> Itek è Iphey yua pha ji ne gethek Iphey ji shii adunmey pha yua ramuii ro, gethek ne Roman pha brantheek ro, ji è gethek ne ji pha

Iphey ne ayie mua phro.” <sup>22</sup> Ji è rek mage ne bran brogthek de dog srane Phaul nane Silas shii mak rek gieng.

Chiih è, ji pha dumuii è Phaul nane Silas ro yung ji srane zuang yi pha yung. <sup>23</sup> Bajo awie dang pha zuang ched ne isa shii phattheg bucho hà chab muui srane phattheg pha dumuii ji shii wie thiigang ne ruii bo ne yung ge. <sup>24</sup> Ji yung pha yoi mage ne ji pha phattheg pha dumuii è isa shii bucho dang pha phattheg hà chab srane isa lai ne hingbang boh nyi duchoi shii phang ne ruii muui.

<sup>25</sup> Ji pha habiu duchoi shii Phaul nane Silas ne Hamangkhang-aphuii shii sia ne ibai bai ne rai, chiih-è phattheg phothek de isa ibai ji nuii ne rai ramuii shii, <sup>26</sup> Hamblo shii, thiichiih shii boh sajiid jia sham ruii ne phattheg pha sarongthek de zab sham dang dun. Ji è rek dang pha ji shii ji pha phattheg pha habintheck de awailum ne hong dun, ithek shii joi pha shiirnathek de awailum ne sey ne chiih dun. <sup>27</sup> Phattheg pha dumuii ji de than ne sieng mage shii, phattheg pho pha habintheck ne hong ne um iang pha doh ruii, ai è now, phattheg pho ne zab yo dun ara! Ji-è ai ne awai khamriie phiang khia srane awaishii ua pha rek. <sup>28</sup> Jishii Phaul è gang ziaak ne yao mage, “Nawaishii diig aphii chid rabo! Gathek ne zab ichiih shii um ro!”

<sup>29</sup> Phattheg pha dumuii ji è bai chuang pha yung mage ne bucho hà ran srane Phaul nane Silas lai moe shii sham ne chiih ne khung phi. <sup>30</sup> Ji phado è ai è ithek shii fuang dun yi srane sai, “Masdothek wo! Gu de ragia rey pha nyie rek chid phlei?”

<sup>31</sup> Ai è chang, “Ithong Isu shii migi now mage bo, ji-arone na nane nawai haliing pho de ragia rey ruii phro.” <sup>32</sup> Ai è ai nane ai haliing phothek shii de Ithong pha miyaogam yua phi. <sup>33</sup> Ji pha habiu dang shii ji pha phattheg pha dumuii ji è isa shii noh ne isa saduii ji shud phi; ji è rek ched ne ai nane awai haliing phothek de khowo yie dang gieng. <sup>34</sup> Ji è rek ched ne ai è Phaul nane Silas shii awai hò hà noh srane michie phi ne chie yi. Ai nane ai haliing phothek ne bajo sang dun, nyieliieshii ithek de sudoh è Hamangkhang-aphuii shii migi now mua dun.

<sup>35</sup> Ji pha thimiang duiine è rey shii Roman pha blu rek pho è magashaig ophispho rog shii, “ithek shii thoh ge bo” è yao ne mua thoh ruii.

<sup>36</sup> Ji-è, ji pha phattheg pha dumuii ji è Phaul shii yao, “Blu rek pho è nasa shii thoh ne dun yi pha mua thoh ro. Ji è nasa ne ichiih thoh ne liijiing rek ne dun shabo.”

<sup>37</sup> Ji è yao phi magungde, Phaul è ji pha magashaig ophisphothek shii yao din, “Gathek shii nyie ichiiig nane suruii adoh habuii shii ithek è gasa shii brantheck moe shii zuang, chiih-è gasa de Roman pha bran habuii shii ithek è gasa shii phattheg hà fen muui. Ji-è, ithek ne gasa shii bran athieg yi pha ug ne thoh pha rek ara. Hì è rek phane arey phro! Roman pha ophispho awaithek ichiih wuii srane gasa shii thoh yi chid phro.”

<sup>38</sup> Ji pha Magashaig ophisphothek è ji pha miyaogamthek yi Roman pha dumuii shii phosro din phi; ithek è Phaul nane Silas ne Roman pha bran rone yoi mage ne bajo rum dun. <sup>39</sup> Ji è ithek ne thiisa hà wuii srane isa shii khung ne isa shii phattheg è fuang khia ne ji pha rajan thoh ne dun pha yao phi. <sup>40</sup> Phaul nane Silas è ji pha phattheg è fuang khia ne Lydia pha hò hà dun dun. Thiichiih shii isa è migipho shii si srane boh noh yi pha miyaogamthek yao marui ne dun dun.

## 17

*Thesalonikha hà*

<sup>1</sup> Phaul nane Silas ne Amphipholis nane Apholonia è dong ne lua srane Jewthek misiahò jia um pha Thesalonikha hà wuii thog dun. <sup>2</sup> Idang duiine Phaul è Jewthek misiahò hà wuii dun. Thiisa hà de Jewish Thung pha Inai uomchieng rey srane brantheke rog yao rai ne <sup>3</sup> jigigam ji pha miyao yao phi ne Masaiya ne diig rek chid phro, chiih-è, iy pha è de hòì dìn phro. Phaul è ithek shii ziake ne yao, “Gu è nyie yao pha Isu hì ne Masaiya ji yao.” <sup>4</sup> Itheke de Phaul miyao ji nuuie ne Phaul nane Silas rog dog gieng; ji-è, ilkhi rek pha hò-amuiitheke nane Grekh pha bajo ibrog hanyie è Hamangkhang-aphuii shii sia ne rai pho de ithek rog dog gieng.

<sup>5</sup> Ji è rek magungde, Jewthek ne miegriie mage ne bran buiitheke shii lumuii è khrab srane gidieg rek pha dog yi. Itheke ne zab rajan pho shii srobro ziake srane Jasan rone beng pha hò shii jo ne buii rek ne, Phaul nane Silas shii sow ne fuang hà brantheke moe shii ri ne noh pha wuii dun. <sup>6</sup> Jishii, ithek è Phaul nane Silas shii adoh phi, ji è ithek ne Jasan nane migi now pha gaithek shii zum ne ji pha rajan pha blu rek pho shii noh srane ziake ne yao, “Hiitheke bran ne zab pha ithua shii diig phi muui ro! Chiih è, sudoh ichiih gethek rajan shii wuii thog ro, <sup>7</sup> chiih-è, Jasan è jithek pha bran shii awai hò shii rai yi ro. Itheke è Bisiu pha Ipheytheke chui yi srane gai saja jia um rone yao muui ro, ji pha saja ne Isu beng rone yao ro.” <sup>8</sup> Ji pha miyaogamtheke yao mage ne bran brog nane ji pha rajan shii blu rek pho ne bajo lijieg dun. <sup>9</sup> Ji pha blu rek pho è Jasan nane gaithek shii awaithek shii thoh ne dun yi pha bang phi yi pha rek muui.

*Berea hà*

<sup>10</sup> Ji pha habiu thog dang shii migiphotheke è Phaul nane Silas shii Berea hà thoh ge. Ai è thiisa hà wuii thog srane Jewthek misiahò hà wuii dun. <sup>11</sup> Thiisa pha brantheke ne Thesalonikha è de bajo lubo hong pha brantheke ara, ithek ne ji pha mua shii bajo wie nuuie dun, chiih-è, inai tham ne jigigam de tham ne Phaul miyao ji izai bey ne riig ne rai gieng. <sup>12</sup> Bajo Grekh brantheke è migi now gieng, chiih-è, bajo nuruii shak pha Grekh hò-amuii phiing nane hò-aphuii phiingtheke de migi now gieng. <sup>13</sup> Jishii, Thesalonikha pha Jewthek è Phaul ne Berea hà de Hamangkhang-aphuii pha miyaogam yua ramuii è yoi mage ne ithek è thiisa de wuii srane brantheke khrab srane mak rek noh. <sup>14</sup> Ji è rek mage ne migipho è Phaul shii khamuii ring hà riie ne dun ge; ji è dun ge magungde, Silas nane Thimotheke ne Berea hà rai dun. <sup>15</sup> Brantheke hanyie Phaul shii noh ne Athens thog dang pha wuii gieng pho shii Phaul è Berea hà thoh dinne mua jia yao yi ne Silas nane Thimotheke de jog jog ai rog shii dog gieng bo.

*Athens hà*

<sup>16</sup> Phaul è Athens hà Silas nane Thimotheke shii khan ne rai ramuii shii, ji pha rajan shii bajo jangbang pha jangbang um pha ji doh mage ne Phaul ne bajo zo dun. <sup>17</sup> Ji-è, ai ne Jewthek misiahò hà Jewthek nane Gaibrantheke hanyie è Hamangkhang-aphuii shii sia ne rai pho rog yao ne rai, chiih-è, limiangtheke pha ithua shii de bran hanyiitheke è ji dong ne lua ruui pho shii de inai tham ne yao ne rai noh. <sup>18</sup> Ephikhurean nane Stoiikh pha masdotheke de ai rog shii khnaing noh. Thiichiih um pha bran giak è de aishii sai, “Bi-iy hì nyie arey pha yao ne doh yi pha bidiang phlei?”

Gaithek è de chang din, “Ai ne gai thiigpho pha hamangkhang-aphuii Chiang Yao ramuii pha duiine ro.” ItheK è ji Yao phane nyieliieshii, Phaul è Isu nane Isu hòi pha miyao ji Yao mage ne Yao dun ro. <sup>19</sup> Ji-è, ithek ne Phaul shii noh srane ji pha rajan pha limiang Areophagus moe shii noh thog srane Yao, “Gathek de na muyua pha miyao wo ji nyie lai ne id pha now muui ro, <sup>20</sup> gethek è noh pha miyao giak ne khuchung de ayoï ba pha miyao Yao pha yoi muui ro, ji pha miyao ne nyie Yao phiiga, ji gathek de id pha yang muui ro.” (<sup>21</sup> Athens hà rai pha brantheK nane gai thiig phothek um phothek ne awaithek ishaktek ne thiichiïh phi ne miyao wo ji nuui ne rai pha rek yang dun.)

<sup>22</sup> Phaul è ji pha rajan pha limiang duchoi shii riu srane Yao mage, “Gu è nathek AthentheK ne bajo giang rek pha doh muui ro.” <sup>23</sup> Ji-è, gune nathek rajan hi shan ne lua srane ithek sia pha ithuathek riig mage shii, gu è nathek sia pha lubao jia shii hi è zey ne um iang pha doh ruui ro, “A-id pha jangbang shii nathek è hanyie shii sia pha ji ro.” Ji ne nathek è a-id magungde gu è nathek shii sudoh shii yua pha ji ro. <sup>24</sup> Hamangkhang-aphuii ne hanyie è sohjambling nane sohkhung shii um pha zab shii rab pha, hi ne Hamangkhang nane sohnyiak pha Ithong ro, ai ne wad miirab pha MisiahòteK shii ne arai phi phro. <sup>25</sup> Chiïh è, ai ne gethek bliã rek pha ji ne ai è chid phane nyie de aphi mua phro, nyieliieshii, awai è sieng pha chai nane sieng pha misey phi ne hanyie shii nyie chid pha jithek phi ro. <sup>26</sup> Ai è bran jia è zab brantheK shii sohnyiak khungtheK shii sieng ne rai yi pha rab phi. Awai è ibi shii ishak nane khi hà rai pha ithuathek ne khriig rab ne ruijong ro. <sup>27</sup> Ai è jithek rek phane ithek è aishii riig din yi pha rek phi ro. Chiïh è, ithek è aishii khi è now lei ne ji idoh yi pha rek phi ro. Jimagunde Hamangkhang-aphuii ne gethek è ruang asi ro; <sup>28</sup> giak è Yao pha duiine ro, “Aishii gethek sieng ne, lua ne, zen phro.”

Hi ne nathek pha sthun shii zey pha duiine ro, “Gethek de ai aniphiing ro.”

<sup>29</sup> Gethek de Hamangkhang-aphuii pha ani phiing habuii ne, gethek ne anoh chid rabo ai ne san liïman nane bran miirab pha lubao pha jangbangtheK duiine ro. <sup>30</sup> BrantheK è Hamangkhang-aphuii shii adoh pha ishak ai è de brantheK shii ariig phi, jishii ai è zab pha brantheK shii awaithek buii rek pha lumuiitheK è thado riie ne dun sha bo è yung ramuii ro. <sup>31</sup> Ai è awai mugua ne ruui pha bran ji è ichiïh sohjambling hi shii wie awie pho shii chua pha dashab rek ne ruijong ro. “Ai è ji pha miyao ne zab pha bran è izai rone thieg yi phane ji pha bran shii hòi din yi jong ro!”

<sup>32</sup> Phaul è hòi din pha miyao Yao pha ji nuui ne bran giak ne aishii siakjo, jishii, giak bran è Yao, “Gathek ne na miyao ji dinne Yao din phi pha now muui ro.” <sup>33</sup> Ji-è, Phaul ne limiang jung pha ithua ji thoh ne dun dun. <sup>34</sup> Giak bran de ai rog dog ne migi now dun. ItheK ne Dionysius, limiang shii um pha sathiing jia; chiïh-è, Damaris beng pha hò-amuii jia de, chiïh-è GaibrantheK de dog gieng dun.

## 18

### *Khorinth hà*

<sup>1</sup> Ji pha idoh è Phaul ne Athens shii thoh marui ne Khorinth hà wuii dun.

<sup>2</sup> Thiisa hà ai ne Phonthus hà giak pha, Akhuila beng pha Jew bran jia si ruui. Ji pha bran ne doh iujia pha ibi shii, awai yiy Phrisila rog shii Ithaly è dun



thog pha bran ro. Ji è dun thog phane Khlaudius Bisiu è Jewthek shii Rom thoh ne dun bo ne è yung mage ne ji mudun thog ro. Phaul è ithek shii riig pha wuii dun, <sup>3</sup> chiih-è ithek rog shii rai ne bliathek rek gieng, nyieliieshii, ai de ithek duuine yung haliig rung srane awaithek chie pha pheng ne chie ne rai pha bran ro. <sup>4</sup> Phaul ne Jewthek misiahò hà idang Jewish Thung pha Inai shii wuii srane yao ne rai, chiih-è, Jewthek nane Grekhthek shii ai miyao ji izai now yi pha rek ne rai.

<sup>5</sup> Silas nane Thimothi de Mesidonia è dun thogmage shii Phaul ne awai ishak ne mua ji yao pha zab phi muui. Jewthek shii yao, Isu ne Masi ji ro.

<sup>6</sup> Itek ji yoi ne aishii anuii pha rek ne awie pha yao mage ne, ai ne awai yung pha phlab ji sham srane yao, “Nathek sand dun arone, ji ne nawaithek shii the din bo! Ji rey pha gaja ne gu ashi phro. Sudoh è thiwing gune Gaibranthek shii wuii dun phro.” <sup>7</sup> Ji-è, ai ne ji pha ithua thoh marui ne hanyie è Hamangkhung-aphuii shii sia pha bran, Thaidius Justhus beng pha gai bran hò hà dun ne rai dun. Ai hò ne Jewthek misiahò pha khlie shii um.

<sup>8</sup> Khrisphus, hanyie yi Jewthek misiahò pha bohkhoh è de Ithong ji shii awai haliig pho è now dang ne migi now dun. Chiih-è Khorinth pha bran gaithek de ji pha mua yoi ne migi noh srane khowo yie gieng.

<sup>9</sup> Biu jia shii Phaul è ibang jia bang ruii, ji pha ibang shii Ithong è Phaul shii yao, “Arum chid rabo, agak pha athodang pha yao ne rai bo,

<sup>10</sup> nyieliieshii, gune na rog shii um gieng ro. Hanyie de na shii achun mua phro, nyieliieshii, ichiih pha rajan hà de gu branthek um iang ro.”

<sup>11</sup> Ji-è, Phaul ne thiichiih pha ithua shii idam jia è khuyo thog dang pha Hamangkhung-aphuii miyaogam ji yao ne rai marui.

<sup>12</sup> Galio shii Akhaya pha Roman badri rab mage shii, Jewthek è ò dog srane Phaul shii zum ne che pha hò shii noh dun. <sup>13</sup> Itek è yao, “Hi pha bran ne branthek shii nyu ne Hamangkhung-aphuii shii sia yi pha rek muui ro. Hi ne gethek Iphey shii adunmey pha miyao ro!”

<sup>14</sup> Phaul è yao sha pha rek shii, Galio è Jewthek shii yao, “Hi ne suruii nane buii rek pha miyao arone gu è nathek miyao de boh noh ne nyarekphi phro,

<sup>15</sup> jishii, hithek ne miyaogamthek nane ibeng Chiang è khnaing bie pha miyao arone chiih-è nawaithek Iphey bie arone, ji ne nawaithek chung ligiang rai bo. Gune hi è rek pha miyao che pho asi ro!” <sup>16</sup> Ji-è, ai ne ithek shii che pha hò è fuang gieng muui. <sup>17</sup> Itek è Sosthenes, Jewthek misiahò pha chua ophis pho shii zum srane zuang, jishii Galio è nyie de arek.

### *Antioch hà khid din*

<sup>18</sup> Phaul ne migiphothek rog shii Khorinth hà inai bajo rai marui ne Phrisila nane Akhuila rog Syria hà riie ne in ne wuii dun. Ji hà wuii pha a-id ba pha ibi Khenchreea shii ai è ibi hà surua thak muui pha ji è khaziang khua muui. <sup>19</sup> Itek ne Iphisus hà thog dun. Thiichiih Phaul è Phrisila nane Akhuila shii thoh marui ne ai ne Jewthek misiahò hà wuii dun srane Jewthek rog shii khnaing noh. <sup>20</sup> Branthek è aishii bajo rai ba bo ne yao magungde ai ne ithua arai mua. <sup>21</sup> Ji phachiang ai ne branthek shii ji pha ithua athoh ba shii yao, “Hamangkhung-aphuii è wuii din yi arone gune nathek shii wuii din ruii phro.” Ji è yao marui ne ai ne Iphisus è de run shii in ne dun din dun.

<sup>22</sup> Ai è Khaesarea thogmage shii, ai ne Jerusalem hà wuii srane charch pho shii salam yao marui, chie-è Antioch dun din dun. <sup>23</sup> Thiichiih shii

inai lujia rai marui ne ji pha ithua thoh marui ne Galathia nane Phrygia pha ithuathek hà lua srane migipho shii bo lubo rek phi.

### *Apholos ne Iphesus nane Khorinth hà*

<sup>24</sup> Ji pha ishak shii Alezendria hà giak pha Apholos beng pha Jew jia de Iphesus hà wuii thog ruii. Ai ne miyao bajo lie ne yao pha nane jigigam ji bajo thieg pha bran ro. <sup>25</sup> Aishii ne Ithong pha Lumuii dun pha ji yua jong pha ji è ai ne Isu Chiang pha miyao ji ne bajo sang ne yao ne yua phi. Jimagunde ai ne Jon khowo yie pha ji thieg bie. <sup>26</sup> Ai ne Jewthek misiahò hà bajo gang rek ne yao. Phrisila nane Akhuila è ji yoi mage shii, aishii hò hà noh srane Hamangkhung-aphuii pha lumuii dunmey pha ji wie yao phi. <sup>27</sup> Apholos è Akhaya wuii pha rek dun. Ji è Iphesus pha migipho è aishii nong ne aishii wie wuii yi pha jigigam jia zey ne thoh gieng. Ai è thiisa thog mage shii Hamangkhung-aphuii pha bushun è migipho shii bajo nong phi. <sup>28</sup> Jigigam shii zey ne um pha duiine Isu ne Masi rone gang khnaing mage ne Jewthek pha limiangthek moe shii ai yang dun.

## 19

### *Paul ne Iphesus hà wuii thog*

<sup>1</sup> Apholos ne Khorinth hà ba shii, Paul ne zab du-ùa dong ne lua srane Iphesus hà wuii thog dun. Thiisa hà ai è giak samoythek shii si ne <sup>2</sup> ithek shii sai, “Nathek è migipho rey mage shii nathek de Ragung So mua jong bey?” Ithek è chang din, “Gathek ne Ragung So um rone de ayoi ba ro.”

<sup>3</sup> Paul è ithek shii sai din, “Chiihphado, nathek ne khi-è rek pha khowo yie phlei?”

Ithek è chang din, “Jon pha khowo yie phro.”

<sup>4</sup> Paul è yao din, “Jon pha khowo yie phane branthek shii layog è thadoh khid yi pha ro, jimagunde Israel pha branthek shii yao, ai idoh è wuiiramuii pha ji shii migi now bo, ji ne Isu ro.”

<sup>5</sup> Ithek è ji yoi mage ne Ithong Isu beng è khowo yie. <sup>6</sup> Paul è awai wad ithek khrug shii khoh phi shii, Ragung So è ithek lakhung de ley dun, ji-è, ithek de khuchung de ayoi ba pha miyaogamthek yao ne Hamangkhung-aphuii pha mua de yao ne rai dun. <sup>7</sup> Ji pha bran brog ne ithek snanyi pha bran brog ro.

<sup>8</sup> Paul ne Jewthek misiahò hà wuii srane branthek shii habie uom thog dang pha gang rek ne yao. Ithek rog shii athodang pha khnaing srane ithek de Hamangkhung-aphuii pha Sajathua pha ji shii izai now yi pha yao ne rai. <sup>9</sup> Jishii, giak branthek ne lawasdai rek ne ji izai anow pha rek srane bran brog moe shii Ithong pha Lumuii dun pha shii buii yao ne rai dun. Ji è rek mage ne Paul è migipho shii awai rog noh srane ji pha ithua thoh ne dun dun. Miyao jung pha Thyranus hò hà dun srane inai tham ne ji pha miyao yao ne rai. <sup>10</sup> Ji rek phane idam nyi rey dang pha rek ne rai dun. Ji-è, Asia du-ùa shii rai pho khinyama jia pha Jewthek nane Gaibranthek um pho de Ithong ji pha miyaogam yoi dun.

### *Skhewa pha dufuiithek*

<sup>11</sup> Hamangkhung-aphuii ne Paul è khuchung de adoh dang ba pha buangthek pha bliathek rek ne rai dun. <sup>12</sup> Ai kho pha yung thileg nane rinyie shii riing pha rathang rang de rad pho shii yie ne sud phi arone ithek miiriiethek ne zab pha khia dun, chiih-è, ibuii ragungthek de fuang khia dun. <sup>13</sup> Ji è rek shii, thiichiih lua ne rai ne ibuii ragung khia pha giak Jewthek

de Ithong Isu pha ibeng yao srane ibuii ragung shii khia pha rek riig. Ithek è ibuii ragungthek shii yung phro, “Gu è na shii, Phaul è yao pha Isu beng è fuang khia bo ne yung phro.” <sup>14</sup> Jewish pha boh phabi pha dufuii mile Skhewa høg è jithek rek ne rai.

<sup>15</sup> Jishii, ibuii ragung è ithek shii yao din, “Gu de Isu shii thieg muui ro, chiih-è Phaul shii de thieg muui ro; jishii, nathek ne hanyie ga?”

<sup>16</sup> Ibuii ragung um pha bran ji è ithek shii awie dang pha jo ne ji pha bran yang dun. Ithek ne ji pha hò è yo ne ran dun. Saduii de thoh, chiih-è, yungthek zab jithiak maphi. <sup>17</sup> Iphesus hà rai pha Jewthek nane Gaibrantek è ji pha mua yoi mage shii bajo rum ne Ithong Isu pha ibeng shii bajo boh ilab phi. <sup>18</sup> Migipothek è de bajo wuii srane limiangthek moe shii awaithek nyie rek mua pha ji yao ne thieg yi. <sup>19</sup> Jadu rek pho bajothek de awaithek jigithek yie srane zab bai shii ziao muui. Ithek è ji pha igong tham ne riig shii ji pha igong ne liiman shikhi itham saguii thog dun. <sup>20</sup> Ji pha duine Ithong pha miyaogam ne bajo blu um ne athodang pha zab pha ithua shii gang yoi thog dun.

### *Iphesus hà dung rai*

<sup>21</sup> Ji è rey ched pha idoh shii Phaul è Mesidonia nane Akhaya è dong ne Jerusalem hà de wuii pha now. Ai è yao din, “Thiisa wuii thog ne de gune Rom de riig pha wuii chid phro.” <sup>22</sup> Ji-è, ai ne awai brapho nyi Thimothi nane Erastus shii Mesidonia hà wuii ge, ji è thoh srane awai ne Asia du-ùà hà ishak bajo rai din marui.

<sup>23</sup> Ji pha ishak shii Iphesus hà ne Ithong pha Lumuii Chiang è bajo diig thog ruii. <sup>24</sup> Liiman rab pha bran Demethrius beng pha bran jia ne misia hò pha jangbang Ardemis pha Ithong rab srane chong rek ne rai shii, ai chong ji ne blia rek pho shii bajo phua mua dun. <sup>25</sup> Ji-è, ai è ji rab pho nane gaithek ji è rab phothek shii ò khrab ne ho srane yao, “Branthek wo, nawaithek de thieg iwa! Gathek bukho rey phane hi pha blia è rey ro. <sup>26</sup> Jimagunde, thuh ichiuh shii nawaithek de doh ne yoi iwa! Hi pha Phaul ne nyie rekramuii ga? Ai ne bran miirab pha hamangkhung-aphuii ne hamangkhung-aphuii asi rog è yao ne ai è Iphesus nane Asia pha zab du-ùà pha brantek nyiu ne ai miyao nuii dun ro. <sup>27</sup> Hi è rey phane buii rey pha um ro, hi ne gethek chung pha ibeng ne lu rey dun pha um ro. Ji duine jia ashi pha yi sia pha jangbang Ardemis pha ibeng ne oi pha rey dun phro, airo boh ne lu rey dun phro. Ji pha jangbang shii ne Asia shii rai pha zab brantek nane zab sohjambling shii rai pha brantek è sia ne rai.”

<sup>28</sup> Brantek è ji pha miyaogamthek yoi mage ne bajo lijieg ne ziak, “Ardemis ne Iphesus pha bajo boh ro!” <sup>29</sup> Ji pha mua ne ji pha rajan shii zab yoi thog dun. Mesidonia pha bran nyi, Gaius nane Aristarkhus Phaul rog luagieng pho shii zum ne bran ithua ugud hà noh dun. <sup>30</sup> Phaul awai de ji pha bran brog ibi shii wuii pha rek shii migipho è gak ne awuii yi. <sup>31</sup> Ai ro giak ijakthek ji pha ithua pha bukhothek pho è de aishii ji pha bran ithua ugud shii awuii dang rabo ne mua khung ne thoh ge. <sup>32</sup> Ji pha maley ne bajo buii gui dun: nyieliieshii, giak brantek ne gai jia yao ne ziak, giak è yi gai yao ne ziak, nyieliieshii giak ne thiichiih shii limiang jung pha ji de agao pha wuii thog ruii. <sup>33</sup> Giak bran è ji rey pha gaja ne Alezendar rone è yao ne giak Jewishthek è aishii brantek pha ibi shii wuii yi. Ji è wuii thog mage ne ai è brantek shii Alezendar wad è hìog ne aro yi pha rek srane ai è haro rek ne yao pha saro. <sup>34</sup> Jishii, thiichiih um pha brantek è ai de Jew rone thieg

mage ne ishak nyi thog dang pha ziak ne rai, “Ardemis ne Iphisisu pha bajo boh ro!”

<sup>35</sup> Idohhè shii thiichiih rajan pha boh jia è ji hòì pha ji ìu rek mua ge. Ai è yao, “Gu ijak Iphisithek wo! Zab brantheke è thiege chak ro, Ardemis ne Iphisisu pha boh nane hamangkhang è chiih pha lubao riie ruii pha misia hò chak ro. <sup>36</sup> Hanyie de hithek pha miyao ne asnai mua phro. Ji-è, nathek de lijiege ne ro srane adunmey pha arek rabo. <sup>37</sup> Hi pha bran nyi è Misiahò pha nyie de agow, chiih-è, gethek pha hamangkhang-aphuii shii buii nyie de ayao ro. <sup>38</sup> Demethrius nane ai bliaphothek è hanyie shii magungde gidieg nin pha um arone, gethek shii ji che pha riichai um ro, chiih-è, ji chua pha idang inai hò um ro; thiisa hà ne ilkhì nya rek mua. <sup>39</sup> Jishii, ji è bajo boh rek pha noh arone, zab dun mey pha limiang jung srane yao rai haga. <sup>40</sup> Sudoh shii nyie rey pha buii hò ne gethek shii de bajo awie pha nin thog ruii phro. Hi pha srobrone nyi chiang de oi ro, chiih-è, ji è gethek ne wie chiang ayao mua phro.” <sup>41</sup> Ji è yao ched ne ai è ji pha limiang jung phane jong pha dun ge.

## 20

### *Mesidonia nane Akhaya hà wuii dun*

<sup>1</sup> Buii guì pha ji them ched ne Phaul è migipho shii ò khrab ne ho ne boh rek ne wad è phriie ne miyagamtheke yao marui. Ji è rek ched ne ai ne ji pha ithua thoh ne Mesidonia hà wuii dun. <sup>2</sup> Ai è zab pha ithua è dong ne lua srane brantheke shii boh rek yi pha bajo muatheke yao marui. Ji pha idoh è ai ne Akhaya hà wuii thog dun. <sup>3</sup> Thiichiih shii ai ne habie uom rai marui. Ai ne Syria hà wuii sha pha saro ramuii shii ai è Jewtheke è aishii diig phi pha nung ramuii rone thiege dun. Ji-è, ai ne Mesidonia è dong ne dun din pha phak. <sup>4</sup> Berea hà rai pha Phyrhus pha dufuii Sophather de ai rog shii wuii gieng; ji duiine Thesalonikha hà rai pha Aristarkhus nane Sekhundus; Derbe è de Gaius; Asia pha du-ùà è de Thychikus nane Throphimus; Timothi de. <sup>5</sup> Itheke de Throas hà ibi wuii ne gathek shii khan ne rai iang. <sup>6</sup> Gathek de Philipi è sai ne phiia ajiiie pha iweb chie ched ne in ne daguii shii ithek rog Throas shii dog gieng. Thiichiih shii gathek ne damiley rai marui.

### *Phaul è Throas hà idohhè riig wuii*

<sup>7</sup> Sonibari inai shii gathek ne michie chie pha ò khrab. Phaul è brantheke shii habiu duchoi thog dang pha miyao yao ne rai gieng, nyieliieshii, ji pha thimiang duiine è rey mage shii ai ne ithek shii thoh ne dun sha pha rey ramuii. <sup>8</sup> Bajo muchuang ùgud pha lakhungtheke hà hang ne maley dug ro. <sup>9</sup> Ji è yao ramuii shii Euthykhos beng pha bran jia de hazingcho shii dug ne nuii gieng. Phaul è athodang pha yao ne rai mage ne Euthykhos ne miyem hùghùg ne rai. Idohhè shii ai ne men liak mage ne ji pha hò ùgud uom pha lakhung è nyiak thog dang pha chiih dun. Itheke è ran srane aishii chiing mage shii ai ne iyjong dun. <sup>10</sup> Ji è rek magungde, Phaul è thazam wuii srane aishii giak mage ne yao, “Arum chid rabo, ai ne a-iy ba ro!” <sup>11</sup> Ji è yao ched marui ne lakhung pha hògud hà dun din srane iweb phed ne chie. Itheke rog shii hanai chiù thog dang pha miyao yao marui ne Phaul è ji pha ithua thoh ne dun dun. <sup>12</sup> Itheke è ji pha filiao bran shii hòì din mage ne bajo sang dun.

### *Throas è Milethus shii wuii thog*

<sup>13</sup> Gathek ne run è in ne Asos hà ibi wuii iang, thiisa è gathek ne Phaul shii de noh ne in yi ne wuii dun. Ai è gathek shii ibi yao ne ruiijong, nyieliieshii, ai ne soh è luaramuii pha ji è yao ne ruii. <sup>14</sup> Ai è gathek shii Asos hà si mage shii, gathek è aishii de noh srane Michiyoylene hà wuii dun. <sup>15</sup> Gathek ne thiichiih è de run shii in ne ji pha thimiàng duine è rey shii, Chios wuii thog dun. Inai jia pha idoh è gathek ne Samos shii wuii thog dun. Ji pha idoh pha inai shii gathek ne Michiyous wuii thog dun. <sup>16</sup> Phaul ne Iphius dong ne in ne wuii pha now. Nyieliieshii, Asia du-ùà shii ishak ajong yi pha noh ne rek. Ai ne jog jog Jerusalem hà thog yi pha rek. Jog thog mua arone, inai Saguii shii sai pha idoh shii Jerusalem hà thog pha now ro.

### *Phaul è Iphius pha dukhothek shii salam yao marui*

<sup>17</sup> Michiyous hà Phaul è Iphius shii mua jia thoh ge, Charch pha dukhothek shii aishii si iang bo. <sup>18</sup> Ithek è ai moe shii wuiithogmage shii, ai è ithek shii yao, “Nawaithek de thieg iwa, gu è nathek rog shii khi-è rek ne ishak zab phi ne rai gieng pha ji, Asia du-ùà shii nyathog dang pha idoh è yie dang ne sudoh thog pha. <sup>19</sup> Bajo jum rek ne bajo miegkho noi srane Ithong pha khiao duine bliathek rek marui, ji pha doh ne bajo diig thog dun nyieliieshii, Jewthek è mak rek noh. <sup>20</sup> Nathek de thieg iwa! Gune nathek shii nong pha miyao ne branthek pha moe shii, chiih-è, hò hò shii ayao pha athoh marui ro. <sup>21</sup> Jewthek shii de, Gaibrantek shii de gu è phriie ne yao marui, ithek ne awaithek pha layogthek è Hamangkhung-aphuii shii rai ne Ithong Isu shii migi now bo. <sup>22</sup> Chiih-è sudoh de Ragung So pha miyao nuii ne Jerusalem hà wuiiramuii ro, thiisa hà nyie rey pha ji athieg pha wuiiramuii ro. <sup>23</sup> Gune rajantek hà Ragung So è phathek nane diig ne gu khan muui ro è phriie pha ji thieg bie ro. <sup>24</sup> Jishii, gune gui sieng pha chai ne boh anow; gune Ithong Isu è phi ne rek yi pha blia ji rek ched bi pha noh ro, ji pha blia ne Hamangkhung-aphuii pha bushun pha Mua Wie ji yao pha ji ro.

<sup>25</sup> “Gu ne nathek duchoi shii wuii ne Hamangkhung-aphuii pha zab riichai khoh pha mua yao jong ro. Ji-è, sudoh è thiwing ne nathek ne gu shii khuchung de adoh din sha phro. <sup>26</sup> Ji-è, gune sudoh nathek shii izai surua thak ne yao dang phro: Nathek duchoi shii hanyie magungde san dun arone, ji ne gu gaja asi phro. <sup>27</sup> Nyieliieshii, gu è Hamangkhung-aphuii pha miyao dun pha miyao ayao pha athoh marui ro. <sup>28</sup> Ji-è, nawaithek shii riigbthan ne rai iang bo, chiih-è, Ragung So è boh marui pha shiishai brog shii de wie riig ne rai iang bo. Hamangkhung-aphuii pha charch pha brogpho rek ne rai bo, ji ne awai ro ro, Ai è awai dufuii khlem ne iy yi pha è rab ne ruii ro. <sup>29</sup> Gune thieg muui ro, gu dundun pha idoh è shii nyigodogthek ne nathek duchoi shii wuii srane ji pha shiishaithek ne achie yi phro. <sup>30</sup> Nawaithek duchoi è giak bran ne migiphothek shii khlam yao ne noh dun pha ishak thog ruii phro. <sup>31</sup> Ji-è, ji nowbthan ne rai bo, gune gu miegkhothek hanai habiu noi ne nathek shii idam uom yua ne rai noh jong ro.

<sup>32</sup> “Ji-è gune nathek shii Hamangkhung-aphuii pha wad nane bushun pha mua shii boh marui ro, ji-arone, nathek shii de gang sieng pha rab phro, chiih-è, Hamangkhung-aphuii è awai branthek shii phi pha khirzey ji phi ruii phro. <sup>33</sup> Gune hanyiethek pha san liiman nane yungthek achid ro. <sup>34</sup> Nawaithek è de thieg iwa! Gune gui wad è bliathek rek ne gui branphiingthek nane gui chid pha manathek phi phro. <sup>35</sup> Gu è bajo diig bliathek rek ne nathek de ziapho shii hi è rek ne nong bo ne doh yi, Ithong

Isu awai miyao marui pha miyaogamthek ji nowkhlei bo, ‘Ji ne yie pha ji è de phi pha ji bajo lubo um ba ro.’”

<sup>36</sup>Phaul è ji yao ched dang shii ai è ithek rog shii bam ne sia marui. <sup>37</sup>Ithek è bajo choh ne aishii giak srane ai mizia shii khichiuug ne wie dun ge. <sup>38</sup>Ithek ne bajo zo dun, nyieliieshii, ai è yao marui: ithek ne aishii khuchung de adoh din sha. Ji-è, ithek de ai rog shii run um pha ithua thog pha wuii gieng.

## 21

### *Phaul è Jerusalem wuii*

<sup>1</sup>Gathek è ithek shii salam yao marui ne ji pha ithua thoh ne wuii dun. Thiisa è gathek ne miang in ne Khos hà wuii thog dun; ji pha thimiang duiine è rey mage shii gathek ne Rhodes hà thog dun. Thiisa è de gathek ne Phathara hà wuii din dun. <sup>2</sup>Thiichihih shii gathek è Phoenikha ran pha run jia doh, ji è gathek ne thiichihih in ne wuii dun. <sup>3</sup>Gathek ne Khyphrus doh muui pha ithua hà thog dun. Ji-è, gathek ne dinne hayang hà riie ne Syria hà wuii din dun. Gathek ne run pha manathek khiang sha pha Thyre pha khamuii ring shii wuii thog dun. <sup>4</sup>Thiichihih shii de gathek è migi now pha bran si ne ithek rog shii damiley thog pha rai marui. Thiichihih shii Ragung pha blu è Phaul shii Jerusalem awuii rabo ne yao ruii. <sup>5</sup>Jishii, gathek thiichihih rai pha ishak jong sha pha rai mage ne gathek è ithek shii thoh marui ne guithek lumuii hà wuii dun. Ithek de awaithek yiy nane anphiing de noh ne gathek rog shii khamuii ring thog dang pha wuii gieng. Gathek è bam ne sia marui. <sup>6</sup>Ji-è sia ched ne gathek è ithek shii salam yao marui ne gathek de run bucho shii in dun, ithek de awaithek hò hà dun din dun.

<sup>7</sup>Gathek ne athodang pha guithek kho lumuii Thyre è Phtholemais wuii thog dun. Thiichihih shii de gathek è migipho shii khung rai ne ithek rog shii inai jia rai marui. <sup>8</sup>Ji phado è gathek ne ji pha ithua de thoh dinne wuii srane Khaesarea hà wuii thog dun. Thiichihih shii gathek è Gachem Philiph pha hò shii rai marui. Ai ne Jerusalem shii brapho miley gua ne ruii pha è jia ro. <sup>9</sup>Aishii gey adun ba pha dimi wi Hamangkhang-aphuii pha mua yao ne rai pha um iang. <sup>10</sup>Gathek ne thiichihih shii inai bajo rai ramuii shii Agubus beng pha chaigphuii jia de Judea è wuii thog ruii. <sup>11</sup>Ai ne gathek moe shii wuii srane Phaul rathang yie ne awai lai nane wad shii phang srane yao, “Hi ne Ragung So è khi è yao pha ji ro: Rathang hi pha muspho shii ne Jerusalem hà Jewthek è hi duiine phang ne Gaibrantheke shii phi muui phro.”

<sup>12</sup>Gathek è ji è yao pha yoi mage ne gethek nane gaithek è Phaul shii Jerusalem hà awuii yi pha khung ne yao. <sup>13</sup>Ji è yao magungde, Phaul è ithek shii yao, “Nathek ne nyie rek phlei? Hi è rek ne choh phane gu lubu chuimuii ne bey? Gune Jerusalem hà phang pha jia asi pha yi Ithong Isu Chiang è iy pha de nya rek mua phro.”

<sup>14</sup>Gathek è aishii anyiu mua, ji-è, gathek ne agak pha sang yao din, “Yang ne hi ne Ithong pha munow ji rey yi bo.”

<sup>15</sup>Gathek è thiichihih shii ishak iujia rai marui ne Jerusalem hà wuii pha saro. <sup>16</sup>Khaesarea pha giak samoythek de gathek rog wuii gieng. Ithek è gathek shii khyphrus pha Manasan, bajo inai ibi è migi now pha bran rey pha hò shii rai pha noh dun.

### *Phaul è Jems shii si wuii*

<sup>17</sup> Gathek è Jerusalem wuiithogmage shii, migipho è gathek shii lua wieho ne wuii yi. <sup>18</sup> Ji pha thimiàng duine Phaul ne Jems shii si pha wuii dun; thiisa hà charch pha zab dukhothek de um iang. <sup>19</sup> Phaul è ithek shii salam yao, Phaul è ithek shii Hamangkhang-aphuii è Gaibranthek shii ai blia è nyiethék rek pha ji zab phosro phi. <sup>20</sup> Ji yao pha nuii ne ithek è Hamangkhang-aphuii shii chiong phi. Ji phado è Phaul shii de yao, “Gathek pha khuii Phaul wo! Nawai de riig muui ro, itham pha Jewthek ne migipho rey ne Iphey shii khinyama jam now dun ro. <sup>21</sup> Jimagunde ithek è gathek shii, na è Gaibranthek sothek hà rai pha Jewthek shii Moses pha Iphey duine awaithek aniphiing miàngkheg chid pha nane mizenthek anuii chid rabo è yua phrone yao ramuii ro. <sup>22</sup> Ithek ne na wuiiramuii rone izai thiengjong ro, gethek ne nyie khi è rek sha pha lei? <sup>23</sup> Na ne gathek noh pha ji rek bo. Thiichiih shii bran wi è surua thak ne um ro. <sup>24</sup> Na ne ithek rog shii wuii gieng srane ithek shii muhui hui yi pha è nung phi mage bo, jiarone, ithek ne awaithek khaziàng nyakhua mua phro. Ji è rek arone, zab na chiàng yao pha jithek ne izai asi rone nya thieg ruii phro, chiih-è, nawai de Moses pha Iphey shii zen pha ji rek ne rai pha doh ruii phro. <sup>25</sup> Jishii, Gaibranthek hanyie è migi now jong pho ne gethek è jigigam zey ne thoh pha nung rai jong ro: ithek ne jangbang shii zud pha nyie de achie dang rabo; ifai nane yua rib ne ua pha ibey achie rabo; chiih-è, ithek ne siulao pha biwo è ruang rai bo.”

<sup>26</sup> Ji-è, Phaul è ji pha thimiàng duine è rey mage shii, ji pha bran wi shii noh ne ithek shii muhui hui ne rek phi. Ji è rek ched marui ne ai ne Misiahò hà wuii srane ji pha muhui hui ched pha inai khinyama chia pha um lei ne ji yao pha pho phi wuii. Idohhè pha inai shii ne ithek wi chiàng è khlem ne zud phi chid phro.

### *Misiahò hà Phaul shii zum dun*

<sup>27</sup> Ji è rek ne rai magungde, inai damiley jong sha pha rai ramuii shii, Asia pha du-ua è wuii thog pha giak Jewthek è Phaul ne Misiahò hà um iang pha doh ruii. Ji-è, ithek è branthek shii khrab ne lijieg yi ne Phaul shii zum dun. <sup>28</sup> Ithek è ziaak ne yao, “Israel pha bran de wo! Nong phi bo! Hi pha bran ne khi khi hà wuii magungde Israel pha branthek shii gidieg yua muui ro, chiih-è, Moses mizen marui pha Iphey nane hi pha Misiahò shii jia rek ne yua ramuii ro. Thuh shii de ai è Gaibranthek noh ne Misiahò hi shii ithua so shii zea rekramuii ro!” ( <sup>29</sup> Ithek è ji è yao phane, nyieliiishii, ithek è Iphisis pha Throphimus de Phaul rog shii ji pha rajan shii um gieng. Aishii ne Misiahò shii Phaul miinoh ne wuii gieng ara è now ne yao dun.)

<sup>30</sup> Ji pha anomuluii pha miyao è ji pha rajan pha zab ithua shii yoi ne branthek ne ran srane Phaul shii zum srane ji pha Misiahò è fuang khia maphi. Ji è rek dang mage ne ji pha Misiahò pha habin de kheb dun. <sup>31</sup> Ji pha bran brogthek è Phaul shii ua mua pha rek, jimagunde, Jerusalem shii bajo buii rey ramuii rone ji pha phosrone Roman arming yungpho shii thoh ge. <sup>32</sup> Ji nya yoi dang shii, ji pha yungpho è awai ophisphothek nane siphahithek noh ne ji pha bran brog um pha ithua shii wuii thog ruii. Branthek è ai nane ai siphahithek shii doh mage ne Phaul shii azuang din pha ruii muui. <sup>33</sup> Ji pha yungpho è Phaul moe shii wuii srane Phaul shii zum, chiih-è Phaul shii shiirnai nyi è joi pha yung. Ji è rek ched ne ai è sai, “Hi ne hanyie ga? Chiih-è ai è nyie rek muui ga?” <sup>34</sup> Ji pha bran giak è gai yao ne ziaak, giak è gai yao ne ziaak. Thiichiih shii wieng phleg pha miyao yao dun ne yungpho ji ne

nyie rey dun pha isiie athieg mua phi, ji-è, ai è brantheek shii yung ne Phaul shii siphahithek rai pha hò hà noh yi. <sup>35</sup> Itheek de Phaul rog ukhno thog pha wuii gieng, chiih-è siphahithek è Phaul shii chaing ne noh chid pha rey dun, nyieliieshii, bran brogtheek ne bajo buii rey dun. <sup>36</sup> Itheek ne ai idoh shii wuii gieng srane aishii ua muuii pha ziaak ne yao, “Aishii ne ua muuii bo!”

*Phaul è awaishii haro rek*

<sup>37</sup> Siphahithek è Phaul shii arming rai pha hò shii noh sha pha saro shii, Phaul è yungpho ji shii yao: “Gune na shii miyao jia nya yao mua nebey?”

Ji pha yungpho è sai, “Na de Grekh nya yao mua nebey? <sup>38</sup> Na ne Egyph pha bran asi bey? Buyo shii hanyietheek srobro shii buii mak rek pho rab ne itham wi shii jabiing hà noh dunpha bran ji asi bey?”

<sup>39</sup> Phaul è chang, “Gune Jew ro, gune Tharsus hà Khilisia shii giak pha Jew ro, gune bajo boh pha rajan shii rai pha bran ro. Gu shii de brantheek shii yao yi pha phi bo.”

<sup>40</sup> Ji-è ji pha yungpho è Phaul shii yao pha ishak phi, ji è, Phaul ne datham shii riu srane brantheek shii aro yi pha wad è kho ne yao. Itheek è aro sha pha rey mage shii Phaul è itheek shii Hebriu pha miyaogam è yao phi:

## 22

<sup>1</sup> “Gu ijak Jewtheek wo! Gu è natheek moe shii gui chiang haro yao pha ji nuuii mage bo!” <sup>2</sup> itheek è ai ne Hebriu è yao ruuii pha ji yoi mage ne bajo arodang pha rai dun, jiè Phaul ne wiwi yao lumao dun:

<sup>3</sup> “Gune Jew ro, gune Tharsus hà Khilisia pha ithua shii giak pha bran ro, jimagunde, gune ichiih Jerusalem hà Gamaliel pha jigigampho rek ne sieng pha bran ro. Gu de getheek riing mizen maruii pha bajo giang pha Iphey ji pha muyua mua jong ne sudoh ichiih um pha natheek duiine Hamangkhung-aphuii shii phi jong ro. <sup>4</sup> Gu de bran hanyie è hi pha lumuii shii lua pha brantheek shii iy dang pha diig cheo phi jong ro. Gu è hò-aphuii, hò-amuiitheek shii zum ne phatheg chab jong muuii ro. <sup>5</sup> Hi pha miyao ne Kho Phabi nane Limiangtheek è gu miyao ramuii hà izai chak rone nyayao ruuii phro. Gu è Damaskhus pha Jew ijaktheek shii zey pha jigigam mua dun pha ji è gune thiisa hà itheek shii zum ne shiirnai è zoi ne Jerusalem noh srane diigkhuii pha wuii dun.

*Phaul è awai lai dun pha miyao yao*

<sup>6</sup> “Gune Damaskhus pha moe wuii thog ramuii shii, hanai duchoi pha ishak liing shii gu moe shii hamangkhung è hamblo shii haliao jia bliak thogruii. <sup>7</sup> Gune nyiak shii thud dun shii, goh è gu shii yao pha miyaogam jia yoi ruuii, ‘Saul, Saul! Na ne nyie rek ne gu shii diig phi phlei?’ <sup>8</sup> Gu è sai din, ‘Ithong na ne hanyie ga?’ Ai è yao din, ‘Gune Nazareth pha Isu ro, na è hanyie shii diig phi pha ji ro.’ <sup>9</sup> Gu rog shii um pha brantheek de ji pha haliao bliak pha ji ne doh gieng shii hanyie è gu shii yao pha miyaogam ji ne ayoi gieng. <sup>10</sup> Gu è sai din, ‘Ithong wo, ji-arone, gune nyie rek chid pha um lei?’ Ji pha Ithong è gu shii yao din, ‘Sieng ne Damaskhus hà wuii mage bo, thiisa hà na shii Hamangkhung-aphuii è nyie rek bo ne boh ne ruuii pha ji zab yao phi phro.’ <sup>11</sup> Haliao bliak pha ji è gune Miegthi pha rey dun. Ji-è gu rog wuii gieng phothek è gu shii wad chaing ne Damaskhus hà wuii thog yi.

<sup>12</sup> “Ji pha rajan shii Ananias beng pha bran jia ne giang rek ne Iphey ji nuuii ne thiichiih rai pha Jewish è bajo ilab phi pha jia um iang. <sup>13</sup> Ai è gu shii wuii srane gu moe shii riu ne yao, ‘Gu ai khuuino Saul, dinne mieg doh din bo!’



Ji è yao dang pha ji shii gu mieg ne doh din ruii ne gu è aishii riig. <sup>14</sup> Ai è yao, ‘Gethek riing pha Hamangkhung-aphuii è na shii ai munow ji thieg bo ne gua jong ro, airo giang khiao ji thieg yi pha, chiih-è, aiwairo miyaogam ji yoi yi pha gua ne ruiijong ro. <sup>15</sup> Ji-è, na de brantheke shii ai Chiang è nyie doh ne yoi pha ji yao chid phro. <sup>16</sup> Ji-è, nane ichiih shii nyie rek ne chia ne khan phlei? Sieng ne khowo yie mage srane nawai layog ji sud yi pha aishii sia mage bo.’

### *Phaul ne gaibrantheke shii yao yi pha ho*

<sup>17</sup> “Gune Jerusalem dun dinne Misiahò shii sia ramuii shii, gu è ibang jia bang ruii, <sup>18</sup> ji pha ibang shii gu è Ithong shii doh ne ji pha Ithong è gu shii yao ramuii pha bang ruii, ‘Jog rek ne Jerusalem thoh ne dun dun bo, nyieliieshii, ichiih pha brantheke ne na è gu Chiang è nyie yao pha ji ne anuii phi phro.’ <sup>19</sup> Gu è chang, ‘Ithong, ithek ne bajo wie thieg iwa, gune Jewtheke misiahò hà wuii srane hanyiethek na shii migipho shii zum ne zuang pha bran ro. <sup>20</sup> Chiih è, na khagi Stephen uaphothek pha idoh shii de gu de thiichiih um ne aishii ua bo è yao ne gu è de ua pho pha yungtheke shii khagi rek gieng.’ <sup>21</sup> Ithong è gu shii yao, ‘Gune na shii ruang hà gai Gaibrantheke shii wuii ge phro.’”

<sup>22</sup> Brantheke ne Phaul è ji yao ched dang pha nuii ne rai dun; jimagunde, ji yao ched mage ne ji pha brantheke ne bajo gang rek ne ziake ne yao, “Aishii noh srane ua muui bo! Ai ne sieng ne rai phane adunmey pha um ro!”

<sup>23</sup> Itheke ne awaitheke yungtheke fi srane nyiak phlab hum srane hasam shii fen ne ziake ne yao. <sup>24</sup> Roman pha yungpho è awai brantheke yung ne Phaul shii arming rai pha hò hà noh yi srane nyie rek ne Jewtheke è aishii gidieg rek ne ziake pha ji thieg yi pha zuang pha yung. <sup>25</sup> Zuang pha ji joi ched magunde, Phaul è thiichiih riu pha ophispho shii sai, “Hi è rek ne Roman pha bran, hanyie è nyie suruii arek pha shii zuang pha ji Iphey shii dun mey bey!”

<sup>26</sup> Ji pha ophispho è ji yoi mage ne ai ne Roman pha yungpho shii wuii dun srane yao, “Nane nyie rekramuii ga? Ai de Roman pha bran ro!”

<sup>27</sup> Ji-è, ji pha yungpho boh è Phaul shii wuii srane sai, “Gu shii yao mage bo, na de Roman pha bran bey?”

Phaul è chang, “Ji chak ro.”

<sup>28</sup> Ji pha yungpho boh è yao, “Gune Roman pha bran rey yi phane bajo bang phi ne rey ro.”

Jimagunde, Phaul è yao, “Gune giak dang pha ji è Roman pha bran ro.”

<sup>29</sup> Ji è yao dang pha ji shii, Phaul shii miyao sai pha noh pha brantheke ne idoh dun din dun; chiih-è ji pha yungpho boh de Phaul ne Roman pha bran rone thieg mage ne Phaul shii shiirnai è joi pha ji bajo rum din dun.

### *Phaul ne limiang bohkhoh moe shii noh thog*

<sup>30</sup> Jewtheke ne nyie Chiang è Phaul shii buii nin pha ji thieg yi pha ji pha yungpho boh è ji pha thimiang duiine è rey mage shii, shiirnai sey srane noh dun, phabi kothek nane limiangtheke shii maley dug yi pha yung. Ji è rek srane ai è Phaul shii ithek ibi shii riu ba yi.

## 23

<sup>1</sup> Phaul è limiangtheke shii wie riig srane yao, “Gu ijak Israelpho wo! Gune sudoh thog dang pha Hamangkhung-aphuii shii so now ne rai.” <sup>2</sup> Ananias beng pha Kho Phabi jia è Phaul moe shii riu pho shii Phaul sem shii phey

yi pha yung. <sup>3</sup> Phaul è yao din, “Lakhung chuang pho nathek shii de Hamangkhang-aphuii è chua din ruii phro! Nathek ne Iphey shii zen pha duine gu shii nin pha thiichiih shii dug ramuii ro, jimagunde, nathek ne gu shii phey yi pha yung ramuii ne Iphey zen pha ji chui muui ro!”

<sup>4</sup> Phaul moe shii dug pha bran jia è yao, “Na ne Hamangkhang-aphuii pha Kho Phabi shii biwo yao ramuii ro!”

<sup>5</sup> Phaul è chang din, “Gu ijak Israel pho wo! Ai ne boh phabi rone gunè athieg ro. Jigigam shii ne hi è zey ne um ro, ‘Nathek ne bohkhoh pho shii buii ayao rabo.’”

<sup>6</sup> Phaul è Sadusithek pha ibrog jia nane Pharisithek pha ibrogthek um iang pha doh mage ne ithek shii limiangthek moe shii ho ne wuii yi ne yao, “Gu ijak Israelthek wo! Gu de Pharisithek ro, gu de Pharisithek pha dufuii ro. Sudoh gunè ichiih shii chua phane iy ne hòi din pha miyao shii luthong pha chiang è rey dun ro!”

<sup>7</sup> Ai è ji nya yao dang mage shii, Pharisithek nane Sadusithek ne awaithek chung gui rai ne yoh yoh che dun. ( <sup>8</sup> Nyieliieshii, Sadusithek è yao, iyphothek ne khuchung de ahoi din phro, chiih-è hamangkhlithek nane Ragung ne oi ro; jishii Pharisithek ne ji ne um rone migi now ne rai.)

<sup>9</sup> Thiichiih ziake ne yua pha ne bajo bajo boh rey ruii, Pharisithek rog dog pho giak Iphey yua pha masdothek è riu srane gang ziake ne yao: “Gathek ne hi pha bran shii nyie chun pha lumuii adoh phi ro! Aishii ne hamangkhlithek nane Ragung è izai yao chak ro!”

<sup>10</sup> Ji pha khnaing pha ne bajo boh boh hòi mage ne Phaul shii noh pha yungpho ne yang ne Phaul shii brantheke è ua ne dum dum rek mua phade um è now ne bajo rum dun. Ji è ji pha dumuii è awai siphahithek shii wuii ne Phaul shii brantheke pha duchoi è arming rai pha hò idoh noh din pha yung.

<sup>11</sup> Ji pha habiu shii Ithong è Phaul moe shii riu srane yao, “Nane arum ched rabo! Na ne ichiih Jerusalem shii gu chiang è yao jong phi ro, hi duine Rom hà de yao mage bo.”

### *Phaul shii ua muui pha munung nung rai*

<sup>12</sup> Ji pha thimiang riang duine è rey mage shii Jewthek è ò wuii si srane nung rai. Ithek è thiichiih shii surua thak rai, Phaul shii a-ua shapho ne ithek ne nyie de achie aniing dang phro. <sup>13</sup> Ji pha munung nung rai phothek ne bran sawi huak pha um. <sup>14</sup> Ithek è boh phabi nane dukhothek shii wuii srane yao, “Gathek è surua thak jong ro, gathek ne Phaul shii a-ua shapho shii ne nyie de achie dang bi phro. <sup>15</sup> Ji-è, na nane limiangthek ne Roman yungpho shii Phaul shii miyaogam sai ba pha um rone khlam ne thazam thoh ge pha yung bo. Ji è rek shii gathek ne ai ichiih athog ba shii ua mua pha saro iang phro.”

<sup>16</sup> Ji è yao pha ji ne Phaul ro bumuii pha dufuii ji è yoi mage ne phathek hà Phaul shii wuii ne yao phi. <sup>17</sup> Ji nuii ne Phaul è thiichiih um pha arming rai pha hò pha ophispho ho srane yao, “Hi pha bufuiiduii shii boh yungpho shii noh ne wuii mage bo; ai ne dumuiiboh è siphahi pha kho shii miyao jia yao pha um ro.” <sup>18</sup> Arming rai pha hò ophispho ji è aishii noh ne wuii srane yungpho shii yao, “Phaul è gu shii ho ne hi pha bufuiiduii shii na moe shii noh ne wuii mage bo è yao dun ro, nyieliieshii, ai ne na shii miyao jia yao pha um ro.”

<sup>19</sup> Ji pha yungpho è aishii wad è chaing srane dug yi srane sai, “Na ne gu shii nyie yao pha um ga?”

<sup>20</sup> Ai è yao, “Jew pha riichaithek ne thimiang ne na shii Phaul shii bsa hà limiangthek moe shii noh dinne miyao sai ne wie thieg yi pha rone è khlam ne lia pha nung jong ro. <sup>21</sup> Jishii na ne ithek miyao anuii rabo, nyieliieshii, ithek ne sawi è de huak dang pha branthek ug ne Phaul shii khan ne rai iang phro. Ithek ne Phaul shii a-ua shapho shii ne nyie de achie aniing dang phro è yao ne surua thak jong ro. Ithek ji rek pha surui jong ro chiih-è naro muphak ji khan ramuii ro.”

<sup>22</sup> Ji pha yungpho è aishii yao, “Na è hì pha mua gu shii phosro jong rone hanyie shii de ayao dang rabo,” È yao ne aishii thoh ne dun ge.

### *Phaul ne badri Felikhs shii thoh gey*

<sup>23</sup> Ji pha idoh è ji pha yungpho è ophispho nyi shii ho ne yao, “Khaesarea wuii pha siphahi wieng nyi, sthuh pho samiley nane jiong han pho wieng nyi khrab srane sudoh biu pha dige ishak dang shii wuii pha saro bo. <sup>24</sup> Phaul shii sthuh phi ne in yi srane Felikhs Badri shii wie wuii thog yi bo.” <sup>25</sup> Ji è yao ched ne ji pha yungpho è jigigam jia zey ne thoh ge: <sup>26</sup> “Khladius Lysias è bajo thieg pha badri Felikhs shii wie khung bi. <sup>27</sup> Jewthek è hì pha bran shii zum ne ua pha rekramuii shii, ai ne Roman pha bran rone thieg mage ne gu è siphahithek rog shii wuii srane aishii ragia rek phi ro. <sup>28</sup> Gune ithek è aishii nyie chiang è layog nin pha ji thieg yi pha aishii limiang moe shii noh ne sai riig shii de <sup>29</sup> Gune, aishii, ai iy yi pha nane phattheg chab chid pha blia rek pha adoh phi ro. Aishii nin phane awaithek Iphey zen pha ji è sai ne rek pha miyao bie ro. <sup>30</sup> Aishii mak pha khinrin um rone mua yoi mage ne gu è aishii na shii wuii ge pha phak ne wuii ge ro. Gu è aishii ninphothek shii yao jong ro, miyao nin pha jí ne na moe shii che phi phro.”

<sup>31</sup> Siphahithek è jithek pha muyung rek ne wuii dun. Ithek è Phaul shii ji pha habiu dang shii khinyama ruang noh mua pha noh ne Anthiphathris hà thog dun. <sup>32</sup> Ji pha thimiang duine rey mage shii lai lua pha siphahithek è sthuh pho shii Phaul rog wuii ge ne awaithek ne awaithek rai pha ithua hà idoh khid din dun. <sup>33</sup> Ithek Phaul shii Khaesarea hà noh thog srane jigigam ji badri shii phi srane Phaul de ai wad shii boh ne thoh marui. <sup>34</sup> Ji pha badri è ji pha jigigam tham ne riig srane Phaul shii sai, “Na ne khi pha du-ua hà rai pha bran lei?” Badri ji è Phaul ne Khilisia ithua hà rai pha bran rone thieg mage shii. <sup>35</sup> Ai è yao, “Gune na shii layog ninphothek wuiithogmage shii na miyao nuii phi phro.” Ji è yao ched ne ji pha badri è awai sandrithek shii yung ne Phaul shii badri awai hò boh bucho shii ilkhi rek ne rai yi.

## 24

### *Phaul shii layog nin*

<sup>1</sup> Inai daguii rey ched pha idoh Ananias beng pha boh phabi nane giak dukhothek nane Therthulus Ipheypho rog shii Khaesarea hà wuii thog ruii. Ithek ne Badri Felikhs moe shii wuii srane Phaul shii bajo nin ne yao.

<sup>2</sup> Chiihphado Phaul shii bucho noh ne wuii yi. Phaul shii bucho noh thog shii, Therthulus è Phaul shii layog nin pha jao ruii:

“Na ne bajo wie! Naro wie dumuii ji è gathek shii bajo ishak thog dang pha liijiing rek phi ro, chiih-è, soh shii wie rey yi pha bajo miigak bliathek rek phi ro! <sup>3</sup> Gathek è hì ne khi hà magungde idang rey yi ro. Ji è gathek ne na shii bajo laso bajo wie now phi ro. <sup>4</sup> Gune na ishak bajo phiang thog pha

ayie yang ro, jimagunde, gune na shii khung ne yao phro, na de ùjia jum rek ne gathek miyao ji nuui phi bo. <sup>5</sup> Gathek è hì pha bran ne bajo buii bran rone doh muui ro; ai è zab sohjambling pha Jewthek shii awaithek chung gui rai yi ro; ai ne Nazarene pho pha dumuui ro. <sup>6</sup> Ai ne Misiahò de jia rek muui ro, ji-è, gathek ne aishii zum mua ro. <sup>7</sup> Gathek è guithek pha Iphey è aishii che pha nung rai shii Lysias dumuui boh wuii srane banghiie rek ne aishii ne gathek è noh dun ro. <sup>8</sup> Nawaide aishii musai sai arone, ai muchang ji nuui ne, nyie Chiang è aishii gathek è layog nin pha ji ne nyathieg ruii phro.” Chiihphado Lysias è yung srane airo nin pho shii ibi wuii yi. <sup>9</sup> Jewthek de ithek rog dog srane ji pha layog nin phane izai chak rone yao dun.

*Phaul è Felikhs moe shii awaishii haro rek*

<sup>10</sup> Ji pha badri è Phaul shii de awai Chiang yao yi pha phi. Ji-è, Phaul de yao pha jao,

“Gune thieg chak ro! Na ne ichiih soh pho shii miyaothek ne bajo ishak thog dang pha wie che phi ne rai pha bohkhoh ro, ji-è, gu de na moe shii gui shii haro rek phi pha miyao yao pha wie than muui ro. <sup>11</sup> Hi ne nawai de nyathieg ruii phro, gune inai snanyi pha ibi shii Jerusalem hà sia pha wuii dun. <sup>12</sup> Jewthek è gune Misiahò hà hanyie rog shii de khnaing noh pha adoh ro, chiih-è gune Jewthek misiahòthek nane ji pha rajan hà khi hà de wuii magungde branthek shii buii yao ne srobro rek pha adoh ro. <sup>13</sup> Chiih è, sudooh ichiih shii de ithek è nin ji ne izai rone nyie miyao è khagi arek mua ro. <sup>14</sup> Gune hì nuui rone nathek shii yao: Gune hì pha Lumuui è lua ne gethek ro blangthek pha Hamangkhung-aphuui shii sia phro, jishii ithek è hì ne biidiie rone yao. Jishii, gu de Moses nane chaigpho mizey marui pha Iphey pha jigigam jithek ne migi now ne rai phro. <sup>15</sup> Gu de ithek duine Hamangkhung-aphuui shii buii nane wie pha branthek ne hòi din pha miyao ji luthong ne rai ro. <sup>16</sup> Ji è idang gune gui munow rek pha ji ne Hamangkhung-aphuui nane branthek moe shii sang doh yi phro.

<sup>17</sup> “Gune Jerusalem è bajo idam thog dang pha ruang rai dun pha ji è gune gui branthek è bang yie srane sia ne zud pha wuii dun. <sup>18</sup> Gune Misiahò shii muhui hui; idoh shii ithek è gu shii doh dun ro. Thiichiih gu rog shii bran brog ne oi iang ro, chiih-è anuui pha rek pho ne oi iang ro. <sup>19</sup> Thiichiih shii ne Asia du-ùà hà rai pho Jewthek um bie ro; yangne ithek awaithek de gu shii buii nin pha miyao um phade um phro; ji è awaithek de na moe shii wuii srane yao chid phro. <sup>20</sup> Gu è limiang moe shii riu mage shii nyie suruii blia rek ne biwo doh dun lei ne ichiih pha bran shii de yao yi bo— <sup>21</sup> ‘Gu è iy pho hòi din phrone limiang moe shii gang yao pha Chiang è gu shii nin mua bie pha ichiih riu yi ro.’ ”

<sup>22</sup> Ji-è, Felikhs ne miyao chang pha lumuui ne wie thieg mage ne nuui pho shii noi ho srane yao, “Yungpho Lysias ji wuii thog ruii shii gu è ithek pha miyao hì phak ne yao phi phro.” <sup>23</sup> Ji-è, ji pha Badri è buii shii ilkhi rek pha sandri kho shii Phaul shii ilkhi rek ne rai pha yung, jishii thaluii mua pha phi bo è yao, ijakthek è aishii nyie chid phajithek yie ne phi yi bo.

*Phaul ne Felikhs nane Drusila moe shii wuii yi*

<sup>24</sup> Inai ùjia idoh shii, Felikhs ne awai yiy Drusila rog shii wuii dun, hanyie yi Jew ro, rog shii wuii srane Phaul shii isa moe shii noh yi srane Phaul è Isu Masi shii migi now pha miyao yao pha ji nuui. <sup>25</sup> Jishii Phaul è bajo wie pha, alijieg yi pha nane dinne che pha inai thog ruii pha miyao yao pha yoi mage ne Felikhs ne rum dun pha ji è Phaul shii yao, khae, “Na ne nya dun

mua sha phro. Khuchung magungde gu è ishak mua ruii arone, na shii nya ho ruii phro.” <sup>26</sup> Ji pha ishak phi phane ji pha Badri ne Phaul è aishii bang phi ruii phro luthong ne phi phro; ji pha Chiang è shak shii awai de Phaul ho ne miyao yao wuii.

<sup>27</sup> Dam nyi rey ched pha idoh è Phorsius Festhus è Felikhs pha badri ithua ji yang ne yie dun. Felikhs è Jewthek è aishii wie now yi pha Phaul shii phatheg hà chab ne thoh marui.

## 25

### *Phaul è bisiu shii khung ne lia*

<sup>1</sup> Da-uom pha idoh è ji pha Festhus ne ji pha du-ua pha badri thog dun, ai ne Khaesarea è Jerusalem hà wuii dun, <sup>2</sup> Thiisa hà boh phabi nane Jewishthek pha wegthek è Phaul shii nin pha miyaothek ai moe shii yao. <sup>3</sup> Ithek è Festhus shii ithek miyao nuii ne Phaul shii Jerusalem hà ithek moe shii noh din bone lia, nyieliieshii, ithek ne Phaul shii lumuii hà ua muui pha phak rai ne lia. <sup>4</sup> Festhus è chang, “Phaul ne Khaesarea phatheg hà ruii muui ro, chiih-è, gune thiisa hà jog dun din phro. <sup>5</sup> Ji-è, nathek ro dumuiithek gu rog shii Khaesarea hà wuii ge srane ji pha bran è buii blia rek muui arone thiisa hà nin yi bo.”

<sup>6</sup> Festhus è Jerusalem hà damiliao dasua thog pha rai marui ne Khaesarea hà dun din dun. Ji pha thimiang duine è rey mage shii Festhus è miyao phak ne che pha ithua shii wuii srane Phaul shii bucho noh ne wuii yi. <sup>7</sup> Phaul è thiichiih wuiithogmage shii Jerusalem è wuii thog pha Jewthek è aishii bajo awie awie pha miyao yao ne nin pha jao ruii. Jimagunde ithek ne khagi aphii mua. <sup>8</sup> Jithek yao magungde Phaul è awaishii haro rek ne yao, “Gune Jewthek pha Iphey shii buii chun pha nyie blia arek ro; chiih-è Misiahò nane Roman Bisuu shii buii chun pha blia de arek ro.”

<sup>9</sup> Ji è yao magungde Festhus ne Jewthek è aishii wie now yi pha Phaul shii sai din, “Na ne hi pha miyao ne Jerusalem hà wuii srane gu è che yi bo è now bey?”

<sup>10</sup> Phaul è yao din, “Gune Bisuu pha ibi awai ro chua pha hò shii riu muui ro.” Gune Jewthek shii nyie buii blia arek ro, ji ne nawai de wie thieg iwa! <sup>11</sup> “Gu è Iphey shii buii chun muui arone, chiih-è, gu è gui iy dun pha buii blia rek muui arone, gune ji è yo yi pha alia phro. Chiih è, ithek è gu shii gidieg rek pha ji jia asi arone, hanyie de gu shii ithek wad shii aphii mua phro. Ji-è, gune Bisuu è che bone è lia muui ro.”

<sup>12</sup> Chiiphado Festhus è yua pho shii nung srane chang din, “Na è Bisuu moe shii yao pha khung pha ji è Bisuu è na shii nyadun yi phro.”

### *Phaul è Agripha bisiu nane Bernise moe shii riu yi*

<sup>13</sup> Inai Iujia rey ched pha idoh è Agripha nane Bernise ne Khaesarea è Festhus shii si pha wuii thog ruii. <sup>14</sup> Thiichiih shii isa ne inai Iujia rey pha rai ched mage shii Festhus è Phaul pha mua ne saja ji shii yao phi: “Ichiish shii Felikhs è phatheg hà chab ne thoh marui pha bran jia um ro; <sup>15</sup> Gu è Jerusalem wuii dun shii, Jerusalem pha Jewthek, Phabi kothek nane dukhothek è aishii buii nin ne gu shii de aishii nin bone lia. <sup>16</sup> Jishii gu è ithek shii yao, Romanthek gathek ne khuchung de buii rek pha bran shii ne hanyie ninphothek rog shii ò si yi ne awaishii haro rek ne miyao ayao sapho ne thaluuu nin pha lajia oi ro. <sup>17</sup> Ithek ichiih wuii thog shii, chiiphado, gu è nyie ishak de amua yi. Jishii din pha idoh shii gu è phak pha ithua hà

dug srane Phaul shii thiichiih noh yi phro. <sup>18</sup> Aishii ninphothek ne aishii nin pha jai ne nin shii, ithek minin ne gu munow duiine nyie buii rek pha lumuii adoh phi ro. <sup>19</sup> Zab ithek ne aishii khnaing pha ji ne awaithek ro giang nane bran beng Isu pha Chiang è ro, hanyie yi iyjong pha ji ne, Phaul è a-iy ba rone bey rai phro. <sup>20</sup> Gune ji pha miyao ne che ne aphak mua phi pha ji è ji pha miyao Chiang è wie thieg pha Phaul shii sai phro, na ne Jerusalem hà wuii srane nin pha hì è chua yi habey? <sup>21</sup> Ji isai mage shii Phaul è gu shii khung ne yao ro, gu shii ne sandri pha iliing shii rai yi pha lia; chiih-è Bisiu awai è airo blia ne phak yi bo. Ji-è gune yung ne aishii Bisiu hà athoh ge shapho sandri iliing shii ruii yi phro.”

<sup>22</sup> Agripha è Festhus shii yao, “Gu de ji pha bran miyao nuii pha now ro.” Festhus è chang, “Thimiang shii nuii bo.”

<sup>23</sup> Ji pha thimiang duiine rey mage shii, Agripha nane Bernise boh dumuii rek ne siphahi kthothek nane ji pha rajan shii kho pha brantheke ro shii bran phiing um iang pha hò shii khud dun. Festhus è yung ne Phaul shii thiichiih noh ba yi. <sup>24</sup> Festhus è yao, “Agripha Saja nane ichiih gathek ro shii um pha brantheke wo: Nawaithek de riig mage bo! Hi pha bran ne hanyie ichiih nane Jerusalem hà um pha Jewtheke è aishii nin pha suanghàw yie thog muui ro. Itheke è aishii asieng sha yi bo è ziak muui ro. <sup>25</sup> Jishii gune ai iy yi pha miyao yao pha nyie lumuii adoh phi ro. Chiih è, ai è de aishii Bisiu shii wuii ge bone gu shii khung ne yao pha ji è gu de aishii wuii ge pha phak ne ruii phro. <sup>26</sup> Jishii, gu shii nyie miyao siu zey Bisiu shii thoh pha oi phi ro. Ji-è, sudoh gune aishii nathek moe shii nane Agripha Saja na moe shii noh ne riu yi ro. Yangne ne hì pha suruii chua ne yao mage shii gu de nyie magungde nya zey mua phro. <sup>27</sup> Chiih-è aishii buii yao ne ai ichiih wie zey ne athoh ge pha ji gune wie athan ro.”

## 26

### *Phaul è awaishii Agripha moe shii haro rek ne yao*

<sup>1</sup> Agripha è Phaul shii yao, “Nashii de nawai Chiang shii yao pha ishak phi ruii ro.” Phaul è awai wad phia bi srane haro rek hìtheke yao:

<sup>2</sup> “Agripha Saja wo! Sudoh gune chua wie mua ne na moe shii Jewtheke è khinyama jia nin pha miyao Chiang gui shii haro rek mua yi pha miyao yao mua ro.” <sup>3</sup> Na ne Jewishtheke pha Iphey nane gu rai phatheg wie thieg ne rai pha bran ro. Ji-è, gune na shii khung ne yao phro, gu miyao hì jum rek ne nuii phi bo.

<sup>4</sup> “Jewtheke ne lu è gune khi è rek ne riig pha ji zab thieg chak ro.” Itheke de gune igobi gui soh hà khi è rek ne rai pha ji, chiih-è Jerusalem shii de khi è rek ne rai pha ji thieg ro. <sup>5</sup> Itheke ne gu shii wie thieg phro. Itheke è yao yang pha now arone nya yao ruii phro. Gune igobi khi è rek ne Pharisitheke bran rek ne bajo gang Iphey rek ne rai pha bran ro. <sup>6</sup> Sudoh gune ichiih shii riu ne phak yi phane gu è Hamangkhung-aphuii è gethek pha blangtheke shii sbang rek marui pha ji shii luthong pha Chiang riu yi dun ro. <sup>7</sup> Gethek brantheke pha jad snanyi è luthong muui pha Hamangkhung-aphuii shii hanai habiu sia pha ji shii luthong mage ne riu yi bie ro. Saja wo! Hi pha Chiang è sudoh na moe shii Jewtheke è gu shii layog nin bie ro. <sup>8</sup> Ichiih um pha nathek de nyie rek ne Hamangkhung-aphuii è iy dun pha ji hòi jong yi pha miyao ji shii migi now pha diig than dun nebey?

<sup>9</sup> “Gu de Nazareth pha Isu shii bajo buii rek pha lumuii sow ne buii rek noh phro.” <sup>10</sup> Ji-è gune Jerusalem hà rai shii de ji è rek marui. Gune Phabi bohthek è jigigam yie srane Hamangkhung-aphuii pha branthek shii zum ne phatgeg chab muui srane ithek shii ua pha, gu de haro rek gieng. <sup>11</sup> Bajo ishak ne ithek shii Jewthek misiahòthek hà bajo diig phi srane awaithek migi ji thoh yi pha rek phro. Gune ithek shii bajo buii rek ne ithek shii diig phi pha gai rajantheek de thog dang pha wuii dun.

*Phaul è awai lai dun pha miyao yao*  
(Blk 9:1-19; 22:6-16)

<sup>12</sup> Ji è rek pha blia Chiang è gune bajo blu nane muyung Phabi kothek è jigigam mua ne Damaskhus hà wuii dun. <sup>13</sup> Ji ne lumuii hà hanai duchoi rey pha ishak shii ro. Saja! Na de nuui mage bo, gu è hasiang è de bajo sang chuang pha muchuang jia Hamangkhung è gu nane gu rog shii wuii gieng pho moe shii wiid thog ruii. <sup>14</sup> Gathek ne zab nyiak hà thud dun, chiih-è, gune Hebriu è yao pha miyaogam jia yao pha yoi ruii, Saul, Saul! Na ne nyie rek ne gu shii diig phi phlei? Na ne suwuii è Ithong muchang shii lai gang pha duine nawaishii zuang dinne riie yi ro. <sup>15</sup> Gu è aishii sai, Ithong wo! Na ne hanyie ga? Ji pha Ithong è chang, Gune Isu ro, hanyie shii na è diig phi pha ji ro. <sup>16</sup> Jishii na ne jai ne nawai lai shii riu mage bo. Gune na moe shii dong khlei phane na shii gu khiao gua pha dong phro. Na ne branthek shii na è sudoh shii nyie doh muui pha ji nane phariang è na shii nyie doh yi phajithek yao chid phro. <sup>17</sup> Gune na shii Jewthek nane Gaibrantheek shii thoh ge srane nathek wad è ragia rek phi phro. <sup>18</sup> Nane ithek mieg hong phi ne igiia è isang hà rai yi chid phro, chiih-è Sakhathong pha blu è Hamangkhung-aphuii shii rai yi chid phro. Ji arone, awaithek è gu shii migi now pha ji è awaithek layog khung dun srane Hamangkhung-aphuii gua pha branthek rog rai pha ithua mua ruii phro.

*Phaul è awai bliathek yao*

<sup>19</sup> Agripha Saja wo! Gune Hamangkhung è ji pha ibang mua phane asnai mua phro. <sup>20</sup> Gune ithek shii awaithek layog rek pha lumuii è thado riie ne dun srane Hamangkhung-aphuii shii izai now chid pha miyao yao marui ro; chiih-è, ithek de layogthek è lubukhid gey rone doh yi pha bliathek rek ne doh yi bo. Jithek pha miyao ne gu è igobi Damaskhus hà, chiih-è Jerusalem hà de, chiih-è zab Israel pha soh Judeathek nane Gaibrantheek shii de yao marui ro. <sup>21</sup> Ji phachiang è Jewthek ne gune Misiahò shii um iang shii zum srane ua muui pha rek. <sup>22</sup> Ji è rek magungde Hamangkhung-aphuii è gu shii nong phi ne sudoh gune ichiih shii lu pho um ne de, boh pho um ne de zab moe riu ne ji pha miyao yao pha mua dun ro. Gu è nyie yao pha ji ne buyo shii chaigpho nane Moses è ji ne izai rey ruii phro è yao marui pha miyao ji yao ramuii ro: <sup>23</sup> “Masi ne diig rek chid phro, chiih-è, iyjong pha è de igobi hòi din phro, chiih-è Jewthek nane Gaibrantheek shii de muchuang pha giawo yao ruii phro.”

<sup>24</sup> Phaul è awaishii haro rek shii, Festhus è aishii ziak ne giung, “Na ne biu dun ara, Phaul! Na boh miidab è nawaishii biu pha lumuii hà khiyid ne noh dun ara!”

<sup>25</sup> Phaul è chang, “Naro ithong! Gune abiu ro. Gu è nyie yao ramuii pha ji ne izai chak ro! <sup>26</sup> Agripha saja! Gune na shii gui Lubo boh rek ne nya yao mua phro nyieliieshii nawai de hithek ne zab thiegjong ro. Gune thieg muui ro na de hithek rey phane zab riig jong ro, Hithek rey phane ug ne rey pha asi

ro. <sup>27</sup> Agripha Saja! Na de chaigpho shii migi now bey? Gu munow arone, Na de migi now chak ro!”

<sup>28</sup> Agripha è Phaul shii yao din, “Ichihih pha ishak lu shii na ne gu shii de Masipho rab mua pha now bey?”

<sup>29</sup> Phaul è chang din, “Ishak dum magungde, phiang magungde, shiirnai jia hi thoh bie ne Hamangkung-aphuii shii gune na nane sudoh ichihih shii khinyama pha bran gu miyao hi nuui ne rai phothek ne gu duiine rey pha sia phro!”

<sup>30</sup> Saja, Badri nane Bernise chihih-è zab brantheek jai dun, <sup>31</sup> Brantheek dun ched pha idoh è awaithek chun yao rai, “Hi pha bran è iy chid pha nane phatheg chab muui pha blia rek pha adoh phi ro.” <sup>32</sup> Ji-è, Agripha è Festhus shii yao, “Hi pha bran è Bisiu moe shii yao pha khung ne alia arone aishii ne thoh jong ge phro.”

## 27

### *Phaul è Rom hà wuii pha run shii in dun*

<sup>1</sup> Thiichihih shii Ithaly hà in ne wuii pha phak rai mage shii, ithek è Phaul nane gai phatheg chab phothek shii ne Julius shii phi muui, Roman arming pha ophispho è “Bisiu arming” shii ho <sup>2</sup> Ji-è, gathek ne Adramythium pha kho ring hà ran ne Asia hà ran pha run um iang pha du-ùà wuii thog ne in ne wuii dun. Ji è wuii shii gathek rog shii Mesidonian Thesalonikha hà rai pha bran jia de gathek rog shii wuii gieng. Ai beng ne Aristharkhus ro. <sup>3</sup> Ji pha thimiang duiine è rey mage shii gathek ne Sidon hà wuii thog dun. Julius ne Phaul shii wie now pha bran, ji-è, Phaul shii awai ijaktheek shii wuii ne si yi srane awai nyie chid phajithek phi yi. <sup>4</sup> Gathek ne ji pha ithua de thoh marui ne wuii din dun. Hasam boh sam ramuii pha ji è gathek ne Khyphrus pha gachung pha nui hà wuii thog dun. <sup>5</sup> Gathek ne thiichihih è de dinne Khilisia nane Phamphyliya pha khamuii jithek hiia ne in srane Lysia hà Myra beng pha ithua shii wuii thog dun. <sup>6</sup> Thiichihih shii ophispho è Alezendria hà è Ithaly hà ran pha run jia doh ruui, ji-è, ai ne gathek shii ji pha run shii khud ne in ne thoh ge.

<sup>7</sup> Gathek ne diig rek ne hanai rasey pha run shii in ne Khnidus beng pha bajrai shii thawun wuii thog ruui. Hasam boh sam pha ji è gathek ne ibi awuii mua pha thiichihih shii gathek ne buzam in ne Wok Salmone è dong srane wuii ne Khrethe pha gachung nui è wuii dun. <sup>8</sup> Gathek è bajo diig rek ne gachung pha nui è Safe Harbors ithua shii thog, jine Lasea bajrai è ruang asi pha ithua shii wuii thog dun.

<sup>9</sup> Gathek ne bajo inai thiichihih rai dun, chihih-è ibi awuii mua pha dinne bajo diig rey dun. Itek ro khung dun pha inai ji ne hiia jong; Phaul è brantheek shii phriie ne yao: <sup>10</sup> “Hò-aphuiithek wo! Sudoh gethek ichihih è wuii din pha kho lumuii ne bajo diig thog pha um ro! Lumuii hà gethek miihan nane run shii de bajo buii rey pha doh muui ro, chihih-è, brantheek de iy dun pha doh muui ro.” <sup>11</sup> Phaul è ji è yao magungde, arming pha ophispho ne run khiyid pha ilkhi nane run muspho pha miyao nuui dun. <sup>12</sup> Run thiigang pha ithua shii ne hakhang pha ishak shii riie pha awie ro. Ji è bajo brantheek riig ne Phoenikhs thog yi pha rek, ji è rek mua arone gethek ne Phoenikhs shii ji pha hakhang ishak hiia yi pha rai. Phoenikhs ne hayang nane bichiu hà rai ne run thiigang pha ithua Khrethe ji ro.

*Khamuii shii hasam sam ne khedthog*



13 Hayang è jum hasam jia sam ne thogmage ne brantheck è noh, ithek ne awaithek muphak pha miyao jithek nyarey mua è now ne run shii shiie jarog um pha ithang jithek sey srane Khrethe pha khamuii ring moe hà riie ne khiyid ne wuii dun. 14 Ji è rek mage shii, khthiie Hasam boh jia sam ne thog ruii, Ji pha Hasam ne “Hakhoi bichiu” pha hasam rone ibeng ne ruii pha hasam ro, gachung è sam ruii pha hasam ro. 15 Ji pha hasam è run ji shii sam ne reng mage. Ji pha run ne gathek dun pha lumuii hà riie ne akhid mua pha ji è gathek è run ji hasam è khi-è rek ne sam ne noh dun pha ji rek yi. 16 Gathek ne hayang pha Khauda pha gachung è dong ne wuiiramuii shii iu run jia shii boh run hà chab srane iliing yi ne ragia rek phi. Thiichiih shii gathek è runthek shii hasam è sam ne awie pha arey yi pha iujia ragia rek mua. 17 Itheck ne run ji shii risiong è ri srane shan ne joi ne iring hà ruii. Itheck ne Libya pha balimuang duchoi shii lim mage è now ne rum ne muna shii chiing ne thazam khia srane hasam è khi è rek ne reng dun pha ji ran yi. 18 Ji pha hasam boh khed phane athodang pha khed ne rai dun. Ji-è, ji pha thimiang duiine è rey mage shii ithek è run shii han pha manathek zab kho hà chiing ne fen muii. 19 Chiuh è, idoh pha inaithek shii ithek è run shii han pha manathek ne jia jia rek ne kho hà chiing ne fen muii. 20 Inai bajo thog dang pha gathek ne hasiang dadiang adoh dang pha rai dun. Ji pha hasam ne athodang pha bajo boh boh sam ne rai dun. Ji è rek mage ne gathek ne ragia rey yi pha aluthong pha rey dun.

21 Ji phadoh è zabtheck ne michie achie pha bajo phiang ishak rey sha dun shii, Phaul è riu srane brantheck shii yao! “Brantheck wo! Nathek è gu miyao nuii ne Khrethe è awuii arone, gethek shii de diig nane manathek de afen chid iwa. 22 Jishii, tuh gune nathek shii khung ne yao phro, lububo rek boh! Nathek ro chai de a-iy sha phro, jishii, run hi ne awie pha rey bie phro. 23 Dibiu gu khi hà um pha nane gu sia pha Hamangkhung-aphuii hamangkhliie gu shii wuii thog. 24 ‘Chiuh è gu shii yao, Phaul! Nane arum chid shah rabo, na ne Bisiu moe shii riu chid phro. Hamangkhung-aphuii è awai wie pha è nane run shii in pho zab chai shii de ragia rek phi ro.’ 25 Brantheck wo! Nathek ne lububo now ne rai sha bo! Nyieliieshii gu è Hamangkhung-aphuii shii izai now ro, hithek ne gu è khi è yao pha ji duiine rey ruii phro. 26 Jishii, gethek ne gachung ring jia shii shau thog ruii phro.”

27 Hithek ne habiu snawi rey jong dun ro. Gathek shii ne hasamkhanoi ji è Meditheranean hà shau ne noh dun. Ji pha ibiu shii run khiyid phothek è gachung moe shii thog ramuii rone than ruii. 28 Ji-è, ithek ne ithang shii lubao jia phang srane kho bucho shii fen, ji pha kho ne giia wieng jia è ichag pha jam bie pha thieg ruii. Iujia idoh è de ji è rek din shii ithek ne ji pha khamuii ne giia sadigey bie rone thieg ruii. 29 Itheck ne ji pha run ne shak ring shii kham mage è rum ne run idoh shii jarog wi ji khia ne fen srane hamiang jog rey yi pha sia. 30 Run khiyid pho è run è yo pha surui. Run iu ji shii jia ne khamuii shii reng ne. Itheck ne shiie jarog ji fen pha wuii pha duiine rek srane yo pha saro. 31 Ji è rek magungde, Phaul è arming pha ophispho nane siphahitheck shii yao, “Khiyid phothek ne run shii ashid pha aruii arone, nathek ne ragia rey mua pha aluthong chid rabo.” 32 Ji è yao mage ne siphahitheck è run iu shii thiigang pha risiong laig thiak ne ran yi.

33 Hamiang arey ba pha ibi shii Phaul è ithek shii michie chie yi pha yao: “Natheck ne inai snawi rey dang pha nyie de achie dang pha khan ne rai jong ro. 34 Gu è ithek shii khung ne yao; ithek de michie iujia chie mage bo; ithek

ne ragia rey yi pha chie chid, ithek pha khaziang jia de ashan mua phro.” <sup>35</sup> Ji è yao ched ne Phaul è iwebthek chiing srane ithek moe shii Hamangkhang-aphuii shii laso phi srane phed ne chie pha jao ruii. <sup>36</sup> Ithek de lubu boh rek srane zab è de michie iujia chie gieng. <sup>37</sup> Thiichihih shii gathek ne wieng nyi è samiley è riig pha branthek um ro. <sup>38</sup> Zab branthek chie ched ne ithek è run ji shii thoh rey yi pha phiugthek chiing ne kho hà fen muii.

### *Run jo dun*

<sup>39</sup> Hanai rey mage shii, run shii in pho branthek ne khamuii ring shii ran thog sha ruii rone athieg mua phi. Jishii, ithek è kho ring doh ruii. Ji-è ithek ne ji pha iring pha ithua shii ran yi pha phak rai. <sup>40</sup> Ithek è run ji shii khamuii hà zem yi pha shiie jarog thang jithek laig muii srane khiyid pha ithang ji de sey muii. Ji è rek ched ne ithek ne jai srane run ran pha ibi shii riu srane hasam è ran ji shii ibi hà reng ne ran yi pha rek yi. Ji è rek mage ne gathek ne khamuii ring hà riie ne run dun. <sup>41</sup> Ji è rek shii, ji pha run ne balimuang shii kham ne bali bucho hà zem dun; run pha ibi ji ne bali shii dak ne ibi aran mua pha rai dun. Ji è rek shii run pha idoh de gashao khed pha ji è zab dum dum jolaig dun.

<sup>42</sup> Thiichihih in pha siphahithek è phattheg chab pho ne kho phad srane yo dun è noh ne phattheg chab pho shii zab ua muii pha rek. <sup>43</sup> Ji è nung rai magungde, arming pha ophispho ji ne Phaul shii ragia rek phi pha noh ne ai è ji è rek pha aphi. Ji arek yi pha ai è branthek hanyie è kho phad lie pho shii kho hà biung srane kho ring hà phad ne dun yi pha yung. <sup>44</sup> Zab ji è rek ne kho hà biung gieng. Giak ne hingphing shii, giak ne run ji è jolaig pha idumthek shii khoh ne fuang khia dun. Ji è rek ne gathek zab ne kho ring dun thog ne ragia rey dun.

## 28

### *Maltha hà*

<sup>1</sup> Gathek ne nyie de achun dang pha iring hà ran thog mage shii gathek è ji ne gachung pha ithua ne Maltha rone thieg ruii. <sup>2</sup> Thiichihih shii rai pho ne gathek shii bajo masangmaliang pho ro, thiichihih shii haphie jao ne phie ruii pha ji è hakhang khang ruii, ji-è, ithek ne bai fu srane gathek shii ho ne ang yi. <sup>3</sup> Phaul è hing pho jia khrab srane bai shii fu mage shii, bai ilua rey mage ne pham jia wuii srane Phaul wad shii chong mage. <sup>4</sup> Thiichihih rai pha branthek è Phaul wad shii pham chong pha ji riig ne awaithek chung yao rai, “Hi pha bran ne sgohpho rek ara! Ai ne khamuii è ragia rey dun magungde, airo khirzey è aishii asieng yi ro.” <sup>5</sup> Jishii, Phaul è ji pha pham shii kho srane nyie de achun dang pha bai shii ziao muii. <sup>6</sup> Ithek ne, ai ne phieng ne hamblo shii thud ne iy dun pha ji riig pha khan ne rai ne de. Bajo phiang ishak thog dang pha khan ne riig magungde aishii nyie chun pha adoh ro. Ji-è, ithek de awaithek khani lai srane yao, “Ai ne jangbang ara!”

<sup>7</sup> Ji pha ithua è bajo ruang asi pha raigthek ne Phublius ro ro, bajo boh gachung. Ai è gathek shii wie ho ne wuii yi ne gathek da-uom airo biwen rey ne rai dun. <sup>8</sup> Phublius pha aphuii ne hakhangzia ne lui khey ne rad srane biang shii thiang ne rai ne um iang. Phaul è ai ugud shii wuii srane sia phi ne wad kho ne gang rek phi. <sup>9</sup> Ji è rey mage shii, zab gai rad pha gachung pho de wuii ne gang dun. <sup>10</sup> Ithek è gathek shii bajo lasen phi ge. Chihih è, gathek è run bucho shii in mage shii gathek è lumuii hà nyie chid phajithek ithek è zab phi gieng.

### *Maltha è Rom shii wuii thog*

<sup>11</sup> Habie uom idoh gathek ne run shii in ne ji yi Alezendria è ran pha ji ro, “jangbang Iwen Beng” pha ji ro, ji pha run ne gachung shii hakhang shak thog dang pha rai marui srane dinne run shii in din ne wuii dun. <sup>12</sup> Gathek ne Syrakhus beng pha rajan shii wuii thog ne ji pha rajan shii inai da-uom rai marui. <sup>13</sup> Thiichiih è de gathek ne run shii in dinne Rhegium pha rajan shii wuii thog dun. Ji pha thimiàng duiine è rey mage shii, hasam ne hayang è sam ruii, ji è gathek ne danyi shii Phutheoli pha bajrai shii wuii thog ruii. <sup>14</sup> Thiichiih shii gathek ne migiphothek shii si ne ithek è gathek shii inai mile thog pha rai marui pha yao. Chiih-è gathek ne Rom hà wuii thog dun. <sup>15</sup> Rom hà migipho è gathek thog pha mua yoi mage shii gathek shii si pha ruang ruang pha Aphius pha bajaraithek pha iring hà rai phothek de wuii thog ne riu ne khan iang. Phaul è ji doh mage ne Hamangkhung-aphuii shii laso phi ne bajo lububo now dun.

### *Rom hà*

<sup>16</sup> Gathek ne Rom shii wuii thog mage shii, Phaul shii awai lum ne rai ba iy srane aishii riig pha siphahi jia ilkhi rek yi.

<sup>17</sup> Inai uom rey ched pha idoh è Phaul è Jewish kothek shii maley ho ne jung, ithek khrab ne maley jung thog shii, Phaul è ithek shii yao, “Gu ijak Israelthek wo, gu è brantheek shii nyie achun habuii shii, chiih-è, gethek blang mizen marui pha Iphey shii de buii arek, gu shii Jerusalem hà phathek chab muii srane Romanthek wad shii phi muii ro. <sup>18</sup> Roman pho è gu shii miyao sai ched ne gu shii thoh din pha noh, nyieliieshii ithek è gu shii gu iy shapho pha nyie bli rek pha adoh phi. <sup>19</sup> Jishii, Jewthek è gu shii layog nin pha ji è gune Bisiu ibi shii khung ne yao pha dun mey ruii. Gune gui brantheek shii layog nin pha lumui oi magungde yao pha rey dun ro. <sup>20</sup> Ji-è, gu è nathek shii riig yang chiih-è nathek rog shii miyao yao yang muii ro. Zai yao chak arone, gune hì è rek ne shiirnai è phang phane hanyie shii Israel pha brantheek è luthong pha Chiang è phang dun ro.”

<sup>21</sup> Ithek è aishii yao, “Gathek shii ne Judea è na Chiang nyie jigigam aphithog ro. Chiih è, hanyie de mua yie ne awuiithog ro, chiih-è na shii buii yao phade ayoi ro. <sup>22</sup> Jishii, gathek ne naro munow ji nuii pha now muii ro. Nyieliieshii, brantheek è na hanyie rog um pho shii bajo gidieg yao ramuii ro.”

<sup>23</sup> Ji-è, ithek ne ji nuii pha inai jia shii dashab rek srane ithek zab Phaul rai pha ithua shii wuii thog ruii. Phaul è, hamiang è habjuang thog dang pha Hamangkhung-aphuii ro zab riichai pha ji yao phi. Ai è ithek shii Isu shii izai now yi pha Moses pha Iphey nane chaigpho miyao marui pha jigigamthek è yie srane yao ne izai now yi. <sup>24</sup> Giak ne ai miyaogamthek ji izai now gieng, chiih-è giak ne izai anow phi. <sup>25</sup> Phaul è miyao jia yao ched mage shii, awaithek chung de a-ò rai pha ithua ji thoh ne dun dun: “Khi è rek ne Ragung So è chaig Aijaya rog phi ne ithek pha blangthek shii yao pha miyao hì ro!” <sup>26</sup> Ai ne hì è yao marui ro,

“Wuii srane hì pha brantheek shii yao mage bo”  
Nathek ne miyao hì nuii ne de miyao ji agao phi phro;

Nathek ne riig ne de ji ne adoh phi phro,

<sup>27</sup> nyieliieshii, hìthek pha bran ne khani bajo liing pha brantheek ro, ithek ne awaithek khohthek zab kheb muii ro, chiih-è awai miegthek siie muii ro,

Ji arek arone ithek mieg de nyadoh mua phro.

Ithek khoh de nyayoi mua phro,  
ithek khanithek de nyagao ruii phro,  
chiih-è ithek de gu shii khid din ne,  
“Gu de ithek shii gang rek phi phro.”

<sup>28</sup> Phaul è miyao jia yao srane maley ji jong yi: “Nathek de thieg mage bo! Hamangkhung-aphuii pha giawo rey pha mua hì ne Gaibrantheke shii thoh ge phro, chiih-è, ithek ne hì pha mua ji shii yoi ruii phro!” <sup>29</sup> Phaul è ji è yao ched mage ne Jewtheke ne awaitheke chung khnaing rai ne dun dun.

<sup>30</sup> Dam nyi thog dang pha Phaul ne gai hò shii rai pha igong phi ne rai marui. Thiichiih shii ai è brantheke hanyie aishii si wuii pho shii wie wuii yi. <sup>31</sup> Thiichiih shii ai è hong ne ai ne bajo boh rek ne Hamangkhung-aphuii pha Sajathua pha ji yao ne lthong Isu Masi pha miyaothek yua marui.

## ROMANTHEK Shii Phaul Re-è Jigigam Yaophi

*Phaul pha jigigam hi ne Romanthek* è Phaul shii wuii ne Roman hà charch rab pha phak bo è yao. Ai muphak ne Masipho duchoi shii blia rek pha now ne ìujia ishak chiihphado, ai bow rog shii, Sphain hà wuii pha yang.

Ai mizey hò ne Masiphothek migi ro miigao ji yao ne zey phi chiih-è Masipho ro blia rek pha ji ne chai chang shii um ro. Hi pha jigigam shii ne Phaul ro mua pha zab miyao um ro.

Chiihphado shii Roman pha charch pha brantheek shii ilab rek ched ne ai è ithek shii sia phi pha ji ithek shii yao, Phaul è jigigam pha miyao ji yao: “Muawie ji è thieg yi Hamangkhung-aphuii è brantheek shii khi-èrek ne awai rog shii rangsua è ruii: Hì ne igobi è yie ne iidoh thog pha migi è ro” (1:17).

Chiihphado Phaul ji pha chang ji huak now. Zab pha brantheek shii, nyi manyi Jewishthek nane Gaibrantheek shii Hamangkhung-aphuii rog shii rangsua ruii chid phro, chiih-è zab pha ò shii ne layog pha blu bucho hà ro. Brantheek ne Hamangkhung-aphuii rog shii rangsua ruii pha ne Isu Masi ro migi ji è rey ro. Dinpha Phaul ro miyao ne chai wo yi Masi rog shii ò rek ne ji è phua ne Hamangkhung-aphuii rog shii siangthang rey ro. Migipho ne Hamangkhung-aphuii rog shii liijiing um ne Hamangkhung-aphuii pha Ragung è Layog nane iy pha blu è ichad rek phi. Muyua 5-8 shii Phaul è de Migipho chai pha Hamangkhung-aphuii ro Iphey nane Hamangkhung-aphuii ro Ragung pha blu chang shii mulo. Chiihphado guaphasamoy è musai rog shii rai ne Jewishthek nane Gaibrantheek ne nyie khi-èrek ne Hamangkhung-aphuii è phak pha brantheek rog shii khriig mage phlei. Phaul è thiichuih shii jong Jewishthek è Isu shii snai pha ji ne Hamangkhung-aphuii ro muphak ne zab brantheek shii Isu Masi hà Hamangkhung-aphuii ro bushun thog yi, chiih-è ai ne migi rek Jewishthek ne idang Isu Masi shii asnai phro. Idohhè shii Phaul è Masipho chai ne khi-èrek ne sieng chid pha ji zey, zab è miigak ne gai rog shii khi-èrek ne miie pha chang shii zey. Ai è Hamangkhung-aphuii ro blia rek pha muyua ji yie, Masipho ne soh shii nane nawaithek chung blia rek chid phro, chiih-è khi-èrek ne gethek lubu shii masipho duiine now chid. Ai è jigigam yi awairo mua nane Hamangkhung-aphuii chang pha miyaogamtheek rog shii jongmuii.

### **Ìiing shii um pha ji**

Yaophi pha nane Chiang shii (1:1-17)

Hamangnyiak pha brantheek ne giawo chid (1:18; 3:20)

Giawo pha Hamangkhung-aphuii ro lumuii (3:21; 4:25)

Masi shii iwo chai (5:1; 8:39)

Israel shii Hamangkhung-aphuii ro phak (9:1; 11:36)

Masipho ro chai pha Iphey (12:1; 15:13)

Jong pha nane hanyiehanyie ro salamtheek (15:14; 16:27)

<sup>1</sup> Phaul è, Masi Isu ro khiao nane guaphasamoy gua chiih-è Hamangkhung-aphuii ro Mua Wie ji yua pha gua ne ho.

<sup>2</sup> Mua Wie ji ne buyo è Hamangkhung-aphuii pha chaigtheek chang è sbang rekjong, ji duiine gangtheek jigigamtheek shii de zey ne um ro. <sup>3</sup> Hì ne gathek ro Ithong Isu Masi, airo Dufuii chang ro: ji duiine airo siu de,

ai ne Dawid ro riing è giak; <sup>4</sup> Airo ragung pha so pha bohblu è ne, ai iy ne sieng pha ji è ai ne Hamangkhung-aphuii Dufuii rone doh yi. <sup>5</sup> Ai Chiang è Hamangkhung-aphuii è gu shii Masi Chiang shii guaphasamoy pha chua phi, ji è sohthek pha zab pha branthek migi nane nuui ro. <sup>6</sup> Rom hà hanyie um pha hi de lao ne, hanyie shii Hamangkhung-aphuii è Isu Masi ro rey pha ho ro.

<sup>7</sup> Chiih-è Rom hà nathek zab shii gu è zey hanyie shii Hamangkhung-aphuii è miie ne awai ro bran re yi pha ho:

Hamangkhung-aphuii gethek Aphuii nane Ithong Isu Masi è nathek shii bushun nane liijing phi bo.

### *Laso phi pha misia*

<sup>8</sup> Igobi, gu nathek zab shii Isu Masi Chiang è Hamangkhung-aphuii beng shii laso phi, nyieliieshii zab pha sohjambling è naro migi ji yoi ramuii ro. <sup>9</sup> Hamangkhung-aphuii ne guro khagi ro ji è gu nyie yao pha ji ne izai ro—Hamangkhung-aphuii hanyie shii guro zab lubu rog shii blia rek chiih-è Mua Wie yua pha ji ne ai Dufuii Chiang shii ro. Hamangkhung-aphuii ne thieg gu nathek shii nowkhlei <sup>10</sup> idang pha ishak gune sia. Gune Hamangkhung-aphuii shii airo wie ji iidohè shii gu shii rab mua srane thuh nathek shii wuii mua din pha ji lia. <sup>11</sup> Gune nathek shii bajo riig yang pha now ro, chiih-è nathek shii gang rey yi pha ragung khirzey ji thang pha now ro. <sup>12</sup> Gu è nyie yao pha ji ne gu nane nathek ne gethek chung ò ishak shii nong rai pha rek bo, nathek ne gathek migi Chiang è chiih-è gu yi nathek migi Chiang è ro.

<sup>13</sup> Nathek now bo, guro khuiinotek nane bumuiithek, gu è nathek shii wuii pha bajo phak, jishii idang nyie pha lei rey dun. Gu ne Gaibrantek pha duchoi hà de blia rek pha duine, gu nathek duchoi shii de migi arekpho shii de yang mua ne noh pha now ro. <sup>14</sup> Chiih-è gune zab pha bran ro blia rek chid pha um ro, thiig shii nane jabiing shii, jigigampho shii nane jigigam azey pho shii de ro. <sup>15</sup> Ji-è, gune Mua Wie ji ne nathek hanyie Rom shii rai pho shii yua pha bajo yang muui ro.

### *Muawie pha blu*

<sup>16</sup> Gune Muawie shii awo ro; hi ne Hamangkhung-aphuii ro blu è hanyie migi rek pho shii zab ragia rek phi, chiih-è igobi shii Jewthek nane Gaibrantek shii de khagi rek phi. <sup>17</sup> Muawie ji è Hamangkhung-aphuii ne branthek awai rog shii khi-èrek ne rangsua ruii pha ji dong phi: hi ne migi è igobi è yie ne jao pha nane jongdang pha ro. Jigigam shii yao, “Branthek hanyie yi migi ji è Hamangkhung-aphuii rog shii rangsua è rai phane sieng phro.”

### *Bran ro ichiig*

<sup>18</sup> Hamangkhung-aphuii ro liijeg ne Hamangkhung è zab layog nane buii branthek chiih-è izai thieg pha ji shii gak pho shii de dong ne gidieg rek ruii phro. <sup>19</sup> Hamangkhung-aphuii è ithek shii lago phi, nyieliieshii nyie thieg mua pha ji ne Hamangkhung-aphuii è ithek shii miang phi ro. Miang ne Hamangkhung-aphuii awai miirab ro. <sup>20</sup> Hamangkhung-aphuii è sohjambling nyarab dang ne, airo adoh pha muna nane, airo idang pha blu chiih-è airo hamang pha so è ne, wie sang è doh jong ro; ithek ne hi pha manathek ne Hamangkhung-aphuii miirab ji è than ro. Ji-è jithek pha branthek è khlam pha ji ne arey sha phro! <sup>21</sup> ithek ne Hamangkhung-aphuii

shii thieg, jishii ithek ne ai è rey pha aishii ne ilab aphì, chiih-è ithek ne aishii laso de aphì. Ji phachiang, ithek munow ne zab khani oi pha rey dun, chiih-è ithek ro khani isloi jine zab igia è ledun ro. <sup>22</sup> ItheK è awaithek shii ithek ne bajo id ro yao, jishii ithek ne bi-ìethek ro; <sup>23</sup> jishii ithek khuchung de a-iy pha Hamangkhung-aphuii shii sia pha khalo shii, ithek ne jangbang è rab pha bran iytheK fuiitheK ibeytheK nane phamtheK shii sia ne rai.

<sup>24</sup> Chiih-è ji è Hamangkhung-aphuii è ji pha brantheK shii ithek lubuthek shii izia khama rek yang pha ji ithek shii zab phi ne rek yi, chiih-è ithek awaithek chung biwo de rek rai. <sup>25</sup> ItheK isbang Hamangkhung-aphuii shii de biidiie hà zia muui; Rab phi pho hanyie shii idang chiong chid ne sia pha khalo shii Hamangkhung-aphuii miirab jishii sia ne rai! Amen.

<sup>26</sup> Nyieliieshii ithek jithek rek, ji è Hamangkhung-aphuii è biwo yi ithek lakhung shii phi muui. Hò-amuii rang de Iphey shii arai pha thoh muui srane gai rog shii siulao rek. <sup>27</sup> Ji duiine hò-aphuiitheK è de awaithek yiy rog shii zen ne men rai pha ji è de thoh muui srane gai bimithek rog shii men ne lua. Hò-aphuiiphing de awaithek chung biwo rek rai, chiih-è iidoh shii awai michid ne rek pha asi pha blia ji è ithek lakhung shii lago muadun.

<sup>28</sup> Nyieliieshii ji pha brantheK ne Hamangkhung-aphuii ro isbang ji khani hà ruii pha anuii, Ai è ithek lakhung shii awie pha khani phi, ji è ithek ne arek pha blia ji rek. <sup>29</sup> ItheK ne zab pha awie, buii, giichak chiih-è awie pha è ledun; ithek ne ley miegriie, sgoh, mak, biidiie nane diig phi pha ji è leydun. ItheK mulo rai ne <sup>30</sup> awaithek chung buii yao rai; ithek ne Hamangkhung-aphuii shii khiijai, lubusai, wiangwe, chiih-è nyigodog rek; ithek dinne de buii blia rek pha lumuii now ba; ithek awaithek aphuii-amuiitheK miyao anuii pha rek;

<sup>31</sup> ItheK shii now pha khani oi; ithek awaithek sbang shii aruii, chiih-è ithek è gaithek shii de bushun arek chiih-è amiie. <sup>32</sup> HanyietheK ji pha lumuii shii rai pho ne iy ruii phrone Hamankhung-aphuii Iphey jine thieg. Jishii thuh shii ithek hì pha blia awaithek jia mirek asi pha, gaithek shii de yao srane rek ba yi.

## 2

### *Hamangkhung-aphuii ro chua*

<sup>1</sup> Nathek, gu ijak, gaithek shii chua habey? Nathek shii khuchung magunde akhung phro, nathek hanyie magunde, nathek gaishii chua arone nathek ji duiine rek ara ro, nawaithek shii the ara ro. <sup>2</sup> Gethek ne thieg Hamangkhung-aphuii ne brantheK nyie rek pha ji shii chua pha ji ne rangsua chak ro. <sup>3</sup> Jishii nathek, gu ijak, nathek ji è rek pha blia rek srane gaishii the ne nathek Hamangkhung-aphuii ro chua pha ji è yo mua phro è now ne bey? <sup>4</sup> Din ne nathek airo boh bushun, zudphi, jum jishii ne snai muui, nathek ne thieg Hamangkhung-aphuii ne bushun ro, nyieliieshii ai ne nathek shii layog è khid yi pha bidiang muui ro. <sup>5</sup> Jishii nathek ro thua nane lawasdai lubu ro, ji è nathek ne Hamangkhung-aphuii ro lijieg chiih-è giang chuathek pha Inai thog ruii pha ji è bajo nawaithek shii lago khrab ramuii ro. <sup>6</sup> Hamangkhung-aphuii è zab pha brantheK shii awaithek è nyie rek pha ji duiine lasen phi ruii phro. <sup>7</sup> Giak brantheK ne wie rekramuii ro, chiih-è biisiie shii sow muui ro, nuii, chiih-è idang pha chai sow; jipho shii ne Hamangkhung-aphuii è idang pha chai phi ruii phro. <sup>8</sup> Giak brantheK ne nyie asi pha ji shii nuii ne giichak pha rangsua shii ne snai mua; ithek shii ne Hamangkhung-aphuii ro lijieg pha ji thoi ne mua ruii phro.

<sup>9</sup> Zab hanyie è buii rek pho ne thiisa hà diig srane riie ruii phro, chiih-è igobi shii Jewthek chiih-è Gaibrantek shii de ro. <sup>10</sup> Jishii Hanyie è wie rek pho shii ne Hamangkhang-aphuii è biisiie, ilab, chiih-è liijjing phi ruii phro, igobi Jewthek shii chiih-è Gaibrantek shii phi ruii phro. <sup>11</sup> Hamangkhang-aphuii è zab shii ò chua ruii phro.

<sup>12</sup> Gaibrantek shii ne Moses ro Iphey oi ro; ithek layog rek ne Iphey è yo rey dun phro. Jewthek shii ne Iphey um ro, ithek layog rek arone Iphey è chua ruii phro. <sup>13</sup> Ji-è bran ne Hamangkhang-aphuii rog shii giang ruii pha ji ne, Iphey nuii pha Chiang è asi ro, Jishii Iphey shii nyie yung pha ji rek pha ji re-è ro. <sup>14</sup> Gaibrantek shii ne Iphey oi ro; Iphey oi magunde, jishii Iphey shii nyie yung pha ji duiine rek pho jine awaithek Iphey ro. <sup>15</sup> Iphey shii nyie yung pha ji ne ithek lubuthek shii zey ne um rone, ithek mirek ji è doh yi. ItheK è de hi ne izai chak rone doh yi, ithek lubunow ne sak shii ithek shii nin chiih-è sak shii ragia rek phi. <sup>16</sup> Chiih-è jiè gu muyua pha Mua Wie ji duiine, Isu Masi Chiang è Hamangkhang-aphuii è ug pha nowtek è chua pha Inai thog ruii phro.

### *Jewthek nane Iphey*

<sup>17</sup> Nathek Chiang nyie lei? Nathek nawaithek shii Jewthek ro è yao; nathek ne Iphey shii luthong chiih-è Hamangkhang-aphuii Chiang shii nyigodog rek; <sup>18</sup> Hamangkhang-aphuii è nathek shii nyie rek bo è yang pha ji ne nathek ne thieg, chiih-è nyie izai ji gua pha ne ithek ne Iphey è dab jong; <sup>19</sup> Nathek è miegthi shii doh yi pha ji ne izai chak, chiih-è hanyie ne igiia shii um pho shii isang phi,

<sup>20</sup> Chiih-è nathek bi-iethek shii yua, chiih-è nathek ne snai pho shii yua pha masdo ro. Nathek shii ne Iphey umjong ne izai nane khani ne zab le zanjong ro. <sup>21</sup> Nathek ne gaithek shii yua—nyie rek ne nawaithek shii ayua lei?

Nathek è yua, “Mugo agow rabo—Jishii nawaithek ne mugo nebey? <sup>22</sup> Nathek è yao,” “Siulao arek” jishii nathek ne siulao rek nebey? Nathek ne jangbang shii zia than, jishii nathek ne Misiahòtek shii rio nebey? <sup>23</sup> Nathek Hamangkhang-aphuii ro Iphey shii nyigodog rek—jishii nathek ne Iphey chui srane Hamangkhang-aphuii shii biwo rey yi nebey? <sup>24</sup> Jigigam shii yao, “nyieliieshii Jewthek nathek Chiang è, Gaibrantek ne Hamangkhang-aphuii shii buii yao.”

<sup>25</sup> Nathek Iphey ji nuii arone, nathek è miangkheng pha ji ne igong chak ro; jishii nathek è Iphey anuii ji arone, nathek Miang-akheg liak pha ji wie ro. <sup>26</sup> Gaibrantek arone, hanyie è Miang-akheg ba pho è, Iphey shii yung pha ji nuii ne de, Hamangkhang-aphuii è aishii ne Miang-akheg ba rone achoi phi nebey? <sup>27</sup> Chiih-è nathek ne miangkheng jong pha jigigam zey ne ruii magunde; nathek Jewthek ne Gaibrantek Chiang è nathek shii the ruii phro nyieliieshii nathek è Iphey shii chui muii, chiih-è ithek yi siu è Miang-akheg magunde, jishii ithek ne Iphey nuii phro. <sup>28</sup> Zab pha iidohè shii, Jew isbang ne hanyie, izai miangkheng pho ji bey? Jine Jewthek bran asi ro hanyie yi fuang hà doh yi ne hanyie yi siu shii kheg bie. <sup>29</sup> Jishii de hanyie yi iliing pha Jewthek arone jine Jew isbang ro, hanyie lubu yi khegong pho ne chiih-è hi ne Hamangkhang-aphuii ro ragung blia ro, chiih-è Iphey zey pha ji è asi ro. Ji è rek pha brantek ne bran è amua pha, Hamangkhang-aphuii è chiong mua ruii phro.



## 3

1 Nathek Jewthek ne Gaibranthek è muna phua nebey? Din ne ithek è kheg pha jishii ne phua um bey? 2 Hi ne bajo miigak ro, zab pha lumuii shii, igobi pha ithua shii, Hamangkhung-aphuii è awairo mua ne Jewthek shii miigi rek. 3 Jishii giak bran yi isiie arek arone nyie rey mage phlei? Ji pha miyao è Hamangkhung-aphuii ne isiie asi bey? 4 Khuchunde asi phro! Hamangkhung-aphuii ne izai ro, jigigam shii yao pha duiine. Zab pha branthek rang de biidiie ro,

“Nathek è yao shii nathek ro izai doh ruii phro.”

“Nathek biidiang shii nathek ro maley ne yang ruii phro.”

5 Jishii gethek mirek pha asi pha blia ji è Hamangkhung-aphuii ne rangsua rek rone muna adoh yi bey? Ai è gethek shii lagothek phi mage shii Hamangkhung-aphuii ne asi rone nyayao mua nebey? (Hi ne isbang pha musai chak ro.) 6 Khuchunde asi phro! Hamangkhung-aphuii è achua arone, nyie khi-èrek ne sohjambling shii chua mage phlei?

7 Jishii gethek ro blia Hamangkhung-aphuii biisiie shii biidiie arone airo izai muna san rey dun nebey? Nyie rek ne gune layogpho shii the bamuii lei? 8 Nyie rek ne ayao lai? Chiihphado, “Ji-è cho gethek ne wie thog yi pha buii rek habey” Zai, giak branthek ne gu shii makhak-riing ne jithek yao ne the muii ro! Ithek shii rey pha um pha ji ne, ithek shii ne the ruii phro.

### *Hanyie jia de giang asi ro*

9 Chiihphado wie ro, Jewthek gethek ne Gaibranthek è de wie ba bey? Khuchung de asi phro! gune doh jong ro Jewthek chiih-è Gaibranthek ne layog pha blu iliing shii um ro. 10 Jigigam shii yao;

Hanyie jia de giang oi ro,

11 Hanyie de khua oi ro

dinne Hanyie de Hamangkhung-aphuii shii sia pha bran oi ro.

12 Zab pha branthek ne Hamankhung-aphuii è khid dun ro;  
ithek zab ne buii rey dun ro;

nyie izai ji ne hanyie de arek ro, jia rang de arek ro.

13 Ithek miyaogamthek ne zab awiedang pha khlam ro;  
ithek ri ne biidiie yao bie phro,

chiih-è buii rek, ithek ri ne idiig um pha pham duiine ro;

14 ithek miyao ne zab awie pha thamai pha ro.

15 Ithek ne gaishii diig phi chiih-è ua pha now;

16 ithek khi hà wuii magunde awie pha rek ne muadun phro.

17 Ithek ne liijiing pha lumuii ne athieg ro,

18 “chiih-è ithek ne Hamangkhung-aphuii shii rum pha adab ro.”

19 Thuh gethek ne thieg sha hanyie Iphey nuii ne rai lei ne zab Iphey è yao ruii, ji è zab branthek shii khung pha gak srane, chiih-è zab pha sohjambling ne Hamangkhung-aphuii pha chua pha miie shii yi bo. 20 Iphey shii chid pha duiine hanyie jia de Hamangkhung-aphuii mieg shii giang arey phro, Iphey è branthek layog rek rone doh yi phro.

### *Khi-èrek ne gethek ne Hamangkhung-aphuii rog shii giang ruii*

21 Jishii thuh Hamangkhung-aphuii è branthek shii awai rog giang ruii pha dong phi ro. Hi ne Iphey rog nyie arek chid phro, Moses nane chaigthek è hi ne izai rone doh yi. 22 Hamangkhung-aphuii è branthek shii giang ruii

pha ji ne ithek è Isu Masi shii migi rek pha ji è ruii phro, Hamangkhung-aphuii è hithek zab rek pha ji ne hanyie è Isu shii migi rek pha ji è ro nyieliieshii nyie de yo asi sha ro:

<sup>23</sup> Zab pha bran è layog rek chiih-è Hamangkhung-aphuii ro biisiie è ruang dun marui. <sup>24</sup> Jishii Hamangkhung-aphuii è bushun ley phi srane hanyie è gethek shii layog è khia phi pha, Isu Masi Chiang è awai rog shii giang rai noh. Chiih-è hanyie è ithek shii sey phi. <sup>25-26</sup> Hamangkhung-aphuii aishii ne phi, ji è phi ne iy pha ji ne brantheke migi è ithek layog ne khung ge ro. Hamangkhung-aphuii ne giang chak rone doh yi pha ji rek phi. Igobi è ai ne jum nane brantheke layog shii sasab arek ro; jishii thuh pha ishak shii giang chak rone doh yi pha ai è ithek layogtheke rog shii rai. Ji duiine Hamangkhung-aphuii è awai shii giang rone doh yi chiih-è hanyie Isu shii migi rek pho izai chak rone yao.

<sup>27</sup> Chiihphado nyie, gethek ne oi pha ji shii de nyigodog nyarek nebey? Chiih-è hi ne nyie Chiang è lai? Hi ne gethek è Iphey nuii pha ji bey? Asi, jishii gethek è migi rek pha ji ro. <sup>28</sup> Gune hi de yao Hamangkhung-aphuii rog shii brantheke giang ruii phane ithek ro migi ji è phro, chiih-è Iphey shii nyie yung pha ji è arek phro. <sup>29</sup> Din ne Hamangkhung-aphuii ne Jewtheke ro Hamangkhung-aphuii bie bey? Ai yi Gaibrantheke ro Hamangkhung-aphuii pha asi bey? Ai ne gai ro de chak ro. <sup>30</sup> Hamangkhung-aphuii ne jia bie ro, chiih-è ai ne Jewtheke shii awaitheke migi ji è awai rog shii giang ruii phro, chiih-è Gaibrantheke shii de ithek migi ji è awai rog shii giang ruii phro. <sup>31</sup> Gethek rek pha hi pha isiie ne Iphey rog thaluii rey phrone yao nebey? Asi, zab asi; ji pha Chiang shii gethek ne Iphey shii chuh kho chid.

## 4

### *Abraham ro miiriig*

<sup>1</sup> Gethek nyie yao muluii, chiihphado, gethek ro riing Abraham aphuii shii? Ai mirek ji nyie ga? <sup>2</sup> Ai mirek pha ji è de ai yi Hamangkhung-aphuii rog shii giang rey ne rai arone, ai de Iujia ne nyigodog rek iwa, jishii Hamangkhung-aphuii mieg miie hà asi iwa. <sup>3</sup> Jigigam shii yao, “Abraham è Hamangkhung-aphuii shii migi rek, chiih-è nyieliieshii airo migi ne Hamangkhung-aphuii è giang hà choi phi. <sup>4</sup> Brantheke hanyie è blia rek pha ji ne riinangtheke mua ruii phro, jishii jine ley phi pha asi ro, ithek è wiang ne rek ne ji è mua ro. <sup>5</sup> Bran hanyie è awai migi shii luthong ne; awai blia shii aluthong rabo; chiih-è hanyie è biidiie chiih-è izai shii yao thieg pha Hamangkhung-aphuii shii migi rek pho ne, airo migi shii Hamangkhung-aphuii è yi ne sasab rek srane aishii ne giang è awai rog shii ruii muu. <sup>6</sup> Hamangkhung-aphuii è brantheke hanyie yi blia rek pha ji è asi pha migi Chiang è giang rone choi phi pha ji shii ne Dawid è de wie rone yao ro.

<sup>7</sup> “Sang pho ne hithek ro hanyie ro biidiie blia nane layog shii khung phi!

<sup>8</sup> Sang pho ne hithek ro hanyie ro layog shii Ithong è sasab aruii!”

<sup>9</sup> Dawid miyao pha sang pha ji ne miangakheg pho ro bie bey? Khuchung magunde asi ro! Hi ne Miangakheg ba pho shii de ro. Ji è gethek ne jigigam shii thieg jong, “Abraham è Hamangkhung-aphuii shii migi rek, chiih-è nyieliieshii airo migi è Hamangkhung-aphuii è aishii giang ro è choi phi.” <sup>10</sup> Hi pha ishak ne khuchung ga? Hi ne Abraham è Miangakheg ba pha ibi ba asi iidoh shii ba? Hi ne ibi hà ro, iidoh hà asi ro. <sup>11</sup> Ai ne iidoh

hà miàngkheg ba, chiih-è ai miàngkheg pha ji ne nyieliieshii ai miàng-akheg ba pha ibi shii airo migi jishii Hamangkhang-aphuii è giàng rone nuui phi pha cheb ro. Chiih-è ji è Abraham ne zab hanyie è Hamangkhang-aphuii shii migi rek ne chiih-è ai è giàng ro è nuui phi pho pha ragung aphuii ro. <sup>12</sup> Ai ne Miàng kheg pho ro aphuii de ro, ji ne, hanyie è miàngkheg pho rog cho gieng shii de ro, chiih-è gethek ro aphuii Abraham è Miàng-akheg ba pha ibi shii sieng pha duiine migi pha ò chai shii sieng pho ro de aphuii ro.

### *Hamangkhang-aphuii ro sbang ne migi è mua ro*

<sup>13</sup> Hamangkhang-aphuii è Abraham nane ai riingthek shii sohjambling ne zab ai ro rey phrone sbang phi, ai è ji è rek phi, nyieliieshii Abraham è Iphey nuui rone asi ro, jishii nyieliieshii ai è migi rek chiih-è Hamangkhang-aphuii è giàng rone choi phi. <sup>14</sup> Hanyie è Iphey shii nuui bie ne Hamangkhang-aphuii ro sbang ji zab rey arone brantheke ro migi ne adubo ro chiih-è Hamangkhang-aphuii ro sbang ne adunmey pha rekdun phro. <sup>15</sup> Iphey è Hamangkhang-aphuii ro lijieg yi phro; jishii Iphey oi bsa ne, Iphey anuii pha arek phro.

<sup>16</sup> Chiih-è sbang ne migi lakhung shii mua ruii phro, ji è sbang ne Hamangkhang-aphuii è zab pha Abraham riingthek shii de phi, chiih-è Iphey nuui pho shii asi bie pha, jishii Abraham duiine hanyie è migi rek pho shii de ro. Nyieliieshii Abraham ne gethek zab pha ragung aphuii ro;

<sup>17</sup> Jigigam shii yao, Gu na shii bajo soh pha aphuii rab phi pha ro, Hanyie è iy pha ji è hòi din yi, chiih-è ai è yung mage ne nyie arey pha ji de rey yi, Abraham è Hamangkhang-aphuii shii migi rek ji è sbang ne Hamangkhang-aphuii mieg moe shii wie ro.

<sup>18</sup> “Abraham è migi rek ne chiih-è luthong, thiisa hà luthong chid pha nyie miyao oi shii pha rangde luthong, ji è ai ne bajo thiig pha aphuii rey dun.”

Jigigam shii yao pha duiine, “Naro riingthek ne dadiangthek duiine rey ruii phro.” <sup>19</sup> Ai ne idam wieng jia rey sha; jishii ai iy sha pha rek ne Sarah de ani agiak sha pha re ne awai siu è phak ramuii shii isa ro migi ne ù arey ro. <sup>20</sup> Airo migi jine athoh, chiih-è Hamangkhang-aphuii ro sbang shii biidiie rone anow; airo migi ne blu rog awaishii ley, chiih-è ai è Hamangkhang-aphuii shii laso phi. <sup>21</sup> Aishii ne izai è Hamangkhang-aphuii è nyie sbang phi pha ji ne rek mua phi. <sup>22</sup> Jine nyieliieshii Abraham ro migi ji è “Hamangkhang-aphuii è giàng rone nuui phi.” <sup>23</sup> Hi pha miyaogamthek ne, aishii giàng rone nuui phi pha hi ne awai ji jia shii azey bie ro. <sup>24</sup> Hi ne gethek hanyie è Ithong Isu ne iy pha ji è hòi din rone migi rek ne giàng shii nuui phi pho shii de zey phro.

<sup>25</sup> Nyieliieshii gethek layog Chiang è ai iy dun, chiih-è gethek shii Hamangkhang-aphuii rog rangsua ruii pha hòi din phi.

## 5

### *Hamangkhang-aphuii rog shii rangsua*

<sup>1</sup> Thuh gethek shii migi ji è Hamangkhang-aphuii rog shii rangsua ruii, gethek ne Hamangkhang-aphuii rog shii Ithong Isu Masi Chiang è lijiing um ro. <sup>2</sup> Ai è gethek ro migi ji è thuh gethek rai nuui pha Hamangkhang-aphuii ro lijiing shii nohjong ro. Ji è gethek ne Hamangkhang-aphuii pha biisiie thang pha ji shii luthong ne nyigodog rek phro! <sup>3</sup> Gethek ne ithek ro diigthek shii de nyigodog rek, nyieliieshii gethek ne thieg diig è ne zud rek ruii phro, <sup>4</sup> zud ji è ne Hamangkhang-aphuii ro blia doh ruii phro, chiih-è zud ji è

luthong rey ruii phro. <sup>5</sup> Airo luthong ji ne gethek shii duhug arek phro, jishii Hamangkhung-aphuii è Ragung So yi thaluu gethek shii phi pha duiine awai ro miie de gethek lubu shii thoi phi. <sup>6</sup> Gethek ne arek muluui ba shii, Hamangkhung-aphuii è Masi shii gua ne layog pha branthek Chiang shii iy yi. <sup>7</sup> Giang bran Chiang shii giak è iy phi phane diig ro, hì ne yangne bushun rek ne bran wie Chiang shii nya-iy mua pha de um ro. <sup>8</sup> Jishii Hamangkhung-aphuii è gethek shii khama bushun rek phi pha ji ne doh yi, Masi è gethek Chiang pha ishak shii ne gethek ne layogpho shii ba! <sup>9</sup> Ai iy phi pha ji ne thuh gethek ne Hamangkhung-aphuii rog shii giang rai mua; chiihphado gethek ne Hamangkhung-aphuii ro lijieg pha ji è din è de bajo khagi rey phro! <sup>10</sup> Gethek ne Hamangkhung-aphuii ro gidieg ro, jishii ai Dufuii iy pha ji è ai è gethek shii ijak rab phi, thuh shii gethek ne Hamangkhung-aphuii ro ijak ro, ji è gethek ne Masi chai è khama bajo ragia rey ruii phro! <sup>11</sup> Jishii hithek ne zab asi ro; gethek ne nyieliieshii Hamangkhung-aphuii è Ithong Isu Masi hanyie è gethek shii Hamangkhung-aphuii rog shii ijak rab phi pha ji è nyie rek phi pha ji è de lubo rek bo,

### *Adam nane Masi*

<sup>12</sup> Layog ne sohjambling shii bran jia Chiang è thog, chiih-è ai layog è iy pha ji de awai rog shii yithog. Idohhè shii ne, iy pha ji ne zab pha bran jadthek shii shiuy dun, nyieliieshii zab pha branthek è layog rek. <sup>13</sup> Iphey phijong pha ibi è layog ne sohjambling shii um. Khi hà Iphey oi jihà ne layog sasab arek. <sup>14</sup> Jishii Adam pha ishak è yi ne Moses iy pha ji è branthek shii khohtek. Jishii zab pha bran hanyie è Adam mirek pha Hamangkhung-aphuii miyao anuii pha arek pho shii de layog è khohtek.

Adam ne jia hanyie wuiiramuii pha jangbang ro. <sup>15</sup> Jishii nyi ne ò asi ro, Nyieliieshii Hamangkhung-aphuii ro lei pha lasen Adam ro layog duiine asi ro. Hì ne izai ro, nyieliieshii bran jia layog è bran bajo iy dun. Jishii Hamangkhung-aphuii ro bushun ne muna boh ro, chiih-è airo lei pha lasen ji ne bran jia Isu Masi Chiang è bran bajo shii bushun mua. <sup>16</sup> Chiih-è ichiuh shii ne Hamangkhung-aphuii ro lasen nane bran jia ro layog chung ne yo ro, doh shii layog jia è “Ichiig” chua pha thog; jishii doh hà bajo layog yi lasen hà wuiithok ne, “Ichiig oi sha ro!” <sup>17</sup> Hì ne izai ro, bran jia layog ji è nyieliieshii iy phane jao ne rangsua rek. Ji è iidoh shii bran jia Isu Masi Chiang lasen boh mua ruii phro! Chiih-è zab hanyie è Hamangkhung-aphuii ro ley bushun nane Isu Masi chai Chiang è lei ai rog shii khohtek ruii phro.

<sup>18</sup> Ji-è chiihphado, layog jia è zab pha bran shii the, ji duiine giang jia è zab pha branthek shii thoh phi srane chai phi. <sup>19</sup> Chiih-è nyieliieshii bran jia è miyao anuii pha rek srane doh ne zab pha bran shii layogphothek rey dun, ji duiine doh ne bran jia miyao nuii srane ithek shii Hamangkhung-aphuii rog giang rai yi.

<sup>20</sup> Ichiig ne bajo rey yi pha Iphey doh yi phro; jishii khihà layog bajo rey, Hamangkhung-aphuii ro bushun ne dinne de bajo rey ruii phro. <sup>21</sup> Ji-è chiihphado, layog è iy pha ji è ilkhi rek pha duiine, idang chai hà lua now pha Isu Masi Chiang è Hamangkhung-aphuii bushun ne giang hà ilkhi rek ruii phro.

## 6

*Layog è iy jishii Masi rog ò rai arone isieg rai*

<sup>1</sup> Gethek nyie yao, chiihphado? Hamangkhung-aphui ro bushun ne bajo rey yi pha gethek ne layog shii rai habey? <sup>2</sup> Khuchung magunde asi, gethek ne layog shii iyjong—chiihphado khi-èrek ne sieng ne rai mua phlei? <sup>3</sup> Nathek ne thiejong, gethek ne Isu Masi rog shii ò rai pha khowo yi shii, ji è gethek ne ai è iy pha rog shii ò rai pha khowo yijong ro. <sup>4</sup> Gethek ro khowo ji re-è, chiihphado, gethek de ai è iy pha ji thang ne ai rog shii wieng muui, Aphui ro blu biisiie ji è Masi ne iy biisa è dinne hòi pha duiine, ji è gethek de iwo chai shii sieng.

<sup>5</sup> Ji pha iidoh è ai mirek duiine gethek de ai rog ò jia shii iy, ji duiine gethek de ai mirek duiine ai rog shii chai hòi din. <sup>6</sup> Chiih-è gethek ne thieg layog pha blu shii awalum ne mua yi pha, gethek ro ihèg chai ne iy pha rog shii awai ro bai shii ruii, ji è gethek ne dinne bajo layog ro khiao arai sha phro. <sup>7</sup> Bran iy mage shii, ai ne layog pha blu è ichad rek phi. <sup>8</sup> Gethek Masi rog shii nya iy dang ne, gethek de ai rog shii sieng phrone gethek è migi rek. <sup>9</sup> Gethek ne thieg Masi iy ne hòi din chiih-è khuchung de a-iy sha phro—Iy pha ji è ai lakhung shii boh akhoh sha phro. <sup>10</sup> Chiih-è ji è, nyieliieshii ai iy dun, layog ne ai lakhung shii blu oi sha ro; chiih-è thuh ai ne ò shii chai sieng ne rai pha ji ne Hamangkhung-aphui Chiang rai ro. <sup>11</sup> Ji duiine nathek ne iy pha ji shii ne now chid, ji è layog Chiang è ruang rey muui, jishii Masi Isu Chiang è Hamangkhung-aphui rog shii ne sieng phro.

<sup>12</sup> Ji-è nathek nawaitheklum ne chid pha ji shii nuii yi pha, Layog ne mua pha siuthek shii khuchung de boh akhoh sha phro. <sup>13</sup> Nawairo siu pha ichua ne awie pha blia rek pha layog shii api rabo, jishii, nawaishii ne hanyie yi iy pha ji è chai yi pha duiine Hamangkhung-aphui shii phi bo, chiih-è nathek ro zab chai shii giangthek bliathek rek pha aishii phi muui bo. <sup>14</sup> Layog ne nathek ro Ithong arab rabo; chiih-è nathek ne Iphey iliing shii arai ro jishii Hamangkhung-aphui ro bushun iliing shii ro.

### *Giangthek ro khiaothek*

<sup>15</sup> Nyie, chiihphado? Nyieliieshii gethek ne Iphey iliing shii asi jishii gethek ne Hamangkhung-aphui ro bushun iliing shii, ji è gethek ne layog rek habey? Khuchung de asi! <sup>16</sup> Nathek ne hi thieg nathek è giak ro khiaothek rek pha nuii mage shii, nathek ne ithek khiao rey ruii, nathek ne layog pha khiao rek arone iy ruii phro, dinne nuii pha khiao rek arone Hamangkhung-aphui rog shii rangsua sieng ruii phro. <sup>17</sup> Jishii Hamangkhung-aphui shii laso ro! now bo luang jia na de layog ro khiao ro, thuh shii nathek è zab nawai lubu rog shii izaithek ji choi ro. <sup>18</sup> Nane layog è thoh srane giang pha khiao rey dun ro.

<sup>19</sup> (Gune idang gao pha nyuak è yao nyieliieshii nathek ne agao mua.) Luang jia nathek è de nawaithek shii awie pha awie shii khiao rek pha nathek è zab phi muui. Ji duiine ithek de thuh shii gang chiih-è giang shii khiao rek pha nawaithek shii zab muui bo. <sup>20</sup> Nathek yi layog ro khiao ba shii, nathek shii ne giang è thoh phi phro. <sup>21</sup> Nathek shii wo pha blia rek pha hi ne nathek shii nyie mua lai, iidoh nathek shii ne iy pha ji mua phro! <sup>22</sup> Ji shii thuh nathek ne layog è ichad rek phi chiih-è Hamangkhung-aphui ro khiao rey sha ro. Nathek è mua pha ne chai ro aishii zab phi muui bo, chiih-è iidoh shii idang chai mua ruii phro. <sup>23</sup> Layog ne iy pha riinang phi ruii phro; jishii Hamangkhung-aphui ro lei pha lasen Masi Isu gethek ro Ithong rog shii ò rai yi pha idang pha chai ro.

## 7

*Yiygey pha ji è najang yao*

<sup>1</sup> Gu nyie yao ramuii pha ji ne nathek ne gao phro, gu khuinothek, nyieliieshii nathek zab Iphey ji ne thieg, Iphey ji ne branthek shii khothek pha ji ne ithek sieng ne rai shii kho bie phro. <sup>2</sup> Gey dun pha bimi ro miyao duiine, airo gey yi khama sieng ne rai ji nyama thog pha ai rog shii rai pha phang phro; jishii ai iy dun, chiihphado awai gey rog shii phang pha Iphey ne thoh dun phro.

<sup>3</sup> Ji-è, gey isieng nya um ba shii ai yi gai rog shii yiygey arone aishii ne siulao pha bran rone ho phro; jishii airo gey yi iy dun arone, ji pha bimi shii ne thaluii thoh muui srane ai ne bufuii shii yiygey magunde aishii ne siulao ayao phro. <sup>4</sup> Ji ne khi-èrek ne nathek rog shii um ga, gu khuinothek. Bajo igobi è Iphey shii yao jong, nathek de iy dun nyieliieshii nathek de Isu pha siu ro; chiih-è gethek shii Hamangkhung-aphuii ro blia rek yi pha iy ne hòi din pha thuh shii nathek ne ai rog shii ro. <sup>5</sup> Gethek de ji duiine bran è lajia jishii sieng ramuii shii, gethek ne siu pha blia rekramuii shii Iphey ji è layog è yang pha ji shii khui, chiih-è gethek è rek pha ji ne iidoh shii ne zab iy dun. <sup>6</sup> Thuh shii, gethek ne Iphey è thoh rey ge ro, nyieliieshii gethek ne phathek hà zum ne ruii muui pha ji è ne gethek ne iyjong ro. Iphey shii zey pha ihè lumuii shii ne muna alua sha, jishii Ragung pha iwo lumuii shii lua.

*Iphey nane layog*

<sup>7</sup> Chiihphado, Iphey awai ne layog rone, gethek ne yao habey? Khuchung magunde asi! Jishii Iphey è layog ne nyie ga, jine gu shii thieg yi. Iphey è gu shii ayao arone, Gai ro nyie um pha ji ne agiichak rabo è yao pha ji ne gune athieg mua. <sup>8</sup> Jishii layog è chua mua srane yung pha ji è zab pha muna, giichak pha ji ne gu lakhung shii lao mage. Iphey oi arone, layog ne iy dun ro. <sup>9</sup> Gune Iphey è yo ba shii ne isieng ro; jishii yung pha ji thog mage ne layog è chai ne sieng dun, chiih-è gune iy dun <sup>10</sup> chiih-è muyung yi chai yi pha rek shii, gu shii iy pha ji yi phi, chiih-è gune iy dun. <sup>11</sup> Layog è chua doh mage ne, chiih-è muyung è yi srane gu shii ne nyiu ne gu shii ua muui.

<sup>12</sup> Ji-è, chiihphado, Iphey awai ne gang ro, chiih-è muyung ne gang, giang nane wie ro. <sup>13</sup> Jishii chiihphado hi-ne wie bey? Gu shii iy yi pha ji ne, khuchung de asi phro! Hi pha layog ne nyie wie ji è khoth srane rek ne, layog è gu shii iy pha phi ne, izai pha Iphey jine doh yi pha rek. Chiih-è, muyung è layog ne dinne de bajo awie pha layog doh yi.

*Gaithek duchoi shii khnaing*

<sup>14</sup> Gethek ne thieg Iphey ne giang ro; jishii gune giang bran asi ro, chiih-è layog ro khiao rek pha liu muui. <sup>15</sup> Gune athieg nyie rek chid pha ji ne, chiih-è gu è nyie rek yang pha ji ne gu è arek, jishii gu è snai muui pha ji shii rek. <sup>16</sup> Gu è nyie rek pha ji ne gu è arek yang pha ji rek, gune Iphey yi rangsua rone nuui rone doh yi. <sup>17</sup> Ji-è gune ji asi ro hanyie è ji rek pha ji ne, jishii ji ne gu shii sieng pha layog ji ro. <sup>18</sup> Gu ne thieg giang arai arone wie ne gu rog shii arai phro, wie rek yang pha gu shii um magungde, gune arek mua ro. <sup>19</sup> Gu è rek yang pha wie ne gu arek ro, ji pha Chiang shii gune gu è arek yang pha awie pha blia shii rek phro. <sup>20</sup> Gu è nyie arek yang pha ji shii gu è rek arone, hì rek pho ne gu mirek asi pha gai mirek ro, ji è layog gu rog shii rai pha ji ne ro ai Chiang è rey phro. <sup>21</sup> Ji-è gu riig shii Iphey ne blia rek, gu è nyie wie ji rek pha now shii, gu mugua ne nyie awie pha ji rey dun phro.

<sup>22</sup> Guro iliing è ne Hamangkhung-aphui ro Iphey shii sang phro. <sup>23</sup> Jishii guro siu shii ne yo Iphey è blia rek pha doh muui ro-Iphey ji è ne gu khani è nuui Iphey ji shii mak rek muui ro. Layog pha Iphey è gu shii ne phattheg rab srane gu siu shii blia rek muui ro. <sup>24</sup> Gune khi-èrek pha diig bran, Gu shii iy pha jihà noh pha ji è hanyie è gu shii ji pha siu è ragia rek phi phlei? <sup>25</sup> Hanyie è rek pha Ithong Isu Masi Chiang è Hamangkhung-aphui shii laso ro, chiihphado, hì ne, guro muphak ro, guiro è gu Hamangkhung-aphui ro Iphey pha blia gui khani rog shii nya rek mua phro, jishii thuh thog pha gui ro siu miyang ne layog Iphey pha blia rek phro.

## 8

### *Ragung shii chai*

<sup>1</sup> Thuh shii hanyie ne Masi Isu rog shii ò rai pho ne the pha oi sha phro. <sup>2</sup> Iphey pha Ragung, hanyie è gethek ro chai shii Isu Masi Rog ò rai yi muui pha ji è Iphey pha layog chiih-è iy pha ji è thoh phi phro. <sup>3</sup> Nyieliieshii bran ro ziig ne zia buii ne Iphey è arek mua pha ji ne, Hamangkhung-aphui è rek. Ai è awairo Dufuii thoh pha ji è bran ro ziig pha Layog shii nin, hanyie ne bran ro layog ziig duuine ziig rog shii wuii ne layog shii ruang rek phi. <sup>4</sup> Hamangkhung-aphui è hì rek pha ji ne nyieliieshii Iphey pha giangthek ro gangthek ne bran ziig duuine asi pha hanyie è Ragung duuine rai pho gethek shii zab liingsed yi bo.

<sup>5</sup> Hanyie yi bran siu duuine rai ai khani shii ne bran siu è nyie yang pha ji rai, hanyie yi ragung duuine rai arone ai khani ne ragung è nyie yang pha jihà rai. <sup>6</sup> Hanyie yi bran siu shii rai pho ne iidohè shii ne iy phro; hanyie yi ragung shii rai pho ne iidoh shii ne sieng ne rai chiih-è liijiing mua ruii phro. <sup>7</sup> Chiih-è ai bran siu rai arone ji pha bran ne Hamangkhung-aphui rog shii gidieg rey dun phro; chiih-è ai ne Hamangkhung-aphui ro Iphey ne anuii mua phro. <sup>8</sup> Hanyie è awai ro bran siu shii nuui pho ne Hamangkhung-aphui shii sang arek mua phro.

<sup>9</sup> Jishii nathek ne bran siu duuine arai rabo è yao bo; ji phachiang, shii nathek ne ragung shii rai bo è nawaithek shii yao bo—chiihphado, izai Hamangkhung-aphui Ragung ne nathek rog shii rai phro. Hanyie shii Ragung oi arone Masi ne ai è asi ro. <sup>10</sup> Layog è nathek siu iy dun magunde, jishii Masi ithek rog shii rai arone, nathek ragung ne sieng ne Hamangkhung-aphui rog giang ruii phro. <sup>11</sup> Hanyie yi iy ne hòì din pha Hamangkhung-aphui ro Ragung yi nathek rog shii rai arone, chiihphado hanyie è Isu shii iy pha ji è hòì phi pha ji ai Ragung nathek shii un pha ji è nathek ro iy pha siuthek shii de chai phi rui phro.

<sup>12</sup> Ji-è chiihphado, gu khiiinothek nane bumuiithek, jishii bran mizen è yang pha ji gethek ne arai pha, gethek ne hì ne rek chid phro. <sup>13</sup> Jishii gethek bran siu duuine rai arone, nathek ne iy ruii phro, jishii Ragung Chiang nathek è layog blia ji iy arone nathek ne sieng phro. <sup>14</sup> Hanyie shii Hamangkhung-aphui ro ragung rai chiihphado, ai ne Hamangkhung-aphui Dufuii ro. <sup>15</sup> Hamangkhung-aphui è nathek shii ragung phi pha jine nathek shii khiao rek pha yi pha aphi ro; ji è nathek ne arum chid rabo; ji phachiang shii, ragung è Hamangkhung-aphui ro ani rab phi phro, chiih-è ragung pha blu ji è gethek ne Hamangkhung-aphui shii “Aphui! guro Aphui rone choh ruii phro!” <sup>16</sup> Hamangkhung-aphui ro ragung è gethek ne Hamangkhung-aphui ro chak rone yaothieg ne awailum ne gethek ro ragungthek shii rung. <sup>17</sup> Ji pha iidoh è gethek ne airo ani rey dun, gethek

ne ai è awai bran shii ruii phi pha khirzey ji gethek de rangsua rey, chiih-è Hamangkhung-aphuii è aishii nyie ruii phi pha ji ne gethek de rangsua rey dun; chiih-è Gethek de Masi ro diig shii thang gieng arone, gethek de airo biisiie shii thang gieng phro.

### *Phariang pha biisiie*

<sup>18</sup> Gu è now muui ro thuh pha ishak gethek shii nyie diig rek pha ji ne gethek shii dong ruii pha biisiie shii a-ò mua phro. <sup>19</sup> Hamangkhung-aphuii yi awai ani shii dong ruii pha ji ne zab pha zen è khan ne rai ro. <sup>20</sup> Chiih-è zen è nin ne mua pha rek, jishii awailum ne asi ro, jishii nyieliieshii Hamangkhung-aphuii miiyang pha hi è thuh de um rone doh yi. <sup>21</sup> Zen awai ne inai jia shii ne mua dun pha khiao è ichad rey srane Hamangkhung-aphuii ro anithek ro biisiie ji thang ruii phro. <sup>22</sup> Gathek ne thieg ji pha ishak è yi ne thuh thog pha zab pha zen pho ne thuh thog pha ani giak pha duiine riie ne ro muui ro. <sup>23</sup> Jishii hi ne zen pha awai ji jia muro asi ro, gethek hanyie shii igobi Hamangkhung-aphuii ro lasen høg pha ragung um pho Hamangkhung-aphuii è awai ani rab ne gethek ro zab thoh phi pha ji shii khan pho de ro muui ro. <sup>24</sup> Chiih-è gethek ro Luthong ji è gethek ne ragia rey phro; jishii gethek è luthong pha ji riig arone, ji ne izai luthong asi ro. Nyie gethek è rek pha ji shii ne luthong habey? <sup>25</sup> Jishii gethek ariig pha ji shii luthong arone, gethek ne aishii de jum è khan ara ro.

<sup>26</sup> Ji duiine gethek zia arone Ragung è wuii srane nong phi phro. Chiih-è gethek ne sia pha athieg chiih-è miyaogamthek ayao mua pha ro pha ji ne Ragung awai è gethek Chiang Hamangkhung-aphuii rog shii khung phi phro.

<sup>27</sup> Chiih-è Hamangkhung-aphuii, hanyie è gethek lubuthek shii thieg pha ji ne, Ragung è now pha ji de thieg ro, nyieliieshii awai bran Chiang è awai miiyang duiine Ragung è Hamangkhung-aphuii rog shii khung phi.

<sup>28</sup> Gethek ne thieg hanyie è aishii miie pho chiih-è ai miiyang ne ho pho rog shii ne Hamangkhung-aphuii è zab ai blia ne wue rek phi. <sup>29</sup> Hanyie shii Hamangkhung-aphuii è gua jong aishii ne awai Dufuii duiine rey yi, ji è ai ne bajo boh haliing shii zab boh abam rey yi phro. <sup>30</sup> Chiih-è hanyie shii Hamangkhung-aphuii è ruang rek, aishii de ho; chiih-è hanyie shii ai è ho, ai è awai rog shii rangsua rai yi, chiih-è ai awai ro biisiie ji ai rog shii thang noh.

### *Masi Isu shii Hamangkhung-aphuii pha miie*

<sup>31</sup> Hi pha zab miyao è, gethek ne nyie yao pha lei? Hamangkhung-aphuii ne gethek ro arone, hanyie è gethek shii gidieg rek mua phlei?

<sup>32</sup> Hamangkhung-aphuii è awai ro Dufuii iphen jia shii de awai è aruii pha gethek shii phi muui! Ai ne awai dufuii gethek shii phimuui ro—Ai ne zab pha manathek ne gethek shii thaluu aphii habey? <sup>33</sup> Hanyie è Hamangkhung-aphuii è gua pha ji shii nin phlei? Hamangkhung-aphuii awai è yao aishii ne ichiig oi rone yao thiak jong ro! <sup>34</sup> Chiihphado, hanyie aishii the pha lei, Masi Isu asi ba? Hanyie è iy srane, dinne hòi ne sieng chiih-è Hamangkhung-aphuii ro wad phazoì pha ithua shii rai ne gethek Chiang aishii khung ne rai! <sup>35</sup> Ji-è, hanyie è gethek shii Masi ro bushun pha è yo rek mua? Dinne duhung dinne chi-iyiy dinne dusho shii diig dinne iy yi pha ji è rek ne chiih-è hanyie diig rek mua phlei? <sup>36</sup> Jigigam shii yao, Nathek Chiang è gathek zab pha inai shii buii hà iy pha rek;



gathek shii ne shiishai duiine ua pha rek.

<sup>37</sup> Hanyie è gethek shii bushun rek pha ai Chiang è hì zab shii yangge ro. <sup>38</sup> Ji-è gune nyie magunde izai now nyie magunde: Iy pha ji chiih-è chai, hamangkhliethek chiih-è Hamangkhung pha khothtek chiih-è blu, thuh chiih-è doh de airo bushun è ruang arek mua phro, <sup>39</sup> Sohjambling lakhung hà de chiih-è sohjambling pha buchohà de, chiih-è zab zen pha è de gethek ro Ithong Masi Isu Chiang pha Hamangkhung-aphuii ro miie nyie gethek ro ji è de gethek shii yo arek mua phro.

## 9

### *Hamangkhung-aphuii nane airo bran*

<sup>1</sup> Gune izai yao; chiih-è gune Masi pha ro chiih-è biidiie ayao. Chiih-è Ragung So è de gu khani shii khagi rek muui ro. Ji è gune yao shii biidiie ayao ro. <sup>2</sup> Gu è yao mage shii gune bajo duhug rey dun chiih-è gune lubu ne jongdang pha riedun <sup>3</sup> gui ro bran Chiang è, gui ro isiu nane ifai! Ithek Chiang shii gu ne Hamangkhung-aphuii ro thamai pha iiling hà nane Isu Masi è yo rek muui pha de nyayang mua. <sup>4</sup> Ithek ne Hamangkhung-aphuii bran ro; ai è ithek shii awai Dufuii rab srane chiih-è awai ro biisiie ji ithek shii dong phi; ithek ne izai è sia yi pha; nane ithek ne Hamangkhung-aphuii shiinyiethek mua yi pha; chiih-è ai è awai sbangthek ithek rog shii rab srane ithek shii Iphey phi; <sup>5</sup> ithek ne Hebrii bran pha zab è wie riingthek ro; chiih-è Masi de siu è ne ithek ro jad pha ro. Hanyie è zab shii khothtek muui pha, Hamangkhung-aphuii airo è biisiie rey bo! Amen.

<sup>6</sup> Hamangkhung-aphuii ro sbang bia phrone gu ayao ro; Israel pha zab bran ne Hamangkhung-aphuii ro bran asi ro. <sup>7</sup> Din ne Abraham ro riingthek pha aniphiing de zab ne Hamangkhung-aphuii ro bran asi ro. Hamangkhung-aphuii è Abraham shii yao, “Gu è sbang rek pha riingthek jine Isakh è rey ruii phro.” <sup>8</sup> Ji-è siu è giak pha bran ne Hamangkhung-aphuii ro asi ro, ji pha Chiang shii, sbang shii nuui ne giak pha ani ne Hamangkhung-aphuii ro izai riingthek ro. <sup>9</sup> Hamangkhung-aphuii ro sbang ne hì pha miyaogamthek re-è ro: “Rangsua pha ishak gu iidoh wuii shii, chiih-è Sarah ne dufuii um ruii phro.”

<sup>10</sup> Hì zab asi ro. Chiih-è Rebekha ro dufuii nyi ne ò aphuii pha ro, ji ne gethek riing Isakh ro. <sup>11-12</sup> Jishii Hamangkhung-aphuii è Dufuii jia shii ne awai blia rek pha gua jong ro, Hamangkhung-aphuii è bimi shii yao, “Abam jine khuii ro blia rek ruii phro.” Ai è hì yao pha ibi è chiih-è ithek giak pha ibi è ithek ne wie de arek chiih-è buii de arek; chiih-è Hamangkhung-aphuii è gua pha ji ne nyie ithek è rek pha ji è nuui pha asi awai è ho pha ji è ro.

<sup>13</sup> Jigigam shii yao pha duiine, “Gu Jakhob shii miie, jishii gu Esau shii amiie.”

<sup>14</sup> Chiihphado, Hamangkhung-aphuii ne awie ro, gethek ne yao habey? Khuchungde asi ro. <sup>15</sup> Ai è Moses shii yao, “Gu hanyie shii bushun rek yang aishii rek pha ro; Gu hanyie shii wie rek yang aishii wie rek pha ro.” <sup>16</sup> Ji-è chiihphado, zab ne bran è nyie yang pha ji aluthong phro, jishii Hamangkhung-aphuii shii bushun bie phro. <sup>17</sup> Jigigam shii yao pha Egyph pha saja shii, Zab pha sohjambling shii gu beng shii yao pha chiih-è gu blu doh yi pha gu è na shii saja rab yi phro. <sup>18</sup> Ji-è chiihphado, Hamangkhung-aphuii ne ai è hanyie shii yang pha ji shii bushun phi phro chiih-è hanyie shii lawas dai rab yang aishii rab phro.

*Hamangkhung-aphuii ro lijieg nane bushun*

<sup>19</sup> Jishii na è jia gu shii yao ruii phro, hì ne jì è arone, Hamangkhung-aphuii ne hanyie rog shii khi-èrek ne ijak thoh mua phlei? “Chihih-è hanyie è Hamangkhung-aphuii miyang shii hanyie è gieng mua phlei?”

<sup>20</sup> Jishii hanyie ga nane, gu ijak, Hamangkhung-aphuii shii iidoh chang mua habey? “Khalia pha jariie è imia ne nyie um ne rab phlei? Na ne rab pha bran shii sai mua nebey,” <sup>21</sup> Zab pha iidoh shii, Bran è awai miyang ne khalia shii rab pha jì ne chid muii ne rab phro, chihih-è ò pha khalia è jariie nyi rab, jia yi wie idam shii, chihih-è gai yi thaluii shii chid pha rab phro.

<sup>22</sup> Hì duiine Hamangkhung-aphuii è nyie rek pha jì ne izai ro. Ai è lijieg chihih-è airo blu jì doh yi pha yang phro. Jishii ai ne bajo jum chihih-è hanyie yi mua pha um pha ai è lijieg muii pha jì shii zud ne rai phro. <sup>23</sup> Ai è awai ro biisiie mua yi pha gethek lakhung shii thoi ne gethek shii saro phi pha khirzey bushun chihih-è awai ro biisiie jì de gethek shii thoh ne doh yi pha yang phro. <sup>24</sup> Gethek ne ai è ho pha bran ro, Jew jia è asi pha gai pha branthek è de ro. <sup>25</sup> Hì ne ai è nyie yao pha jì ne Hosea pha jigigam shii zey ne um ro:

“Bran hanyie guro asi pha jì shii ne

Gu è gui bran rone ho ruii phro.”

Gu è amiie pha jad shii

“Gune guiro miie pha soh rone ho ruii phro.”

<sup>26</sup> Chihih-è bajo ithua shii ithek è

yao, ithek ne gu bran asi ro è yao, “thiisa hàne isieng Hamangkhung-aphuii ro Dufuii rone ho ruii phro.”

<sup>27</sup> Aijaya è Israel Chiang shii yao pha duiine: “Israel pha bran ithek khamuii pha bali igam nyama um ne de, ithek ne iujia ragia rey bie phro;

<sup>28</sup> Hamangkhung-aphuii ro zab sasab ne sohjambling pho rog shii kthiie rek ruii phro.” <sup>29</sup> Hì ne Aijaya è ibi hà yao jong, “Bohblu pha Hamangkhung-aphuii gethek shii giak riingthek athoh arone, gethek ne Sodom nane Gomorah duiine rey dun phro.”

*Israel nane muawie*

<sup>30</sup> Ji-è gethek ne Gaibranthek shii yao, hanyie Hamangkhung-aphuii rog shii giang ruii pha abidiang shii ithek ro migi è ne ai rog shii giang rey dun;

<sup>31</sup> Hamangkhung-aphuii rog shii rangsua rai pha Iphey sow pha branthek Hamangkhung-aphuii shii adoh ro, nyie rek ne asow mua? <sup>32</sup> Chihih-è nyie rek ne? Nyielieshii ithek ne migi shii aluthong pha jishii awaithek mirek shii luthong phlei? Chihih-è ithek kham srane “lubao lakhung shii khamdun”

<sup>33</sup> Jigigam shii yao:

“Riigbo, gu Zion shii lubao ruii pha ro

jìne branthek shii kham yi pha ro,

jì pha sak ne ithek shii chihih yi pha rab phro.

Jishii hanyie magunde aishii migi rek arone aishii ne azo yi phro.”

## 10

<sup>1</sup> Gu khuiinothek nane bumuiithek, gui bran shii ragia rey yi pha nyie khi-èrek ne gui lubu rog shii yang! Nyie khi-èrek ne ithek shii sia phi! <sup>2</sup> Gu ithek shii izai yao ithek ne Hamangkhung-aphuii shii iliing è sia; jishii ithek ro misia ne izai khani è asi ro. <sup>3</sup> Ithek ne Hamangkhung-aphuii rog shii branthek ne nyie khi-èrek ne ruii pha jì ne athieg pha rek srane, jì pha Chiang shii, ithek ne awaithek lum ne lumuii rab ne; jì è ithek ne awaishii

Hamangkhung-aphuii pha lumuii è giang ruii pha ji shii ne awaithek shii ne aphi. <sup>4</sup> Masi è Iphey yi srane jong muui, ji è hanyie magungde migi rek arone Hamangkhung-aphuii rog shii giang rey yi.

*Giawo ne zab shii ro*

<sup>5</sup> Moses è hi zey pha ji ne Hamangkhung-aphuii rog shii giang ruii pha ji ne Iphey nuui pha ji è ro, “Hanyie magungde muyungthek ji nuui arone ai ne sieng ne rai phro.” <sup>6</sup> Jishii jigigam shii migi è Hamangkhung-aphuii rog shii giang ruii phro è yao pha ji ne hi ro: “Nane nawaiishii asai rabo,” hamangkhung hàne hanyie dun pha lei? (Chiih-è Masi shii ne thazam hanyie è noh pha). <sup>7</sup> Din ne hi de nawaiishii asai rabo, hanyie yi sohjambling bucho hà dun pha lei? (Chiih-è Masi shii iy dun pha ji è hanyie è hòi ne noh pha). <sup>8</sup> Nyie hi yao pha ji ne hi ro: “Hamangkhung-aphuii ro mua ne na moe shii nane na sem shii chiih-è na lubu shii um ro.” Jine gethek yua muui pha mua migi ji ro. <sup>9</sup> Gethek è Isu Ithong shii Hamangkhung-aphuii è iy pha ji è hòi phi rone migi rek arone nathek ne ragia rey phro.

<sup>10</sup> Hi ne gethek ro migi è Hamangkhung-aphuii rog shii giang ruii phro; chiih-è gethek sem è yao arone gethek ne ragia rey phro. <sup>11</sup> Jigigam shii yao, “Hanyie magunde aishii migi rek arone azo ruii phro.” <sup>12</sup> Hi zabjia shii lua ne, nyieliieshii thiisa hàne Jewthek nane Gaibranthek shii yo oi rai phro; Hamangkhung-aphuii ne ò Ithong ro, chiih-è ai è hanyie aishii ho pha ji shii ne bajo khirzey phi ro. <sup>13</sup> Jigigam shii yao, “Hanyie magunde Ithong beng yi arone ai ne ragia rey phro.”

<sup>14</sup> Jishii ithek è migi arek arone nyie khi-èrek ne aishii nong pha yao phlei? Chiih-è ithek mua anuii pha nyie khi-èrek ne migi rek mage phlei? Chiih-è ithek è mua ayoi ba arone nyie khi-èrek ne yoi mage phlei? Chiih-è mua ayao ba arone khi-èrek ne yoi mage phlei? <sup>15</sup> Chiih-è muaphothek shii atoh arone nyie khi-èrek ne mua thieg mage phlei? Jigigam shii yao, “Hanyie è Mua Wie yi ne wuii ruii pha muapho ne bajo wie ro!” <sup>16</sup> Jishii zab ne Mua Wie shii anuii ro. Aijaya è yao, “Ithong, hanyie è gethek ro mua shii migi rek phlei?” <sup>17</sup> Ji-è chiihphado, migi yi mua nuui pha ji è thog phro, chiih-è miyaogam yi Masi ro yua pha ji è thog phro.

<sup>18</sup> Jishii gu sai: Ithek è mua ayoi pha ji ne izai bey? Um ithek è rek—jigigam shii yao:

“ithek è ro pha goh ne zab pha sohnyiak hà yoidun ro:

ithek ro miyaogamthek ne sohjong bsa hà thogdun ro.”

<sup>19</sup> Din ne gu sai: Israel pha branthek ne agao chak bey? Moses awai ne igobi shii yao:

“Gune guro bran è miegriie yi pha gai jad shii ho;

gune guro branthek shii miegriie yi pha;

chiih-è bi-iethek shii khoh ne

ithek shii lijieg yi pha ro.”

<sup>20</sup> “Chiih-è Aijaya è lububo rek ne yao”

“Gune hanyie gu shii asow pho shii doh yi;

hanyie è gu shii asai pho shii gune aishii dong ruii phro.”

<sup>21</sup> Jishii Israel pha Chiang shii ai è yao, “Muyua anuii pho chiih-è wiangwe rek pho shii thawuii bo è yao ne zab pha inai gune wad phia ne rai.”

<sup>1</sup> Gu sai, chiihphado: Hamangkhung-aphuii è awai ro bran shii snai nebey? Khuchungde asi ro! Gune gui de Israelith ro, Abraham pha riing ro, chiih-è Benjamin jad pha bran ro. <sup>2</sup> Hanyie shii igobi è awai è gua pha ji shii ne, Hamangkhung-aphuii è awai bran shii asnai ro. Nathek ne jigigam thoh shii nyie yao pha ji ne thieg, Elija è Israel pha gidieg shii Hamangkhung-aphuii rog shii khung ne yao:

<sup>3</sup> “Ithong, ithek è naro chaigtek shii ua muui chiih-è naro sriie ziao pha ji chuak muui; Gu ne gui jijia led sha bie ro, chiih-è ithek ne gu shii ua pha bidiang muui ro.”

<sup>4</sup> Hamangkhung-aphuii è aishii nyie chang phlei? “Gu è gui shii bran itham mile hanyie è biidiie pha hamangkhung-aphuii Bal shii asia pho shii ruii phro.”

<sup>5</sup> Hi duiine thuh shii: thiisa hane nyieliieshii airo bushun è Hamangkhung-aphuii è gua pha iujia led sha bie ro. <sup>6</sup> Ai è gua pha ji ne airo bushun ji è rey ro, ai è nyie rek pha ji è asi ro. Hamangkhung-aphuii è branthek è nyie rek pha ji è gua arone, chiihphado airo bushun ne izai asi ara ro.

<sup>7</sup> Chiihphado nyiega? Israel pha branthek ne ithek nyie sow pha ji ne adoh ba. Hi è iu ibrog hanyie Hamangkhung-aphuii è gua pho mudoh bie bey? Chiih-è gai thek ne Hamangkhung-aphuii è ho pha ji shii khophang rey dun ro. <sup>8</sup> Jigigam shii yao, “Hamangkhung-aphuii è ithek ro khani nane ithek lubuthek shii athieg yi pha rab ne ruii muui; thuh pha iidoh shii ithek ne ariig mua chiih-è ithek ne ayoi mua.” <sup>9</sup> Chiih-è Dawid de yao,

“Itek ro michie ne awaithek shii zum pha chiih-è awai ro ubong ro;

Awai thek chiih ruii phro, awaithek shii lago phi ruii phro!

<sup>10</sup> Itek ro mieg ne thi rey dun phro ji è ithek ne ariig mua phro;

Chiih-è ithek shii awaithek ro diigtek iliing hà zab pha ishak ukhu-òg rab ne ruii muui phro.”

<sup>11</sup> Gu sai, chiihphado: Jewthek ne kham mage shii, ithek ne zab muadun habey? Khuchungde asi phro! Nyieliieshii ithek è layog rek, giawo Jewthek shii miegriie yi pha Gaibrantek shii phi phro. <sup>12</sup> Layog è Jewthek shii ne sohjambling shii bajo bohkhoh khirzey yi ro, chiih-è ithek ro ragung pha nuruii è Gaibrantek shii bohkhoh khirzey phi ro. Chiihphado, Jewthek pha bran ò shii khrab mage pha ishak shii ne dinne ji è bajo muna khirzey mua ruii phro!

### *Gaibrantek shii giawo*

<sup>13</sup> Gu thuh Gaibrantek nathek shii yao ramui ro: Chiih-è gune bajo inai è Gaibrantek ro yuapho ro, gune gui blia shii wiangwe rek phro. <sup>14</sup> Yangne gu ne gui bran shii miegriie pha rab ne, chiih-è gai thek shii ragia nyarek mua phi. <sup>15</sup> Itek è snai mage shii, bran bushun ne Hamangkhung-aphuii ro mak è jak rey dun. Hi ne nyie ga chiihphado, ithek è nuii mage shii? Hi ne iyjong pha chai ro.

<sup>16</sup> Igobi pha iweb dum ji yi Hamangkhung-aphuii shii phi, Chiihphado, zab pha iweb de ai ro rey phro; chiih-è hing pha iriing yi Hamangkhung-aphuii shii phi arone idiphak de ai ro rey phro. <sup>17</sup> Raig shii hai pha sumaro hingmuii idiphak yi jo dun shii, chiih-è jabiing pha sumaro hingmuii è rung din phi ro. Nathek Gaibrantek pho ne jabiing pha sumaro hingmuii duine ro, chiih-è thuh shii nathek ne Jew ro luraaktek pha chai shii gang è thang ro. <sup>18</sup> Ji-è chiihphado, nathek hanyie yi idiphak duiine jo pho shii ne makhak-ariing rabo, nyie khi-èrek ne nathek ne wiangwe rek mua mage

phlei? Nathek ne idiphak duiine ro; nathek ne iriing shii anong gieng ro iriing ne nathek shii nong phro.

<sup>19</sup> Jishii nathek ne yao ruii, “Oh, jishii idiphak ne jo ne guro ùgud rab ro.”  
<sup>20</sup> Ji ne izai ro. Ithek ne chuii dun ro nyieliieshii ithek ne migi arek, nathek tuh de led pha ji ne nyieliieshii nathek ne migi rek. Jishii wiangwe arek rabo; ji pha Chiang shii rum bo. <sup>21</sup> Hamangkhang-aphuii è awai idiphak Jewthek shii de akhung phi. Ai è nathek shii khung phi phrone now bey?  
<sup>22</sup> Ichiih gethek ne riig Hamangkhang-aphuii ne jum chiih-è chieg ro, ai ne hanyie chiih pha ji shii ne chieg ro, jishii nathek airo jum shii idang rai arone airo jum de nathek shii rai phro, jishii nathek arai arone, nathek shii ne jo muui phro. <sup>23</sup> Chiih-è Jewthek ne migi arek pha ji thoh muui arone, ithek shii ne iidoh awaithek rai pha ithua shii ruii din muui phro; Hamangkhang-aphuii ne ji nyarek mua phro. <sup>24</sup> Gaibranthek ne jabiing pha sumaro muui jo dun pha idiphak duiine ro chiih-è chiihphado, izai sumaro shii yi srane raig pha sumaro muui shii rung. Jewthek ne raig pha hingmuui duiine ro; chiih-è hi ne Hamangkhang-aphuii è jo dun pha idiphak shii awai ro hingmuui shii rung din pha ji wie ba phro.

### *Zab shii Hamangkhang-aphuii ro bushun*

<sup>25</sup> Thiisa hàne ug pha izai um ro, gu khuiinothek, gu nathek shii thieg yi pha yang ro, hi è nathek shii ne khama thieg rone ragia rek ruii phro. Hi ne ji ro Israel pha bran ro lawas dai ne idang pha asi ro, jishii Gaibranthek yi zab Hamangkhang-aphuii shii awuii sbo shii thog pha bie ro. <sup>26</sup> Chiih-è hi ne khi-èrek ne zab Israelthek ne ragia rey pha ji ro. Jigigam shii yao pha duiine,

“Ragia rek phane Zion è wuii ruii phro

chiih-è Jakhob riingthek è zab shii awie blia ne zang muui phro.

<sup>27</sup> Gu ithek ro layogthek yie shii,  
 gu ithek rog shii sbang rab pha ro.”

<sup>28</sup> Nyieliieshii ithek ne Mua Wie shii snai, Gaibranthek nathek chiang è Jewthek ne Hamangkhang-aphuii ro gidieg ro. Jishii nyieliieshii Hamangkhang-aphuii è gua è ithek shii gua, nyieliieshii ithek ro blangthek, ji è ithek ne airo ijak ro. <sup>29</sup> Hamangkhang-aphuii ne hanyie shii gua chiih-è hanyie shii khirzey phi pha ji ne awai khani ne alai phro.

<sup>30</sup> Gaibranthek nathek ne dohbi ne Hamangkhang-aphuii shii anuii; jishii tuh nathek ne bushun muage ro, nyieliieshii Jewthek è anuii pha rek. <sup>31</sup> Ji duiine nyieliieshii bushun nathek shii mua pha ji ne Jewthek è tuh shii Hamangkhang-aphuii shii anuii pha rek, ji pha Chiang shii ithek de tuh Hamangkhang-aphuii pha bushun muage. <sup>32</sup> Ji-è ai ne ithek zab shii ai bushun doh mua yi pha, Hamangkhang-aphuii è zab anuii pha branthek rone rab muui.

### *Hamangkhang-aphuii shii chiong*

<sup>33</sup> Hamangkhang-aphuii pha bohkhoh ne bajo boh ro! Airo khani chiih-è thieg pha ji ne khama jam ro! Ai è phak pha ji ne hanyie yao mua phlei? Ai lumuii ne hanyie thieg mua phlei? <sup>34</sup> Jigigam shii yao,

“Ithong ro khani ne hanyie thieg mua phlei? Hanyie ne aishii yua mua phlei?”

<sup>35</sup> Ji-è ai ne iidoh phi pha, hanyie è aishii nyie phi phlei?

<sup>36</sup> Chiih-è zab pha manathek ne ai è rey phro, chiih-è zab pha manathek ne ai è khia ruii phro chiih-è zab ne airo ro. Hamangkhung-aphuii rone idang biisiie rey bo! Amen.

## 12

### *Hamangkhung-aphuii ro blia shii chai*

<sup>1</sup> Ji-è chiihphado, gu khuiinothek nane bumuiithek, nyieliieshii Hamangkhung-aphuii ro boh bushun gethek shii rek phi, ji è gu nathek shii khung ne yao: nawaithek de Hamangkhung-aphuii shii isieng zid mage bo, airo blia shii phi muii srane aishii sang phi bo. Jine nathek è phi pha ji ne izai misia ro. <sup>2</sup> Sohjambling pho duine nawaishii arek rabo, jishii nawaithek ro khani yi zab lai arone Hamangkhung-aphuii è de nathek ro iliing pha de zab lai ruii phro. Nathek ne Hamangkhung-aphuii è nyie yang pha ji ne nyie wie chiih-è aishii ne sang ba chiih-è hi ne khriig ba ji nyathieg ruii phro.

<sup>3</sup> Chiih-è nyieliieshii Hamangkhung-aphuii ro thaluu bushun ne gu shii phi, ji è gu nathek zab shii yao: Nathek ne nawaithek shii um pha ji è bajo anow rabo. Ji pha Chiang shii, nawaithek è now pha ji shii jum rek bo, chiih-è nawaithek shii Hamangkhung-aphuii è phi pha ji duine migi rog shii chua bo.

<sup>4</sup> Gethek siu jia è bajo ichua um, chiih-è hi ne zab yo blia rek. <sup>5</sup> Ji duine, chiihphado gethek ne bajo, gethek ne Masi rog shii siu jia bie ro, chiih-è gethek ro yo shii siu ne jia bie ro. <sup>6</sup> Ji-è gethek ne Hamangkhung-aphuii è phi pha yo lasen ji duine bushun rog shii blia rek. Gethek ro lasen ji yi Hamangkhung-aphuii mua yao arone, gethek shii um pha migi ji duine rek bo; <sup>7</sup> hi ne blia rek pha arone gethek ne blia rek chid phro, hi ne yua pha arone gethek ne yua chid phro; <sup>8</sup> hi ne gaishii lububo rek phi pha arone, gethek ne rek chid phro. Hanyie magunde gai rog shii thang pho ne khriig pha thang bo, hanyie rangsua um pho ne snak rek bo. Hanyie magunde bushun rek pho ne sang ne rek bo.

<sup>9</sup> Miie pha ji ne zab wie è ruii bo. Awie pha blia shii amiie rabo, nyie wie pha ji shii khoh bo. <sup>10</sup> Masipho khuiinothek nawaithek chung lua è miie rai bo, chiih-è nawaithek chung shii ilab phi rai pha yang bo. <sup>11</sup> Blia gang è rek bo chiih-è siikhad ajo pha arek rabo. Nawaithek zab pha lubu rog shii Ithong shii sia bo. <sup>12</sup> Nathek ro luthong ne sang ne ruii bo, nathek ro diigthek shii jum rek bo, chiih-è idang sia bo. <sup>13</sup> Na shii um pha ji nawai ijak Masipho è chid pha ji thang bo, chiih-è naro hò habin athiegpho shii hong bo.

<sup>14</sup> Hanyie è na shii diig phi pha ji shii Hamangkhung-aphuii è khirzey lia phi bo aishii khirzey lia phi ne athamai rabo. <sup>15</sup> Hanyie è sang ji pha rog shii sang bo, hanyie è choh ji pha rog shii choh bo. <sup>16</sup> Zab pha rog shii ò ruii bo. Wangwe arek rabo, jishii zum blia shii nuui bo. Nawaishii thieg rone anow rabo.

<sup>17</sup> Bran giak è na shii asi pha rek muii magunde, asi pha iidoh arog din rabo. Zab pha miie shii nyie wie ji rek pha bidiang bo. <sup>18</sup> Zab pha rog shii Liijiing rai pha na è zab rek muii pha ji rek mage bo. <sup>19</sup> Arog rabo, gu ijak, ji pha Chiang shii Hamangkhung-aphuii è lijieg phaji rek bo. Jigigam shii yao, “Gu è rog pha ro, gu è iidoh phi din pha ro, Ithong è yao ro.” <sup>20</sup> Ji phachiang shii, jigigam è yao: “Narog gidiegpho yi chi-iyiy muii arone, aishii michie phi ne chie yi bo; ai gahanghang arone, niing pha phi bo; ji rek phane na

è aishii ne wo pha bai fuh phi.” <sup>21</sup> Awie pha è na shii ayang yi rabo; ji pha Chiang shii, wie è buii shii yang bo.

## 13

### *Soh pha riichai shii nuii*

<sup>1</sup> Zabjia ne soh pha riichaithek nuii chid, nyieliieshii Hamangkhung-aphuii è ayung pha ne nyie riichaithek arab ro, chiih-è nyie riichaithek thuh shii ruii pha ji ne Hamangkhung-aphuii è ro. <sup>2</sup> Hanyie è thuh pha riichai anuii pha rek arone Hamangkhung-aphuii è nyie yung pha ji shii de anuii pha rek ro; chiih-è hanyie magunde anuii pha rek arone ai è chua ruii phro. <sup>3</sup> Hanyie è wie rek pho ne khohphothek shii arum pha jishii hanyie è buii rek ji pho shii rum bo. Nathek ne riichai pha bran è arum yang bey? Chiihphado nyie wie ji rek bo, chiih-è ithek ne nathek shii chiong ruii phro. <sup>4</sup> nyieliieshii ai ne nawaithek ro wie rek phi pha Hamangkhung-aphuii ro khiao ro. Jishii nathek è awie pha rek arone, chiihphado aishii rum bo, nyieliieshii airo blu è lago phi pha ji ne izai ro. Ai ne Hamangkhung-aphuii ro khiao ro chiih-è hanyie è buii rek pha ji shii phi pha lago han muui ro. Jishii awie pha Chiang shii de rum bo.

<sup>5</sup> Ji phachiang è nathek ne riichaithek shii nuii chid—nyieliieshii Hamangkhung-aphuii ro lago è asi bie pha, jishii khani pha Chiang è de nuii bo.

<sup>6</sup> Ji ne nyieliieshii nathek de mijin phi, nyieliieshii ithek ro blia zab rey mage shii riichaithek ne Hamangkhung-aphuii ro blia rek phro. <sup>7</sup> Phi bo, chiihphado, nathek è ithek shii nyie phi pha um pha ji; nawaithek ro nujo nane nuruii mijinthe phi bo, chiih-è zab shii ilab phi ne ithek shii nuii pha doh yi bo.

### *Nawaithek chung nong rai bo*

<sup>8</sup> Hanyiejia ne gai iliing shii muruii um ne arai rabo—Natek ro muruii phi pha um pha ji ne nawaithek chung miie rai pha ji bie ro. Hanyie magunde ji rek arone Iphey shii nuii ara ro. <sup>9</sup> Muyungthek, “Siulao arek rabo; gai shii a-ua rabo; agow rabo; gai ro nyie um pha ji ne ayang rabo” zab hì, chiih-è Iphey jia shii gai pha Chiang è de rung, “Nawaithek shii miie pha duiine nawaithek ro hadung-haluu pho shii de miie bo.” <sup>10</sup> Na è gaishii miie pha ji ne, na è aishii awie pha blia arek ro; miie bo, chiihphado, zab Iphey shii ne nuii ro.

<sup>11</sup> Nathek ne hì rek bo, nyieliieshii nathek ne thieg nathek ro miyem è sieng pha ishak ne thog sha. Gethek è igobi shii migi rek pha ji è yi ne thuh gethek shii ragia rek pha ne nui thog sharuii ro. <sup>12</sup> Habiu ne jong sha bsa ro, inai yang ne ichiih um ro. Cho gethek ne habiu pha blia ji ne ruii sha muui haro, chiih-è cho gethek ne miagian yi srane isang hà mak rek rai haro. <sup>13</sup> Bran hanyie inai isang shii rai pho shii ne, gethek è wie yao ne wie è rek ne rai haro awie pha asi dinne phuiithiig pha asi, siulao pha asi dinne giichak pha asi, gui pha asi dinne miegriie pha asi ro. <sup>14</sup> Jishii Ithong Isu Masi ro miagianthek yie ne, chiih-è nawaithek ro layog shii isiie khriig nane chidthe shii gak muui bo.

## 14

### *Nawaithek chung achua rabo*

<sup>1</sup> Wiewuui bo hanyie yi migi shii zia, jishii ithek ro nujo munowthek Chiang shii ai rog akhiinaing rabo. <sup>2</sup> Hanyie bran yi awai migi è nyie magunde chie mua phro, jishii bran hanyie yi migi shii zia arone marerethek chie bie. <sup>3</sup> Bran hanyie è nyie zab chie pha ji ne achie pho shii akhiichai rabo, hanyie è marerethek chie bie pha ji ne zab chie pha bran shii achua rabo; Hamangkhang-aphuui ne jipha bran shii choi ro. <sup>4</sup> Gai ro khiathok shii chua pha ji ne na hanyie lai? Khiao ne blia wie rek arek jine awai ithong phak ruii phro. Chiih-è ai ne rek muui phro, nyieliieshii Ithong ne aishii nyarek mua phro.

<sup>5</sup> Bran jia è izai inai ji shii ne gai inai ne miigak ba ro è now, jishii giak è zab pha inai ne ò ro è now. Zab è awaithek khani shii chiih-è nowjong ro. <sup>6</sup> Hanyie yi giu è now ne jia inai shii nuui arone ai ne Ithong shii ilab phi phro; hanyie è nyie chie magunde ai ne Ithong shii ilab phi phro, nyieliieshii ai è Hamangkhang-aphuui shii michie pha laso phi, hanyie è khihà chie khihà achie pho Ithong shii laso phi phro, chiih-è ai ne Hamangkhang-aphuui shii laso phi phro. <sup>7</sup> Gethek ne gethek Chiang asieng ro, chiih-è gethek ne gethek Chiang a-iy ro. <sup>8</sup> Gethek sieng ne rai magunde Ithong ro sieng, iy magunde Ithong ro iy, gethek ne sieng magunde iy magunde gethek ne Ithong ro ro. <sup>9</sup> Masi ne iy pha nane sieng pha Ithong ro, nyieliieshii ai ne iy ne hòì din. <sup>10</sup> Nathek chiihphado, hanyie ne marerethek chie bie phlei? Nyie rek ne nawaithek ro chua pha gai shii phi phlei? Chiih-è hanyie zab chie pho ne—nyie rek ne gai migiphothek shii khiijai phlei? Gethek zab shii ai è chua pha Hamangkhang-aphuui ibi shii riu chid phro. <sup>11</sup> Jigigam shii yao, “Gune izai isieng Hamangkhang-aphuui ro, Ithong è yao,

Zab gu ibi shii niing bo,

chiih-è zab gune Hamangkhang-aphuui rone yao bo.”

<sup>12</sup> Chiihphado, zab gethek ne Hamangkhang-aphuui shii sasab phi chid.

### *Nawaithek chung achiih rai yi rabo*

<sup>13</sup> Ji-è, chiihphado, cho gethek gaishii chua pha ji ne gak muui, jiphachiang shii, nathek ne nawaithek yi gai shii kham srane layog shii chiih yi pha khuchung de arek rabo. <sup>14</sup> Gune Ithong rog shii ò pha ji è Isu è gu shii izai rab phi, nyie michie magungde zea asi ro; jishii branthek è michie yi zea rone migi rek arone, chiihphado jine aishii zea rey dun phro. <sup>15</sup> Na è chie pha ji yi na khiiino shii diig phi arone, nane miie pha ji shii bajo asi sha ara ro. Masi è bran Chiang shii iy pha ji shii ne nathek è michie chie pha ji re-è gai shii diig arey yi rabo! <sup>16</sup> Na è wie mua pha ji ne ibeng awie pha arey yi rabo. <sup>17</sup> Hamangkhang-aphuui ro zab boh riichai jine chie niing pha miyao asi ro, jishii Ragung So è phi pha gang, liijiing, chiih-è lised ji ro. <sup>18</sup> Chiih-è hanyie magunde ji duine Masi ro blia rek arone, ai è Hamangkhang-aphuui shii sang yi chiih-e gaithek wie rone yao.

<sup>19</sup> Ji-è chiihphado, gethek ne idang liijiing yie pha chiih-è gethek chung nung ne chuh rek pha ji bidiang bo. <sup>20</sup> Nyieliieshii michie è, Hamangkhang-aphuui nyie rek pha ji shii srobroy arek rabo. Michie ne zab chie bo, jishii giak shii diig phi ne kham yi srane layog hà chiih yi pha ji ne nyie michie magungde awie ro. <sup>21</sup> Rangdua ruii phane hì ro nawai khiiino dinne bumui chiih yi pha blia ne ibey achie rabo chiih-è phuui aning rabo. <sup>22</sup> Chiihphado, na nane Hamangkhang-aphuui pha duchoi shii nyie miyao Chiang yao pha ji shii ruii bo. Ai è chua shii bran hanyie yi ichiig oi pha than pha ji ne, ai ne sang ro! <sup>23</sup> Jishii hanyie è chie shii than arone, Hamangkhang-aphuui è ai



nyie chie pha jine the ruii phro, nyieliieshii ai è rek jine migi è asi ro. Chiih-è nyiemagunde migi è asi arone jine layog ro.

## 15

### *Nawaithek shii asang pha, gaitheksii sang bo*

<sup>1</sup> Gethek hanyie yi migi shii gang arone zia pho ro miihanthek shii nong phi bo. Gethek è gethek shii asang rabo. <sup>2</sup> Ji phachiang shii, ithek ro migi rab phi pha gethek ne khuiino ithek shii wie sang bo. <sup>3</sup> Masi è awaishii asang yi ro, ji phachiang shii, jigigam shii yao, “Nathek shii gang è makhak-riing pha jithek ne gu shii chiih thog.” <sup>4</sup> Jigigam shii nyie zey pha ji ne gethek shii yua pha zey phro, ji pha Chiang shii gethek ne zud ne lububo rek pha Chiang è gethek shii luthong mua mua. <sup>5</sup> Chiih-è Hamangkhung-aphuii ro, jum nane lububo rek phi pha lumuii ne Isu Masi khi-èrek pha ji yi ne nawaithek duchoi shii ò now bo. <sup>6</sup> Ji-è zab nathek ne ò shii goh jia è Hamangkhung-aphuii nane gethek ro Aphuii Ithong Isu Masi shii chiong mua.

### *Gaibrantek shii muawie*

<sup>7</sup> Chiihphado, Hamangkhung-aphuii ro biisie rek pha, Masi è nathek shii nuii pha duiine nawaithek chung de choi rai bo. <sup>8</sup> Gu nathek shii yao Masi ro chai ne Jewthek duchoi shii blia rek pha ro, chiih-è awai blangthek shii sbang rek pha ji ne izai rek pha chiih-è Hamangkhung-aphuii ne isiie rone doh yi pha rek phro, <sup>9</sup> chiih-è airo bushun ji Hamangkhung-aphuii shii chiong pha Gaibrantek shii de riichai phi phro, jigigam shii yao, “Chiih-è ji è gune Gaibrantek shii chiong phi; Gune nathek shii chiong bai.”

<sup>10</sup> Dinne yao,

“Gaibrantek ne nathek Hamangkhung-aphuii pha brantek rog shii lised bo!”

<sup>11</sup> Chiih-è dinne,

zab pha Gaibrantek Ithong shii chiong bo;

“Zab pha bran aishii, chiong bo!”

<sup>12</sup> Chiih-è dinne, Aijaya de yao,

Jese pha riing ne dong ruii phro;

Ai-ne Gaibrantek shii khothek ruii phro,

“Chiih-è ithek ne aishii luthong ruii phro.”

<sup>13</sup> Hamangkhung-aphuii ne luthong pha lumuii rone nathek è aishii migi rek pha ji shii lubo nane liijiing rog shii zan phi phro, ji è nathek ro luthong pha jine athodang pha Ragung So è shiie bo.

### *Phaul lububo rek ne zey pha Chiang*

<sup>14</sup> Gu khuiinotek nane bumuiithek wo: gu è gui shii than izai nathek de zab ley wie è, nathek shii de zab khani um bo, chiih-è nathek de gaishii yua mua bo. <sup>15</sup> Jishii hi pha jigigam ne Hamangkhung-aphuii è gu shii chua phi ne gu nathek shii izai miyao now yi pha arum dang pha nathek shii zey phi. <sup>16</sup> Gaibrantek Chiang è Masi Isu ro khiao rek ne, Hamangkhung-aphuii ro Mua Wie yua pha phabi duiine blia rek, Gaibrantek zid shii Hamangkhung-aphuii nuii phi pha Ragung So è aishii zid phi <sup>17</sup> Chiihphado, Masi rog pha ji è ne, gu è Hamangkhung-aphuii ro blia rek pha ji è gu ne wiangwe nyarek mua phro. <sup>18</sup> Gune arum pha chiih-è yao ne Masi è rek phi pha gu Chiang è Gaibrantek shii now ne Hamangkhung-aphuii shii nuii yi pha rek bie phro. Ai è ji rek pha ji ne miyaogamthek nane bliathek ro,

<sup>19</sup> Buangthek pha nane anomuluii pha blu è, chiih-è Hamangkhung-aphuii ro Ragung è. Chiih-è ji è Jerusalem è yi ne Ilyrikhum thog pha zab pha lumuii hà lua srane, gu è zab Masi Chiang shii Mua Wie yaojong ro. <sup>20</sup> Gu è idang khi hà Masi shii aphì ba biisa hà Mua Wie ji yao yang muui ro, ji è gu ne gai è yaojong bsa hàne awuii yang ro. <sup>21</sup> Jigigam shii yao, “Hanyie shii ai Chiang ayo ba pha ji shii ne doh ruii phro,”

“Chiih-è hanyie yi ayoi ba ai ne id ruii phro.”

### *Paul è Rom wuii pha phak*

<sup>22</sup> Chiih-è ji è gu nathek shii wuii pha rek pha bajo ishak ne gakdun. <sup>23</sup> Jishii gu hi pha ithua pha blia jong arone bajo ishak gu nathek shii wuii ne riig pha rek pha hi ne, <sup>24</sup> gune luthong thuh shii ne rek muui. Gu gui lumuii è sphain hà wuii shii nathek shii si yang muui ro, gu nathek shii dong ne lubo ched pha iidoh shii chiih-è thiisa hà wuii pha nathek nong phi bo. <sup>25</sup> Thuh shii, jimagunde, gune thiisa pha Hamangkhung-aphuii ro blia rek pha Jerusalem hà wuii pha um ro. <sup>26</sup> Mesidonia nane Akhaya pha charchthek pho è Jerusalem pha Hamangkhung-aphuii ro bran shii nong ne thaluii phi pha phak rai.

<sup>27</sup> Ji pha muphak jine awaithek ro ro, jishii, izai miyao ne, nathek ne ithek shii nong chid pha blia chak ro. Jew è Ragung khirzeythek Gaibranthek rog shii thang phi pha duiine, Gaibranthek de awaithek ro muna khirzey ne thang chid phro. <sup>28</sup> Gu hi pha blia jong mage shii chiih-è ithek è khia pha bang yi zab nathek shii phi marui phro, Gu gui lumuii è Sphain hà wuii shii nathek shii dong ruii pha ro. <sup>29</sup> Gu nathek shii wuii ruii shii gune thieg, gune Masi ro ley khirzey è chua ne wuii ruii pha ro. <sup>30</sup> Gu nathek shii khung phro, gu khuiinotek nane bumuiithek: Gethek ro Ithong Isu Masi nane Ragung pha miie è gu shii rung phi pha Hamangkhung-aphuii è gu rog gang sia phi bo. <sup>31</sup> Gu shii de sia phi bo, gune Judea pha migi arek pho è ragia rey pha chiih-è thiisa pha Hamangkhung-aphuii pha bran de gu blia ji nuii yi bo. <sup>32</sup> Chiih-è Hamangkhung-aphuii è yang arone gune nathek shii ley lised è wuii mua ne chiih-è nathek shii wuii ne nathek rog shii michie chie mua phro. <sup>33</sup> Gathek ro Hamangkhung-aphuii pha liijiing ne, zab nathek rog shii um bo. Amen.

## 16

### *Awai ro salamthek*

<sup>1</sup> Gu Phoebe nane hanyie è kenchreae pha Charch riig muui pha gu bumuiithek shii jieg. <sup>2</sup> Hamangkhung-aphuii pha branthek è rek pha duiine, bimi shii de Ithong beng shii choi mage bo; bimi è na shii nyie nong pha chid pha um jine phi mage bo; bimi ji awai ne bajo bran rog shii wie ijak rey yi bo chiih-è gu shii de nong bo.

<sup>3</sup> Gu è gu ijak Masi Isu ro blia rek pha Phrisila chiih-è Akhuila, shii salamthek yao ne thoge; <sup>4</sup> ithek ne gu Chiang shii awaithek ro chai ne diig hà ruii muui. Gune ithek shii laso phi phro—Gu è jia asi, jishii zab pha Gaibran charchthek è de ithek shii laso phi phro. <sup>5</sup> Itek hò shii si pho shii de salamthek ro, Asia pha du-ua shii zab è igobi hanyie è Isu Masi shii migi rek pha gu ijak Ephaenethus shii de salamthek ro. <sup>6</sup> Hanyie è nathek Chiang shii blia nang è rek pha Mery shii de salamthek ro. <sup>7</sup> Gu rog shii phattheg hà ò rai pha Andronikhus nane Junias ijak—Jewthek shii de salamthek ro;

ithek ne guaphasamoythek duchoi shii wie thieg phro, chiih-è ithek ne gu è arab ba pha ibi shii Masiphothek reyjong ro.

<sup>8</sup> Ithong ro ò pha guro ijak Ambliathus shii de salamthek thoh. <sup>9</sup> Guro wie ijak Sthachys shii de, chiih-è Masi ro blia rek pha gethek ro ijak Urbanus shii de guro salamthek ro. <sup>10</sup> Hanyie ro izai è Isu Masi shii khagi rek phi pha Apheles shii de salamthek ro. Aristobulus pha haliing pho shii de salamthek ro. <sup>11</sup> Ijak Jewthek, nane Narkhisus haliingthek pha Masipho Herodion shii de salamthek.

<sup>12</sup> Thryphaene nane Thryphoso, hanyie è Ithong blia rek muui pha, chiih-è guro wie ijak hanyie è Ithong blia bajo rek muui pha Phersis shii de salamthek ro. <sup>13</sup> Gune Rufus shii de hanyie shii wie è Ithong ro blia rek pha, chiih-è hanyie è gu shii awai dufui duiine rek muui pha ai amui shii de salamthek ro. <sup>14</sup> Asynkhrithus, Phlegon, Hermes, Phathrobas, Hermas, chiih-è ai rog shii um pha zab gai Masipho shii de guro salamthek ro. <sup>15</sup> Philologus chiih-è Julia è yi ne Nereus chiih-è airo bumui shii, chiih-è Olymphas chiih-è hanyie ai rog shii um pha zab Hamangkhung-aphuii pha bran shii de salamthek ro. <sup>16</sup> Nawaithek chung so khichiug ne salamthek rai bo. Zab pha Masi ro charchthek è nathek shii salamthek thoge ro.

### *Idoh pha muyua ro*

<sup>17</sup> Gu nathek shii khungdang phro, gu khuinothek nane bumuiithek: riig bo hanyie è che rek pha chiih-è bran migi shii diig phi pha chiih-è nyie na è mua pha muyua shii buii suang rek ruii phro. Ithek è ruang rai bo! <sup>18</sup> Ji rek pha bran ne Ithong Masi ro blia arek ara ro, jishii ithek ne awaithek ro lui pha blia rek. Jishii ithek ro wie miyaogamthek nane khua pha miyao è ichiig oi pha branthek shii khinrin rek ro. <sup>19</sup> Nathek è muawie shii chuh rai rone yoi jong ro, chiih-è ji pha Chiang shii gu ne na shii wie now ro. Gu nathek shii è now ro nyie wie shii ne thieg bo, jishii nyie awie pha ji shii a-id rabo. <sup>20</sup> Chiih-è Hamangkhung-aphuii è gethek ro lijiing pha lumuii è Sakhatong shii chui srane gethek lai bucho shii ruii muui phro.

Gethek ro bushun pha Ithong Isu ne nathek rog shii um bo.

<sup>21</sup> Guro ijak bliapho, Thimothei; chiih-è Lusius, Jasan, chiih-è Sosiphathar Jewthek-ijak è nathek shii salamthek thoh ge ro.

<sup>22</sup> Gu Therthus, hanyie è jigigam hi zey, Masipho pha salamthek yao ro.

<sup>23</sup> Gu ro muspho Gaius, hanyie ro hò shii Charch rek muui pha è salamthek thoh ge ro; Rajan pha bang ruiipho; Erasthus, chiih-è gathek ro khuino Kuarthus è de salamthek thoh ge ro. <sup>24</sup> Gathek ro Ithong pha bushun ne nathek rog shii um bo.

### *Jongsha pha chiong pha misia*

<sup>25</sup> Cho gethek ne Hamangkhung-aphuii shii biisiie phi rai haro! Chiih-è bajo inai è khia ruii pha ji è izai ji ug ne ruii pha duiine, chiih-è gu muyua pha Isu Masi ro Mua Wie ji duiine ai ne gethek shii migi hà chuh è riu pha nyarab mua phro. <sup>26</sup> Jimagunde thuh shii, chaigthek Chiang è izai jine fuang hà yi jong ro; chiih-è idang pha Hamangkhung-aphuii ro muyung è zab pha sohthek shii id yi phro, ji è zab è migi rek ne chiih-è nuii bo.

<sup>27</sup> Hanyie shii khani ley um pha ne, Hamangkhung-aphuii awai bie ro, ji è Isu Masi Chiang è idang biisiie rek ne rai bo! Amen.

## KHORINTHEK Shii Phaul Re-è Igobi Pha Jigigam YAOPHI

Khorintheek shii Phaul ro igobi pha jigigam ne masipho ro chai nane migi shii diigtheek rog shii khoh pha ji zeyjong ro, jithek ne Phaul miirung pha charch shii khia khlei ro. Ji pha ishak shii Khorinth ne Grekh pha bajo boh rajan ro. Ji ne Roman du-ùà iliing pha Akhaya pha bajo jadthek de um. Hi ne chong è, awaithek ro zen pha ji shii wiangwe ne, ruang hà shiie pha layog, chiih-è ichua pha giangtheek è thiegdun.

Charch hà che rai chiih-è layog, chiih-è siulao rai pha nane yiygey rai pha Chiang shii musaithek sai, thieg pha Chiang shii, Charch pha muyung, Ragung so pha lasen hég, chiih-è hòì din pha diigtheek shii now srane guaphasamoy è jigigam zey. Bajo iliing è ai riig nyie khi-èrek ne Mua Wie è ji pha musaithek ne chang yi.

Itho 13, shii doh yi Hamangkhung-aphuii ro bran shii ne miie ne zab è wie lasen ro, ji pha jigigam pha itho ne bajo wie è thieg pha ji ro.

### **Iliing shii um pha ji**

*Yaophi (1:1-9)*

Charch iliing shii yoyo ibrog (1:10—4:21)

Siulao pha munow nane haliing pha chai (5:1—7:40)

Masipho nane migi arek pho (8:1; 11:1)

Charch pha chai nane misia (11:2—14:40)

Masi nane migipho hòì din pha (15:1-58)

Judea hà Masiphothek shii zid (16:1-4)

Nujo miyaothek nane jongsha (16:5-24)

<sup>1</sup> Phaul è, hanyie shii Hamangkhung-aphuii è yang ne Masi Isu ro guaphasamoy rek yi, chiih-è gathek ro khuiino Sosthenes è de.

<sup>2</sup> Khorinth shii um pha Hamangkhung-aphuii ro charch chiih-è Hamangkhung-aphuii è hanyie shii zab so pha bran rone ho pha, chiih-è hanyie yi aishii um pho ne Isu Masi rog shii phro, ithek ro Ithong nane gathek ro Ithong, hanyie è Isu Masi shii sia pha zab bran shii ò rek bo.

<sup>3</sup> Hamangkhung-aphuii gethek ro Aphuii nane Ithong Isu Masi è nathek shii bushun nane liijung phi bo.

### *Masi shii khirzeythek*

<sup>4</sup> Nathek Chiang shii gune idang guro Hamangkhung-aphuii shii laso phi, nyieliieshii Isu Masi Chiang è ai è nathek shii bushun phi. <sup>5</sup> Nathek Masi rog shii ò um pha ji è nathek ne zab pha muna, chiih-è ne zab pha yao pha nane zab khani shii bohkhoh rey ruii phro. <sup>6</sup> Masi ro mua Chiang è nathek shii chuh è rab phi sra ne <sup>7</sup> nathek khan muui pha gathek ro Ithong Isu Masi dong ruii pha ji è, nathek shii mua pha khirzey jine iphen jia de iujia arey yi ro.

<sup>8</sup> Jong pha Inai shii de nathek shii chuh è ruii phro, jiè nathek ne gethek ro Ithong Isu Masi pha Inai shii ne ichiig oi phro. <sup>9</sup> Hamangkhung-aphuii shii migi rek bo, Hamangkhung-aphuii hanyie è nathek shii gathek Ithong awai Dufuii Isu Masi rog ò rek pha ho ro.

*Churh shii chedun*

<sup>10</sup> Gethek ro Ithong Isu Masi pha riichai è gu nathek zab shii yao, gu ijakthek, nathek è nyie yao pha ji shii ne nuii, jiè nathek duchoi shii ache ruii phro. Zab ò jia rai bo, jia now bie ne chiih-è jia rek bie bo. <sup>11</sup> Chloe haliing pha giak brantheek è gu shii miang è yao, gu ijakthek, thiisa hà nathek duchoi shii gui muui ro. <sup>12</sup> Gu ne hì duiine nathek shii yao: Nathek zab jia jia ne yo yaodun. Jia è yao, “Gune Phaul rog luagieng” gai è yao, “Gune Apholos rog luagieng” gai è yao, “Gune Phithar rog luagieng” chiih-è gai è yao, “Gune Masi rog luagieng.” <sup>13</sup> Masi shii yoyo ibrogthek che nebey! Nathek chiang shii bai hà iy pha ji ne Phaul bey? Nathek ne Phaul ro samoy rey ne khowo yi nebey?

<sup>14</sup> Gu Hamangkhung-aphuii shii laso phi, Grisphus nane Gaius shii thoh ne gu è nathek hanyie shii khowo aphi ro. <sup>15</sup> Chiihphado, nathek ne gu beng è khowo yie phrone, nathek ne hanyie de ayao mua phro. <sup>16</sup> (Oh, gu è de Sthephanas nane airo haliing pho shii khowo phi; jishii gu è gai hanyie shii khowo phi pha ji ne gu anow mua ro.) <sup>17</sup> Masi è gu shii khowo phi pha athoh ro. Ai è gu shii ne Mua Wie ji yao pha thoh, chiih-è bran khani pha nyuak è rek ne yua pha asi ro, ji pha chiang shii izai rab ne Isu bai shii iy pha blu shii nathek è ariao yi rabo.

### *Masi ne Hamangkhung-aphuii pha blu nane khani ro*

<sup>18</sup> Hanyie yi san dun ramuii pho ne, Masi bai shii iy pha mua jine adunmey ro: jishii gethek hanyie è ragia rey pho shii ne Hamangkhung-aphuii blu ro. <sup>19</sup> Jigigam shii yao,

Gune khua pha khani shii srobro rek ruii phro chiih-è bajo id brantheek ro khani shii de ijiu jia hà ruii muui phro.

<sup>20</sup> Ji-è ji arone, khua ne khi hà dun dun lai? Dinne bajo id pho ne khi hà dun dun lai? Dinne ichiih sohjambling pha lie pho ne khi hà lei? Hamangkhung-aphuii è ichiih sohjambling pha khani ne bi-ìe rone doh yi!

<sup>21</sup> Hamangkhung-aphuii è brantheek shii awaithek khani è aishii athieg yi pha rab muui. Ji phachiang shii, gethek muyua pha mua ji ne thaluii “bi-ìe” rone yao pha ji ne, hanyie è migi rek pha ji shii ne ragia rey phrone Hamangkhung-aphuii è phakjong ro. <sup>22</sup> Jewthek è buangthek pha khagi shii chid, chiih-è Greekthek ne khani shii sow. <sup>23</sup> Chiih-è gethek ne, Masi ne zun dun pha ji yao, ji pha mua ne Jewthek shii ne buii ro chiih-è Gaibrantheek shii ne adunmey ro; <sup>24</sup> jishii Hamangkhung-aphuii è hanyie shii ho pha ji ne, nyi manyi Jewthek nane Gaibran shii de ro, hì pha mua ne Masi ro, hanyie shii Hamangkhung-aphuii ro blu nane Hamangkhung-aphuii ro khani um ro. <sup>25</sup> Nyieliieshii Hamangkhung-aphuii ro bi-ìe ne brantheek ro khani è bo doh muui ro, chiih-è Hamangkhung-aphuii pha zia ne brantheek ro chua è de bo doh muui ro.

<sup>26</sup> Gu ijakthek, Hamangkhung-aphuii è nathek shii ho mage shii, nathek ne nyie ga thuh shii now bo. Bran è now shii nathek è giak yi khua dinne blu dinne boh ilkhi ro. <sup>27</sup> Hamangkhung-aphuii è khani oi pho shii gua pha ji ne nak ne sohjambling pha khani um pho shii biwo rek yi pha rek, chiih-è sohjambling pho zia ro è yao pha ji shii gua ne blu pho shii biwo rey yi. <sup>28</sup> Sohjambling pho nyie shii lu riig muui pha nane thoh muui pha, chiih-è nyie asi rone yao pha ji shii gua srane sohjambling pho è miigak rone now pha srobro yi pha gua phro. <sup>29</sup> Hì pha miyao è hanyie de Hamangkhung-aphuii moe shii nyigodog arek mua. <sup>30</sup> Jishii Hamangkhung-aphuii è gethek shii Masi Isu rog shii ò rai yi pha noh, chiih-è Hamangkhung-aphuii è Masi

shii gethek ro khani rab phi. Ai Chiang è gethek ne Hamangkhung-aphuii rog shii giang ruii; gethek de Hamangkhung-aphuii ro so bran rey ro chiih-è gethek ne layog è ichad rey ge ro. <sup>31</sup> Ji-è, chiihphado, jigigam shii yao, “Hanyie magungde nyigodog rek yang arone Ithong è nyie rek pha ji shii nyigodog rek bo.”

## 2

### *Masi zundun pha Chiang mua*

<sup>1</sup> “Gu ijakthek, gu nathek shii wuii srane Hamangkhung-aphuii ro ug ne ruii pha izai ji yua shii, gu boh miyaogamthek nane boh è dab pha ji è ayao ro.” <sup>2</sup> Gu nathek rog um ba shii, gune gui khani shii nowjong zab shii bia srane Isu Masi shii nane airo bai shii iy pha ji shii nowdang bie. <sup>3</sup> Ji-è gu nathek shii wuii shii, gune zia nane rum ne sam, <sup>4</sup> chiih-è guro muyua nane mua ne bran khani pha miyaogamthek è khia pha asi ro, jishii Hamangkhung-aphuii ro Ragung pha blu è khagi rek. <sup>5</sup> Chiihphado, nathek mihi ne bran khani lakhung shii asi ro jishii Hamangkhung-aphuii pha blu lakhung pha ro.

### *Hamangkhung-aphuii ro khani*

<sup>6</sup> Jishii hanyie yi ragung shii weg arone gune aishii khani pha mua ji yua. Jishii sohjambling è rey pha blu dinne sohjambling shii bukthothek pha bluthek—blu ne awaithek blu shii san muii pha khani ji asi ro. <sup>7</sup> Gu è yao pha khani ne brantheek è ug ne ruii pha Hamangkhung-aphuii ro ug pha khani ji ro, jishii sohjambling rab pha ibi, hanyie è khuchung mujo gethek ro biisiie ne guajong ro. <sup>8</sup> Hi pha sohjambling pha bo khophothek hanyie de hi pha khani ne athieg ro. Ithek è thieg arone, ithek ne biisiie pha Ithong ne bai hà azun chid. <sup>9</sup> Jimagunde, jigigam shii yao,

“Hanyie è khuchung de adoh dinne khuchung de ayoi,  
hanyie è khuchung de anow pha ji ne rey ruii phro,  
Hamangkhung-aphuii è jine hanyie è aishii miie, ji shii saro phi.”

<sup>10</sup> Jishii Hamangkhung-aphuii è gethek shii airo Ragung è awairo ug pha ji shii id yi. Hamangkhung-aphuii ro yang ne bucho hà ug pha blia rangde Ragung è zab sowdun. <sup>11</sup> Hi ne bran awairo ragung awaishii um pha ji ne zab awai Chiang shii thieg bie; ji duine, Hamangkhung-aphuii ro Ragung ne Hamangkhung-aphuii Chiang zab thieg. <sup>12</sup> Gethek ne ichiih sohjambling pha ragung achoi ro; ji pha Chiang shii gethek ne Hamangkhung-aphuii è thoh ge pha Ragung shii choi, chiihphado gethek ne Hamangkhung-aphuii è gethek shii phi pha ji ne nyathieg mua phro.

<sup>13</sup> Ji-è chiihphado, hanyie shii ragung um gethek è ragung pha izaithek yao, jishii gethek ne bran khani è yua pha miyaogamthek jine ayao pha, Ragung pha muyua è yao haro. <sup>14</sup> Hanyie shii Ragung oi Hamangkhung-aphuii ro Ragung è thog pha lasen høg jine ayie mua phro. Ji è rek pha brantheek ne jithek shii ne athieg mua chiih-è aishii ne jithek adubo ro; nyieliieshii ithek ro ibid ne Ragung è chua mua bie phro. <sup>15</sup> Jimagunde hanyie shii Ragung um, khi-èrek magunde, zab pha ibid shii nyachua mua, jishii hanyie magungde aishii achua mua phro. <sup>16</sup> Jigigam shii yao, “Ithong ro khani ne hanyie thieg mua phlei?”

“Aishii ne hanyie è yua mua phlei?”  
Jimagunde, gethek ne Masi ro khani um ro.

## 3

*Hamangkhang-aphuui pha khiaothek*

<sup>1</sup> Gu ijaktek wo, nyieliieshii gu è hanyie shii ragung um pha brantheek shii yao pha duiine izai miyao ji ayao mua, gu è nathek shii ne ichiih sohjambling pha duiine yao chiih-è Masipho migi shii anithek duiine ro.

<sup>2</sup> Michie ii-àk è asi pha, gune nathek shii niu wang, nyieliieshii nathek ne ji ne arey ba ro. Chiih-è nathek thuh rangde ji asharo ba ro. <sup>3</sup> Nyieliieshii nathek murai hi ne thuh de sohjambling pho murai duiine rai bamuii ro. Thiisa hà nathek duchoi shii gidieg um arone nawaithek chung gui rai phro, nathek ne ichiih sohjambling pha rone chiih-è ji pha mizen shii sieng rone khagi arey bey? <sup>4</sup> Nathek jia è yao, “Gune Phaul rog luangieng,” chiih-è gai è yao, “Gune Apholos rog lua giung è yao pha ji ne nathek ne sohjambling pha bran duiine achia bey?”

<sup>5</sup> Yaochak arone, Apholos ne hanyie lei? Chiih-è Phaul ne hanyie ga? Hanyie è migi shii no ne lua pha, gethek ne Hamangkhang-aphuui ro khiao bie ro, gethek zab jia è Ithong è aishii rek boh ne phi pha blia ji rek: <sup>6</sup> Gu iriie wey, Apholos è misieng shii khoh phi, jishii misieng sieng yi pha ji ne Hamangkhang-aphuui ro. <sup>7</sup> Hanyie jia è misiengtheek shii hai magungde chiih-è hanyie jia è kho zuak magungde nyie blia oi ro. Hi ne Hamangkhang-aphuui ro blia ro, nyieliieshii ai è misieng shii sieng yi. <sup>8</sup> Thuh shii ne hai pha bran nane khoh phi pha bran ne ò ro, hanyie è nyie khi rek pha ji Hamangkhang-aphuui è ji duiine lasen phi ruii phro. <sup>9</sup> Chiih-è gethek ne ò shii Hamangkhang-aphuui pha blia rekramuii ro, chiih-è ithek ne Hamangkhang-aphuui ro raig ro, chiih-è nathek Hamangkhang-aphuui ro hò de ro. <sup>10</sup> Hamangkhang-aphuui è gu shii phi pha lasen ji è khoh srane, gune hò wie rung pha duiine sarong rek ruii, chiih-è gai jia è ji pha lakhung shii hò rung, jishii nyie khi-èrek ne rung pha, zab ne ji shii wie gayiig bo. <sup>11</sup> Hamangkhang-aphuui è Isu ai jia shii khuchung mujo sarong rab ne ruii jong, chiih-è hanyie è de gai sarong arab muui sha phro. <sup>12</sup> Giak ne san, liiman dinne igong um pha lubao è sarong shii hò rung pha rek, giak ne hing, saing dinne sasen è rung phro. <sup>13</sup> Chiih-è zab bran mirek pha blia igong ji ne Masi ro Inai thog mage shii doh ruii phro. Ji pha Inai shii bai è zab pha blia shii dong ruii phro; chiih-è hanyie ro jine wie awie bai è chai ruii phro. <sup>14</sup> Chiih-è nyie sarong shii rab pha ji ne bai è ahùb arone, ji rung pha bran shii ne lasen mua ruii phro. <sup>15</sup> Jishii hanyie ro blia yi bai shii hùb dun arone airo lasen ne amua ruii phro; jishii ai è bai ji è yo arone, awai ne ragia nyarey mua.

<sup>16</sup> Zai Nathek ne thieg nathek ne Hamangkhang-aphuui ro misia hò ro chiih-è Hamangkhang-aphuui ro ragung ne nathek shii rai phro. <sup>17</sup> Ji-è hanyie è Hamangkhang-aphuui ro misia hò shii mua lai ne Hamangkhang-aphuui è aishii de mua ruii phro. Chiih-è Hamangkhang-aphuui ro misiahò ne so ro chiih-è nawai de airo misiahò ro.

<sup>18</sup> Hanyie de awaishii bi-ìe arek rabo. Chiih-è hanyie magungde de nathek duchoi shii ai ne ichiih sohjambling pha sasab è khua now arone, khua rey yi pha, bi-ìe rey bo. <sup>19</sup> Chiih-è ichiih sohjambling pho munow pha khani jine Hamangkhang-aphuui mieg moe shii ne adubo ro. Jigigam shii yao, “Hamangkhang-aphuui ne khuathek shii awaithek briak shii zum din ruii phro.” <sup>20</sup> Chiih-è gai jigigam de yao, “Ithong è ne thieg khua rone now pha ji ne adubo ro.” <sup>21</sup> Ji-è, hanyie magunde bran è nyie rek mua pha ji shii ne

nyigodog arek mua phro. Zai è arone hì zab ne naro ro: <sup>22</sup> Phaul, Apholos, chiih-è Phithar; hì pha sohjambling, chai chiih-è iy pha, thuh pha chiih-è phariang pha hì ne zab nathek ro ro, <sup>23</sup> chiih-è na ne Masi re-è rey chiih-è Masi ne Hamangkhang-aphuii re-è rey ro.

## 4

### *Masi ro guaphasamoythek*

<sup>1</sup> Nane gathek shii Masi ro khiaothek duine now bo, hanyie shii Hamangkhang-aphuii ro ug pha izaithek shii dumuii phi. <sup>2</sup> Hì è rek pha Khiaothek ai ne awai masdo shii wie è isiie rek chid phro. <sup>3</sup> Thuh shii, gu ne na chiih-è hanyie sohkhung pho shii chua pha ji sandiig arek ro; gu gui lakhung shii de achua ro. <sup>4</sup> Gu è now pha ji ne sang ro, jishii ji è ne izai gu ne ichiig rone doh yi pha asi ro. Hanyie è chua pha gu lakhung shii phi pha ji ne Ithong jia bie ro. <sup>5</sup> Ji-è nathek ne chua pha ji ne khriig ishak athog ba shii ne hanyie jia shii de achua rabo. Idohhè pha chua pha ji ne Ithong wuii ruii pha ji khan bo; ai ne igiia ug pha ji shii ne isang yi phro chiih-è brantheek khani shii ug ne now pha ji shii ne hong ruii phro. Chiih-è chiihphado ithek shii mua sapho pha chiong jine Hamangkhang-aphuii è mua ruii phro.

<sup>6</sup> Nathek Chiang è, gu ijakthek, gu è hì zab yao pha Apholos nane gui, gasa nyi è rek pha ji ne nathek shii rek phi, jiè nyie yao pha miyiaosiu ne nathek shii id mua pha, “Bohkthothek shii wie è riig bo” Nathek hanyie de bran jia shii wiangwe srane gai shii makhak-ariing rabo. <sup>7</sup> Hanyie è na shii gaithek è de boh rab phlei? Nashii nyie um pha ji ne Hamangkhang-aphuii è phi pha ji asi bey? Wie, na shii um pha lasen ji asi arone nyie khi-èrek ne nyigodog rek mua phlei?

<sup>8</sup> Nathek nyie chiid pha ji ne zab nathek shii umjong bey? Nathek ne bokho reyjong bey? Nathek ne sajathek rey dun bey? Gethek ne thuh de arey ba ro? Nathek sajathek rey pha ji ne gu è yang ro, jiè gethek ithek rog shii sajathek rek mua. <sup>9</sup> Gu ne hì duine than gethek riigdang pha ji shii zab sohjambling pha hamangkhlhie thek nane brantheek mieg moe shii brantheek è iy pha the muui pha ji duine guaphasamoythek shii ne Hamangkhang-aphuii è iidohè pha ithua shii phi. <sup>10</sup> Masi Chiang è gethek ne bi-iethek ro, jishii nathek ne Masi rog shii um pha ji è khua ro! Gathek ne zia ro, jishii nathek ne gang ro! Gathek shii ne snai muui, jishii nathek shii ne ilab phi. <sup>11</sup> Hì pha ishak thokdang shii gethek ne chi-iyiy nane gahang-hang ba; gethek ne yung hègthek guui; gethek shii ne zuang; gethek ne ithua hà lua ne rai; <sup>12</sup> Gathek ne blia gang rek srane guithek shii jid yi, gathek shii thamai mage shii, gathek ne khurzey rey, gathek shii diigchiao thog mage shii, gathek è zud; <sup>13</sup> gathek shii makhak-riing mage shii, gathek è jum miyaogamthek rog è chang. Chiihphado gethek ne ichiuh sohnyiak pha snai muui pha ji asi sha ro; gethek ne thuh shii sohjambling pha izia-ikho ro!

<sup>14</sup> Gu è nathek shii hì zey pha ji ne, nyieliieshii nathek shii biwo than yi pha azey ro, jishii gui anithek rone nathek shii yua phro. <sup>15</sup> Nathek Masipho chai shii itham sua gayiigphothek um ne de, nathek shii aphuii jia bie ro. Nathek chai Masi rog shii ò um pha ji ne gu nathek shii Mui Wie yie pha ji è gu nathek ro aphuii rey ro. <sup>16</sup> Gu nathek shii khung, chiihphado, nathek ne gu mirek ji shii lua bo. <sup>17</sup> Hì pha blia Chiang è hanyie yi guiro bushun nane Masipho chai shii isiie rek pha, gui dufuii Thimothi shii gu nathek shii thoge



ro. Gu è iwo chai Masi Isu rog shii ò rek ne nuii pha sbang chiih-è nyie gu è zab pha charch shii yua pha ji ai ne ithek shii now yi.

<sup>18</sup> Nathek giak ne wiangwe rey dun nyieliëshii nathek ne è now gu ne nathek shii si pha awuii sharuii. <sup>19</sup> Jishii, Ithong è yang arone, gu nathek shii khthiie wuii ruii phro, jiè ji pha brantheek shii um pha blu wiangwe pha ji shii gune sou pha ro, chiih-è ithek è nyie yao pha ji asi ro. <sup>20</sup> Hamangkhang-aphuii ro Sajathua ne miyaogamtheek è asi ro, jishii blu è ro. <sup>21</sup> Nathek shii ne nyie khi-èrek ne ò chid? Gu ne nathek shii zuang pha wuii ruii haba dinne miie pha ragung nane jum ji yie ne nathek shii wuii ruii habey?

## 5

### *Charch shii siulao*

<sup>1</sup> Thuh, hi ne nathek duchoi shii bajo buii siulao rek rai pha ji ne yaojong, migi arekpho rangde è jithek pha ichiig ne arek ro. Gu shii yao bran jia ne awai muno rog shii men ramuii ro! <sup>2</sup> Nyiekhi-è, chiihphado, nathek ne wiangwe rek mua nebey? Suang lakhung shii, nathek ne duhug rog shii zan chid, chiih-è bran hanyie è jithek rek pha ji shii ne nathek ro ò è khia muui chid. <sup>3-4</sup> Chiih-è gu siu ne nathek è ruang magungde, thuh de ragung shii ne thiisa nathek rog shii um ro; chiih-è jimagunde gune nathek rog shii um pha duiine, gu ne Ithong Isu beng è ji pha buii rek pha bran lakhung shii chua pha ne ruiijong ro. Nathek ò shii si rai mage shii, chiih-è gui ragung rog shii si pha ro, gethek ro Ithong Isu pha blu gathek rog shii um ne, <sup>5</sup> nathek ne ji pha bran siu mua yi pha sakhatong wad shii phi muui bo, jiè Ithong pha Inai shii ne airo ragung ne ragia rey ruii phro.

<sup>6</sup> Nathek shii wiangwe rek pha rangsua oi ro! Nathek ne yao pha ji thieg, “Iujia pha phiia è zab pha miihab nog pha ji shii phieng yi.” <sup>7</sup> Nathek de ihèg phiia layog shii khia muui bo, chiihphado nathek de zab igang rey phro. Nathek ne khi-è mia pha ji ne izai gu nathek shii thieg, chiihphado ithek de phiia alua pha miihab nog pha duiine rey bo, chiih-è gethek ro Hiiadun pha sai pha ji ne khriig sha ro, gethek ro Hiiadun pha shiiishaiduii Masi ne khlemjong ro. <sup>8</sup> Chiihphado, cho gethek ne iweb shii phiia ihèg pha layog um pha nane awie pha ji è asi pha, jishii iweb shii phiia oi pha gang nane izai pha iweb rog shii Hiiadun pha ji shii lubo rek sha rai haro.

<sup>9</sup> Jigigam shii gu è nathek shii zey pha ji ne gu nathek shii yao siulao pha bran rog shii ijak arek rabo. <sup>10</sup> Thuh gu hanyie thek shii gailbrantheek hanyie è siulao rek dinne sugoh dinne mugo dinne hanyie è jangbangtheek shii siapho shii ayao ro. Itheek shii yoh rey pha ji ne nathek zab ne sohjambling è khia chid ruii phro. <sup>11</sup> Gu miyaosiu ne hi ro, bran hanyie è awai shii migipho ro è yao jishii siulao dinne sugoh rek dinne jangbangtheek shii sia dinne khlam dinne phuiithiig dinne mugopho rog shii ijak arek rabo. Ji è rek pha brantheek rog shii chie pha de adug rabo.

<sup>12-13</sup> Nyayao chak arone, gune fuangpho shii chua pha guro rangsua asi ro. Hamangkhang-aphuii è ithek shii chua ruii phro. Jishii nathek ne nawaithek ro ò pha brantheek shii achua bey? Jigigam shii yao, “Nathek ibrog è awie pha bran shii khia muui bo.”

## 6

*Masiphothek chung mak rek rai pha Chiang è chuathæk hà wuii*

<sup>1</sup> Nathek è hanyie magunde Masipho chung è miyao um arone, ji pha miyao shii Hamangkhung-aphuii pha bran shii khriig rek yi pha khalo shii migi arek pha chuathék ibi shii wuii pha chua um lei? <sup>2</sup> Hamangkhung-aphuii bran ne sohjambling shii chua ruii phrone nathek ne athieg bey? Wie, chiihphado, nathek è sohjambling shii chua arone, nathek ne lu miyao shii achua mua habey? <sup>3</sup> Gethek ne hamangkhliiethék shii de chua ruii phrone nathek ne athieg bey? Chiihphado, ichiih pha chai pha manathék shii ne dinne de bajo chua mua! <sup>4</sup> Jithek pha miyaothék izai thog mage arone, nathek hanyie è charch shii isiie asi pha bran shii khriig rek yi pha wuii nebey? <sup>5</sup> Nathek shii wo muui ro, izai thiisa hà hanyie è Masipho chung gui rai pha ji shii ne chua mua pha khua jia ne um iwa. <sup>6</sup> Ji phachiang shii, Masipho jia chua ò hà wuii ne gairo suang rek srane migi-arekphothék shii maley chua yi!

<sup>7</sup> Hi ne izai chak ro nathek ne nawaithek duchoi shii che srane zab buyud rone doh yi ro. Nathek lakhung ichiiig rey yi pha ji ne wie asi bey? Nathek ro rio yi pha wie asi bey? <sup>8</sup> Ji phachiang shii, nathek ne nawaithek chung asi pha rek ne chiih-è nawaithek chung rio rai, chiih-è gai migiphothék shii rangde ro! <sup>9</sup> Nathek ne izai thieg awie pho ne Hamangkhung-aphuii ro Sajathua akhud mua phro. Nawaithek shii bi-ìe arey rabo; bran hanyie è ichiiig rek, dinne hanyie è jangbang shii sia dinne siulao rek dinne bufuii chung siulao rek <sup>10</sup> dinne hanyie mugo dinne giichak dinne phuiithiiig pho hanyie è gai shii khlam dinne mugopho jithek ne Hamangkhung-aphuii ro Sajathua shii akhud mua phro. <sup>11</sup> Nathek giak ne ji duiine ro. Jishii nathek shii ne layog è igang rekjong ro; nathek è Hamangkhung-aphuii shii phijong ro; nathek shii ne gathek ro Hamangkhung-aphuii ro Ragung nane Ithong Isu Masi è nathek shii ne Hamangkhung-aphuii rog shii rangsua ruiijong ro.

### *Nathek ro siu ne Hamangkhung-aphuii ro biisiie shii blia rek bo*

<sup>12</sup> Giak è yao ruii phro, “Gu shii ne nyie magunde rek yi.” Oh; jishii zab ne nathek shii wie asi ro. Gu ne guishii nyayao muui, “Gune ne nyie magunde rek mua, jishii gune nyie magunde jithek è gu shii khiao arab yi ro.” <sup>13</sup> Giak ne yao ruii phro, “Michie ne lui pha ro, chiih-è lui ne michie pha ro.” Oh; jishii Hamangkhung-aphuii è nyimanyi shii jong muui phro. Siu ne siulao rek pha asi ro, jishii Ithong pha blia rek phi pha ro; chiih-è Ithong è siu shii nyie chid pha ji phi. <sup>14</sup> Hamangkhung-aphuii è Ithong shii iy dun pha ji è hòi phi, chiih-è gethek shii ai è awairo blu è hòi yi phro.

<sup>15</sup> Nathek ne thieg nathek ro siu ne Masi ro siu pha thang ro. Gu ne Masi ro siu ichua shii yie ne chiih-è siulao pha siu ichua rab muui habey? Arey muui! <sup>16</sup> Dinne nathek ne athieg iwa bran hanyie è awai siu shii siulao shii rung ne bimi rog shii siu jia rey dun bey? Jigigam shii miang è yao, “Siu nyi ne jia rey ruii phro.” <sup>17</sup> Jishii hanyie è awaishii Ithong rog shii rung arone ragung shii ne ai rog ò rey dun phro.

<sup>18</sup> Siulao thoh muui bo. Gai nyie layog rek magungde siu shii achun phro; jishii bran hanyie è siulao pha ichiiig layogthék rek arone awai siu shii suang rek phro. <sup>19</sup> Nathek ro siu ne Ragung So pha Jewthék misiahò rone athieg bey, hanyie è nathek shii rai ne hanyie è nathek shii phi pha ji ne Hamangkhung-aphuii è phi ne bey? Nathek ne nawaithek ro asi ro jishii Hamangkhung-aphuii ro ro; <sup>20</sup> ai è nathek shii igong è phegjong ro. Ji-è nathek ro siu ne Hamangkhung-aphuii ro biisiie shii blia rek bo.

## 7

*Yiygey Chiang è Musaithek*

<sup>1</sup> Thuh, na mizey pha miyaotek Chiang shii riig bo, bran jia è ayiyagey pha rek pha ji ne wie rek ro. <sup>2</sup> Jishii nyieliieshii siulao ne bajo um ro, jiè zab pha hò-aphuiittek ne awaithek ro yiy um bo, chiih-è zab pha hò-amuiittek ne awaithek ro gey um bo. <sup>3</sup> Bufuii è gey duine liingsed pha blia rek bo, chiih-è bimithek de yiy duine awaithek blia liingsed pha rek bo, chiih-è zab gai è chid pha ji shii liingsed pha rek rai bo. <sup>4</sup> Yiy ne awairo siu pha muspho asi ro, jishii gey ne yiy ro siu pha muspho ro; ji duine gey de awairo siu pha muspho asi ro, jishii yiy ne gey ro siu pha muspho ro. <sup>5</sup> Igobi nasa misia shii yo rai pha nuui rai shii ne, yo nyarai bo jishii misia jong mage shii nawaisa chung agak rai rabo, jishii chiihphado yiygey duine wie rai bo. Ji duine nyieliieshii naro azud mua pha ji è Sakhathong è chuaan phi mage phro.

<sup>6</sup> Gu è hi nathek shii yao pha ji ne yung pha asi ro, jishii jum è phi phro.

<sup>7</sup> Gu è nathek shii gu duine rai bo è yang muui ro; jishii zab jijia shii ne Hamangkhung-aphuii ro bajo wie lasen um ro, bran jia shii hi pha lasen um ro, gai shii gai lasen um ro.

<sup>8</sup> Thuh, ayiy-agey ba pha nane gey oi pha misiungtek shii gu yao nathek de gu mirek duine athodang pha rai pha ji wie ro. <sup>9</sup> Jishii nathek è chidtek pha ji shii azud mua arone, yiygey mage bo—Michid shii hùb shii ne yiygey liak pha hi wie ba ro. <sup>10</sup> Yiygey pha bran shii gu muyung um ro jishii hi ne guro asi ro hi ne Ithong ro ro: Yiy ne awaithek gey shii athoh rabo; <sup>11</sup> jishii ai è rek arone, ai ne awai ji rai ne dinne awai gey rog shii dinne dog bo; chiih-è gey è yiy shii ache rabo.

<sup>12</sup> Gaithek shii gu è yao (jishii Gui ne Ithong asi ro) Masipho bran jia shii migi arek pha yiy um chiih-è ai è ai rog shii rai pha ro è nuui arone, ai ne ji pha bimi shii ache rabo. <sup>13</sup> Chiih-è Masipho bimi jia è migi arek ba pha bufuii shii yiygey ne chiih-è bufuii ji è bimi rog shii rai pha ro è nuui arone, bimi è ji pha gey shii ache rabo. <sup>14</sup> Migì arek ba pha gey jide awai yiy rog shii ò rai pha ji è Hamangkhung-aphuii è nuui, chiih-è migi arek ba pha yiy ji de migi rek pha gey rog shii ò rai pha ji è Hamangkhung-aphuii è nuui phi. Ji-è arek arone, ithek anithek ne migi arek pha ani duine rey dun phro; jishii hi è rek pha ji è, ithek è Hamangkhung-aphuii shii nuui phi. <sup>15</sup> Jimagunde, hanyie yi migi arek ba pha è Masipho yiygey rog shii thoh yang arone, jine rey yi bo. Zai Masipho yiygey shii ne, yiy magun gey magun ichad nyarek mua phro. Hamangkhung-aphuii è nathek shii liijing hà rai pha ho. <sup>16</sup> Nyie khi-èrek ne na yao mua, Masipho yiy, nathek ne nawaithek gey shii ragia arek habey? Din ne khi-èrek ne yao mua, Masipho gey, ithek yiy shii ne ragia arek habey?

*Hamangkhung-aphuii è ho pha duine sieng bo*

<sup>17</sup> Zab nathek shii Hamangkhung-aphuii è ho shii Ithong è nathek shii lasen phi pha ji duine nathek rai bo. Hi ne gu è zab charchthek shii yua pha Iphey ji ro. <sup>18</sup> Migiangkheg pha bran ne Hamangkhung-aphuii è ho pha ji shii nuui arone, ai ne migiangkheg pha nab shii sud pha abidiang rabo; chiih-è migiang-akheg pha brantheek è Hamangkhung-aphuii miiho shii nuui arone, ai ne migiang-akheg rabo. <sup>19</sup> Bran yi migiangkheg magunde migiang-akheg magunde nyie miyao oi ro, nyie miyao ji ne Hamangkhung-aphuii muyungtek nuui pha ji ro. <sup>20</sup> Zab nathek ne Hamangkhung-aphuii è ho pha ji shii nuui mage shii nathek zab ne rai bo. <sup>21</sup> Hamangkhung-aphuii è nathek shii ho mage shii nathek ne khiao bey? Wie, buii anow chid rabo;

jishii nathek shii ichad rey pha jo um shii, rek bo. <sup>22</sup> Chiih-è khiao hanyie shii Ithong è ho pha bran ne ithong ro ichad sha ro; ji duiine ichad bran hanyie shii Masi è ho pha ji shii ne airo khiao ro. <sup>23</sup> Hamangkhung-aphuii è nathek shii igong è phegjong ro; jiè bran ro khiaothek arey rabo. <sup>24</sup> Gu ijakthek, nathek zab shii Hamangkhung-aphuii è nyie tharo shii ho pha ji ò rai bo.

*Aiyi-agey nane misiungthek shii musaithek*

<sup>25</sup> Thuh, aiyi-agey ba pha bran Chiang shii na è zey pha ji shii now bo: Ithong è gune nyie muyung oi ro, jishii Ithong ro bushun è migi rek sapho um pha ji è guro munow ji nathek shii phi.

<sup>26</sup> Thuh pha diig shii wie è rek ne, gu munow ne bran jia nyie khi è um lai ne ji duiine rai pha ji wie liak ro. <sup>27</sup> Na shii yiy um bey? Chiihphado aishii ruang rek pha abidiang rabo. Nane aiyi-agey ba bey? Chiihphado yiy asow rabo. <sup>28</sup> Jishii na yiygey arone, nane layog arek ro: chiih-è aiyi-agey ba pha bimi yiygey arone, ai ne layog arek ro. Jishii yiygey pha bran shii um pha idang inai pha diig ji nathek shii ragia rek phi pha now ro.

<sup>29</sup> Gu ijakthek, gu è nyie yao pha ji ne hi ro: ishak ne muna oi sha ro, chiih-è thuh è yie ne yiygey pha bran ne ayiy pha duiine rai bo; <sup>30</sup> hanyie choh pho ne, ithek ne duhug arek pha duiine rai bo; hanyie siak pho ne, ithek ne asang pha duiine rai bo; hanyie pheg pho ne, ithek è nyie pheg pha ji ne awairo arey phro; <sup>31</sup> hanyie è manathek migiang shii gayiig pho ne, ithek ne ley a-ong pha duiine rai bo. Chiih-è hi pha sohjambling shii, thuh shii duiine, bajo arai mua sha phro.

<sup>32</sup> Gune nathek shii samdiig è ichad rek phi pha now ro. Aiyi-agey pha bran ne awaishii Ithong rog shii blia rek pha gayiig bo, nyieliieshii ai ne Ithong shii sang yi pha bidiang phro. <sup>33</sup> Jishii yiygey pha bran ne sohjambling pha miyaothek shii gayiig, nyieliieshii ai ne awai yiy shii sang yi pha yang; <sup>34</sup> chiih-è jiè ai ne ithua nyi shii ri. Aiyi-agey ba pha hò-amuii dinne so bimi ne ithong rog blia shii gayiig rek, nyieliieshii ai ne nyimanyi awai siu nane ragung shii phi pha yang; jishii yiygey pha hò-amuii ne sohjambling pha miyaothek rog shii gayiig rek, nyieliieshii ai ne awai gey shii sang yi pha yang phro.

<sup>35</sup> Gu è hi yao pha ji ne nathek shii nong phi pha yang ro. Gu nathek shii gak pha abidiang ro. Ji phachiang shii, gu ne nathek shii nyie izai nane nyie wie ji shii rek yi pha yang ro, chiih-è nyie de a-ong pha zab nawaithek shii Ithong ro blia rek pha phi bo.

<sup>36</sup> Yangne shaduigang rek ne ruii pha idub è aiyi-agey pha phak ne: Bufuii è de miliao bimi pha blia wie arek mua phro è than arone chiih-è ai miyang ji yi bajo chuh chiih-è ai è than arone ithek ne yiygey rai bo, ai è yang pha duiine, chiihphado ithek ne yiygey rai bo. Ji hane layog oi ro. <sup>37</sup> Jishii bufuii è, ji rek pha bangchiie arek pha, yiy-ayiy phrone awai khani shii chuh è rek, chiih-è ai awai miyang shii zab chuh è phriie ne chiih-è khuchung mujo nyie rek pha ji ne awai khani shii now arone chiihphado ai miliao hò-amuii shii ayiy pha ji ne wie rek ro. <sup>38</sup> Ji-è bran hanyie è yiygey pha ji ne wie rek ro, jishii hanyie è aiyi-agey pha ji ne dinne de bajo wie rek ro.

<sup>39</sup> Yiygey pha hò-amuii ne awai gey nya rai ba shii ne ichad asi ro; jishii airo gey yi iy dun arone, chiihphado ai è yang pha bran yiygey mua pha ichad ro, jishii ai ne Masiho bie arone ro. <sup>40</sup> Jishii ai ne awai è rai pha ji duiine rai arone ai ne sang phro. Jine gu munow ro, chiih-è gu munow ne ji ro gu shii ne Hamangkhung-aphuii ro ragung um ro.

## 8

*Jangbangtheek shii zid pha michie chiang musai*

<sup>1</sup> Jangbang shii zid pha michie shii nathek è zey pha ji shii now bo.

Hì ne izai chak ro, ji chak, ithek miyao ji duiine “gethek zab shii ne khani um.” Nyiephalai shii, Khani è ne bran shii thud ne wiangwe rek phi; jishii miie pha ji è ne rab phi. <sup>2</sup> Hanyie magunde ai ne ìu thieg ro è now arone ai ne nyie thieg chid pha ji ne izai athieg ba ro. <sup>3</sup> Jishii bran hanyie è Hamangkhung-aphuii shii miie pho shii ne Hamangkhung-aphuii è thieg ro.

<sup>4</sup> Ji-è, chiihphado, jangbangtheek shii zid pha michie chie pha chiang: gethek ne thieg jangbang ne nyie izai è azen pha chiang shii riu; gethek ne thieg Hamangkhung-aphuii ne jia bie ro. <sup>5</sup> Ichiih shii “hamangkhung-aphuiithek” ho pha um magungde, hamangkhung nane sohnyiak shii magunde, chiih-è bajo “hamangkhung-aphuii” nane bajo “ithongtheek” magungde, <sup>6</sup> Thuh ichiih shii gethek ro Hamangkhung-aphuii ne jia bie ro, Aphuii, hanyie yi zab pha mana shii rab pha nane nyie shii gethek sieng muui pha ji ro; chiih-è Ithong ne jia bie ro, Isu Masi, ai chiang è zab pha mana shii rab chiih-è ai chiang è gethek sieng ramuii pha ji ro.

<sup>7</sup> Jishii hì pha izai ne zab è athieg ro. Giak bran ne sudoh thog pha jangbang shii zid pha ji chie muui ro, ithek ji chie shii ithek ne hì pha michie ne jangbang è rey pha ro è now bamuii ro; ithek ro munow ne zia ro, chiih-è ithek ne jangbang pha michie ji è ichiig rey dun rone ithek è than. <sup>8</sup> Jishii, michie è, gethek ro sieng ne Hamangkhung-aphuii rog shii laziung arey phro, gethek è achie magungde nyie amua phro, gethek è chie magungde nyie aphua phro.

<sup>9</sup> Gayiig bo, jimagunde, naro ichad pha blia ji è hanyie ne migi shii zia ji pho shii layog hà achiih yi rabo. <sup>10</sup> Yangne hanyie yi ji pha miyao shii now pha ji yi zia pho è “Khani” gang pho è Jewtheek misiahò shii zid pha michie chie pha miyao ji na shii doh mage ne aishii ne jangbangtheek hà zid pha ji chie bo ne lububo arek phi bey? <sup>11</sup> Chiih-è jiè naro khuiino ai chiang shii hanyie Masi iy pha zia bran, ne nyieliieshii naro “Khani” è mua dun phro. <sup>12</sup> Chiih-è hì duiine naro suang layog rek ne chiih-è munow zia shii saduii phi pha ji è Masipho shii suang layog rek phro. <sup>13</sup> Ji-è chiihphado, michie è gu migiphotheek shii layog rey arone, gu ne ibey dinne achie phro, jiè gu migipho shii layog hà achiih phro.

## 9

*Guaphasamoy ro rangsuathek nane bliathek*

<sup>1</sup> Gune ichad bran asi bey? Gune guaphasamoy asi bey? Gune gethek ro Ithong Isu shii adoh bey? Chiih-è nathek ne gu è ithong shii blia rek pha ji è arey bey? <sup>2</sup> Gai è gu shii guaphasamoy rone anuii magungde, izai nathek ne rek! Nyieliieshii nathek chai è Ithong rog ò shii rai pha ji è gune guaphasamoy rone nawai è izai doh yi ro.

<sup>3</sup> Bran gu shii siakjo mage shii, hì ne gui è khi-èrek ne guishii ragia rek: <sup>4</sup> Gu blia chiang michie nane niing pha phi pha rangsua ne gu shii oi bey? <sup>5</sup> Gu lua shii gu rog shii Masipho yiy shii yie srane lua pha chiih-è gune gai guaphasamoy nane Ithong ro khuiinothek nane Phithar è rek pha ikhiing ji shii luagieng pha rangsua oi bey? <sup>6</sup> Din ne gethek sieng ramuii pha ji shiine gu nane Barnabas jia è blia rek bie habey? <sup>7</sup> Arming ne awai bang è blia rek

ne bey? Raigpho è awaithek raig pha angur achie habey? Shiishai brogpho ne awai shiishai niu aniing habey?

<sup>8</sup> Gu shii ne idang pha ikhiingthek phriie phane oi ro, nyieliieshii Iphey shii hì duiine yao ro. <sup>9</sup> “Iwoi shan pha ishak shii rawoi ro uphab shii aphan rabo” chiih-è gethek ne Moses ro Iphey tham. Thuh, Hamangkhung-aphuii è rawoi Chiang shii gayiig nebey? <sup>10</sup> Ai è yao shii ai ne izai gethek Chiang shii ayao bey? Oh ji ne gethek shii zey ro. Hanyiejia è woi chiih-è hanyiejia è riug pha ji ne iwoi pha mathang mua phro è luthong ne blia rek. <sup>11</sup> Gathek è nathek duchoi shii ragung pha iriie jai. Gathek è phua pha mana nathek è riug ne yie pha ji ne bajo bey? <sup>12</sup> Gai è na lakhung shii hì luthong pha rangsua um arone, Gathek shii ne ji è de muna rangsua oi bey?

Jishii hì pha rangsua gathek è blia arek yi ro, ji pha Chiang shii, gathek ne Masi ro Mua wie lumuii Chiang shii nyie de adiig yi pha zab shii zud. <sup>13</sup> Nathek ne izai thieg bran hanyie è Misiahò shii blia rek pho ne Misiahò è michie mua chiih-è hanyie è sraibao shii khlemthek zid pho ne khlemthek zid pha mathang mua ro. <sup>14</sup> Ji duiine, Ithong è de yung hanyie è muawie yua pho ne ithek shii ji è sieng ruii phro.

<sup>15</sup> Jishii gune nyie magungde hì pha rangsuathek shii blia arek ro, chiih-è gune hì pha rangsuathek shii ne gui shii lia pha azey ro. Hanyie magungde guro rangsua shii isloi pha miyaogamthek hà lai shii ne, gune iy liak pha wie phro! <sup>16</sup> nyieliieshii muawie ji gu yao rone gune nyigodog rek pha rangsua oi ro. Nyieliieshii, gune hì rek pha muyungthek mua ro. Chiih-è gu muawie ji ayao arone, gu shii ne khama buii ro! <sup>17</sup> Gune ichad è guilum ne blia rek arone, gune mua pha luthong ro; jishii gu ne phi pha blia duiine rek, nyieliieshii Hamangkhung-aphuii è gu shii hì pha blia shii rek pha phi. <sup>18</sup> Chiihphado, gu shii nyie riinang mua phlei? Hì ne muawie yua shii igong ayie pha ji ne chua ro, Mua wie pha gu ro blia shii guro rangsuathek ne alia ro.

<sup>19</sup> Gune ichad bran ro, hanyie ro khiao asi ro; jishii khama rek mua pha ji rek ne bajo brantheK shii yang yi pha gu ne guishii zab ro khiao rab. <sup>20</sup> Gu Jewthek rog shii blia rek shii gu Jewthek shii yang pha Jewthek duiine rai; chiih-è gui rang de Moses ro Iphey shii anuii pha rek srane ithek shii yang pha ithek nyie khi-èrek ne rai pha ji shii rai. <sup>21</sup> Ji duiine, gu Gaibranthek rog blia rek shii, gu Gaibran duiine rai, Gaibranthek shii yang pha Jewthek ro Iphey è fuang rai. Hì pha miyao è ne gune Hamangkhung-aphuii ro Iphey anuii pha asi ro; gu ne izai Masi ro Iphey iliing shii ro. <sup>22</sup> Gu ithek shii yang pha, ithek duchoi shii gu de migi shii zia duiine ithek è rai. Ji-è gune khama rey mua pha ji rek ne bran shii ragia rek mua pha, bran duchoi shii gu ne ithek khi-è rey pha ji duiine rey dun.

<sup>23</sup> Zab gu ne hì rek pha ji ne Mua Wie pha Chiang è khirzeythek mathang rey yi pha rek. <sup>24</sup> Zai nathek ne thieg ranphothek ne chua rai shii, jishii ithek è ne jijia è lasen yang bie, chiihphado lasen mua sapho ran bo. <sup>25</sup> Zab ranphothek bran ne idang arai pha rago pha mugo ji mua pha dab shii ilab phi; jishii gethek è rek pha jia ji ne idang rai pha ji shii rek. <sup>26</sup> Ji è, gune jong pha ithua shii miang ran, ji è gune diingpho ro hanyie è awairo diing pha ji shii isloi adun yi pha diingpho duiine ro. <sup>27</sup> Gaithek shii chua pha iidoh shii guishii zia arey yi pha gune gui siu shii chuh rey yi pha gui shii diigphi.

## 10

<sup>1</sup> Gu ijaktek, hanyie è Moses shii luagieng pha blangthek shii nyie rey pha ji ne, gu nathek shii now yi pha yang ro. Ithek ne zab sakhmiing è ragia rek, chiih-è zab shii wie è Khamuii saig è ragia rek phi ne hiiladun. <sup>2</sup> Sakhmiing nane khamuii hà ithek ne zab Moses ro luagiengpho rone khowo yie. <sup>3</sup> Zab ne ò luruak pha iweb chie <sup>4</sup> chiih-è ithek zab ne ò pha luruak pha kho niing. Ithek ne luruak pha lubao è niing ji ne ithek rog shii wui gieng; chiih-è ji pha boh lubao ne Masi awai ro. <sup>5</sup> Jishii chiihphado de Hamangkhung-aphuii ne ithek è bajo shii ne bushun arek ba ro, chiih-è jiè ithek ro siu-iy jithek ne balimuang lakhung shii dayiingdayang rey dun.

<sup>6</sup> Thuh, hithek zab ne gethek shii now yi ne ithek è rek pha awie pha bliathek ji achid yi pha phriie, <sup>7</sup> chiih-è ithek giak è rek pha duiine, jangbangthek shii asia rabo, jigigam shii yao pha duiine, “Branthek ne niing ne siulao nane awie pha muniing pha michie hà dugdun.” <sup>8</sup> Gethek ne siulao pha ichiig arek rabo, ithek giak è ji rek ne inai jia shii bran itham ichiigna-uom iy dun. <sup>9</sup> Gethek ne Ithong shii achai rabo, giaktek è ji rek ne ithek shii phamthek è ua muii. <sup>10</sup> Gethek ne phosro arek chid phro, giaktek ithek è rek duiine—Chiih-è ua pha hamangkhliie è ithek shii srobro rekmuii.

<sup>11</sup> Hithek zab ithek shii rey pha hi ne ithek gai shii miiriig rey yi, chiih-è ithek è gethek shii phriie pha zey. Jishii gethek ne Jong pha ishak thog sharuii phaji shii sieng ramuii ro.

<sup>12</sup> Na è chuh è riu rone now arone, achihi yi pha gayiig pha ji ne weliak ro. <sup>13</sup> Zab chai phane nathek è thieg ji pha ichua pha chai ne branthek shii thog ramuii ro. Jishii Hamangkhung-aphuii è awai sbang shii ruii, chiih-è nathek shii chuh rai yi pha ai ne nathek ro blu chuh rai muii pha ji è huak ne achai yi phro, nathek shii chai pha ishak shii, ai è nathek shii zud pha chuh phi ruii phro, chiih-è nathek shii khia pha lumuii de phi ruii phro.

<sup>14</sup> Ji-è chiihphado, gu ijaktek, jangbangthek shii sia pha ji è ruang rai bo. <sup>15</sup> Gu id pha bran duiine nathek shii yao ro, gu è nyie yao pha ji ne nawaithek shii chua bo. <sup>16</sup> Ithong Michie shii gethek khoh muii pha gog nane gethek è nyie shii Hamangkhung-aphuii shii laso phi pha ji: gethek ji niing mage shii, gethek ne Masi ro ifai pha mathang niing rai. Chiih-è gethek ji pha iweb ji: gethek è chie mage shii, gethek ne Masi ro siu pha mathang ro. <sup>17</sup> Nyieliieshii gethek zab ne, ichiuh ne iweb jia ro, bajo shii, siu ne jia ro, chiih-è gethek zab ne ò pha iweb shii mathang ro.

<sup>18</sup> Israel pha branthek shii now bo; hanyie è zid pha khlem shii chie pho ne sraibao shii Hamangkhung-aphuii ro blia pha mathang redun ro. <sup>19</sup> Chiihphado, gu miyaosiu ne hi bey, jangbang chiih-è zid pha michie hi ne izai nyiemagunde igongthek bey? <sup>20</sup> Asi ro! gu è nyie yao pha ji ne migi arek pha branthek ro sraibao shii zid pha ji ne Hamangkhung-aphuii shii azid pha ibuiithek shii zid ro. Chiih-è gu ne nathek yi ibuiithek ro ijak rey bone ayang ro. <sup>21</sup> Na ne Ithong ro gog nane ibuii ro gog ne aniing mua phro; nathek ne Ithong ro thiibliie nane ibuii ro thiiliie shii achie mua phro. <sup>22</sup> Gethek ne Ithong shii miegriie rey yi pha yang habey? Gethek ne ai è de bajo gang rone now bey?

<sup>23</sup> “Ji-è ithek è yao,” gethek ne nyie magungde rek mua phro. Jine izai ro, jishii zab ne wie asi ro. “Gethek ne zab nyarek mua phro—Jishii zab ne aphua phro.” <sup>24</sup> Hanyie magungde awai shii wie rey pha ji shii ariig rabo, jishii gaishii wie rey pha ji shii riig bo.

<sup>25</sup> Nawai khani shii nyie musai um magunde, asai pha nathek ne bajarai shii liu pha ibey zab nyachie mua phro. <sup>26</sup> Jigigam shii yao, “Sohnyiaak nane ji shii nyie um pha ji zab Ithong ro ro.”

<sup>27</sup> Migi arekpho è na shii michie chie pha ho chiih-è na è wuii pha phak arone, na ibi shii nyie ruui phi pha ji nawai ro now shii nyie musai asai pha chie bo. <sup>28</sup> Jishii giakthek è na shii yao, “Hi pha michie ne jangbang shii zid pha michie ro,” Na shii yao pha Chiang nane khani pha Chiang è ji pha michie achie rabo. <sup>29</sup> Jine nawairo munow asi jishii gai bran ro now ji è ro.

“Wie, chiihphado,” giak jia è yao, guro thaluii pha blia shii è gai bran munow è “nyie rek ne nyoi chid phlei?”

<sup>30</sup> “Gu è gu michie shii Hamangkhung-aphuii shii laso phi arone, nyie rek ne gu è laso phi pha michie Chiang shii gaithek è gu shii snyiang phlei?”

<sup>31</sup> Wie, na nyie rek magungde, na chie niing magungde, hi zab ne Hamangkhung-aphuii pha biisiie shii rek bo. <sup>32</sup> Jewthek nane Gaibranthek shii chiih-è Hamangkhung-aphuii ro charch shii diig rey pha blia arek rabo.

<sup>33</sup> Gu è rek pha ji duine rek bo; gu è zab shii sang yi pha rek ne bidiang phro, gu ne gui shii wie pha anow ro, jishii zab shii wie rey yi pha now, jiè ithek de raga rey mua.

## 11

<sup>1</sup> Chiihphado, gu è Masi shii nui pha duine, gu shii nui bo.

### *Misia shii khrug chiiëg*

<sup>2</sup> Gu nathek shii chiong nyieliieshii nathek è idang gu shii now chiih-è gu nathek shii phi muui pha muyuathek ji shii lua. <sup>3</sup> Jishii gu nathek shii thieg yi pha yang ro Masi ne zab pha bran è boh ro, gey ne yiy è boh ro, chiih-è Hamangkhung-aphuii ne Masi è boh ro. <sup>4</sup> Ji-è bran hanyie è hong ne misiasia shii Hamangkhung-aphuii ro mua yao ne zab shii airo khrug chaig pha ji ne Masi shii makhak-riing ro. <sup>5</sup> Chiih-è hò-amuii hanyie è hong ne misiasia shii nane Hamangkhung-aphuii mua yao shii khrug acheg pha jine awai gey shii makhak-riing rek; bimi nane hò-amuii ne khaziang laig pho è nyie yo asi ro.

<sup>6</sup> Hò-amuii è awaithek khrug shii acheg arone, ai ne awai khaziang laig liak ji wie ro. Chiih-è hò-amuiithek ne gadong khli magunde khaziang laig magunde biwo pha miyao ro, jiè hò-amuiithek ne khrug cheg chid phro. <sup>7</sup> Bufuiithek ne awaithek khrug acheg chid, nyieliieshii bufuiithek ne Hamangkhung-aphuii ro biisiie pha nane ò mia pha jangbangthek doh yi phro. Jishii hò-amuiithek ne hò-aphuiithek ro biisiie doh yi, <sup>8</sup> Hò-amuii ne hò-amuii è arey ro, jishii hò-amuii ne hò-aphuii è rey. <sup>9</sup> Chiih-è hò-aphuiithek ne hò-amuiithek pha arab ro, jishii hò-amuiithek ne hò-aphuiithek pha rab phi ro. <sup>10</sup> Chiihphado, hamangkhliithek pha Chiang è, hò-amuiithek ne awaithek gey ro riichai pha iliing shii um rone doh yi pha awaithek khrug cheg chid. <sup>11</sup> Ithong lakhung shii gethek ro chai, hò-amuiithek ne hò-aphuiithek è ichad asi ro, ji duine hò-aphuiithek de hò-amuiithek è ichad asi ro. <sup>12</sup> Hò-amuii ne hò-aphuii è rab pha duine ro, ji duine hò-aphuii de hò-amuii è giak ro; chiih-è hi ne zab Hamangkhung-aphuii è rey ro.

<sup>13</sup> Hò-amuiithek ne Hamangkhung-aphuii shii hong ne misia shii khrug acheg pha sia jine wie ba asi pha awie ba nawaithek shii chua bo. <sup>14</sup> Bufuiithek ne khaziang phiang ruui arone biwo ro, <sup>15</sup> jishii hò-amuii khrug shii khaziang phiang ruui arone ai ne khie ro. Bimi shii khaziang phiang phi pha ji ne awai khrug shii cheg bo ne phi ro. <sup>16</sup> Jishii hanyie magungde hi



pha Chiang shii khiinaing yang arone, gune nyie yao pha um pha ji ne hi ne gethek shii oi ro chiih-è hi ne charchtheek pha Hamangkhang-aphuii shii de gai misia pha Iphay oi ro.

### *Ithong ro michie*

(Mth 26:26-29; Mrg 14:22-25; Lug 22:14-20)

<sup>17</sup> Chiihphado, muyuathék duiine, gu nathek shii achiong, nyieliieshii nathek ro malethék pha misia ne nyayaochak arone wie è bajo awie pha rek ro. <sup>18</sup> Zab è igobi, gu nathek shii yao nathek ro maley shii ne yoh yoh ibrogthék pho de um ro; chiih-è iujia ne miyao ne gu migi rek. <sup>19</sup> (Nathek duchoi shii yo che pha ji ne athan chid rabo hanyie magungde rangsua shii arone sang è doh yi phro.) <sup>20</sup> Nathek ibrog è ò shii si mage shii, nathek è chie pha ji ne Ithong ro michie asi ro. <sup>21</sup> Na è chie mage shii, zab ne hanyie è chie pha jao, jiè giak ne chi-iyiy bamuii shii, giakthék ne phuiithiig dun. <sup>22</sup> Nathek ne chie niing pha nawaithek ro hò oi bey? Din ne nathek ne Hamangkhang-aphuii pha charch shii awie pha rek ne chid pha brantheek shii biwo rey yi ne bey? Nathek è gu shii hi pha Chiang shii nyie yao bo è now lei? Gu ne nathek shii chiong habey? Khuchunde gune arek ro!

<sup>23</sup> Gu Ithong è mua pha muyua ji ne gu nathek shii phi: aishii zum pha habiu Ithong Isu iweb dum jia yie srane, <sup>24</sup> Hamangkhang-aphuii shii laso phi, ne ji ne yao, “Hi ne guro siu ro, nyie ji ne nathek ro ro. Hi ne gu shii now pha rek bo.” <sup>25</sup> Hi duiine, dinne Ithong iweb pha iidoh shii gog chiing srane yao, “Hi pha gog ne Hamangkhang-aphuii ro iwo shiinyie ne gu ifai è phang ne ruii. Khuchung magungde na hi niing shii gu shii now pha hi rek bo.”

<sup>26</sup> Hi pha miyao è ne zab pha ishak nane hi pha iweb nane gog è niing shii ai awuii sapho shii Ithong iy pha ji khagi rek ro. <sup>27</sup> Hi ne hi duiine ro hanyie jia è aishii ilab arek pha Ithong ro iweb dinne gog ji è niing arone, ai ne Ithong ro siu nane ifai shii layog ichiig rek ne suang rey dun. <sup>28</sup> Ji-è, chiihphado, igobi nawai shii chai bo, chiih-è iweb ji nane gog ji è niing bo. <sup>29</sup> Jishii na Ithong ro iweb nane gog ji è niing shii nyie athieg arone chie niing ji è nathek nawaithek shii chua noh ro. <sup>30</sup> Ji-è nathek bajo ne zia nane rad pha um ro, chiih-è bajothék ne iy dun ro. <sup>31</sup> Gethek è igobi gethek shii chua bi arone, gethek ne Hamangkhang-aphuii ro chua shii awuii phro. <sup>32</sup> Ji-è gethek ne sohjambling rog shii athey yi pha Ithong è gethek shii chua ne lago phi ro.

<sup>33</sup> Ji-è chiihphado, gu ijakthék, nathek Ithong ro iweb chie pha ò shii khrab mage shii, nawaithek chung khan rai bo. <sup>34</sup> Chiih-è hanyie magunde chi-iyiy arone, nane nawai hò hà chie bo, chiihphado nathek ò si rai pha ji shii ne Hamangkhang-aphuii ro chua pha shii asi phro. Chiih-è gai pha miyao ne, gu wuii ruii shii khriig rek phi pha ro.

## 12

### *Ragung So è lasentheek*

<sup>1</sup> Thuh, na è zey pha Ragung So è lasen hég Chiang ji shii id bo. Gu khuiinothék nane bumuiithek wo nathek ne airo izai jishii id bone gu yang ro. <sup>2</sup> Nathek ne thieg nathek ne migi arekpho ba shii, nathek ne awie pha bajo lumuii shii lua srane chai oi pha jangbanthék shii misiasia. <sup>3</sup> Gu nathek shii thieg yi pha yang ro hanyie jia magungde Hamangkhang-aphuii ro Ragung è noh ne lua pho ne, “Isu shii athamai!” Chiih-è aishii ne Ragung

So è ayua sapho shii ne, “Isu ne Ithong rone” hanyie magungde anuii mua phro.

<sup>4</sup> Thiichhih shii ne Ragung pha ichuathek lasen høg um ro, jishii ithek shii phi pha ji ne Ragung ò ro. <sup>5</sup> Ichihih shii ne Ithong ro blia rek phi pha ichuathek lumuii um magunde jine ò pha Ithong shii blia rek phi. <sup>6</sup> Ichihih shii ne ichuathek blia rek pha chua um, jishii ò pha Hamangkhang-aphuii è zab shii awairo blia rek mua pha chua phi. <sup>7</sup> Zab shii wie yi pha zab bran shii Ragung um ne lumuii doh yi ro. <sup>8</sup> Ragung è bran jia shii ley khani pha mua phi, chiih-è ò Ragung ji è gai bran shii de id pha ley khani um pha mua ji phi. <sup>9</sup> Chiih-è ò Ragung è bran jia shii migi phi, chiih-è gai bran shii ai è gang yi pha blu phi. <sup>10</sup> Ragung è ne bran jia shii ne buangthek pha blia rek yi pha blu phi; chiih-è gai shii ne, Hamangkhang-aphuii ro mua yao yi pha lasen phi; chiih-è gai shii ne, lasen høg yi Ragung è thog pha ba asi ba ji yo rek yi pha chua phi. Chiih-è giak shii ne a-id pha nyuak yao mua pha phi, chiih-è gai shii ne nyie yao pha ji shii yao mua yi pha chua phi. <sup>11</sup> Jishii hithek zab rek pha ji ne ragung ò nane jia bie ro; ai khi-èrek yang lai ne ji duiine, zab pha bran shii yoyo lasen høg phi.

### *Siu jia shii ichuathek bajo*

<sup>12</sup> Siu shii iphen um pha duiine, Masi ne siu jia ro; hì ne yo ichuathek rab magungde, thuh shii siu ne jia ro. <sup>13</sup> Hì duiine, zab gethek ne, Jewthek chiih-è Gaibrantek magungde, khiao magunde ichad nede, chiih-è Ragung ò pha siu jia shii khowo yie, chiih-è gethek zab Ragung jia è niing pha phi.

<sup>14</sup> Siu shii awailum ne ichua jia è arab bie ro, jishii bajo ichua è ro. <sup>15</sup> Laithek è yao, “nyieliieshii gune wad asi, gune siu è rey pha asi ro è yao arone,” Jine siu pha ichua arey rone asi ro. <sup>16</sup> Chiih-è khoh è yao, “nyieliieshii gu ne miegthek asi ro, jìè gu ne siu pha asi ro, ji ne siu pha ichua arey rone asi ro.” <sup>17</sup> Zab pha siu yi mieg bie arone, nyie khi-èrek ne yoi mua phlei? Chiih-è hì yi khoh bie arone, nyie khi-èrek ne no mua phlei? <sup>18</sup> Hì ne nyieliieshii, Hamangkhang-aphuii è nyie khi è chid lei ne siu shii zab yo ichua rab ne ruii. <sup>19</sup> Siu zab yi ichua jia bie arone jine siu asi ro! <sup>20</sup> Ji-è, bajo ichuathek nede jishii siu jia ro.

<sup>21</sup> Ji-è chiihphado, mieg è khow shii ayao muii! Chiih-è khrug è de lai shii ayao mua, “Wie, gu nathek shii achid ro” <sup>22</sup> Jishii, zia siu doh pha ichuathek oi arone gune nyie de arek mua; <sup>23</sup> chiih-è ji pha ichuathek shii gethek è bajo adunmey pha now pha ji ne gethek è muna boh gayiig rek; chiih-è gethek è akhie pha riig muii pha siu ichuathek, nyie yi muna khie pha ichuathek achid rone yao pha ji ne bajo wie blia rone gayiig rek. <sup>24</sup> Hamangkhang-aphuii awai è siu ichuathek ò shii rab ne, hanyie yi boh ilab mua sapho ji shii mua yi. <sup>25</sup> Chiih-è jìè siu ne yoyo rek pha oi ro, jishii zab yo ichuathek ne awaithek chung ò rek bo. <sup>26</sup> Siu pha ichua jia yi diig arone, zab pha ichuathek ne ai rog shii diig gieng bo; ichua jia è chiong arone, zab pha gai ichuathek ne sang shii mathang ro.

<sup>27</sup> Nathek zab ne Masi ro siu ro, chiih-è zab jia ne ji pha ichuathek ro. <sup>28</sup> Charch hà Hamangkhang-aphuii è zab shii hanyiehanyie shii ithua hà ruii: Igobi pha ithua shii guaphasamoythek shii ruii, chiih-è nyichiieng pha ithua shii chaigthek shii ruii, chiih-è uomchiieng pha ithua ne masdothek shii ruii; chiihphado hanyie è buangthek rek, chiih-è hanyie shii gang pha blu phi, gaithek shii nong phi, ithek shii yua pha, chiih-è a-id pha nyuak yao

pha ji shii ro. <sup>29</sup> Itheek zab ne guaphasamoytheek, itheek zab ne chaigtheek asi ro, chiih-è itheek zab ne masdotheek asi ro. Zab pha bran shii ne buangtheek pha blia rek pha blu oi ro, <sup>30</sup> miiriie shii gang phi pha, a-id pha nyuak yao pha, chiih-è nyie yao pha ji shii yua phi pha blu ne zab shii oi ro. <sup>31</sup> Chiihphado natheek ro lubutheek ne miigak pha lasen hège shii khriig rek bo. Jimagunde, hi duiine lumuii shii luagieng pha ji ne, zab è wie ro.

## 13

### *Miie*

<sup>1</sup> Gu ne bran nane hamangkhlieetheek ro nyuaktheek yao mua magungde, jishii gu shii miie oi arone, gu miyao jine thiubiing boi ne shriing sam ne ro pha duiine ro. <sup>2</sup> Gu shii liingsed pha yua pha lasen um magungde; chiih-è zab pha khani um magungde chiih-è ug pha ji zab thieg magungde; chiih-è gu shii phiing shii lua yi pha miigi um magungde jishii gu shii miie oi arone, gu ne nyie de oi ro. <sup>3</sup> Gu shii nyie um pha ji gai shii phi muii magungde, chiih-è gu siu rang de bai shii ziao pha phi muii magungde jishii gu shii miie oi arone, ji ne gu shii wie pha asi ro.

<sup>4</sup> Miie ne zud chiih-è bushun ro; Miie pha jine miegriie nane wiangwe, wiangwe asi ro; <sup>5</sup> miie ne awie pha rek pha nane ibid arek pha chiih-è awie lajia pha nane diig phi pha asi ro; miie ne ichiig shii sasab aruii ro; <sup>6</sup> miie ne buii rog shii asang ro, jishii izai rog shii sang. <sup>7</sup> Miie ne khuchung de athoh ro, chiih-è miigi, luthong zud ne idang ibi rey dun.

<sup>8</sup> Miie ne idang pha ro. Ji shii ne liingsed pha muatheek um, jitheek ne thaluii ro; gai nyuaktheek yao pha lasen hège um magungde, jishii itheek ne jongdun; thieg pha khani um magungde, jishii jine san dun phro. <sup>9</sup> Jishii gatheek ro khani pha lasen hège chiih-è liingsed pha mua ne khuyo ba ro; <sup>10</sup> jishii zab khriig thog mage shii, chiihphado nyie akhriig ba pha ji ne san dun phro. <sup>11</sup> Gu ani ba shii, gu miyao, than, chiih-è gu munow ne zab ani duiine ro; thuh shii gu boh rey shah shii, gu ne dinne anitheek lumuii shii alua sha ro. <sup>12</sup> Getheek è thuh nyie riig pha ji ne jangbang shii rarum mizia duiine ro; chiihphado ji pha ishak shii getheek ne mi riig ruii phro. Thuh shii gu id pha ji ne khuyo ba ro; jishii hi ne zab rey ruii phro, gu è Hamangkhung-aphuii ro khani shii rey pha duiine—chiihphado zab rey ruii phro.

<sup>13</sup> Idohhè shii Miigi, luthong, chiih-è miie hi pha uom ne raidun phro; chiih-è hi pha miie ne zab è boh ro.

## 14

### *Ragung lasentheek chiang*

<sup>1</sup> Hi ne miie ro, chiihphado, natheek ne miie shii mua pha chuh è bidiang chid. Hamangkhung-aphuii ro mua yao pha lasen ne, zab è wie ne natheek ro lubutheek ne ragung pha lasen hège shii khriig rek bo. <sup>2</sup> Hanyie è a-id pha nyuaktheek ai ne gai shii ayao ro, jishii ai ne Hamangkhung-aphuii shii yao, nyieliieshii hanyie è de aishii athieg mua. Ai ne ug pha izaitheek miyao shii Ragung pha blu è yao. <sup>3</sup> Jishii hanyie magungde Hamangkhung-aphuii mua ji yao pha ji ne bran shii yao chiih-è itheek shii nong phi, lubu bo rek phi, liijiing rek phi. <sup>4</sup> Hanyie magungde a-id pha nyuaktheek yao arone ai ne awaishii nong bie, jishii hanyie magungde Hamangkhung-aphuii miyao yao arone ai ne zab pha charch shii nong phi.

<sup>5</sup> Gu è de nathek zab shii a-ìd pha nyuaktheek yao bo è yang ro, jishii gu è nathek shii Hamangkhung-aphuii pha mua yao pha lasen um bo ne yang ro. Jishii hanyie è Hamangkhung-aphuii miyao yao pho ne zab charch shii nong mua pha, hanyiejia è ai nyie yao pha ji ayua sapho shii ne Hamangkhung-aphuii mua shii yao phothek bo ba ro. <sup>6</sup> Ji-è, gu ijaktheek, gu nathek shii a-ìd pha nyuaktheek yao arone gune nathek shii blia rey nebey? Gu è nathek shii Hamangkhung-aphuii è phi pha miyaogam, khani, wie mua nane muyua ji iujia ayie sapho shii ne gu è rek pha nyie ji ne, nyie arey ro.

<sup>7</sup> Fliie ben duine chai oi pha Thiibiingkhinkheb manathek yie bo—Jine boi pha goh yo aro sapho shiine nyie khi-èrek ne thieg mage phlei? <sup>8</sup> Chiuh-è hanyie jia è thu-ungtheek pha gow ji wie aro arone hanyie è mak rek pha khriig rek mage phlei? <sup>9</sup> Ji duine, naro mua yi a-ìd pha nyuaktheek è sang ayao arone, khi-èrek ne hanyiejia è gao mage phlei? Naro miyaogamtheek ji ne hasam hà kheydun phro! <sup>10</sup> Sohjambling shiine bajo yo nyuaktheek um, jishii miyaosiu oi pha nyuak ne oi ro. <sup>11</sup> Jishii nyuak yao pha ji gu è a-ìd arone, hanyie è ji khoh ne yao ramuii pha ji shii ne gu ne fuangphothek rey ruii phro chiuh-è ithek de gu shii ne fuangpho rey ruii phro. <sup>12</sup> Nathek è Ragung pha lasen um bo è now pha ji è, nyie yi charch shii rung pha nong phi pha ithek ne zab pha lakhung shii bow rab phi pha bidiang bo. <sup>13</sup> Chiuhphado bran hanyie è a-ìd pha nyuaktheek yao pho ne nyie yao pha ji shii yua pha lasen mua bo è sia bo. <sup>14</sup> Jishii gu hi duine sia arone, izai gu ragung ne sia phro, jishii gu khani ne nyie ichua oi ro. <sup>15</sup> Chiuhphado gu ne nyie rek chid? Gu ne gui ragung rog shii sia, jishii gu gui khani rog sia; gu gui ragung è bai, jishii gu gui khani rog shii bai. <sup>16</sup> Na è Hamangkhung-aphuii shii ragung è laso phi bie shii, na è nyie yao pha ji ne athieg pha rek srane, nyie khi-èrek ne athieg pha bran è maley shii “Amin” yao mage phlei? Na è nyie yao pha ji ne ai è yao mua pha lumuii oi ro. <sup>17</sup> Naro Hamangkhung-aphuii shii laso phi pha misia ne bajo wie bie arone, gai brantheek shii ne anong phi ro.

<sup>18</sup> Gu ne nathek è de bajo a-ìd pha nyuak yao, jiè gu ne Hamangkhung-aphuii shii laso phi. <sup>19</sup> Jishii, chiuhphado a-ìd pha nyuaktheek itham miyaogamtheek yao liak shii ne charch misiasia hà gai shii yua pha miyaogamtheek guui yao ne thieg mua pha ji ne wie.

<sup>20</sup> Gu ijaktheek, nathek munow shii ne aniphiing duine anow rabo; jiè awie pha munow shii ne ani duine rek ne ruang rek bo, jishii nawai munow shii sey bo. <sup>21</sup> Jigigam shii hìne zey ro:

Ithong è yao, “A-ìd pha nyuaktheek yao pha bran è kho srane  
gu gui brantheek shii yao pha ro.

Gu gai sohphothek pha sphuntheek è yao ruii è de,  
jishii chiuhphado gui brantheek ne gu shii ayoi ruii phro.”

<sup>22</sup> Ji-è, chiuhphado, a-ìd pha nyuaktheek yao pha lasen ji ne migi arekpho khagi rek yi, migipho shii asi ro, jishii Hamangkhung-aphuii pha mua yao pha lasen è migi-asiphothek shii khagi rek phi, migiphothek shii asi ro.

<sup>23</sup> Chiuhphado, zab pha charch ò si srane gai nyuaktheek yao pha jao arone—thaluii pha bran nane migi arek pho iliing wuii arone ithek è ithek zab shii ibiu ayao ne bey? <sup>24</sup> Jishii zab è Hamangkhung-aphuii mua ji yao shii thaluii pha bran nane migi-arekpho è iliing hà wuii shii, ithek nyie yoi pha ji è ithek shii layog rone chua ruii, ithek è nyie zab yoi pha ji shii chua phro, <sup>25</sup> airo ug ne nowtheek ne fuang hà yie ruii phro, chiuh-è ai ne bam

srane Hamangkhung-aphuii shii sia ruii phro, “Zai Hamangkhung-aphuii ne ichiuh nathek duchoi shii um rone, nuii ruii phro.”

### *Charch pha yung*

<sup>26</sup> Hi ne gu miyao pha miyaosiu ji ro, gu ijakthek. Nathek misiasia pha ò si shii, jia shii ibai um, gai shii yua pha um, chiih-è gai yi Hamangkhung-aphuii è mua pha ji um, chiih-è gai yi a-ìd pha nyuakthek è mua yao pha um ro, chiih-è nathek è nyie yao pha ji shii yao phi pha um, zab ne charch shii nong chid. <sup>27</sup> Hanyieja è a-ìd pha nyuakthek yao pha rek arone, nyi uom è muna ayao rabo, jia pha iidoh shii jia è yao bo, chiih-è bran jia yi ithek è nyie yao pha ji shii yaophi bo. <sup>28</sup> Jishii a-ìd pha nyuakthek yao pha ji shii yua pha bran hanyie de oi arone, hanyie è gai nyuakthek yao pho ji ne aro pha rai ne chiih-è awai shii yao ne Hamangkhung-aphuii shii yao bie bo. <sup>29</sup> Nyi uom yi hanyie è Hamangkhung-aphuii pha mua phi pho ji yao bo, ji pha ishak shii ai è nyie yao pha ji gaithek ne chua bo. <sup>30</sup> Jishii giak yi maley shii dug ne Hamangkhung-aphuii è muah choi arone, hanyie yao ramuii pha ji ne thung chid. <sup>31</sup> Nathek zab ne Hamangkhung-aphuii mua yao pha rek bo, jia pha iidoh shii jia rek bo ji-è, zab ne id ruii phro chiih-è lububo rek pha mua. <sup>32</sup> Hamangkhung-aphuii pha mua yao pha lasen jine yao pho iliing shii phrii bo, <sup>33</sup> nyieliieshii Hamangkhung-aphuii è gethek shii anuii rabo ne ayang jishii ilab nane liijiing rek bo ne yang ro.

Zab charchthek pha Hamangkhung-aphuii pha bran duiine, <sup>34</sup> hò-amuiithek ne malethek shii aro pha rai bo. Ithek maley shii ne nyie yao mua pha oi ro, Jewthek pha Iphey shii yao ro, ithek ne dumuii arek mua. <sup>35</sup> Ithek è nyie thieg yang arone, ithek ne hò hà awaithek gey shii sai bi bo. Hò-amuiithek ne charch maley hà yao pha ji ne biwo ro.

<sup>36</sup> Din ne Hamangkhung-aphuii pha miyaogam ne nathek è thog pha ji è rey mua bey? Din ne hanyie wuii pha ji ne nathek shii wuii bie nebey? <sup>37</sup> Hanyie magungde Hamangkhung-aphuii pha muapho dinne Ragung pha lasen um arone, ai ne gu è nathek shii nyie zey pha ji ne Ithong pha muyung rone than chid. <sup>38</sup> Jishii ai è jithek shii anuii arone aishii anuii ro.

<sup>39</sup> Ji-è chiihphado, gu ijakthek, Hamangkhung-aphuii ro mua yao pha nawaithek lubu shii khriig rek bo, jishii gai nyuakthek yao pha ji shii agak rabo. <sup>40</sup> Zab pha blia ne wie nane yung pha lumuii ji è rek bo.

## 15

### *Masi hòi pha ji*

<sup>1</sup> Chiih-è thuh shii, gu ijakthek, gu è nathek shii nyie yua pha Mua Wie ji, nyie ithek è mua pha ji, chiih-è nathek migi chuh riu muii pha ji shii gu nathek shii now yi. <sup>2</sup> Jine gu è nathek shii yua pha muawie pha mua ji ro. Nathek è chuh khoh arone muawie ji è nathek shii ragia rey—ji arek sapho shii ne nathek è rek pha migi nyie asi ro.

<sup>3</sup> Bajoboh pha miigak gu è nyie mua pha ji ne nathek shii phi: Jigigam shii zey pha ji duiine; Masi è gethek layog chiang iy dun, <sup>4</sup> Jigigam shii zey pha duiine, ai ne iy ne wiengmuii srane ai ne da-uom pha iidoh shii chai hà hò; <sup>5</sup> ai ne Phithar nane guaphasamoy snanyi shii dong. <sup>6</sup> Chiihphado luang jia shii è ai ne wieng guui è muna awairo luagiengpho shii dong, bajo ne thuh thog pha isieng ba ro, jishii giak ne iy jongdun ro. <sup>7</sup> Chiihphado ai Jems shii nane iidoh zab pha guaphasamoythek shii dong.

<sup>8</sup> Gu ne hanyie jia yi adau pha giak pha duiine rangde—zab pha iidoh shii ai gu shii de dongthog. <sup>9</sup> Gu ne zab guaphasamoythek è lu ro—gu ne guaphasamoythek ho mua sapho asi ro, nyieliieshii gu è Hamangkhung-aphuii ro charch shii diig phi. <sup>10</sup> Jishii Hamangkhung-aphuii pha bushun è gu nyie gu ji ro, chiih-è gu shii ai è phi pha bushun ji ne bajo blia phi ro. Zab è lu rey srane, gu ne gai guaphasamoythek è de bajo gang blia rek, jishii hi ne izai gui blia asi ro, jishii Hamangkhung-aphuii pha bushun ne gu rog shii blia rek gieng ro. <sup>11</sup> Ji-è chiihphado, hi ne gu è wuiithok magungde dinne ithek è wuiithok magungde, hi ne gethek zab è nyie yao pha ji ro, chiih-è hi ne nyie nathek è migi rek pha ji ro.

### *Gethek ro hòi*

<sup>12</sup> Thuh, Igobi è gethek ro mua ne Masi iy ne hòi din pha ji yao, nyie khi-èrek ne nathek giak è iy pha ji chai ahoi phrone yao phlei? <sup>13</sup> Ji ne izai arone, hi pha miyaosiu è ne Masi ne iy ne ahoi ara ro; <sup>14</sup> chiih-è Masi iy pha ji è ahoi arone, gethek ne yua pha nyie oi chiih-è gethek ne migi rek pha de oi ro. <sup>15</sup> Ji è de muna, gethek ne Hamangkhung-aphuii Chiang shii biidiie doh ro, nyieliieshii gethek è yao ai ne iy pha ji è hòi ro—jishii iy pha ji è chai hà ahoi arone, chiihphado ai ne Masi shii ahoi ro. <sup>16</sup> Chiih-è iy pha ji è ahoi arone, Masi de ahoi ba ro. <sup>17</sup> Chiih-è Masi yi ahoi ba arone, nathek ro migi ne adubo chiih-è nathek ne thuh de layog hà san badun ro. <sup>18</sup> Chiih-è hanyie è Masi shii migi rek ne iy pho de thaluu ara ro. <sup>19</sup> Gethek ro chai wie bie pha Masi shii luthong arone chiih-è blia shii oi arone, chiihphado gethek ne sohjambling pha branthek è de bushun ji ro.

<sup>20</sup> Jishii izai ne hi ro Masi ne iy ne hòi ro, chiih-è hi de izai ro hanyie è iy dun pha ji shii men pho de dinne hòi ruii phro. <sup>21</sup> Chiih-è iy pha ji ne bran jia è thog pha miyao duiine, hòi pha ji de bran jia è thog ruii phro. <sup>22</sup> Chiih-è zab pha branthek ne Adam rog shii ò rek ne iy dun pha duiine, ji duiine gethek zab ne chai shii hòi ruii nyieliieshii ithek ne Masi rog shii ro. <sup>23</sup> Jishii zab awaithek ro ishak shii hòi ruii phro, zab è igobi shii Masi hòi ruii phro, chiihphado ai wuii ruii pha ishak shii, hanyie yi airo jithek de hòi ruii phro. <sup>24</sup> Chiihphado jong pha ishak thog ruii phro, Masi ne zab luruak khohphothek shii, riichaithek, chiih-è bluthek è yang è hiiia ne chiih-è Hamangkhung-aphuii pha Sajathua hà awairo Aphiuii wad shii phi muii phro. <sup>25</sup> Jishii Hamangkhung-aphuii è mak pho shii yang ne ai lai iliing hà arek sapho shii ne Masi ne khoh ne rai chid. <sup>26</sup> Idohhè pha gidieg ji shii yang pha ji ne iy ji ro. <sup>27</sup> Jishii jigigam shii yao, “Hamangkhung-aphuii è zab pha manathek shii awai lai bucho hà ruii muii ro.” Zai, hi ne sang ro. “Hamangkhung-aphuii è, zab pha miyaogamthek” “Zab pha manathek shii” Hamangkhung-aphuii awailum ne alao ro, hanyie è zab pha manathek shii Masi ro iliing shii ro. <sup>28</sup> Jishii zab pha manathek Masi ro khoh pha iliing hà ruii mage shii, chiihphado ai awai, Dufuii awai è awai shii ne, hanyie è zab pha manathek ai iliing shii ruii pha Hamangkhung-aphuii iliing hà ruii phro, chiih-è Hamangkhung-aphuii è zab khoh ruii phro.

<sup>29</sup> Thuh, branthek hanyie è iy pha khowo yie pho shii ne khi-èrek pha ga? Ithek ne yang pha nyie luthong phlei? Iy pha ji ne chai hà ahoi phrone yao pha, giak è yao pha duiine, hi ne izai arone, nyie rek ne ji pha branthek ne iy pho shii khowo phi phlei? <sup>30</sup> Chiih-è gethek ne—nyie rek ne idang buii shii ran phlei? <sup>31</sup> Gu ijakthek, gu ne idang iy pha ji shii diig rek! Gu ne

nathek lakhung shii wiangwe rek, gethek chai gethek Ithong Masi Isu rog shii um pha ji è, gu shii yaothiak bo. <sup>32</sup> Gu è ichiuh Iphesus hà jabiing pha ibeymuthung rog shii bran duiine now ne mak rek arone gune nyie phua mage phlei? “Jishii iy pha ji yi ahoi arone, chiihphado yao pha ji duiine rey dun,” thimiang ne gethek iy sha, jiè cho gethek ne chie-niung sha rai haro.

<sup>33</sup> Bi-iè arey rabo, “Awie pha ijak è ziiig wie shii mua muui.” <sup>34</sup> Nathek nawaithek ro khani wie shii Iidoh khid srane layog lumuii shii thoh muui bo. Nathek giak è Hamangkhung-aphuii shii athieg pho shii gu nathek shii wo yi pha hi yaothiag.

### *Hòi pha Siu*

<sup>35</sup> Giak è sai ruii, “Nyie khi-èrek ne iy pha ji ne sieng din phlei? Nyie khi-èrek pha siu ne ithek shii um ga?” <sup>36</sup> Nathek bi-ie! Nathek è iriie shii nyiak lakhung hà wey shii, jine a-iy sapho shii ne chai hà abeb mua phro. <sup>37</sup> Chiih-è nathek è nyie hai pha ji ne iriie bie ro, chiih-è yang ne igam yi, phiug nane gai igam, chiih-è imuui shii ne ahai pha iriie shii hai bie shii iidoh hàne sieng khlei ruii ro. <sup>38</sup> Hamangkhung-aphuii è iriie shii ai khi-è yang pha ji shii siu rey yi; ai ne zab pha iriie shii awai siu sbang shii phi.

<sup>39</sup> Chiih-è zab ibey isiengthek ne ichua ò asi; bran siu shii ne ò jia pha ichua ibey um, ibeymuthung shii ne yo, fuiithek shii ne yo, chiih-è ù shii de yo.

<sup>40</sup> Chiih-è ichiuh shii ne Hamangkhung pha siu chiih-è sohnyiak pha siu um ro; Hamangkhung pha khie siuthek ne sohnyiak pha khie siuthek è yo ro. <sup>41</sup> Hasiang shii ne awairo khie um, habie shii ne yo khie um, chiih-è dadiangthek shii ne yo khie um; chiih-è dadiangthek awaithek chung de ichua yo khie um ro.

<sup>42</sup> Jine khi-èrek ne iy pha ji chai sieng ruii mage ji ro. Siu shii wieng mage shii, hi ne i-iy ro; hòì mage shii hi ne isieng ro. <sup>43</sup> Wieng mage shii hi ne akhie pha zia ro; hòì mage shii, hi ne khie nane gang ro. <sup>44</sup> Wieng mage shii, hi ne siu sbang ro. Chiih-è hòì mage shii, hi ne luruak siu rey ro, jine izai, jiè siu sbang um pha duiine ragung pha siu um chid. <sup>45</sup> Jigigam shii yao, “Igobi pha bran” Adam shii, ne isieng rab; jishii nyichieng pha Adam ne Ragung chai phi ro. <sup>46</sup> Ai-ne igobi shii Ragung è arey ro, jishii siu sbang è ro, ji pha iidoh shii Ragung è rey. <sup>47</sup> Igobi pha Adam ne, nyiak è rab ne, sohnyiak è wuii; chiih-è din pha Adam ne Hamangkhung è wuii ro. <sup>48</sup> Hanyie yi sohnyiak shii um pha ji ne ithek ne nyiak è rab pha jia duiine ro, hanyie yi Hamangkhung pho ne Hamangkhung è wuii pha jia duiine ro. <sup>49</sup> Gethek è sohnyiak è rab pha bran duiine guui, jiè gethek ne hamangkhung è rab pha ji shii guui haro.

<sup>50</sup> Nyie gu miyaosiu ne, gu ijakthek wo, siu nane ifai Hamangkhung-aphuii pha Sajathua shii mathang oi phro, chiih-è nyie iy dun pha ji ne a-iy pha ji shii ayie mua phro:

<sup>51-52</sup> Ug pha izai ji shii yoi bo: Gethek ne zab a-iy phro, jishii iidohè pha thu-ung ji thud mage shii, gethek zab ne mieg leb pha duiine blieg shii lai chid. Chiih-è thu-ung thud mage shii, iypho de hòì ne, khuchung de dinne a-iy phro, chiih-è gethek zab ne lai ruii. <sup>53</sup> Hanyie iypho ne a-iy bsa hà lai ruii phro. <sup>54</sup> Ji è rek pha ji thog mage shii iypho ne a-iy biisa hà lai dun phro, Chiihphado hi pha jigigam ne izai rey ruii phro: “Iy pha ji ne srobro rey mage shii; yang pha ji ne zab rey ge ro!”

<sup>55</sup> “Iypho nathek ro yang pha ji ne khiisa lei? Iypho nathek ro saduii phi pha blu ne khiisa lei?”

<sup>56</sup> Iy ne saduii phi pha airo blu ne layog è mua, chiih-è layog è awai blu ne Iphey è mua. <sup>57</sup> Jishii Hamangkhung-aphuii è gethek shii Ithong Isu Masi Chiang è yang yi pha ji shii laso phi bo!

<sup>58</sup> Ji-è chiihphado, gu ijakthek, chuh riu ne athodang pha rek bo. Idang nawaithek Ithong ro blia rek bo, nathek ne thieg ro, nathek è Ithong ro blia nyie rek pha ji khuchunde de Adunmey pha arey phro.

## 16

### *Chid pha migiphothek shii zid*

<sup>1</sup> Thuh shii, Judea hà rai pha Hamangkhung-aphuii pha bran shii nong phi pha nathek è zey pha bang Chiang shii now bo. Nathek ne rek chid, gu è Galathia pha charchthek shii nathek shii nyie rek bo è yao pha ji rek bo.

<sup>2</sup> Zab pha Deobari shii nathek ne bang khrab ne ruii bo, nathek è khama wiang pha sasab è ruii chid, chiih-è ragia rek bo. Ji-è gu wuii shii bang ne dinne athan chid phro. <sup>3</sup> Gu wuiithok pha iidoh shii, nathek shii nuii phi rone yaophi pha jigigam phi, chiih-è ithek shii thoh ne nathek ro lasen shii Jerusalem hà wuii yi pha ro. <sup>4</sup> Gu shii wuii pha magak arone, ithek ne gu rog shii nyawuii mua phro.

### *Phaul ro muphak*

<sup>5</sup> Gu Mesidonia hà wuii ched pha iidoh shii nathek shii wuii ruii phro—nyieliieshii gu ne Mesidonia hà wuii chid pha um ro. <sup>6</sup> Gu nathek rog shii Iujia ishak nyarai gieng, yangne hakhangshak yi jongdang pha rai pha ro, chiih-è chiihphado shii gu dinne khi hà wuii ne de nathek ne gu lumuii shii athodang pha nong mua phro. <sup>7</sup> Gu ne nathek shii Iujia si pha asi pha, Ithong è ishak phi arone, gu nathek rog shii bajo ishak rai pha luthong phro.

<sup>8</sup> Gu ichiih Iphisus shii Phentekhosth pha inai thog pha rai pha ro. <sup>9</sup> Ji shii thiisa hà gidieg bajo um magunde thiisa hàne boh blia pha khriig chua um ro.

<sup>10</sup> Thimothi yi nathek lumuii hà wuii ruii arone, nathek duchoi shii wie ho rone aishii than yi pha ho bo, nyieliieshii ai de gu duine Ithong ro blia rek pha bran ro. <sup>11</sup> Hanyie magungde aishii ariig bieyie rabo, jishii nathek ne airo idang pha lumuii shii Iiijiing hà nong phi bo, jiè ai ne iidoh gui shii dunthok din phro; migipho rog shii iidoh thog din pha gu ne aishii luthong phro.

<sup>12</sup> Thuh abam Apholos Chiang shii. Awai abam rog shii, gai migiphothek rog shii nathek hà wuii yi pha gu è idang lubu bo rek phi. Jishii ai ne hì pha ishak shii dun chid phrone zab athan ba ro. Jishii ai chua mua arone, ai ne wuii dun phro.

### *Idohhè pha miyaogamthek*

<sup>13</sup> Nowbthan bo, migi shii chuh è riu bo, arum pha gang rek bo. <sup>14</sup> Naro zab pha blia ne miie è rek bo.

<sup>15</sup> Nathek ne Sthephanas chiih-è airo haliing phothek Chiang shii ne thieg. Ithek ne Akhaya shii zab è igobi Masipho rey chiih-è Hamangkhung-aphuii ro bran shii blia rek pha zab awaithek shii phi muii. Gu ijakthek, gu nathek shii khung, <sup>16</sup> Hanyie magungde ithek rog blia rek gieng, chiih-è ithek ne hì rek pha dumuii shii gieng bo.

<sup>17</sup> Gu Sthephanas, Forthunathus chiih-è Achaikhus, wuii ruii pha miyao ji shii bajo sang, ithek ne nathek oi pha ji shii zab rek <sup>18</sup> chiih-è ithek shii sang



yi pha duiine, ithek è nathek shii de sang ba yi phro. Hi-è rek pha brantheK ne riig sapho ro.

<sup>19</sup> Asia pha du-ùà shii charchtheK pho è nathek ro salam thoh ge ro, Akhuila chiih-è Phrisila chiih-è ithek hò shii si pha charchtheK è de lao ne Masipho ro salam thoh ge phro. <sup>20</sup> Ichiih pha zab pha migiphotheK shii de salam thoh ge, Nawaithek chung jia è gairog shii liijiing pha khichiug rai bo.

<sup>21</sup> Gui ro wad è hì zey, Phaul è salam ro.

<sup>22</sup> Hanyie è Ithong shii amiie arone ai lakhung shii ne mucho um ro!  
Marana tha—gethek ro Ithong, wuii bo!

<sup>23</sup> Ithong Isu ro liijiing ne nathek rog shii um bo.

<sup>24</sup> Isu Masi beng è guro miie ne zab nathek rog shii um bo.

## KHORINTHEK

### Shii Phaul Re-è Nyichiieng Pha Jigigam

### Yaophi

Phaul ro din pha jigigam hi ne Khorintheek shii zey, ai nane Khorinth pha charch rog shii siangthang diig rey shii zey, charch pha giak brantheek khagi rog shii Phaul suang shii bajo gang è jo, jishii ai è ò rek pha wie yang chiih-è ji rey mage shii, ò rai rone airo boh lubo doh yi.

Igobi pha ichua jigigam ne Phaul è awai ro Khorinth pha siangthang rog shii phak, charch hà mak nane makhak-riing rek pha ji yao pha chuh è chang, nyie rek ne chang pha ji shii yao, chiih-è airo bangchiie chang pha ji è nuui ne ò rai rone airo lubo doh yi. Chiihphado Judea hà rai pha chid pha Masipho shii yang ne nong phi pha ai è charch shii yao. Idohhè pha ithothek shii hanyie Khorinth pha giak brantheek è awaithek ne izai guaphasamoytheek rone yao chiih-è Phaul ne biidiie jia rone the shii, ji pha suang è Phaul è awai ro guaphasamoy shii ragia rek.

#### **Iiing shii um pha ji**

Yaophi (1:1-11)

Phaul nane Khorinth pha charch (1:12; 7:16)

Judea hà rai pha Masipho shii zid (8:1; 9:15)

Phaul ne awai ro guaphasamoy ro riichai shii ragia rek ne ruii. (10:1; 13:10)

Jongsha (13:11-13)

<sup>1</sup> Phaul è, Masi Isu ro guaphasamoy Hamangkhung-aphuii è yang, chiih-è gethek ro khuiino Thimothi re-è,

Khorinth pha Hamangkhung-aphuii pha charch, chiih-è zab Akhaya pha Hamangkhung-aphuii pha brantheek shii ro:

<sup>2</sup> Gethek Aphiui Hamangkhung-aphuii chiih-è Ithong Isu Masi è nathek shii bushun nane liijiing phi.

#### *Phaul è Hamangkhung-aphuii shii laso phi*

<sup>3</sup> Cho gethek de gethek ro Hamangkhung-aphuii shii chiih-è gethek ro Ithong Isu masi shii, chiih-è bushun pha Aphiui shii, hanyie è nong pha thog mua pha Hamangkhung-aphuii shii laso phi haro! <sup>4</sup> Ai è gethek ro zab pha diig shii nong phi, gethek Hamangkhung-aphuii è mua pha nong ji è gethek de gai ro zab pha diig shii nong mua phro. <sup>5</sup> Masi è bajo diigtheek rek pha ji shii gethek è thang pha duiine, Masi Chiang è gethek shii Hamangkhung-aphuii ro nong pha ji thang ro. <sup>6</sup> Gathek è diig mage arone, hi ne nathek shii nong pha nane giawo ro; gethek yi nong arone, chiihphado nathek shii nong mua ne gathek è zud mua pha ò diigtheek shii chua phi ne jum è zud yi. <sup>7</sup> Ji-è gathek luthong pha ji ne nathek ne khuchung de asid phro; gathek ne thieg nathek è gathek miidiig jishii thang pha ji ne, jiè nathek de gathek è mua pha nong jishii de thang phro.

<sup>8</sup> Ijaktheek, Asia du-ua shii gethek shii diig rey pha ji ne gathek ne now yi pha yang ro. Miihan yi bajo bo chiih-è bajo lei gethek lakhung shii thog ne, gethek ne sieng rai pha luthong pha ji shii de thoh muui. <sup>9</sup> Gethek lakhung shiine iy bsa hà phi muui pha than. Jishii hi è rey pha ji gethek shii gethek aluthong pha, jishii hanyie è iy bsa è hòi pha Hamangkhung-aphuii è rek bie.

<sup>10</sup> Ai ne buithek nane diig è iy pha ji shii de ai è gethek shii ragia rek, chiih-è ragia rek ruii chiih-è ai ne gethek shii dinne ragia rek ruii phrone ai lakhung shii luthong chid ne, <sup>11</sup> nathek è gathek shii nong phi pha gathek shii sia phi pha miyaosiu ro. Ji-è gathek shii sia pha bajo sia ji ne chang ruii phro, chiih-è Hamangkhung-aphuii ne gethek shii khirzey phi ruii phro, chiih-è bajo thek ne awaithek ro goh ne aishii ziaak ruii ne aishii laso phi ruii phro.

### *Paul ro phakthek lai*

<sup>12</sup> Ichiih pha sohjambling shii gethek ro siengthek ne chiih-è gathek ro nyie siangthang ne nathek rog shii um sbang pha ji ne, bran ro khani è asi pha ji shii Hamangkhung-aphuii ro liijiing pha blu è rone chiih-è Hamangkhung-aphuii è phi pha miang nane wie ji shii khoh rone gathek ne guithek è now pha ji shii yao srane wiangwe rek. <sup>13-14</sup> Gathek è nathek shii zey pha jine nathek nyatham ne nyagao pha ji ro. Jishii nathek thuh rang de gathek shii ichua iujia id bie ara ro, gu nathek shii luthong nathek ne gathek shii zab id ruii phro, jìe Ithong Isu pha inai shii gathek è nathek shii wiangwe rek pha duiine, nathek de gathek shii wiangwe rek mua phro.

<sup>15</sup> Hithek zab thieg ne Gu ne igobi nathek shii wuii pha muphak rab, jìe nathek shii nyichieng khirzey mua ruii phro. <sup>16</sup> Gu Mesidonia hà wuii ne chiih-è iidoh dun shii gu nathek shii de wuii phak phro, nyieliieshii gu Judea hà wuii shii nathek ro nong ne gu shii mua yi. <sup>17</sup> Hi pha muphak rek shii, gune hohiia rey bey? Gu ne gui muphakthek rab shii, gu ne gui shii phua pha muphak rab ne bey? Ishak ò shii “Oh, oh” chiih-è “Asi, asi,” rone saro ne rai pho duine gui shii wie pha jithek rab ne bey? <sup>18</sup> Hamangkhung-aphuii izai yao pha duiine, gu è nathek shii sbang rek pha ji ne “Oh,” nane “Asi” ne asi ro; <sup>19</sup> Isu Masi, Hamangkhung-aphuii ro Dufuii, Chiang shii Silas, Thimothi, chiih-è gu hi pha duchoi shii yua muii pha gathek de “Oh” nane “asi” rone asi ro. Ai ne Hamangkhung-aphuii ro “Oh” ro; <sup>20</sup> Chiih-è ai ne Hamangkhung-aphuii pha zab sbang ne “Oh” ro. Hi ne nyieliieshii Isu Masi Chiang è gathek ro “Amen” yao pha ji ne Hamangkhung-aphuii pha biisiie yao. <sup>21</sup> Hi ne hanyie è gathek shii nathek rog shii ò rab pha Hamangkhung-aphuii awai ro, izai gethek ro chai ne Masi rog ò shii rek ne rai ne; hi ne Hamangkhung-aphuii awai ro hanyie è gathek yo rek ne, <sup>22</sup> hanyie è awai ro muspho pha nab ne gethek shii ruii phi ro, chiih-è ai ne gethek shii phi pha ne bajo um pha surua So Ragung ne gathek lubuthek shii phi ro.

<sup>23</sup> Gui khagi duiine gune Hamangkhung-aphuii shii ho—Ai ne gu lubu shii thieg! Nathek shii ragia rek phi pha, gu Khorinth hà wuii pha aphak ro. <sup>24</sup> Gathek ne nathek è nyie migi rek pha ji shii bangchiie rek pha abidiang ro; gathek ne thieg nathek ne migi shii chuh è riu, ji phachiang shii nawaithek shii sang yi pha gathek ne nathek rog shii blia rek.

## 2

<sup>1</sup> Ji-è gu nathek shii zo yi pha dinne awuii pha gui khani shii now. <sup>2</sup> Chiih-è gu nathek shii duhug rey yi arone, gu shii hanyie è sang yi phlei? Hanyie shii gu è duhug phi pha brantheek ne gu shii nyasang yi. <sup>3</sup> Ji-è gu ne nathek shii ji pha jigigam zey—Gui shii duhug rey yi pha gu nathek shii awuii yang, nyieliieshii gu shii sang yi pha ji ne nathek ro, chiih-è gu ne thiegjong, gu ne sang mage shii, chiihphado nathek zab sang ruii phro. <sup>4</sup> Gu nathek shii bajo diig chiih-è bajo duhug nane bajo mieg khothek shan ne zey; Gu mizey hi

ne nathek shii duhug rek yi pha azey ro, jishii gu è nathek zab shii khama miie pha jithek thieg yi pha zey.

### *Ichüigpho shii khung phi*

<sup>5</sup> Thuh hanyieja è gaithek shii zo yi arone, ai ne gu shii jia arek bie pha nathek zab ichua shii iujia duhug phi. (Ji-è gu nyie yao pha ji aishii bajo diig aphi yang ro.) <sup>6</sup> Ji è rek pha bran shii ne nathek è lago phi pha ji ne khriig shak ro. <sup>7</sup> Thuh shii, ji-è, ai ne bajo duhug rey ne zab thoh muui pha arek yi pha aishii ne khung phi bo chiih-è nathek ne aishii lubu bo rek phi bo. <sup>8</sup> Ji-è gu nathek shii khung nathek è aishii shii khama miie pha ji ne izai id yi bo. <sup>9</sup> Nyieliieshii gu nathek shii diigchiao shii wie riu chiih-è nathek ne miyao shii idang nuui ne khama rai mua pha ji gu nathek shii thieg pha jigigam ji zey. <sup>10</sup> Nathek è ai è rek pha ichüig shii khung phi shii, gu de nathek shii khung phi, chiih-è gu è khung phi arone, izai gu ne zab shii khung phi chid, <sup>11</sup> nyieliieshii Ibuii wad è gethek lakhung aruii yi pha; gu ne nathek Chiang Masi moe shii khung phi ro, chiih-è gethek ne airo phakthek thieg.

### *Throas hà phaul ro ji than*

<sup>12</sup> Gu Throas hà thog shii Masi ro Mua Wie ji yua shii, Ithong è thiisa hà blia rekpha lumuii hong phi pha doh. <sup>13</sup> Jishii gune bajo samdiig, nyieliieshii gu ne gethek khuiino Thaidas ne thiisa hà asi. Ji-è gu thiisa pha brantheck shii wie rai bo è yao ne Mesidonia hà wuii maruii.

### *Masi Chiang è yang*

<sup>14</sup> Jishii Hamangkhung-aphuii shii laso phi! Chiih-è gethek Masi rog shii um pha ji è idang Hamangkhung-aphuii è phathegpho duine Masi ro yang pha lumuii lua. Hamangkhung-aphuii è gathek shii Masi Chiang pha khani yi rem now pha duine zab hà shiiyi yi pha gathek shii khoh. <sup>15</sup> Chiih-è gethek ne Masi è Hamangkhung-aphuii shii phi pha rem no pha bisi duine, hanyie ragia rey pha ji shii de shiie chiih-è san dun pha ji shii shiie muui ro. <sup>16</sup> Chiih-è hanyie yi san ramuii pho shii ne awie pha now ji ro; jishii hanyie yi ragia rey ramuii pho ne chai phi pha now ro. Chiihphado, hi pha blia duine hanyie rek mua phlei? <sup>17</sup> Gethek ne hanyie è Hamangkhung-aphuii mua shii chongjai duine thoh è yie bie pha gaithek duine asi ro, Masi pha khiaotheck duine gethek ne ai moe shii wie è yao ro, nyieliieshii Hamangkhung-aphuii è gethek shii thoh phi ro.

## 3

### *Shiinyie iwo pha khiaotheck*

<sup>1</sup> Gethek ne din guithek Chiang shii nyigodog rek pha duine yoi bey? Gaibrantheck duine nathek shii nuui pha jigigamtheck shii zey dinne nathek è gathek shii jigigamtheck zey chid, hì ne rey mua nebey? <sup>2</sup> Gathek shii jigigam zey um pha jine nawaithek ro, zab shii thieg yi pha nane tham pha Chiang ne gathek lubuthek shii zey um ro. <sup>3</sup> Hì ne izai ro Masi awai è zey ne hì ne gethek è thoh ge. Hì ne sahi è asi pha jishii hì ne isieng Hamangkhung-aphuii ro Ragung rog shii zey, chiih-è lubao khinia shii azey ro jishii bran lubuthek shii zey.

<sup>4</sup> Gu hì yao pha ji ne nyieliieshii gathek ne Masi Chiang è Hamangkhung-aphuii shii zab migi ruii ro. <sup>5</sup> Gethek ne hì pha blia rek mua sapho yao pha ne gethek shii nyie oi ro; gethek shii um pha chua ne Hamangkhung-aphuii è thog; <sup>6</sup> Hanyie è gathek shii shiinyie iwo pha blia rek mua chua phi pha ji

ne ai ro, ji shii ne zey pha Iphey shii achab ro jishii Ragung è phi pha iwo sbang ro. Zey pha Iphey ji ne iy shii yi, jishii Ragung ne chai phi.

<sup>7</sup> Lubao khinia shii Iphey ne jigigam shii chong ne zey, chiih-è ji pha Iphey shii phi mage shii Hamangkhung-aphuii ro biisiie ne khia thog. Chiih-è Moses ro mizia shii imo chuang ched dun shii de, hì ne bajo gang jiè Israel pha brantheK mieg ne aishii ariig mua. Iy pha Iphey è gang rek ne biisiie rog shii wuii mage arone, <sup>8</sup> Ragung pha blia ne dinne khama boh biisiie rey ruii phro! <sup>9</sup> Yaothiak pha ji rangde nyama biisiiethek yie; giawo yie pha blia ne dinne khama biisiiethek um ba ro! <sup>10</sup> nyieliieshii thuh pha biisiie ne bajo chuang mage ne dohbi pha ichuang biisiie ne dun dun rone gethek ne yao mua ro. <sup>11</sup> Chiih-è iujia rai bie pha ji shii rangde biisiie um arone, ji è de idang rai pha ji shii ne khama biisiie um ba ro.

<sup>12</sup> Nyieliieshii gethek ne ji pha luthong um, jiè gathek ne bajo lububo ro. <sup>13</sup> Gethek ne Moses duiine asi, hanyie è awai mizia shii yung rek ne cheg muu srane, nyieliieshii aishii dong pha imo khlieng jong ramuii shii Israel pha brantheK shii adoh yi pha rek. <sup>14</sup> Zai ithek khani de cheg dun; chiih-è ithek ne ihèg jigigam pha shiinyie ji tham mage shii, duchung pha ishak shii de ò yung è cheg muu ro. Bran jia yi Isu shii ò rey mage, ji pha yung ne thandun. <sup>15</sup> Sudoh thog dang pha, ithek è Moses ro Iphey ji tham shii jipha yung è ithek ro khani shii ne cheg bamuii ro. <sup>16</sup> Jishii hine than mua, jigigam shii ne Moses Chiang shii yao pha duiine: “Ithong shii khid mage shii, ai ro yung ne thandun.” <sup>17</sup> Thuh shii, hì pha itho “Ithong” um pha ji ne Ragung ro; chiih-è Ithong Ragung kiihà um lei ne jihà ne wie ichad sha ro. <sup>18</sup> Chiihphado, gethek zab ne, miziathek acheg pha Hamangkhung-aphuii pha biisiie shii dong yi bo; chiih-è Ithong è thog ruii pha ò biisiie, hanyie yi Ragung, jiè de bajo biisiie rey ne ai duiine gethek shii ley yi.

## 4

### *Khalia pha jariiethek shii luruak nuruii*

<sup>1</sup> Hamangkhung-aphuii awai ro bushun ne gethek shii hì pha blia rek pha phi, chiih-è jiè gethek ne lubu lu arek rabo. <sup>2</sup> Gethek ro ug pha miyao nane biwo blia ne ruang ruii muu bo; chiih-è gethek ne awie pha blia arek rabo, chiih-è gethek ne Hamangkhung-aphuii ro miyaogam shii de biidiie ayao rabo. Gethek ne Hamangkhung-aphuii moe shii ne izai pha zab ley ichuang shii rai ne chiih-è zab gaithek shii wie thieg yi pha gethek shii wie rek pha bidiang bo. <sup>3</sup> Gethek è yua pha muawie ji ug arone, hì ne hanyie muadun pha ji ug bie ro. <sup>4</sup> Ithek ne migi arek, nyieliieshii ithek ro khanithek ne ichiih sohjambling pha awie pha hamangkhung-aphuii ro igiia shii ruii ba muu ro. Ibuu è ithek shii ne ithek shii chuang pha isang ji ariig mua yi pha ruii ro, isang pha Mua Wie ji è thog pha ji ne Masi ro biisiie rek bie ro, chiih-è hanyie ne Hamangkhung-aphuii ro duiine mia lei. <sup>5</sup> Chiih-è gethek muyua jine gethek ro asi ro; gethek è Isu Masi ne Ithong rone yua phro, chiih-è Isu Chiang naro khiao duiine gathek de ro. <sup>6</sup> Hamangkhung-aphuii hanyie è yao, “Igiia ne isang chuang ruii phro!” jine ò Hamangkhung-aphuii hanyie è awairo isang gethek lubu shii chuang phi, hì pha blia ne Masi mizia shii Hamangkhung-aphuii ro biisiie chuang pha khani ji gathek shii noh pha rek.

<sup>7</sup> Thuh shii hì pha luruak pha nuruii ne gethek hanyie shii um pho ne thaluu pha khalia jariiethek duiine ro, ji pha Chiang è bajoboh blu ne gethek shii asi pha Hamangkhung-aphuii è rone ji doh yi. <sup>8</sup> Gethek ne idang diig rey,

jishii ismed arey ro; shakshii ne than, jishii khuchung de aslem yi; <sup>9</sup> Mak ne bajo um, jishii gethek shii ijak de um yi; chiih-è gethek shii awie dang pha duhug magungde, gethek ne srobroy arey. <sup>10</sup> Idang gethek ne Isu ro iy pha ji shii gethek ro siu iy ji shii han, jiè Isu ro chai ne gethek ro siuthek shii doh mua. <sup>11</sup> Chiih-è gethek ro chai ne jong pha Isu Chiang è idang iy pha buii hà ro, ji duine gethek ro iy pha siu shii airo chai doh yi. <sup>12</sup> Hi pha miyaosiuthek è iy pha ji ne gethek shii blia rek, jishii chai ne nathek shii blia rek ro.

<sup>13</sup> Jigigam shii yao, “Gu ne yao nyieliieshii gu ne migi rek.” Migi pha ò ragung shii, gathek de yao nyieliieshii gathek è de migi rek ro. <sup>14</sup> Gathek ne thieg hanyie Hamangkhang-aphuii è Ithong Isu shii chai hòi yi pha ji ne gethek shii de Isu rog shii chai hòi yi ne, chiih-è gethek shii de nathek rog awai moe shii noh ruii phro. <sup>15</sup> Hi ne zab ne nathek Chiang shii ro; chiih-è Hamangkhang-aphuii ro bushun ne muna è muna brantheq shii thog pha duine, ithek ne Hamangkhang-aphuii ro biisiie shii ne dinne de laso pha misiathek phi ruii phro.

### *Migi shii sieng*

<sup>16</sup> Hi pha Chiang è gethek ne khuchung de lubu lu arek ro. Gethek ro siu yi shong pha rek magungde, gethek ro luruak ne inai è iwo rey ruii phro. <sup>17</sup> Chiih-è hi pha lu nane thaluui pha diigchiao shii gethek è diig rek pha ji ne anomuluui nane idang pha biisiie jine diig è de boh yie ruii phro. <sup>18</sup> Ji-è gethek ro isiie jine ithua jia shii ruii bo, doh pha manatheq shii asi pha, jishii gethek ro mieg ariig mua pha mana lakhung shii khriig rek bo. Gethek è nyie riig mua pha ji ne luja ishak bie, jishii gethek è adoh pha ji ne idang rai pha ro.

## 5

<sup>1</sup> Gethek rai pha hi pha giabrang ne—sohnyiak shii ne gethek ro siu ro—ji shii mua muui arone, gethek rai yi pha Hamangkhang hane Hamangkhang-aphuii shii ne hò um ruii phro, awai miirab pha hò ro, nyie jine idang rai ruii phro. <sup>2</sup> Thuh shii gethek ne fing, jiè gethek ro hò Hamangkhang è thog pha ji ne gethek lakhung shii guui pha boh ne gethek michid ji ro; <sup>3</sup> ji pha hò guui ne gethek siu ne ikhilen asi sha ro. <sup>4</sup> Gethek sohnyiak pha giabrang shii rai ba shii, gethek shii ne ziig pha than ne fing ruii phro; hi ne sohnyiak pha siu è ichad mua pha yang asi ro, jishii gethek ne hamangkhang è wuii pha ji gethek lakhung shii guui yi pha yang ro, jiè nyie iy pha ji shii ne chai hà lai mua. <sup>5</sup> Hi ne Hamangkhang-aphuii ro hanyie è hi pha lai gethek shii saro phi, ai è gethek shii zab ruii phi rone khagi rek pha Ragung ne gethek shii phi.

<sup>6</sup> Ji-è gethek ne idang ley lububo rek bo. Gethek ne thieg gethek siu pha hò hà um shii gethek ne Ithong hò è ruang ro. <sup>7</sup> Chiih-è gethek ro chai ne migi pha miyao è sieng ruii phro, jishii riig pha miyao ji asi ro. <sup>8</sup> Gethek ne ley zab lububo ro chiih-è gethek siu pha hò thoh srane Ithong rog hò hà rai pha yang bo. <sup>9</sup> Zab è ne, nyayaochak arone, gethek ichiih pha hò shii um magungde chiih-è thiisa pha hò shii um magungde gathek ne aishii sang yi pha yang ro. <sup>10</sup> Gethek zab ne ai è chua pha Masi ibi shii dong ro. Gethek siu pha chai shii wie rek pha ji nane awie pha rek pha blia ji è gethek nyie mua sapho zab mua ruii phro.

### *Masi Chiang è Hamangkhang-aphuii rog shii ijak*

<sup>11</sup> Ithong shii nyie rek ne rum chid pha miyaosiuthek ne gethek ne thieg, jiè gethek ne nathek gaithek shii yua pha bidiang. Hamangkhung-aphuii ne zab gethek shii thieg, chiih-è gune nathek shii luthong nathek lubuthek shii ne gu shii wie è thieg. <sup>12</sup> Gathek ne nathek shii yang pha dinne guithek Chiang shii wie rone yao pha abidiang ro; gathek ne guithek shii nathek è nyigodog rek yi pha nathek shii wie Chiang ji phi pha bidiang, jiè nathek ne nathek ro ziig è asi pha hanyie è bran mizia Chiang shii wiangwe rekpho shii chang mua. <sup>13</sup> Gethek ne izai ibiu bey? Hi ne Hamangkhung-aphuii Chiang ro. Dinne gethek ne isiie bey? Chiihphado hi ne nathek Chiang shii ro. <sup>14</sup> Gethek zab ne Masi ro miie è khoh dun ro, jiè thuh, gethek ne thieg zab pha Chiang è bran jia ne iy dun, hi nyie yao pha ji ne ai è iy shii gethek zab de mathang ro. <sup>15</sup> Ai è zab bran Chiang shii iy phi, jiè hanyie sieng pho awaithek sieng pha asi, jishii awaithek Chiang shii hanyie ai yi iy srane chai hà hòì din pha Chiang shii sieng bie bo.

<sup>16</sup> Chiihphado, gethek ne hanyie jia shii ne bran pha è achua rabo. Luang jia gethek ne Masi shii bran pha è chua, jishii gethek ne arek sha ro. <sup>17</sup> Hanyie magungde Masi shii dog arone, ai ne iwo chai rey dun; ihèg chai ne dundun, chiih-è iwo chai ne thokjong ro. <sup>18</sup> Hìthek zab ne Hamangkhung-aphuii è rek ro, hanyie yi Masi Chiang è gethek shii mak è ijak hà lai phi chiih-è gaithek shii airo ijak rab pha gethek shii blia phi. <sup>19</sup> Gathek ro mua ne Hamangkhung-aphuii è zab pha brantheek shii Masi Chiang è awai ijak rab phi. Hamangkhung-aphuii è ithek ro layog shii sasab aruii ro, chiih-è ai ne gethek shii mua phi chiih-è ji pha mua nyie khi-èrek ne ithek shii awai ro ijak rab pha ji yao.

<sup>20</sup> Chiihphado, ichiik gethek ne Masi Chiang shii yao, Hamangkhung-aphuii awai de gethek Chiang è yao muui ro. Gethek de Masi Chiang khung ro: Hamangkhung-aphuii è nathek shii de mak è ijak hà lai phi bo! <sup>21</sup> Masi ne layog oi sha ro, jishii gethek Chiang è Hamangkhung-aphuii aishii de gethek layog shii mathang ne ai rog shii ò rey ne gethek Hamangkhung-aphuii ro rangsuathek shii mathang yi.

## 6

<sup>1</sup> Hamangkhung-aphuii rog shii gethek ro ò blia, chiihphado, gu nathek shii khung phro hanyie è Hamangkhung-aphuii ro bushun mua maphi pho shiine amua yi rabo: <sup>2</sup> Hamangkhung-aphuii è nyie yao pha ji ne nuui bo:

“Nathek shii harohang rone doh yi pha guro ishak thog mage shii.”

Gu na shii yoi phi;

Na shii ragia rek pha guro ishak thog mage shii,

“Gu na shii nong phi ro.”

Yoi bo! Hi ne Hamangkhung-aphuii ro harohang phi pha ishak ro; sudoh ne ragia rey pha inai ro!

<sup>3</sup> Gathek ne hanyie shii gethek blia shii ichiig doh yi pha ayang ro, jiè gethek ne hanyie lumuii shii magungde dag-riak pha abidiang ro. <sup>4</sup> Ji phachiang shii, zab shii gathek è rek pha ji shii diigcheothek, thuathek, diigtheek jum è zud srane, gathek ro zab blia shii ne Hamangkhung-aphuii ro khiao rone doh yi. <sup>5</sup> Gathek shii phatheg hà zuang ne, chiih-è makhakriing rek; chiih-è gathek è amen pha chiih-è michie de achie pha huak ne blia rek ro. <sup>6</sup> Gathek ro gang è, khani è, jum è, bushun è—Ragung So è, gathek ro izai miie è, <sup>7</sup> gathek ro izai pha mua è, chiih-è Hamangkhung-aphuii pha blu è gathek ne guithek shii Hamangkhung-aphuii ro khiao rone doh yi.

Jo pha nane guithek shii ragia rek pha miyang nyimanyi um pha duiine gathek shii ne giangthek um ro. <sup>8</sup> Gathek ne ilab phi chiih-è makhak-riing ro; gathek ne makhak-riing rek chiih-è chiong rek. Gathek shiine khlampho duiine makhak-riing phi, jimagunde gathek ne izai yao; <sup>9</sup> athiegphe duiine, jimagunde gathek ne zab thieg; gathek ne iy dun pha duiine ro, jishii, nathek riig gathek ne isieng ro. Gathek shii lago phi, jimagunde gathek ne a-ua ro; <sup>10</sup> Duhug thog yi magungde, gathek ne idang lised ro; gathek shii dusho riig magungde, jishii gathek è bajo brantheek shii bohkhoh rab phi; gathek shii nyie oi pha doh magungde, thuh gathek shii ne zab nuruii um ro.

<sup>11</sup> Khorinth pha ijakthek! Gathek nathek shii miang è yao; gathek ne gathek ro lubuthek hong ro. <sup>12</sup> Gathek ne hanyie è nathek shii lubuthek bin pha ji asi ro; hi ne nathek ro, hanyie è nawaihek lubuthek gathek bin pha ji ro. <sup>13</sup> Thuh shii nathek ne gui anithek duiine gu nathek shii yao: gathek ro nathek shii um pha ò thanthek ji gathek shii doh yi bo. Nathek ro lubuthek de boh hong bo!

### *Migi-arekpho ro bangchiie rekpho shii phriie*

<sup>14</sup> Migi-arekpho rog shii ò blia rek pha abidiang rabo, hi ne arek mua phro. Nyiekhi-è izai nane biidiie ne ijak rey mage phlei? Nyiekhi-èrek ne isang nane igiia ne ò rai mage phlei? <sup>15</sup> Nyiekhi-è Masi nane Ibuii ne nuii rai mage phlei? Migipho nane migi-arekpho ne nyie ò rek lei? <sup>16</sup> Nyiekhi-è Hamangkhung-aphuii ro Jewthek misiahò nane migi-arekpho ro jangbang ne nuii mage phlei? Chiih-è gethek ne isieng Hamangkhung-aphuii pha Jewthek misiahò ro! Hamangkhung-aphuii awai è yao pha duiine, “Gu ne gui bran rog shii gui hò rab pha ro  
chiih-è ithek duchoi shii rai pha ro;  
Gune ithek ro Hamangkhung-aphuii rey ruii phro,  
chiih-è ithek ne guro bran rey ruii phro.”

<sup>17</sup> Chiih-è Ithong è yao,  
“Nathek ne ithek shii thoh chid  
chiih-è nawaihek ne ithek è yo rek bo.  
Nyie zea ji rog shii arek rabo,  
chiih-è gu nathek shii nuii ruii phro.”

<sup>18</sup> Gune nathek ro aphuii rey ruii phro,  
chiih-è nathek ne guro dufuii nane dimi rey ruii phro,  
Bohblu Ithong è yao.”

## 7

<sup>1</sup> Hithek zab sbangthek ne gethek shii rab phi, gu ijakthek. Ji-è chiihphado, cho gethek de gethek ro siu nane ragung shii zea rey muui pha zab shii gang rab rai haro, chiih-è cho gethek de Hamangkhung-aphuii shii rum ne sieng ne zab so rek rai haro.

### *Phaul ro lubo*

<sup>2</sup> Nathek lubuthek shii gathek ro ùgud rab bo. Gathek hanyie shii de ichiig arek ro; gathek hanyie shii srobro arek ro, chiih-è gathek hanyiejia shii de zia pha phua pha abidiang ro. <sup>3</sup> Gu è hi yao pha ji ne nathek shii the pha ayao ro; nyieliieshii gu è ibi hà yao pha duiine, na ne gathek shii bajo bushun rek ne gathek iy ne de sieng ne de idang ò shii rai yi. <sup>4</sup> Gu ne na shii bajo luthong; gu ne na shii wiangwe yie pha ji ne ji ro! Zab guro diigthek shii gune thuh de lububo ro; gune leyphrid pha lubo ro.



<sup>5</sup> Doh gathek Mesidonia hà wuiithok shii rangde, thung pha oi ro. Thiisa hàne zab diigtheek ro, gai rog shii gui rai, gathek ro lubuthek shii rum. <sup>6</sup> Jishii Hamangkhung-aphuii, hanyie è gu lubu-lu shii lububo rek phi, Thaidas wuii ruii shii gathek lubu shii boh rek phi. <sup>7</sup> Hi ne ai wuii ruii phrone gathek sang bie pha asi ro, jishii nathek è aishii lububo rek phi pha phosro ji è sang. Ai è gathek shii yao, na ne gu shii khama riig yang, na lubu shii ne khama diig um, na ne gu shii ragia rek pha saro khama saro ara ro; chiih-è gu ne ji è de muna sang ro.

<sup>8</sup> Jishii guro ji pha jigigam è de nathek shii duhug rab muui arone, gu è zey pha ji ne gu ne adiig ro, nathek iujia ishak shii duhug rey ramuii pha ji gu è riig mage shii gu de duhug rey. <sup>9</sup> Jishii thuh gune sang—nyieliieshii gu è nathek shii duhug rab pha ji è asi ro, nyieliieshii nathek ro duhug ji è nathek ro lumuiitheek lai phi. Ji pha duhug ne Hamangkhung-aphuii è khoh, chiih-è chiihphado gathek ne nathek shii buii arek yi. <sup>10</sup> Duhug jine Hamangkhung-aphuii è khoh srane giawo shii lua pha lubu lai ne now—chiih-è ai Chiang shii ne duhug arek chid! Jishii duhug jine bran è rey pha ji ne iy pha khui ro. <sup>11</sup> Riig bo Hamangkhung-aphuii è nathek ro duhug ji shii nyie rek ga: hìne nathek shii chid pha rab phi, chiih-è khama nathek ro ichiig oi rone doh yi pha yang ro! Ji è rek pha lijieg ji, ji è rek pha phriie, ji è rek pha than, ji è rek pha lubu phi pha jine, ichiig bliia rek pha ji shii lago phi pha saro pha ji ro! Nathek è zab miyao shii ichiig oi rone nawaithek shii doh yi.

<sup>12</sup> Ji-è, gu ji pha jigigam zey magungde, hì ne hanyie è ichiig rek chiih-è hanyie ne ichiig jipho jia shii zey doh bie pha asi ro, jishii, gu nathek shii miang rab pha zey, Hamangkhung-aphuii mieg moe nathek ro lubu phi ne gathek shii khama jam è lubu phi lai ne jine doh yi. <sup>13</sup> Jine nyieliieshii gathek shii lububo rek phi.

Gathek shii lububo arek bie ro; Thaidas è gu shii ne awai ro sang pha rog shii khama nathek zab è aishii sang nong phi pha ji è gu shii de sang yi! <sup>14</sup> Gu ai moe shii nathek shii nyigodog arek yi, chiih-è nathek ne gu shii duhug aphi mua phro. Gathek è nathek shii ne idang izai yao, chiih-è ji pha lumuii ò shii gu è Thaidas shii nyigodog rek phi pha ji ne izai doh yi. <sup>15</sup> Chiih-è jiè airo miie ne nathek shii lahuhuak gang rey yi, ai è nowkhlei pha duiine nathek zab ne nyiekhi-èrek ne airo muyung shii nuui pha saro, chiih-è nathek ne nyiekhi-èrek ne rum ne sam ne aishii wie ho. <sup>16</sup> Gu ne nathek shii zab nyaluthong, gu ne khama sang ro!

## 8

### *Masipho mizid*

<sup>1</sup> Gathek ro khuiinothek nane bumuiitheek, Hamangkhung-aphuii ro bushun ne Mesidonia pha charch shii khi-èrek ne jong pha ji shii ne gu nathek shii id yi pha now ro. <sup>2</sup> Ithek ne bajo diig pha ji shii de chai srane; chiih-è ithek ne dusho magungde, jimagunde ithek ro lubo ne bajo rey srane, ithek ne awaithek miphi jishii lububo rek ne phi. <sup>3</sup> Gu nathek shii nyayao mua ithek è khama phi mua pha ji phi, chiih-è awaithek khama phi mua pha ji è muna phi. Awaithek lum ne yang pha ji phi <sup>4</sup> ithek è gathek shii khung ne yao, Judea pha Hamangkhung-aphuii ro branthek shii nong mua phi pha chua gathek shii de um yi bo. <sup>5</sup> Hi ne gathek è luthong pha ji è de bajo ro! Igobi ithek ne awaithek shii Ithong shii phi; chiih-è chiihphado è Hamangkhung-aphuii miyang è ithek ne awaithek shii wie è gathek shii

phi muii. <sup>6</sup> Ji-è hanyie è hì pha blia shii jao pha Thaidas shii gathek è khung, hì pha miie pha wie blia shii zab rek ne na shii nong phi ne wiwi rek yi. <sup>7</sup> Migi shii, miyao shii, chiih-è khani shii, nong phi pha nathek ro yang chiih-è nathek ro miie gathek shii um pha ji ne zab bajo bohkhoh ro. Ji-è gu nathek shii hì pha miie pha blia shii lubu hong boh ne yang ro.

<sup>8</sup> Gu khohthek pha ji shii arab arek ro. Jishii gaithek shii khi-èrek ne yang ne nong phi pha ji doh yi, gu ne nathek ro miie jine khi-èrek ne izai ji doh pha bidiang ro. <sup>9</sup> Nathek ne gathek ro Ithong Isu Masi ro bushun ne thieg; nathek shii bohkhoh rab pha awai shii dusho rab, ai ne bohkhoh magunde, ai ne nathek Chiang awai shii dusho rab.

<sup>10</sup> Gu è now pha ji ne hì ro nathek è biichiie pha idam shii nyie jao pha ji ne thuh shii jong pha rek pha ji ne nathek shii wie ro. Blia asi doh bie pha jishii nathek ne blia rek pha yang pha ji shii nathek ne igobi ro. <sup>11</sup> Chiihphado, ai rog shii rai srane ji pha blia shii jong bo! Chiih-è nathek khi-èrek ne phak pha ji duiine zab ne jong pha yang bo, chiih-è thuh na shii nyie um pha ji rog shii rek bo. <sup>12</sup> Na è phi yang arone, na è nyie phi pha ji shii Hamangkhung-aphuii è naro lasen choi ruii phro, na è nyie aphi pha ji è asi ro.

<sup>13-14</sup> Gune gai shii isloi thoh ne nathek shii mahan han yi pha abidiang ro; hì pha ishak shii ne nathek shii zab um ro, nathek ne ithek oi pho shii nong phi hì ne izai blia ro. Chiihphado, nathek è chid mage shii nathek shii zab um ruii, nathek è ithek shii nong ruii phro, hì duiine nyimanyi shii ne ò riig ro. <sup>15</sup> Jigigam shii yao pha duiine, “Hanyie è bajo khrab arone bajo oi phro, chiih-è hanyiejia è ìujia khrab pha ji shii bajo ìujia oi phro.”

### *Thaidas nane airo ijakthek*

<sup>16</sup> Gathek è nathek shii nong phi pha duiine Thaidas shii yang ne rab pha Hamangkhung-aphuii shii laso phi! <sup>17</sup> Ai è gathek è khung pha ji shii nuii bie pha ji asi pha, ai ne gethek shii nong phi pha bajo yang ne awailum ne nathek shii wuii pha phak. <sup>18</sup> Ai rog shii gathek è khuiino jia thoh ge. Nyieliieshii ai muawie yua pha blia Chiang è aishii ne zab pha charch è boh ilab phi. <sup>19</sup> Ji è de, aishii ne guajong chiih-è Ithong ro biisiie Chiang è hì pha blia pha miie ne gethek è han pha duiine gethek rog shii lua pha nane charchthek è bow jong ro.

<sup>20</sup> Gethek è miie pha lasen jia wad hà yie shii hanyie ji shii suanghàw arek yi pha gethek ne bajo gayiig ne rek ro. <sup>21</sup> Gethek ro blia ne Ithong mieg shii asi bie pha jishii brantheek miie shii nyie rangsua ji pha ro.

<sup>22</sup> Ji-è gathek ne ithek rog shii gathek ro khuiino thoh ge ro; gathek è aishii blebbleb chai, chiih-è ai ne idang nong phi pha yang pha doh. Chiih-è thuh ai ne nathek shii bajo luthong, ai ne zab e muna ne nong phi pha yang ro. <sup>23</sup> Thaidas ne, ai ne guro ijak nane nathek shii nong phi pha gu rog shii blia rek gieng; gai khuiinothek duiine hanyie è ai rog shii wuii gieng, ithek è jijia charchthek pha bran ro chiih-è Masi ro biisiie shii yi. <sup>24</sup> Nathek ro miie ne ithek shii doh yi bo, jiè zab pha charchthek ne izai id ne chiih-è gethek ne ithek Chiang shii nyigodog rek pha rangsua chak rone thieg yi bo.

## 9

### *Chid pha migiphothek shii nong phi*

<sup>1</sup> Judea hà Hamangkhung-aphuii ro bran thoh ne nong phi pha Chiang ne nathek shii izai azey chid. <sup>2</sup> Gune thieg nathek ne yang ne nong phi, chiih-è gune nathek Chiang è Mesidonia pho shii nyigodog rek. “Gu è nathek shii

yao, Akhaya pha migiphothek ne biichiie pha idam è nong pha saro jong ro.” Nathek ro yang pha ji è bajo gaithek shii lubu è yang pha ji shii nai mage. <sup>3</sup> Thuh gu è hithek pha migiphothek shii thoh ge pha miyao è yie srane nathek chiang è gathek nyigodog isoloi miyaogamthek arey yi pha ji rek. Jishii, gu nathek shii yao, nathek ne nong phi pha saro bo. <sup>4</sup> Nyiephalai shii, Mesidonia pho gu rog shii wuii gieng ne nathek ne asaro pha ji shii doh mage shii, nathek ro wo pha ji ne ayao chid—chiih-è nathek shii izai biwo mua pha chak—gathek ne khama wo! <sup>5</sup> Ji-è gu munow ne hi pha migiphothek shii khung ne gu ibi nathek hà wuii ne nathek miirab pha lasen sbang igobi khriig rek pha thoh chid pha um ro. Chiihphado gu wuiithok mage shii hi ne khriig rey ruii phro, chiih-è hi ne nyieliieshii nathek miphi jine nathek è yang phrone doh yi, chiih-è nyieliieshii nathek shii phi pha bangchai asi ro.

<sup>6</sup> Now bo bran hanyie è iriie lu wey bie arone iwoi de lu woi bie; hanyie magungde iriie bajo wey arone iwoi de bajo woi ruii phro. <sup>7</sup> Chiihphado, nathek ne zab nawaithek lubu muphak ji phi bo, chiih-è diig now ne chiih-è hi ne rek pha blia chak rone arek phi rabo; nyieliieshii Hamangkhung-aphuii ne hanyie è sang ne phi lei ne aishii miie. <sup>8</sup> Chiih-è Hamangkhung-aphuii ne na è chid pha ji è de bajo phi mua, jiè nathek shii ne idang nathek michid jine nawaithek shii um ro chiih-è wie blia pha ji de zab cho ruii phro.

<sup>9</sup> Jigigam shii yao pha duiine,

“Ai è dushothek shii sang ne phi;

airo bushun ne idang rey ne rai.”

<sup>10</sup> Chiih-è Hamangkhung-aphuii, hanyie è nathek shii iriie wey pha chiih-è iweb phi ne chie yi pha ji ne, nathek chid pha zab iriie phi ruii phro chiih-è sieng yi ne chiih-è nathek ro bohkhoh yamiing rey yi ne ji è bajo phua yi phro. <sup>11</sup> Ai è nathek shii ne bohkhoh rab srane idang nathek shii ne sang ne rai yi, jiè bajo brantheek ne nathek ro lasen gathek è mua pha ji shii ne yie srane Hamangkhung-aphuii shii laso phi. <sup>12</sup> Hi pha blia nathek mirek hi ne Hamangkhung-aphuii pha bran è chid pha ji shii phi bie pha asi pha, jishii hi ne Hamangkhung-aphuii shii leyphrid ne laso phi pha mua. <sup>13</sup> Chiih-è nyieliieshii khagi ji è nathek ro yiethek pha blia, nyie nathek è rek pha chiih-è nathek rog nane zab pha rog shii nathek ro mathang shii bajo jiè Masi pha muawie shii nathek è migi rek pha ji shii ne bajo Hamangkhung-aphuii shii biisiie phi ruii phro. <sup>14</sup> Chiih-è ithek ro bajo jam miie pha misia ne nathek shii sia phi, nyieliieshii Hamangkhung-aphuii ro bajoboh bushun ne nathek shii doh yi. <sup>15</sup> Cho gethek ne igong oi pha lasen chiang Hamangkhung-aphuii shii laso phi haro.

## 10

### *Phaul è awai blia shii ragia rek*

<sup>1</sup> Gu, Phaul, gui è nathek shii khung—gu nathek rog um shii gu hanyie gu ne jum nane bushun rek bo ne yao, jishii gu ruang rey mage shii nathek lubu shii duhug rek yi. Masi ro jum nane bushun è <sup>2</sup> gu wuii ruii shii, gu shii bangchiie arek rabo ne gu nathek shii khung; chiih-è hanyie è gu ne sohjambling pha now ji rek rone yao pha nathek shii buii è gu ne nyachang mua. <sup>3</sup> Hi ne izai chak gethek ne sohjambling shii sieng, jishii gethek ne sohjambling pha now shii mak arek haro. <sup>4</sup> Mak shii gethek è khoh pha migiang jine sohjambling pha migiang asi ro, jishii Hamangkhung-aphuii ro bajo blu pha migiang ro, gethek è khoh pha nyie ji ne gang khoh pha ji shii

srobro rek pha ji ro. Gethek è biidiie khnaing pha ji shii srobro rek; <sup>5</sup> gethek ne Hamangkhung-aphuii ro khani shii suang riu muui pha wiangwe pha diig shii biizam rengmuui; gathek è zab now pha ji shii zum srane ne ruui ne Masi shii nuui pha rab muui bo. <sup>6</sup> Chiuh-è nawaithek ne zab nuui rone khagi doh yi pha iidoh shii, gune hanyie è anuui pha blia rek pho shii ne lago phi pha sarojong ro.

<sup>7</sup> Nathek ne fuang è khia ruui pha manathek shii riig, ichiuh shii hanyie magungde nawaithek shii Masi è rey rone yao pha um bey? Wie, cho awaithek chiang shii dinne now yi haro, nyieliieshii ithek ne khama Masi ro duuine gethek de Masi ro ro. <sup>8</sup> Ithong è gathek shii phi pha riichai pha chiang shii iujia muna nyigodog rek magungde gune awo, riichai jine nathek shii rab pha phi phro, jishii nathek shii chuak pha arab ro. <sup>9</sup> Guro jigigamthek è nathek ro now shii hi ne rum pha jigigamthek rone now yi pha gu ayang ro. <sup>10</sup> Giak è ne yao, “Phaul ro jigigam ne bangchai nane gang ro, jishii bran è ai gethek rog um mage shii ne, ai ne zia, chiuh-è ai miyaogamthek de nyie asi!” <sup>11</sup> Ji è rek pha brantheke ne thieg chid gu è ruang rai shii nyie jigigam zey pha ji nane gu nathek rog shii um shii nyie rek pha ji ne ichiuh shii ne yo asi ro.

<sup>12</sup> Zai gethek ne hanyie è awaithek shii bajo boh rek ne rai pho rog shii gethek ne ò rek pha lububo arek mua phro. Itheke ne khama bi-è ro! Itheke ne awaithek shii bajoboh ruui pha ji shii chua pha ne rab ne ruuijong ro, chiuh-è awaithek ro boh rek pha ji è awaithek shii chua ro! <sup>13</sup> Gethek shii ne, gethek ro phriie pha ji è hiia ne nyigodog arek rabo; hi ne Hamangkhung-aphuii è blia gethek shii rab phi pha blia shii phriie bo, chiuh-è hi ne gethek duchoi pha blia de ji pha phriie pha iliing shii ro. <sup>14</sup> Nathek ne ji pha phriie pha iliing shii ro, jiè gathek ne Masi ro Mua Wie yie ne nathek shii wuii shii gathek è de ji pha phriie è fuang awuii phro. <sup>15</sup> Ji-è gethek ne Hamangkhung-aphuii è gethek shii blia rab ne ruui pha jishii gathek è phriie ji è huak ne rek magungde jishii ne gethek è nyigodog arek rabo. Ji phachiang shii, gathek ne nathek shii migi bajo rey pha luthong ne chiuh-è gethek de nathek duchoi shii blia boh rek mua ne, chiuh-è idang gathek ne Hamangkhung-aphuii è rab pha phraithek pha duchoi shii rai mua. <sup>16</sup> Ji-è gathek de nathek è fuang gai sothek hà Mua Wie nyayua mua chiuh-è gai è rek jong pha raig shii gethek ne nyigodog arek haro.

<sup>17</sup> Jishii jigigam shii yao pha duuine, “Hanyie magunde nyigodog rek yang arone Ithong è nyie rek pha ji shii nyigodog rek bo.” <sup>18</sup> Hi ne Ithong è gathek shii wie now mage shii gathek ro wie blia ne khagi rek phi, chiuh-è gethek è gethek shii wie now pha ji ne asi ro.

## 11

### *Phaul nane biidiie guaphasamoy*

<sup>1</sup> Gu ne bi-è ba magunde, nathek ne gu shii nuui bo. <sup>2</sup> Hamangkhung-aphuii è rek pha duuine, gu nathek shii miegriie phro, chiuh-è nathek ne igang gangbimi duuine ro hanyie shii gu è bran jia Masi rog shii yiygey phrone sbang rek. <sup>3</sup> Nathek ro khani ne wie è buii hà lai yi phrone chiuh-è Isu lakhung shii nathek ro ley nane igang lubu phi pha ji ne thoh muui phrone gu ne rum muui ro—ji-è rey arone, pham ro biidiie è Hawa shii khinrin pha ji duuine rey phro. <sup>4</sup> Chiuh-è gathek è yua pha ji asi pha, yo Masi ro yua pha gai jia hanyie nathek shii wuii pho shii lised ne zud, chiuh-è nathek ne Ragung

nane muawie gathek muawie pha ji è ne zab yo pha ragung nane yo muawie shii ne nuui!

<sup>5</sup> Gune gui shii anow phro nathek è bajo boh “Gua pha samoy rone ho muui pha ji è lu asi ro!” <sup>6</sup> Yangne, gu è yao pha ji ne athua pha de um, jishii khani oi pha asi ro; zab pha tharothek shii magungde chiih-è zab pha ishak shii de gune hi nathek shii sang yao phi.

<sup>7</sup> Gu nathek shii Hamangkhung-aphui ro Mua Wie yua shii gu nathek shii nyie muna de ishuk ro, gu gui shii jum rek ne nathek shii miigak rey yi pha rek. Ji è rek shii gune ichiig um bey? <sup>8</sup> Gu nathek rog blia rek ba shii, gu shii ne gai charch pho è phi ro. Nyayaochak arone nathek shii nong phi pha ne gune nathek ro riaa ramui ro. <sup>9</sup> Gu nathek rog rai pha ishak shii, gu è bang chid shii, gu è nathek shii afag-afi arek ro; hanyie yi Mesidonia è wuii pha khuiinotek è gu è chid pha ji shii zab yi phi, ji è doh bi shii magungde phariang shii magungde nathek shii miihan arey yi phro! <sup>10</sup> Masi ro izai gu rog shii um pha ji è, gu sbang rek hi pha guro nyigodog ne zab Akhaya khi hà magungde aro pha arai phro. <sup>11</sup> Nyieliieshii gu ne nathek lakhung shii miie oi pha chiang è hi yao nebey? Hamangkhung-aphui ne thieg gune nathek shii miie!

<sup>12</sup> Thuh Ji phachiang shii gai guaphasamoythek è hanyie è gethek ro ò blia rek rone nyigodog rek pha jo aphii pha, gu nyie rekramuii pha ji ne gu rek ne rai pha ro. <sup>13</sup> Jithek pho ne izai guaphasamoy asi ro—ithek ne biidiie pha guaphasamoythek ro, hanyie yi awaithek shii khlam rek ne chiih-è Masi ro izai guaphasamoythek duine doh yi pha awaithek mizia lai ne blia ne biidiie rone doh yi. <sup>14</sup> Wie, anomuluii phane nyie oi ro! Sakhathong rangde muchuang pha hamangkhiie duine doh yi pha chia ro! <sup>15</sup> Ji-è airo khiaotek è awaithek shii giangthek ro khiaotek duine chia pha ji ne miyao boh asi ro. Jong shii ithek ne awaithek è rek pha mua sapho ji ne zab mua ruii phro.

### *Paul guaphasamoy duine diigthek*

<sup>16</sup> Gu dinne yao: hanyie jia de gu shii bi-ìe anow rabo. Jishii nathek è rek arone, gu shii bi-ìe rone nuui bo, jiè gune luja magungde nyigodog um mua. <sup>17</sup> Jishii thuh shii gu è nyie yao pha ji ne Ithong è gu shii yao bo è ayang ro; hi pha nyigodog pha miyao ne bi-ìe duine yao! <sup>18</sup> Jishii tharothamang pha chiang nyigodog rek pha ne bajo um ro, gu de ji duine rek ruii phro. <sup>19</sup> Nathek ne nawaithek bajo khanipho ro, jiè nathek ne bi-ìethek shii sang ne zud phi. <sup>20</sup> Nathek ne hanyie è nathek shii yung, chiih-è nathek shii rek bie yi, chiih-è ibongthek è phang ne chiih-è nathek shii miiriig-achiing pha rek ne dinne nathek mizia shii pheypho shii ne zud phi. <sup>21</sup> Gethek ne jithek shii rek pha ne murumdum rone nuui pha ji ne gu ne wo muui ro!

Jishii hanyie è gu ne bi-ìe duine yao pha chiang shii nyigodog rek mua pha chua um arone—gu shii de chua um ro. <sup>22</sup> Ithek ne Hebrui bey? Gu ne Hebrui ro. Ithek ne Israel pho bey? Gu ne Israel pho ro. Ithek ne Abraham ro riingthek bey? Gu ne Abraham ro riing ro. <sup>23</sup> Ithek ne Masi ro khiao bey? Gu ne ibiu bran duine yoi ro—jishii gune ithek è de wie khiao ba ro! Gu ne ithek è de bajo blia gang rek ba, gu ne ithek è de bajo ishak phatæg hà wuii, gu shii ithek è muna zuang, chiih-è gu ne ithek è muna iy bsa hà wuii dun. <sup>24</sup> Guii chieng Gu shii ne Jewthek è sa-uom è dige sukhug ithang rek ne chia; <sup>25</sup> Romanthek è gu shii uom chieng chia; chiih-è luang jia gu shii lubao rek ne chao. Gu ne runboh uom zemdun shii de um, chiih-è luang jia shii gu ne

inai jia ibiu jia kho hà raidun. <sup>26</sup> Gu è lua pha bajo ishak shii kho khed pha ji è chiih-è riaopho è chiih-è Jew ijaktheek è chiih-è migi arek pho è de buii ro; chiih-è rajantheek hà de buii ro, chiih-è jabiing hà de, chiih-è khamuii giu hà de chiih-è biidiie pha ijaktheek è de buii ro. <sup>27</sup> Thiisa hà blia nane diig um; chiih-è men pha de amen mua chiih-è chi-iy nane khahanghang ro; chiih-è gune michie chiih-è giabrang chiih-è yung de guii pha ashiook. <sup>28</sup> Chiih-è zab shii thoh srane, zab pha inai gune Charch pha blia shii now ne diig hà ro. <sup>29</sup> Giak è zia rey mage shii, gu de bajo zia than; chiih-è giak yi layog hà lua mage shii, gu duhug è leydun.

<sup>30</sup> Gu ne nyigodog rek chid arone, gu ne khama zia rone doh yi pha manathek Chiang shii nyigodog rek. <sup>31</sup> Ai beng shii idang khirzey rey bo— Ithong Isu Masi pha Aphui Hamangkhung-aphui ne—gune biidiie asi rone thieg. <sup>32</sup> Gu Damaskhus hà shii, Saja Arethas iiling pha sandri è gu shii zum pha rajan gak shii khanpho shii ruii. <sup>33</sup> Jishii gu ne sirid è chab srane haziingcho shii hòg srane ai è yo maruii.

## 12

### *Phaul ro ibangtheek nane dongtheek*

<sup>1</sup> Ji è wie arek magungde, gune nyigodog rek chid, jishii thuh gu shii ne Ithong è phi pha ibang nane dothek Chiang yao pha ro. <sup>2</sup> Gu ne izai Masipho pha bran jia shii dam snawi è ibi shii zab è giu pha hamangkhung hà noh dun pha thieg, (gu ne athieg hi izai rey nebey dinne hi ne ibang bang nebey ro—jishii Hamangkhung-aphuii thieg bie). <sup>3-4</sup> Gu dinne yao, gu ne thieg ji pha bran shii ne hamangkhung hà noh dun (dinne gu ne athieg ro hi ne izai rey nebey asi hi ne ibang nebey ro—Hamangkhung-aphuii è thieg bie), chiih-è thiisa hà ai è miyaogamtheek hà aruii mua pha goh yoi, chiih-è tharothamang semtheek è ayao mua pha miyao de yoi phro. <sup>5</sup> Ji-è gu ne ji pha bran Chiang shii nyigodog rek—jishii gu ne gui shii zia doh yi pha nyigodog ji shii thoh bie ne, jishii gu ne gui Chiang shii nyigodog arek ro. <sup>6</sup> Gu ne nyigodog rek yang arone, gu ne bi-ie asi ro, nyieliieshii gu ne izai yao. Jishii gu ne nyigodog arek phro, nyieliieshii chiihphado gu shii nyie rek bo ne doh yi pha chiih-è yao yi pha ji yoi yi pha ji thoh ne gu ne hanyiejia shii de gu Chiang shii giu now um pha ayang yi ro.

<sup>7</sup> Jishii nyieliieshii gu è bajo wieng pha manathek shii doh pha ji shii wiangwe rey pha ji è gu shii ragia rek pha, gu siu shii bajo riie pha miiriie phi ne, ji pha miiriie è Sakhathong pha muapho duiine blia rek srane gu shii zuang ne chiih-è wiangwe rek pha ji shii gak. <sup>8</sup> Gu è Ithong yie muii bo è yao ne hi pha Chiang shii uomchiieng misia sia. <sup>9</sup> Jishii ai muchang ne: “Na chid pha ji ne guro zab bushun ro, chiih-è gu ro blu ne naro zia shii bajo boh ro.” Gu ne bajo sang phro, chiihphado, Masi ro blu pha ragia ne gu lakhung shii um rone than yi pha gu ne gui ro zia shii wiangwe rek. <sup>10</sup> Gu ne zia è chiih-è makhak-riingtheek è chiih-è nangtheek è chiih-è diigkhuitheek è, chiih-è diigtheek Masi Chiang liingsed ro. Chiih-è gu zia um shii, chiihphado gu ne gang ro.

### *Phaul è Khorintheek pho shii samdiig*

<sup>11</sup> Gu ne bi-ie duiine blia rek—jishii natheek è gu shii ji rek pha rab. Natheek ne gu shii nuii rone doh yi pha ne natheek jia bie ro. Chiih-è nyie oi magunde, gu ne natheek ro wie guapha samoytheek è lu asi ro. <sup>12</sup> Bajo buangtheek chiih-è wiengtheek pha blia è gu shii ne natheek shii bajo zum rog shii rek pha khagi

rek ro. <sup>13</sup> Gu è nathek shii bang nong phi bo ne alia ne diig aphii pha ji thoh muui srane, gu ne nathek shii nyie khi-èrek ne gai Charch è de bajo diig rek mage phlei? Gu è asi pha blia rek pha ji nathek gu shii khung phi bo! <sup>14</sup> Hi ne uomchiieng ishak sha ro nathek shii wuii pha saro pha ji ne uomchiieng ishak sha ro—chiih-è gu ne nathek shii nyie de alie ruii phro. Gu ne nathek shii chid bie ne, nathek bang shii achid ro. Nyayaochak arone, anithek ne aphuii-amuii shii aphii chid phro, jishii aphuii-amuii è awaithek anithek shii phi chid. <sup>15</sup> Nathek shii nong phi pha, chiih-è, gu shii nyie um pha ji shii de mua pha chiih-è gui shii de mua pha bajo lised ro. Nyieliieshii gu nathek shii bajo miie pha ji è nathek ne gu shii iujia miie bie habey?

<sup>16</sup> Chiihphado, nathek ne nuii, gu ne nathek ro miian asi ro. Jishii bran giak ne gu shii ne khua rone yao chiih-è nathek shii biidie rog shii ibongphang pho rone yao. <sup>17</sup> Nyie khi-èrek ne? Gu ne hanyie muaphothek shii thoh srane gu ne nathek è rek bie yi nebey? <sup>18</sup> Gu è Thaidas shii nathek hà wuii yi pha khung, chiih-è gu ai rog shii gai Masipho thoh ge. Thaidas è nathek shii rek bie yi rone nathek yao nebey? Ai nane gu ne ò è now pha blia arek bey?

<sup>19</sup> Yangne nathek zab ne hi è now gathek ne nathek ibi shii gaithek shii idang ragia rek pha bidiang. Asi! Gathek è yao pha ji ne Hamangkhang-aphuii moe shii Masi è yang pha ji yao, chiih-è gu ijakthek, gathek nyie rek pha ji ne zab nathek shii nong phi pha rek phi. <sup>20</sup> Gu è nathek shii nyie chid pha ji è gu ne yo doh ne, chiih-è gu shii nathek è nyie chid pha ji è nathek gu shii yo doh mage pha ji shii, gui chiih-è, miegriie pha, lijiegthek pha, munyua pha, makhak-riingthek pha nane gachiminya, wangwe chiih-è muyung shii oi pha jithek doh ruii pha rek pha ji doh mage pha gu ne rum muui ro. <sup>21</sup> Dinpha ishak shii gu wuii ruii shii Hamangkhang-aphuii gu shii ne nathek moe shii biwo rek mage pha ji ne chiih-è buyo hanyie è layog rek ne chiih-è ithek è rek pha awie pha bliathek è lubu alai pha—ithek ro giichak nane ithek ro siulao pha layogthek lakhung shii gu ne choh ruii phrone gu ne rum muui ro.

## 13

### *Idohhè pha phriiethék nane salamthék*

<sup>1</sup> Hi ne gu nathek shii wuii ne riig pha uomchiieng sha ro. Jigigam shii yao, “Nyie magunde the pha ji ne nyi è huak ne khagi rek srane phak ruii phro.” <sup>2</sup> Doh bi hanyie è layog rek pho shii, chiih-è gaithek shii de gu yao pha yang ro; hi ne gu nathek shii nyi chiieng riig pha wuii shii yaojong, jishii gu ruang hà magunde gu dinne yao: Dinpha ishak gu wuii ruii shii hanyie de lago è ayoh mua phro. <sup>3</sup> Gu Chiang è Masi è yao pha nathek è chid pha khagi ne zab um phro. Ai è nathek shii chua mage shii ai ne zia asi phro; ji pha Chiang shii ai è awai ro blu ne nathek duchoi shii riig yi. <sup>4</sup> Zia pha ishak shii aishii bai hà zun muui magunde, jishii hi ne Hamangkhang-aphuii pha blu è isieng ro. Ai rog shii ò rek pha ji è gethek de zia ro: jishii gathek ro siangthang nathek rog shii rek pha ji è gethek airo chai shii Hamangkhang-aphuii pha blu pha mathang rey ruii phro.

<sup>5</sup> Nawaithek shii migi shii wie awie pha ji doh pha, chai ne chiih-è chua mage bo. Nathek ne zab buyud arey sapho shii ne—izai Masi Isu nathek shii um rone thieg ne bey? <sup>6</sup> Gu ne migi rek gathek ne zab achiih rone nathek ne thieg ruii phro. <sup>7</sup> Nathek shii asi pha blia arek yi rabo ne gu ne Hamangkhang-aphuii shii sia—chiih-è gethek ne rey mua rone doh yi pha

asi, jishii gathek shii chiihpho rone doh magunde, jiè nathek ne izai shii rek mua. <sup>8</sup> Chiih-è gethek ne izai pha suang arek mua phro, jishii aishii rek mua bie. <sup>9</sup> Chiih-è gathek zia shii gathek ne sang jimagunde nathek ne gang ro. Chiih-è gathek ne nathek shii zab khriig rey bo ne sia ro. <sup>10</sup> Ji ne nyieliieshii gu ne nathek è ruang ba shii hì zey phro: hì ne gu wuiithok shii Ithong è nathek shii rab pha chiih-è achuak yi pha riichai gu shii phi pha ji è khoh srane nathek lakhung shii bangchai arey yi ro.

<sup>11</sup> Thuh shii, gu ijakthek! Wie è rai bo! Khriig rey pha bidiang bo; Gu è khung shii nuii bo; nawaithek chung nuii rai bo; liijiing shii rai bo. Chiih-è Hamangkhung-aphuii pha miie nane liijiing ne nathek rog shii um ruii phro.

<sup>12</sup> Nawaithek chung liijiing pha khichiug è salam rek rai bo.

Zab pha Hamangkhung-aphuii brantheK è nathek shii salamtheK ren ge ro.

<sup>13</sup> Ithong Isu Masi ro bushun, Hamangkhung-aphuii ro miie, chiih-è Ragung So pha ò ne zab nathek rog shii um bo.



## GALATHITHEK Shii Phaul Re-è Jigigam Yaophi

Isu ro mua wie Chiang jao ne yua ne chiih-è hanyie yi Jewthek asi pha bran duchoi shii wieho, izai Masipho rey pha ne bran yi Moses ro Iphey ji nuui chid habey rone musai sai. Phaul è khnaing pha jine mugak asi rone yao— izai shii ne, chiih-è gethek ro migi Masi shii rek pha ji mugak ro, ji pha Chiang è zab ne Hamangkhung-aphuii rog shii rangsua ruui. Jimagungde Galathia pha charchthek duchoi shii, Roman du-ùà pha Asia Minor ithek wuii srane Phaul shii gui ne yao Hamangkhung-aphuii rog shii rangsua rai pha ne Moses ro Iphey shii de nuui chid phro.

*Galathianthek shii Phaul ro jigigam* ne biidiie yua bsa hà dun pha bran shii izai migi hà iidoh noh ne dab yi. Phaul è awai shii Isu Masi pha guaphasamoy pha rangsua rone ho pha ji jao ne ragia rek. Ai è boh rek, awai mua pha guaphasamoy ne Hamangkhung-aphuii è thok, bran pha riichai è asi ro, chiih-è awai blia ne Jewthek asi pho shii ro. Chiihphado ai è branthek ne Hamangkhung-aphuii rog shii rangsua rey phane migi ji è rone khnaing noh. Jong pha ithothek shii Phaul è doh yi Masipho blia ne ziig pha miie ji è Masi migi rone doh yi.

### **Iliing shii um pha ji**

Yaophi (1:1-10)

Phaul ro guaphasamoy rone riichai phi (1:11—2:21)

Hamangkhung-aphuii ro bushun pha muawie (3:1—4:31)

Masipho ichad nane khaja (5:1—6:10)

Jongsha (6:11-18)

<sup>1</sup> Phaul re-è, hanyie yi guaphasamoy ne bran è athog ro dinne tharothamang pha miyaosiuthek re-è asi rone yao, jishii hanyie è aishii iy pha ji è hòì din yi pha Isu Masi nane Hamangkhung-aphuii Aphuii re-è rone yao. <sup>2</sup> Ichiih um pha zab migiphothek gu rog dog gieng pho è Galathia pha charchthek shii salamthek renge:

<sup>3</sup> Hamangkhung-aphuii gethek ro Aphuii nane Ithong Isu Masi è nathek shii bushun nane lijiing rey bo.

<sup>4</sup> Gethek shii duchung pha awie pha idam è ragia rek phi ne chiih-è gethek ro Hamangkhung-aphuii nane Aphuii è yang pha ji nuui pha ji re-è, Masi awai ne gethek layog Chiang phi muui. <sup>5</sup> Hamangkhung-aphuii ro biisiie ne idang nane idang rey bo! Amen.

### *Muawie jia*

<sup>6</sup> Gune nathek shii wiengphleg muui ro! Ishak muna asi ba shii nathek ne hanyie shii bushun ne Masi è ho pha ji shii ne tho muui ara ro, chiih-è nathek ne gai muawie shii choi dun ara ro. <sup>7</sup> Nyayao chak shii ne, “Gai muawie,” ne oi ro, jishii gu miyao hìne nyieliieshii ichiih ne giak bran ne nashii afak-afi rek ne chiih-è Masi ro muawie shii lai pha bidang muui ro. <sup>8</sup> Jimagungde gathek è yua pha muawie ji è yo hamangkhung hamangkhliie nane gathek è yua arone, aishii ne thumluui hà the dun ro! <sup>9</sup> Gu è doh ibi de yaojong, chiih-è thuh shii de gu yao din; hanyie magungde nathek è nuui pha mua ji è gai yua arone, aishii ne thumluui hà the dun!

<sup>10</sup> Gu è tharothamang è choi pha ji shii mua pha bidiang pha duine bey? Khuchungde asi! Gu è nyie yang pha ji ne Hamangkhung-aphuii è choi pha ji ro! Gune bran rog shii boh rey yi pha bidiang ne bey? Gune thuh de ji rek pha bidiang bamuii arone, gune Masi ro khiao asi ro.

*Phaul ne nyie khi-èrek ne guaphasamoy rey*

<sup>11</sup> Gu khuiinotek wo, gu nathek shii yao, gu yua pha mua jine bran è rey pha asi ro. <sup>12</sup> Gune hanyie bran è de amuii ro, chiih-è gu shii hanyie è de ayua ro. Hi ne Isu Masi awai è gu shii doh yi ro.

<sup>13</sup> Nathek ne nyayao mua, gune Jewishthek ro giang shii lubu phi ne rai shii, gu è khi-èrek ne Hamangkhung-aphuii ro charch shii bushun de arek pha diigkhui phi ne gu è khama srobro rek mua pha rek ro. <sup>14</sup> Gune idam ò pha Jew ijakthek duchoi shii Jewthek ro giang pha blia shii gune ithek è de ibi ba ro, chiih-è gathek ro blangthek pha zenthek pha ji shii ithek è de bajo lubu phi ba ro.

<sup>15</sup> Hamangkhung-aphuii è awairo bushun è gu agiak ba pha ibi è gu shii guajong ro, chiih-è airo blia rek pha ho. <sup>16</sup> Ji-è ai awairo Dufuii gu shii dong phi pha phak mage shii, gune ai chiang pha Mua Wie jine Gaibrantek shii yao mua pha gu ne hanyie shii de yua phi bo ne awuii ro. <sup>17</sup> Chiih-è gune hanyie gu è ibi um pha guaphasamoy shii riig pha Jerusalem hà de awuii ro. Jiphachiang shii, gune khthiie Arabia hà wuii ne chiihphado gu ne Damaskhos hà khid din. <sup>18</sup> Idam uom pha iidoh shii gu ne Phithar è mua mua pha Jerusalem hà wuii dun, chiih-è ai rog shii habda nyi rai. <sup>19</sup> Gu è Ithong ro ikhuii Jems shii doh bie ne gai guaphasamoy hanyie shii adoh ro.

<sup>20</sup> Gu è nyie zey pha ji ne izai ro. Gu ne biidiie asi rone Hamangkhung-aphuii ne thieg ro!

<sup>21</sup> Chiihphado shii gu Syria nane Silikhia pha ithuathek hà wuii dun. <sup>22</sup> Jipha ishak shii Judea charch pha brantek ne gu shii athieg ro. <sup>23</sup> “Ithek ne hanyie è gethek shii diig phi ne mua maphi pha bran jine migi pha miyao yua muui rone gaithek è yao pha ji thieg bie ro!” <sup>24</sup> Ji-è ithek ne nyieliieshii gu chiang Hamangkhung-aphuii shii chiong ro.

## 2

*Phaul nane gai guaphasamoythek*

<sup>1</sup> Idam snawi pha iidoh shii gu Barnabas rog shii, Thithus shii de gu rog shii noh ne iidoh Jerusalem hà wuii dun. <sup>2</sup> Gu è wuii pha ji ne nyieliieshii Hamangkhung-aphuii è gu shii wuii chid phrone yao ro. Gu è Gaibrantek shii yua pha muawie mua ji pha chiang shii dumuiithek rog shii gu è yaophi. Gune gui ro iidoh pha blia nane thuh pha blia shii ne buyud rey bo ne ayang ro. <sup>3</sup> Gu ijak Thithus ai ne Greg magunde, aishii ne miangkheng bo ne bangchiie arek ro, <sup>4</sup> Jimagungde gai è ne rek yi pha yang ro. Migiphotek rone doh yi srane ji pha bran ne bujuui pha gathek duchoi è khud dun ro, nyieliieshii gethek Masi rog shii ò um pha ji è gethek ro ichad chiang ji shii sow pha rek ro. Ithek è gethek shii ne khiao rab pha yang ro, <sup>5</sup> jimagungde izai pha muawie ne gathek è nathek chiang shii ragia rek phi ne, gathek è ithek shii iujia de jo aphi ro.

<sup>6</sup> Jimagungde hanyie è dumuiithek—doh yi magungde, gu ne yao pha ji ne nyieliieshii ithek nyie magungde gu shii ne hi nyie yo arey ro, Hamangkhung-aphuii ne fuang è khia pha ji è achua phro—Gu ne yao, ji pha dumuii è gu shii ne nyie iwo miyao ayao ro. <sup>7</sup> Jishii, ai è Phithar shii

Jewthek ro guaphasamoy rab ne muawie ji yua pha blia phi pha duiine Hamangkhung-aphuii è gu shii de Gaibranthek shii muawie yua pha blia phi ro. <sup>8</sup> Phithar shii Jewthek ro guaphasamoy rab pha duiine, gu shii de Hamangkhung-aphuii blu è Gaibranthek ro guaphasamoy rab muui. <sup>9</sup> Jems, Phithar nane Jon hanyie shii dumuiithek doh yi ne Hamangkhung-aphuii è gu shii blia wie phi rone id yi; ji è ithek ne Barnabas nane gu rog shii wadthek chiiang rai, jine gathek zab ne ijak rone doh yi, Gathek è nuui rai Barnabas nane gu ne Gaibranthek shii blia rek pha ro, chiih-è ithek yi Jewthek duchoi shii blia rek pha ro. <sup>10</sup> Zab ithek è lia pha ji gethek ne ithek duchoi pha dusho shii nowkhlei phi ro, ji pha mana jine gu è bajo rek yang ro.

### *Paul è Anthioch hà Phithar shii giung*

<sup>11</sup> Jimagungde Phithar Anthioch wuiithok mage shii, gu è Phithar shii bran moe shii giung, nyieliieshii ai ne asi dang pha blia rek. <sup>12</sup> Jems è doh pha giak branthek thiisa athog ba pha ibi shii, Phithar de Gaibranthek khuinothek nane bumuiithek rog shii chie niing, jishii branthek thok mage pha idoh, ai yi Gaibranthek migiphothek rog shii achie yo rey dun, nyieliieshii ai ne migiangkheg pha haro rek pho shii rum. <sup>13</sup> Gai Jewthek migiphothek è jao ne Phithar murum ji duiine rum; chiih-è Barnabas rangde ithek shii dog dun. <sup>14</sup> Ithek ne muawie pha izai lumuii miang rog shii alua pha ji gu è doh mage shii, gu è ithek zab pha moe shii Phithar shii yao, “Nane Jew ro, tuh de nane Jew duiine arai pha, Gaibran duiine rai ro. Chiihphado, ithek ne Gaibran shii Jewthek duiine rai bo è nyie khi-èrek ne bangchiie rek mua mage phlei?”

### *Jewthek nane Gaibranthek ne migi è ragia rey ro*

<sup>15</sup> Zai, gu ne nyagiak dang pha ji è Jew ro chiih-è “Gaibran ne layogphothek rone ithek shii ho pha duiine gu ne asi ro” <sup>16</sup> Tuh magungde gathek ne thieg bran jia yi Hamangkhung-aphuii rog shii rangsua rai mua phane Iphey è nyie chiid pha ji rek pha ji è asi pha Isu Masi shii migi rek pha ji è ro. Gethek de Hamangkhung-aphuii rog shii rangsua rai phane Isu Masi shii migi rek pha ji è ro, chiih-è Iphey shii nyie chiid pha ji è asi ro. Chiih-è hanyie magungde Iphey è chiid pha ji rek ne Hamangkhung-aphuii rog rangsua arai muui phro. <sup>17</sup> Chiihphado, gethek ne Isu Masi rog shii ò rek pha ji è Hamangkhung-aphuii rog shii rangsua ruui pha bidiang arone, gethek ne Gaibranthek duiine layogthek doh dun—Jipha miyaosiu è Masi ne layog pha Chiang blia rek ne bey? Ji ne asi ro! <sup>18</sup> Gu è gui muchui muui pha Iphey ji rab din arone, chiihphado gu è gui shii Iphey chui-ramuii pha bran jia rone doh phro. <sup>19</sup> Iphey Chiang shii yao arone, jimagungde, gu ne iy-iy ro, gu shii Hamangkhung-aphuii rog shii sieng yi pha Iphey è gu shii ne ua muui ro. Gu shii de Masi rog shii bai hà iy yi, <sup>20</sup> jiè gu è rai pha hine gui asi ro, jishii hanyie gu shii sieng pha ji ne Masi ro, hanyie è gu shii miie ne chiih-è gu Chiang shii awai chai de tho muui ro, ji pha chai è tuh de gune rai ro, chiih-è gu ne Hamangkhung-aphuii pha Dufuii migi è sieng ro. <sup>21</sup> Gu ne Hamangkhung-aphuii pha bushun shii snai pha anuii phro. Jimagungde branthek yi Hamangkhung-aphuii rog shii Iphey ji è rangsua rey arone, Masi iy pha miyaosiu thek ne nyie de oi pha rey dun ro!

## 3

<sup>1</sup> Bi-ìe Galathithek! Nathek shii hanyie è thamiie lei? Nathek mieg moe shii Isu Masi ne bai shii iy pha ji ne doh yi! <sup>2</sup> Hi jia gu shii yao riig bo: Nathek ne Hamangkhung-aphuii Ragung mua phane Iphey shii nyie chiid pha ji rek ne mua ne ba asi pha mua nuii ne migi rek pha chang ne mua ne bey? <sup>3</sup> Chiihphado nathek ne nyiekhi-èrek ne bi-ìe lei! Nathek ne Hamangkhung-aphuii ro Ragung è jao; jishii nathek ne thuh shii ne nawairo blu shii jong pha rek ne bey? <sup>4</sup> Nathek ne nawaithek è thieg pha miyaosiu ne zab nyie oi bey? Zai hìne nyie miyaosiu ne um ro! <sup>5</sup> Chiihphado Hamangkhung-aphuii è nathek duchoi shii Ragung nane buangthek pha blia rek pha ji phi phane nyieliieshii nathek è Iphey nyie chiid pha ji nuii ne mua pha ba asi pha nyieliieshii muawie nuii ne chiìh-è migi rek ne mua ne bey?

<sup>6</sup> Abraham è thieg pha ji shii wie id bo; jigigam shii yao, “Ai è Hamangkhung-aphuii shii migi rek, chiìh-è nyieliieshii ai migi è Hamangkhung-aphuii è aishii giang rone nuii phi.” <sup>7</sup> Chiihphado nathek ne hì now ne thieg bo, Abraham ro izai riingthek ne bran hanyie shii migi um pha ji ro. <sup>8</sup> Jigigam è chaig Hamangkhung-aphuii è Gaibranthek shii de migi ji è awai rog shii rangsua ruii phi. Ji-è jigigam de yao Abraham shii de Mua Wie ji yao muui ro: “Na chang è zab pha bran shii ne Hamangkhung-aphuii è khirzey phi ruii phro.” <sup>9</sup> Abraham è migi rek jiè ai ne khirzey mua, jiè zab hanyie è migi rek arone Abraham duine khirzey mua ruii phro.

<sup>10</sup> Hanyie è Iphey shii luthong ne rai pho ne thamiie pha iliing shii ro. Jigigam shii de yao, “Hanyie magungde zab Iphey pha jigigam shii zey ne um pha Iphey shii idang migi arek arai arone ai ne Hamangkhung-aphuii ro thamiie pha iliing shii um ro!” <sup>11</sup> Thuh shii ne thieg sha, hanyie magungde Iphey pha miyaosiu ji è ne Hamangkhung-aphuii rog shii rangsua arai mua phro, nyieliieshii jigigam shii yao, “Bran hanyie shii migi è Hamangkhung-aphuii rog shii rangsua ruii bie pha ji ne sieng ruii phro.” <sup>12</sup> Jimungde Iphey ne migi rog shii nyie rek pha oi ro. Jiphachiang shii, jigigam shii yao, “Hanyie è Iphey è nyie chiid pha ji zab rek arone sieng muui phro.”

<sup>13</sup> Jimagungde gethek chang Masi de thamiie thoh pha ji è gethek shii Iphey è thamiie pha ji è khia phi; jigigam shii yao, “Hanyie magungde hingmuui shii zun ne iypho ne Hamangkhung-aphuii è thamiie pha iliing shii ro.” <sup>14</sup> Masi è ji rek pha ji ne nyieliieshii Hamangkhung-aphuii è Abraham shii sbang rek pha khirzey jine Isu Masi chang è Gaibranthek shii de mua yi pha rek ro, jiè migi ji è gethek de Hamangkhung-aphuii è sbang rek pha Ragung ji mua ro.

### *Iphey nane sbang*

<sup>15</sup> Gu ijakthek wo, gu ne idang pha shan ji è yao: Bran nyi yi nuii srane shiinyie shii zey arone, hanyie de alai mua phro chiìh-è nyie de achoh mua phro. <sup>16</sup> Thuh shii, Hamangkhung-aphuii è Abraham nane awairo riingthek shii sbang rek. Jigigam è ne “Riingthek,” Bajo ro ayao ro, hì pha miyaosiu, jishii “Riing” ne jia bie ro, hì pha miyaosiu ne bran jia bie ro, ji pha ibeng ne Masi ro. <sup>17</sup> Gu è nyie yao pha ji ne Hamangkhung-aphuii è Abraham rog shii shiinyie rab ne sbang ruii phro. Iphey yi wieng wi è sa-uom idam iidoh phi ne de ji pha shiinyie nane Hamangkhung-aphuii sbang shii alai muui phro. <sup>18</sup> Hamangkhung-aphuii pha lasen yi Iphey è luthong arone, ji ne sbang shii aluthong mua. Jishii, hìne nyieliieshii ai sbang è ji pha lasen ne Hamangkhung-aphuii è Abraham shii phi muui ro.

<sup>19</sup> Chiiphado, Iphey è now pha jine nyie ga? Hine asi pha rek pha ji shii doh yi pha chodo muui ro, chiih-è hipha miyaosiu ne Abraham ro riing hanyie yi wuii ruii pha ji thok pha rai phro. Hamangkhliethek è Iphey ne khliethek wad shii thoh ge. <sup>20</sup> Jishii bran jia ro blia pha ishak thok mage shii khliie ne achiid sha; chiih-è Hamangkhung-aphuii ne jia bie ro.

### *Iphey pha blia*

<sup>21</sup> Chiiphado hi pha miyaosiu è Iphey Hamangkhung-aphuii ro sbangthek shii suang rek ne bey? Asi ro! Brantheke è Iphey shii choi arone ithek ne chai yi ruii phro, chiihphado zab ne nuii pha ji è Hamangkhung-aphuii rog shii rangsua rai mua ruii phro. <sup>22</sup> Jimagungde jigigam è yao zab pha soh ne layog iliing shii ro; chiih-è nyie lasen yi Isu Masi shii migi rek pha ji è mua ruii phrone sbang rek pha ji ne hanyie è migi rek pho shii phi ruii phro.

<sup>23</sup> Jimagungde migi thok pha ishak ibi shii, Iphey è gethek shii ne phatgeg iliing hà chab ne ichad rek phi pha migi ji athog shapho shii ne kheb muui ro. <sup>24</sup> Masi wuiithok ne migi è gethek shii Hamangkhung-aphuii rog shii rangsua aruii sapho shii ne Iphey è gethek shii ne dumuii rek ba ro. <sup>25</sup> Thuh shii migi ichiih shii um ro, Iphey è ne gethek shii bajo dumuii arek sha ruii phro.

<sup>26</sup> Hine migi Chiang è Isu Masi rog shii ò rek pha ji è nathek zab ne Hamangkhung-aphuii ro aniphiing rey ro. <sup>27</sup> Nathek de Masi rog shii ò Khowo yiejong ro chiih-è thuh nathek ne yung guijong pha ji ne Masi ro chai è nathek shii guui ne ruii ro. <sup>28</sup> Ji-è ichiih shii Jewthek nane Gaibrantek ne yo asi sha ro, chiih-è khiao nane ichad de, bufuii nane bimi de nathek zab ne Isu Masi rog shii ò pha ji è nathek ne jia bie ro. <sup>29</sup> Nathek de Masi ro rey arone, nathek de Abraham ro riingthek chiih-è Hamangkhung-aphuii è nyie sbang rek pha ji mua ruii phro.

## 4

<sup>1</sup> Din ne de—Dufuii hanyie è awai aphuii ro nuruii mua ruii pha ne, zab awairo magungde aiwai shii ne filiao ba shii khiao è rek pha ji duine rek bo. <sup>2</sup> Ai ne filiao ba shii, chiih-è aphuii è ruii pha ishak ji athog sapho aishii gayiig ne khriig sharo pha bran um ro. <sup>3</sup> Ji duine gathek shii de luruak è weg arey ba pha ibi shii soh shii khoh pha ragungthek è khiao khui ne ruii ro. <sup>4</sup> Idohhè pha rangsua ishak thok mage shii, Hamangkhung-aphuii è awairo Dufuii shii thoh ge. Ai yi bran amuii è wuii srane Jewthek ro Iphey iliing shii rai, <sup>5</sup> chiih-è hanyie yi Iphey iliing shii um pho shii ne ichad rekgong phi, jiè gathek ne Hamangkhung-aphuii ani rey yi.

<sup>6</sup> Chiih-è nathek shii awai dufuii rone doh yi pha Hamangkhung-aphuii hanyie è “Aphuii, guro Aphuii” Rone ho ne cho muui pha awairo Dufuii Ragung gethek lubuthek iliing shii thoh ge ro. <sup>7</sup> Ji-è nathek ne khiao asi sha pha ani sha ro. Nathek ai ro dufuii nyarey dang ne Hamangkhung-aphuii è awai dufuii shii nyie um pha ji zab nathek shii de phi.

### *Paul è Galathithek Chiang shii samdiig*

<sup>8</sup> Doh ibi ne nathek ne Hamangkhung-aphuii shii ne athieg, jiè nathek ne biidiie pha hamangkhung-aphuii ro khiao rek. <sup>9</sup> Jishii thuh nathek ne Hamangkhung-aphuii shii thiegsha dinne gu ne yao mua, nathek shii Hamangkhung-aphuii è de thieg sha, jiè nathek ne nyiekhi-èrek now ne asi pha ragung è khui pha ji shii iidoh khid yang phlei? Nyiekhi-èrek ne nathek

ne din airo khiao rey pha yang phlei? <sup>10</sup> Nathek ne inai, habie, ishak, nane idam shii isiie rek. <sup>11</sup> Gune nathek chiang shii samdiig muui ro! Guro zab blia nathek shii rek phi pha ji ne nyie de arey pha rey dun bey?

<sup>12</sup> Gu ijakthek wo, gu nathek shii khungdang phro, gu duine rek bo. Chiih-è gu de nathek duine ro. Nathek è gu shii ne ichiig arek ro. <sup>13</sup> Nathek ne nowkhlei phro igobi gu è nathek shii nyie rek ne thawawie yua pha ji shii ne; nyieliieshii gune rad. <sup>14</sup> Jimagungde gu siu pha tharo shii ne nathek shii boh diigchio shii, nathek ne gu shii khinrin ne asnai ro. Jiphachiang shii, nathek è hamangkhlie shii choi pha duine choi, chiih-è Isu Masi shii choi pha duine choi. <sup>15</sup> Nathek ne bajo sang pha de ne! Nyie rey dun ga? Gu ne gui è nya mua, nathek è rey mua pha blia arone nawaithek mieg de khia ne gu shii yao phi mua phro. <sup>16</sup> Thuh shii gune izai yao pha ji è nathek ro suang rey dun bey?

<sup>17</sup> Gai branthek è nathek shii jam miie doh yi, jimagungde nathek ro now pha ji ne wie asi ro. Zab ithek ro yang pha ji ne nathek shii gu-è yo rek pha yang phro, jiè nathek è ithek shii um yi pha ò miie nathek shii de um yi pha rek phro. <sup>18</sup> Nathek ro blia yi wie arone, hi pha jam miie pha ji ne wie ro—Hine idang izai chak ro, gune nathek rog shii um doh pha ji asi bie pha idang pha ro. <sup>19</sup> Guro bushun anithek wo! Din ne luangjia, amuii è ani giak shii riie pha duine, Masi ro ziig nathek shii akhud sapho shii gu de ji duine riie ne rai ro. <sup>20</sup> Thuh shii gu ne nathek rog shii um pha yang muui ro, jiè gune nathek chiang shii yo jum è now mua. Gune nathek chiang shii bajo samdiig muui ro!

### *Hagar nane Sara ro miiriig*

<sup>21</sup> Hanyie yi Iphey pha iliing shii rai pha yang muui pho nathek shii gu sai riig: Nathek ne Iphey è nyie yao pha ji ne ayoi bey? <sup>22</sup> Iphey shii yao Abraham shii dufuii nyi um, jia yi khiao hò-amuii ro dufuii jia yi ichad ro hò-amuii pha dufuii ro. <sup>23</sup> Airo khiao hò-amuii dufuii jine zen è giak, chiih-è airo ichad hò-amuii è giak pha ji ne Hamangkhang-aphuii sbang è giak ro. <sup>24</sup> Hi pha manathek è nyathieg mua: Hò-amuii nyi è shiinyiethek duine ò yi. Hagar è giak pha ani ne khiao ro, chiih-è ai ne Sinai phiing shiinyie shii ò rab. <sup>25</sup> Hagar hanyie è Arabia pha Sinai phiing shii riu pha jine Jerusalem rajan shii awai bran rog shii khiao mia yi ro. <sup>26</sup> Jishii Hamangkhang pha Jerusalem ne ichad ro, chiih-è ai ne gathek ro amuii ro. <sup>27</sup> Jigi shii yao,

“Sang bo, ani agiak pha hò-amuii nathek!

ziak ne lubo rog shii choh bo

ani giak shii riie pha ji athan ba pho

chiih-è hò-amuii hanyie shii khiijai muui pho ne

gey um pha hò-amuii è de

bajo ani um ruii phro.”

<sup>28</sup> Thuh, nathek, guro ijakthek, Isakh duine, nathek de Hamangkhang-aphuii pha ani rone ai sbang shii doh yi bo. <sup>29</sup> Jipha ishak shii siu è giak pho è Ragung è giak pho shii diig phi ro, chiih-è thuh shii ji duine ro. <sup>30</sup> Jimagungde jigigam shii nyie yao lei? Jigigam è yao, “Khiaomuii nane ai ani shii thoh ge bo; nyieliieshii khiao hò-amuii ro dufuii ne ichad hò-amuii pha dufuii rog, aphuii ro bangnuruui shii mathang oi phro.” <sup>31</sup> Ji-è gu ijakthek wo, gethek ne khiao hò-muii ro ani asi ro, jishii gethek ne ichad hò-amuii pha ani ro.

## 5

*Nawaithek ro ichad shii khoh bo*

<sup>1</sup> Ichad gethek shii nyie um pha ji ne—Masi è gethek shii ichad rek phi! Chiihphado ichad reyjong pha brantheke duiine riu mage bo, chiih-è nawaithek shii dinne khiaothek arey yi rabo.

<sup>2</sup> Yoi bo! Gune Phaul nathek shii yao nathek è nawaithek è miangkheng arone, hì pha miyaosiu thek è Isu ne nathek shii nyie blia oi rone rey dun ro. <sup>3</sup> Dinne gu luangjia brantheke hanyie è miangkheng pho ne Iphey shii zab nuii chid phrone phriie ro. <sup>4</sup> Hanyie è nawaithek shii Iphey nuii pha ji è Hamangkhung-aphuii rog shii rangsua ruii pha bidiang pho ne Isu Masi è yo rey dun ro. Chiih-è gethek ne Hamangkhung-aphuii ro bushun è yo rey dun ro. <sup>5</sup> Chiih-è gethek ne, Hamangkhung-aphuii è ai rog shii rangsua ruii phrone gethek è luthong chid; chiih-è hine nyielieshii gethek ro mi è Hamangkhung-aphuii blu pha Ragung è blia rek ruii phrone khan ro. <sup>6</sup> Chiih-è gethek yi Isu Masi rog shii ò rey mage shii, miang-akheg magungde chiih-è miangkheng magunde ji è nyie yo achun ro, miyaosiu ne miie è blia rek pha mi gi ro.

<sup>7</sup> Nathek ne bajo wie rek muui ro! Nathek izai shii anuii rabo ne hanyie mugak lei? Ai ne nyie khi-erek ne nyiu phlei? <sup>8</sup> Hanyie è nashii ho pha ji ne, Hamangkhung-aphuii è rek pha asi ro. <sup>9</sup> Yao pha duiine “Nog pha iweb men pha ji phiia lujia chiid bie ro.” <sup>10</sup> Jimagungde thuh thok pha gune nathek shii luthong ba ro. Gathek chai Ithong rog shii ò pha ji è Ithong è gu shii ne nathek gai now pha ji shii ne arab phrone thieg yi, chiih-è bran hanyie è nathek shii diig phi pha ji ne hanyie magungde aishii ne Hamangkhung-aphuii è lago phi ruii phro.

<sup>11</sup> Gu khuiinothek wo! Jimagungde gu shii ne, gu miangkheng pha ji ne mugak rone idang yua arone, nyie rek ne gu ne thuh de diigchio muui ne bey? Jine izai arone, chiihphado gu muyua pha Masi ro bai Chiang ne nyie diig arey phro. <sup>12</sup> Gu ne hì è yang ro hanyie nathek shii zo yi pho ne zab pha dun srane awaithek ro soh muui bo!

<sup>13</sup> Gu ijaktek wo! Nathek shii ne ichad rey yi pha ho. Jimagungde hì pha ichad shii ne nawai siu è chiid thek pha ji è ihia aphrai yi rabo. Jiphachiang shii, miie ji è nathek shii nawaithek blia rek rai pha rey phi bo. <sup>14</sup> Chiih-è zab pha Iphey ne ò jia pha muyung shii rey dun ro: “Nawai shii miie pha duiine, hadung-haluii pho shii de miie bo.” <sup>15</sup> Jimagungde nathek è jabiing pha muram duiine rek ne diig phi ne nawaithek chung buii rek rai arone, chiihphado riig bo, dinne nawaithek chung zab srobro rey dun phro.

*Luruak nane tharothamang ziig*

<sup>16</sup> Gu è nyie yao pha ji ne hì ro: Ragung è naro sieng thek lua yi bo, chiih-è nane bran ziig jihà chiid pha ji ne liingsed arey yi phro. <sup>17</sup> Chiih-è gethek ro tharothamang ziig è chiid pha ji shii ne, Ragung è nyie chiid pha ji suang rek, chiih-è Ragung è nyie chiid pha ji shii ne tharothamang ziig è nyie chiid pha ji shii suang rek ro. Isa nyi ne suang ro, hì pha miyao è na nyie rek yang pha ji ne arek mua ruii phro. <sup>18</sup> Nathek shii Ragung è lua noh arone nathek ne Iphey pha iliing oi ro.

<sup>19</sup> Tharothamang ziig è rek pha ji ne zab dong ruii phro. Hì ne nawaithek shii siulao, zia chiih-è awie pha blia; <sup>20</sup> Jangbang shii sia pha chiih-è bizaigmuii pha miyao ji doh yi. Brantheke chung suang rey srane gui rai phro; ithek ne gidieg rek ne lijeg srane nyua rai ne, ibrog yoh yoh rey rai

phro; <sup>21</sup> ithek chung giichak rai ne phuiithiig ne siulao rai ne, chiih-è hì duiine gai bliathek de rek phro. Gu nathek shii dohbi yao jong pha duiine gu nathek shii phriie phro, hanyie magungde hì è rek pha blia rek arone ai ne Hamangkhung-aphuii ro Sajathua shii akhud mua ruii phro.

<sup>22</sup> Jimagungde Ragung ne miie, lubo, lijiing, lubuphiang, bushun, wie, migi, <sup>23</sup> jum rek ne chiih-è awaishii zud ne doh yi ro. Jithek zab shii ne nyie Iphey è suang oi sha ro. <sup>24</sup> Chiih-è hanyie yi Isu shii rey pho ne awai siu è ziig pha munow shii nane muchiid shii ne iy ba yi. <sup>25</sup> Ragung è gethek shii ne chai phi; ai è gethek sieng muui pha ji shii de phrai chid. <sup>26</sup> Gethek chung ne wiangwie chiih-è afak-afi chiih-è miegriie arek rai haro.

## 6

### *Diig bliathek shii nawaithek chung nong*

<sup>1</sup> Gu ijaktek wo, asi pha ichua rek pha ji è giak shii zum dun arone, chiih-è nathek hanyie yi luruak pho ne si bsa hà rek phi bo; jimagungde nathek ne jum è rek bo. Chiih-è nawai shii wie riig ne chuajan bsa hà achai yi rabo.

<sup>2</sup> Gaithek ro miihan shii de nong ne hang rai bo, ji è rek arone nathek ne Masi ro Iphey nuii ro. <sup>3</sup> Hanyie è nyie de oi pha rek srane awaishii awai nyie um rone now arone, ai ne awaishii khinrin rek ro. <sup>4</sup> Zab shii hanyie hanyie è rek pha ji è chua ruii phro, hìne wie arone, ai ne gai nyie rek pha ji shii achua pha, awai è nyie rek pha ji shii wiangwie nyarek mua phro. <sup>5</sup> Zab ne hanyie hanyie ro miihan han chid.

<sup>6</sup> Na shii Masipho pha mua yuajong arone, nane nawai shii nyie mana wie um pha ji ne nawai rog masdo shii thang bo.

<sup>7</sup> Nawaishii akhin-arin rabo. Hanyie magungde Hamangkhung-aphuii shii bi-ie arab mua phro. Branthek awai è nyie hai pha ji shii chiig ruii phro.

<sup>8</sup> Ai è awai è zen shii chiidthekek pha raig hai arone ai ne iy pha yamiing chiig ruii phro; ai ne Luruak pha raig shii hai arone, ai ne Ragung è idang chai pha yamiing chiig ruii phro. <sup>9</sup> Ji-è cho gethek ne wie rey pha ji shii ajid haro; chiih-è gethek ne wie rek pha atho arone, gethek ne wie yamiing chiig pha ishak thok ruii phro. <sup>10</sup> Ji-è gethek ne jo um shii, gethek ne zab shii wie rek haro, chiih-è migipho shii wie rek dang rai haro.

### *Idohhè shii phriie pha nane salam ro*

<sup>11</sup> Riig bo thuh shii nyie boh jigigamthek gu è nathek shii rab ne zey pha ji ne gui wad è zey ro. <sup>12</sup> Bran hanyie è nathek shii migiangkheg bo è bangchiie rek pha ji ne fuang pha miyaosiu thek Chiang shii doh yi ne wiangwie rek. Itheke è ji rek pha ji ne nyieliieshii Masi pha bai Chiang shii ithek diigchiao amua yi ji pha blia rek. <sup>13</sup> Migiangkheg pho awaithek rang de Iphey shii anuii: Itheke è nathek shii migiangkheg bo è yang, nyieliieshii ithek è ji pha siu ne phijong rone ithek è wiangwie rek mua pha yang. <sup>14</sup> Jimagungde gune, gethek ro Ithong Isu Masi ro bai Chiang shii wiangwie rek bie ro; airo bai Chiang è sohjangbling ne gu shii iy-iy ro, chiih-è gu Chiang sohkhung ne iy-iy ro. <sup>15</sup> Nathek migiangkheg ne de migiang-akheg ne de ji pha miyaosiu ne nyie achun phro, jimagungde nyie miyaosiu chun pha ji ne iwo zen pha ji ro. <sup>16</sup> Bran hanyie è ai sieng shii ji pha miyaosiu shii nuii arone, lijiing chiih-è bushun ne ai rog shii nane Hamangkhung-aphuii pha bran rog shii um bo!

<sup>17</sup> Jong sha: Hanyie de gu shii muna diig aphì sha rabo, nyieliieshii gu siu shii um pha chebtheke è ne gu ne Isu ro khiao rone doh yi ro.



<sup>18</sup> Guro Ithong Isu Masi pha bushun ne nathek zab guro ijakthek rog shii um bo. Amen.

## IPHISITHEK Shii Phaul Re-è Jigigam Yaophi

Phaul è Iphisianthek shii jigigam zey pha ji ne igobi shii zab ò um ro Hamangkhung-aphuii è zab hamangkhung nane sohnyiak, rog shii Masi yi khrug rek pha zab zen shii ò yie pha phak, (1:10) Hamangkhung-aphuii bran ne Isu Masi rog shii ò rek pha boh phak pha ji shii rai chiid phro ne khung.

Iphisianthek pha igobi pha ithua shii, zeypho è Hamangkhung-aphuii awai è gua pha brantheke shii yao pha lumuii ò Chiang shii igobi rey yi, nyie khi-èrek ne ithek ne Dufuii Isu Masi è khung ne ithek ro layog shii ichad rey pha ji ro chiih-è Hamangkhung-aphuii pha boh sbang ne Ragung So shii ne zab rey mua pha ji ro. Nyichiieng pha ithua shii ne ai è thampho shii sieng pha lumuii ne Masi rog shii ò rek pha ji è airo izai chai shii ò rey pha khung.

Bajo ò re-è yao pha ò shii khohe ne Hamangkhung-aphuii bran ne Masi rog shii ò rek bo ne doh yi: charch ne siu duiine ro, ai khrug ne Masi ro; dinne hò duiine ro, ai rog shii Masi ne iring pha lubao ro; dinne yiy duiine, ai rog shii Masi ne gey duiine ro. Hi pha jigigam ne zeypho è Masi shii Hamangkhung-aphuii pha bushun ne phi rone bajo giu yao ro. Zab khlem, khungphi, bushun, nane gang ne Masi ro miie muchuang shii doh ro.

### **Iliing shii um pha ji**

Yaophi (1:1-2)

Masi nane charch (1:3—3:21)

Masi shii iwo chai (4:1—6:20)

Jong sha (6:21-24)

<sup>1</sup> Phaul re-è, hanyie yi Hamangkhung-aphuii è yang pha Masi Isu ro guaphasamoy—

Iphisus hà Hamangkhung-aphuii ro bran pha hanyie è ithek ro chai ne Isu Masi rog shii ò migi rek ro:

<sup>2</sup> Hamangkhung-aphuii gathek ro Aphuii nane Ithong Isu Masi è nathek shii bushun nane liijung phi bo.

### *Masi hà luruak pha khirzeythek*

<sup>3</sup> Cho gethek ne Hamangkhung-aphuii nane Ithong Isu Masi Aphuii shii laso phi haro! Chiih-è gethek ne ò Masi rog pha ji re-è aine gethek shii hamangkhung pha sohjambling shii zab pha Ragung khirzey gethek shii phi ro. <sup>4</sup> Sohjambling rab pha ibi è rang de, gethek ro Masi rog shii ò pha ji è Hamangkhung-aphuii è gethek shii guajong ro, ji-è gethek ne ai ibi shii ichiig arek pha gang rek chid.

Nyieliieshii airo miie <sup>5</sup> Hamangkhung-aphuii ne awairo Dufuii rab pha rone Isu Masi Chiang è khuchung mujo gethek shii guajong ro, hì ne awai è sang pha awai blia rek pha rab phi. <sup>6</sup> Cho gethek ne airo biisiie pha bushun shii chiong rai haro, thaluii pha lasen shii ai è awairo bushun Dufuii shii phi muui! <sup>7</sup> Masi ifai Chiang è gethek shii ichad rek phi, jine gethek ro layog ne khung ge ro. Hamangkhung-aphuii ro bushun ne bajo boh ro, <sup>8</sup> nyie yi ai è bajoboh chua ne phi pha ji ro!

Ai è izai gethek shii awairo zab khani nane gao pha ji ne <sup>9</sup> ai è nyie yang pha ji Hamangkhung-aphuii è rek phi, chiih-è Masi Isu Chiang è zab ug ne

phakjong pha ji gethek shii thieg yi. <sup>10</sup> Hì pha phak ne Hamangkhung-aphuii è zab rek pha khriig ishak thok mage shii, zab hamangkhung pha nane zab sohnyiak pha rab pha ji shii ò jia shii yie pha, ai rog shii ne Masi ne khrug ro. <sup>11</sup> Zab ne Hamangkhung-aphuii ro phak duine rek ro; chiih-è Masi rog ò rey yi pha Hamangkhung-aphuii è gethek shii gua ro, ai igobi è nyie phak pha ji è gua ro, nyieliieshii awai bliá rek yi pha gua ro. <sup>12</sup> Chiihphadó cho gethek hanyie è dohbi Masi shii luthong pha ji è Hamangkhung-aphuii ro biisiie pha ji shii chiong haro! <sup>13</sup> Na è izai mua ji yoi mage shii, na de Hamangkhung-aphuii pha bran nyarey mua ruii phro, ji pha Mua Wie ji è na shii giawo yie ruii phro. Na de Masi shii migi rek bo! Chiih-è Hamangkhung-aphuii awai è sbang rek muui pha Ragung So ji è nathek shii ai ne muspho ro ne nab phi phro. <sup>14</sup> Hamangkhung-aphuii è awairo brantheek shii sbang nyie rek pha ji ne gethek shii mua ruii phro ne ibi è Ragung So ne phijong ro, chiih-è hì ne gethek shii phi phro ne, Hamangkhung-aphuii hanyie awairo shii ne zab ichad rek phi ruii phro ne zai yaodang ro. Ji-è cho gethek ne airo biisiie pha ji shii chiong rai haro!

### *Phaul ro misia*

<sup>15</sup> Hì pha Chiang, gu nyayoi dang ne nathek migi Ithong Isu shii um ne chiih-è nathek ro miie ne zab pha Hamangkhung-aphuii pha bran rog shii um pha ji, <sup>16</sup> Gu è nathek Chiang shii Hamangkhung-aphuii shii laso phi phaagak ro. Gu misia shii nathek shii nowkhlei phi, <sup>17</sup> chiih-è gethek ro Ithong Isu Masi ro Hamangkhung-aphuii biisiie pha Aphuii shii lia ro chiih-è ai è nathek shii Ragung phi bo chiih-è Ragung nathek shiine nathek shii khani phi ne Hamangkhung-aphuii dong yi, ji-è nathek de aishii id ruii phro. <sup>18</sup> Nathek shii de airo muchuang ji riig yi pha gu è nathek ro khani hong phi bo ne lia, ji-è nathek shii ai è ho pha nyie luthong ji ne thieg ruii chiih-è awai bran shii sbang rek pha khama pha anomuluii pha khirzeytheek thieg ruii phro, <sup>19</sup> chiih-è hanyie è migi rek pho gethek shii ai è awairo riichaiboh chua ne khama bliá rek ro ne thieg ruii phro. Gethek shii bliá rek pha hì pha blu ne bajo chua ne ò ro, <sup>20</sup> ji pha blu è khoh pha ji ai è Masi shii iy pha ji è hòi din chiih-è hamangkhung pha sohjambling hà aishii awai phazoi hà dug yi. <sup>21</sup> Masi ne riichaithek, bluthek nane Ithongtheek chiih-è zab pha hamangkhung pha bohkhohtheek pha ji shii de khoh ro; ai ne ichiih sohkhung pha riichaithek nane dinpha riichai ibeng shii è de zab è boh ibeng ba ro. <sup>22</sup> Hamangkhung-aphuii è zab pha manathek ne Masi lai iliing shii ruii ne chiih-è zab pha mana shii Ithong rab srane charch shii phi muui. <sup>23</sup> Charch ne Masi ro siu ro, charch è ne aishii jong phi ro, chiih-è ai ne zab pha ithua shii zab pha manathek shii ley ro.

## 2

### *Iy pha ji re-è sieng*

<sup>1</sup> Ibi hà nathek ne luruak shii iy dun, nyieliieshii nathek è anuii pha ji è layogtheek rey dun. <sup>2</sup> Jipha ishak shii nathek ne sohjambling pha awie pha lumuii shii nuui ne lua; chiih-è nathek ne hamang hà ragung pha bluthek pha khohpho, ragung shii nuui, thuh shii ji pha ragung ne bran hanyie è Hamangkhung-aphuii shii anuii pho shii khoh ro. <sup>3</sup> Zai shii ne zab gethek de ithek duine ro chiih-è gethek ro tharothamang pha ziig ji duine rai. Chiih-è gethek ro siu nane khani è nyie chiid pha ji duine gu è rek. Gethek ro ziig

è gethek de zabthek duiine Hamangkhung-aphuii ro lijieg pha diig ji mua ruui phro ne phakjong.

<sup>4</sup> Jimagungde Hamangkhung-aphuii pha bushun ne bajo ro, chiih-è ai è gethek shii miie pha ji ne boh ro. <sup>5</sup> Gethek anuii pha ji è ji pha ishak shii gethek luruak ne iy dun shii, ai è Masi rog shii sieng yi. Hine Hamangkhung-aphuii bushun è gethek ne ragia rey ge ro. <sup>6</sup> Gethek Masi Isu rog ò pha ji è ai è gethek shii Masi rog hòì phi ne ai rog hamangkhung pha sohjambling shii khoi yi. <sup>7</sup> Ai è ji rek pha ji ne airo bushun pha bajoboh ne zab Ishak thog shii doh yi pha Masi Isu hà ài è miie shii gethek shii doh yi. <sup>8-9</sup> Chiih-è hì ne Hamangkhung-aphuii bushun è nathek ro migi ji è ragia rey ge ro. Hì ne nawaithek musnak è ragia arey ro, Jimagungde Hamangkhung-aphuii pha lasen ro. Ji-è hanyie de ji pha chiang shii nyigodog arek mua phro. <sup>10</sup> Gethek ne nyie khi-èrek ne um pha ji Hamangkhung-aphuii awai è rab phi, chiih-è gethek ro Masi Isu rog shii ò pha ji è ai è gethek nyie rek yi pha saro ne ruijong pha ji ne gethek shii wie blia rek pha chai rab phi.

### *Isu shii ne jia bie ro*

<sup>11</sup> Nathek Gaibrantheke nyagiak dang ne “Miang-akheg” pho rone yao, Jewtheke è awaithek shii miangakheg pho rone yao, (branteke è awaithek siuthek rek yi) chiih-è nane igobi nyie ga ji nowkhlei bo. <sup>12</sup> Jipha ishak shii nathek ne Masi re-è yo rey dun ro. Nathek ne gai branteke ro chiih-è nathek ne Hamangkhung-aphuii è gua pha bran è asi ro. Hamangkhung-aphuii è awai branteke shii sbang rek pha shiinyie shii ne nathek ne mathang oi ro, chiih-è nathek ne ichiih sohkhung shii luthong oi ro chiih-è Hamangkhung-aphuii de oi pha rai ro. <sup>13</sup> Jimagungde thuh shii, Masi Isu rog shii ò pha ji è chiih-è hanyie nathek è ruang rek pho shii Masi iy ne zid pha ji è inui hà noh ge ro. <sup>14</sup> Chiih-è Masi Gaibranteke nane Jewtheke shii ò jia rab phi ne awai è gethek shii liijiing yi phi ro. Nathek shii yo rek ne mak rek ne ruui pha muthua shii awai siu è chuak muui ro. <sup>15</sup> Nyieliieshii jadtheke bran nyi shii bran iwo jia rey yi ne awaithek chung ò rek yi pha, ai è Jewtheke ro Iphey rog muyungtheke nane khothek pha ji shii sad muui ro, hì duiine liijiing rab phi ro. <sup>16</sup> Ai è bai shii iy pha ji è Masi è ithek ro suang shii srobro rek muui ro, bai pha miyaosuthek ji è jad nyi shii siu ò jia rab ne Hamangkhung-aphuii hà iidoh noh ro. <sup>17</sup> Ji-è Masi wuiithok srane Hamangkhung-aphuii è ruang rey ne Gaibranteke nathek zab, chiih-è Jewtheke, hanyie ai moe shii um pho theke zab shii liijiing pha Mua Wie yua ro. <sup>18</sup> Hì ne Masi chiang è gethek zab, Jewtheke nane Gaibranteke ne, Aphiui moe pha Ragung jia shii wuii mua ro.

<sup>19</sup> Ji-è Gaibrantheke nathek ne fuangbranteke nane gai branteke asi sha ro; nathek ne thuh shii Hamangkhung-aphuii pha bran ijak ro chiih-è Hamangkhung-aphuii pha halliing sha ro. <sup>20</sup> Na shii ne guaphasamoy nane chaig pha sarong rung phi ro, iring pha lubao ne Masi Isu awairo. <sup>21</sup> Ai ne jia ro hanyie è zab pha hò shii ò khoi ne rab chiih-è ug pha Jewtheke misiahò ne Ithong shii sey re ro. <sup>22</sup> Masi Isu rog shii ò rek pha ji è na shii de zab pha gai rog shii Ragung è Hamangkhung-aphuii rai muui pha ji shii ò rung-ramuii ro.

## 3

### *Paul è gaibranteke shii blia rek*

<sup>1</sup> Hì pha chiang è, gune, Paul Gaibranteke nathek chiang gu ne Masi Isu pha phathegpho ro, gu ne Hamangkhung-aphuii shii sia. <sup>2</sup> Zai nathek ne yoi

iwa, Hamangkhung-aphuii pha awairo bushun ne nathek shii wie rek phi pha blia ji gu shii phi ro. <sup>3</sup> Hamangkhung-aphuii è awairo ug pha phak ne gu shii thieg yi ro. (Gune hi pha Chiang shii dum zeyjong bie ro, <sup>4</sup> chiih-è gu nyie zey pha ji nathek è tham arone gu è gao pha Masi ro ug muuii pha ji ne nathek nyathieg mua ruui phro.) <sup>5</sup> Igobi pha ishak shii hi ne bran shii ayao pha ug ne ruui, jishii Hamangkhung-aphuii è thuh shii ne Ragung è so guaphasamoythek nane chaigthek shii dong phi. <sup>6</sup> Ug pha ji ne hi ro mua miyaosiuthek ji è Gaibranthek de Hamangkhung-aphuii ro khirzey shii ithek de Jewthek rog mathang um ro; ithek de ò pha siu ro chiih-è Isu Masi Chiang è rab muuii pha Hamangkhung-aphuii ro sbang shii de mathang um ro.

<sup>7</sup> Hamangkhung-aphuii ro bajowie pha lasen nyie ai è gu shii awairo blu phi ne blia rek yi pha Chiang gune muawie pha khiao rab muuii ro. <sup>8</sup> Gune Hamangkhung-aphuii pha bran duchoi shii zab è lu rey dun ro; thuh shii Hamangkhung-aphuii è gu shii Masi ne ajong pha lasen mathang rone Gaibranthek shii Mua Wie ji yi phi pha jo phi ro. <sup>9</sup> Chiih-è Hamangkhung-aphuii ro ug pha phak ne nyie khi-èrek ne branthek shii blia rek rone doh yi ro, Hamangkhung-aphuii hanyie ne zab pha manathek Rabpho è awairo ug pha phak jine buyo pho è ug ne ruui ne, <sup>10</sup> Jiphachiang shii thuh pha ishak shii, hi pha miyaosiu ne charchtek re-è hamangkhung pha sohjambling pha bluthek hà hamangkhiie pha bohkhohthek è airo yoyo pha khani shii thieg yi. <sup>11</sup> Hamangkhung-aphuii è ji duiine rek pha ji ne awairo idang pha blia shii rek, nyie jine ai è gethek ro Ithong Masi Isu è rek ge. <sup>12</sup> Masi rog shii ò pha ji nane gethek ro migi aishii um pha ji è gethek ne lububo rek ne chiih-è zab migi rek ne Hamangkhung-aphuii moe shii wuii mua ro. <sup>13</sup> Chiihphado gu nathek shii khung, lubu-lu arek rabo nyieliieshii gu è nathek Chiang diig rekjong ro; hithek zab ne nathek shii phua pha ro.

### *Masi ro miie*

<sup>14</sup> Jiphachiang è gune Aphuii ibi shii lagiungthek niing, <sup>15</sup> zab airo re-è hamangkhung pha haliing nane sohnyiak pha haliing pho ne izai ibeng choi ruui phro. <sup>16</sup> Airo ragung è blu phi ne nathek ro iliing pha chai rek yi pha gu è Hamangkhung-aphuii shii airo biisiie pha ley ji lia ro, <sup>17</sup> chiih-è gune sia phro nathek shii ne iriingthek nane sarong um ne miie shii ò chuh rek mua. <sup>18</sup> Ji-è nathek ne zab Hamangkhung-aphuii ro bran rog Masi ro miie pha ji ne khama rei chiih-è khama phiang chiih-è khama giu nane khama jam ji thieg pha blu mua bo. <sup>19</sup> Nathek ne hi pha miie khuchung de zab ne athieg mua magunde nathek thieg ruui phro chiih-è ji-è Hamangkhung-aphuii ro ziig shii zab le bo.

<sup>20</sup> Airo blu gethek shii blia rek pha ji ne gethek è lia muuii pha ji è chiih-è now ji è de bajo rek mua: <sup>21</sup> Hamangkhung-aphuii ro biisiie ne charch nane Masi Isu shii idang pha ishak um bo, chiih-è idang nane idang! Amen.

## 4

### *Siu pha òjia*

<sup>1</sup> Chiihphado gu nathek shii khung, nyieliieshii gu è Ithong blia rek pha Chiang è gu shii phatæg hà chab muuii pha ji ro: Nathek shii ho pha ishak shii Hamangkhung-aphuii è phrai ne ruui pha ji shii ji duiine chai sieng bo.

<sup>2</sup> Idang jum, mieng, nane zud rek bo. Nawaithek chung zud rai srane miie

doh yi bo. <sup>3</sup> Ragung è nathek shii lijiing è ò phang phi pha òjia shii ragia pha nawaithek ro wie ji rek bidiang bo. <sup>4</sup> Ichiih ne siu jia bie chiih-è Ragung jia bie ro. Ji duiine Hamangkhang-aphuii è nathek shii ho pha luthong jia bie ro. <sup>5</sup> Ichiih ne Ithong jia bie ro, migi jia bie, khowo jia bie ro; <sup>6</sup> Ichiih shii zab pha bran ro Hamangkhang-aphuii nane Aphuii ne jia bie ro, ai ne zab pha Ithong ro, zab re-è blia rek ne chiih-è zab shii um ro.

<sup>7</sup> Gethek zab shii ne Masi è awai è yang ne nyie phi pha bajo wie lasen ji mua ro. <sup>8</sup> Jigigam shii yao pha duiine,  
 “Ai bajo giuthek hà wuii dun shii,

Zum ne ruii pha bajo shii ai è ai rog noh dun ro;

Ai è brantheek shii lasentheek phi marui.”

<sup>9</sup> Thuh shii, ai laziung wuii dun rone yao pha miyaosiu jine nyie ga? Hi pha miyaosiu ne ai ne igobi sohnyiak pha bajo luii shii wuii marui ro. <sup>10</sup> Ji-è hanyie yi buzam wuii pha ji ne laziung, hamangkhangtheek è de lakhung hà wuii dun ne airo um pha ji zab pha hamangnyiak rog shii zan dun ro. <sup>11</sup> Hine ai hanyie brantheek shii lasentheek phi muui pha ji ro;

Ai è giak shii guaphasamoytheek bow, giak shii chaigtheek rab, giak shii Mua yua pho rab, chiih-è giak shii Phasthartheek nane Masdotheek rab. <sup>12</sup> Ai è ji rek pha ji ne Masipho ro blia rek yi pha zab pha Hamangkhang-aphuii bran shii saro phi, nyieliieshii Masi ro siu ji rung pha rek. <sup>13</sup> Chiih-è ji-è gethek ne migi ò shii rek srane chiih-è gethek khani ne Dufuii Hamangkhang-aphuii hà rek; gethek de bran weg rey ne, bajo giu Masi ro ley giu jihà thok ruii phro. <sup>14</sup> Chiihphado, khasauthek è shau srane thelailthalai pha hasam khinrin pha bran miyao ji shii shau ne, hanyie è ithek ro thaluuu pha briaktheek ji è gai shii awie pha lumuii hà lua noh pha jihà ne gethek ne ani asi sha ro. <sup>15</sup> Jiphachiang shii, ragung pha miie è izai yao ne, gethek ne hanyie yi khrug Masi ro zab pha lumuii è sieng chid phro. <sup>16</sup> Ai phrai pha ji zab pha yoyo siu ichuathek ne ò shii rey ro, chiih-è zab pha rung ji è nyie phi pha rog shii zab pha siu ne ò rey bo. Ji-è zab yo ichua ji blia yi isiie è rek mage shii, zab siu ne sieng srane miie shii awailum ne rab dun.

### *Masi shii iwo chai*

<sup>17</sup> Chiihphado, Ithong beng è, gu nathek shii phriie phro: Migi-arekpho duine asieng rabo, hanyie è nowtheek yi pha ji ne adunmey pha ro <sup>18</sup> chiih-è hanyie khani yi igiia hà um lei ne. Itheek ne Hamangkhang-aphuii è phi pha chai shii ne mathang oi ro, chiih-è ithek ne zab athieg pho nane lawasdai ro. <sup>19</sup> Itheek ro wo pha than pha ji ne zab san dun ro; ithek ne awaithek zia pha blia shii zab phi muui chiih-è zab pha awie pha manatheek athung pha rek lumao ro.

<sup>20</sup> Jithek ne nathek è Masi Chiang dab pha ji asi ro! <sup>21</sup> Nathek ne izai ai Chiang yoijong iwa chiih-è airo luagiengpho duiine nathek ne izai Isu shii um pha ji de dajong ro. <sup>22</sup> Nathek è sieng pha ihèg nyie shii sieng yi pha ji è nathek ro ihèg lajia pha ji è ruang rek bo, ihèg lajia pha khinrin ne chiid pha ji è srobroyong ro. <sup>23</sup> Nathek ro lubuthek nane khanitheek ne jong pha iwo rab bo, <sup>24</sup> nyie yi Hamangkhang-aphuii mia ne zen ne awailum ne izai chai shii dong pha ji ne miang nane gang ro chiih-è ji pha iwo lajia shii guui bo.

<sup>25</sup> Chiihphado, khlam pha ne oi sha ro! Zab ne airo ijak migipho shii izai yao bo, nyieliieshii gethek zab ne Isu siu shii ne ò pha bran ro. <sup>26</sup> Nathek

lijieg arone, nathek ro lijieg ji è layog hà anoh yi rabo, chiìh-è idang inai lijieg ne arai rabo. <sup>27</sup> Sakhathong shii chua aphì rabo. <sup>28</sup> Nathek riaopho arone, ariao sha pha gak bo chiìh-è ji pha chiang shii, blià rek pha jao ne wiang ne awai chai shii isiie rai ne dusho shii nong phi bo. <sup>29</sup> Awie pha rey pha miyaogamthek ayao rabo, jimagungde ji è ne wie rey ne chiìh-è nyie chiid pha ji phi pha ji shii rab pha miyaogamthek yao bie bo. Ji-è nathek nyie yao pha ji ne nathek shii nuiiphothek shii wie rey yi bo. <sup>30</sup> Chiìh-è Hamangkhung-aphui ro Ragung So shii azo yi rabo; chiìh-è nathek shii Hamangkhung-aphui ne muspho rone Ragung è cheb rab ro, Zai yao dang Hamangkhung-aphui è nathek shii ichad rek phi pha Inai ne thok ruii phro. <sup>31</sup> Nathek ro khowthek, lajia nane lijieg pha ji ne ruang rek muii bo. Din ne aziak sha pha chiìh-è makhak-ariing, nyie shii magunde khiijai pha athan yi rabo. <sup>32</sup> Jiphachiang shii, jum rek ne gai shii bushun rek bo, chiìh-è Hamangkhung-aphui è Masi chiang nathek shii khung phi pha ji duiine gai jia shii khung phi bo.

## 5

### *Muchuang shii sieng*

<sup>1</sup> Nathek ne Hamangkhung-aphui bushun ani nyarey dang shii nathek de ai duiine rey pha bidiang bo. <sup>2</sup> Nathek chai ne miie shii phrai bo, Masi è gethek shii miie ne awai chai gethek shii phi ne chiìh-è rem now pha zid nane khlem ji è Hamangkhung-aphui shii sang yi.

<sup>3</sup> Nathek Hamangkhung-aphui bran nyarey dang ne, siulao pha, dinne awie pha blià, dinne giichak pha ji ne ibeng yie pha nyie miyaosiu thek shii de rangsua oi ro. <sup>4</sup> Chiìh-è nathek ne nyie yi zea, wie miyao shii suang chiìh-è zea miyao akhoh rabo. Jiphachiang shii nathek ne Hamangkhung-aphui shii laso phi bo. <sup>5</sup> Nathek shii izai yao hanyie jia de siulao, dinne zea chiìh-è giichak (Giichak ne jangbang sia pha duiine ro) Hamangkhung-aphui nane Masi ro Sajathua pha mathang amua ruii phro.

<sup>6</sup> Nathek shii gaithek è bi-ìe miyaogamthek yao ne akhin-arin yi rabo; hì ne nyieliieshii hì pha manathek ne Hamangkhung-aphui ro lijieg ne hanyie è aishii anuii pho shii thok ruii phro. <sup>7</sup> Ji-è ji duiine pha brantheek rog shii nyie de rek pha oi ro. <sup>8</sup> Nathek ne nawaithek shii igiia hà rai noh, jishii nathek Ithong ro bran rey pha iidoh shii nathek de muchuang hà rai pha brantheek duiine rey bo. <sup>9</sup> Hì pha muchuang ne zab ichua pha bajo wie, giangthek nane izai shii bukho yamiing yi ruii phro. <sup>10</sup> Ithong shii nyie khi-èrek ne nyuii yi pha nui pha bidiang bo. <sup>11</sup> Brantheek è rek pha adunmey pha mana igiia è rey pha manathek è yo rai bo. Jishii, ithek shii igiia è muchuang hà noh bo. <sup>12</sup> (Ithek è ug ne rek pha mana shii yao pha rangde izai hì ne bajo biwo ro.) <sup>13</sup> Chiìh-è zab pha mana shii fuang isang hà yie mage shii, chiìhphado ithek ro izai ziiig ne sang è dong khlei ruii phro. <sup>14</sup> Chiìh-è zab nyie yi sang dong khlei ruii pha jine muchuang rey ruii phro. Ji-è hì ne yaojong ro, “Sieng mage bo” men pho

chiìh-è iy pha ji è hòi mage bo,

Chiìh-è nathek lakhung shii Masi ne khlieng ruii phro.

<sup>15</sup> Ji-è nathek khi-èrek ne sieng chiid pha ji ne gayiig bo. Athieg pha brantheek duiine arai pha, jishii khua pha brantheek duiine sieng bo. <sup>16</sup> Nashii zab nyie jo um pha ji shii wie pha khoh bo, nyieliieshii duchung ne awie pha

inai ro. <sup>17</sup> Bi-è arey rabo, jishii Ithong è nashii nyie rek yi pha yang pha ji sow pha bidiang bo.

<sup>18</sup> Phuii niing ne athiig rabo, jine nashii buii rek bie phro, ji phachiang shii, Ragung è ley bo. <sup>19</sup> Nawaithek chung chiong pha ibai pha miyaogamthek è ibai è chiih-è ug pha ibaithek è yao rai bo; Ithong shii ibai nane sthun bai srane nawaithek lubu rog shii chiong bo. <sup>20</sup> Gethek ro Ithong Isu Masi beng re-è, Hamangkhung-aphuii Aphuii ro zab pha chiang shii idang laso phi bo.

### *Geythek nane yiythek*

<sup>21</sup> Nyieliieshii nathek Masi shii ilab rek rone, nawaithek chung phi rai bo.

<sup>22</sup> Yiythek, Ithong shii rek pha duine nathek de geythek shii phi muui bo.

<sup>23</sup> Chiih-è Masi è charch lakhung shii riichai rek pha duine geythek ne yiythek lakhung shii riichai nyarek mua. Chiih-è Masi awai siu ne charch shii ne awai è giawo rek ro. <sup>24</sup> Chiih-è ji-è charch re-è de Masi shii phi pha duine yiy nawaithek de zab geythek shii phi muui bo.

<sup>25</sup> Geythek de Masi è charch shii miie ne awairo chai phi pha duine, nawaithek yiy shii miie bo. <sup>26</sup> Ai è hì rek pha ji ne kho è sud ne so rab pha iidoh shii airo miyaogam ji è charch shii Hamangkhung-aphuii shii zid pha rek srane <sup>27</sup> charch ne zab khie rab ne— igang nane ichiig oi rone doh yi, chiih-è izea oi rone ichum oi rone chiih-è nyie biidiie oi rone chiih-è khiiriig rek srane awaishii phi muui. <sup>28</sup> Hò-aphuiithek nawaithek siu shii miie pha duine yiythek shii de miie bo. Hò-aphuii hanyie è yiy shii miie arone ai awai shii miie ara ro. <sup>29</sup> (Gethek hanyie de gethek siu shii akhijjai phro, ji phachiang shii gethek ro siu shii ne wang ne chiih-è gethek è gethek siu shii gayiig rek, Masi è charch shii gayiig pha duine; <sup>30</sup> nyieliieshii gethek ne airo siu pha bran ro.) <sup>31</sup> Jigigam shii yao, “Jipha chiang è gey ne awai aphuii amuii shii thoh ne yiy rog shii rai dun phro, chiih-è isa ne jia rey dun phro.” <sup>32</sup> Ichiih shii bajo jam è ug ne ruii pha izai ne hì pha jigigam è dong ro, Masi nane charch shii rek pha ji ne nyie gu è thieg pha ji ro. <sup>33</sup> Jishii hì ne nathek shii de yao ro: Zab gey ne yiy shii nawai shii duine miie bo, chiih-è zab yiythek ne gey shii ilab phi bo.

## 6

### *Aniphiing nane aphuii-amuiithek*

<sup>1</sup> Aniphiing, aphuii-amuii shii nuui phane nathek ro Masipho pha blia ro, chiih-è hì rek phane izai blia ro. <sup>2</sup> “Nawaithek aphuii-amuiithek shii ilab phi pha ji” hìne igobi pha muyung Hamangkhung-aphuii sbang shii cho phi ro: <sup>3</sup> “Ji-è zab ne na rog shii wie wuii mua, chiih-è nane soh shii phiang ishak sieng ruii phro.”

<sup>4</sup> Amuii-aphuiithek, nawaithek aniphiing shii lijieg yi pha blia arek rabo. Jiphachiang shii, Masipho pha wie ji yua srane sieng yi bo.

### *Khiaothek nane musphothek*

<sup>5</sup> Khiaothek, nawaithek tharothamang pha musphothek shii rum ne sam ne nuui bo; chiih-è nathek è Masi ro blia rek pha duine, nawaithek lubu è izai rek bo. <sup>6</sup> Nathek shii riig pha blia ji arek bie rabo, nyieliieshii nathek ne nathek nuui pha ji yang pha now phro. Jimagungde Masi pha khiao duine Hamangkhung-aphuii è nyie yang pha ji ne nawaithek lubu è rek bo. <sup>7</sup> Chiih-è bran shii arek bie pha, nawaithek blia ne Ithong shii rek pha duine, chiih-è sang khiao duine rek bo. <sup>8</sup> Nowkhlei bo hanyie è blia wie rek pha ji shii



ne, Hamangkhung-aphuii è gethek zab shii lasen phi ruii phro, khiao shii magungde chiih-è ichad shii magungde.

<sup>9</sup> Muspho, hì duiine rek ne nawaithek khiaothek shii awie pha arek rabo. Nowkhlei bo khiao nathek ne hamangkhung hà hanyie è zab shii ò chua ruii pha muspho ne ò bie ro.

### *Hamangkhung-aphuii pha zab mak pha yugiang*

<sup>10</sup> Idohhè, nawaithek chua ne Ithong rog shii ò rek ne chiih-è airo riichaiboh blu ji shii rab bo. <sup>11</sup> Hamangkhung-aphuii è phi pha zab suang pha yugiang ji guii bo, ji-è na ne Sakhathong ro awie pha briakthek suang ji è chuh rai mua phro. <sup>12</sup> Chiih-è gethek ne tharothamang è suang mak arek ro, jishii awie pha hamangkhung pha sohjambling shii bohkhohphothek, riichaithek, nane soh pha bluthek ji pha igiia sohjambling shii mak rek bo. <sup>13</sup> Ji-è thuh shii Hamangkhung-aphuii ro mak pha yugiang guii bo! Ji-è awie pha inai thok mage shii, nathek ne suangpho è jo ji shii nyagieng mua phro; chiih-è iidohè thok pha mak rek pha idoh, nathek ne nawaithek ithua shii chuh rek ne riu ruii phro.

<sup>14</sup> Ji-è nawai rinyie shii izai rathang riieng ne, chiih-è giang nane lubutho pha khug miak ne, saro ne riu bo, <sup>15</sup> chiih-è nawai lakhia khia ne liijiang pha Mua Wie yao pha saro bo. <sup>16</sup> Idang pha ishak migi shii ne khug duiine han bo, chiihphado nathek ne zab pha Sakhathong ro hòi ne reg pha medthek ji shii ua mua. <sup>17</sup> Chiih-è giawo shii khuthung duiine thung bo, chiih-è Ragung è nathek shii phi pha khamriie duiine Hamangkhung-aphuii miyaogam shii de wad shii choi bo. <sup>18</sup> Hithek zab ne misia rog shii rek ne, Hamangkhung-aphuii pha nong shii lia bo, chiih-è Ragung è noh dun pha duiine zab pha ishak shii sia bo. Jiphachiang è nowbthan ne khuchung magungde athoh rabo; Hamangkhung-aphuii pha branthek shii idang sia bo. <sup>19</sup> Gu yao pha saro mage shii Hamangkhung-aphuii è gu shii mua phi yi pha gu shii de sia mage bo. Ji-è gune ug ne ruii pha mua ji thieg yi pha lububo rek ne yao mua. <sup>20</sup> Hìpha mua Chiang è gune khliie ro, jimagunde thuh shii gune phattheg hà um magunde. Gune mua shii lububo è yao chiid pha ji shii yao mua pha sia mage bo.

### *Idohhè pha salamthek*

<sup>21</sup> Thaichikus, Ithong pha blia shii gathek ro bushun khuiino nane isiie khiao è gu Chiang pha mua zab phi pha ji yao ruii phro, Ji-è gu rog ne khi-èrek pha ji nathek ne thieg ruii phro. <sup>22</sup> Jiphachiang è gathek ne nyie khi-èrek reyramuui pha ji nane nathek shii lububo rek phi pha gune aishii nathek hà thoh ge ro. <sup>23</sup> Hamangkhung-aphuii pha Aphiuii nane Ithong Isu Masi è zab pha migipho shii liijiang nane migi rog pha miie ji phi bo. <sup>24</sup> Hamangkhung-aphuii ro bushun ne zab hanyie è gathek Ithong Isu Masi rog pha miie ne khuchung de a-iy pha miie pho rog shii um bo.

## PHILIPHITHEK Shii Phaul Re-è Jigigam Yaophi

Phaul ro Jigigam Philiphithek shii zey pha ji ne Masedonia du-ua pha Roman European nyiak shii Phaul è igobi rab pha charch shii zey. Hi ne guaphasamoy phatæg hà um muui shii zey, chiih-è hi ne gai Masipho bliaphothek pha suang è awai shii diig phi mage pha ishak shii chiih-è Philiphi pha charch shii biidiie pha muyua ji è diig rey dun. Thuh de hì pha jigigam è lubo yi chiih-è Isu Masi shii Phaul ro jam migi ji è nyayao mua.

Jigigam Khthiie zey pha chiang ne Philiphi Masiphothek è airo chid pha ishak shii ithek è aishii nong phi pha lasen thoh ge pha chiang è laso phi. Ai è awai ro ishak shii khoh srane ithek izai rek yi, ji è ithek ne airo diigchiaothek shii nane awaithek ro wie shii lububo rek ne izai now yi. Ai è ithek shii munyua miiyang nane wiangwe shii phrai mua pha jum ziiig ne Isu shii um bone khung. Ithek ro chai Masi rog shii um pha ji ne Hamangkhung-aphuii ro bushun lasen rone ai è ithek shii nowkhlei yi, Jewthek ro Iphey ji è mua pha asi pha nyie ji ne ithek è migi è muage ro. Ai è hanyie yi Masi rog shii ò sieng pha ji shii ne Hamangkhung-aphuii è lubo nane liijiing phi rone zey ro.

Hì pha jigigam ne lubo, luthong, ò jia nane zud ne Masipho migi nane chai shii chuh rek bone gang è cheb rek phi. Hì de Phaul è Philiphi pha charch shii jam è miie rey rone dong phi ro.

### **Iliing shii um pha ji**

Yaophi (1:1-11)

Phaul awairo Ishak (1:12-26)

Masi shii chai (1:27; 2:18)

Thimothi nane Ephaphrodithus ro muphak (2:19-30)

Makphothek nane buiithek shii phriie (3:1; 4:9)

Phaul nane airo Philiphi pha ijakthek (4:10-20)

Jongsha (4:21-23)

<sup>1</sup> Masi Isu ro khiaothek Phaul nane Thimothi re-è—Hamangkhung-aphuii ro branthek Philiphi shii rai pho hanyie yi Masi Isu rog shii ò rek pha, Charch pha dumuiithek lao ne chiih-è nongphothek shii de:

<sup>2</sup> Hamangkhung-aphuii gathek ro Aphuii nane Ithong Isu Masi è nathek shii bushun nane liijiing phi bo.

*Phaul è airo thampho shii sia*

<sup>3</sup> Gu idang ishak nathek shii now shii gu ne gui Hamangkhung-aphuii shii nathek chiang laso phi;

<sup>4</sup> Chiih-è gu zab ishak nathek zab shii sia shii, gu ne lubo rog shii sia  
<sup>5</sup> nyieliieshii nathek è igobi è thuh thog pha mua pha bliia shii nathek è gu shii nong phi ro. <sup>6</sup> Ji-è thuh gu ne thieg Hamangkhung-aphuii hanyie è hì pha wie bliia ne nathek duchoi jao pha ji ne, Masi Isu pha Inai ajong sapho shii ne rek ne rai ruii phro. <sup>7</sup> Nathek ne idang gu lubu shii um ro! Chiih-è gu rek pha nathek chiang shii than pha ne gu shii khriig um bie ro. Chiih-è Hamangkhung-aphuii è gu shii phi pha jo shii thuh gu ne phatæg hà um shii chiih-è fuang hàne mua shii ragia rek pha nane chuh è rab shii de nathek

zab ne mathang um ro. <sup>8</sup> Gu ne izai yao rone Hamangkhung-aphuii ne guro khagi ro, gu è nathek Chiang guro jam than rone yao mage shii zab ne Masi Isu awai lubu è thog ruii phro.

<sup>9</sup> Gu ne sia nathek ro miie ne ò rog shii izai khani nane isiie chua ne muna è muna rey ruii ne, <sup>10</sup> ji è nathek ne nyie yi zab è wie ji gua muui ruii phro. Chiiphado nathek ne gang rey ne the pha Masi ro inai è ichad rey ruii phro. <sup>11</sup> Hamangkhung-aphuii ro chiong nane biisiie Chiang pha nathek ro chaithek ne wie pha ichuathek nyie yi Isu è rek mua bie pha ji è zan ro.

### *Sieng pha ne Masi ro*

<sup>12</sup> Gu nathek shii thieg yi pha yang ro, gu ijakthek, gu shii rey pha manathek ne izai mua shii ibi shii yi pha nong ro. <sup>13</sup> Idohhè shii, zab saja ro hò pha arming nane zab gai ichiuh um pha ji ne gu phattheg hà um rone thieg nyieliieshii gu ne Masi ro khiao ro. <sup>14</sup> Chiuh-è gu phattheg hà um pha ji ne bajo migipothek ne Ithong shii muna lububo rey dun, ji è ithek ne zab pha ishak shii mua ne arumdang pha yua\* pha lububo rey dun.

<sup>15</sup> Zai ji ne ithek gai ne Masi ji yua nyieliieshii miegriie pha nane gui, jimagunde gai ne wie yang pha ji è rek. <sup>16</sup> Ji rek pha ji ne miie è ro, nyieliieshii ithek ne thieg Hamangkhung-aphuii è gu shii ne mua shii ragia rek pha blia phijong ro. <sup>17</sup> Gaithek ne Masi shii isiie è ayao ro, jimagunde munyua miyyang pha ragung è; gu phattheg hà ba shii ithek ne gu shii muna diig phi ruii pha rek.

<sup>18</sup> Hi ne nyie miyao de oi ro! Masi ro yua pha ji shii ne asi pha now magunde si pha now magunde zab rey now pha jine athodang pha sang ro— Chiuh-è gu ne idang sang ruii <sup>19</sup> nyieliieshii naro misiathek re-è chiuh-è Isu Masi ro ragung è nyie nong gu shii rek pha ji è ichad rek phi ruii phro ne gu thieg ro. <sup>20</sup> Guro jam chid pha ji nane luthong ne guro blia shii gu ne khuchung de buyud arey yi pha, jimagunde idang pha ishak, chiuh-è thuh shii, gu ne ley lububo rek chid, ji è guro zab pha blia shii guro chai shii sieng magunde iy magunde gu ne Masi shii biisiie rek chid. <sup>21</sup> Chiuh-è guro chai ne nyie lei? Gu sieng pha ne Masi bey. Chiiphado, iy pha ji ne gu shii phua ro <sup>22</sup> Jishii athodang pha ji è sieng arone wie blia muna rek mua, chiiphado gu ne ayao mua gu ne nyie gua chid. <sup>23</sup> Gune ithua nyi shii ri. Gune hipha chai thoh ne Masi rog shii muna sieng pha now ro, nyie yi zab è wie mana ro; <sup>24</sup> Jishii nathek Chiang shii gu ne isieng rai pha mugak ba ro. <sup>25</sup> Gu ne hi nyayao mua, chiuh-è ji è gu ne thieg gu ne rai. Nathek ro Migi shii lubo nane ibi rey pha ji shii pha chodo phi pha, gu ne nathek rog shii rai ruii ne, <sup>26</sup> Ji-è gu nathek rog shii dinne um mage shii, nathek shii nathek ro chai Masi rog shii um pha Chiang shii gu Chiang shii wiangwe ne muna rek pha Chiang um phro.

<sup>27</sup> Thuh, mugak pha mana ne hi ro nathek ro chai ne Masi ro mua duine um chid, ji è dinne gu nathek shii riig pha awuii mua magunde, chiuh-è jia chid pha ji shii nathek ne mua migi shii ò mak rek muui rone chiuh-è nathek ne blia jia shii chuh è riu rone gu ne yoi ruii phro. <sup>28</sup> Nawaithek ro mak shii arum chid rabo; idang lububo rek bo, chiuh-è hi ne khagi rek ruii phro ithek ne mua dun chiuh-è nathek yang ruii phro, nyieliieshii hi ne Hamangkhung-aphuii è hanyie shii yang phi ruii phro. <sup>29</sup> Nathek shii ne Masi ro blia rek pha jò phijong ro, aishii migi rek bie pha ji asi ro, jishii ai Chiang shii diigchiao

zud rek pha phi phro. <sup>30</sup> Thuh shii nathek de mak hà gu rog shii ichua nyayie mua phro. Igobi gu è mak rek pha ji nathek è doh pha mak ò ji ro, chiih-è nathek yoi pha gu thuh de mak rek ramuii pha jia ji ro.

## 2

### *Masi ro jum nane bohthek*

<sup>1</sup> Nathek ro chai shii Masi è nathek shii gang rab phi, chiih-è airo miie è nathek shii liijiing rek phi. Nathek ne Ragung\* rog shii ò rek bo, chiih-è nathek ne nawaithek chung bushun nane zo rai bo. <sup>2</sup> Chiihphado, gu nathek shii khung, ò nowthek, ò miie shii thang rai, chiih-è ragung nane khani shii ò rek ne gu shii zab sang yi pha rab mage bo. <sup>3</sup> Nyigodog rek pha munyua miiyang nane buii chid pha ji arek rabo, jimagunde nawaithek chung jum rek rai bo, idang nawaithek shii è ne gai wie ba rone now bo. <sup>4</sup> Chiih-è nawai shii asi bie pha, nawaithek chung nyu rai pha ji shii riig bo. <sup>5</sup> Nathek shii nyie ziig um pha ji ne Masi Isu shii um pha jia ji ro:

<sup>6</sup> Ai ne idang Hamangkhung-aphuii shii ziig um,  
Jishii ai ne Hamangkhung-aphuii rog shii ò rek pha bangchiie anow† ro.

<sup>7</sup> Ji pha Chiang shii awai ro thaluii yang ne awai  
shii nyie um pha ji zab thoh muui chiih-è khiao pha ziig yie.

Ai ne tharothamang duiine re srane  
chiih-è tharothamang duiine dong khlei

<sup>8</sup> Ai ne jum chiih-è iy bsa thog dang pha— nuii pha lumuii shii lua  
chiih-è bai hà iy bsa thog dang pha de nuii pha lumuii shii lua

<sup>9</sup> Ji pha Chiang shii Hamangkhung-aphuii bajo giu ithua lakhung shii aishii  
hò phi  
chiih-è gai è boh ibeng aishii phi muui.

<sup>10</sup> Chiih-è ji è Isu beng shii  
hamangkhung shii um pha ji, sohjambling shii um pha ji,  
chiih-è sohniak pha ji shii ne ai lagiungthek shii niing ‡ ruii phro.

<sup>11</sup> Chiih-è Hamangkhung-aphuii pha Aphuii ro biisiie pha,  
Isu Masi Ithong rone zab ne hong ne yao ruii phro.

### *Sohjambling shii muchuangthek duiine khlieng bo*

<sup>12</sup> Ji-è chiihphado, bushun ijakthek, gu nathek rog um shii nathek è gu shii idang nuii phi, thuh gu nathek è ruang shii nathek gu shii nuii phi pha ji ne muna mugak ba ro. Nawaithek ro giawo ji zab rek pha rum ne sam pha rog shii rek bo, <sup>13</sup> nyieliieshii Hamangkhung-aphuii ne idang nathek shii blia rek ne chiih-è yang rab ne awairo blia shii nuii yi pha rab phi ro.

<sup>14</sup> Phosro nane akhnaing pha zab rek bo, <sup>15</sup> ji è nathek ne hanyie yi awie pha sohjambling nane layog bran shii rai pha ji è, ichiig oi pha nane igang Hamangkhung-aphuii ro isiie ani rey bo. Nathek è chai pha mua itheek shii phi pha duiine, nathek ne hamang hà dadiangthek chuang pha duiine ithek lakhung shii khlieng chid. <sup>16</sup> Ji-è nathek rek arone, Masi pha Inai shii nathek shii wiangwe rek pha Chiang um ruii phro, nyieliieshii hì è ne zab gu miwiang nane blia ne adobo arey rone doh yi phro.

**1:30** 1:30: Blk 16:19-40 \* **2:1** 2:1: Nathek ne Ragung rog shii òsia um ro; dinne Ragung è nathek shii ò sia hà noh phi ro. † **2:6** 2:6: noh din yi; dinne dun ruii, thogruui. **2:10** 2:10,11: Aij 45:23 (LXX) ‡ **2:10** 2:10: sohjambling luui: hamangkhung shii um pha ji, soh shii um pha ji. **2:15** 2:15: Iphy 32:5

<sup>17</sup> Yangne guro chai ifai sun phi pha duiine khlem phi shii nathek ro migi yi Hamangkhung-aphuii shii phi bo. Ji-è ji ne ji arone, guro lised ne guro lubo ne nathek zab rog shii thang. <sup>18</sup> Ji duiine, nathek ne lised bo chiih-è nathek ro lubo ne gu rog shii thang bo.

### *Thimothi nane Ephaphrodithus*

<sup>19</sup> Hi yi Ithong è yang arone, gu ne luthong Thimothi shii khthiie gu ne nathek hà thoh mua, ji è gu ne nathek Chiang pha mua è lububo rek. <sup>20</sup> Ai ne jia ro hanyie è gu muthantheK shii thang chiih-è hanyie yi izai nathek Chiang shii gayiig phi. <sup>21</sup> Zab ne awaithek ro phua shii samdiig bie ne, Isu Masi Chiang rog shii asi ro. <sup>22</sup> Chiih-è ai ne awairo blia ne igong shii nyie khi-èrek ne khagi rek pha ji nathek nawaithek ne thieg, nyie khi-èrek ne ai nane gune, dufuii nane awai aphuii duiine mua Chiang shii ò blia rek. <sup>23</sup> Ji-è gu ne thieg nyie khi-èrek ne zabtheK ne gu Chiang thog ruii ne aishii ne nathek hà khthiie thoh ge pha gu ne luthong ro. <sup>24</sup> Gu gui ne nathek shii khthiie wuii mua ruii phro ne gu ne Ithong shii migi rek.

<sup>25</sup> Gu è nowjong gathek ro ikhuii Ephaphrodithus shii nathek hà thoh ge phane mugak ro, hanyie yi blia rek ne gu Chiang shii ragung pha mak rek ne hanyie yi nathek ro muapho duiine gu shii nong phi ne blia rek phi ro. <sup>26</sup> Ai ne nathek zab shii bajo riig yang chiih-è bajo samdiig rek nyieliieshii ai ne rad muui rone nathek ne yoijong.

<sup>27</sup> Zai ai ne rad ne achihi iy pha rek ro. Jishii Hamangkhung-aphuii aishii bushun rek, chiih-è aishii asi bie pha jimagunde gu shii de rek phi, chiih-è dinne muna duhug shii de ragia rek phi. <sup>28</sup> Chiihphado, gu ne aishii nathek hà thoh ge pha zab muna yangmuui ro, ji è nathek ne dinne aishii riig mage shii lised ruii phro, chiih-è gui ro duhug ne jongdun ro. <sup>29</sup> Chiihphado, Ithong shii khuiino duiine, lubo rog, aishii choi bo. Ai duiine rek pha zab bran shii ilab doh yi bo. <sup>30</sup> Nyieliieshii ai ne nawaithek è aphi mua pha nong ji gu shii phi pha, awai chai shii Masi ro blia Chiang è achihi iy pha jiriak rek.

## 3

### *Zai giangtheK*

<sup>1</sup> Jong sha, gu ijaktheK, nawaithek ro Ithong shii ò pha ji shii lubo rek bo. Gu è igobi shii nyie zey pha ji zey din pha ne gu buii anow, chiih-è gu rek chak arone nathek shii ne ragia rek ruii phro. <sup>2</sup> Hanyie è ji pha awie pha jithek shii rekpho shii, jithek pha chiietheK shii, hanyie è siu shii laig pha bangchiie rek pho wie è riig bo. <sup>3</sup> Hanyie è izai migiangkheg pha ji mua pha hì ne gethek ro, ithek asi ro, chiih-è gethek è airo Ragung è Hamangkhung-aphuii shii misiasia chiih-è gethek chai Masi Isu rog shii ò um pha ji shii sang ro. Gethek ne fuang pha migiangkheg pha ji shii ne migi arek ro. <sup>4</sup> Gu ne jithek pha zabtheK shii migi shii rek mua pha de um phro. Nathek è hanyie jia yi fuang pha migiangkheg pha ji shii migi rek mua phro ne now arone, ji shii than phane gu ne muna Chiang um ro. <sup>5</sup> Gune habda rey shii, gu shii ne migiangkheg muui. Gu ne IsraeltheK è giak pha, igang ifai Hebrew, Benjamin jad ro. Jewish Iphey è yao ne, nya ruii dang shii, gu ne Pharisi, <sup>6</sup> chiih-è gu è charch shii diigchiao phi pha ji shii bajo miegriie. Iphey pha muyungtheK ji nuui ne brantheK ne giang re arone, gu ne ichiig oi ro. <sup>7</sup> Jishii jithek pha manatheK shii gu è phua rone tham pha ji ne thuh gu tham shii Masi Chiang

adubo rey dun ro. <sup>8</sup> Jithek pha mana ji asi bie pha, nyie yi mana gunchid pha gu Ithong Masi Isu pha khani Chiang è, gu ne zab ne adubo tham dun ro. Ai Chiang è gu ne zab thoh muui; gu ne zab shii izea-ikho duine now muui, nyieliieshii gu ne Masi shii yang mua <sup>9</sup> chiih-è ai rog shii zab ò rek mua. Gu ne guilum ne giangthek oi ro, jithek pha ichua ne Iphey nuui pha ji è mua ro. Gu shii thuh giang um pha ji ne Masi shii migi ji è phi, giang ji ne Hamangkhung-aphuii è thog ruui chiih-è migi Chiang è ro. <sup>10</sup> Zab gu è yang pha ji ne Masi shii thieg bo chiih-è airo hòi pha blu shii than mua chiih-è airo diigchiaothek shii thang bo chiih-è airo iy pha ji shii ai duine rey bo. <sup>11</sup> Luthong ji è gui ne iy pha ji ne chai è hòi ruui phro.

### *Jieg shii ran bo*

<sup>12</sup> Gu ne zab yang ge dinne zab khriig sha rone ayao ro. Gu ne nyie yi Isu Masi è awailum ne gu shii yangjong pha lasen ji yang pha bidiang ramuii ro.

<sup>13</sup> Ji chak, gu ijakthek, gu ne yangjong rone izai anow ro; \* mana jia ne gu è rek, jimagunde, gu iidoh shii um pha ji bia srane nyie yi ibi um pha ji thog pha gu ne bajo bidiang rek. <sup>14</sup> Nyie yi Hamangkhung-aphuii è chai lakhung shii Masi Isu Chiang è ho pha, jieg ji mua pha gu ne miang ran ro.

<sup>15</sup> Zab gethek ne hanyie yi luruak iweg pho ne ò now bo. Jishii nathek gai yi yoh now um arone, Hamangkhung-aphuii è ji nathek shii sang rab phi phro. <sup>16</sup> Jishii, ji ne yangne, cho gethek ne ò khothek shii thuh thog pha gethek nuui luagieng pha ji shii ibi lua haro.

<sup>17</sup> Gu shii nuui bo, gu ijakthek, gathek è nathek Chiang khriig pha miiriig hanyie è luagieng pha ji shii wie yoi bo. <sup>18</sup> Gu è hì ne dohbi hà blebbleb yaojong, chiih-è thuh gu ne miengkothek rog shii yao din: Ichihi ne bajo hanyie ro chaithek ne Masi bai hà iy dun pha ji shii bajo suang rab ne ruui ro.

<sup>19</sup> Ithek ne thumuluii hà jong ruui phro, nyieliieshii ithek ro hamangkhung-aphuii ne ithek ro siu è chid pha ji ro. Ithek ne ithek è nyie wo chid pha ji shii wiangwe rek, chiih-è ithek ne ichiih sohjambling è re pha mana jia ji shii now bie ro. <sup>20</sup> Jishii, gethek, ne hamangkhung pha bran ro, chiih-è gethek ne gethek ro Ragiapho, hamangkhung è wuii ruui pha Ithong Isu Masi yang ne khan phro. <sup>21</sup> Ai ne, blu è zab pha manathek awairo khoh pha iliing shii yie mua pha ji è khoh ne gethek ro zia iy pha siu shii lai ruui ne ithek shii awairo biisiethek siu duine rab ruui phro.

## 4

### *Muyungthek*

<sup>1</sup> Ji-è, chiihphado, gu khuiinothek nane bumuiithek, nathek ne gu shii khama bushun rek chiih-è gu ne nathek shii bajo now muui ro! Nathek è gu shii bajo sang yi ne khama nathek Chiang shii gu shii wiangwe rek yi ro! Hì ne chiihphado, gu khuiinothek, nathek ro chai ne Ithong shii khi-èrek ne chuh riu muui pha ji ro.

<sup>2</sup> Euodia nane Synthyché, gu nathek shii khung, Ithong shii ne bumuiithek duine nuui phi bo. <sup>3</sup> Chiih-è na shii de, guro isiie ijak, nathek ne hì pha hò-amuii shii nong phi bone gu yang muui ro; nyieliieshii isa ne Khlementh nane zab gai guro ijak bliaphothek hanyie ro ibeng yi Hamangkhung-aphuii ro

\* 3:13 3:13: asi; giak jigizey shii um thuh de asi. 3:17 3:17: 1Khor 4:16; 11:1

chai pha siog shii um pha ji shii, chiih-è gu rog mua shiyy pha ji shii snak ne bliã rek gieng.

<sup>4</sup> Nathek ro ò Ithong rog shii um pha ji ne idang lubo rek bo. Gu dinne yao: sang bo!

<sup>5</sup> Zab shii jum ziig doh yi bo. Ithong ne khthiie wuiiramui ro. <sup>6</sup> Nyie Chiang shii sam-adiig rabo, jimagunde naro zab pha misiathek shii na nyie chid pha ji shii lia bo, idang aishii ne laso pha lubo rog shii lia bo. <sup>7</sup> Chiih-è Hamangkhang-aphuii ro lijiing, nyie yi tharothamang è gao pha ji è muna ruang, Isu Masi rog shii ò pha ji shii nawai ro lubuthek nane khanithek shii ragia ruii bo.

<sup>8</sup> Jongsha shii, gu ijakthek, nyie yi wie nane chiong pha ji duine rey mua pha: Izai pha manathek shii, giu, rangsua, igang, miie, nane ilab yi nawaithek khani rog shii zan bo.

<sup>9</sup> Nyimanyi guro miyaogamthek nane guro bliathek, chiih-è nathek ne gu è nyie dab nyie choi pha ji ne nui ne ruii bo. Chiih-è Hamangkhang-aphuii hanyie è gathek shii phi pha lijiing ne nathek rog shii um bo.

### *Lasen pha Chiang shii lasotek phi bo*

<sup>10</sup> Guro chai Ithong rog shii ò um pha ji hì ne gu shii boh lubo rek ne ji pha bajo ishak iidoh shii nathek ne gu shii gayiig rone luang jia doh yi pha jo um ro. Nathek ne gu shii gayiig pha gak muu rone gu ayao ro— nathek ne hì doh yi pha jo ne oi sha ro. <sup>11</sup> Chiih-è nyieliieshii gu ne snai pha than rone ayao ro, chiih-è gu shii nyie um pha ji shii liingsed pha dabjong ro. <sup>12</sup> Gu ne dusho rey pha ji de nyathieg muu chiih-è bajo huak ne um pha ji shii de nyathieg muu. Ji-è khihà de, khi pha ishak hà de, gu ne hì pha ug pha ji shii dabjong, gu ley dinne chi-iy-iy magunde, gu ne bajo dinne lujia magunde, gu ne liingsed ro. <sup>13</sup> Gu ne Masi è gu shii phi pha blu è zab shii nyarek mua.

<sup>14</sup> Jishii nathek è guro diigchiaotek shii nong phi pha ji ne bajo wie ro. <sup>15</sup> Mua wie yao pha inaithek ibi hà gu è Masedonia thoh maruii ne dun pha ji ne Philiphi nathek ne bajo wie è thieg, nathek ne gu shii nong phi pha charch ji bie; guro phua pha nane chun pha shii thang pha ji nathek bie ro.

<sup>16</sup> Gu ne blebbleb Thesalonikha hà nathek nong ched mage shii, nathek è ji gu shii thoh ge. <sup>17</sup> Hì ne gu lasenthek mua bie pha yang pha asi ro; ji pha Chiang shii, gu ne nathek sasab shii phua ji chodo phi pha yang ro. <sup>18</sup> Ichiih, chiihphado, nathek è zab gu shii phi pha ji ne guro sasab ro— Chiih-è hì ne bajo cho sha ro! Nathek ro zab lasenthek Ephaphrodithus è yie ne gu shii yie phi pha ji ne thuh gu nyie chid pha zab ji ne rey sha ro. Khlem pha nyie yi nuii sbo pha chiih-è aishii sang yi pha, ithek ne rem no pha ji yi Hamangkhang-aphuii shii zid pha ji duine ro. <sup>19</sup> Chiih-è Masi Isu Chiang airo zab nuruii ley phi pha ji, guro Hamangkhang-aphuii è nathek chidtek shii zab phi ruii phro. <sup>20</sup> Gathek ro Hamangkhang-aphuii nane Aphuii ro biiie ne idang nane idang re bo! Amen.

### *Idohhè pha salamtek*

<sup>21</sup> Hanyie yi Masi Isu è rey pha Hamangkhang-aphuii pha brantheke zab jia shii salam ro. Ichiih gu rog shii um pha migiphothek è de nathek shii salamtek ren ge ro. <sup>22</sup> Hanyie yi Bisiu ithua è rey pho shii, Ichiih pha zab Hamangkhang-aphuii ro brantheke è salamtek ren ge ro. <sup>23</sup> Ithong Isu Masi ro bushun ne nathek zab rog shii rey bo.

## KHOLOSITHEK Shii Phaul Re-è Jigigam Yao phi

Phaul ro jigigam Kholosithek shii zey pha ji ne Iphibus pha bichiu Asia Minor pha du-ua Kholosi charch shii zeyjong ro. Ji pha charch ne Phaul è rung pha asi ro, jishii ji pha sohtua ne Phaul è airo gaja rone than, ji è ai è Roman iliing pha soh Asia rajan pha Iphibus è bliapho thoh ge. Phaul è yoi shii Kholosi pha charch shii ne biidiie pha masdothek um hanyie è Hamangkhung-aphuii shii thieg pha nane ley giawo um pha khalo shii ne luruak khohphothek nane riichaithek jia shii sia bie chid phro ne yua ramuii. Ji pha rog shii, ji pha masdothek è yao. Migiangkheg ne michiethek Chiang shii nane gai miyaothek shii ne wie è nuui ne gang è bokhoh chid.

Ji pha muyuathek shii suang rek pha Phaul è izai masiphothek mua ji è zey. Airo muchang ji è Isu Masi ne ley giawo phi mua chiih-è ji pha gai migithek nane dabthek ai è ruang noh muui phro. Masi Chiang Hamangkhung-aphuii è sohjambling shii zen, ai Chiang è ji shii iidoh yie din. Sohjambling giawo luthong ne Masi shii ò pha ji è ro. Chiihphado Phaul è migiphothek pha chaithek shii ji pha boh muyuathek shii lua ne zey phi.

Hì ne Thychikus shii isiie rek chid, hanyie yi hì pha jigigam Phaul Chiang shii Kholosi hà yie phi shii Onesimus de ò shii um, Philimon ro khiao Chiang shii Phaul è philimon shii zey.

### **Iliing shii um pha ji**

Yaophi (1:1-8)

Ziig nane Masi ro blia (1:9; 2:19)

Masi shii iwo chai (2:20; 4:6)

Jongsha (4:7-18)

<sup>1</sup> Phaul re-è, hanyie yi Hamangkhung-aphuii miyyang ne Masi Isu ro guaphasamoy ji nane gethek ro khuiino Thimothi—

<sup>2</sup> Hamangkhung-aphuii ro bran Kholosi pha, hanyie yi gathek ro migi ijakthek Masi rog shii:

Gathek ro Hamangkhung-aphuii è nathek shii bushun nane liijiing phi bo.

### *Laso pha misia*

<sup>3</sup> Gathek è nathek shii sia shii, gathek ne idang gethek ro Ithong Isu Masi Aphuii pha Hamangkhung-aphuii shii laso phi. <sup>4</sup> Chiih-è gathek ne nathek ro migi Masi Isu shii nane nathek ro miie ne zab Hamangkhung-aphuii bran shii um ro ji de yoi muui ro. <sup>5</sup> Zai mua nyie yi Mua Wie ji igobi nathek shii thog, ai è zid pha luthong Chiang ne nathek è yoi. Ji è nathek ro migi nane miie yi hamangkhung hà ragia rek ne ruui phi pha luthong shii rai ro. <sup>6</sup> Chiih-è hìne nathek duchoi shii, nathek ne igobi pha inai è Hamangkhung-aphuii ro bushun Chiang shii yoi chiih-è hìne nyie khi-èrek pha izai rone thieg pha duine mua ne khirzey yie ne chiih-è zab pha sohjambling shii shiyy lumao muui ro. <sup>7</sup> Nathek ne Hamangkhung-aphuii ro bushun ne, hanyie yi gathek \*duchoi pha Masi ro isiie bliapho Ephaphras, gathek ro ijak khiao ji è thieg ro. <sup>8</sup> Ai è gathek shii Ragung è nathek shii phi pha miie ji yao phi ro.



<sup>9</sup> Chiih-è ji pha Chiang è gathek ne nathek Chiang yoi pha ji è yie ne idang nathek shii sia phi, gathek ne Hamangkhang-aphuii shii sia, nathek shii de airo Ragung phi pha awailum pha khani, gao nane khani ji zan phi bo. <sup>10</sup> Chiihphado nathek ne Hamangkhang-aphuii è chid pha duine rai mua, chiih-è nathek ne ai nyie sang pha wie blia ji idang rek mua. Nathek chai shii de zab pha wie blia è se ruii, chiih-è nathek ne Hamangkhang-aphuii ro khani è sieng ruii. <sup>11-12</sup> Nathek ne nyie airo biisiie boh blu è thog pha chuh pha rog shii gang ji rek phi, ji è nathek ne lubuphiang pha rog shii zab zud mua. Chiih-è lubo rog shii Aphuii shii laso<sup>†</sup> phi mua ruii phro. Hanyie shii nawairo mathang mua spho rek phi pha ji shii ne Hamangkhang-aphuii è awai branthek ro nyie shii isang pha Sajathua hà ong ne ruii phi ro. <sup>13</sup> Ai è gethek shii riichai igia è ragia rek phi srane Sajathua pha awairo bushun Dufuii hà noh ne ragia rek phi, <sup>14</sup> hanyie è gethek ro layogthek khung phi srane ichad rek phi.

### *Isu Masi nane airo blia*

<sup>15</sup> Masi ne adoh pha Hamangkhang-aphuii shii doh pha mia ro. Ai ne igobi giak pha Dufuii ro, chiih-è nyie manathek rab pha ji shii zab è bo ro. <sup>16</sup> Ai Chiang è Hamangkhang-aphuii è hamangkhang nane sohnyiak shii zab rab. Chiih-è doh pha mana de rab chiih-è adoh pha manathek de rab, Chiih-è luruak pha blu è yi ne, ithongthek, khophothek chiih-è riichaithek de rab. Hamangkhang-aphuii è zab hamangnyiak shii rab chiih-è ai re-è ai pha rab phi. <sup>17</sup> Zab è ibi Masi ne um, chiih-è ai rog shii dog ne zab pha mana ne airo awai ithua shii um ro. <sup>18</sup> Ai ne siu pha khrug charch ro; Ai ne siu pha chai ithua ro. Ai ne igobi giak pha Dufuii ro, nyieliieshii ai ne zab pha manathek è de ibi rai mua pha ai ne iy bsa è de hòì din. <sup>19</sup> Chiih-è hì ne Hamangkhang-aphuii awai muphak pha ji è Dufuii ne awailum ne Hamangkhang-aphuii duine rey ro. <sup>20</sup> Dufuii Chiang è, chiihphado Hamangkhang-aphuii è zab hamangnyiak shii awai hàne iidoh yie din pha phak. Hamangkhang-aphuii è bai pha awai dufuii ro ifai<sup>‡</sup> ji è zab shii lijiing rab phi, chiih-è zab pha manathek shii chiih-è nyie shii sohnyiak nane hamangkhang shii de ai Chiang è iidoh awai hà yie din yi.

<sup>21</sup> Luang jia shii nathek ne Hamangkhang-aphuii è ruang rey ne chiih-è nyieliieshii nathek è awie pha blia rek ne now pha Chiang aishii suangthek rek. <sup>22</sup> Jishii thuh ne, airo dufuii iy pha Chiang è Hamangkhang-aphuii è nathek shii airo ijak rab phi srane So igang, nane biidiie asi bsa è ai moe hà noh phi. <sup>23</sup> Na ne athothang pha gang shii isiie rek ne chiih-è chuh rek ne rai bo, chiih-è na mua yoi mage shii nawai è yang pha luthong pha ji è nawai shii asid yi rabo. Hì ne ji pha mua ro gu, Phaul, nyie yi zab sohjambling shii yua muui pha khiao ji ro.

### *Phaul ne charch shii khiao duine blia rek*

<sup>24</sup> Chiih-è thuh nathek Chiang è diig rek pha ji ne sang ro, gu siu è diigthek rek pha miyao ne airo siu charch pha Chiang shii Masi ro diigthek nyie yi led bamuii pha diigthek jijong yi pha gu ne nong ramuii ro. <sup>25</sup> Chiih-è nathek shii wie rek yi pha hanyie è hì pha blia gu shii phi. Gu ne Hamangkhang-aphuii Chiang Charch shii khiao rab ne rai. Hì pha blia ne awairo mua shii

<sup>†</sup> **1:11-12** 1:11-12: jum rog chiih-è lubo rog shii laso phi; dinne jum nane lubo rog shii chiih-è laso phi. **1:14** 1:14: Iphi 1:7 **1:18** 1:18: Iphi 1:22,23 **1:20** 1:20: Iphi 2:16 <sup>‡</sup> **1:20** 1:20: ai Dufuii ro ifai; dinne ai Dufuii ne iy bsa à zid muui ro.

zab yao pha ro. <sup>26</sup> Nyie yi buyo è zab pha bran è ug ne ruii pha ji ne jishii thuh ne awai bran shii dong phi. <sup>27</sup> Hamangkhung-aphuii muphak ne rab pha ji ne airo ug pha ji awai bran shii thieg yi, nyie ai è awai bran shii bukho nane boh lubo ug pha ji ro, chiih-è ug pha ji ne hì ro Masi ne na shii um ro, nyie hì pha miyao ne nathek de Hamangkhung-aphuii ro biisiie ne thang ruii phro. <sup>28</sup> Ji-è gathek ne Masi ne zab shii yua. Zab pha khani rey mua pha ji è gathek ne phriie ne ithek shii yua nyieliieshii zab shii Hamangkhung-aphuii moe hà weg rey ne hanyie ne Masi rog ò rey mua. <sup>29</sup> Masi è phi pha riichai boh chua nyie yi gu shii blia rek ramuii pha ji shii bokhoh ne hì pha blia shii jong yi pha gu è wiang nane diig rek.

## 2

<sup>1</sup> Ji-è gu è nathek chiih-è Laodisea pha bran nane zab gai hanyie gu shii athieg ba pho Chiang gu ne khama diig blia rek pha ji gu nathek shii yao riig. <sup>2</sup> Gu è ji rek phane ithek ne lububo rek ne miie shii ò rey yi pha rek phi, chiih-è izai id pha yao pha ji è yi khani thazang shii bajo bukho rey ruii, ji èrek ne Hamangkhung-aphuii ro ug pha ji id mua, ug nyie yi Masi awai ro. <sup>3</sup> Ai ne Hamangkhung-aphuii ro ug pha khani nane id pha thazang ji hong pha ziu ro.

<sup>4</sup> Chiihphado, Gu nathek shii yao, ithek ne khama khie doh magunde hanyi è de nathek shii biidiie pha khnaing ji è khinrin arek yi rabo. <sup>5</sup> Chiih-è gu ne siu shii oi magungde, thuh de gu ne ragung shii ne nathek rog shii ro, chiih-è nathek ro migi ne Masi rog shii ò wie chuh rek pha ji riig ne gu ne sang ro.

### *Masi rog shii ley chai*

<sup>6</sup> Nathek è Masi Isu ne Ithong rone nyanuii shii, nathek ne ai rog shii ò rek ne rai bo. <sup>7</sup> Nathek iriingthek ne ai rog shii jam ruii bo, ai rog shii nathek chai ne rung bo, chiih-è nathek è yua pha duiine nawaithek migi shii gang rek ne rai bo. Chiih-è laso è ley ne rai bo.

<sup>8</sup> Chiihphado, riig bo, hanyie è de bran ro adunmey pha khinrin pha khani è nathek shii khiao arab yi rabo, nyie yi Masi è asi pha jishii bran è yua pha nane hamangnyiak pha khohpho pha ragungthek è thog ro. <sup>9</sup> Masi siu shii Hamangkhung-aphuii ro chai ne zab um ro. <sup>10</sup> Chiih-è nathek ne ai rog ò rek ne rai bone ley chai phijong ro. Ai ne zab pha luruak pha khohphothek nane riichai è khrug ba ro.

<sup>11</sup> Masi rog shii ò rek pha ji è nathek de migiangkheg, nathek ne tharothamangthek è rab pha ji è Migiang-akheg ro, jishii Masi miirab ji è kheg, nyie yi gethek ro layog pha blu shii de ichad rek phi ro. <sup>12</sup> Chiih-è nathek è khowo yi shii, nathek shii de masi rog shii wiengjong, chiih è hanyie è aishii hòì din yi pha, Hamangkhung-aphuii blu khowo shii nathek ro migi è Masi rog hòì din ro. <sup>13</sup> Nathek ne luang jia ne ragung shii iy dun nyieliieshii nathek ro layog è chiih-è nyieliieshii nathek ne Iphey oi pha Gaibran ro. Jishii thuh Hamangkhung-aphuii è nathek shii Masi rog chai yi phi. Hamangkhung-aphuii è gethek ro zab layog khungjong phi; <sup>14</sup> ai è gethek ro anyu pha muruiithek sasab shii iphey è phang ne ruii pha ji shii thoh muii ne bai shii ziin muii pha Chiang è zab ruang rek phi. <sup>15</sup> Chiih-è ji pha bai è Masi ne blu pha luruak khohphothek nane riichaithek è awai shii

ichad rek ge; chiih-è zab pha moe ithek shii khiao rab ne airo yang pha lubo pha ji shii noh dun.

<sup>16</sup> Ji-è hanyie de nyie chie niing dinne gang inai dinne Iwo Habie sai dinne Jewthek thung pha inai Chiang shii Iphey arab haro. <sup>17</sup> Zab jithek pha mana ne phariang ne ragia bie phro; chiih-è isbang ne Masi ro. <sup>18-19</sup> Nyieliieshii wie è miiramthek nane hanyie ne biidiie pha tharothamang rey ne chiih-è hamangkhliteth shii sia ne nawaithek shii ne hanyie è boh rone yao pho è athe yi rabo. Zai branthek ne ithek ro tharothamang è now pha jihà ne wiangwe rek pha nane hanyie yi siu pha khrug rone Masi shii khoh pha ji ne thoh muui. Masi è phriie pha zab siu shii ran ne miak chiih-è rung pha ji è ò shii khoh dun, chiih-è Hamangkhang-aphuii è chid pha ji sieng dun.

### *Masi rog shii sieng pha nane iy pha*

<sup>20</sup> Nathek ne Masi rog shii iy ne hamangnyiak pha ragunthek khothek pha ji è ichad rek phi. Nyie, chiihphado è nathek ne ichiih sohjambling è rey pha duine rai habey? Nyie rek ne nathek ne ji è rek pha Iphey ji nuui phlei <sup>21</sup> “Ji akhoh rabo,” ji achai rabo, gai shii akhoh rabo? <sup>22</sup> Zab hì pha mana ne ithek è khoh jishii adunmey pha mana rey dun ro hì pha mana Chiang è yao ro. Ithek ne bran Iphey nane muyuathek ro. <sup>23</sup> Hamangkhliteth shii sia pha bangchiie nane biidiie pha jum, chiih-è siu shii diigchiao phi pha hì thek zab ne khani ji è ipheythek shii khia, jishii ithek shii ne siu è chid pha ji shii phriie rek phane zai igong oi ro.

## 3

<sup>1</sup> Nathek ne Masi rog shii chai hòijong, Ji-è nathek ro lubuthek ne hamangkhang pha manathek shii now mage bo, Khiah Masi ne Hamangkhang-aphuii ro biang pha phazoi shii dug muui ro. <sup>2</sup> Nathek ro khanithek ne ichiih sohnyiak pha ji shii asi pha, thüsa pha manathek shii isiie rek bo. <sup>3</sup> Chiih-è nathek iy dun pha ji è nathek ro chai ne Masi rog shii ug ne Hamangkhang-aphuii hà ro. <sup>4</sup> Nathek ro isbang chai ne Masi ro chiih-è ai dong mage shii, chiihphado nathek de ai rog shii dong ne airo biisiie ji thang ruii phro!

### *Chai ihèg nane iwo*

<sup>5</sup> Chiihphado, nathek shii ne siulao, zea, awie pha now pha sohnyiak pha chid blia, awie yang pha, chiih-è giichak (chiih-è sgow ne jangbang ro) nathek shii blia rek pha ji shii ne ua muui bo. <sup>6</sup> Nyieliieshii jithek pha Chiang ji è Hamangkhang-aphuii ro lijieg hanyie è aishii anuii pho shii thog ruii phro. <sup>7</sup> Ishak jia shii nathek ro chai ne jithek è dia muui shii, nathek ne nawaithek è chid pha ji shii sieng.

<sup>8</sup> Jishii thuh nathek ne hì thek pha zab mana shii, lijieg, awie now, chiih-è khiijai pha than manathek jithek zab è ruang rai bo. Makhak-riing pha miyao dinne zea miyaothek nathek semthek è akhia rabo. <sup>9</sup> Nawaithek chung biidiie ayao rai rabo, nyieliieshii nathek ne ihèg lajia pha ji ne hongjong muui ro <sup>10</sup> chiih-è nathek ne iwo ji guui bo. Hì ne iwo chai ro nyie yi Hamangkhang-aphuii awai ne rab pho ro, chiih-è athodang pha iwo awai ro midong duine rab lumao, nyieliieshii awairo ley khani nathek shii rey yie pha rek. <sup>11</sup> Ji è rey pha Chiang shii, Gaibranthek nane Jewthek duchoi migiangkheg pha nane migiang-akheg pho duchoi shii dinne jabiingpho

duiine miishiiypho, khiao chiih-è ichad pho chung ne nyie yoh oi ro, jishii zab ne Masi ro, Masi ne zab shii um ro.

<sup>12</sup> Nathek ne Hamangkhung-aphuii ro bran ro; ai è nathek shii miie chiih-è awairo rone nathek shii gua. Ji-è chiihphado, nathek ne bushun, jum, isiie, mieng, nane zud pha yung guii bo. <sup>13</sup> Nawaithek chung zud rai bo chiih-è nathek gai gidieg yao rai mage shii khung phi rai bo. Nathek ne Ithong è khung phi pha duiine nawaithek chung de khung rai bo. <sup>14</sup> Chiih-è hithek shiine miie pha ji shii lao bo, nyie ne zab shii khriig ò jia hà phang ne ruii phi phro. <sup>15</sup> Hipla liijjing ne nathek phak shii gayiig rek phi pha Masi è phi ro; chiih-è hìne jipha liijjing ro Hamangkhung-aphuii è siu jia shii ò jia rek pha ho. Chiih-è laso phi bo. <sup>16</sup> Masi ro mua ne zab nathek shii lubuthek hà um bo. Nawaithek chung zab khani rog shii yua ne yung rai bo. Sthun bai ne, ibai bai ne, so ibaithek bai ne; Hamangkhung-aphuii shii nawaithek lubu è ibai bai ne laso phi bo. <sup>17</sup> Chiihphado, nathek ne zab rek ne yao bo, Ithong Isu ibeng è zab rek ro, chiih-è nathek ne ai chiang è Hamangkhung-aphuii Aphiui shii laso phi bo.

### *Chai iwo shii hanyiehanyie siangthangtek*

<sup>18</sup> Yiy nawaithek ne nawaithek geytek shii phi muui bo, chiih-è nathek Masiphothek è nyie rek pha ji duiine rek bo.

<sup>19</sup> Geytek, nawaithek yiy shii miie bo chiih-è ithek shii buii arek rabo.

<sup>20</sup> Aniphiing, idang nawaithek aphiui-amuiithek shii nuui pha hì ne nathek ro Masipho pha blia ro, chiih-è Hamangkhung-aphuii è sang pha chiang ji ne hì ro.

<sup>21</sup> Aphiui-amuiithek, Nawaithek aniphiing shii alijieg yi rabo, asi shii ne ithek lubu lu rey mage phro.

<sup>22</sup> Khiaothek, zab shii ne nawaithek ro muspho shii nuui bo, nathek ne ithek è nathek shii riig mage shii nathek ne rek chak rone doh yi pha arek bie rabo; jishii nawaithek lubu rog shii rek bo nyieliieshii nathek ne Hamangkhung-aphuii shii ilab rek phi. <sup>23</sup> Nathek nyie blia rek magungde, nathek ne bran blia rek pha asi pha Ithong ro blia rek pha duiine nawaithek lubu rog shii rek bo. <sup>24</sup> Now bo Ithong è awai bran shii nyie ruii phi pha ji ne nathek ne mua ruii phro. Chiih-è nathek è blia rek pha Masi ne isbang Muspho ro. <sup>25</sup> Chiih-è nyie awie pha blia rek arone aishii ji duiine phi din ruii phro, nyieliieshii Hamangkhung-aphuii è zab bran shii ò è chua ruii phro.

## 4

<sup>1</sup> Musphothek, nawaithek khiaothek shii khui shii wie nane khriig rek bo, Now bo nathek shii de hamangkhung hà Muspho um ro.

### *Yuathek*

<sup>2</sup> Misa shii chuh rek bo, chiih-è Hamangkhung-aphuii shii laso phi pha nawaithek misia shii nowbthan bo. <sup>3</sup> Ji-è Hamangkhung-aphuii è gu shii ne Masi pha ug pha airo mua ji yua mua wie chua phi yi pha ji pha ishak shii gathek shii de sia phi bo. Ji è gu ne phat heg shii ro. <sup>4</sup> Chiihphado, gu ne khi-èrek hì duiine sang è yao mua shii sia mage bo.

<sup>5</sup> Nathek shii um pha zab jo shii ne wie khoh pha rab ne hanyie yi migipho asi pho shii blia rek shii khua è rek bo. <sup>6</sup> Nathek miyao ne idang sang pha nane nyu yang yie bo, chiih-è ithek zab shii khi-èrek ne izai chang chid pha ji ne nathek ìd bo.

### *Idohhè pha salamthek*

<sup>7</sup> Gathek ro wie ijak Thychikhus, hanyie yi Ithong blia shii nane migi shii bliapho è, nathek shii gu Chiang zab mua phi ruii phro. <sup>8</sup> Ji è gathek zab ne khi-èrek ne um lei ne ji pha Chiang nathek nuui ne sang yi pha, gu ne aishii nathek hà thoh ge ro. <sup>9</sup> Ai rog shii Onesimus de wuii dun, ji ne bushun nane isiie ijak ro, hanyie yi nathek ibrog è ro. Ichihi shii nyie re ramuii pha ji ne ithek è nathek shii yao ruii phro.

<sup>10</sup> Aristarchus, hanyie yi gu rog shii phatgeg hà ro, nathek shii salamthek phi ro, chiih-è Marg è de rek ro, hanyie yi Barnabas ro khuiino ro. (Ai è nathek lumuii shii wuii arone nathek ne Marg shii wie ho pha muyuathek ne mua jong.) <sup>11</sup> Joshua shii, Justhus de ho, nathek shii bajo salamthek thoh ge. Jithek um ne hanyie è gu rog shii Hamangkhung-aphuii ro Sajathua pha blia rek pha Jewthek migiphothek bie ro, chiih-è ithek ne gu shii bajo nong phi ro.

<sup>12</sup> Ephaphras è, nathek ibrog pha gai branthek nane Masi Isu ro khiao è de salam phi ro. Ai ne idang nathek Chiang shii athodang pha sia phi ro, nathek shii chuh rek phi bone Hamangkhung-aphuii shii lia phi ro, chiih-è Masiphothek shii ne weg rey ne ley gayiig yi pha, chiih-è Hamangkhung-aphuii miyyang ji shii zab nuui yi pha rek phi ro. <sup>13</sup> Gu ne nathek Chiang nane Laodisea pha bran shii nane Hierapholis shii airo snag blia ji gui è khagi nyarek mua. <sup>14</sup> Lug, gethek ro bushun pha mapho nane Demas è de salamthek yao ne ren ge ro.

<sup>15</sup> Gathek ro zab è wie salam ji ne Laodisea pha charch pha migiphothek shii chiih-è Nympha nane Charch ai è airo hò shii si muui pha ji shii de phi bo. <sup>16</sup> Nathek hì pha jigigam tham ched pha idoh, Laodisea pha Charch pha migiphothek shii de tham yi bo. Ji pha ishak ò shii, Gu è thoh ge pha jigigam ji ne Laodisea pha migiphothek è na shii thoh ge shii na ne tham bo. <sup>17</sup> Chiih-è Archiphus shii yao bo, na shii Ithong è blia phi pha ji ne jong pha rek bo.

<sup>18</sup> Hi ne gui wad mizey ro: Phaul re-è salamthek thoh ge ro. Guro shiirnaithek shii abileng rabo!

Hamangkhung-aphuii ro bushun ne nathek rog shii um bo.

## THESALONITHEK

### Shii Phaul Re-è Igobi Pha Jigigam

### Yaophi

Thesalonikha ne Mesidonia du-ua Roman Rajan pha Jila ro. Philiphi thoh wuii pha iidoh shii Phaul è thiichiih shii Charch rung. Hanyie yi Jewthek ro giang shii rey yang pho pha Jewthek asi pha duchoi shii Phaul ro Migipho pha mua yua pha ji ne blia wie re pha ji shii Jewthek ne khthiie miegriie dun ro gak. Phaul shii Thesalonikha thoh ne Berea hà dun dun bangchiie rek. Chiihphado, ai Khorinth hà thog, Phaul yi awai ijak nane bliapho ijak Thimothi è Thesalonikha charch pha phosro yaophi.

Phaul ro igobi pha jigigam yi Thesalonikhapho shii lububo rekpha nane thiisa pha Masipho shii chuh rek phi. Ai è ithek ro migi nane miie pha mua Chiang shii laso phi; ai ithek rog rai shii awai murai pha chai ichua ji ithek shii now yi, chiih-è chiihphado charch hà Masi ne wuii din ruii pha musai ji ithek shii changphi: Masi iidoh awuii ba pha ibi shii migipho iy arone ai iidoh wuii shii yi pha idang pha chai shii thang mua habey? Chiih-è Masi ne khuchung wuii ruii phalei? Ji pha ishak shii Phaul è Masi iidoh wuii ruii pha luthong ramuii pha ji shii ne liijjng è blia rek bo è yua pha chua yie.

#### **Iliing shii um pha ji**

Yaophi (1:1)

Lasò nane chiong (1:2—3:13)

Migipho ro ziiig shii lububo rek phi (4:1-12)

Masi wuii ruii pha Chiang shii yao (4:13—5:11)

Idohhè pha lububo rek phi pha ji (5:12-22)

Jongsha (5:23-28)

<sup>1</sup> Phaul, Silas, nane Thimothi è, Thesalonikha charch pha bran shii, hanyie yi Aphuii Hamangkhung-aphuii nane Ithong Isu masi ro:  
Khirzey nane liijjng ne nathek ro ro.

#### *Thesalonithek pha chai nane migi*

<sup>2</sup> Gathek ne nathek zab Chiang Hamangkhung-aphuii shii idang laso phi chiih-è nathek shii idang gathek misia shii sia phi <sup>3</sup> Nye khi-èrek ne migi shii blia hà rek yi, chiih-è nathek ro miie ne khi-èrek ne nathek ro blia shii snak rek, chiih-è gathek ro Ithong Isu Masi shii nathek ro luthong ne khi-èrek ne chuh rey yi pha ji gathek ro Hamangkhung-aphuii nane Aphuii shii ibi now ro. <sup>4</sup> Gathek khiuinothek nane bumuiithek, gathek ne thieg Hamangkhung-aphuii ne nathek shii miie chiih-è awairo rey yi pha guajong ro. <sup>5</sup> Gathek è Mua Wie ne miyaogamthek asi bie pha, jimagunde blu nane Ragung So rog shii ro, chiih-è zab pha izai rog shii nathek shii yie phi ro. Gathek ne nathek rog shii rai shii khi-èrek pha ji ne nathek de thieg; hì ne nawaithek shii wie pha ji um ro. <sup>6</sup> Nathek ne gathek shii nane Ithong shii nui ro, chiih-è nathek shii bajo diigchiao rek magunde, nathek ne Ragung So è thog pha mua shii lubo rog shii choi ro. <sup>7</sup> Nathek ne Mesidonia nane Akhaya pha zab migiphothek shii miiriig redun ro. <sup>8</sup> Chiih-è Ithong ro mua Chiang ne nathek è fuang Mesidonia nane Akhaya hà rek bie pha asi pha, Jimagunde naro

migi ne Hamangkhung-aphuui shii um rone zab hà thogdun ro. Chiihphado, nyie oisha, gathek ne yao chid. <sup>9</sup> Gathek yi nathek shii wuii shii nathek è gathek shii khi-èrek ne choi, chiih-è nathek è khi-èrek ne Hamangkhung-aphuui shii khid ne, izai isiang shii blia rek ne <sup>10</sup> chiih-è Dufuui hamangkhung è wuii ruii pha ji shii khan—ai Dufuui Isu, hanyie è iy pha ji è hòì phi chiih-è Hamangkhung-aphuui ro lijjeg thog ruii pha ji shii Isu è ragia rek phi pha ji shii branthekek zab ne nathek Chiang yao muui ro.

## 2

### *Phaul Thesalonikha shii blia rek*

<sup>1</sup> Gathek ro khuiinothek nane bumuiithek, nathek nawaithek de thieg gathek è nathek shii wuii pha ji ne adubo asi ro.

<sup>2</sup> Nathek ne thieg gathek ne Thesalonikha hà nathek shii awuii ba shii Philiphi hà gathek shii ne makhak-riing ne diigchiao reyjong ro. Chiih-è thiisa hàne bajo suang ne muna um magunde, gathek ro Hamangkhung-aphuui ai è thog pha Mua Wie ji nathek shii yua yi gathek shii lububo phi. <sup>3</sup> Gathek è nathek shii khung pha ji ne buii, dinne izea nowthek è arek ro, chiih-è hanyie jia shii khinrin pha abidiang ro. <sup>4</sup> Ji pha Chiang, gathek ne idang Hamangkhung-aphuui è chid pha ji yao ro, Nyieliieshii Mua Wie ji phi spho rone ai è gethek shii chuajong ro. Gathek ne bran shii nyu yi pha asi ro, jishii hanyie è gethek ro now pha ji shii chai pha Hamangkhung-aphuui shii nyu yi pha rek ro, <sup>5</sup> Nathek bajo wie è thieg, gathek ne nathek shii shan ne yao pha awuii ro, chiih-è sgoth shii ug pha miyaogamthek akho ro—Jithek zab shii ne Hamangkhung-aphuui ne gathek ro khagi ro! <sup>6</sup> Gathek ne hanyie è de chiong yi pha abidiang ro, jimagunde na è de dinne gai è de asi ro, <sup>7</sup> gathek ne Masi pha Guaphasamoythek pha ji è nathek shii nyanak spho shii ro. Jishii amuii\* è awai ani shii gayiig pha duuine gathek ne nathek rog um shii jum rek ne rai. <sup>8</sup> Nyieliieshii gathek è nathek shii miie pha ji è gathek ne nathek shii Hamangkhung-aphuui ro Mua Wie ji asi bie pha gathek ne guithek ro chaithek shii de thang pha sarojong. Nathek ne gathek ro bajo miie ro! <sup>9</sup> Zai nathek ne nowkhlei iwa, gathek ro khuiinothek nane bumuiithek, gathek è Hamangkhung-aphuui Mua Wie ji yua shii nathek shii nyie diig arey yi pha gathek ne inai nane habiu blia bajo diig rek!

<sup>10</sup> Nathek ne gathek ro khagi, nathek è migi rek pha ji ne gathek ne khi-èrek ne gang, rangsua, nane ichiig asi rone sieng pha ji ne Hamangkhung-aphuui awai de khagi ro. <sup>11</sup> Nathek ne thieg gathek è nathek zab shii rek noh pha ji ne aphuii è awai aniphiing shii rek pha ji duuine rek noh. <sup>12</sup> Gathek è nathek shii lububo rek phi, gathek è nathek shii liijiing phi, chiih-è gathek ne nathek shii khung hanyie è awairo Sajathua nane Biisiie shii thang yi pha nathek shii ho pha ji shii Hamangkhung-aphuui è sang pha chai ichua shii rai pha lububo rek phi ro.

<sup>13</sup> Chiih-è gathek ne Hamangkhung-aphuui shii idang laso phi pha gai Chiang de um ro. Gathek è nathek shii Hamangkhung-aphuui pha mua yie phi shii, nathek ne nuui ne choi, jine branthekek pha mua duuine asi pha jishii Hamangkhung-aphuui mua rone choi, hì ne izai ro. Nyieliieshii Hamangkhung-aphuui ne nathek è migi rekpho shii blia rek phi. <sup>14</sup> Gathek

**2:2** 2:2: Blk 16:19-24; Blk 17:1-9 \* **2:7** 2:7: gethek khihà gai bran gethek khihà nathek rog, amuii duui negiak jigizey shii um gathek ne nathek rog shii ne ani duuine ro; gathek ne amuii duui ne ro.

**2:14** 2:14: Blk 17:5

ro khuiinothek nane bumuiithek, Hamangkhung-aphui ro charch Judea hà hanyie yi Masi Isu è rey pho shii Jewish è diig phi. Ji duiine nathek shii de nawaithek bran è diig mua ruii phro, <sup>15</sup> hanyie è Ithong Isu shii nane chaigtek shii ua muii, chiih-è gathek shii diigchiao phi. Hamangkhung-aphui shii ne ithek ne khama asang yi phro! Itek shii ne khama zab ro mak ro! <sup>16</sup> Itek ne mua è giawo yie pha gaibrantek shii yua pha ji shii rangde gathek shii gak pha bidiang. Ji duiine ithek è idang rek pha layogtek shii jongdang pha rek ro. Chiih-è thuh Hamangkhung-aphui ro lijie ne iidohè ithek shii thog ruii phro.

### *Paul è ithek shii wuii pha yang din*

<sup>17</sup> Gathek ro, khuiinothek nane bumuiithek, gathek yi nathek è ùjia yoh rey mage shii—izai gathek munow ji-è yoh asi ro, jishii siu è bie—gathek ne nathek shii khama now ne khama gathek ne nathek shii si din pha snak bidiang! <sup>18</sup> Gathek ne nathek shii khid pha yang. Gu ne dinne luang jia iidoh wuii pha bidiang, jimagunde sakhathong è gathek shii awuii yi.

<sup>19</sup> Zab, nathek ro hanyie gathek ro luthong ne, gathek ro lubo ro, chiih-è gathek ro Ithong Isu wuii ruii mage shii ai mieng moe shii gathek è yang shii nyigodog rek pha chiang ne nathek ro chiih-è nathek ne gai è ù asi ro. <sup>20</sup> Zai, nathek gathek ro wiangwe nane gathek ro lubo ro!

## 3

<sup>1</sup> Idohhè, gathek ne hì shii azud mua ro. Ji-è gathek ne Athens jia hà rai pha phak, <sup>2</sup> gethek ro khuiinothek hanyie gathek rog shii Hamangkhung-aphui ro blia Masi chiang Mua Wie yao pha gathek ne Thimothi shii ren ge. Nathek shii chuh rek ne migi shii nong phi pha gathek è aishii thoh gey, <sup>3</sup> ji-è nathek ne jia de ji pha diigcheothek pha chiang è iidoh akhid yi. Nawaithek ne thieg hithek zab pha diigcheothek ne Hamangkhung-aphui è gethek shii yang pha ji ro. <sup>4</sup> Chiih-è gathek ne nathek rog ba shii, gathek ne nathek shii igobi mujo yaojong gethek ne diigchiao ruii phro; chiih-è nathek ne wie è thieg, jine ji duiine rey ro. <sup>5</sup> Ji-è gu ne Thimothi shii thoh ge. Gu ne hì shii azud mua ro, ji-è gu ne nathek migi chiang thieg yi pha aishii thoh. Zai nathek shii ne Sakhathong è chuajan ne zab gathek blia ne adubo arey yi phro! <sup>6</sup> Thuh Thimothi ne iidoh dun thog, chiih-è ai è gathek shii nathek ro migi nane miie pha chiang shii wie pha mua yiethok. Ai è gathek shii yao nathek ne idang gathek shii wie now ne na è gathek shii riig yang pha ji duiine bajo gathek ne nathek shii riig yang muii ro. <sup>7</sup> Ji-è khuiinothek nane bumuiithek zab gathek ro diig nane duhug ne gathek na chiang shii è lububo ro. Hi ne naro migi ji è gathek shii lububo rek phi, <sup>8</sup> nyielieshii thuh nathek ro chai ne Ithong rog ò nane chuh riu arone gathek ne zai sieng mua. <sup>9</sup> Thuh gathek ne na chiang è Hamangkhung-aphui shii laso nyaphi mua. Nyielieshii na chiang è gathek ne ai moe gathek bajo lubo um ro ji-è gathek ne aishii laso phi. <sup>10</sup> Chiih-è nathek shii riig wuii srane nathek ro migi shii nyie chid ne nyie phi mua pha ji shii aishii lia ne inai nane habiu gathek lubu shii sia ro. <sup>11</sup> Gathek ro Hamangkhung-aphui nane Aphui awai nane gathek ro Ithong Isu è nathek shii wuii pha lumuii saro phi bo! <sup>12</sup> Ithong è nawaithek chung pha miie shii rab ne nathek shii gathek ro miie khama boh duiine zab bran chiang miie shii muna nane muna sieng bo. <sup>13</sup> Ji duiine



aine nathek shii chuh rek ruii phro, chiih-è Ithong Isu yi hanyie awai rog wuii ruii shii nathek ne Hamangkhung-aphuii nane Aphuii moe shii khriig nane so um yi.\*

## 4

### *Ji pha chai ne Hamangkhung-aphuii shii sang yi*

<sup>1</sup> Idohhè, gathek khuiinotek nane bumuiithek, Hamangkhung-aphuii è sang pha nathek ne khi-è rai chid nathek ne gathek è dajong. Hi ne, ji chak ro, nathek ne rai ramuii ro. Chiih-è thuh gathek ne dinne de muna rek bo ne Ithong Isu beng è nathek shii khung. <sup>2</sup> Ithong Isu pha riichai è gathek è nathek shii phi pha muyuathek ne nathek ne thieg. <sup>3</sup> Hamangkhung-aphuii ne nathek shii gang rey bo ne now ro chiih-è siulao è gang rey bo ne yang ro. <sup>4</sup> Zab pha brantheek ne awai yiy\* rog shii gang nane ilab shii khi-èrek ne rai pha ji ne thieg chid, <sup>5</sup> Hamangkhung-aphuii shii athieg pha bran duiine siu è chid pha ji rog shii asi ro. <sup>6</sup> Hi pha miyao è, chiihphado bran ne awai khuiinotek Masiphothek shii ichiig arek rabo dinne ai è phua ayie rabo. Gathek è hi ne igobi yaojong ro, chiih-è gathek ne chiih-è nathek shii gang phriie hanyie è hi rek pho shii ne Ithong è lago phi ruii phro. <sup>7</sup> Hamangkhung-aphuii è gethek shii chai zea sieng pha aho ro, jishii gang rai pha ho phro. <sup>8</sup> Ji-è chiihphado, hanyie magunde hi pha muyua shii snai pha ne bran shii snai pha asi ro, jimagunde Hamangkhung-aphuii hanyie è nathek shii Ragung So phi pha ji shii ro.

<sup>9</sup> Nathek shii ne nawaithek khuiino Masipho shii miie bo ne azey chid. Nathek nawaithek chung khi-èrek ne miie chid pha ji ne Hamangkhung-aphuii è nathek shii yuajong ro. <sup>10</sup> Chiih-è zai nathek shii um pha ji duiine, Mesidonia pha khuiinotek nane bumuiithek shii de ziig rekramuii ro. Ji-è gathek nathek shii khung, gathek ro khuiinotek nane bumuiithek, dinne de muna rek bo. <sup>11</sup> Nawaithek chai yi liijiing shii sieng pha phrai bo, nawai blia shii gayiig bo, chiih-è gathek è nathek shii igobi yao pha duiine, nawai sieng pha ji shii wiang bo. <sup>12</sup> Hi pha lumuii è hanyie migipho arey ba pho è ilab mua ruii phro, chiih-è nathek nyie chiid pha ji shii ne ithek gai shii aluthong chid phro.

### *Ithong wuii ruii*

<sup>13</sup> Gathek khuiinotek nane bumuiithek, gathek ne nathek shii hanyie iy dun ji pha izai Chiang shii thieg yi pha yang ro, ji-è hanyie shii luthong oi pho, nathek shii duhug arey phro. <sup>14</sup> Gethek ne migi rek Isu ne iy ne hòì din, chiih-è gethek ne migi rek hanyie è aishii migi rek ne iy dun pho ne Hamangkhung-aphuii è Isu rog shii iidoh noh. <sup>15</sup> Thuh shii gathek è nathek shii nyie yua pha ji ne Ithong ro muyua ro: gethek hanyie yi Ithong wuii ruii pha inai shii isieng um iang pho ne hanyie iyjong pho è ibi awuii. <sup>16</sup> Thiichiih ne khohamangkhlhie ro goh ne, yung srane ziak ruii phro, Hamangkhung-aphuii pha thu-ung goh, chiih-è Ithong awai hamangkhung è thazam wuii ruii phro. Chiih-è hanyie Masi shii migi rek ne iy dun pho shii igobi chai hà hòì yi phro; <sup>17</sup> chiihphado gethek hanyie yi ji pha ishak shii isieng rai pho shii ne khrab srane hasam hà shii Ithong shii si pha ithek rog sakhmiingthek

\* **3:13** 3:13: zab hà nyie ye ai re-è; dinne zab airo hamangkhlie. \* **4:4** 4:4: nathek yiy rog shii rai bo; dinne nawaithek siu shii phrai bo. **4:15** 4:15-17: 1Khor 15:51-52

hà um ruii phro. Chiih-è gethek ne idang Ithong rog shii ruii ruii phro. <sup>18</sup> Ji-è chiihphado hì pha miyaogamthek è nawaithek chung lububo rek bo.

## 5

### *Ithong wuiramuii pha ji shii saro iang bo*

<sup>1</sup> Khuinothek nane bumuiithek, hì pha ishak nane ithua ne khuchung rey ruii, ji ne nathek shii ne azey chid. <sup>2</sup> Chiih-è nathek nawaithek ne bajo wie thieg mugo yi habiu wuii pha duiine Ithong pha Inai de thog ruii phro. <sup>3</sup> Brantheke yao shii, “Zab ne lijiing nane ragia ro,” chiihphado hamblo shii ithek shii ne srobrotog ruii phro! Hì ne hò-amuii è ani giak pha rek shii riie pha duiine hamblo thog ruii phro, chiih-è brantheke ne ayao mua phro. <sup>4</sup> Jimagunde, khuinothek nane bumuiithek, nathek ne igiia hà asi ro, chiih-è Inai ne nathek shii mugo duiine anomuluii pha ayie yi phro. <sup>5</sup> Nathek zab brantheke hanyie yi ichuang pha, chiih-è hanyie yi inai pha ro. Gethek ne habiu nane igiia pha asi ro. <sup>6</sup> Ji-è chiihphado, gethek ne ithek gai duiine men ne arai rabo; gethek ne sieng ne athiig pha rai bo. <sup>7</sup> Brantheke ne habiu hà men; chiih-è habiu hà niing phro. <sup>8</sup> Jimagunde gethek ne hanai pha ro, chiih-è gethek ne athiig pha chid. Gethek ne migi shii guii ne chiih-è miie shii khug duiine, chiih-è gethek è giawo pha luthong shii khuthung duiine thung chid. <sup>9</sup> Hamangkhung-aphuii è gethek shii airo lijieg shii diig yi pha agua ro, jimagunde gathek ro Ithong Isu Masi Chiang è giawo shii mua yie pha gua ro. <sup>10</sup> Ji-è ai wuii ruii shii gethek ne iyjong magunde chiih-è isieng magunde ai rog shii rai mua pha Isu ne gethek Chiang shii iy dun. <sup>11</sup> Ji-è thuh nathek rekramuii pha ji duiine, gethek chung lububo rek ne gethek chung nong rai bo.

### *Idohhè pha muyua nane salam*

<sup>12</sup> Gathek nathek shii khung, gathek ro khuinothek nane bumuiithek, hanyie è nathek duchoi shii Masi pha chai ji yua ne, gayiig rek pho shii wie è ilab phi bo. <sup>13</sup> Nyieliieshii ithek è rek pha blia shii boh nane miie rog ilab rek bo. Nawaithek duchoi shii lijiing rai bo.

<sup>14</sup> Gathek ne nathek shii khung, gathek ro khuinothek nane bumuiithek, siikhad-ajo pho shii phriie bo, murum dum pho shii lububo rek phi bo, zia pho shii nongphi bo, zab shii zud bo. <sup>15</sup> Riig bo hanyie è nathek shii awie pha rek ithek shii iidoh arog rabo, Jimagunde idang pha ishak shii nathek ro phrai ne nawaithek nane zab bran shii wie rek pha phrai bo.

<sup>16</sup> Idang lubo rek bo, <sup>17</sup> idang ishak sia bo, <sup>18</sup> Isu Masi hà ne, Hamangkhung-aphuii ne nathek è hì chid pha ji ro, zab pha diig shii de sang shii de idang ishak shii laso phi bo.

<sup>19</sup> Ragung So shii agak rabo; <sup>20</sup> Muathek chaig pha ji shii makhak-ariing rabo; <sup>21</sup> zab pha manathek shii chai bo: nyie yi wie ji ruii bo <sup>22</sup> chiih-è awie pha ji shii zab thoh muui bo.

<sup>23</sup> Hamangkhung-aphuii hanyie è gethek shii lijiing phi ne zab pha lumuii shii so rab ne na è rek pha ji shii zab ruii bo—ragung, luruak, nane siu—gethek ro Ithong Isu Masi wuii shii zab ichiig ne ichad ruii bo. <sup>24</sup> Hanyie na shii ho ai ne rek phi phro, nyieliieshii ai ne isiie ro.

<sup>25</sup> Khuinothek nane bumuiithek gathek shii de sia phi bo.

<sup>26</sup> Lijiing pha khichiug è zab pha migipho shii salam rek bo.

<sup>27</sup> Hi pha jigi ne zab migipho è tham bo gune Ithong pha riichai è nathek shii khung ne yao.

<sup>28</sup> Gethek ro Ithong Isu Masi ro bushun ne nathek rog shii um bo.

## THESALONITHEK

### Shii Phaul Re-è Nyichiieng pha Jigigam Yaophi

Thesalonikha charch shii Masi iidoh wuii phro ne yua pha muyuathek sang asi pha ne bajo um ro. *Phaul è dīnpha jigi Thesalonikha shii zey pha ji ne* Ithong wuii ruii pha inai pha muyuathek shii sang yao phi pha, Phaul è hì pha muyua shii sang yao phi pha zey ro. Masi iidoh khid pha ibi shii layog pha blia bajo rey ruii phro. Awie pha dumuii anomuluii pha cheb rey ruii phro hanyie “Awie Jia” rone yao ruii phro, chiih-è ai ne Masi shii suang rek ruii phro.

Phaul è thampho shii ithek ne Diig duhug shii magunde ithek ro migi shii gang rai bone hì pha jigi è yao, awaithek ro chai pha bang wiang bone yao ro, chiih-è Phaul nane airo ijakthek duine blia rek ne chiih-è idang wie blia rek pha bidiang bo.

#### **Iiing shii um pha ji**

Yaophi (1:1-2)

Chiong nane lububo (1:3-12)

Masi wuii ruii pha ji yao (2:1-17)

Masipho ziig (3:1-15)

Jongsha (3:16-18)

<sup>1</sup> Phaul, Silas, nane Thimothi re-è,

Hanyie yi Hamangkhung-aphuii gethek ro Aphuii nane Ithong Isu Masi ro Thesalonikha charch pha brantheek shii:

<sup>2</sup> Hamangkhung-aphuii gethek ro Aphuii nane Ithong Isu Masi nathek shii bushun nane liijing phi bo.

#### *Masi wuii ruii shii chua*

<sup>3</sup> Gathek ro khuiinothek nane bumuiithek, gathek ne nathek Chiang shii idang Hamangkhung-aphuii shii laso phi. Hì ne gathek shii rek chid pha rangsua ro, nyieliieshii nathek ro migi ne muna boh rey ne chiih-è nawaithek chung miie rai pha ji ne boh rey din ramuii ro. <sup>4</sup> Ji pha Chiang è gathek ne guthek shii Hamangkhung-aphuii pha charch hà nathek Chiang shii nyigodog rek. Gathek ne nathek è athodang pha diigchiao nane duhug shii dab pha ji shii zud ne migi rek pha Chiang shii nyigodog rek. <sup>5</sup> Hithek ne zab khagi rek ro Hamangkhung-aphuii ro chua pha ji zai ro, hì pha Chiang è nathek è nyie diig rek pha ji shii, nathek ne airo Sajathua pho rey mua spho rey ruii phro. <sup>6</sup> Nyie rangsua ji Hamangkhung-aphuii è rek ruii phro: chiih-è nathek shii hanyie è diig rek ji shii ne diig phi ruii phro, <sup>7</sup> chiih-è ai è nathek hanyie diig pho shii ichad rek phi chiih-è gathek zab shii ichad rek phi. Ai ne Ithong Isu yi hamangkhung è awairo riichaiboh pha hamangkhliiethek rog <sup>8</sup> chiih-è hòi pha bai rog shii wuii ruii mage shii, hanyie è Hamangkhung-aphuii ro shii snai ne hanyie è Isu Masi ro Mua Wie ji anuii pho shii ne lago phi ruii phro. <sup>9</sup> Ai hanyie yi awairo brantheek è biisiie choi pha chiih-è zab hanyie è migi rek pho è ilab choi pha Inai ai wuii ruii shii nathek zab de ithek rog shii um ruii phro, nyieliieshii gu nathek shii yaojong pha mua shii

migi rek ro, <sup>10</sup> ithek zab ne idang srobro pha lago shii diig ruii phro, chiih-è Ithong nane airo bohbiisiie pha miie è yoh yoh rek ruii phro.

<sup>11</sup> Ji-è gathek ne idang nathek shii sia phi. Gathek è guithek Hamangkhung-aphuii shii nathek shii ai è sieng pha ho pha chai shii rey mua spho rab phi bone sia. Ai ne zab nathek ro wie pha chid shii airo blu è rey yi bo chiih-è nawaithek ro migi pha blia shii jong yi bo. <sup>12</sup> Ji duiine gethek ro Ithong Isu beng è biisiie ne nathek è mua ruii phro, gethek Hamangkhung-aphuii nane Ithong\* Isu Masi pha bushun ne, nathek shii de ai re-è ro.

## 2

### *Awie Jia*

<sup>1</sup> Ithong Isu Masi wuii ruii pha miyao nane ai rog shii gethek ro ò khrab pha Chiang shii: gu khuiinotek nane bumuiithek gu nathek shii khung, <sup>2</sup> nawaithek munow shii jum è anomuluii pha arek rabo chiih-è Ithong pha inai thogjong rone yao pha ji shii duhug arek rabo. Yangne gathek è chaig chiih-è yua hì yaojong rone, chiih-è gathek è hì pha jigi hà zeyjong rone chiih-è gathek è yao rone gai è nowjong pha de um iwa. <sup>3</sup> Hanyie jia è de nathek shii nyie lumuii hà de akhin-arin yi rabo. Awie pha jia hanyie yi thumluii hà dun pha sbang rekjong pha ji khia ne iidohè mak arek sapho shii ne ji pha Inai athog ruii phro. <sup>4</sup> Ai ne zab shii hamangkhung-aphuii rone ho pha ji shii chiih-è misiasia pha mana shii gak ruii phro chiih-è ithek zab pha lakhung dug ruii phro. Ai ne wuii srane Hamangkhung-aphuii ro Misiahò shii dug chiih-è Hamangkhung-aphuii ro è yao ruii phro.

<sup>5</sup> Nathek ne anow khlei bey? Gu nathek rog um ba shii gu nathek shii zab yaojong ro. <sup>6</sup> Thuh rey ruii pha ji shii gak pha nyie magunde um pha ji ne nathek ne thieg pha ji shii diig bamuii ro. Chiihphado, khriig ishak shii, Awie pha Jia ne khia ruii ro. <sup>7</sup> Ug pha Awiethek ne khuchung mujo blia rekjong ro, jishii hanyie jia è khoh ne ruii pha ji shii lumuii è afen sapho shii ne nyie rey pha rek pha ji ne arey phro. <sup>8</sup> Chiihphado Awie Jia jine dong ruii phro, jishii Ithong Isu wuii ruii shii, ai ne aishii ai sem pha misey è ua ne aishii ne airo wud pha moe è srobro rek ruii phro. <sup>9</sup> Awie pha Jia ne Sakhatong pha blu rog shii wuii ne zab pha biidiie buangthek nane anomuluii pha rek ruii phro, <sup>10</sup> chiih-è hanyie yi chun ramuii pho shii ne zab awie pha ichua è khoh ne khinrin ruii phro. Itek ne mua ruii phro nyielieshii ithek ne ragia rey pha izai shii amiie chiih-è wie de aho. <sup>11</sup> Chiih-è Hamangkhung-aphuii è ithek shii blia rek yi pha ichiig pha blu thoh ge ji-è ithek ne nyie biidiie shii migi rek yi ro. <sup>12</sup> Ji-è zab hanyie ne izai shii migi arek ro, jishii layog shii ne sang pho shii, the ruii phro.

### *Nathek shii ne giawo pha gua phro*

<sup>13</sup> Nathek hanyie shii Ithong è miie pha khuiinotek nane bumuiithek, gathek ne nathek Chiang idang Hamangkhung-aphuii shii laso phi. Chiih-è nathek izai shii migi rek pha Chiang è Hamangkhung-aphuii nathek shii igobi\* gua pha ji ne Ragung pha blu è ragia rey ne airo gang bran rab phi ro. <sup>14</sup> Hamangkhung-aphuii è nathek shii gathek è yua pha Mua Wie ji è nathek

\* **1:12** 1:12: gethek Hamangkhung-aphuii nane Ithong; dinne gethek Hamangkhung-aphuii nane Ithong; dinne. **2:1** 2:1: 1The 4:15-17 **2:4** 2:4: Ezkh 28:2 **2:8** 2:8: Aij 11:4 **2:9** 2:9: Mth 24:24 \* **2:13** 2:13: igobi duui ne; giak jigizey shii um igobi jao pha re-è.

shii ho, ai è nathek shii ho pha ji ne Ithong Isu Masi ro biisiie mathang shii nawaithek ro rey yi pha ho phro. <sup>15</sup> Ji-è gathek ro khuiinothek nane bumuiithek, chuh riu ne gathek miyyau nane, gathek ro jigigam pha nyie izai yua pha ji shii khoh bo.

<sup>16</sup> Gathek ro Ithong Isu Masi awai nane Hamangkhung-aphuii gethek ro Aphuii, hanyie gethek shii miie chiih-è airo bushun è asid yi pha lububo nane chuh luthong ji phi ne, <sup>17</sup> nathek shii nyie wie ji ne idang rek ne yao yi pha nathek shii lububo rek phi ne chuh rek phi.

### 3

#### *Gathek shii sia phi bo*

<sup>1</sup> Idohhè, gathek ro khuiinothek nane bumuiithek, gathek shii sia phi bo, hi ne nathek duchoi shii um pha duiine Ithong ro mua ne athodang pha dinne shiie ne ilab rog shii choi yi bo. <sup>2</sup> Hamangkhung-aphuii ne zab mua shii migi arek pho, chiih-è awie pha bran nane buii bran è gethek shii ragia rek phi bone, ji de sia mage bo.

<sup>3</sup> Jishii Ithong ne isiie ro, chiih-è ai è nathek shii ne Awie Jia ji è chuh rek phi ne ragia ruii phro. <sup>4</sup> Chiih-è Ithong è gathek shii nathek pha migi ji phi, chiih-è nathek è rek muui rone chiih-è gathek è nathek shii nyie yao pha ji athodang pha rek rone gathek migi rek ro.

<sup>5</sup> Ithong è nathek shii ne Hamangkhung-aphuii ro miie chiih-è Masi è phi pha zud shii bajoboh gua pha ji shii noh bo.

#### *Blia rek pha gaja*

<sup>6</sup> Gathek ro khuiinothek nane bumuiithek, Ithong Isu Masi beng è gathek nathek shii yung phro hanyie yi gathek è ithek shii phi pha muyung shii alua pha chiih-è chai shii siikhad-ajo pha sieng pho è ruang rai bo. <sup>7</sup> Nathek nawaithek ne wie è thieg nathek ne gathek è rek pha ji rek bo. Gathek ne nathek rog hà um shii siikhad-ajo pha arek ro. <sup>8</sup> Gathek ne igong aphi pha thaluu ne hanyie ro nong shii achoi ro. Ji phachiang, gathek blia rek chiih-è bajo snak rek; nyieliieshii nathek hanyie jia shii de miihan arey yi phro ne gathek ne hanai habiu blia rek. <sup>9</sup> Gathek è ji rek pha ji ne, nyieliieshii gathek ne nong pha rangsua nak pha oi rone rek pha asi ro; gathek è rek pha ji ne nathek shii luagieng pha miiriig ji rek phi phro. <sup>10</sup> Gathek nathek rog um shii, gathek è nathek shii yao, “Hanyie blia rek pha anuii pho ne michie de achie rabo.”

<sup>11</sup> Gathek hi yao pha ji ne nyieliieshii nathek duchoi shii giak ne siikhad-ajo pha rai chiih-è gai bran ro blia shii de afa-afi rek bie pha yoi gathek è yoi.

<sup>12</sup> Gathek ne ji pha bran shii Ithong Isu Masi beng è yung chiih-è ithek shii isiie chai noh bo ne chiih-è awaithek chai sieng pha blia wiang bone phriie phro.

<sup>13</sup> Jishii nathek, khuiinothek nane bumuiithek, wie rek pha ji shii ajid rabo. <sup>14</sup> Yangne ithek gai ne gathek è nathek shii thoh pha jigi ji pha mua ne anuii pha de um phro. Ji è um arone, ithek shii isiie rek bo chiih-è ithek rog shii nyie ayie-aphi rabo, ji-è ai ne biwo rey ruii phro. <sup>15</sup> Jishii ithek shii mak duiine arek rabo; ji phachiang, khuiino duiine ithek shii phriie bo.

#### *Idohhè pha miyaogamthek*

<sup>16</sup> Ithong awai ne hanyie yi gethek ro liijiing pha Ithong chiih-è idang ishak chiih-è khiihà magunde liijiing phi bo.

<sup>17</sup> *Phaul re-è salam phi ro* Hì ne gui ro wad è zey: Hì pha lumuii è gune zab jigi shii (cheb) rek; hì duiine gune zey ro.

<sup>18</sup> Gethek ro Ithong Isu Masi ro bushun ne nathek zab shii um bo.

## THIMOTHI

### Shii Phaul Re-è Igobi Pha Jigigam

### Yaophi

Thimothi ne, Asia Minor pha filiao masipho ro, airo amuii ne Jewish ro chiih-è airo aphuii ne Grekh ro. Ithong ro blia shii ai ne Phaul ro nongpho ro, *Igobi pha Phaul ro jigi Thimothi shii zey pha ji ne miigak um miyao rog shii isiiè rek ne zey.*

Hì pha jigi shii igobi ne charch shii biidiie yua pho shii suang phriie ne zey ro. Hì pha muyua ne Jewthek nane Jewthek asi pho ro malaomajiao pha biidiethék ji ro. Hì pha sohjambling ne awie rone migi rek, chiih-è ug pha khani ji id pha jia shii giawo mua bie, chiih-è chieniing pha ji thoh ne chiih-è ayigey pha rek pho shii ne giawo muii ruii phro ne ji pha Chiang shii yie srane biidiie muyua ji yua. Ji pha jigi shii de charch pha gayiig nane misiasia pha Chiang shii yao ro, charch dumuiithek nane nongthek shii ziiig pha ichua um chid phro ne dum dum shii yao muii ro. Idohhè shii, nyie khi-è-rek ne Isu Masi ro wie khiao rek chid chiih-è yoh-yoh ibrog migiphothék rog hà gathek Chiang shii Thimothi shii yua.

#### **Iiing shii um pha ji**

*Yaophi (1:1-2)*

*Yao pha jithek shii charch nane ophisphothék now yi (1:3—3:16)*

*Hì pha blia Chiang Thimothi shii yao (4:1—6:21)*

<sup>1</sup> Phaul re-è, Masi Isu ro guaphasamoy Hamangkhung-aphuii ro gethek shii ragia rek pha nane gethek ro luthong Masi Isu re-è ro,

<sup>2</sup> Thimothi shii, migi pha guro zai dufuii: Aphuii Hamangkhung-aphuii nane Masi Isu gathek ro Ithong re-è na shii ne bushun, nane liijiing phi ro.

#### *Biidiie yua pho shii phriie*

<sup>3</sup> Gu Mesidonia hà wuii shii gu è na shii khung ne yao pha ji duine, gu ne na shii Iphisus hà rai bone yang muii ro. Giak bran è thiisa hàne biidiie pha muyuathek yua muii ro, chiih-è na ne ithek shii gak bo. <sup>4</sup> Ithek shii, jithek pha phaluiithek chiih-è blangthék ibengthék nyie ji ne khnaingthék rey khlei pha ji shii thoh yi pha yao bo; ithek ne Hamangkhung-aphuii ro phak nyie migi re-è thieg pha ji shii ne nyie blia oi ro. <sup>5</sup> Hì pha muyung Chiang è igang lubu, sang munow, chiih-è isbang migi re-è khia pha miie shii dong khlei. <sup>6</sup> Giak bran ne ji re-è khid din chiih-è awie pha bi-ie muphak pha lumuii hà san dun ro. <sup>7</sup> Ithek ne Hamangkhung-aphuii ro iphey pha masdothék rek yang, jishii ithek ne awaithek miyaogamthék shii agao ro chiih-è awaithek è nyie shii migi rog shii yao pha miyaothék Chiang shii agao ro.

<sup>8</sup> Gethek ne id Iphey shii wie re-è khoh arone Iphey ne wie ro. <sup>9</sup> Ji arone hì ne nowkhlei yi, iphey ji ne bran wie shii arab phi ro, jishii iphey chuipho shii nane suruii rek pho shii, chiih-è Hamangkhung-aphuii oi pho shii nane layogthék shii, chiih-è hanyie yi giang asi pho shii din ne ragung oi pho shii, chiih-è hanyie è awaithek aphuiithek amuiithek shii ua pho nane sgoh rek pho shii de, <sup>10</sup> chiih-è awie pha, chiih-è siulao rek pho, chiih-è zumphothék chiih-è biidiie yao chiih-è biidiie khagi rek chiih-è wie yua pha ji shii suang



rek pho shii rab phi ro. <sup>11</sup> Ji pha muyua ne muawie shii doh muui ro, Hamangkhung-aphuii ro biisiie pha Mua Wie nane khirzey Hamangkhung-aphuii re-è gu shii yao bone phi ro.

### *Hamangkhung-aphuii ro bushun shii chiong*

<sup>12</sup> Gu ne hanyie è gu blia shii chua phi pha gethek ro Ithong Masi Isu shii lasothek phi. Gu ne aishii laso phi nyieliieshii ai è gu shii airo blia rek mua sapho jo phi ne gu shii gua phi.

<sup>13</sup> Dohbi hane gu è aishii awie pha yao ne diig phi ne makhak-riing. Jishii Hamangkhung-aphuii gu shii bushun rek phi nyieliieshii gu ne migi de oi ba chiih-è gu ne nyie rek pha ji ne gu ne athieg ba ro. <sup>14</sup> Chiih-è gethek Ithong ro bajo bushun gu lakhung shii phi chiih-è gethek ro Masi Isu rog shii ò rek pha ji re-è migi nane miie ne gethek shii chodang pha phi. <sup>15</sup> Hi ne zai yao, zab nuui ne migi rek chid phro: Masi Isu ne layogphothek shii ragia pha sohjambling shii wuii ro. Gu ithek è de buii ro, <sup>16</sup> jishii Masi Isu ro jum ne ley gu rog shii um rone Hamangkhung-aphuii ne gu shii bushun rek phi, layog è de bajo layog gui shii, doh hà hanyie re-è aishii migi rek ne chiih-è idang chai mua pho shii de miiriig rey dun phro. <sup>17</sup> Idang pha Saja, isieng nane adoh pha, Hamangkhung-aphuii bie, aishii ne idang pha idang ilab nane biisiie ro! Amen.

<sup>18</sup> Timothi, gu ani, nyie yi chaigtek re-è dohbi hà na chiang shii yaojong pha duiine hi pha muyung ne na shii phi phro. Ji pha miyaogamtek shii migiang duiine kho srane mak rek bo, <sup>19</sup> chiih-è nawai migi nane sang now pha ji shii ruii bo. Giak bran ne ithek ro now pha ji shii anuii chiih-è ithek ro migi shii mua maphi ro. <sup>20</sup> Itek duchoi shii ne Hemenius nane Alezendar, hanyie shii gu è sakhathong pha blu shii phi srane lago phi; hi ne ithek ro makhak-riing pha ji shii gak yi pha yua ruii phro.

## 2

### *Charch pha misiasia*

<sup>1</sup> Zab è igobi, chiihphado, gu ne hi yao misiathek, khungtek, chiih-è zab brantek chiang shii Hamangkhung-aphuii shii lasothek midid bone ro; <sup>2</sup> sajathek chiih-è zab gaithek hanyie shii riichai umpha, ji è gethek aropha chiih-è liijiing re-è Hamangkhung-aphuii shii ilab rek rone wie giang re-è sieng mua phro. <sup>3</sup> Hi ne wie chiih-è gethek ro Ragia Hamangkhung-aphuii shii khung yi ro. <sup>4</sup> Ai ne zab shii ragia rek ne yang chiih-è zai shii id yi pha yang. <sup>5</sup> Chiih-è Hamangkhung-aphuii ne jia bie ro. Chiih-è Hamangkhung-aphuii nane brantek shii ò rek pha bran jia um ro, ji ne Masi Isu ro, <sup>6</sup> ai ne tharothamang shii ichad rek phi pha awai shii phi muui. Jine khrig ishak shii khagi ro—Hamangkhung-aphuii è zab shii ragia rek phi pha yang <sup>7</sup> chiih-è ji è gu shii ne migi nane izai pha mua ji yao yi pha Gaibrantek ro guaphasamoy nane masdo duiine thoh gey. Gu ne akhlam ro; gu ne izai yao ro!

<sup>8</sup> Zab migipho ne alijieg pha chiih-è akhnaing pha wad chaing sia bone gu ne yang muui ro, hò-aphuiithek ne Hamangkhung-aphuii shii phi srane misia shii awaithek ro wad chiing ne lijieg nane akhnaing rabo. <sup>9</sup> Gu ne hi de yang muui ro hò-amuii ne yung guui shii de isiie re-è guui bo; duchung pho ro khaziang duiine asi pha chiih-è san mihen, mukthothek chiih-è igong pha yung guui ne achia rabo, <sup>10</sup> jishii wie blia re-è hanyie shii giangtek hò-amuii

duiine ho muui pha ji ne zai lumui ro. <sup>11</sup> Hò-amui ne aropha chiih-è zab jum re-è dab bo. <sup>12</sup> Gu ne ithek shii yua pha de aphii chiih-è hò-aphuii lakhung shii riichai rek pha de aphii ro, ithek ne aro pha rai chid. <sup>13</sup> Nyieliieshii Adam shii igobi rab chiih-è chiihphado Eve shii rab. <sup>14</sup> Chiih-è Adam shii akhinrin ro; jishii hò-amui shii khinrin rek chiih-è Hamangkhung-aphuii ro Iphey shii chui maphi pha ji ne hò-amui ro. <sup>15</sup> Jishii ai ne migi rog shii chiih-è miie nane so bushun rog shii isiie rek chid arone\* hò-amui ne ani giak pha ji re-è ragia rey ruii phro.†

### 3

#### *Charch pha dumuiithek*

<sup>1</sup> Hi ne izai yao ro: hò-aphuii ne charch pha dumui rek yang arone ai ne wie blia shii chid ro <sup>2</sup> Charch pha dumui ne ichiig oi pha um chid; ai ne yiy jia um bie chid,\* ai ne ichiig pha, zud ne; ikhiing re-è rek ne ai ne awai hò shii awaithek bran shii wieho chid; ai ne yua mua chid; <sup>3</sup> ai ne phuii aniing pha chiih-è buii bran asi pha, jishii jum nane lijiing um chid; ai ne bang shii de amiie chid; <sup>4</sup> ai ne awai haliing shii de wie gayiig mua chid chiih-è awai aniphiing shii de zab pha lumui shii awai shii nuii yi chid. <sup>5</sup> Hò-aphuii yi awai haliing shii isiie rek pha athieg arone, nyie khi-è-rek ne Hamangkhung-aphuii ro charch shii gayiig mua magey phlei? <sup>6</sup> Ai ne migi shii de weg um chid, ji è ai ne nyigodog shii aphiang pha chiih-è Sakhathong duiine athe rabo. <sup>7</sup> Ai ne charch è fuangpha bran è de ilab rek pha hò-aphuii um chid, ji è ai ne lu arey pha chiih-è Sakhathong ibong shii aphang ruii phro.

#### *Charch pha nongphothek*

<sup>8</sup> Charch pha nongphothek ne ziig chiih-è isiie ne wie um chid; ithek ne phuii de aniing chiih-è bang de asgow chid; <sup>9</sup> ithek ne isang lubu munow rog shii migi re-è zai dong pha ji shii chuh re-è kho chid. <sup>10</sup> Itek shii ne igobi chai chid, chiih-è chiihphado, chai pha ji re-è hua ge arone, ithek ne blia rek chid. <sup>11</sup> Itek ro yiythek† de wie ziig nane amshiiy-alawoi pha um chid; ithek ne zab shii athiigpha nane isiie um chid. <sup>12</sup> Charch pha nongphothek ne yiy jia um bie chid,‡ chiih-è awai aniphiing nane awai haliing shii wie re-è gayiig rek mua chid. <sup>13</sup> Nongphothek hanyie è awaithek blia shii wie rek ne awaithek shii wie ithua mua ge, chiih-è awaithek ro migi Masi Isu shii um pha Chiang shii lububo è yao mua ro.

#### *Bajobo ug pha ji*

<sup>14</sup> Gu è na shii hì pha jigi zey pha duiine, gu ne khthiie wuii ne riig pha luthong ro. <sup>15</sup> Jishii gu chiadun arone, isieng Hamangkhung-aphuii pha charch, ji ne izai pha sarong nongpho ro Hamangkhung-aphuii ro hò shii ne nyie khi-è-rek ne gethek chung ziig rek rai pha ji hì pha jigi è ìd ruii. <sup>16</sup> Khama Bajobo pha ug nane gethek ro giang shii ne hanyie jia de asnai mua phro: ai ne tharohthamang rey ne dong khlei,

Ragung re-è rangsua rone doh yie,§

---

**2:13** 2:13: Igo 2:7; Igo 2:21-22    **2:14** 2:14: Igo 3:1-6    \* **2:15** 2:15: Ani re-è ragia rey ruii phro; dinne Ne ani giak pha ji re-è ragia rey ruii phro.    † **2:15** 2:15: Ai ne migi rog arone; dinne Itek migi rog arone.    **3:2** 3:2-7: Thd 1:6-9    \* **3:2** 3:2: Ai ne yiy jia um bie chid; dinne Luang jia yiygey bie chid.    † **3:11** 3:11: Itek ro yiythek; dinne Hò-amuii nongphothek.    ‡ **3:12** 3:12: Yiy jia um bie chid; dinne Luang jia yiygey bie chid.    § **3:16** 3:16: Ragung re-è rangsua rone doh yie; dinne Chiih-è, Ragung è, rone doh yi pha ji ne izai.

chiih-è khliiethek è aishii doh.  
 Ai Chiang shii ne soh duchoi shii yua,  
 Zab pha sohjambling è aishii migi rek,  
 chiih-è aishii ne hamangkhung hà noh dun.

## 4

### *Biidiie pha masdothek*

<sup>1</sup> Ragung è sang yao giak brantheek ne thog ruii pha ishaktek shii ne migi thoh ruii phro; ithek ne biidiie pha ragungtheek shii nuii ne ibuiithek è yua pha ji shii lua ruii phro. <sup>2</sup> Ji è rek pha yuathek ne shiie chieg rog shii ziao pha duiine khinrin pha khlampho è shiui ro, ithek munowtheek ne iyiy ro. <sup>3</sup> Jithek pha brantheek yua yiigey nane ji pha giak michiethek chie phane ichiig ro. Jishii Hamangkhung-aphuii è jithek pha michie ne hanyie yi migiphothek nane izai shii thieghpho ne lasothek misia pha iidoh ne chie pha rab phi ro. <sup>4</sup> Hamangkhung-aphuii miirab pha zab ne wie ro, snai pha ne nyie de oi, jishii zab ne lasothek pha misia rog shii choi ro, <sup>5</sup> nyieliieshii Hamangkhung-aphuii ro miyaogam nane misia ne Hamangkhung-aphuii shii choi ro.

### *Masi Isu ro khiao wie*

<sup>6</sup> Na è migiphothek shii hì yua arone, na ne Masi Isu ro khiao wie rey ruii phro, na ne nawai giang pha miyaogam pha migi nane izai re-è yua pha ji shii nawai ragungtheek shii wang pha duiine ro. <sup>7</sup> Hamangkhung-aphuii oi pha phaluii è ruang rek bo, nyieliieshii hì ne nyie blia oi ro. Nawai shii hamangkhung-aphuii chai ji è dab ne rai bo. <sup>8</sup> Siu pha blia shii de nyie magunde bid um ro, jishii ragung pha blia zab pha lumuii shii ne zab shii wie ro, jimagunde ji ne thuh nane phariang pha chai nyimanyi shii sbang rek ro. <sup>9</sup> Hì ne zab shii nuii ne chiih-è migi rek pha izai miyao ro. <sup>10</sup> Gathek ne diig\* rek ne blia gang rek, nyieliieshii gathek ro luthong ne isieng Hamangkhung-aphuii shii ruii, ai ne zab ro Ragia ro, hanyie è migi rek pha ji pho ro.

<sup>11</sup> Ithek shii hì pha miyaothek nane yuathek ji phi magey bo. <sup>12</sup> Nyieliieshii na filiao pha ji è hanyie de na shii luid ariig yi rabo, jimagunde migiphothek shii naro miyao, naro blia, naro miie, naro migi, nane gang shii khagi rek bo. <sup>13</sup> Idohhè gu wuii ruii shii, nathek ro ishak phi ne brantheek moe shii jigithek tham ne yao, na ne yua pha ji shii snak rek bo. <sup>14</sup> Nyie chaigtheek è yaojong pha nane dukhothek è wad nathek lakhung shii ruii shii nathek shii phijong pha ragung lasen ji shii asnai rabo. <sup>15</sup> Nawai ro ibi rey pha ji shii zab doh yi pha hì thek pha manathek shii rek bo ji è zab ne nawaithek shii doh muui ruii phro. <sup>16</sup> Nawai shii riig ne nawai muyua ji shii riig bo. Hì pha bliathek shii rek ne rai bo, nyieliieshii nathek rek arone, nyimanyi nawai nane hanyie è na shii yoi pha ji shii de ragia rey ruii phro.

## 5

### *Migiphothek ro gajathek*

<sup>1</sup> Firiangweg shii agiung rabo, jishii aishii ne nawai aphuii duiine yao bo. Nawai è filiao bran shii nawaithek khuiinothek duiine rek bo, <sup>2</sup> miriangweg ne nawaithek amuiithek duiine, chiih-è mileo bimithek shii nawaithek bumuiithek duiine, zab gang rog shii rek bo.

\* **4:10** 4:10: Diig; giak jigizey shii ne Suang um.

<sup>3</sup> Misiungthek hanyie yi zab re-è zai awaithek ji lei ne ithek shii ne ilab phi bo. <sup>4</sup> Jishii misiung shii aniphiing nane chem um arone, ithek ne awaithek haliing pha awaithek ro giang bliathek ji igobi rek srane, chiih-è ji duiine awaithek aphuii-amuii nane achinmoi shii ilab rek din ruii phro, nyieliieshii ji ne Hamangkhung-aphuii è chid pha ji ro. <sup>5</sup> Misiung hanyie yi aishii nong pha hanyie oi pha awai ji pho ne, awairo luthong ne Hamangkhung-aphuii rog shii chiih-è misia ne awai shii nong phi pha hanai nane habiu Hamangkhung-aphuii shii athodang pha lea bo. <sup>6</sup> Jishii misiung hanyie è awai chid pha ji igobi phi arone, ai ne isieng magunde iyjong pha duiine ro. <sup>7</sup> Hi pha muyua ne ithek shii phi bo, ji è hanyie jia magunde ithek rog shii ichiig arey. <sup>8</sup> Jishii hanyie jia de awaithek ro siangthang shii gayiig arek arone, nyayaochak shii ne awaithek ro haliing pha brantheke shii arek arone ithek ne migi shii snai ne migi arekpho è de awiedang pha rey dun ro.

<sup>9</sup> Misiung ne idam sariig arey sapho shiine thaluu misiungmuui rog shii lao ne sasab arek rabo. Hide lao ne ai ne luang jia yiygeyjong bie chid\* <sup>10</sup> chiih-è wie rek pha ibeng um chid: hò-amuii hanyie è awai anithek shii wie re-è ram phone, biwen shii awai hò hà choi ne, gai Masiphothek blia pha jum bliathek rek ne, diig shii brantheke shii nong chiih-è awai shii wie blia rek bsa hà phi ro.

<sup>11</sup> Jishii mileo misiung shii ne sasab arek rabo; nyieliieshii ithek ne siu re-è yang pha ji thog arone, ithek ne Masi re-è iidoh khid din magey phro, <sup>12</sup> chiih-è ithek ro igobi pha aishii sbang rek pha ji chui pha ichiig rey ruii phro. <sup>13</sup> Itheke de hò-hò lua ne ishak mua pha ji dab muui ro; ithek ne ayao pha miyao shii de gachitheke yao rone ji è de awie pha rek gai ro blia shii de snak rek pha dab ro. <sup>14</sup> Ji-è gu ne yang mileo misiungthek ne yiygey ne, aniphiing de um bo, chiih-è awaithek hòthek shii gayiig rek bo. Ji anine gethek ro makthek buii de ayao muui. <sup>15</sup> Giak misiungthek ne sakhatong shii gieng pha yiejong ro. <sup>16</sup> Jishii hanyie Masipho hò-amuii ro haliing shii misiung um arone, ai ne ithek shii gayiig chid chiih-è charch shii miihan aphi chid, ji anine charch re-è misiungmuui hanyie ai ne ji lie ne aishii ne gayiig mua.

<sup>17</sup> Dukhothek hanyie è diig rek rone dumuii blia wie rek pho shii ne gai re-è huàk ne choi chid nyayaochak arone yao pho nane yua pho shii mua chid phro. <sup>18</sup> Jigi shii yao, rawoi yi iwoi nan ramuii shii iphab aphan rabo chiih-è “bliapho ne awaithek ro mathang shii ne phi chid.” <sup>19</sup> Dukhothek shii suang the pha ji shii ne nyi re-è muna khagitheke oi sapho shii ne anuii rabo. <sup>20</sup> Hanyie è layog rekpho shii ne brantheke moe shii giung bo, ji anine gaithek de rum ruii phro.

<sup>21</sup> Hamangkhung-aphuii chiih-è Masi Isu nane so hamangkhlietheke moe shii, nathek è nyie rek pha ji shii ne giak shii haro rek giak shii haro arek pha ji arek yi hi yao pha ji nuui yi pha gu nathek shii surua rek ne yao ro. <sup>22</sup> Ithong ro blia rek pho ithek shii phi muui pha brantheke shii wad ruii pha khthiie arek rabo. Gaithek ro layog shii ichua ayie rabo; nawai shii igang ruii bo.

<sup>23</sup> Kho aniing bie rabo, jishii na bleb-bleb rad pha ji re-è nawai luirii pha ji shii nong pha angurphuui lujia niing magey bo.

\* **5:9** 5:9: Luang jia yiygeyjong bie chid; dinne Awai gey shii migi rek chid. **5:18** 5:18: Iphy 25:4Mth 10:10; Lug 10:7 **5:19** 5:19: Iphy 17:6; 19:15

<sup>24</sup> Giak brantheek ro layogtheek ne miang doh, chiih-è ithek ro layogtheek ne ibi hàne awaitheek shii chua ruii phro; jishii giak ro layogtheek ne dohrasey re-è doh bie ruii phro. <sup>25</sup> Ji duiine wie blia ne miang doh, chiih-è miang adoh pha ji ne a-ug mua phro.

## 6

<sup>1</sup> Hanyie yi khiaothek lei ne ai ne awaitheek masdo shii isiie re-è ilab phi chid, ji è hanyie magunde Hamangkhung-aphuii ibeng nane gethek è yua pha ji shii ne wie asi rone ayao mua. <sup>2</sup> Masipho masdo re-è rey pha khiaothek shii muriig-achiing pha arek rabo, chiih-è ithek ne migiphotheek ro. Ji phachiang, ithek ne awaitheek chung din è de huak ne blia rek, nyieliieshii ithek ro blia re-è phua pho ne ithek è miie pha migiphotheek ji ro.

### *Biidie yua pha nane izai bukhotheek*

Nathek ne hì thek zab shii yao ne yua chid. <sup>3</sup> Hanyie è yoh miyao shii yua chiih-è Ithong Masi Isu ro izai miyaogamtheek rog shii anuii arone chiih-è gethek ro yua pha giang re-è yoh ro. <sup>4</sup> Nyigodog shii phieng srane nyie de athieg ro. Aishii ne miyaogamtheek chiang shii khnaing ne gui noh pha awie pha chid pha ji um ro, chiih-è ji ne miegrüie, guipha, makhak-riing awie pha munow shii yie ro, <sup>5</sup> chiih-è khanithek yi blia aphì pha chiih-è izai oi pha brantheek è ne bleb-bleb khnaing ro. Itheek ne giang yi bukho rek pha lumuii rone now ro. <sup>6</sup> Wie, gethek shii nyie um pha jishii khriig arone giang re-è ne gethek shii bajo bukho rab phi. <sup>7</sup> Gethek ne sohjambling shii nyie yie? Nyie de asi ro! Gethek ne sohjambling è nyie yie ne dun phlei? Nyie de asi ro. <sup>8</sup> Ji-è chiihphado, gethek shii michie nane yung um arone ji ne gethek shii khriig ro. <sup>9</sup> Jishii hanyie yi bukho mua yang arone chuajan shii chiih ne awie pha nane bajo bi-ie nane chidtheek shii mua dun pha ibong shii phang ne, nyie yi awie pha nane mua pha ji shii reng ruii. <sup>10</sup> Chiih-è bang shii miie phane zab awie ichuathek pha iikhiing ro. Giak ne ji shii mua pha yang chiih-è ji pha chiang shii ithek ne migi pha lumuii ji è ruang rey dun, chiih-è ithek ne bajo duhug um srane ithek ro lubuthek ne chuidun.

### *Hanyiehanyie ro miyuathek*

<sup>11</sup> Jishii, Hamangkhung-aphuii ro bran, hì thek zab shii toh muii bo. Giangtheek, hamangkhung-aphuii duine, migi, miie, zud, chiih-è zum shii mua pha bidiang bo. <sup>12</sup> Nawaithek ro migi shii khama ran mua pha ji ran bo, chiih-è nawaithek ne idang pha chai shii yang bo; chiih-è nawaithek ro migi yi bajo khagi pha ibi shii chuh è nuii magey shii Hamangkhung-aphuii è hì pha chai hà ho ro. <sup>13</sup> Hamangkhung-aphuii moe shii, hanyie è chai ne zab manathek shii phi, chiih-è Masi Isu ibi, hanyie è awai migi shii chuh re-è Phonthius Philath ibi shii nuii bone, gu nathek shii yung <sup>14</sup> chiih-è nathek shii phi pha muyung shii nuii bo, chiih-è Ithong Isu Masi yi khia pha Inai thogdang pha ithek shii isiie ruii bo. <sup>15</sup> Airo khia pha ji ne khirzeyley pha Hamangkhung-aphuii nane khopho jia bie pha chiih-è Saja pha sajathek chiih-è Ithong pha Ithongtheek è khriig ishak shii yie ruii phro. <sup>16</sup> Awai ji jia idang-idang isieng rai bie; ai ne hanyie jia de athog muii pha isang hà rai. Hanyie jia de aishii ariig ro; hanyie jia de aishii adoh mua. Ilab nane idang pha blu ne airo ro! Amen.

<sup>17</sup> Hanyie shii hì pha chai pha mana bukho um pho shii nyigodog arek rabone yung bo, jishii ithek ro luthong pha ji ne thaluu pha mana bukho shii arek rabo, jishii hanyie è gethek shii zab pha lubo yie phi pha Hamangkhung-aphuui shii rek bo. <sup>18</sup> Wie blia boh chiih-è bliathek shii bukho rey yi bo, chiih-è lubusua rek ne gai rog shii thang bo ithek shii yung bo. <sup>19</sup> Ji duiine ithek ne nuruii awaithek ro khrab yi bone nyie yi phariang pha wie ii-àk sarong rey ruii. Chiih-è ji è ithek ne nyie izai chai shii yang muui ruii phro.

<sup>20</sup> Thimothei, nyie yi na shii gayiig pha phi pha ji shii ne wie re-è ragia rek bo. Hamangkhung-aphuui shii makhak-riing pha miyao ruang ruii bo chiih-è brantheke ne khani rone yao pha bi-ie khnaing pha ji re-è ruang rai bo. <sup>21</sup> Giak ne ji um rone yao, chiih-è ji pha Chiang è ithek ne migi pha lumuii shii ne sanmuui.

Hamangkhung-aphuui ro bushun ne nathek zab rog shii um bo.

## THIMOTHI

### Shii Phaul Re-è Nyichiieng Pha Jigigam

### Yaophi

*Phaul re-è Thimothi shii Nyichiieng pha Jigigam* filiao nong gieng pha nane din pha ilkhi duiine boh shii um pha nujo pha muyua Thimothi shii yao. Miyaosiu ne zud pha ji ro. Thimothi shii ne migi re-è Isu Masi ro khagi rek yi pha chiih-è izai yua pha Mua Wie ji nane Surua Ihèg shii kho pha, chiih-è airo masdo nane yuapho duine blia rek pha zab shii diig duchoi shii awai blia ji rek pha lububo rek phi.

Thimothi shii ne phriie “bi-ie nane awie pha khnaingthek shii adoggieng bone, ji ne wie arek ro.” Jishii hanyie è ithek shii yoi pha branthek shii mua bie yi ro.

Hì thek zab shii ne, Thimothi shii zeypho awai chai pha miirag nane awai migi, jum, miie, zud diig khui pha ji shii nowkhlei yie ro.

#### **Iling shii um pha ji**

*Yaophi (1:1-2)*

*Chiong nane yao (1:3—2:13)*

*Yua nane phriie (2:14—4:5)*

*Phaul awai ro tharo (4:6-18)*

*Jongsha (4:19-22)*

<sup>1</sup> Hamangkhung-aphuii è yang pha Isu Masi ro guaphasamoy Phaul re-è, nyie gethek yi Masi Isu rog ò um pha sbang pha chai shii yua pha thoh ge.

<sup>2</sup> Guro bushun dufuii Thimothi shii:

Aphuii Hamangkhung-aphuii nane gethek ro Ithong Masi Isu ne na shii bushun, nane liijung phi bo.

#### *Lasothek phi pha nane lububo rek*

<sup>3</sup> Gune, gui blangthek re-è rek pha duiine hanyie shii gu è sang munow rog shii blia rek pha Hamangkhung-aphuii shii lasothek phi. Gu è hanai nane habiu gu misiathek shii na shii now pha duiine gu ne aishii laso phi ro. <sup>4</sup> Gu ne naro miegkothek shii now muui ro, chiih-è gu ne na shii bajo riig yang muui ro, ji è gu ne lubo rog shii ley mua ruui phro. <sup>5</sup> Naro moi Lois nane naro amuii Eunise shii de um pha ichua, naro isiie migi shii de now khlei muui ro. Gu ne migi rek ji ne na shii de um ro. <sup>6</sup> Gu è wadthek na lakhung ruui magey shii Hamangkhung-aphuii re-è phi pha lasen shii isieng ruui yi pha ji pha Chiang gu na shii nowkhlei yi. <sup>7</sup> Chiih-è Hamangkhung-aphuii re-è gethek shii phi pha Ragung ji ne gethek shii murumdum rek pha aphi ro; ji pha Chiang, airo Ragung ne gethek rog blu, miie, nane zud pha zan phi ro.

<sup>8</sup> Chiihphado, gethek Ithong shii khagi rek pha awo rabo, din ne Isu Masi Chiang gu phatheg hà rai pha ji shii awo rabo. Ji phachiang shii, Hamangkhung-aphuii re-è na shii chua phi pha duiine Mua Wie pha diig shii nawai ro ichua rek bo. <sup>9</sup> Ai ne gethek shii ragia rek ne gethek shii awai bran rey yi pha ho phro, nyieliieshii gethek è nyie rek pha ji re-è asi ro, jishii nyieliieshii ai awai ro blia nane bushun re-è ro. Ai è gethek shii phi pha awai bushun ne ishak ajo ba pha ibi Masi Isu Chiang re-è phijong, <sup>10</sup> Jishii tuh hì ne gethek ro Ragia Masi Isu wuii ruui pha ji è gethek shii dong phi ro. Ai è iy pha blu shii jong muui chiih-è muawie ji è a-iy pha chai ji shii dong phi.

11 Hamangkhang-aphuui è gu shii Mua Wie ji yao pha guaphasamoy nane masdo duiine boh ro, 12 chiih-è hi ne ji pha Chiang re-è gu ne hi pha manathek shii diig rey ro. Jishii gu ne thuh de ley migi um ro, nyieliieshii gu ne hanyie shii migi rek aishii ne thieg, chiih-è migi rek nyie yi gu shii phi pha blia ji pha Inai ji thogdang pha ai ne ragia rek mua.\* 13 Na shii iikhiing shii luagieng yi pha duiine, gu è na shii yuajong pha izai miyaogamthek shii chuh re-è khoh bo, chiih-è gethek ro Masi Isu rog ò rek pha miie nane migi shii rey ne rai bo. 14 Hanyie gethek shii rai pha Ragung So pha blu re-è nathek shii phi pha blia shii wie manathek shii ruii bone nathek shii yao ro.

15 Nathek ne thieg, zab Asia pha du-ùà, Phygelus nane Hermogenes dungdang ne gu shii ne thoh marui. 16 Onesiphorus haliingpho shii ne Ithong è bushun doh yi bo, nyieliieshii ai è gu shii ne bleb-bleb sang phi. Gu ne phatheg hà um pha ji shii de ai ne awo ro, 17 jishii ai ne Rom hà thogdang shii, ai ne gu shii adoh sapho shiine jao ne sow. 18 Ji pha Inai shii Ithong airo bushun ne aishii phi bo! Chiih-è ai ne gu shii Iphisus hà khama wie rek phi pha ji nathek ne wie re-è thieg ro.

## 2

### *Masi Isu ro isiie siphahi*

1 Gu dufuui, na shii, Masi Isu rog shii gethek ro ò bushun ji è gang rek bo. 2 Ai ne bajo khagi moe shii nathek gu re-è yoi pha muyuathek shii yie bo, chiih-è hanyie è gaithek shii de yua mua ruii pha, migi bran ithek shii phi muui bo.

3 Masi Isu ro isiie siphahi duiine, nawaithek ro diig ichua ji yie bo. 4 Wie blia rek ramuii pha siphahi ne awairo yungpho pha ophispho shii nya yie chiih-è fuang pha bran ro chai ne ithek blia shii alao yi. 5 Hanyie è chua ne ranpho ne kothek shii anuii sapho shii ne lasen ayang muui phro. 6 Raigpho hanyie è diig blia rek ruii pho ne ibi pha yamiing mathang um chid. 7 Gu è nyie yao pha Chiang shii now bo, nyieliieshii Ithong re-è na shii zab id muui yi ruii phro.

8 Gu è yao pha Mua Wie ji duiine Isu Masi shii now bo, hanyie yi iy pha ji re-è hò, hanyie yi Dawid ro riing ro. 9 Nyieliieshii gu è Mua Wie yua, gu ne diig rek chiih-è gu ne suruii pho duiine shiirnai rek ne phang muui. Jishii Hamangkhang-aphuui pha miyaogam ne shiirnathek re-è aphan ro, 10 chiih-è ji pha giawo ne Masi Isu re-è rey pha nane idang pha biisiie yie pha ji shii ithek shii de mua yi pha Hamangkhang-aphuui è gua pha bran Chiang shii gu ne zab shii zud. 11 Hi thek ne zai yao:

Gethek ai rog shii iy arone,  
gethek de ai rog shii sieng ruii phro.

12 Gethek ne athodang pha zud arone,  
Gethek de ai rog shii kho ruii phro.

Gethek ne ai rog shii snai arone,  
ai de gethek shii snai ruii phro.

13 Gethek ne isiie asi arone,  
ai ne isiie shii rai yi phro,  
nyieliieshii ai ne awai shii biidiie asi rone arek mua phro.

### *Nuii pha bliapho*



<sup>14</sup> Nawai brantheek shii hi now yi bo, chiih-è miyaogamtheek Chiang shii mak arek rabone ithek shii Hamangkhung-aphuii moe shii surua phriie bo. Hi ne wie arek ro, jishii hanyie è nuii pha brantheek shii mua ruii phro. <sup>15</sup> Hanyie Hamangkhung-aphuii ro izai mua shii wie yua ne, awairo blia shii awo pha bliapho duine, Hamangkhung-aphuii mieg moe shii ley nuii pha ji yang pha nawairo wie ji rek bo. <sup>16</sup> Nyie yi brantheek shii Hamangkhung-aphuii re-è ruang rek bie pha, sohjambling pha nane bi-ie miyao ji re-è ruang rek bo. <sup>17</sup> Ji-è yua pha ji ne saduii re-è isiu shii chie muui pha duine ro. Ji pha manathek shii yua pha bran nyi ne Hemenius nane Philethus ro. <sup>18</sup> Itheek ne izai lumuii shii thoh marui rone getheek ro hòi pha ji ne reyjong rone yao ne izai pha gai migiphothek shii samdiig yi ro. <sup>19</sup> Jishii Hamangkhung-aphuii è zieg pha ii-àk sarong ji shii ne anai mua ro; chiih-è ji shii ne hi pha miyaogamtheek ne zeyjong ro: “Ithong ne thieg hanyie yi ai ro.” Chiih-è “Hanyie yi Ithong ro rone yao ithek ne awie pha rek pha ji re-è ruang khid chid.”

<sup>20</sup> Hò boh shii ne zab ichuatheek pha skhongtheek nane shiikhiia um ro: giak ne san luman re-è rab chiih-è giaktheek ne hing nane nyiak re-è rab pha ro; giak ne mugak blia pha ro, giak shii ne thaluii kho bie ro. <sup>21</sup> Hanyie è awaitheek shii zab awie pha manathek re-è sud pho shiine, wie blia shii kho ruii phro, nyieliieshii ithek shii ne zid ne awaitheek spho shii kho yi pha, zab wie blia shii kho pha sarolong ro. <sup>22</sup> Filiaomiliao shii awie pha chid pha ji shii thoh muui bo, chiih-è giang, migi, miie, chiih-è lijiingtheek hanyie shii Ithong è nong phi pha ho pha igang lubu pho rog shii ò rek ne snak ne sgow bo. <sup>23</sup> Jishii bi-ie nane asi pha khnaingtheek re-è ruang rek bo; natheek ne thieg ithek ne getheek shii gui pha jiha the muui ro. <sup>24</sup> Natheek Ithong ro khiao ji re-è, natheek ne agui rabo. Natheek ne zab shii bushun rek bo, hanyie è nawai ro gidiegtheek shii khriig rek pha duine hanyie yi jum wie nane jum masdo duine bushun rek bo, <sup>25</sup> na è makpho shii khriig rek shii jum um chid, ji duine Hamangkhung-aphuii ne ithek shii lubukhid ne izai shii id mua yi pha wie jo phi ruii phro. <sup>26</sup> Chiih-è chiihphado awaitheek munohtheek wuii magey shii ne, chiih-è hanyie è ithek shii zum srane ithek shii ji pha yang hà nuii yi pha Sakhatong pha ibong re-è yoh rey ruii phro.

### 3

#### *Idohhè pha inai*

<sup>1</sup> Now bo iidohè pha inaitheek shii diig pha ishak um ruii phro. <sup>2</sup> Brantheek ne munyua, sgow, nyigodog, nane, wiangwe; ithek ne makhak-riing, awaitheek aphuii-amuiitheek shii anuii, bushun oi rai pha chiih-è giang de arek phro; <sup>3</sup> ithek ne bushun arek, khlam pha, guirai, chiih-è makhak-riing; ithek ne wie shii khiijai; <sup>4</sup> ithek ne khinrin rek bie yie, chiih-è nyigodog shii phieng rek; ithek Hamangkhung-aphuii è muna awaitheek chid pha ji miie pha; <sup>5</sup> ithek ne gatheek ro giang shii ibeng re-è khoh bie, jishii zai blu shii ne snai muui. Ji è rek pha brantheek re-è ruang rai bo. <sup>6</sup> Itheek gai ne brantheek hò khud chiih-è arey aho pha hò-amuiitheek hanyie shii ithek ro layogtheek pha ichiig re-è doh ne ruii pha chiih-è zab ichuatheek è chid pha ji re-è yie ne ruii, <sup>7</sup> ji pha hò-amuii hanyie yi id pha idang bidiang jishii khuchung de izai athieg mua pho lakhung shii phriie phro. <sup>8</sup> Jannes nane Jambres è Moses shii gidieg rek pha duine—Jihà brantheek hanyie ro khanitheek ne blia arey

chiìh-è hanyie yi migi shii buyud rey dun pha brantheek ne izai shii gidieg rek. <sup>9</sup> Jishii ithek ne ruang awuui mua ro, nyieliieshii ithek ne khama bi-ìe rone zab è riig ruii phro. Jine Jannes nane Jambres shii de reyjong ro.

### *Idohhè yuathek*

<sup>10</sup> Jishii nathek ne gu muyua shii lua bo, chiìh-è gu blia shii, chiìh-è guro blia pha chai shii luagieng bo; nathek ne guro migi, guro jum, guro miie, guro zud, <sup>11</sup> guro diigchiaothek, chiìh-è guro diigtheek shii riigjong ro. Gu shii Anthiokh, Ikhonium hà rey, chiìh-è Listhra, hà diig diigchiaothek rek pha ji shii gu è zud pha jithek ne nathek zab thieg jong! Jishii Ithong è gu shii jithek zab re-è ragia rek phi. <sup>12</sup> Zab hanyie magunde Masi Isu rog shii ò rek ne wie chai shii rai yang arone aishii ne khui ruii phro; <sup>13</sup> chiìh-è awie pha brantheek nane khinrinpho ne awie pha ji è awiedang pha ji è de gai shii khinrin ne awaithek shii de khinrin ruii phro. <sup>14</sup> Jishii nathek shii yuajong chiìh-è migi shii chuh rek ne athodang pha zaithek rek bo. Nathek ne thieg hanyie yi nathek ro masdothek, <sup>15</sup> chiìh-è now bo nathek ne ani pha ishak re-è yie ne, nyie yi nathek shii khani phi mua pha Masi Isu shii migi rek pha ji re-è giawo hà lua mua yi pha nathek ne So Jigithek shii ne thiegjong ro. <sup>16</sup> Zab Jigithek ne Hamangkhang-aphuui re-è thog chiìh-è kho\* ne izai shii yua, asi pha ji shii giung, biidiie shii khriig rek, chiìh-è giang shii sieng pha nong phi, <sup>17</sup> ji è brantheek hanyie è Hamangkhang-aphuui ro blia rek pho shii ley idlie ne wie blia zab shii khriig rek chid.

## 4

<sup>1</sup> Hamangkhang-aphuui nane Masi Isu um pha moe shii ne, hanyie è isieng nane iy pha ji shii chua ne, chiìh-è nyieliieshii ai ne Saja duiine, khoh pha wuii ruii phro ne <sup>2</sup> mua shii yua bo, ji shii ne din ne de yao bo (ishak khriig magunde akhriig magunde), na è zab shii lijiing è yua pha duiine nyu ne, phriie chiìh-è lububo rek phi bo gu ne surua khung phro. <sup>3</sup> Izai yua pha ji shii brantheek ne anuii pha ishak thog magey shii, chiìh-è nyie yi awaithek è yoi yang pha ji shii yao pha mana re-è mana masdothek shii khrab ne ithek ne awaithek è nyie nuui yang pha ji shii yua ruii phro. <sup>4</sup> Itek ne izai nuui pha ji è khid dun phro chiìh-è ithek ro khani ne phaluiihèg hà rai dun phro. <sup>5</sup> Jishii nathek ne zab khi-è-rek pha ishak shii magunde ji shii zud bo nawaithek shii zud bo; Mua Wie yua pha blia rek bo, Hamangkhang-aphuui ro khiao duiine nawaithek ro blia rek bo.

<sup>6</sup> Gu shii ne; zid pha ishak thog sha ro; hì pha chai shii thoh pha guro ishak ne ichiìh um ro. <sup>7</sup> Gu ran muui pha ji shii, gu ne ranjong, gu ne khama ran chid pha ji shii ranjong ne, chiìh-è gu ne migi shii ruiijong.\* <sup>8</sup> Chiìh-è thuh thiisa hàne nyie yi Hamangkhang-aphuui rog shii rai pha rangsua chiang yang pha lasen ji ne gu shii khan muui ro. Ithong hanyie yi giangtheek Chua pha ji re-è gu shii lasen ne ji pha Inai gu shii phi ruii phro—Chiìh-è gu shii asi bie pha, jishii zab hanyie è miie rog shii ai dong ruii phro ne khan pho shii de phi ruii phro.

### *Hanyiehanyie ro miyaogamtheek*

<sup>9</sup> Gu shii kthiie wuii mua pha nawai shii bidiang. <sup>10</sup> Demas ne duchung

**3:11** 3:11: Blk 13:14-52Blk 14:1-7Blk 14:8-20 \* **3:16** 3:16: Zab Jigithek ne Hamangkhang-aphuui re-è thog chiìh-è kho sapho; dinneZab Jigithek ne Hamangkhang-aphuui re-è thog jide kho sapho.

\* **4:7** 4:7: Migì shii ruii; dinne Guro izai sbang shii. **4:10** 4:10: Khol 4:14; Phlm 24; 2Khor 8:23; Gal 2:3; Thd 1:4

pha sohjambing rog shii miie dun chiih-è gu shii thoh srane Thesalonikha hà dun dun. Khresens ne Galathia hà dun dun, chiih-è Thaidas re-è Dalmathia hà dun dun. <sup>11</sup> Gu rog shii Lug bie. Marg shii sow ne na rog shii noh ruii bo, nyieliieshii ai ne gu ro blia shii nong mua. <sup>12</sup> Gu è Thychikus shii Iphisis hà thoh gey. <sup>13</sup> Na dun shii, Kharphus rog Throas hà guro phadiig bia marui pha ji yie phi bo; chiih-è jigi de shukhug re-è rab pha jigi yiedo phi bo.

<sup>14</sup> Jabapho Alezendar è gu shii ne bajo boh diig phi; awai è nyie rek ruii pha ji è Ithong ne aishii lasen phi ruii phro. <sup>15</sup> Nawai shii airo suang ji è ragia rek bo, nyieliieshii ai ne gethek ro mua shii bajo buii re-è gak muui ro.

<sup>16</sup> Igobi gu ne gui shii ragia rek shii hanyie de gu Chiang shii ariu ro; zab è gu shii ne ji thoh marui. Hamangkhung-aphuii ne ithek suang shii sasab ayie rabo! <sup>17</sup> Jishii Ithong gurog shii rai ne chua phi, ji è gu ne jab mua ne Gaibrantek shii yao muui pha; chiih-è gu ne iy pha yaothiek pha ji è ragia rey ge. <sup>18</sup> Chiih-è Ithong è gu shii zab awie pha ji è ragia rek ruii phro chiih-è awai ro hamangkhung pha Sajathua hà ragia è noh ruii phro. Aishii ne idang nane idang biisiie rey bo! Amen.

### *Idohhè pha salamthek*

<sup>19</sup> Gu è Phrisila nane Akhuila chiih-è Onesiphorus pha haliing shii de salamthek thoh gey. <sup>20</sup> Erasthus ne Khorinth hà rai dun ro, chiih-è gu è Throphimus shii Milethus hà thoh marui, nyieliieshii ai ne rad muui. <sup>21</sup> Hakhangshak athog ba pha ibi shii dun pha bidiang bo.

Eubulus, Phudens, Linus, chiih-è Khlaudia è awaithek ro salamthek thoh ge, chiih-è ji duiine gai Masipothek de nathek zab shii salam thoh gey ro.

<sup>22</sup> Ithong ne nathek ragung rog shii um bo.

Hamangkhung-aphuii ro bushun ne zab nathek rog shii um bo.

## THAIDAS Shii Phaul Re-è Jigigam Yaophi

Thaidas ne Gaibran è migi rey srane hanyie yi Phaul rog Hamangkhang-aphuii bliia shii bliapho nane bliia rek gieng pha bran ro. Phaul è Thaidas shii jigigam zey pha ji ne Khrethe hà rai pha filiao jia hanyie aishii nongphi ai beng shii zey phro, hanyie shii thiisa Charch pha bliia shii dumuii rek yi pha thoh marui. Jigi ne miigak uom pha chiang shii zey.

Igobi, Thaidas shii nowdin yi ji è Charch pha dumuii phothek shii khi-èrek pha ziig um chid, chiih-è hì ne Khrethantheke shii rai pha awie pha ziigphothek duine arai rabo ne yao. Din ne, charch shii yoh yoh ibrogthek, Firiang, chiih-è miriang shii chiih-è (hanyie yi miliao bimi shii yua chid) chiih-è filiao bufuii, chiih-è khiaothek, shii yua pha chiang shii khi-èrek ne yua pha ji de Thaidas shii yua. Idohhè shii zeypho Thaidas shii Migipho ro ziig chiang shii yua phi pha ji zey, miigak ne lijiing rai ne chiih-è dung ne rai pha, chiih-è khiwegkho, khnaing rai pha ji, nane Charch shii che rai pha ji thoh muui bo.

### **Iliing shii um pha ji**

Yaophi (1:1-4)

Charch pha ophisphothek (1:5-16)

Charchthek shii yoh yoh ibrog pha bliia (2:1-15)

Lububo rek pha nane Phriie (3:1-11)

Jongsha (3:12-15)

<sup>1</sup> Hamangkhang-aphuii ro khiao nane Isu Masi ro Guaphasamoy Phaul ro.

Gu shii ne gua ne Hamangkhang-aphuii è gua pha bran ro migi shii nongphi ne ithek shii ne gathek ro migi pha Izai shii yua pha ji shii noh yi pha thoh ge, <sup>2</sup> Nyie yi idang pha chai luthong ji shii rai ro. Hamangkhang-aphuii hanyie ne biidiie asi pha ji ne, gethek shii hì pha chai ne ishak jao pha ibi è sbang rek, <sup>3</sup> khriig ishak shii ai è ji shii awai mua shii dong phi. Jine gu shii phijong ro, chiih-è gune gethek ro ragia Hamangkhang-aphuii muyung ji è yao.

<sup>4</sup> Gethek ro ò um pha migi shii gu zai dufuii, Thaidas shii gu hì zey.

Aphuii Hamangkhang-aphuii nane Masi Isu gethek ro ragia è na shii ne bushun nane lijiing phi bo.

### *Khrethe shii Thaidas ro bliia*

<sup>5</sup> Jine nyieliieshii nane zab pha thawun shii Charch pha dukho bow srane ithek thuh de nyie chid pha ji mana shii khriig rek yi pha gune na shii Khrethe hà thoh marui. Gu è yao pha ji nowkhlei bo: <sup>6</sup> Dukhowthek ne ichiig oi pho rek chid; aine yiy jia um bie chid,\* chiih-è airo anipiing migiphothek um chid chiih-è aphrai mua rone chiih-è miyao anuii pho rone hanyie de athey mua rabo. <sup>7</sup> Charch pha dukho nya rek dang ne Hamangkhang-aphuii ro bliia pha ilkhi ro, ai ne athey phoh um chid. Ai ne wiangwe pho nane khthiie lijieg pho nane phuiithiig pho nane ichiigsow pho chiih-è bang giichak pho arey mua phro. <sup>8</sup> Ai ne bran shii wieho chid

**1:4** 1:4: 2Khor 8:23; 2Thi 4:10

**1:6** 1:6-9: 1Thi 3:2-7

\*

**1:6** 1:6: yiy um bie chid; dinne luang

jia yigye bie chid.

chiih-è nyie wie shii miie rek chid. Ai ne awai shii zud ne, giang, gang, nane isiiewie um chid. <sup>9</sup> Ai ne nyie mua shii migi rek mua chiuh-è nyie muyua shii nuii mua pha ji shii ne chuh è khoh chid. Ji duiine ai ne gai shii izai muyua ji è lububo rek mua chiuh-è gidieg pho shii ne ithek ichiig doh mua yichid.

<sup>10</sup> Chiuh-è de bajo um ba, Jewish ro giang è rey pha migipho shii, hanyie ne ithek ro awie pha khani ji è gai shii gidieg nane khinrin rek. <sup>11</sup> Ithek mulo rai hi ne gak chid phro, nyieliieshii ithek ne nyie ayua pha ithek muyua ji è chiuh-è biwo lumuii pha bang rab ne zab pha halingphothek shii duhug rek ro. <sup>12-13</sup> Hi ne Khrethan awai ro, awaithek ro chaig jia è, hanyie izai yao shii ai è yao, “Khrethantheke ne idang khlamphothek ro, awie pha ibeymuthung, nane siikhad-ajo pha sugowthek ro.” Ji pha chiang è nane ithek shii chieg giung bo, chiuhphado ithek shii de chiuh-è migi um ruii phro <sup>14</sup> chiuh-è Jew phaluithek ne akhoh sha phro chiuh-è hanyie è izai shii snai pha bran è thog pha tharothamang pha muyungthek de akhoh sha phro. <sup>15</sup> Hanyie ne awai è awaishii igang lei ne zab awai shii igang ro; jishii hanyie yi zia nane migi arekpho, ithek ro khani nane siuthek ne zab zia ro. <sup>16</sup> Ithek ne yao ithek ne Hamangkhung-aphuii shii thieg ro, jishii ithek ro blia è ne aishii snai muui. Ithek ne khjaipho nane miyao shii anuiipho ro, ithek ne nyie de wie rek pha a-ò ro.

## 2

### *Mua khriig*

<sup>1</sup> Jishii na ne nyie yi khriig muyua nuii pha ji yua chid phro. <sup>2</sup> Wegsua hò-aphuiitheke shii phuii athiig yi pha, khani sang rek pha, chiuh-è zud pha; ithek ro migi shii khriig rek pha, miie nane zud yi pha yua bo. <sup>3</sup> Ji duiine wegsua hò-amuiitheke shii de gang chai shii rai pho hò-amuii duiine rek bo ne yua bo. Ithek ne biidiie pho nane phuii pha khiao arek yi rabo. Ithek ne nyie wie ji shii yua yi bo, <sup>4</sup> chiuh-è miliao hò-amuiitheke shii de awaithek geythek nane aniphung shii miie pha dab yi bo,

<sup>5</sup> Chiuh-è awai shii wie nane igang, chiuh-è hanyie yi awai gey shii ilab rek pha wie yiy rey srane, hanyie de Hamangkhung-aphuii è thog pha mua shii awie rone ayao ruii phro.

<sup>6</sup> Ji duiine filiao hò-aphuiitheke de zud rek bone ne yua bo. <sup>7</sup> Zab pha manatheke shii nawaithek de wie ziig pha miiriig rek bo. Nawai muyua shii izai nane lubu phi ne rek bo. <sup>8</sup> Makhak-ariing pha khriig miyaogam shii kho bo, chiuh-è gethek chiang shii nyie buii yao pha lumuii oi pha chiang è naro suangpho shii ne biwo hà ruii muui phro.

<sup>9</sup> Khiaothek ne awaithek ithong shii ilab phi ne zab pha blia shii ithek shii sang yi bo. Ithek ne ithongthek shii iidoh achang rabo <sup>10</sup> chiuh-è ithek ro agow rabo. Ji phachiang shii, chiuh-è ithek è rek pha zab shii gethek ro ragia Hamangkhung-aphuii chiang shii yua pha ji wie ibeng rey yi pha ithek ne idang wie nane isiie rone doh yi bo.

<sup>11</sup> Chiuh-è Hamangkhung-aphuii awairo bushun ne zab pha bran ro giawo pha chiang shii dong phi. <sup>12</sup> Ji pha bushun è gethek shii biidiie pha hamangkhung-aphuii hà rai pha ji nane sohjambling pha miiyang ji thoh muui bo ne yao ro, chiuh-è ichiuh sohjambling shii zud, giang, nane hamangkhung-aphuii è yang pha ji shii rai bo, <sup>13</sup> chiuh-è biisiie gethek ro

boh Hamangkhung-aphuii nane Ragia Isu Masi\* dong ruii pha, khirzey Inai gethek luthong pha ji khan ne rai ro. <sup>14</sup> Ai è gethek shii awie pha ji è ragia rek pha chiih-è gethek shii igang bran rab pha chiih-è awai ji pha bran rey yi pha chiih-è wie rek yang yi awaishii gethek Chiang phi muii.

<sup>15</sup> Hìthek pha manathek shii yua bo chiih-è nawairo yoithek shii lububo nane giung shii nawai ro riichaithek è khoh bo. Hanyie magunde na shii luii ariig yi rabo.

### 3

#### *Masipho ro züig*

<sup>1</sup> Nawai bran shii bohkhophothek shii phi pha chiih-è riichaithek shii nuii pha nowkhlei yi bo, chiih-è zab lumuii shii wie rek pha saro yi bo. <sup>2</sup> Hanyie shii de buii ayao yi rabo, jishii lijiing nane zab rog dung ne rai bo, chiih-è zab shii idang züig mieng è doh yi bo. <sup>3</sup> Gethek de luang jia shii ne bi-ie, anuii pha rek chiih-è khinrindun. Gethek de awie pha chid pha nane zab awie pha ichuathék shii sangmiie ne rai, pha ji shii khiao rek. Gethek de makhak-riing nane siakjo shii sieng ne rai; chiih-è gaithek è gathek shii khiijai chiih-è gethek è de ithek khiijai. <sup>4</sup> Jishii gethek ragia pha Hamangkhung-aphuii ro bushun nane miie ji dong mage shii, <sup>5</sup> ai è gethek shii ragia rek phi. Jishii hì ne gethek è nyie wie rek pha ji è asi ro, jishii hanyie è awai Ragung So è sud ne gethek shii iwo giak nane iwo chai phi. Chiih-è awai ro bushun ji è gethek shii ragia rek phi. <sup>6</sup> Hamangkhung-aphuii è gethek ro ragia Isu Masi ji pha Chiang è gethek shii Ragung So leyphrid thoi phi, <sup>7</sup> ji-è airo bushun è gethek de Hamangkhung-aphuii rog shii khriig rai mua ne gethek luthong pha idang pha chai shii mua ruii phro. <sup>8</sup> Hi ne zai yao.

Gu nathek shii hì pha miyao è wie chuh phi pha yang ro, ji-è hanyiethek ne Hamangkhung-aphuii shii migi rek pho ne, nyie yi wie blia shii rek pha nyie yi wie nane zab è kho pha ji shii isiie rek mua ro. <sup>9</sup> Jishii bi-ie pha khnaingthek, phiang blangthek ro sasab, guithek, chiih-è Iphey Chiang mak rek pha ji de thoh muii bo. Jithek pha ne blia adunmey pha nane ibid oi pha ji ro. <sup>10</sup> Hanyiethek che pha rek pho shii nyichiieng phriie bo, chiih-è chiihphado ji è muna rek pha nyie oi sha phro. <sup>11</sup> Nathek ne thieg è-rek pha bran ne awiedang ro, chiih-è ithek layog è ne ithek ne asi rone doh yi.

#### *Idohhè pha muyuathék*

<sup>12</sup> Gu è Arthemas nane Thychikhus nathek hà thoh shii, Nikhopholis hà gu hà wuii yie pha na ne bajo bidiang bo, nyieliieshii gune hakhangshak shii thiisa hà rai pha phakjong ro. <sup>13</sup> Nathek ne Ipheypho Zenas nane Apholos isa ro luachiug pha ji ne jao yie pha nawaithek ne bajo bidiang bo, chiih-è ithek nyie chid pha ji shii zab riig bo. <sup>14</sup> Gethek bran de nyie wie ji shii ishak phi pha dab chid, ji-è izai chid pha ji phi mua; ithek ne thaluii pha chai asieng chid phro.

<sup>15</sup> Hanyie yie gurog shii um pho zab è nathek shii salamthek thoh ge ro. Gathek ro salamthek de migi pha gathek ijak shii phi bo.

Hamangkhung-aphuii ro bushun ne nathek zab shii um bo.

\* **2:13** 2:13: gethek ro bajoboh Hamangkhung-aphuii nane Ragia Isu Masi; dinnebajoboh Hamangkhung-aphuii nane gethek ro Ragia Isu Masi. **2:14** 2:14: Chng 130:8; Mul 19:5; Iphy 4:20; 7:6; 14:2; 1Phth 2:9 **3:12** 3:12: Blk 20:4; Iphi 6:21,22; Khol 4:7,8; 2Thi 4:12 **3:13** 3:13: Blk 18:24; 1Khor 16:12

## PHILIMON Shii Phaul Re-è Jigigam Yaophi

Philimon ne zab re-è id pha Masipho ro, yangne ai ne Kholosai charch pha bran ro, chiih-è Onesimus beng pha khiao ro muspho ro. Ji pha khiao ne awai muspho è yoh marui, chiih-è chiihphado ai ne Phaul rog shii id rai. Ji pha ishak shii Phaul ne phat heg hà um. Phaul Chiang è, Onesimus ne Masipho rey. *Phaul re-è Philimon shii jigi phi pha ji ne Philimon shii awairo khiao shii ò rek phi pha Chiang shii zey ro.* Phaul re-è Onesimus shii ai hà iidoh thoh din ramui ro, chiih-è aishii wieho khiao shii khung phi pha duine asi pha ji shii Masi pha khuino duine wieho yi pha Phaul re-è aishii khung.

### **Iiing shii um pha ji**

Yaophi (1-3)

Philimon shii chiong pha (4-7)

Onesimus chaing shii khung (8-22)

Jongsha (23-25)

<sup>1</sup> Masi Isu Chiang phat heg hà rai pha Phaul, chiih-è gethek khuino Thimothi re-è.

Gethek ijak nane gethek rog shii blia rek pha Philimon, <sup>2</sup> chiih-è na hò shii charch rekpho chiih-è gethek bumuii Aphia, chiih-è gethek rog pha siphahi Archiphus:

<sup>3</sup> Gathek Aphuii Hamangkhung-aphuii chiih-è Ithong Isu Masi nathek shii bushun nanè liijiing phi.

### *Philimon ro miie nane migi*

<sup>4</sup> Khuino Philimon, idang gu ne sia pha ishak shii, gunè na beng soi ne chiih-è gui Hamangkhung-aphuii shii lasothek phi. <sup>5</sup> Ithong Isu shii naro migi um pha nane Hamangkhung-aphuii ro zab brantheK shii na è miie pha ji ne gu è yoi ro. <sup>6</sup> Gu misia ne hì ro migipothek duine gathek ro òsia nathek rog shii nyie gethek ro chai Masi rog shii ò zab khirzey Chiang jam id pha ji yie ruui phro. <sup>7</sup> Bushun khuino, naro miie, re-è gu shii bajoboh lised yie phi chiih-è bajo lububo rek phi! Na è Hamangkhung-aphuii ro zab brantheK shii lubuthek re-è sang yie.

### *Onesimus Chiang shii khung*

<sup>8</sup> Ji-è hì pha Chiang è gu ne Masi shii naro khuino duine, nyie rek chid pha ji shii na shii nyayung muui ro. <sup>9</sup> Jishii nyieliieshii gu na shii miie, ji pha Chiang shii gu ne khung. Phaul, gunè Masi Isu ro khliie ro, chiih-è thuh shii gunè ai Chiang shii phat hegpho ro, jimagunde gu ne hì pha blia rekramuii.\*

<sup>10</sup> Ji-è Onesimus, hanyie yi Masi shii guiro dufuii ro: Ai Chiang è gu na shii khung; gu phat heg hà rai pha ishak ne airo ragung pha aphuii rey dun.

<sup>11</sup> Ishak jia shii ai ne na shii nyie de aphua ro, jishii thuh ai ne phua sha ro,† na shii de gu shii de nyimanyi shii phua phro. <sup>12</sup> Gu thuh aishii iidoh

**1:2** 2: Khol 4:17 \* **1:9** 9: Masi Isu ro khlei ro, chiih-è thuh shii gunè ai Chiang shii phat hegpho; dinneFiriang, chiih-è Masi Isu, thuh shii gunè ai Chiang shii phat hegpho. **1:10** 10: Khol 4:9 † **1:11** 11: Grekh è Onesimus beng pha miyaosiu “kho.”

nathek shii thoh ramuii ro, chiih-è ai rog shii guro lubu de wuiiramuii ro. <sup>13</sup> Gune aishii isa gui rog hà ruii yang shii, muawie Chiang è gu phatæg hà rai pha ishak shii, ai ne nathek Chiang è gu shii nong phi ro. <sup>14</sup> Ji è rek magun de, gune na shii nong bone bangchiie arek yang ro; ji phachiang, gune na shii nawailum ji rek bone yang ro. Ji-è gu de na anuii sapho ne gune nyie de arek phro.

<sup>15</sup> Ji rek phade yangne um ruii phro, Onesimus ne lujia ishak shii na re-è ruang rey dun chiih-è ai ne nathek rog shii idang rai pha dun mua din.

<sup>16</sup> Chiih-è thuh ai ne khiao asi bie ro, jishii khiao re-è de bajo boh ro: ai ne Masi shii bushun khuiino ro. Ai ne gu shii bajo mugak ro! Chiih-è nyimanyi khiao duiine chiih-è Ithong shii ne khuiino duiine na shii ne din ne de huak ne mugak ro! <sup>17</sup> Ji-è na ne gu shii nawai ijak duiine now arone gu shii wieho pha duiine aishii de iidoh wieho bo. <sup>18</sup> Ai è na shii ichiig chiih-è nyie muruii um arone gu ibeng shii sasab ruii muui bo. <sup>19</sup> Thuh, gu ne gui wad rog shii hi zey: *Gu, Phaul, na shii iidoh nyaphi din* (Gu ne na shii anow din yi phro, nyayao chak arone, nawai ne gu shii phi pha khe sha bie ro.) <sup>20</sup> Ji-è, guro khuiino, Ithong Chiang shii gu haro shii hi rek phi bo; Masi shii khuiino duiine, gu shii sang yi bo!

<sup>21</sup> Gu ne migi, hi pha zey pha duiine, na ne gu è nyie khung pha ji shii rek ruii phro—Zai gu ne thieg na de ji è huak ne rek muui phro. <sup>22</sup> Hi pha rog shii gu shii ugud jia saro phi bo, nyieliieshii gu ne ji pha Hamangkhung-aphuii shii luthong, ai ne nathek ro zab misiathek shii chang chiih-è gu shii ne nathek shii phi din ruii phro.

### *Idohhè pha salamtek*

<sup>23</sup> Ephaphras, Masi Isu Chiang, hanyie è gu rog diig rek ne phatæg hà um pha, ai è de nathek shii salam thoh ge ro, <sup>24</sup> chiih-è ji-è gu rog bliapho Marg, Aristarkhus, Demas, chiih-è Lug salamtek thoh ge ro. <sup>25</sup> Ithong Isu Masi ro bushun nathek zab rog shii um bo.



## HEBRIUTHEK Shii Jigigam Yaophi

*Hebriuthek ro jigi* ne ibrog Masipho shii zey, hanyie è zey ramuii pha gidieg Chiang shii diig si srane Masi pha migi shii ne thoh bsa hà rey dun. Zeypho è doh yi ne Isu Masi ne zai nane iidohè shii dong pha Hamangkhung-aphuii rone ithek migi shii lububo rek phi. Hì rek pha ai ne zai uom shii dong phi: (1) Hanyie ai è diigchiao shii zud pha ji è Aphuii shii zai nuui pha ji shii dab pha ji è Isu ne Hamangkhung-aphuii ro idang pha Dufuii rey ro. Hamangkhung-aphuii dufuii rey pha ji è, Isu ne Surua ihèg pha chaigtheK è chiih-è hamangkhliethek chiih-è Moses awai è de boh ba ro. (2) Isu ne idang pha phabi nane Surua Ihèg pha phabitheK è de boh ba rone Hamangkhung-aphuii è yaojong ro. (3) Isu pha Chiang è migipho layog chiih-è rum chiih-è iy pha ji è; ragia rey ge ro. Chiih-è Isu ne phabi dumuii duiine, zai giawo shii phi ro, nyie hìne Hebriu pha giang pha muhui shii khlem pha ibeymuthung ji è midong doh noh.

IsraeltheK pha phaluii shii idlie pha brantheK ro migi ro ò ji duiine yie srane (ithoh 11), zeypho è thamphotheK shii migi shii rai bone yao, chiih-è ithoh 12 shii ai è airo jigi hì thamphotheK shii athodang pha iidohè thog pha migi shii chiih-è mieg yi Isu shii riig ne rai bone yao, chiih-è nyie diig chiih-è diigkhui ne ithek shii thog magunde zud bone khung ro. Jigi hìne yua pha nane phriie pha miyaogamtheK rog shii kheb dun ro.

### **Iiing shii um pha ji**

Yaophi: Masi ne Hamangkhung-aphuii ro zab dong pha ji ro (1:1-3)

Masi ne hamangkhlietheK è de huak ne boh ro (1:4—2:18)

Masi ne Moses nane Joshua è de huak ne boh ro (3:1—4:13)

Masi ro phabi ne zab è de huak ne boh ro (4:14—7:28)

Masi ro shiinyie ne zab è boh ro (8:1—9:22)

Masi ro zid ne zab è boh ro (9:23—10:39)

Migi ne bajo boh ro (11:1—12:29)

Hamangkhung-aphuii shii sang yi (13:1-19)

Jong Sha pha misia (13:20-21)

Iidohè pha miyaogamtheK (13:22-25)

### *Hamangkhung-aphuii miyaogam ro Dufuii re-è*

<sup>1</sup> Buyo Hamangkhung-aphuii è bajo ishak chiih-è chaigtheK pha ji è bajo lumuii è gethek blangtheK yao ro, <sup>2</sup> jishii thuh pha iidohè pha inai shii ne awai dufuii ji è gethek shii yao ro. Ai jia Chiang è Hamangkhung-aphuii è hamangnyiak shii rab ro, chiih-è iidohè shii zab pha manatheK shii muspho rey pha Hamangkhung-aphuii è gua ro. <sup>3</sup> Ai ne Hamangkhung-aphuii ro biisiie pha Chuang pha ji shii mia ro chiih-è jine Hamangkhung-aphuii awai chai duiine rey yi, airo bohbluthek miyaogamtheK è hamangnyiak hà rai yie ro. Zab bran ro layog shii khung phi pha ji rey ched pha iidoh è, ai ne hamangkhung hà Hamangkhung-aphuii ro giu blu um pha phazoi hà dug dun ro.

### *Hamangkhung-aphuii ro zabèboh dufuii*

<sup>4</sup> Hamangkhung-aphuii è aishii ithek è de bajo boh ibeng phi pha duiine, Dufuii ne hamangkhliiethek è de bajo boh rab phi ro. <sup>5</sup> Hamangkhung-aphuii ne khuchung de hanyie hamangkhliiethek shii ayao,

“Nathek gu dufuii ro;

Sudoh gu ne nathek Aphuii rey ruii.”

Hamangkhung-aphuii è hanyie hamangkhliiethek Chiang shii ayao ro, “Gune ai Aphuii rey ruii,

chiuh-è ai ne gu Dufuii rey ruii phro.”

<sup>6</sup> Jishii Hamangkhung-aphuii è awai ro igobigiak pha Dufuii shii sohjambling hà thoh shii, ai è yao,

“Zab Hamangkhung-aphuii ro hamangkhliiethek aishii misiasia chid phro.”

<sup>7</sup> Jishii hamangkhliiethek Chiang shii Hamangkhung-aphuii è yao,

“Hamangkhung-aphuii è airo hamangkhliiethek ne hasamthek rab, chiuh-è airo khiaothek shii ne bai hang pha rab phro.”

<sup>8</sup> Jishii Dufuii Chiang shii, Hamangkhung-aphuii è yao:

“Hamangkhung-aphuii wo\* naro Sajathua, ne, idang nane idang rey bo!

Na ne nawai† brantheK rog shii isii è kho ro.

<sup>9</sup> Na ne nyie shii rangsua ji shii miie chiuh-è nyie yi asi jishii khiijai.

Ji pha Chiang è Hamangkhung-aphuii, na ro Hamangkhung-aphuii è na shii

gua  
chiuh-è ilab pha lubo ne ai è na iijiiakthek shii phi pha  
ji è de bajo boh na shii phi ro.”

<sup>10</sup> Ai ne hi de yao,

“Ithong, na ne, igobi sohnyiak shii rab,

chiuh-è nawai ro wad sbang è hamangkhung shii rab.

<sup>11</sup> Ithek ne sand ruii phro, jishii na ne asand ruii phro;

ithek ne zab yungthek duiine ihèg rey dun.

<sup>12</sup> Na ne ithek shii phadiig duiine jiangmuui phro,

chiuh-è ithek ne yungthek duiine laidun.

Jishii na ne idang pha duiine ò ro,

chiuh-è naro chai ne khuchungde ajong.”

<sup>13</sup> Naro makpho shii

“Naro lai iling hà aruii sapho shii ne

Guro phazoi hà dug bone:

Hamangkhung-aphuii ne awai ro hamangkhliiethek hanyie shii magunde khuchungde ayao ro.”

<sup>14</sup> Ji-anine, hamangkhliiethek ne nyie ga? Ithek ne ragungthek hanyie è Hamangkhung-aphuii ro blia rek chiuh-è hanyie è giawo shii choi pho shii nong yi pha aishii thoh ge.

## 2

### *Bajobo giawo*

<sup>1</sup> Ji-è gethek shii ne ruang afen yi pha ji pha Chiang shii gethek è yoijong pha izai shii chuh è khoh chid. <sup>2</sup> Gethek blangthek shii hamangkhliiethek è miyaogam phi pha jine zai shii doh yi, chiuh-è hanyie è arekieng, anuii

**1:5** 1:5: Chng 2:7; 2Sam 7:14; 1Phal 17:13      **1:6** 1:6: Iphy 32:43 (LXX)      **1:7** 1:7: Chng 104:4

(LXX)      **1:8** 1:8-9: Chng 45:6-7      \* **1:8** 1:8: Naro Sajathua, Hamangkhung-aphuii wo, ne idang; dinne Hamangkhung-aphuii ne naro sajathua.      † **1:8** 1:8: Nathek ro; giak jigizey ne um phaneAiro.

**1:10** 1:10-12: Chng 102:25-27 (LXX)      **1:13** 1:13: Chng 110:1

pho ithek shii ne lago mua ro. <sup>3</sup> Gethek è Bajobo giawo shii isiie arek arone khi-è-rek ne, yoh ne khia magey phlei? Ithong awai igobi giawo hi yao bi, chiih-è hanyie è aishii hi yoi gathek ne izai rone khagi rek phi. <sup>4</sup> Ji pha ishak shii buangthek nane wienthek pha zab ichuathek rek pha ji è chiih-è awai è yang pha Ragung So pha lasen ji thang pha ji è Hamangkhung-aphuii awai ro khagi shii de lao phi.

*Hanyie jia è gathek shii giawo hà noh phi*

<sup>5</sup> Hamangkhung-aphuii è hamangkhliethek shii gethek è nyie yao ramuii pha sohjangbling ji shii iwo sohjangbling thog ramuii pha ji shii kho pha aphii ro. <sup>6</sup> Ji pha Chiang shii, jigi shii yao pha duine:

“Hamangkhung-aphuii wo, bran ne nyie ga, na ne ithek shii now bo;

Ai ne bran bie ro, na ne ithek shii gayiig chid habey?

<sup>7</sup> Na è aishii ne lujia ishak pha hamangkhliethek è lu rab;

na ne aishii ilab nane biisiie rog shii rago khak phi;\*

<sup>8</sup> chiih-è aishii ne zab manathek shii bohkhophothek rab phi.”

Hi è yao jine Hamangkhung-aphuii è aishii “Zab manathek shii bohkhophothek rab phi” Ji pha miyao è ne zab ne sang è lua ro, jimagunde Gethek ne thuh de bran ne zab manathek shii bohkhopho pha adoh ba ro.

<sup>9</sup> Jishii Isu shii doh. Hanyie shii ai de lujia ishak hamangkhliethek è lu rab ro, ji è Hamangkhung-aphuii ro bushun è ai ne zab Chiang iy dun. Airo iy pha diig Chiang ji è ai ne thuh rago rog pha biisiie nane ilab mua pha aishii doh muui ro. <sup>10</sup> Bajo aniphiiing shii noh srane airo biisiie ji thang pha diig ji è Isu ne isiie rab chid. Hi pha blia rek pha ne Hamangkhung-aphuii shii rangsua um bie ro, nyieliieshii ai ne rab pha nane zab shii ruii ro. Ithek shii giawo hà noh pha ne Isu jia bie ro.

<sup>11</sup> Ai ne brantheke shii awaithek layogthek è sud phi, chiih-è nyimanyi ai nane hanyie shii igang rabjong pho ne ò Aphuii ro. Ji è Isu ne ithek shii awai ro haliingpho rone ho pha ji shii ne awo ruii phro. <sup>12</sup> Ai è Hamangkhung-aphuii shii yao,

“Gune gui khuiinothek shii na è nyie rekjong phi pha ji yao phi pha ro;

Gu ne na shii ithek ro male shii chiong phi pha ro.”

<sup>13</sup> Ai è de yao, “Gune guiro migi Hamangkhung-aphuii shii ruii pha ro.” Chiih-è ai è de yao, “Ichihi shii gu ne Hamangkhung-aphuii è phi pha aniphiiing rog shii ro.”

<sup>14</sup> Ai è ithek shii aniphiiing rone ho phane, ibey nane ifai bran ro, Isu awai de ithek duine rey dun ne ithek tharothamang ziig ji shii thang. Ai è ji rek pha jine nyieliieshii airo iy pha ji è hanyie shii iy pha blu um pha ibuui shii ai ne srobroy rek mua pha ji rek, <sup>15</sup> nyieliieshii iy pha ji è rum ne hanyie yi awaithek ro chai khiaothek rek pha ji è ichad phi. <sup>16</sup> Hi ne sang ai è nong phi pha jine hamangkhliethek asi ro. Ji phachiang ai è, Abraham riingthek shii ne nong phi. <sup>17</sup> Hi pha miyaosiu è airo Hamangkhung-aphuii blia shii brantheke ro layogthek ne khung mua phi pha ithek ro migithek nane bushunthek pha kho Phabi rey pha zab pha lumuii shii airo khuiinothek duine rey dun. <sup>18</sup> Chiih-è thuh ai ne hanyie chuajan ithek shii nong mua phi, nyieliieshii ai awai de chuajan nane diig rekjong.

2:6 2:6: Chng 8:4-6 \* 2:7 2:7: Bajo jigizey ne dog: Na è ithek shii ne khophothek rab zab na è rab pha ji (riig Chng 8:6). 2:12 2:12: Chng 22:22 2:13 2:13: Aij 8:17 (LXX); Aij 8:18 2:16 2:16: Aij 41:8-9

## 3

*Isu ne Moses è de bajo boh ro*

<sup>1</sup> Hanyie shii Hamangkhung-aphuii è ho pha ji ro! Guro Masipho khuiinothek, hanyie shii gathek è yao pha migi pha kho phabi shii Hamangkhung-aphuii è thoh ge pha Isu shii now bo. <sup>2</sup> Moses è Hamangkhung-aphuii hò shii awai blia shii migi rek pha duiine, Isu de Hamangkhung-aphuii è hìpha blia rek pha gua Hamangkhung-aphuii shii isiie rek. <sup>3</sup> Brantheke hanyie è hò rung pha ji ai ne hò è de muna bajo boh ilab mua ro. Ji duiine Isu ne Moses è de muna ilab mua sapho ro. <sup>4</sup> Zai, zab pha hò ne hanyie jia è ne rab ro—Chiih-è Hamangkhung-aphuii jia bie ro hanyie è zab pha manathek shii rab. <sup>5</sup> Moses ne Hamangkhung-aphuii hò shii khiao duiine isiie rek, chiih-è ai è yao pha mana jithek ne Hamangkhung-aphuii ne phariang shii yao pha rek ro. <sup>6</sup> Jishii Masi ne Hamangkhung-aphuii hò pha ilkhi rek shii Dufuii duiine isiie rek. Gethek è nyie shii luthong pha ji shii lububo rek ne migi rek arone gethek ne ai Hamangkhung-aphuii ro hò ro.

*Hamangkhung-aphuii ro brantheke thung pha*

<sup>7</sup> Ji-è chiiphado, Ragung So è yao pha duiine, Sudoh na è Hamangkhung-aphuii goh yoi arone,  
<sup>8</sup> ithek è aishii balimuang hà chai pha ruii pha ishak shii, naro blangtheke duiine Hamangkhung-aphuii shii suang rek pha duiine, nathek de lawasdaì arek rabo.  
<sup>9</sup> Hamangkhung-aphuii è yao, ithek ne idam shawi shii gu è nyie rek pha ji riig magunde  
 ithek è gu shii thiisa hà chuaian.  
<sup>10</sup> Chiih-è gu ne jithek pha bran shii lijieg ne yao,  
 “Itheke ne idang gu shii ilab arek  
 chiih-è gu muyung shii anuii pha rek.”  
<sup>11</sup> Gu ne lijieg dun chiih-è surua sbang rab:  
 “Khi hà gu è ithek shii thung pha soh phi pha ji shii ne ithek ne khuchung de akhud mua ruii phro!”  
<sup>12</sup> Gu iijiiaktheke, nathek è hanyie de awie pha rey chiih-è migi arek pha isieng Hamangkhung-aphuii è khid pha ji è de lubu gayiig bo. <sup>13</sup> Ji phachiang shii nathek hanyie de layog è khinrin ne lawasdaì arey yi rabo, “sudoh” Jigam ji è gethek shii nyayao bamuii pha duiine nathek ne nawaithek chung idang nong rai chid. <sup>14</sup> Gethek ro migi ibi shii um pha ji yi iidohè thogdang pha chuh è khoh arone gethek ne zab Masi rog shii iijiiaktheke ro.  
<sup>15</sup> Hi ne jigi è nyie yao:  
 “Natheke ne sdoh Hamangkhung-aphuii goh yoi arone,  
 nathek ro blangtheke è Hamangkhung-aphuii shii suang rek pha ishak shii rek pha duiine nathek ne lawasdaì arek rabo.”  
<sup>16</sup> Brantheke hanyie è Hamangkhung-aphuii ro goh yoi ne chiih-è aishii ne suang rek pha ne hanyie lei? Moses è Egyph hà noh pho theke ro. <sup>17</sup> Idam shawi shii Hamangkhung-aphuii è hanyie shii lijieg? Balimuang hà iy pha layogtheke shii lijieg phro. <sup>18</sup> Hamangkhung-aphuii è surua sbang rek shii, ithek ne gu è thung pha phi pha soh shii akhud mua phro—Hanyie shii yao

pha jine hanyie è suang rek pha ji shii yao ro. <sup>19</sup> Chiihphado, gethek doh ro, ithek ji pha soh shii akhud mua, nyieliieshii ithek ne migi arek.

## 4

<sup>1</sup> Thuh, ai è yao pha thung Chiang shii Hamangkhung-aphuii gethek shii sbang mizid rek pha jine thuh de um, chiihphado, gethek shii mua yi pha gethek gayiig rai haro. <sup>2</sup> Ithek è yoi pha duiine gethek de Mua Wie yoijong. Ithek ne mua ne yoi, jishii ithek shii ne wie arey ro, nyieliieshii ithek ne yoi shii ithek ne migi rog shii achoi ro. <sup>3</sup> Chiihphado, gethek hanyie è migi rekpho ne Hamangkhung-aphuii è sbang rek pha thung shii choi ro. Hi ne ai miyao duiine ro,

“Gu ne lijeg dun chiih-è surua sbang rab:

‘Khi hà gu è ithek shii thung pha sohjambling phi pha ji shii ne ithek ne khuchung de akhud mua ro!’ ”

Ai è hì yao magunde airo blia ne sohjambling rab pha ishak shii jong ge. <sup>4</sup> Chiih-è damiley pha inai Chiang shii ne gai pha jigigamthek shii yao ro: “Hamangkhung-aphuii è awai ro blia è damiley inai shii thung.” <sup>5</sup> Ji pha miyao shii din è yao: “Khi hà gu è ithek shii thung pha soh phi pha ji shii ne ithek ne khuchung de akhud mua.” <sup>6</sup> Hanyie è Mua wie shii igobi yoi pho ne thung pha ji shii achoi ro, nyieliieshii ithek ne migi arek. Chiihphado, thiisa hà, giak hanyie shii ne choi pha phi ro. <sup>7</sup> Nyie yi “sudah” rone ho pha ji shii Hamangkhung-aphuii gai inai shii rab srane ji pha izai shii riig yi. Bajo idam pha iidoh jigigam shii zeyjong pha jine ai è Dawid re-è yao:

“Na è sdoh Hamangkhung-aphuii ro goh yoi arone,  
Lawasdai arek rabo.”

<sup>8</sup> Joshua è branthek shii Hamangkhung-aphuii ro thung pha sbang ji phi arone, Hamangkhung-aphuii gai inai pha Chiang shii ayao chid ro. <sup>9</sup> Hi duiine, thiisa hane thuh de Hamangkhung-aphuii ro damiley inai shii thung pha duiine Hamangkhung-aphuii ro branthek ne nyathung ba muii ro. <sup>10</sup> Hanyie magunde Hamangkhung-aphuii ro thung pha sbang shii choi pho ne Hamangkhung-aphuii è awairo blia è thung pha duiine ithek de awaithek ro blia è de thung muii ro. <sup>11</sup> Ji-anine, cho gethek ne, ji pha thung shii choi pha gethek khama rek mua pha ji rek haro, ji è nyieliieshii ithek è migi arek pha ji è ithek shii amua pha rek pha ji duiine gethek de jia de buyud arey yi haro. <sup>12</sup> Hamangkhung-aphuii ro miyaogam ne isieng nane, blia rek ne, irey nyi um pha khamriie è de huak ne irey um ro, khihà luruak nane ragung si, chiih-è rungpha nane ihieng ne ò um pha jihà thog pha nyachey mua. Jine lubu pha munowthek nane chid pha ji shii chua ro. <sup>13</sup> Jine Hamangkhung-aphuii è nyie de a-ug mua; sohjambling shii ai è nyie rab pha jine dong khlei ro. Chiih-è gethek ro sasab ne zab aishii phi chid.

### *Isu ne bajo bohkho phabi*

<sup>14</sup> Ji-è gethek de gethek è yao pha migi shii wie è khoh ne ruii rai haro. Isu, ne Hamangkhung-aphuii pha Dufuii ro—Gethek shii ne Bajobo kho phabi um ro, hanyie yi Kho phabi Hamangkhung aphuii moe hà wuiijong ro. <sup>15</sup> Gethek ro Kho phabi jine luang jia de gethek ro zia pha rog shii bushun arey mua sapho asi ro. Ji phachiang shii, gethek shii kho phabi um hanyie shii ne gethek Chiang zab pha lumui shii chuajan jong ro, jimagunde layog

arek ro. <sup>16</sup> Chiihphado cho gethek ne migi rek rai chiih-è Hamangkhung-aphuui biang khi hà bushun um bsa hà wuii rai haro. Thiisa hà gethek ne bushun mua srane khuchung gethek chid shii gethek shii nong mua phi pha bushun doh ruii phro.

## 5

<sup>1</sup> Zabèbo pha kho phabi shii ne awaithek duchoi è gua ne mizidtek zid phi chiih-è layogtek pha Chiang shii mizidtek phi pha awaithek duchoi shii Hamangkhung-aphuui ro blia rek yi pha gua ro. <sup>2</sup> Ai awai ro bajo ichuathek shii zia ro, ai ne nyie de athieg pha brantheK chiih-è asi pha rek pha bran ibi shii jum rek ro. <sup>3</sup> Chiih-è nyieliieshii awai ne zia ro, ai ne bran layog shii mizid zid bie pha asi, jishii awai layogtek shii de zid chid phro. <sup>4</sup> Hanyie de awai shii kho phabi ilab rone agua mua phro. Jine Hamangkhung-aphuui è Aron duiine bran shii kho phabi rab pha ho pha bie ro. <sup>5</sup> Ji duiine Masi de awai è awai shii kho phabi ilab ne ayie ro. Ji phachiang shii, Hamangkhung-aphuui è aishii yao,

“Na ne gu dufuui;  
sdoh gu ne na Aphuui rey ro.”

<sup>6</sup> Ai ne gai ithua hà de yao,  
“Na ne Melkhizedek lumuui shii  
idang phabi rey ruii phro.”\*

<sup>7</sup> Isu ro chai sohnyiak shii ai ne misiathek nane khungtek è cho ne hanyie è aishii iy pha ji è ragia rek mua pha Hamangkhung-aphuui shii miegkhothek chiih. Nyieliieshii ai ne jum nane isiie rek, ji è Hamangkhung-aphuui è aishii yoi. <sup>8</sup> Ai ne Hamangkhung-aphuui Dufuui magunde airo diig ji è nuii pha ji shii dab. <sup>9</sup> Ai ne khriig rab magey shii ai ne hanyie è aishii nuii pho ro idang pha giawo pha ithua rey, <sup>10</sup> Chiih-è Hamangkhung-aphuui è Melkhizedek lumuui shii aishii ne kho phabi rone yaothiek ro.†

### *Migi thoh pho shii gidieg phriie*

<sup>11</sup> Chiih shii ne gethek hìpha Chiang shii yao pha miyao ne bajo um ro, jishii hìne nathek shii yua pha diig ro, nyieliieshii nathek ne gao pha ne bajo rasey ro. <sup>12</sup> Nathek shii ne masdo rey pha ishak ne cho ishak um—Thuh de nathek shii Hamangkhung-aphuui pha igobi pha mua Chiang shii yua pha gai chid ba ro. Gang michie chie pha khalo shii nathek ne thuh de niu niing ba muui ro. <sup>13</sup> Hanyie magunde thuh de niu niing ba arone ai ne ani ba ro, chiih-è zai nane biidiie shii rek rone a-id ro. <sup>14</sup> Ji phachiang shii, gang michie ne, hanyie noi ne wie nane awie pha jishii Ìdjong pha, chai thek ro.

## 6

<sup>1</sup> Cho gethek de iweg muyua pha jihà wuii ne, igobi pha Masipho mua ji shii gethek ne iidoh ruiimuii haro. Gethek ne awie pha blia è khid ne chiih-è Hamangkhung-aphuui ro migi rek jong; <sup>2</sup> khowothek\* nane wad ruii ne sia pha mua chiih-è iy ne hòi din chiih-è idang pha chuathék, hì thek shii din

**5:3** 5:3: Lew 9:7    **5:4** 5:4: Mul 28:1    **5:5** 5:5: Chng 2:7    **5:6** 5:6: Chng 2:7    \* **5:6** 5:6: Melkhizedek lumuui shii idang phabi rey ruii phro; dinne Melkhizedek duiine; dinne Melkhizedek lumuui shii rey.    **5:7** 5:7: Mth 26:36-46; Mrg 14:32-42; Lug 22:39-46    † **5:10** 5:10: kho phabi lumuui shii ne Melkhizedek; dinne Melkhizedek duiine; dinne Melkhizedek lumuui shii aishii ne Kho phabi rone yaothiek ro.    **5:12** 5:12-13: 1Khor 3:2    \* **6:2** 6:2: khowothek; dinne Muhuithek shii.

ne gai sarong arab haro; <sup>3</sup> Hamangkhung-aphuii è chid arone cho gethek de ibi wuii! Chiuh-è gethek ne hì rek haro.

<sup>4</sup> Hanyie è awaithek migi shii thoh pho shii khi-è rek ne lubukhid din muui phlei? Ithek luang jia Hamangkhung-aphuii muchuang shii um; ithek ne hamangkhung pha lasen shii chai chiuh-è Ragung So pha mathang shii choi; <sup>5</sup> ithek ne Hamangkhung-aphuii ro miyaogam jine wie rone ley pha ji è ìdjong, chiuh-è ithek ne thog ramuii pha Ishak pha bluthek shii than. <sup>6</sup> Chiuh-è chiuhphado ithek ne migi shii thoh muui! Ji-è ithek shii ne lubukhid din yi pha ne lumuii oi ro, nyieliiieshii ithek ne Hamangkhung-aphuii ro Dufuii shii din è bai shii zun din yi chiuh-è limiang moi shii wo pha khia din yie. <sup>7</sup> Hamangkhung-aphuii è nyiak shii khirzey phi nyie shii blebbleb chiuh pha haphie ji è niing chiuh-è hanyie shii haipha ai blia rey muui sapho pha misiengthek shii sieng yie. <sup>8</sup> Jishii migemthek nane saingthek ji sieng arone jine nyie blia oi; hine Hamangkhung-aphuii è thamai pha buii ro chiuh-è jine bai è hùb ruii phro.

<sup>9</sup> Jishii iijiiakthek wo, gathek ne hì duuine yao magunde, nathek Chiang shii gethek ne migi rek. Nathek ro giawo pha wie khirzeythek um rone gathek ne thieg. <sup>10</sup> Hamangkhung-aphuii ne haro ahan ro. Nathek è aishii miie pha doh yi chiuh-è thuh de nathek è gai shii nong ramuii pha blia jine ai khuchung de abia phro. <sup>11</sup> Gathek ro Bajobo yang pha jine nathek zab jia è chid pha jine iidohe thog pha rek ne rai bo, ji è nathek è luthong pha manathek ne zai thog ruii phro. <sup>12</sup> Gathek ne nathek shii skhad-ajo pha rey yi pha ayang ro, jishii hanyiethek è migi rek chiuh-è lubu phiang rek pha duuine rek ne chiuh-è Hamangkhung-aphuii è nyie sbang rek pha ji mua boh.

### *Hamangkhung-aphuii ro izai sbang*

<sup>13</sup> Hamangkhung-aphuii è airo sbang Abraham shii rab shii, ai è nyie sbang rek pha ji shii rek pha rone surua thak. Ji shii ne hanyie jia de awaithek è bajo boh oi ro, awai ro surua rab pha ishak shii ai è awai ro ibeng kho ne rab. <sup>14</sup> Ai è yao, “Gu na shii khirzey phi ruii chiuh-è na shii bajo riingthek phi ruii phro ne, gu na shii sbang rek.” <sup>15</sup> Abraham ne lubuphiang, ji è ai ne Hamangkhung-aphuii è nyie sbangthek rek pha ji shii choi jong. <sup>16</sup> Gathek è surua thak shii, gethek è de bajo boh jia ro ibeng kho ne thak, chiuh-è surua è ne zab khnaingthek shii khriig rek phi. <sup>17</sup> Hanyie yi airo sbang shii choi pha rekpho ne ithek shii ne Hamangkhung-aphuii ne airo blia ji khuchung de alai phro ne gang è ìd yie pha yang ro; ji è awai ro surua ne sbang shii chohdo. <sup>18</sup> Chiuhphado, hì shii ne nyi miyaothek ro, jine khuchung de alai muui chiuh-è Hamangkhung-aphuii ne ji pha Chiang è biidiie arey phro. Ji-è gethek ne ai rog shii ragia doh ne gethek ibi shii ruii phi pha luthong ji shii chuh kho bone boh lububo rek phi ro. <sup>19</sup> Gethek ro chai pha jarog duuine gethek ne hipha luthong um ro. Hì ne ragia nane izai ro, chiuh-è hamangkhung pha misiahò pha yungshaig ji è dong ne zab so ithua hà khud dun. <sup>20</sup> Gethek Chiang shii Isu ne gethek ibi hà wuii ne chiuh-è phabi Melkhizedek lumuii shii, idang pha kho phabi rey dun.†

## 7

### *Phabi Melkhizedek*

6:8 6:8: Igo 3:17-18    6:14 6:14: Igo 22:16-17    6:19 6:19: Lew 16:2    6:20 6:20: Chng 110:4

† 6:20 6:20: phabi Melkhizedek lumuii shii (riig 5:6).

1 Melkhizedek ne Salem pha saja chiih-è Zab è bajo boh Hamangkhung-aphuii phabi ro. Abraham è sajathek wi shii ai è yang ne mak è iidoh dun din shii, Melkhizedek è aishii si srane aishii khirzey phi, 2 chiih-è Abraham awai nyie yi pha ji è aishii sua jia phi. (Melkhizedek ro ibeng igobi pha miyaosiu ne “Rangsuathek pha Saja ro” Chiih-è nyieliieshii ai ne Salem pha saja habuii ne, airo ibeng pha miyaosiuuthek ne “Liijiing pha Saja.”) 3 Melkhizedek ro aphuii nane amuii din ne airo blangthek pha hanyie ro de sasab oi ro; ai giak pha nane airo iy pha ji de nyie sasab oi ro. Ai ne Hamangkhung-aphuii ro dufuii duine ro; ai ne idang phabi rey ne rai dun ro. 4 Chiihphado, na ne riig, ai ne khama bajo boh ro. Abraham ne, gethek ro id pha blang, ai è mak shii zab mua pha jine aishii sua jia shii phi. 5 Chiih-è Lewi pha riingthek hanyie ne phabithek shii ne Iphey ji è yung ne Israel pha brantheke è sua jia khrab yie, ithek ne Abraham ro riingthek magunde jine awaithek ro bran ji è ro. 6 Melkhizedek ne Lewi riing re-è asi, jishii ai ne Abraham è sua jia khrab chiih-è aishii khirzey phi, Hamangkhung-aphuii ro sbangthek shii choi pha Abraham ji ro. 7 Hanyie jia shii khirzeythek mua pha ji shii ne hanyie jia è khirzey phi pha jine bajo boh ba rone ji shii ne nyie asi pha than pha oi sha ro. 8 Jigi shii yao pha duine, nyayao chak arone phabithek ro sua ne bran è khrab ji pha phabithek ne iy ruii phro; jishii Melkhizedek sua jia khrab pha ne idang isieng ro. 9 Chiih-è, ji yao arone, Abraham è sua jia phi shii, Lewi è de phijong. 10 Ji pha ishak Lewi ne agiak ba ro, nyayao chak arone Melkhizedek è aishii si pha ishak shii Lewi ne airo blang Abraham ro siu shii ba ro.

11 Lewi phabithek è Israel pha bran shii Iphey phi. Thuh, Lewi pha phabi ne blia shii khriig rey arone, Aron è asi pha, hanyie jia Melkhizedek phabi lumuii\* shii gai ichua pha phabi khia phane achid ro. 12 Phabithek laidun shii, iphey de lai dun pha rey ro. 13 Chiih-è gethek Ithong, hanyie shii hìpha manathek yao pha yoh jad è rey pha, chiih-è airo jad pha bran ne thuh thog pha phabi blia arek ba ro. 14 Hi ne wie thieg ai ne Judah jad pha bran rey ne giak ro; chiih-è Moses è phabithek pha yao magey shii ne hìpha jad shii ne ayao ro.

### *Melkhizedek duine gai phabi*

15 Hanyie ne Melkhizedek duine gai phabi ne khia din ro; hìpha miyao ne din ne de miang è yao. 16 Aishii ne phabi rabjong ro, bran ro khothek nane iphey re-è arab ro, jishii nyie yijong pha oi pha chai pha blu è rab ro. 17 Jigi shii yao pha duine, “Na ne idang pha phabi rey ruii Melkhizedek phabi lumuii duine.”† 18 Chiihphado, Thèg bohkho, ji shii ne yoh ruii muii, nyieliieshii jine zia nane blia adunmey ro. 19 Moses ro Iphey shii ne nyie de khriig arab ro. Chiih-è thuh pha wie luthong phijong pha chiang ji è gethek ne Hamangkhung-aphuii moe shii wuii ro.

20 Chodo hà, de Hamangkhung-aphuii ro surua um ro. Jihà ne gai phabi rab pha ishak shii ji è rek pha surua oi ro. 21 Jishii Hamangkhung-aphuii è aishii yao shii ji pha surua ji è Isu ne phabi rey ro, “Ithong ne surua sbang rab

chiih-è iidoh ayie phro:

‘Na ne idang pha phabi rey ruii phro.’ ”

7:1 7:1-2: Igo 14:17-20    7:5 7:5: Ssb 18:21    \* 7:11 7:11: Melkhizedek phabi lumuii shii (riig 5:6).    7:17 7:17: Chng 110:4    † 7:17 7:17: Melkhizedek phabi lumuii shii (riig 5:6).    7:21 7:21: Chng 110:4



<sup>22</sup> Chiihphado, hìpha yo, è de Isu ne wie shiinyie rey phro ne sbang rab ro. <sup>23</sup> Yo gai de um ro: Gai phabithek bame um, nyieliieshii ithek iy dun chiih-è ithek ro blià ne athoh pha arek mua ro. <sup>24</sup> Jishii Isu ne idang sieng rai, chiih-è airo phabi duine pha blià ne gai shii amua phro. <sup>25</sup> Chiih-è ji è, ai re-è hanyie Hamangkhang-aphuui shii wuii pha ji shii ragia rek phi pha, thuh nane idang rek mua ro, nyieliieshii ai ne idang isieng chiih-è ithek chiang ai ne Hamangkhang-aphuui rog shii khung phi ro. <sup>26</sup> Chiihphado, Isu, gethek chid pha mua pha Kho Phabi ro. Ai ne so; aishii ne ichiig oi ro chiih-è aishii ne layog oi ro; aishii ne layog branthek è yoh rek srane hamangkhang lakhung è chiing phi. <sup>27</sup> Ai ne gai Kho Phabithek duine asi ro; awairo igobi pha layogthek pha chiang inaitam ne mizid zid pha achid chiih-è chiihphado branthek ro layogthek pha de achid ro. Ai awai shii mizid pha ishak shii luang jia idang pha mizid phijong ro. <sup>28</sup> Moses ro Iphey è bran hanyie yi akhriig ba pha ji shii Kho Phabithek rab; jishii hanyie yi Iphey è iidoh wuii pha ji shii Dufuui rab, chiih-è hanyie shii ne idang khriig rabjong pha ji shii Hamangkhang-aphuui ro sbang ne surua rog shii rab.

## 8

### *Isu gethek ro Kho Phabi*

<sup>1</sup> Zab gethek è nyie yao pha jine ji ro chiih-è hanyie yi hamangkhang hà Hamangkhang-aphuui ro so pha biang ro phazoi shii dug pha ji pha Kho Phabi um ro. <sup>2</sup> Ai ne Bajo So ithua Kho Phabi duine blià rek, ji ne, haliig sbhang nyie yi tharothamang wad è asi pha Ithong è ruii pha ji ro.

<sup>3</sup> Zab kho phabi shii ne Hamangkhang-aphuui shii miiram zid phi pha chiih-è mizidthek phi pho ro chiih-è gethek ro Kho Phabi shii mizid pha ne nyie um chid. <sup>4</sup> Ai ne sohnyiak hà um arone ai ne phabi arey, nyieliieshii Jewish ro Iphey shii chid pha lasen phi pha ne phabithek um jong. <sup>5</sup> Phabithek duine ithek è rek pha blià ne nui bie pha chiih-è hamangkhang hà nyie um pha ragia ji ro. Hi ne Moses rog shii um pha duine ò ro. Ai è Shiinyie Haliig rab shii, Hamangkhang-aphuui è aishii yao, “Na è phiing shii nyie doh pha ji duine zab rab bo.” <sup>6</sup> Jishii thuh, Hamangkhang-aphuui nane awairo bran shii shiinyie shii khriig wie rab pha duine Isu shii phi pha phabi blià ne ithek è de boh ba ro, nyieliieshii hìne wie manathek pha sbangthek duine rab ro. <sup>7</sup> Ibi pha shiinyie rog shii ichiig oi arone jihà ne din pha ji arab chid phro. <sup>8</sup> Jishii ai è yao shii, Hamangkhang-aphuui è ai bran rog shii ichiig doh, “Ithong è yao, gu è Israel pha bran rog nane Judah pha bran rog shii iwo shiinyie rab pha, inaithek ne thog sharuii ro.

<sup>9</sup> Hi ne gu è ithek shii wad è noh ne ithek shii Egyph hà fuang noh pha inai shii gu è ithek ro blangthek shii rab pha shiinyie duine asi phro.

Ithek gu è ithek shii shiinyie shii migi arek ro, chiih-è ji è gu ithek shii agayiig ro.

<sup>10</sup> Thuh, Ithong è yao, inai thog ruii shii Israel pha bran rog shii

gu è rab pha shiinyie ne hi ro:

Gu ne gui ro iphey ithek khani shii chab phi chiih-è ithek lubuthek shii zey phi pha ro.

Gu ne ithek ro Hamangkhang-aphuii rey,  
chiih-è ithek ne gu bran rey ruii phro.

<sup>11</sup> ‘Ithong shii ld bo ne’ Hanyie jia de awaithek ijiiak shii ayua sha phro  
awaithek ro hadung-haluiipho shii ayao sha phro,  
Chiuh-è lu de zabèboh de ithek ne zab gu shii thieg ruii phro.

<sup>12</sup> Gu ne ithek ro layog shii khung phi  
chiuh-è awie pha ji shii khuchung de anow ruii phro.”

<sup>13</sup> Shiinyie iwo ji è yao srane, Hamangkhang-aphuii è rab, igobi pha jine  
ihèg rab; chiuh-è nyie ihèg rey srane ùb ne sand dun phro.

## 9

### *Sohnyiak pha nane hamangkhang pha misiasia*

<sup>1</sup> Igobi pha shiinyie ne misiasia pha bohkhoh pha chiuh-è misiasia pha  
ithua de um jine bran è rab ro. <sup>2</sup> Nyie shii So Ithua rone yao pha haliig ji è ibi  
hà rab. Ji shii ne bunthruak nane Hamangkhang-aphuii shii mizid pha iweb  
um pha thiiebliie um ro. <sup>3</sup> Dinpha yungshaig iidoh shii ne Bajo So Ithua rone  
ho pha haliig um ro. <sup>4</sup> Jihà ne biisiie ziao pha san sraibao um chiuh-è san è  
cheg pha Shiinyie Japho jia um chiuh-è san jarai shii manna zan ne um ro,  
iirabthek khinrin pha Aron ro miichang de um, chiuh-è muyungthek zey pha  
lubao thileg nyi de um. <sup>5</sup> Jiha Hamangkhang-aphuii um rone yao pha japho  
lakhung shii iyig um pha ibeymuthung um ro, ithek iyig è shiuy, layogthek  
khung phi pha jiha cheg ruii. Jishii thuh ne zab ikhiing-ijuang yao pha ishak  
oi ro.

<sup>6</sup> Hi duiine ji pha manathek shii khriig rek ne ruii ro. Phabithek ibi pha  
haliig hà wuii ne idang awaithek ro bliathek rek, <sup>7</sup> jishii iliing pha Haliig  
biicho hàne Kho Phabi è wuii bie, chiuh-è idam jia shii luang jia rek bie. Ai  
ne awai Chiang nane athieg pha layog rek pha branthek Chiang ai ne ifai yie  
ne iliing wuii rone Hamangkhang-aphuii shii mizid phi. <sup>8</sup> Ibi pha haliig ji  
nya-um sapho shii ne Bajo So Ithua wuii pha lumuii ne thuh thog pha ahong  
ba rone zab khriig rek ruii pha lumuii ji è Ragung So è sang è yuajong ro.  
<sup>9</sup> Jine thuh pha ishak pha cheb ro. Ji pha miyaosiu è ne mizidthek chiuh-è  
miiram zidthek Hamangkhang-aphuii shii phi pha ji è ne misiasia phothek  
ro lubu shii khriig arab muii, <sup>10</sup> nyieliieshii ithek ne michie, muniing chiuh-  
è yoh-yoh muhui pha iphey ji è rek bie. Jithek ne zab fuang pha khothek,  
nyie yi Hamangkhang-aphuii è iwo muyung rab pha ishak athog sapho pha  
bie ro.

<sup>11</sup> Jishii ichiuh shii umjong\* pha wie manathek pha kho phabi duiine Masi  
wuiijong ro. Ai è blia rek pha haliig ne bajo boh nane bajo khriig ro; hùne  
bran wad è rab pha haliig asi ro. Hi ne, sohjambling pha ichua è rab pha  
asi ro. <sup>12</sup> Masi è haliig dong wuii shii, ai ne siphin fai nane rawoi mizid  
zid ne aphi ro; gethek shii idang pha chai mua yi pha ai ne awai nujo ro  
ifai yie ne Bajo So Ithua shii luang jia shii idang pha wuii. <sup>13</sup> Siphinthek  
nane suwuiiduii ro ifai shii ziao pha sphie ne bran hanyie yi zeakho ji pha  
lakhung shii shun, chiuh-è ji pha so rek phi pha ji è ithek shii ne mizen shii  
zea ji ruang rek ro. <sup>14</sup> Hi ne izai chak ro, Masi ro ifai è ne muna chiuh-è sang

**9:2** 9:2: Mul 26:1-30; Mul 25:31-40; Mul 25:23-30    **9:3** 9:3: Mul 26:31-33    **9:4** 9:4: Mul 30:1-6;  
Mul 25:10-16; Mul 16:33; Ssb 17:8-10; Mul 25:16; Iphy 10:3-5    **9:5** 9:5: Mul 25:18-22    **9:6** 9:6:

Ssb 18:2-6    **9:7** 9:7: Lew 16:2-34    \* **9:11** 9:11: Ichiuh ne thogjong; giak jigizey ne Thog sharuii.

**9:13** 9:13: Lew 16:15-16; Ssb 19:9,17,19

rek ro idang pha Ragung è Hamangkhung-aphuui shii khriig zid pha ji ai ne awai shii mizid muui. Gethek shii isieng Hamangkhung-aphuui ro blia rek muui pha, airo ifai è gethek ro adunmey mizen pha lubu munow shii sud phi ro.

<sup>15</sup> Hi pha Chiang è shiinyie iwo shii rab Masi ro, ji è hanyie shii Hamangkhung-aphuui è ho pho shii ne Hamangkhung-aphuui è sbang rek pha idang khirzeythek shii choi ro. Jine nyarek mua nyielieshii igobi pha shiinyie shii chun ramuui shii ithek è rek pha ichiigthek re-è brantheek shii ichad rek phi pha jia iyjong ro.

<sup>16</sup> Yang pha Chiang ne bran hanyie è rab pha iy dun ro khagi rek pha miigak ro, Chiih-è yang pha miyaosiu ne hanyie rab pha bran ji isieng ba shiine nyie asi ro, jine ai iy dun pha iidoh ji è chun ruii phro. <sup>17</sup> Hi ne ai iy pha iidoh è thoh ruii, rab pha bran ji sieng ba shii ne nyie de arey phro.

<sup>18</sup> Ji-è igobi pha shiinyie<sup>†</sup> ne ifai rog shii kho ne chun bie ro. <sup>19</sup> Igobi, Moses è Iphey shii rek ne ruii pha ji duine brantheek shii zab pha muyungthek ji yao. Chiihphado rawoi nane siphin ifai yie ne kho rog shii lao, chiih-è Iphey pha jigi nane zab bran shii hysoph pha iphang nane ishaig miiriing shii kho ne shund phi. <sup>20</sup> Ai è yao, “nyie yi Hamangkhung-aphuui è nathek shii nuui bone yung pha ne shiinyie rog cheb rek pha ifai ro.” <sup>21</sup> Ji duine Moses de shiinyie haliig shii nane misiasia shii kho pha zab manathek de ifai è fi phi. <sup>22</sup> Izai, Iphey ji è zab pha ne yangkho ifai sud ro, chiih-è ifai ji shund arone layogthek shii de khung mua ro.

### *Masi ro zid pha ji è layogthek shii yiedun*

<sup>23</sup> Ji pha manathek, nyie yi isbang hamangkhung è noi pha ji duine sud ro. Jishii hamangkhung pha manathek awaithek ne ji è wie zidtheek chid phro. <sup>24</sup> Masi nyie jine izai sbhang pha, bran wad è rab pha So Ithua hàne awuui ro, ai ne awailum ne hamangkhung hà dun dun, ai ne thuh gethek Chiang Hamangkhung-aphuui moe shii dongkhliee.

<sup>25</sup> Jewish pha phabi boh ne idamtham Bajo So Ithua hà miiram ifai rog shii wuii. Jishii Masi ne awai shii mizid pha bleb-bleb awuui ro, <sup>26</sup> chiihphado sohjambling nyarab dang è yie ne thuh thog pha bame diig rek iwa. Ji pha Chiang shii, thuh iidohè pha ishak moe è yie ne zab idam shii, awai shii zid pha ji è zab layogthek shii sud phi pha, ai ne luang jia idang pha khia ro. <sup>27</sup> Zab ne luang jia ne iy chid, chiih-è ji pha iidoh è Hamangkhung-aphuui chua ruii phro. <sup>28</sup> Ji duine Masi de bame ro layogthek ruang rek pha luang jia mizid zid muui ro, bajo layog shii ne khia fen mua. Ai ne layog Chiang è asi pha, jishii hanyie aishii khan pho shii ragia rek pha din ne dong ruii phro.

## 10

<sup>1</sup> Jewish ro Iphey ne wie manathek sbhang thog ramuui pha ji pha ragey duine ro; awai ne zai asi. Hi ne idamtham ne idang ò mizid zid pha ji phi ro. Chiihphado, Iphey ji ne, brantheek hanyie yi Hamangkhung-aphuui shii wuii ji pha zidtheek khriig rey pha khi-è-rek magey phlei? <sup>2</sup> Brantheek Hamangkhung-aphuui shii misiasia pha ji è zai ithek layogthek shii sud arone, ithek ne din re-è layog pha ichiig rone athan, chiih-è zab zidtheek ne gakdun phro. <sup>3</sup> Jishii, hìpha, zid ne idamtham ne bran pha ithek ro layogthek

<sup>†</sup> 9:18 9:18: Shiinyie: Grekh shii ji pha miyaogam siu ne “rey ruii” Chiih-è “shiinyie.”

now yi ro. <sup>4</sup> Chiih-è rawoithek nane siphintheK ifai è ne layogtheK shii akhia mua phro.

<sup>5</sup> Ji pha Chiang, Masi sohJambling shii wuii shii, ai è Hamangkhung-aphuii shii yao:

“Na ne zidtheK nane mizidtheK achid ro, jishii na è gu Chiang siu shii saro phi.

<sup>6</sup> Na ne sraibao shii ziao pha miiramtheK shii

chiih-è zidtheK rog shii layogtheK shii khia muui pha ji shii de asang ro.

<sup>7</sup> Chiihphado gu ne yao, Hamangkhung-aphuii Wo,

Iphey pha jigi shii gu shii zey pha duuine ro, nathek è yang pha ji rek pha ‘Gune ichiih um ro.’”

<sup>8</sup> Ai è ibi yaojong, “Na ne khuchung de ayang ro chiih-è zidtheK chiih-è mizidtheK sraibao shii ziao pha miiramtheK de layogtheK shii khia yi pha zidtheK shii de na ne asang ro.” Hì pha mizid ne Iphey ji duuine zid magunde ai è hi yao ro. <sup>9</sup> Chiihphado ai è yao, Hamangkhung-aphuii Wo, na è yang pha ji rek pha “Gu ne ichiih um ro.” Ji-è Hamangkhung-aphuii zab ihèg zid shii fen muui srane Masi ro zid shii ji pha ithua hà ruii muui ro. <sup>10</sup> Nyieliieshii Isu Masi è Hamangkhung-aphuii ne aishii nyie rek phi bone yang pha ji rek phi, Gethek ne zab ai è awairo siu shii luang jia pha idang mizidtheK phi pha ji è gethek ro layog è sud phi ro.

<sup>11</sup> Zab Jewish inaitham ne awaithek ro blia rek chiih-è idang ò zid pha mizid, ji shii ji pha zid khuchung de layogtheK shii ruang arek mua ro. <sup>12</sup> Ji-arone, Masi, ne layogtheK Chiang luang jia mizid zid jong, mizid jine idang chun, chiih-è ai ne Hamangkhung-aphuii pha phazoi hà dug dun ro. <sup>13</sup> Ji-è ai ne thuh ai ro makpho shii Hamangkhung-aphuii è airo lai liing hà aruii sapho thog pha ai ne khan muui ro. <sup>14</sup> Chiihphado, jia zid pha rog, hanyie yi layogtheK è sud pho shii ne ai è idang khriigjong pha rab ro.

<sup>15</sup> Chiih-è Ragung So de gethek shii airo khagi phi ro. Igobi ai è yao,

<sup>16</sup> “Ithong è yao ro, Inai thog ruii shii hìpha shiinyie ne gu è ithek rog shii rab pha ji ro:

Gu ne gu ro IphemtheK shii ithek ro lubuthek hà chab phi

chiih-è awaithek khani shii zey phi pha ro.”

<sup>17</sup> Chiihphado ai è yao, “itheK ro layogtheK nane awie blia shii din ne anow sha phro.” <sup>18</sup> Ji-è hì thek ne khungjong shii, mizid pha ji è layogtheK shii ruang rek pha ji din ne achid sha ro.

### *Cho gethek Hamangkhung-aphuii moe hà wuii sha rai*

<sup>19</sup> Chiihphado, gu iijiaktheK, Isu iy miyao ji è gethek shii Bajo So Ithua hà wuii mua pha zab ichad sha ro. <sup>20</sup> Ai ne gethek shii yung saig ji è lumuii iwo, sieng pha lumuii shii hong phi ro—Ji ne ai awairo siu ji ro. <sup>21</sup> Hamangkhung-aphuii hò pha ilkhi bajoboh phabi ne gethek rog shii um ro. <sup>22</sup> Ji-è cho gethek ne wie lubu nane izai migi rog, chiih-è ichiig è sudjong pha lubu chiih-è khow so è sud pha siuthek ne Hamangkhung-aphuii moe hà wuii rai haro. <sup>23</sup> Ji-è cho gethek ne gethek è rek pha gethek ro luthong chuh è kho rai haro, nyieliieshii gethek ai ro sbang rai rone Hamangkhung-aphuii shii migi rek mua ro. <sup>24</sup> Cho gethek ne nong rai chiih-è miie rone doh yi chiih-è wie rek pha now rai haro. <sup>25</sup> Cho gethek ne gai è rek ramuii pha duuine, gethek è ò shii male rek pha lajia pha ji shii athoh haro. Ji phachiang shii, Ithong

pha Inai nui thog pha nathek è doh pha ji è cho gethek chung zab shii mana lububo rek rai haro. <sup>26</sup> Chiuh-è gethek izai ji id yi pha iidoh shii gethek è layogthek rek arone layogthek shii sud pha gai zid oi sha ro. <sup>27</sup> Ji phachiang shii, zab thog ramuii pha chua shii chiuh-è hanyie è Hamangkhung-aphuii shii suang rek pho bai è ziao pha rum ji shii khan bie ro! <sup>28</sup> Hanyie magunde Moses ro Iphay shii anuii pho ne aishii ne bushun arek pha bran nyi uom khagi rek ne ua muui ro. <sup>29</sup> Chiuhphado, Hamangkhung-aphuii ro Dufuii shii hanyie è snai pho shii, chiuh-è layogthek è ithek shii sud pha Hamangkhung-aphuii shiinyie ifai ji shii igong oi pha duiine rek pho shii nyie rey ruii phlei? Nyieliieshii ai ne Ragung pha bushun shii de makhak-riing, ji è ithek shii chua ne khama buii rey ruii phro! <sup>30</sup> Chiuh-è gethek ne thieg hanyie yao, “Gu ne rog din ruii, Gu ne phi din ruii phro” Chiuh-è ai hì de yao, “Ithong ne awai bran shii chua ruii phro.” <sup>31</sup> Isiang Hamangkhung-aphuii wad shii thog pha ne bajo buii ro!

<sup>32</sup> Igobi hà na rog shii nyie umjong pha ji shii now bo. Hamangkhung-aphuii ro muchuang nathek lakhung shii phi pha inai iidoh shii nathek ne bajo manathek shii diig rek, ji shii rang de nathek shii ne diig ji è ayang mua ro. <sup>33</sup> Ji pha ishak nathek shii ne hong ne makhak-riing ne khui chiuh-è ishak jia shii hanyie rog shii hì è rey pho rog shii nong pha saro ro. <sup>34</sup> Na è phathegphothek ro diigchiaothek shii thang, chiuh-è nathek ro manathek shii ne zab reo, nathek ne nawaithek munow rey pha ji shii lised ne zud, nyieliieshii nyie yi idang rey ne rai pha wie manathek jine thuh de nathek shii um bamuii rone nathek ne thieg ro.

<sup>35</sup> Nawaithek ro lububo rek pha ji shii amua rabo, chiuhphado, nyieliieshii jine bajoboh lasen mua ruii phro. <sup>36</sup> Hamangkhung-aphuii è yang pha ji shii blia rek pha nane chiuh-è ai è nyie sbang rek pha ji shii choi pha Na ne jum rek bo. <sup>37</sup> Chiuh-è, jigi shii yao pha duiine,

“lu jia pha ishak shii,  
chiuh-è hanyie wuiiramuii pha jine wuii phro;  
ai ne achia phro.

<sup>38</sup> Guro rangsua brantheke ne, migi rek ne sieng ruii phro;  
jishii hanyie magunde iidoh khid din arone,  
Gu ne ithek rog shii asang din sha phro.”

<sup>39</sup> Gethek ne iidoh khid pha bran nane mua pha asi ro. Ji phachiang shii gethek ne migi rek chiuh-è ragia rey ro.

## 11

### Migi

<sup>1</sup> Migi um pha ji è gethek luthong pha manathek shii ne zai mua ruii, gethek è adoh pha manathek jine um rone migi rek. <sup>2</sup> Buyo ishak pha bran ithek ro migi è Hamangkhung-aphuii è nuii phi pha ji shii yang.

<sup>3</sup> Hì ne migi è gethek gao zab hamangnyiak ne Hamangkhung-aphuii ro miyaogam è rab ro, ji è nyie doh pha ji shii ne nyie adoh pha ji è rab ro.

<sup>4</sup> Airo migi è Abel è Hamangkhung-aphuii shii Khain è de wie mizid phi. Airo migi ji è ai ne rangsua pha bran rone Hamangkhung-aphuii è nuii phi,

nyeliieshii Hamangkhung-aphuui awai è airo lasenthek shii nuui phi. Ai iyjong magun airo migi pha miyaosiu è Abel ne thuh de yao bamuii ro.

<sup>5</sup> Migì ji è Enokh shii a-iy yie. Ji pha Chiang è aishii ne Hamangkhung-aphuui hà noh dun, chiih-è hanyie de aishii adoh mua, nyeliieshii Hamangkhung-aphuui è aishii noh dun. Jigi shii yao Enokh shii laziung noh dun pha ibi shii ai è Hamangkhung-aphuui shii sang yi ro. <sup>6</sup> Hanyie jia de migi arek pha Hamangkhung-aphuui shii sang arek mua phro, hanyie magun Hamangkhung-aphuui shii wuiipho ne Hamangkhung-aphuui idang um rone chiih-è hanyie aishii sowpho ne lasen phi rone migi um chid.

<sup>7</sup> Migì ji è Hamangkhung-aphuui è ai adoh pha phariang pha manathek shii phriie pha ji shii Noah è yoi ro. Nyie yi Ai nane airo haliingpho ragia rey mua pha ai è Hamangkhung-aphuui shii nuui srane run jia rab. Idohhè shii sohjambling shii ne the dun, chiih-è migi ji è thog pha Hamangkhung-aphuui ro rongsuathek ne Noah è choi ro. <sup>8</sup> Migì Chiang shii nyie shii Hamangkhung-aphuui è aishii phi phro ne sbang rek pha soh shii wuii Hamangkhung-aphuui è aishii ho shii Abraham è nuui phi ro. Ai ne khi hà wuiiramuii pha jine nyie de athiegdang awai soh shii thoh marui. <sup>9</sup> Migì Chiang è Hamangkhung-aphuui è aishii sbang rek pha soh hà ai ne fuang bran duine rai ro. Ai ne haliigtheK shii rai, hanyie yi Hamangkhung-aphuui ro ò sbang ji Isakh nane Jakhob de haliigtheK shii rai. <sup>10</sup> Chiih-è Abraham ne Hamangkhung-aphuui è izey rab chiih-è idang pha sarong rog shii rajan rab pha ji shii khan muui ro. <sup>11</sup> Migì Chiang è ai ne bajo weg magunde chiih-è Sarah awai ani agiak magunde Abraham ne aphuui rey dun ro. Ai ne airo sbang rey yi pha ai ne\* Hamangkhung-aphuui shii migi rek ro. <sup>12</sup> Abraham ro siu ne iy dun pha duine ro, ai è hamang pha dadiangtheK duine chiih-è khamuiiring pha bajo baligamtheK duine airo riingtheK wuii ro.

<sup>13</sup> Migì ji è zab ji pha bran ne iy dun. ItheK ne Hamangkhung-aphuui è sbang rek pha manathek shii ayie mua ro, jishii ithek ne ruang è ithek shii doh chiih-è ithek shii wieho, ithek ne sohnyiak shii fuang pha brantheK nane gai brantheK shii rey ne rai pha ji shii nuui phi. <sup>14</sup> Hanyie è jithek shii yao pha mana ne sang è id yi ithek ne awaithek ro soh shii sow ramuii ro. <sup>15</sup> ItheK ne awaithek è thohjong pha soh shii anow ro; ithek ne now arone, ithek shii ne iidoh khid pha choi um ro. <sup>16</sup> Ji phachiang shii, hìne ithek è thoh marui pha ji è de bajo wie pha soh hamangkhung pha soh ji shii chid ro. Chiih-è ji è Hamangkhung-aphuui ne awai ne ithek ro Hamangkhung-aphuui rone yao phane awo ro, nyeliieshii ai ithek shii rajan saro phi ro. <sup>17</sup> Migì ji è Hamangkhung-aphuui è Abraham shii chai pha rek shii Abraham ne awai dufuui Isakh shii mizid sha pha rek ro. Abraham ne Hamangkhung-aphuui è sbang rek pha jia ro. Jimagunde ai ne awai dufuui shii zid pha duine mizid pha saro rek ro. <sup>18</sup> Hamangkhung-aphuui è aishii yao, “Gu è sbang rek pha nro riingtheK ne Isakh è rey ruui phro.” <sup>19</sup> Abraham ne idjong Hamangkhung-aphuui ne Isakh shii iy pha ji è nyahoi mua—Chiih-è, ji è, zai Abraham ne Isakh shii iy pha ji è choi din ro.

**11:5** 11:5: Igo 5:21-24 (LXX)    **11:8** 11:8: Igo 12:1-5    **11:9** 11:9: Igo 35:27    **11:11** 11:11: Igo 18:11-14; 21:2    \* **11:11** 11:11: Hi ne migi, aniphiing. Airo; giak jigizey um Hi ne migi ji rab Sarah awai shii now yi pha, ai bajo miriang magunde aniphiing um. Ai.    **11:12** 11:12: Igo 15:5; 22:17; 32:12    **11:13** 11:13: Igo 23:4; 1Phal 29:15; Chng 39:12    **11:17** 11:17: Igo 22:1-14    **11:18** 11:18: Igo 21:12

<sup>20</sup> Migi Chiang shii Isakh è Jakhob nane Esau shii phariang pha khirzeythek shii sbang rek ro.

<sup>21</sup> Migi Chiang è Jakhob è awai iy pha ibi shii Joseph ro dufuiithek shii khirzey phi. Ai ne thagin è gin ne chiih-è Hamangkhung-aphuii shii misiasia.

<sup>22</sup> Migi Chiang shii Joseph è awai iy sha pha nui thog sha shii ai è Israelthek ro Egyph è thoh ne dun ruii phro ne yao, chiih-è airo siu rog shii nyie rey pha Chiang shii de yua phi.

<sup>23</sup> Migi Chiang shii Moses pha aphuii-amuii è ai giak pha iidoh aishii habie uom ug ne yie ro. Ithek è aishii bajo khie ani rone riig, chiih-è ithek ne sajathek muyung shii anuii pha rek pha ji de arum. <sup>24</sup> Migi Chiang shii Moses è ai chai rey pha ishak shii, sajathek dimi pha ani rone aho yie.

<sup>25</sup> Ai ne layog shii Iujia ishak lubo liak shii ne Hamangkhung-aphuii bran rog shii diig rek pha ji wie ba rone guajong ro. <sup>26</sup> Ai è nohjong Egyph pha zab nuruiithek è ne Masaiya Chiang diigchiao shii zud pha ji wie ba ro, nyieliieshii airo mieg yi phariang pha lasen shii riig muui ro.

<sup>27</sup> Hi ne migi re-è rey ro Moses ne sajathek ro lijièthek shii arum pha Egyph thoh muui ro. Ai ne adoh pha Hamangkhung-aphuii shii do, ji è ai ne iidoh khid pha ji shii anuii ro. <sup>28</sup> Migi ji è aishii hiadun pha ji shii rab yie chiih-è Iy pha Khlei è Israelthek pha igobi giak pha dufuiithek shii a-ua yi pha habin shii ifai fi pha yung ro.

<sup>29</sup> Migi è Israelthek ne igo soh duuine Khamuii Saig è hiia dun, EGYPHTEK è ji rek pha bidiang shii ithek shii kho è lim muui ro.

<sup>30</sup> Migi è Jerikho pha mthuathek shii Israelthek è inai miley lua ne shan pha iidoh shii chuakdun. <sup>31</sup> Migi ji è, siulao rek pha Rahab shii ne hanyie è Hamangkhung-aphuii shii anuii pho rog shii ne a-ua ro, nyieliieshii ai ne Israelthek pha bujuiiphothek shii wie è ho phi.

<sup>32</sup> Gu ne yao lumuii habey? Gideon, Barag, Samson, Jephtha, Dawid, Samuel, chiih-è chaigthek pha yao phane ishak acho sha ro. <sup>33</sup> Migi ji è ithek ne zab ro soh shii mak rek ne yang ge. Ithek ne nyie izai ji shii rek chiih-è Hamangkhung-aphuii è nyie sbang rek pha ji shii choi ge ro. Ithek ne bargithek sem shii de kheb muui, <sup>34</sup> bai hòi shii de nyia muui khamriie è de ragia rek ge ro. Ithek ne zia, jishii gang rey dun; ithek ne mak shii de riichaiboh um chiih-è fuangphothek pha arming re-è de yang gey ro. <sup>35</sup> Migi ji è hò-amuii ne awaithek ro iyjong pha siangthangthek ji è hòi pha muui din ne yie ro.

Gaithek ne ichad shii snai, wie chai shii hipha Chiang khui ne iy dun. <sup>36</sup> Giak ne makhak-riing chiih-è chia, chiih-è giak shii ne shiurnaithek è phang ne phatheg hà chab muui ro. <sup>37</sup> Ithek shii ne lubao è chao, ithek shii ne aroh è nyirang laigthek muui, ithek shii ne khamriie è ua muui ro. Ithek ne shiishai nane siphin khug gui—Ithek ne dusho chiih-è diigchiao, chiih-è ithek shii ne gayiig de arek. <sup>38</sup> Sohjambling ne ithek shii wie acho ro! Ithek ne wogthek

**11:20** 11:20: Igo 27:27-29,39,40    **11:21** 11:21: Igo 48:1-20; Igo 47:31 (LXX)    **11:22** 11:22: Igo 50:24,25; Mul 13:19    **11:23** 11:23: Mul 2:2; Mul 1:22    **11:24** 11:24: Mul 2:10-12    **11:28** 11:28: Mul 12:21-30    **11:29** 11:29: Mul 14:21-31    **11:30** 11:30: Jos 6:12-21    **11:31** 11:31: Jos 6:22-25; Jos 2:1-21    **11:32** 11:32: Chua 6:11—8:32; Chua 4:6—5:31; Chua 13:2—16:31; Chua 11:1—12:7; 1Sam 16:1—1Saj 2:11; 1Sam 1:1—25:1    **11:33** 11:33: Dan 6:1-27    **11:34** 11:34: Dan 3:1-30    **11:35** 11:35: 1Saj 17:17-24; 2Saj 4:25-37    **11:36** 11:36: 1Saj 22:26,27; 2Phal 18:25,26; Jeri 20:2; 37:15; 38:6    **11:37** 11:37: 2Phal 24:21

hà chiih-è nyaliag ichothek hà rai ne balimuangthek nane phiingduiithek shii gai brantheke duiine lua muui ro.

<sup>39</sup> Hi thek zab sasab ne ithek ro migi um pha ji è yang ge ro! Jimagunde Thuh de ithek ne Hamangkhung-aphuii è sbang rek pha ji shii ne achoi ro. <sup>40</sup> Nyieliieshii Hamangkhung-aphuii è gethek shii ne ji è de wie phakjong. Ai è gethek rog shii ò rek ne ithek shii khriig rab pha ji chid bie ro.

## 12

### *Hamangkhung-aphuii gethek aphuii*

<sup>1</sup> Gethek pha, ne boh ibrog pha khagi shand ne um ro. Ji-è chiihphado, cho gethek lumuii shii dog pha ji shii ruang rek chiih-è layog è chuh kho pha ji è de zab ruang rek rai haro, chiih-è cho gethek shii ran pha um pha ji shii lubu è phi ne ran rai haro. <sup>2</sup> Cho gethek ro mieg hanyie shii gethek ro migi shii ibi è iidohè thog pha luthong pha Isu shii riig rai haro. Ai ne bai shii riig srane athoh muui ro! Ji phachiang shii, nyieliieshii ai è khan pha lubo ne, ai ne bai shii iy pha Chiang shii nyie de anow ro. Chiih-è ai ne thuh Hamangkhung-aphuii ro biang phazoi hà dug ne rai muui ro.

<sup>3</sup> Ai ne khama diig rek ne lua chiih-è layogphothek è aishii khama khiijai pha jine now bo! Ji-è nawai shii lubu iu rek athoh rabo. <sup>4</sup> Chiih-è narò layog suang pha mak shii ne na ne thuh de iy bsa thog pha zud ne arek ba ro. <sup>5</sup> Hamangkhung-aphuii è awai ani duiine nathek shii yao pha lububo rek pha miyaogamthek ne nathek bia dun bey?

“Gu ani, Ithong è na shii yua shii wie nuui bo,

Chiih-è ai è nathek shii giung shii lubu-iu arek rabo.

<sup>6</sup> Nyieliieshii ai è miie pha ji shii ne Ithong è wie yua ro, chiih-è awai ani duiine choi pha zab shii lagothek phi ro.”

<sup>7</sup> Aphuii ro lago duiine now ne na è diig rek pha ji shii zud bo; narò diig rek pha ji Hamangkhung-aphuii ne na shii awai ani duiine rek rone doh yi ro. Aphuii è lago aphi pha dufuii ne hanyie um bey? <sup>8</sup> Awairo zab ani duiine na shii lago aphi arone, ji pha miyaosiu è ne na ne ani sbhang asi ro, jishii duroi ro. <sup>9</sup> Gethek ro pha bran aphuiithek è yao arone, ithek è gethek shii lago phi chiih-è gethek ne ithek shii ilab phi. Chiihphado, gethek ne gethek ro ragung pha Aphuii shii phi ne sieng pha jine ji è de boh ro! <sup>10</sup> Ithek è khriig rone riig shii; gethek bran pha aphuiithek è gethek shii lago phi phane iujia ishak ro, jishii Hamangkhung-aphuii ne gethek shii wie pha ji rek, ji è gethek ne airo sothek ji shii thang mua pha rek ro. <sup>11</sup> Gethek shii lago phi magey shii, ji pha ishak shii gethek shii iujia ishak zo yi, chiih-è alised yi ro. Jimagunde iidoh hanyie è ji pha lago shii isiie rekpho shii rangsuathek chai pha lijiing lasen shii ruii phro.

### *Muyungthek nane phriiethek*

<sup>12</sup> Chiihphado, nawaithek ro jid pha wadthek chiing magey bo, chiih-è nawaithek ro lagiung sham pha ji shii ne chuh rek bo! <sup>13</sup> Lumuii mieng shii lua ne ruii bo, ji è laidadiang alua mua yi pha arek pha, jishii ji pha chiangg shii gang yi bo.

<sup>14</sup> Zab jia rog shii lijiing rek pha bidiang bo, chiih-è so chai rai pha bidiang bo, nyieliieshii sothek oi arone hanyie jia de Ithong shii adoh ruii phro. <sup>15</sup> Hamangkhung-aphuii ro bushun è iidoh khid din yi pha suang shii ragia rek



bo. Hanyie jia de misieng khow sieng pha ji duiine arey rabo chiih-è ai ro idiig ne bame diig rey ro. <sup>16</sup> Hanyie jia de siulao arek rabo, chiih-è hanyie è dufuii dukho re ne luang jia chie pha awai rangsuathek shii liu muui pha Esau duiine ragung oi pha duiine arey rabo. <sup>17</sup> Ji pha idoh, na ne id, ai ne awai aphuii ro khirzey shii choi pha yang; jishii aishii ne iidoh khid din yi, chiih-è ai ne miegkhothek rog shii sow magunde ai è rekjong pha ji shii nyie lumuii chua amua ro.\*

<sup>18</sup> Na è nyie shii nyathan mua, Sinai phiing pha bai hang rog shii, igiia nane hòthab, hasamkhanoi shii, <sup>19</sup> Phiong pha thu-ung è, chiih-è gu ro pha Sinai Phiing shii Israel pha brantheke wuii pha duiine, na ne awuii ro. Bran è goh yoi magey shii, gai miyaogam ayoi yi rabo ne ithek ne khung, <sup>20</sup> nyieliieshii ithek nyie yao pha muyung shii ne azid mua ro, “miiram è phiing shii khoh arone, jine iy pha lubao è chao chid ro.” <sup>21</sup> Moses è yao pha ji riig pho ne bajo rum um ro, “Gu ne sham ne rumdun!” <sup>22</sup> Ji phachiang shii, na ne hamangkhung pha Jerusalem itham hamangkhliethek rai pha Zion pha Phiing nane isieng Hamangkhung-aphuii ro rajan shii wuii. <sup>23</sup> Hamangkhung hà hanyie ro ibeng zeyjong pha, Hamangkhung-aphuii ro ibi giak pha lubo khrab bsa hà nathek wuii ro. Nathek ne hanyie yi zab bran shii chua pha Hamangkhung-aphuii shii wuii ge ro, chiih-è khriig bran shii isiie rabjong pha ragungthek hà wuii ro. <sup>24</sup> Nathek ne hanyie è shiinyie wo rab, chiih-è Abel pha ifai è de huàk ne ifai shund pha sbang rek pha Isu shii wuii ge ro.

<sup>25</sup> Wie gayiig bo, chiihphado, hanyie è yao ji shii yoi pha asnai rabo. Hanyie è sohnyiak shii so mua yao pha ji ayoi rone ayao mua ro. Chiihphado, gethek ne hamangkhung è yao pha ji è khiddun arone gethek yoh pha lumuii ne bajo lu ro! <sup>26</sup> Ji pha ishak shii airo goh ne sohnyiak shii sham magey, jishii thuh ne ai è sbang rek, “Gu ne din ne soh shii ashambie pha hamangkhung shii de sham ruii phro.” <sup>27</sup> “Din ne luang jia” Miyaogamthek è ne rab pha manathek ne sham ne chiing ruii phro ne sang riig yi ro, ji è manathek ne ashambie mua pha ji shii rai ruii phro.

<sup>28</sup> Chiihphado, cho gethek ne lasothek phi haro, nyieliieshii gethek ne sajathua ashambie muui pha ji shii choi ge ro. Cho gethek ne laso phi ne chiih-è ilab nane rum srane aishii sang yi lumuii ji è Hamangkhung-aphuii shii misiasia; <sup>29</sup> nyieliieshii gethek ro Hamangkhung-aphuii ne zai srobro rek mua pha bai ro.

## 13

### *Hamangkhung-aphuii shii khi-è rek ne sang yi chid*

<sup>1</sup> Masipho khuiinothek duiine nawaithek chung moe shii ruii bo. <sup>2</sup> Athieg pha biwenthek shii nawai hò hà hophab abia rabo. Giak è ne athieg pha biwenthek ho shii hamangkhliie shii ho jong. <sup>3</sup> Phathegpho shii now srane, nawai de ithek rog phatheg hà duiine now bo. Diigchiaopho shii now srane ithek diigchiaopho ji shii nawai è rad pha duiine now bo.

---

**12:16** 12:16: Igo 25:29-34    **12:17** 12:17: Igo 27:30-40    \* **12:17** 12:17: Ai ne ji shii riig; dinneAi ne khirzey mua yi pha rek    **12:18** 12:18-19: Mul 19:16-22; 20:18-21; Iphy 4:11,12; 5:22-27    **12:20** 12:20: Mul 19:12-13    **12:21** 12:21: Iphy 9:19    **12:24** 12:24: Igo 4:10    **12:25** 12:25: Mul 20:22  
**12:26** 12:26: Hag 2:6 (LXX)    **12:29** 12:29: Iphy 4:24    **13:2** 13:2: Igo 18:1-8; 19:1-3

<sup>4</sup> Yiy-gey pha ji shii ne zab ilab phi chid, chiih-è yiy nane gey chung ne migi um rai chid. Hamangkhung-aphuii ne hanyie shii lubu oi hanyie è siulao rek ithek chua ruui phro.

<sup>5</sup> Bang miie ne sgow pha ji è nawai shii ruang ruui bo, chiih-è nawai shii nyie um pha ji shii cho bo. Nyieliieshii Hamangkhung-aphuii è yao, “Gu ne na shii athoh phro; gu ne na shii asnai phro.” <sup>6</sup> Chiihphado, lubu boh rek srane yao,

“Ithong ne garo nongpho ro,

Gu ne arum phro.

Gu shii hanyie nyie rek mua phiiga?”

<sup>7</sup> Hanyie è nathek shii Hamangkhung-aphuii ro mua yao, nathek ro ibi pha dumuiithek shii now bo. Iidoh pha ji now bo ithek ne khi-è rek ne sieng ithek khi-è rek ne iy chiih-è ithek ro migi shii noi bo. <sup>8</sup> Isu Masi ne duyo, sdoh chiih-è idang ò ro. <sup>9</sup> Izai lumuii ji è nathek ne zab athieg pha muyua pha jihà adun yi rabo. Hi ne hanyie shii hìpha nuui pha ji è khoh ne ithek è anong pha michie Chiang shii khoh nuui pha ji shii ne Hamangkhung-aphuii bushun è iliing pha chua shii choi pha ji wie ro.

<sup>10</sup> Phabithek hanyie Jewish ithua pha misiasia sraibao zid nyie um pha ji shii chie phane rangsua oi ro. <sup>11</sup> Jewish pha Kho Phabi ne layog Chiang shii miiram ro ifai yie ne Bajo So Ithua hà mizid zid; jishii miiram siu shii ne haliig è fuang hà ziao muui. <sup>12</sup> Ji pha Chiang, aiwai ro ifai è brantheK ro layog shii gang rek phi pha, Isu de rajan è fuang hà iy. <sup>13</sup> Chiihphado, cho gethek de, haliig è fuang hà aishii wuii ne chiih-è airo biwo shii thang rai haro. <sup>14</sup> Chiih-è ichiih sohnyiak shii ne gethek ro idang pha rajan ithua oi ro; gethek ne nyie thog ruui pha rajan shii khan ro. <sup>15</sup> Chiihphado, cho gethek de, nyie yi aishii Ithong rone sphuntheK è nuui ne Isu Chiang è Hamangkhung-aphuii shii idang mizid chiong ne zid rai haro. <sup>16</sup> Wie shii rek pha abia rabo chiih-è nawaiithek chung nong rai bo, nyieliieshii hìpha zid jine Hamangkhung-aphuii shii sang yi ro.

<sup>17</sup> Nawaiithek ro dumuiithek shii nuui bo chiih-è ithek muyungtheK shii luagieng bo. Itek ne nathek luruak shii athohdang pha riig muui, nyieliieshii ithek ne ithek ro blia rek pha ji shii Hamangkhung-aphuii shii sasab phi chid phro. Nathek ithek shii nuui arone, ithek ne awaithek blia shii lised ne rek ruui phro; asi arone, ithek ne zo ne rek ruui phro, chiih-è jine nathek shii nong oi ruui phro. <sup>18</sup> Gathek shii misia shii ruui bo. Gethek ne zai nyayao mua gethek munow ne sang ro, nyieliieshii gethek ne zab ishak shii zai shii rek yang. <sup>19</sup> Chiih-è gu shii khthiie iidoh nathek moe shii thoh din yi pha Hamangkhung-aphuii shii sia bone gu ne ithek shii lubu è khung phro.

### *Zab sha pha misia*

<sup>20-21</sup> Gethek Ithong Isu Masi shii Hamangkhung-aphuii è iy pha ji hòì din yi; ai è awai ifai\* phi muui pha Chiang ai ne shiishai pha Bajobo Shiishai brogpho rey, ji pha Chiang è idang pha shiinyie nabjong. Yang ne liijing Hamangkhung-aphuii è na shii airo yang pha ji shii rek yi pha zab wie mana ji shii phi yi pha, chiih-è Isu Masi Chiang, gethek chai shii ai è sang pha ji shii rek yi bo. Chiih-è biisiie ne idang è idang pha Masi ro! Amen.

### *Iidohè pha miyaogamtheK*

---

**13:6** 13:6: Chng 118:6 (LXX)    **13:11** 13:11: Lew 16:27    \* **13:20-21** 13:20-21: Airo ifai; dinneAi zid ne iy.

<sup>22</sup> Gu nathek shii khung, gu iijiiakthek hìpha lububo rek pha mua shii wie è nui bo; gu è nathek shii zey pha jigi hìne phiang asi ro. <sup>23</sup> Gu ne nathek shii gethek khuiino Thimothi phatæg è khia ge pha ji shii id yi pha yang ro. Ai khthiie thog arone, aishii gurog noh srane nathek shii si pha wuii pha ro.

<sup>24</sup> Nathek ro dumuiithek shii chiih-è zab Hamangkhung-aphuii bran shii gathek ro salamthek phi bo. Ithaly pha migiphothek è de nathek shii salamthek thoh gey. <sup>25</sup> Hamangkhung-aphuii ro bushun ne nathek zab rog rai bo.

## JEMS Ro Jigigam Yaophi

Jems è jigigam ne “zab sohjambling pha Hamangkhung-aphuii ro bran ne dayiingdayang rey dun pha ji shii” inai nathek ro chai shii khi-èrek ne rai chid pha ji muyuagthek phi ne khrab srane zey ro, Zeypho ne miiriig ji è khoh srane khani blia nane Masipho ziig nane blia shii gayiig phi pha ji è doh yi ro. Masipho ro blia re-è ai ne wie pha miyao bukho nane dusho, chuajan, wie blia, miiriig-achiing, migi nane bliathek, ri shii kho ne, khani, guirai, wiangwe nane jum, gaithek shii chua, nyigodog, lubuphiang, nane misia hithek zab shii Masipho ne nyie khi-èrek ne blia rek chid pha lei ne ai ne hithek zab pha miyao shii yao ro.

Masipho giang shii nui shii, jigi ne migi rog bliathek rek phane miigak rone chuh rek phi ro.

### **Iliing shii um pha ji**

Yaophi (1:1)

Migi nane Khani (1:2-8)

Dusho nane Nuruii (1:9-11)

Chai nane chuajan (1:12-18)

Yoi nane Rek (1:19-27)

Gidieg shii suang phriie (2:1-13)

Migi nane Bliathek (2:14-26)

Masipho nane airo ri (3:1-18)

Masipho nane Sohjambling (4:1—5:6)

Yoh yoh Muyuathek (5:7-20)

<sup>1</sup> Hamangkhung-aphuii nane Ithong Isu Masi ro khiao Jems re-è:  
Zab pha Hamangkhung-aphuii ro bran sohjambling shii dayiingdayang rey dun pho shii salamthek yao ro.

### *Migi nane khani*

<sup>2</sup> Gu ijiiakthek, nathek lumuii shii zab pha chuajan thog ruii shii nawaithek shii sang bo, <sup>3</sup> chiih-è nawaithek ne thieg nathek ro migi ye chuathék shii yang mage shii, chiih-è gu shii ne zud mua pha blu mua ruii phro.

<sup>4</sup> Nathek ne zai rek boh nathek ro zud ji è ne nathek ro zab lumuii shii buyud arey yie rabo, ji è nathek ne khriig chiih-è zab rey ne, nyie de asiog pha arey yi rabo, <sup>5</sup> Jishii nathek è hanyie magunde khani shii asiog arone, hanyie è nathek shii phi ruii pha, nathek ne Hamangkhung-aphuii shii sia bo, nyieliieshii Hamangkhung-aphuii è nathek zab shii lubu hong ne chiih-è bushun rek ne phi ro. <sup>6</sup> Jishii nathek sia mage shii, nathek ne migi rek ne anowdak rabo. Hanyie magunde nowdak arone hasam è khamuii pha khasao shii thedan thadan pha duiine ro. <sup>7-8</sup> Jiduii pha bran arone nathek ro khani shii arab mua chiih-è nathek è rek pha zab shii aphak mua, nathek ne Ithong è nyie magunde mua ruii phro ne anow chid rabo.

### *Dusho nane bukhothek*

<sup>9</sup> Hanyie dusho Masiphothek shii Hamangkhung-aphuii è ithek shii lakhung chiing mage shii sang bo, <sup>10</sup> chiih-è Hamangkhung-aphuii è bukho

Masiphothek shii buzam yi mage shii sang bo. Chiih-è bukhothek ne jabiing pha iibua duiine san dun phro. <sup>11</sup> Hasiang yi bajo chieg rek mage shii misieng ne hùb dun phro; ji pha iibua ne thud dun phro, chiih-è khie ne mua dun phro. Ji duiine bukhothek ne awaithek chong hà wuii shii mua dun phro.

### *Chai nane chuajan*

<sup>12</sup> Hanyie yi chujan shii isiie rek ne rai ithek ne sang phro, nyieliieshii ithek yi chuajan shii yang ne hiiia mage shii, Hamangkhung-aphuii è aishii miie muui pha ji shii nyie sbang rek muui pha chai ne lasen duiine choi ruii phro. <sup>13</sup> Branthekek chuajan pha ji shii chai mua arone, gethek ne ayao rabo, “hìpha chaujan ne Hamangkhung-aphuii è thog rone ayao rabo.” Nyieliieshii Hamangkhung-aphuii shii ne awie pha ji è achai mua, chiih-è ai ne hanyie shii achai phro. <sup>14</sup> Jishii gethek ro awie pha ji shii chid pha ji è ibong hà phang mage shii gethek shii ne chuajan dun. <sup>15</sup> Chiihphado gethek ro awie pha chidthekek wiig pha ji è layog giak ruii phro; chiih-è layog, ji weg rey mage shii, iy pha ji giak ruii phro.

<sup>16</sup> Gu khuiinothek nane bumuiithek, akhin-arin yi rabo! <sup>17</sup> Zab wie lasen nane zab khriig ne hamangkhung è thog ro; hìne Hamangkhung-aphuii è thazam thog ro, hamangkhung pha muchuangthekek shii rabpho, hanyie ne alai chiih-è igiia shii iidoh ayie ro. <sup>18</sup> Ai awai è yang pha ji è gethek shii izai pha miyaogam ji è chai phi ro, ji-è gethek shii ne zab ai è rab pha duchoi igobi pha ithua shii rai mua yi ro.

### *Yoi ne rek*

<sup>19</sup> Hi nowkhlei bo, Gu khuiinothek nane bumuiithek! Zabjia ne khthiie yoi bo, Jishii rasie è yao chiih-è rasie è lijieg bo. <sup>20</sup> Bran ro lijieg ne Hamangkhung-aphuii ro giangthekek phak shii zab arek mua phro. <sup>21</sup> Ji-è zab awie pha lajia nane buii rek pha ji shii thoh muui bo. Hamangkhung-aphuii shii phi srane nathek lubu shii hai pha miyaogam jishii choi bo, nyie yi na shii ragia rek mua ro.

<sup>22</sup> Airo miyaogam yoi bie pha ji è akhin-arin yi rabo; ji phachiang shii, miyaogam shii nyie yao pha ji rek ne rai bo. <sup>23</sup> Na è miyaogam yoi srane jishii ji duiine blia arek arone bran hanyie è awai mizia shii jangbang hà riig ai ne ji è mia rone riig pha duiine ro. <sup>24</sup> Ai ne awaithek shii wie rone riig chiihphado dundun chiih-è awai ne nyie khi è mia pha jine blengdun. <sup>25</sup> Jishii bran shii ichad rek phi khriig Iphey ji shii wie è riig pho ne, chiih-è thaluu arek bie pha chiih-è chiihphado abia pha jishii blia rek ne rai pho ne—nathek è nyie rek pha ji re-è Hamangkhung-aphuii è nathek shii khirzey phi phro.

<sup>26</sup> Hanyie magunde nathek ne giang rone now bey? Nathek yi nawaithek ro ri shii azud arone, nathek ro giang ne adunmey chiih-è nawai shii khinrin ara ro. <sup>27</sup> Aphuii Hamangkhung-aphuii è igang nane zai giang rone now pha jine hi ro: Dusho nane misiungthekek ro diig shii wie gayiig ne chiih-è nawaithek shii sohjambling shii è buii pha ji è ruang rek bo.

## 2

### *Haro shii phriie*

<sup>1</sup> Gu khuiinothek nane bumuiithek, Gathek ro biisiie pha Ithong Isu Masi pha migiphothek duiine, nathek ne branthekek shii ithek ro fuang è doh yi pha ji duiine khuchung de haro-ahand rabo. <sup>2</sup> Yangne nathek ro male shii

bukho bran yi san pha mihen hen ne chiih-è wie yung guii ne wuii ruii pha de um phro, chiih-è dusho yi ihèg yungthek guii ne wuii ruii pha de um ruii phro. <sup>3</sup> Nathek è yung wie guii ne wuii ruii pha ji shii muna ilab rek ne aishii yao, “ichiih wie ithua shii dug bo,” jishii dusho bran shii yao, “Diichiih shii riu bo, dinne ichiih nyiak gu lai moe shii dug bo,” <sup>4</sup> Chiihphado nathek ne nawaithek duchoi shii yoh yoh rek ne awie pha munow jihà ichiig rek ara ro <sup>5</sup> Yoi bo, gu khuino nane bumuiithek! Hamangkhung-aphuii è ichiih soh shii dusho shii gua ne migi shii bukho rey yi chiih-è ai è hanyie shii miie pho shii sbang rek pha sajathua shii mua yi ro. <sup>6</sup> Jishii nathek è dusho shii ilab arek! hanyie è nathek shii diig phi ne chuathék moe shii ri ne noh pha bukho hithek asi bey! <sup>7</sup> Nathek shii nyie wie ibeng phi pha ji shii awie pha yao pha jine ithek ro. <sup>8</sup> Nathek è sajathua pha Iphey ji nuui arone nathek ne izai blia rek chak ro, nyie yie jigigam shii yao pha duiine, “nawai shii miie pha duiine hadung-haluii pho shii miie bo.” <sup>9</sup> Nathek yi brantheek shii ithek ro fuang è dong pha ji shii duiine rek arone, nathek ne layog pha ichiig rek ro, chiih-è Iphey shii makhak-riing rek chiih-è nathek ne Iphey chui pho duiine Iphey è the ro. <sup>10</sup> Hanyie magunde Muyung jia shii chui arone Iphey zab shii chui pha ichiig rey dun ro. <sup>11</sup> Chiih-è hanyie jia è siulao arek rabo ne yao pha ji è de sgoh arek rabo ne yao ro. Nathek è siulao arek magunde nathek è sgoh rek arone nathek ne Iphey chui pho rey dun ro. <sup>12</sup> Hanyie shii Ichad rek phi pha Iphey è chua ruii pha brantheek duiine nathek ne yao ne blia rek bo. <sup>13</sup> Hamangkhung-aphuii ne hanyie è bushun arek pho shii chua mage shii ai ne bushun arek phi phro; jishii chua pha ji shii ne bushun yang dun phro.

### *Migi nane blia*

<sup>14</sup> Gu iijiaakthek, nathek è nawaithek shii migi um rone yao jishii nathek è blia arek arone nathek ne nyie wie lei? Nathek shii ji pha migi è ragia nyarek nebey? <sup>15</sup> Yangne khuinothek nane bumuiithek hanyie yungthek chid pha um chiih-è chie pha acho phade um. <sup>16</sup> Nathek è ithek shii yao, “Hamangkhung-aphuii nathek shii khirzey phi bo! Lua rai ne wie chie bone yao!”—ithek chai shii nyie chid pha um pha ji shii nathek è aphi arone nyie phua phlei? <sup>17</sup> Ji-è hìne migi rog shii ro: Blia arek pha migi rek bie arone, jine iy-iy ro.

<sup>18</sup> Jimagunde giak è yao, “Bran jia shii migi um, gai shii blia um.” Gu è chang pha ji ne, “Hanyie yi blia arek pha migi um rone gu shii riig yi mage bo. Gu ne nathek shii gu blia ji è migi um rone riig yi pha ro.” <sup>19</sup> Hamangkhung-aphuii ne jia bie rone nathek migi rek nebey? Wie! Ibuiithek de migi rek ne rum ne sham ro. <sup>20</sup> Nathek bi-ie! Nathek ne blia arek pha migi rek pha ji adunmey rone doh yi pha yang bey? <sup>21</sup> Nyie khi-èrek ne gethek ro blang Abraham ne Hamangkhung-aphuii rog shii giang rai? Hì ne ai blia è rey phro, nyieliieshii ai è awairo dufuii Isakh shii sraibao shii phi muui. <sup>22</sup> Nathek adoh ba bey? Airo migi nane blia ne ò jia shii blia rek phro; ai ro bliathek è migi shii khriig rek phi. <sup>23</sup> Ji è yao pha ji è jigigam ne izai rey, “Abraham è Hamangkhung-aphuii shii migi rek, chiih-è nyieliieshii airo migi shii Hamangkhung-aphuii è giang rone nuui.” Ji-è Abraham shii ne Hamangkhung-aphuii ro iijiaak rone ho. <sup>24</sup> Chiihphado, nathek ne idjong,

hìne airo blià ji è ai ne Hamangkhang-aphuui rog shii giang rai, chiih-è airo migi jijia ji è arey phro.

<sup>25</sup> Hì ne siulao rek pha Rahab ro. Ai de ai blià ji è Hamangkhang-aphuui rog shii giang rey, nyeliieshii ai è Israelphothek bujuw pho shii wieho ne ithek shii gai lumuui è yo yi pha nong phi <sup>26</sup> Ji-è ragung oi pha siu ne iy-iy ro, ji duiine blià arek pha migi ne iy-iy ro.

### 3

#### *Ri*

<sup>1</sup> Gu iijiiakthek, nathek bajo ne masdo rey pha arek chid rabo. Nathek ne thieg, gethek masdothek shii ne ithek gai è de buii chua baruui phro. <sup>2</sup> Gethek zab ne blebbleb asi pha rek ro. Jimagunde bran hanyie è nyie yao pha ji shii ichiig arey arone, ai ne khriig ro chiih-è awai ro zab chai shii phrai mua ro. <sup>3</sup> Gethek shii nuui yi pha gethek è sthuii shii iphab joi pha duiine, gethek è khi hà wuii yi pha yang pha ji nyawuii mua yi phro. <sup>4</sup> Chiih-è run shii now bo: Run bo magunde hasam gang è khiyid dun magunde, bey ididuii è mieng rek ne, khiyidpho è khi hà noh yang pha jihà noh dun. <sup>5</sup> Ji-è ri de: ididuii bie, ai ne bajoboh manathek chiang nyigodog nyarek mua.

Now mage bo khama bow pha jabiing shii ijiriak è hùb dun! <sup>6</sup> Chiih-è ri de bai duiine ro. Hì ne ley ichiig gethek ro zab siu hà gang chiih-è gethek ro zab chai re-è zab awie pha shiie yi ro. Hì ne thumluii è thog ruii pha bai duiine gethek sieng pha chai shii ziao muui ro. <sup>7</sup> Bran gethek ne ram mua chiih-è zab ichua ibeymuthung, fuui, pham nane ù shii ram mua ro. <sup>8</sup> Jishii hanyie ji è thuthog pha ri shii agak mua ro, hìne awie pha nane aphrai pha ro, ley iy-iy pha miiriin ro. <sup>9</sup> Ji-è Gethek ne Ithong Aphuui shii laso phi pha bohkhoh haro chiih-è hanyie Hamangkhang-aphuui duiine rab pha, gai bran shii de thamai. <sup>10</sup> Laso phi pha nane thamai pha miyaogam ne ò sem è khia. Gu iijiiakthek, ji duiine arey rabo! <sup>11</sup> Chiih-è gasuang jia è ne rem kho nane ikhow kho ne ò akhia phro. <sup>12</sup> Gu iijiiakthek, Iphem hingmuui, è ne sumaro awoi phro; chiih-è angurmuui è ne iphem woi awoi phro, chiih-è khochow è khophieng akhia mua phro.

#### *Lakhung pha khani re-è*

<sup>13</sup> Nathek hanyie khani um pha nane id pha bran um bey? Nathek ro wie chai ji re-è chiih-è nawaithek ro jum nane khani rog shii nathek wie blià rek ne nawaithek khagi rek bo. <sup>14</sup> Jishii nathek lubu nathek è miegriie rek, khow, chiih-è iwed rek arone nathek ro khani nyigodog ji è izai shii suang arek rabo. <sup>15</sup> Hì è rek pha khani Hamangkhang è thazam awuii ro; hìne sohjambling ro, hìne ragung asi pha nane ibuii ro. <sup>16</sup> Khi hà miegriie nane iwed um, jihà ne liangliang nane zab awie pha ichua um ro. <sup>17</sup> Jishii lakhung è thog pha khani ne zab è igobi igang ro liijiing, mieng, wiedung ro; hìne bushun ley ro chiih-è wie blià rek pha yamiing wie woi yi; hìne haro nane lawasdai ne oi ro. <sup>18</sup> Chiih-è liijiing rabpho ji è liijiing shii hai pha yamiing jine bajo wie è doh yi ro.

### 4

#### *Sohjambling rog shii iijiiak*

<sup>1</sup> Nathek duchoi shii mak nane guithek ne khi-è thog phlei? Nyie nathek iliing shii sangmie chid pha ji è athog bey? <sup>2</sup> Nathek ne manathek ne chid, jishii nathek shii ne jithek oi, ji-è nathek ne ua pha saro; nathek manathek shii ne bajo chid, jishii nathek jithek amua, ji-è nathek gui ne mak rek ro. Nathek nyie chiid pha jine nathek shii oi, nyieliieshii nathek Hamangkhung-aphuii shii alia. <sup>3</sup> Chihih-è nathek lia mage shii, nathek ne amua, nyieliieshii nathek ro now pha jine awie; nathek è lia pha mana ne nawaithek è sang pha ji bohkhoh pha lia. <sup>4</sup> Migi oi pha bran! Nathek ne ji athieg bey sohjambling shii iijiak rek pha jine Hamangkhung-aphuii shii suang rek ro? Nathek sohjambling shii iijiak rek yang pha now arone, nathek ne nawaithek shii Hamangkhung-aphuii ro suang rab phro. <sup>5</sup> Jigigam shii yao pha ji izai asi rone nathek ne anow rabo, “Hamangkhung-aphuii è gethek shii ragung phi pha ji bajo chid pha ji shii zan phi ro.”\* <sup>6</sup> Jishii Hamangkhung-aphuii è phi pha bushun din nede bajo gang ro. Jigigam shii de yao, “wiangwe pho shii ne Hamangkhung-aphuii è suang rek ruii, jishii jum shii ne bushun phi ro.”

<sup>7</sup> Ji-è chiiphado, nawai shii Hamangkhung-aphuii shii phi muui bo. Ibuti shii gak bo, chihih-è ai ne nathek è ruang randun phro. <sup>8</sup> Hamangkhung-aphuii moe shii wuii bo, chihih-è ai de nathek moe shii wuii ruii phro. Layogpho nathek, nawaithek wadthek sud bo! Lawasdai nathek, nawaithek lubutheg shii gang rab bo! <sup>9</sup> Duhug rek bo, ziaak bo, chihih-è choh bo; nathek è siak pha jine choh bsa hà lai bo, nathek ro lubo jine duhug rek bo! <sup>10</sup> Ithong moe shii nawaithek ne jum rek bo, chihih-è ai nathek shii lakhung hà chiing ruii phro.

### *Nawaithek chung chua pha ji phrie*

<sup>11</sup> Gu iijiakthek, gai shii makhak-ariing rabo. Nathek è gai Masipho shii suanghàw ne chua arone, nathek ne Iphey shii suanghàw ne chua phro. Nathek è Iphey shii chua arone, nathek ne Iphey shii anuii pha, Iphey shii chuapho ro. <sup>12</sup> Iphey phi pha nane chua pha ne Hamangkhung-aphuii bie ro. Ai ne ragia rek mua chihih-è srobro rek mua ro. Nawaithek shii hanyie rone now gai shii chua phlei?

### *Nyigodog shii gidieg phrie*

<sup>13</sup> Nathek ji è yao, “sudoh thimiang gethek ne gai thiig hà wuii ne, gethek idam rai srane bang bajo wiang pha chong rek pha wuii phro ne yao pha nathek zab thuh gu shii nuii bo.” <sup>14</sup> Thimiang shii nathek ro chai nyie rey ramuii pha ji de athieg ro! Nathek ne mukham pha bamun duiine ro, lujia khia srane chiiphado san din dun. <sup>15</sup> Hi ne nathek è yao chid: “Ithong è yang arone, gethek ne rai ne jithek rek.” <sup>16</sup> Jishii thuh nathek ne nyigodog rek, chihih-è nathek nyigodog rek; hithek zab nyigodog ne ichiig ro.

<sup>17</sup> Ji-è chiiphado, gethek ne wie rek chid phro ne thiig srane gethek arek arone, gethek ne layog shii ichiig rey dun.

## 5

### *Bukho shii phrie*

<sup>1</sup> Chihih-è thuh shii, bukho bran nathek, gu shii yoi bo! nathek shii thog ramuii pha diig jishii choh ne duhug rek bo! <sup>2</sup> Nathek ro bukho ne shongdun

\* **4:5** 4:5: ragung chid; dinne Hamangkhung-aphuii ne gethek shii ragung ithua hà rai ye pha chid ro. **4:6** 4:6: Khua 3:34 (LXX) **4:13** 4:13,14: Khua 27:1 **5:2** 5:2,3: Mth 6:19



ro, chiih-è nathek ro yung ne bisiathek chiedun ro. <sup>3</sup> Nathek ro san liiman shii ne dakhyem chiedun ro, chiih-è dakhyem è nathek suang pha khagi yao ruii phro, chiih-è bai duine nathek ro ibey chie ruii phro. Nathek è iidoh pha inai shii bukho khrab ro. <sup>4</sup> Nathek ne nathek ro raig rek phi pho shii riinang apho ro. Ithek ro suanghàw yoi bo! Nathek ro misieng khrab pho mucho nè bajo Bohblu Ithong, Hamangkhung-aphuii khothek moe shii thogdun ro. <sup>5</sup> Nathek chai ne ichiih sohnyiak shii ne nyie de diig areydang pha sangmiie ne ley um ro. Nathek ne nawaithek shii ua shapha inai shii ibiingboh rab ne ruii. <sup>6</sup> Nathek è ichiig oi pha bran shii the srane ua muui, chiih-è ithek è nathek shii gidieg arek ro.\*

### *Jum nane misia*

<sup>7</sup> Chiihphado, gu ijjiakthek, Ithong athog sapho shii, ne lubuphiang rek bo. Riig bo Nyie khi-èrek ne soh shii igong pha iwoithek rey yi awaithek è khan pha raigphothek duine lubuphiang rek bo. Ithek ne irab shan pha haphieshak nane irab nyiu pha habie thog dang pha lubu phiang è khan ne rai ro. <sup>8</sup> Nathek de lubu phiang rek bo. Nathek ro luthong lakhung rek bo, Ithong wuii sharuii pha inai ne nui ro.

<sup>9</sup> Gu ijjiakthek, gai ro suanghàw ne gachi ayao rabo, ji-è Hamangkhung-aphuii è de nathek shii achua phro. Chua pha jine nui ro, chiih-è dong sharuii ro. <sup>10</sup> Gu ijjiakthek, Ithong beng è yao pha chaigpho shii now mage bo. Ithek ro lubu phiang nane diig shii zud pha miiriig ji duine ithek è yie mage bo. <sup>11</sup> Gathek è ithek shii sang rone ho nyieliishii ithek è zud. Nathek ne Job è lubu phiang pha jine yoi, chiih-è iidohè shii Ithong è aishii phi pha jine nathek ne thieg. Chiih-è Ithong ne ley bushun nane wie ro.

<sup>12</sup> Gu ijjiakthek, zab è boh, nathek sbang rek shii surua athak rabo. Chiih-è Hamangkhung, chiih-è sohnyiak, chiih-è nyie shii magunde surua athak rabo. “Oh” rone yao bo, na è oh rone yao arone oh yao bo, chiih-è asi rone yao arone asi rone yao bo, Chiihphado nane Hamangkhung-aphuii ro è chua iliing hà athog phro. <sup>13</sup> Nathek duchoi shii hanyie magunde diig um bey? Ithek ne misia mage bo. Chiih-è nathek duchoi shii hanyie magunde sang um bey? Ithek ne chiong ne bai bo. <sup>14</sup> Nathek duchoi shii hanyie magunde rad muui bey? Ithek shii ne Charch pha dukhothek shii ho bo, ji-arone ithek ne Ithong beng è sumaro thiillie shund ne misiasia ruii phro. <sup>15</sup> Ji pha migi misia è bran miiriie shii gang yi phro; Ithong è ai chua shii zan din phi phro, chiih-è ithek è rek pha layog de khung dun phro. <sup>16</sup> Ji-è chiihphado, nawaithek chung layog nuii rai ne chiih-è nawaithek chung sia rai bo, ji-arone nathek gang rey ruii phro. Wie bran ro misia ne blu è chun ruii phro. <sup>17</sup> Elija de gethek duine bran ro. Ai è wiangdang ne misia mage shii haphie aphie pha rey dun, chiih-è soh lakhung shii de idam uom è khuyo haphie aphie ro. <sup>18</sup> Ai è misia din mage shii, hamang è haphie phie ne sohnyiak shii misieng rey din.

<sup>19</sup> Gu ijjiakthek, Nathek hanyie magunde izai è ruang rey dun arone hanyie jia magunde aishii iidoh noh din bo, <sup>20</sup> ji nowbo: hanyie magunde layogphothek shii awie pha lumuii è iidoh noh din arone ai ne ji pha

**5:4** 5:4: Iphy 24:14,15      \* **5:6** 5:6: Bran, chiih-è ithek ne nathek shii akhia hì phro; dinne bran. Hamangkhung-aphuii de nathek shii akhia habey?      **5:11** 5:11: Job 1:21,22; 2:10; Chng 103:8      **5:12** 5:12: Mth 5:34-37      **5:14** 5:14: Mrg 6:13      **5:17** 5:17: 1Saj 17:1; 18:1      **5:18** 5:18: 1Saj 18:42-45  
**5:20** 5:20: 1Phth 4:8

layogpho ro luruak<sup>†</sup> iy pha ji è ragia rek phi chiih-è bajo layog Chiang shii de khung yi phro.

---

<sup>†</sup> **5:20** 5:20: ji pha layogthek luruak; dinneawai nujo ro luruak.

## PHITHAR Ro Igobi Pha Jigam Yaophi

Phithar ro igobi pha jigi è Masiphothek shii zey phi pha hanyie yi Asia hakhoi hanyie yi dayiingdayang rey pha, “Hamangkhung-aphuii è gua pha bran shii ho phro.” Hi pha jigi pha miyaosiu è ne thampho shii lububo rek phi ro. Nyieliieshii ithek ne diigkhui shii diig ne ithek ro migi shii diig rek ro. Zeypho è thamphothek shii Mua Wie Isu Masi chiang hanyie yi iy ne hòi ne wuii ruii phro ne ithek shii luthong pha sbang phi pha ji nowkhlei yi pha rek. Hithek chiang è migipho ne diig shii choi rone zud chid, chiih-è hìne now chid jine awaithek ro migi khama zai chuh lei ne chai riig pha ji ro, chiih-è “Isu Masi khia ruii pha Inai shii” ithek ne lasen mua ruii phro ne now chid.

Diig pha ishak shii airo lububo rek phi pha ji ne, zeypho è de awairo thampho shii hanyie yi Masi ro brantheek duui ne sieng bone khung phro.

### **Iiing shii um pha ji**

Yaophi (1:1-2)

Hamangkhung aphuii ro giawo shii nowkhlei yi (1:3-12)

So sieng pha ji yua (1:13—2:10)

Diig pha ishak shii Masipho ro gaja (2:11—4:19)

Masipho jum nane blia (5:1-11)

Jongsha (5:12-14)

<sup>1</sup> Isu Masi ro guaphasamoy Phithar re-è—Hamangkhung-aphuii è gua ne ruii pha bran hanyie yi dayiingdayang rek ne gai brantheek duine Phonthus, Galathia, Khaphadosia, Asia, chiih-è Bithynia rai pha zab shii.

<sup>2</sup> Hamangkhung-aphuii pha Aphuii chiang è nathek shii ne gua ro. Ragung re-è nathek shii ne so brantheek rab ro, nathek ne Isu Masi shii nuui chid, chiih-è airo ifai è nathek shii sud phi ro.

Bushun nane liijiiing nathek shii ley um bo.

### *Isieng luthong*

<sup>3</sup> Cho Hamangkhung-aphuii nane gethek ro Ithong Isu Masi ro Aphuii shii laso phi bo. Nyieliieshii Isu Masi Iy ne hòi pha ji è airo boh bushun è gethek shii chai iwo rab phi phro. Ji re-è gethek ro isieng luthong pha ji ley rek phi,

<sup>4</sup> chiih-è gethek ne ibi riig srane Hamangkhung-aphuii è awai bran shii ruii phi pha bukho khirzey shii mua pha rek bo. Ai è ji pha khirzey ne nathek chiang shii hamangkhung hà ruii, jihà ne ashong, amua chiih-è asand pha jihà ruii phi. <sup>5</sup> Jithek ne nathek ro ro, nawaithek migi re è Hamangkhung-aphuii ro blu re-è iidohè hà khia pha giawo shii deb rek ne ruii pha ji shii

nathek shii ragia rek ruii phi ro. <sup>6</sup> Hi pha chiang shii sang mage bo, nathek shii thuh lujia ishak duhug rek pha miigak ro, nyieliieshii bajo ichuathek chuajan pha ji nathek è diig rek ro. <sup>7</sup> Ithek è rek noh jine nathek ro migi ne jichak rone khagi rek phi pha. Nyie nyamua mua pha san shii rangde bai shii chai; chiih-è nathek ro migi ne san è de igong bajo muna ro nyie

shii ne chai chid phro, ji-è hìne zud mua, chiihphado nathek ne Isu Masi khia pha inai shii chiong nane biisiie chiih-è ilab mua ruii phro. <sup>8</sup> Nathek ne aishii adoh, jimagunde nathek ne aishii miie, nathek ne thuh adoh ba jimagunde nathek aishii migi rek. Ji-è nathek ne nyie miyaogamthek è ayao

mua pha boh biisiie thek pha lubo shii nathek sang ro, <sup>9</sup> Nyieliieshii nathek

ro nyie migi aishii um pha Chiang è nawaithek ro luruaktek pha giawo mua ro, <sup>10</sup> Hi pha giawo Chiang shii chaigtek bajo gayiig ne sow ne id, nyie Hamangkhang-aphuii è nathek shii phi pha lasen Chiang shii ithek è chaig marui. <sup>11</sup> Itek ne ji pha ishak ne khuchung chiih-è khi-èrek ne thog ruii pha bidiang ne sow marui.\* Hi pha ishak ne Masi ro Ragung ithek shii um pha ji è hìog ro, Masi ne biisiie shii luagieng pha Chiang diig shii zud phro ne yao. <sup>12</sup> Hamangkhang-aphuii è ji pha chaigtek shii khia ne ithek blia ne awaithek shii phua pha arek ro, hamang è thoh pha Ragung So pha blu è Hamangkhang-aphuii ro Mua Wie ne muapho è yao pha jine thuh nathek è yoi pha Chiang, ithek è yao marui pha manathek ne nathek ro ro. Hithek pha manathek shii ne hamangkhlithek rangde gao pha yang.

### *So sieng pha ho*

<sup>13</sup> Ji-è chiihphado, nathek khani ne blia rek pha saro bo. Isu Masi khia mage shii nathek shii phiramuii pha khirzey shii nowbthan ne nawaithek ro luthong shii zab khriig rek ne ruii bo. <sup>14</sup> Hamangkhang-aphuii shii nuii bo, chiih-è nathek sieng pha jine nathek è athieg ba shii chidtek shii um pha jihà arab yi rabo. <sup>15</sup> Ji ph Chiang shii, nathek shii ho pha Hamangkhang-aphuii ne so duiine, nathek è nyie rek pha jine so rek bo. <sup>16</sup> Jigigam shii yao, “So rek bo nyieliieshii gune so ro.”

<sup>17</sup> Nathek è Hamangkhang-aphuii shii sia mage shii, Nathek ne aishii Aphuii rone ho, hanyie è zab pha bran shii ne zab è nyie rek pha ji shii ò è chua; ji-è chiihphado, nathek ichiih sohnyiak shii sieng pha jine aishii ilab rek bo. <sup>18</sup> Nathek ro blangtek è nathek shii adunmey pha lumuii chai hà phi muui pha ji è ichad rek phijong rone nathek ne thieg; hìne muadun pha liiman nane san è asi ro. <sup>19</sup> Hi ne igong khlem hanyie ne shiishaiduii duiine ichiig oi pha Masi ji ro. <sup>20</sup> Aishii ne Hamangkhang-aphuii è sohjambling azen ba pha ibi gua chiih-è iidohè pha inai shii nathek Chiang shii khia phi ro. <sup>21</sup> Ai Chiang è nathek hamangkhang-aphuii shii migi rek, hanyie aishii iy pha ji è hòi yi ne aishii biisiie phi; chiih-è ji-è nathek ro migi nane luthong ne Hamangkhang-aphuii shii um ro.

<sup>22</sup> Thuh shii nathek ro nuii pha zai è nathek ne nawaithek shii igang rek ne chiih-è gai migiphothek shii isiie è miie bo. Nawaithek lubu rog shii wiang ne nawaithek chung miie rai bo.† <sup>23</sup> Hamangkhang-aphuii ro isiang nane idang pha miyaogam è nathek shii ne hanyie è iy pha ji è asi pha a-iy pha aphuii-amuii ani duiine chiih-è giak din phi phro. <sup>24</sup> Jigigam shii yao, “Zab pha bran ne saing duiine ro,

chiih-è zab ithek ro biisiie ne jabiing pha iibuathek duiine ro.

Saing ne gohdun, chiih-è iibuathek ne chiihdun,

<sup>25</sup> Jishii Ithong miyaogam ne idang raidun.”

Hi pha miyao ne nathek shii yaojong pha Mua Wie ji ro.

## 2

### *Isieng lubao nane so brantek*

<sup>1</sup> Chiihphado, zab pha awie shii nawaithek ruang rek bo; biidiie chiih-è lawasdai chiih-è miegriie chiih-è magak-riing pha nyuak ne oi chid rabo.

\* **1:11** 1:11: ishak thog magey shii chiih-è jine khi-è rek ne thog ruii; din bran hanyiega chiih-è ai wuii ruii shii. **1:16** 1:16: Lew 11:44,45; 19:2 † **1:22** 1:22: zab nathek ro lubu re-è; giak jigi zey shii um lubu sang rog. **1:24** 1:24,25: Aij 40:6-8 (LXX)

<sup>2</sup> Wo giak pha aniphiingthek duiine idang igang pha ragung niu shii gahanghang bo, ji-è nathek ji niing arone giawo shii sieng mua ruii phro. <sup>3</sup> Jigi shii yao, “Ithong ne khama bushun nawaithek ne dohjong ro.”

<sup>4</sup> Ithong shii wuii bo, isieng lubao shii branthek è adunmey rone snai pha jine Hamangkhung-aphuii è igong rone yao ne gua jong ro. <sup>5</sup> Isieng lubaothek duiine wuii ruii bo, chiih-è nawaithek shii ne luruak pha Jewthek misiahò rung pha kho yi bo, khihà so phabithek è duiine nathek ne blia rek srane Isu Masi Chiang è Hamangkhung-aphuii yie spho khlem rek bo. <sup>6</sup> Jigigam shii yao,

“Gu è igong lubao shii gua,  
nyie yi gune Zion shii iiriing lubao ruii muii pha duiine ro;  
chiih-è hanyie è aishii migi rek khuchungde awo phro.”

<sup>7</sup> Nathek è migi rekpho shii ne hìpha lubao ne bajoboh igong rey ro; jimagunde hanyie è migi arek pho shii ne:  
“Khi pha lubao shii rungpho è adunmey rone snai muii pha ji ne zab è bajo miigak rey din ro.”

<sup>8</sup> Chiih-è gai jigigam shii yao,  
“Hì pha lubao ne bran shii kham yi,  
chiih-è lubaoboh shii ne ithek shii chiih yi pha ro.”

Ithek ne kham dun nyieliieshii ithek ne miyaogam shii migi arek ro; hìne zai Hamangkhung-aphuii è ithek ro yang pha ji ro.

<sup>9</sup> Jishii nathek shii ne gua pha iiriing ro, Saja pha phabithek, so branthek, Hamangkhung-aphuii awairo bran, hanyie è nathek shii igiia è awairo anomuluii pha muchuang hà noh phi, chiih-è Hamangkhung-aphuii ro anomuluii blia ji yao yi pha guajong ro. <sup>10</sup> Luang jia pha ishak shii nathek ne Hamangkhung-aphuii ro bran asi, jishii thuh shii nathek ne airo bran ro; luang jia shii ne nathek ne Hamangkhung-aphuii ro bushun athieg, jishii thuh nathek ne airo bushun shii muage ro.

### *Hamangkhung-aphuii ro khiaothek*

<sup>11</sup> Gu iijiiakthek wo, ichiih sohkhung pha athieg pha bran nane fuang pha bran duiine! Gu nathek shii khung. Nyie yi idang luruak shii suang rek pha siu è yang pha ji shii aphi rabo. <sup>12</sup> Ithek è nathek shii awie rone nin ruii shii nathek ro ziiig ne migi arekpho duchoi shii bajo wie rek bo, ithek ne nathek ro wie blia ji shii thieg ruii chiih-è ai wuii ruii pha inai shii Hamangkhung-aphuii shii chiong ruii phro.

<sup>13</sup> Ithong Chiang shii nawaithek shii zab pha tharothamang riichai shii phi muii bo: Hanyie yi bajoboh riichai um pha Bisiu, <sup>14</sup> chiih-è hanyie shii awie pha rekpho shii lago phi chiih-è hanyie è wie rek ji shii chiong ruii pha aishii ne bow ne ruiijong pha badri de phi muii bo. <sup>15</sup> Chiih-è Hamangkhung-aphuii è nathek shii ne nathek è wie rek pha ji è bi-èphiiing ro thaluii pha miyao shii aro yi pha rek yang ro. <sup>16</sup> Ichad bran duiine rai bo, nathek ro ichad shii nyie awie pha ji shii cheg yi pha akho rabo, jishii Hamangkhung-aphuii ro khiaothek duiine rai bo. <sup>17</sup> Zab shii ilab rek bo, gai migiphothek shii miie bo, Hamangkhung-aphuii shii rum bo, chiih-è Bisiu shii ilab rek bo.

### *Masi ro diig pha miirig ji*

<sup>18</sup> Khiaothek nawaithek ne nawaithek musphothek shii phi chid srane zab ilab rek rone doh yi bo, hanyie yi jum nane wie shii asi bie pha, jishii hanyie yi sua ji shii ilab rek bo. <sup>19</sup> Hamangkhang-aphuii è nathek shii hìne khirzey phi ruii phro, ichiig oi pha diigcheo ne riie pha ji shii zud arone, nyieliieshii nathek ne ai è yang pha ji shii nuui phi ro. <sup>20</sup> Na è asi pha blia rek shii zuangthek shii zud arone wie ibeng nyie mua mage phlei? Jishii na è rangsua rek mage shii rangde zud arone, ji shii ne Hamangkhang-aphuii è khirzey phi ruii phro. <sup>21</sup> Hi ne ji ro Hamangkhang-aphuii è nathek shii hojong ro, Masi awai de nathek chiang shii diig rek ne chiih-è nathek shii miiriig pha thoh marui, ji-è nathek ne ai è lua pha ji luagieng mua ro. <sup>22</sup> Ai ne layog arek, chiih-è hanyie è ai semthek è biidiie yao pha ayoi ro. <sup>23</sup> Aishii magak-riing mage shii, ai è magak-riing rog shii achang; ai diig mage shii, ai è akhui ro, jishii airo luthongthek ne giang Chua pha Hamangkhang-aphuii shii ruii. <sup>24</sup> \* Masi awai è gethek ro layog ne awai siu shii bai hà han, ji-è gethek layog shii iy ne giang shii sieng mua. Hi ne airo saduii è gethek ne gang ge ro. <sup>25</sup> Nathek ne awaithek lumuii è san dun pha shiishai duiine ro, jishii thuh shii nathek ro Brogpho nane luruakthek shii Gayiig pha ji shii lua yi pha iidoh noh ro.

### 3

#### *Yiythek nane geythek*

<sup>1</sup> Ji duiine nathek yiythek ne nawaithek ro geythek shii phi muui bo, ji-è ithek è hanyie yi Hamangkhang-aphuii miyaogam shii migi arek arone, nathek ro ziiig è ithek shii yang ne migi rek yi phro. Nathek ne miyaogam yao chid pha miigak asi ro, <sup>2</sup> nyieliieshii ithek ne naro ziiig ji khama igang nane ziiig shii nuui chid phro ne riig ruii phro. <sup>3</sup> Nathek ne nawaithek shii khie rab pha nathek ro khaziang shii rab pha ji shii, chiih-è nathek yua shii khow pha mukho shii, chiih-è nathek guii pha yung shii fuang è chia pha nong ayie rabo. <sup>4</sup> Ji phachiang shii, nathek ro khie jine nawaithek ro iliing pha izai shii rey ne rai bo, jum pha idang pha khie nane liijiing ragung, nyie yi Hamangkhang-aphuii mieg moe shii ne zab è ibid um ro. <sup>5</sup> Buyo pha giang hò-amuiithek hanyie yi Hamangkhang-aphuii luthong ruii pho ne awaithek yi geythek shii phi pha ji è awaithek shii khie rab. <sup>6</sup> Sarah ne ji duiine ro; ai ne Abraham shii nuui srane aishii awai ithong rone ho. Nathek ne wie rek ne nyie shii arum arone nathek ne airo dimithek ro.

<sup>7</sup> Ji duiine geythek nawaithek wie gao pha rog shii yiythek rog shii rai bo, ji-è ithek ne nathek è muna zia phro. Ithek shii ilab è yua bo, nyieliieshii Hamangkhang-aphuii ro chai pha lasen jine ithek de nathek rog shii mua ruii phro. Ji rek bo ji-è nathek ro misiathek rog shii hanyie è afa-afi arek gieng phro.

#### *Rangsua rek pha chiang shii diig*

<sup>8</sup> Jong sha: Nathek zab shii ò ziiig nane ò thanthek ji um bo; nawaithek gai chung miie rai bo, chiih-è nawaithek gai chung bushun nane jum rek rai bo. <sup>9</sup> Awie pha ji shii awie pha iidoh aphì rabo, chiih-è thamai pha ji shii iidoh athamai rabo; ji pha chiang shii khirzey phi bo, nyieliieshii ai è nathek shii

ho mage shii Hamangkhung-aphuii è khirzey phi pha rone sbang rek pha jine hì ro. <sup>10</sup> Jigigam shii yao,

“nathek ne chai shii lubo rek yang arone  
chiuh-è wie ishaktek riig yang arone,  
nathek ne awie pha ji ayao pha  
chiuh-è biidiie yao pha ji shii gak bo.

<sup>11</sup> Nathek ne awie pha ji è khid srane wie rek bo;

nathek ne lijiing pha Chiang shii nawaithek ro zab lubu è bidiang bo.

<sup>12</sup> Chiuh-è Ithong è giangthek shii wie è riig

chiuh-è ithek ro misiathek shii yoi phi;

Jishii ai ne hanyie è awie pha rekpho shii ne suang rek.”

<sup>13</sup> Nathek è nyie wie ji shii bajo rek yang arone hanyie è nathek shii mua mage phlei? <sup>14</sup> Nathek ne nyie rangsua rek shii rangde nathek è diig rey arone, nathek ne khama sang ro! hanyie shii arum rabo chiuh-è sam-adiig chid rabo. <sup>15</sup> Jishii nathek ro lubuthek ne Masi Chiang shii boh ilab um bo,

chiuh-è aishii ne Ithong rone ilab rek bo. Nathek shii um pha luthong ji pha Chiang shii yao bo è hanyie è lia ruii shii chang pha zab ishak ne khriig rek bo, <sup>16</sup> jishii jum nane ilab rog shii rek bo. Nawaithek ro lubunow shii sang rek bo, ji-è nathek shii makhak-riing mage shii, Masi ro luagiengphothek rone nathek ro wie ziig shii hanyie è awie rone yao mage shii ithek è nyie yao pha ji shii biwo rey ruii phro. <sup>17</sup> Hì ne Hamangkhung-aphuii è yang arone, awie pha rek pha ji diig shii ne wie rek pha ji shii diig pha ji wie ba ro.

<sup>18</sup> Nathek shii Hamangkhung-aphuii hà noh pha bran wie ne layogphothek lakhung shii Masi ne luang jia shii idang pha layog Chiang shii iy dun.\* Ai ne siu shii ne iy dun, jimagunde ragung shii ne isiang rabjong ro, <sup>19</sup> chiuh-è airo ragung è rai srane ai wuii dun chiuh-è binmuii pha ragungthek shii yua.

<sup>20</sup> Jithek ne hanyie è Hamangkhung-aphuii shii anuii pho ro ragungthek ro chiuh-è Hamangkhung-aphuii ne ithek shii lubu phiang è khan pha ishak shii Noah ne awairo run rab ramuii ro. Run shii ne Iujia bran ro—zab ne mileo ro—ithek shii ne kho è ragia rey ge ro, <sup>21</sup> hanyie shii ne khowo pha cheb ji shii hiög ro, hanyie nathek shii thuh ragia rek phi. Hì ne siu pha izea sud pha ji asi ro, jishii wie lubunow ji è Hamangkhung-aphuii è sbang rabjong ro. Hì ne Isu Masi hòi pha ji è nathek shii ragia rek ge ro, <sup>22</sup> hanyie ne hamang hà dun ne Hamangkhung-aphuii ro phazoi shii um ne, zab pha hamangkhliethek shii nane hamang pha riichaithek chiuh-è bluthek shii bohkho muui ro.

## 4

### *Chai lai dun*

<sup>1</sup> Masi è siu shii diig dang shii, nathek ne nawaithek shii aishii um pha nowthek rog shii ò ji shii chuh rek bo; nyieliieshii hanyie magunde siu shii diig re pho ne layog rog shii oi sha phro. <sup>2</sup> Chiuhphado thuh è, nathek ro sohnyiak shii sieng pha gai jine tharothamang è chidthek shii asi pha Hamangkhung-aphuii è yang pha ji è phrai bo. <sup>3</sup> Nathek ne buyo migi arek pha branthek è rek pha duine cho pha ishak muajong ro. Nathek ne awie pha ziig, chid, biwo blia, chieniing, chiuh-è jangbangthek shii misiasia pha ji è ne khiijai shii sieng ro. <sup>4</sup> Chiuh-è thuh nathek ne ithek rog shii jabiing

nane thaluu sieng pha ji duiine adog mage shii migi arek pho ne wieng dun, chiih-è ji-è ithek ne nathek shii makhak-riing ro. <sup>5</sup> Jishii ithek ne awaithek ro sasab ne Hamangkhung-aphuii shii phi chid phro, hanyie ne iy pha nane isiang shii chua pha ideb ro. <sup>6</sup> Ji è iyjong pho shii de Mua Wie ji yuajong ro, zab shii chuajong pha duiine hanyie ithek yi siu shii sieng shii chuajong ro, ji-è ithek ro ragung chai shiine Hamangkhung-aphuii è rai pha duiine ithek sieng mua ro.

*Hamangkhung-aphuii ro lasenthek pha wie gayiigphothek*

<sup>7</sup> Zab pha manathek jong shapha ne nui ro. Sia mua pha nathek ne zud chiih-è riigbthan bo. <sup>8</sup> Zab pha lakhung shii, lubu phi ne nawaithek jia chung shii miie bo, nyieliieshii miie è bajo layogthek shii cheg phi ro. <sup>9</sup> Nyie de suanghàw arek pha nawaithek hò ne nawaithek chung hong phi bo. <sup>10</sup> Zab jia ne, Hamangkhung-aphuii ro yoyo lasenthek shii wie gayiig rai bo, ai ne Hamangkhung-aphuii è mua pha lasen wie jine gaithek shii wie rek pha kho bo. <sup>11</sup> Hanyie yuapho ne Hamangkhung-aphuii ro muathek yua chid phro; hanyie è blia rekpho ne Hamangkhung-aphuii è ithek shii nyie phi pha ji shii chua rog shii blia rek chid phro, ji-è zab pha manathek ne hanyie shii biisiie nane blu idang nane idang um pha Isu Masi Chiang è Hamangkhung-aphuii shii chiong mua phro. Amen.

*Migipho duiine diig*

<sup>12</sup> Gu iijiiakthek wo, nathek ne riie pha chai pha ji diig shii arey pha jine nathek shii rey rone awiengpphleg rabo. <sup>13</sup> Ji pha Chiang shii nathek ne Masi ro diigthek ji thang mua rone lised bo, ji-è airo biisiie khia mage shii nathek ley lubo um bo. <sup>14</sup> Nathek shii makhak-riing arone nathek ne sang bo, nyieliieshii nathek ne Masi ro luagiengpho ro, hìpha miyaosiu è ne biisiithek pha Ragung, Hamangkhung-aphuii ro Ragung ne nathek lakhung shii rai muui ro. <sup>15</sup> Na shii diig rey pha ji ne, hìne nyieliieshii sgopho rone chiih-è mugopho rone chiih-è suruii rone chiih-è gai bran shii blia shii diig rek rone arey yi rabo. <sup>16</sup> Jishii, na è diig rek nyieliieshii nathek Masipho ro, jine awo rabo, jishii na ne Hamangkhung-aphuii shii laso phi nyieliieshii na ne Masi ibeng yie phro.

<sup>17</sup> Chua pha jao pha ishak ne thog sharuii ro, chiih-è Hamangkhung-aphuii awairo bran ne igobi chua ruii phro. Hì ne gethek rog jao arone, Hamangkhung-aphuii ro Mua Wie shii migi arekpho rog ne khi-è rey ba pharai lei? <sup>18</sup> Jigigam shii yao,

“Hì ne wie bran shii ragia rek pha ne diig ro;

chiihphado, hamangkhung-aphuii oipho nane layogphothek shii nyie rey ruii phlei?”

<sup>19</sup> Ji-è chiihphado, hìne Hamangkhung-aphuii ro yang rone hanyie è diig rekpho ne, awaithek ro wie bliathek re-è awaithek ro rabpho shii hanyie è idang awairo sbang shii zab rek pha ji shii phi muui bo.

## 5

*Hamangkhung-aphuii ro ibrog*

<sup>1</sup> Hanyie, gune gui è kho, nathek duchoi è charch pha dukhothek rone khung phro. Gune Masi ro diig pha khagi ro, chiih-è gune khia ruii pha biisiie ji thang ruii phro. Gu nathek shii khung <sup>2</sup> Hamangkhung-aphuii è



nathek shii phi pha ibrog pha brogphothek rek ne, Hamangkhung-aphuii è nathek shii yang pha duiine nawaithek è yang ne ithek shii gayiig bo, chiih-è ayang pha arek rabo. Nawaithek ro blia rek bo, igong mua bie pha arek rabo, jishii nawaithek blia shii lubu è rek sbhang bo. <sup>3</sup> Nathek shii gayiig yi pha phi pha lakhung shii bohkhoh pha abidiang rabo, jishii ibrog pha mirriigthek rek bo. <sup>4</sup> Chiih-è boh Brogpho khia mage shii, nathek shii ne khuchungde asand pha ikhilieng biisiie rago ji mua ruii phro.

<sup>5</sup> Ji duiine filiao bran nathek de nawaithek shii dukhothek shii phi muii bo. Chiih-è zab nawaithek ne yung guii pha duiine jum guii bo, nawaithek jia chung shii blia rek rai bo; jigigam shii yao, “Hamangkhung-aphuii è wiangwe pha ji shii gidieg rek ro, jishii jum shii haro rek.” <sup>6</sup> Chiihphado, Hamangkhung-aphuii ro riichaiboh pha wad iliing shii, nawaithek shii jum rek bo, ji-è ai è nathek shii awairo wie ishak shii nathek shii lakhung chiing ruii phro. <sup>7</sup> Nathek ro zab pha samdiig ne ai rog shii ruii muii bo, nyieliieshii ai è nathek shii gayiig phro.

<sup>8</sup> Nowbthan bo, wie riig bo! Nathek ro suang, sakhathong, chiih-è hanyie shii magunde chie pha sow ne bargi duiine shand ne lua muii ro. <sup>9</sup> Nawaithek ro migi shii chuh rek ne aishii gak bo, nyieliieshii nathek ne thieg zab pha sohjambling pha gai migiphothek ne ji duiine ichua diigthek rek ro. <sup>10</sup> Jishii nathek è diig ne iujia pha ishak shii, Hamangkhung-aphuii ro zab bushun hanyie è nathek shii awairo idang pha biisiie Masi rog shii ò thang pha ho, awai è nathek shii khriig rek phi ne nathek shii chuh rek phi, gang rek phi, chiih-è asi dang pha rek yi pha rab phi ruii phro. <sup>11</sup> Aishii ne idang pha blu um bo! Amen.

### *Idohhè pha salamthek*

<sup>12</sup> Gu è hìpha jigigam dum nathek shii zey pha jine Silas è nongphi, hanyie shii gu è isiie Masipho duiine gu è ilab rek pha ji ro. Gune nathek shii lububo rek phi chiih-è hìne Hamangkhung-aphuii ro izai bushun rone khagi rek phi pha yang muii ro. Ji shii chuh è riu bo.

<sup>13</sup> Babylon\* hà um pha charch de, Hamangkhung-aphuii gua pha ji è, chiih-è gu dufuii Marg de, nathek shii salamthek thoh ge ro. <sup>14</sup> Nawaithek chung Masipho pha miie è khichiug rai bo. Hanyie yi Masi ro bran lei ne nathek rog shii lijiing um bo.

## PHITHAR Ro Nyichiieng Pha Jigigam Yaophi

Nyichiieng pha Phithar ro jigi ne ibi pha dayiingdayang rey dun pha Masiphothek shii zey ro. Hi pha miyao sbang zey pha jine biidiie pha masdothek shii nane ithek muyua pha zab awie pha blia nane siulao shii khriig rek pha yao. Ji pha diigtheek shii chang phane Hamangkhung-aphuii ro nane Ithong Isu Masi ro izai khani shii khomuii rone doh ro, hanyie awaithek è Isu shii doh chiih-è yua pha ji aishii è yoi pha khani ji è brantheek re-è yoiphi. Hanyie è Masi ne iidoh athog phro ne yua pha ji shii isiie ruii srane zeypho è zey ro. Ai è yao Masi iidoh thog pha chia pha jine nyeliieshii izai Hamangkhung-aphuii ne “hanyie pha shii de mua yi pha ayang ro, jishii zab ne awaithek layog è khid bone yang ro.”

### **Iliing shii um pha ji**

Yaophi (1:1-2)

Masipho shii ho (1:3-21)

Biidiie pha masdothek (2:1-22)

Idohhè shii Masi wuii ruii (3:1-18)

<sup>1</sup> Isu Masi ro khiao nane guaphasamoy, Simon Phithar re-è—

Hanyie yi gathek ro Hamangkhung-aphuii nane Ragia Isu Masi pha rangsuathek ji è gathek ro igong migi duiine hanyie shii phi pha ji shii hìpha jigi phijong ro:

<sup>2</sup> Gathek ro khani pha Hamangkhung-aphuii nane Ithong Isu ro bushun nane liijiang ne nathek shii ley è chua ne phi bo.

### *Hamangkhung-aphuii ro ho nane gua*

<sup>3</sup> Hamangkhung-aphuii ro hamangkhung blu ne hanyie è awai\* ro biisiie nane wiethék shii thang pha ho ro aishii gu è thieg pha khani ji re-è izai giangtek chai shii rai pha zab gethek è chid pha ji phijong ro. <sup>4</sup> Hi duiine ai è sbang rek pha bajo boh nane igong lasenthek phijong ro, ji è ji pha lasenthek è sohjambling pha awie pha chid pha ji è nyayao mua, chiih-è hamangkhung ziig shii nyathang mua. <sup>5</sup> Hithek pha Chiang è nawai migi shii wie chodo pha nawai ro wie shii khani chodo bo; <sup>6</sup> naro khani shii awai shii zud pha ji shii chodo; nawai ro awai shii zud pha ji è zud pha ji shii chodo bo; nawai ro zud pha ji shii hamangkhung-aphuii duiine è chodo <sup>7</sup> naro hamangkhung-aphuii duii pha ji shii ne khuiino ro miie shii miie chodo bo; chiih-è nathek ro Masipho chun pha ji shii miie chodo bo. <sup>8</sup> Hithek pha ichua wie nathek è chid ro, chiih-è nathek zab yi ithek shii bajo um arone, ithek è nathek ro khani pha gethek ro Ithong Isu Masi shii wie nane chun pha rab phi. <sup>9</sup> Jishii nathek shii jithek oi arone nathek ne ruang ariig mua chiih-è nathek shii buyo layogtheek è gang rekjong phi pha ji shii bia dun phro.

<sup>10</sup> Ji-è chiihphado, gu iijiaaktheek, Hamangkhung-aphuii è ho pha ji shii chiih-è ai è nathek shii ne idang lie um pha ji shii din nede muna gang bid-ang bo; nathek è ji rek arone, nathek ne nawaithek migi† shii khuchungde

\* **1:3** 1:3: awai ro shii thang; giak jigizey um ai re-è. † **1:10** 1:10: nathek migi shii thomuii; dinne layog shii ley.

athoh phro. <sup>11</sup> Hi pha lumuii è nathek shii ne gethek ro Ithong nane ragia Isu Masi ro idang pha Sajathua shii khud pha ley rangsua phi ruii phro.

<sup>12</sup> Chihih-è hìpha miyao ne gu idang nathek shii now yi pha ro, nathek ne ithek shii thiegjong chihih-è nathek è mua pha izai ji shii ne chuh reyjong ro. <sup>13</sup> Gu è now shii gu sieng ne rai ba shii hìpha miyaothek pha nathek ro nowkhlei pha ji shii nai pha ne gu shii rangsua um bie ro. <sup>14</sup> Khthiie gune ji pha iy pha siu shii thoh muui chid gune ji thieg, gethek ro Ithong Isu Masi è gu shii miang è yao. <sup>15</sup> Gu ne gui è rek muui pha ji rek pha ro, chihihphado, gu iy dun pha iidoh idang pha ishak shii nathek shii hìpha miyaothek now yi pha lumuii phi pha ro.

### *Masi ro biisiie shii riigpho*

<sup>16</sup> Gathek ne gethek ro Ithong Isu Masi ro riichaiboh ji wuii ruii pha nathek shii thieg yi pha phaluiithek rab ne yao pha ji è ayao ro. Gathek ro mieg è airo zabèboh ji doh ro. <sup>17</sup> Aishii ne ilab nane Hamangkhung-aphuii Aphuii shii biisiie phi mage shii gathek de thiisa hà um, Bajoboh Biisiie è goh aishii thog mage shii, yao, “Hi ne guiro bushun Dufuii ro, hanyie rog shii gu è sang pha ji ro!” <sup>18</sup> Gethek ai rog shii so phiing hà um shii, guithek de ji pha goh ne hamangkhung è wuii ruii pha ji yoi ro, <sup>19</sup> Gethek ne din nede chaigpho re-è yao pha mua shii muna anow dak ro. Nathek ne ji shii isiie rek pha ne nyarek mua, nyieliieshii hìne hamiang pha dadiang yi nathek lubuthek shii chuang ne Inai arey sapho shii ne muchuang khlieng pha duine ro. <sup>20</sup> Zab è muna ne hì shii, nowkhlei bo, jigigamthek shii chaig pha ji shii gethek hanyie magunde gethek lum ayao mua phro. <sup>21</sup> Chihih-è chaigthek ro mua bran è yang pha ji è athog ro, jishii branthek ne Ragung So iliing shii phrai ne ithek yao pha mua jine Hamangkhung-aphuii è thog ro.

## 2

### *Biidiie pha masdothek*

<sup>1</sup> Buyo hà biidiie pha chaigthek ne bran duchoi shii khia thog, chihih-è ji duiine biidiie pha masdothek de nathek duchoi shii khia ruii phro. Ithek ne mua yi, biidiie muyuathek ji yie ruii phro, chihih-è ithek ne hanyie è ithek shii khia phi pha Masdo shii snai ruii phro, chihih-è ithek ne hamblo shii awaithek shii mua pha ji yie ruii phro. <sup>2</sup> Ji-è rangde, bajo ne ithek ro awie pha lumuii jihà luagieng ruii phro, chihih-è nyieliieshii ithek è nyie rek pha ji shii, gaithek ne izai pha Lumuii shii awie pha yao ruii phro. <sup>3</sup> Ithek ro giichak pha ji è hìpha biidiie masdothek ne nathek shii rab pha phaluiithek yao pha ji è phua yi phro. Bajo ibi è ithek ro Chua phane sarojong ro, chihih-è ithek ro Srobropho ne idang sieng ne rai ro!

<sup>4</sup> Hamangkhung-aphuii è layog rek pho hamangkhliiethek shii athoh ro, jishii ithek shii thumluui hà fen muui, Chua pha Inai pha ithek shii igiia\* hà phiing ne rai ro. <sup>5</sup> Hamangkhung-aphuii è ihèg sohjambling shii athoh ro, jishii sohjambling pha hamangkhung-aphuii oi pha branthek shii khokhed noh; jia ragia rey bie jine Noah ro, hanyie è giangthek yua, chihih-è gai miley bran de ragia rey ro. <sup>6</sup> Hamangkhung-aphuii è Sodom nane Gomora rajan shii nin, ithek shii bai è ziao muui, chihih-è hamangkhung-aphuii oi pha bran shii nyie rey ruii pha ji ithek shii miiriig rab ro. <sup>7</sup> Ai è wie bran Loth shii

**1:17** 1:17,18: Mth 17:1-5; Mrg 9:2-7; Lug 9:28-35 \* **2:4** 2:4: shiirnai shii igiia; giak jigizey shii um igiia hà phang. **2:5** 2:5: Igo 6:1; 7:24 **2:6** 2:6: Igo 19:24 **2:7** 2:7: Igo 19:1-16

ragia rek, hanyie yi Iphey oi pha bran ro zab awie blia è duhug rey ro. <sup>8</sup> Ji pha wie bran ne ithek duchoi shii rai, chiih-è inai tham ne diig è duhug rey ne chiih-è ai è ithek ro awie pha bliathek ji riig ne yoi. <sup>9</sup> Chiih-è giang bran shii chaithek è ragia rek phi pha chiih-è khi èrek ne awie pha bran shii Chua pha Inai shii lago iliing shii ruii pha ji de Hamangkhung-aphuii ne thieg ro, <sup>10</sup> hanyie è ithek ro siu zea shii yang phaji luagieng chiih-è Hamangkhung-aphuii riichai shii khiijaipho ro.

Hì pha biidiie masdothek ne arum nane lawasdai ro, chiih-è lakhung pha biisiiepho shii ilab arek rone doh yi; ji pha chiang shii, ithek shii makhak-riing rek. <sup>11</sup> Hamangkhliethek magunde, hanyie yi ithek biidiie pha masdothek è de muna gang nane chuh ba ro jimagunde Ithong moe shii ithek shii nin ne makhak-ariing ro. <sup>12</sup> Hì pha brantheke ne awaithek ro lajia ne ibeymuthung è awaithek lum ne lajia rek pha ji duiine rek, hanyie shii ne zum ne ua pha giak ro, ithek è agao pha ji è; makhak-riing rog shii joh ro. Itheke ne ibeymuthungtheke duiine srobro rey ruii phro, <sup>13</sup> chiih-è ithek è diig phi pha ji è awaithek shii diig phi ruii phro. Awaithek shii sang pha jine sang inai shii rek ne ji è ne ithek siu è chid pha ji shii liingsed ro; ithek ne nathek rog nathek ro michiethék shii dog phane biwo nane awie pha ibeng ro. Itheke zab ne khinrin pha lubo rek ro! <sup>14</sup> Itheke ne hanyie shii de ariig yang ro ji shii siulao rek pha jo ji riig; ithek è yang pha layog ne khuchung de liingsed oi ro. Itheke ne zia bran shii ubong hà phang yi. Itheke ro lubuthek ne gichak pha dab ne ruii ro. Itheke ne Hamangkhung-aphuii ro mucho iliing shii ro! <sup>15</sup> Itheke ne miang lumuii shii thoh srane ithek ro lumuii ne san dun ro; ithek ne Beor ro dufuii Balam è yie muii pha lumuii shii luagieng ro, hanyie ne awie pha blia rek pha ji è mua pha bang shii miie srane <sup>16</sup> chiih-è airo layog chiang aishii giung. Airo bambao è ne bran goh è yao ro chiih-è chaig ro bi-è blia shii gak muii ro.

<sup>17</sup> Hìtheke pha brantheke ne gohdun pha gaphieg duiine ro, chiih-è hasamkhanoi è kheydun pha sakhmiingtheke duiine ro; Hamangkhung-aphuii è ithek ro ithua ne jam igiia hà ongjong ro. <sup>18</sup> Itheke ne wiangwe nane bi-è miyaothek yao, chiih-è hanyie yi awie bsa hà rai pha ji è yo pha jao ramuii pha brantheke shii awie pha siu pha ji chid pha ji shii bohkhoh ne ubong shii phang muii ro. <sup>19</sup> Itheke è ithek shii ichad rek phi phro ne sbang rek—jishii awaithek ne mua pha lajiatheke ro khiao rek ba ro—chiih-è nyie è gethek shii zum ruii pha manatheke ro khiao ro. <sup>20</sup> Brantheke yi Ithong nane Ragia Isu Masi pha ithek ro khani è sohjambling pha awie pha blu è yo arone, chiih-è dinne ithek yang yie, ji è rek pha brantheke rone iidohè ne igobi è de awie pha rey ruii phro. <sup>21</sup> Chiih-è ithek shii phi pha ug muyung ji è khid pha ji shii ithek ne giang pha lumuii khuchungde a-id ba pha ji wieba ro. <sup>22</sup> Itheke shii nyie rey pha jine khuamiyaothek ne zai ro thoh yi ro: “Choi ne awai è moy pha ji shii iidoh wuii” chiih-è “wak ne sudjong pha ji iidoh wuii ne nyiak shii woi din ro.”

### 3

#### *Ithong wuii ruii pha sbang*

<sup>1</sup> Gu iijiaaktheke, hìne gu è nathek shii zey pha din pha jigi ro. Nyimanyi pha jigi shii nathek ro khanitheke shii hìtheke pha manatheke shii now yie rone igang munowtheke pha ji khia pha bidiang. <sup>2</sup> Gu nathek shii buyo

so chaigtheek è yao pha miyaogamtheek ji nowkhlei yi pha yang ro, chiih-è Ithong nane Ragia ro nyie muyung yi guaphasamoytheek è phi pha jine nathek shii de now yi. <sup>3</sup> Zab è igobi, nathek ne gao chid hipha iidohè pha inai shii chai ne awai è yang pha phrai muui pha ji ruui pha brantheek khia ruui phro. Itheek ne nathek shii siakjo ruui phro <sup>4</sup> chiih-è sai ruui, “Ai wuii pha sbang arek bey? Ai ne khihà lei? Gethek ro blangtheek ne iyjong ro, jishii zab ne sohjambling rab pha ishak è thuh ò ro!” <sup>5</sup> Itheek ne buyo Hamangkhung-aphuui è yung ne, hamangkhungtheek nane sohnyiak ne rab pha izai ji shii ne snai muui ro. Sohnyiak ne kho shii kho è rey, <sup>6</sup> chiih-è hine kho è ro, Kho è khokhed pha ji è, ihèg sohjambling ne srobro rey dun ro. <sup>7</sup> Jishii hamangkhungtheek nane sohnyiak thuh shii um pha jine Hamangkhung-aphuui ro ò muyung ji è ruui ro, nyieliieshii bai è srobro rek pha ji ruui ro. Itheek shii ne giang asi pha brantheek shii chua ne srobro pha inai shii ruui phro.

<sup>8</sup> Jishii mana jia shii abia rabo, gu iijiiaktheek! Hamangkhung-aphuui mieg ibi shii ne inai jia nane itham idamtheek duchoi shii yo oi ro; aishii ne nyl ne ò ro. <sup>9</sup> Giak è now pha duine, Ithong ne awai è sbang rek pha jine achia phro. Ji pha Chiang shii, ai ne nathek rog shii lubuphiang rek, nyieliieshii ai ne hanyie jia shii srobro rek yi pha ayang ro, jishii zab ne awaitheek ro layogtheek è khid bone yang ro.

<sup>10</sup> Jishii Ithong wuii pha inai shii ne mugopho duine wuii ruui phro. Ji pha Inai shii ne hamangkhungtheek ne awiedang pha ro srane san ruui phro, hamangkhung pha hasiang, habie nane dadiangtheek ne hùb ne srobro rey ruui phro, chiih-è sohnyiak shii nyie um pha ji rog pha zab ne san ruui phro.\* <sup>11</sup> Zab pha manatheek ne hi duine srobro rey dun, nathek khi-èrek pha brantheek um chid pha lei? Nathek ro chaitheek ne so um chid chiih-è Hamangkhung-aphuui shii phi muui pha um chid, <sup>12</sup> nathek ne Hamangkhung-aphuui ro Inai khan shii chiih-è nathek khama rek muui pha ji rek ne khthiie wuii pha rab bo—hamangkhungtheek hùb ruui ne mua mage pha Inai shii, chiih-è hamangkhung pha hasiang, habie nane dadiangtheek ne chieg ne lieng ruui phro. <sup>13</sup> Jishii gethek ne Hamangkhung-aphuui è iwo hamangkhungtheek nane iwo sohnyiak shii sbang rek pha ji khan bo: Thiisa pha hò hane zab giangtheek um ruui phro.

<sup>14</sup> Chiih-è ji-è, gu iijiiaktheek, nathek ji pha Inai khan shii, nawaitheek khama rek mua pha ji rek ne Hamangkhung-aphuui mieg ibi shii gang nane ichuig oi pha chiih-è ai rok shii liijung rek bo. <sup>15</sup> Ai è nathek shii ragia rey yie pha ishak phi pha ji shii gathek ro, Hamangkhung-aphuui è aishii phi pha khani shii khoh gathek ro iijiiak Phaul è nathek shii zey pha duine Ithong ro lubu phyang shii riig bo. <sup>16</sup> Hi ne ai è hi Chiang shii nyie yao pha ji airo zab jigitheek shii zey. Ichiih pha jigi shii ne athieg pha diig manatheek um hi shii ne khani oi pha nane chuh asi pha brantheek è biidiie è yua muui ro, ithek ne Jigithek pha gai ithothek shii de ji asi pha jihà yua ro. Ji-è ithek ne awaitheek lakhung shii awaitheek ro srobro ji yie ro.

<sup>17</sup> Jishii, gu iijiiaktheek, nathek hine khuchung mujo thiengjong. Chiihphado, ji-è Iphay oi pha brantheek asi pha lumuii hà anoh yie pha chiih-è nawaitheek ro ragia pha ithua è achihi yi pha, nawaitheek shii ragia rek bo. <sup>18</sup> Jishii

**3:3** 3:3: Jud 18    **3:5** 3:5: Igo 1:6-9    **3:6** 3:6: Igo 7:11    **3:8** 3:8: Chng 90:4    **3:10** 3:10: Mth

24:43; Lug 12:39; 1The 5:2; Dng 16:15

\* **3:10** 3:10: san din dun; giak jigizey shii um dohdin; gai

um ziao muui; jia ne dohdin ne srobro reyjong.

**3:13** 3:13: Aij 65:17; 66:22; Dng 21:1

gethek ro Ithong nane Ragia Isu Masi ro bushun nane khani shii idang sey bo. Biisiie ne, thuh chiih-è idang airo ro! Amen.

## JON

### Ro Igobi Pha Jigigam Yaophi

*Jon ro igobi pha jigi* shii nyi Chiang um ro: hanyie hìpha jigi shii thamphothek ne Hamangkhang-aphuii nane ai dufuii, Isu Masi, rog òsia ne rai yi pha lububo rek ro chiih-è jine ithek hìpha òsia shii srobro rekpho nane biidiie yua pho shii phriie. Awie pha mana ne hìpha sohjambling rog ò rai pha Chiang è rey ji è Isu hanyie yi Hamangkhang-aphuii ro Dufuii, ai ne khuchungde tharothamang asi rone biidiie pha masdothek è yua ro. Hanyie masdothek è ji yao jine ragia rey yi pha hìpha sohjambling pha chai lakhung shii anoh sha chid; chiih-è ithek ne hì de yua ji pha giawo nane isiie sieng pha nane chiih-è gai shii miie pha jine nyie de arek chid phro.

Hì pha khani suang ne, zey pho ne so è yao Isu Masi ne tharothamang sbhang ro, chiih-è hanyie è Isu shii migi rek chiih-è Hamangkhang-aphuii shii miie ithek ne awaithek chung miie chid.

#### **Iiing shii um pha ji**

Yaophi (1:1-4)

Muchuang nane igiathek (1:5—2:29)

Hamangkhang-aphuii ro aniphiing nane Sakhathong aniphiing (3:1-24)

Zai nane asi pha (4:1-6)

Miie pha bliia (4:7-21)

Yang pha migi (5:1-21)

#### *Chai pha miyaogam*

<sup>1</sup> Gathek ne nathek shii chai pha miyaogam Chiang shii zey, nyie yi igobi è um. Nyie yi gethek è ji shii khoh è yojjong, chiih-è gethek ji shii mieg è riigjong; oh, gethek riigjong gethek wad è de khohjong. <sup>2</sup> Ji pha chai shii doh muui pha rey magey shii, gethek riigjong ro, ji è gethek yao ruui chiih-è nathek shii idang pha chai Chiang ji yao ruui nyie ji yi Aphuii rog um chiih-è gethek id yi ro. <sup>3</sup> Gethek è nyie doh pha nane yoi pha ji shii gathek ne nathek shii de idyi pha yao, ji è jine gethek Aphuii rog chiih-è Dufuii Isu Masi rog shii na de gathek rog òsia shii si gieng pha rek ro. <sup>4</sup> Gathek è hì zey pha jine gethek ro\* lubo shii zab rey yi pha rek ro.

#### *Hamangkhang-aphuii ne muchuang*

<sup>5</sup> Thuh ai Dufuii è gethek yoi pha mua ji chiih-è id pha yao pha jine hì ro: Hamangkhang-aphuii ne muchuang, chiih-è aishii ne nyie de giia oi. <sup>6</sup> Chiihphado, gethek ai rog shii òsia rone yao, thuh de gethek ne igiia hà rai pha ishak duine ba arone, gethek miyaogam nane bliathek shii de khlam bamui ro. <sup>7</sup> Jishii thuh ai muchuang shii duine—Gethek de muchuang shii rai arone—Ji-anine gethek zab jia rog òsia shii ro, chiih-è gethek ro zab layog shii ne airo Dufuii, Isu ro ifai è sud phi phro.

<sup>8</sup> Gethek è gethek shii layog oi rone yao arone, gethek ne gethek shii khlam ro, chiih-è gethek shii ne nyie zai oi ro. <sup>9</sup> Jishii Hamangkhang-aphuii shii gethek layogthek khung arone, ai ne awai sbang shii ruui chiih-è nyie zai lei

ne ji rek: Ai ne gethek layogthek è khung phi chiih-è gethek ro zab awie pha rek pha ji è gethek shii sang phi phro. <sup>10</sup> Gethek ne layogthek arek rone yao arone, gethek ne Hamangkhung-aphuii shii khlam rone rab ro, chiih-è airo miyaogam ne gethek shii oi ro.

## 2

### *Masi gethek ro nongpho*

<sup>1</sup> Gu aniphiing, gu ne nathek shii hì zey, ji è nathek ne layog arek; jishii hanyie magunde layog rek arone, gethek beng shii Aphuii shii khung pha bran jia um ro—Jine giang ne Isu Masi ro. <sup>2</sup> Chiih-è gethek layogthek shii khung phi pha lumuii ne Masi Chiang è ro, chiih-è gethek layogthek shii asi bie, jishii zab ro layogthek shii khung mua ro.

<sup>3</sup> Gethek ne Hamangkhung-aphuii muyung nuii arone, chiihphado gethek ne aishii id pha ji zai ro. <sup>4</sup> Gathek è aishii idjong rone yao, jishii ai muyung ji anuii arone, gethek ne khlamphothek chiih-è gethek shii zai jine oi ro. <sup>5</sup> Jishii gethek ne airo miyaogam ji shii nuii arone, gethek ne Hamangkhung-aphuii shii miie um pha jine zai nane khriig chak ro. Ji è gethek ne Hamangkhung-aphuii rog ò rai rone yao pha jine izai ro: <sup>6</sup> gethek ne Hamangkhung-aphuii rog ò rone yao arone, gethek ne Isu Masi duiine sieng chid.

### *Iwo muyung*

<sup>7</sup> Gu iijiiakthek wo, gu è nathek shii muyung zey pha hìne iwo asi ro; hìne muyung hèg ji ro, nathek bajo igobi è nyie nuiijong pha jia ji ro. Muyung hèg pha mua ne nathek è yoijong. <sup>8</sup> Jimagunde thuh gu è nathek shii nyie muyung zey pha jine iwo ro, nyieliieshii hìpha zai ne Masi nane nathek shii doh ro. Igiia ne dunjong ro, chiih-è muchuang sbhang jine chuang ramuii ro.

<sup>9</sup> Gethek ne muchuang shii rone yao srane khuiino nane bumuii shii khiijai ba arone gethek ne thuh de igiia hà ba ro. <sup>10</sup> Gethek ne gaithek shii miie arone, gethek ne muchuang hà um ro, chiih-è ji è gethek shii ne gaithek shii layog hà chiih phane nyie de oi ro.\*

<sup>11</sup> Jishii gethek ne gaithek shii khiijai arone, gethek ne igiia hà ba ro; chiih-è igiia hà lua gethek khihà wuii pha jine a-id pha lua bamuii ro, nyieliieshii igiia ji è gethek shii miegthi rab ruii muii.

<sup>12</sup> Gu ne nathek shii zey, gu aniphiing, nyieliieshii nathek layogthek ne Masi Chiang è khungjong ro.

<sup>13</sup> Gu ne nathek shii zey, gu aphuiiphiing, nyieliieshii nathek ne aishii id igobi è um rone id. Gu ne nathek shii zey, filiao-miliao branthek, nyieliieshii nathek ne sakhathong è yang ge ro.

<sup>14</sup> Gu ne nathek shii zey, gu aniphiing, nyieliieshii nathek ne Aphuii shii id, gu ne nathek shii zey, gu aphuiiphiing, nyieliieshii nathek ne aishii igobi è um rone id. Gu ne nathek shii zey, gu filiao-miliao branthek, nyieliieshii nathek ne gang. Hamangkhung-aphuii ro jigigam ne nathek shii rai, chiih-è nathek ne sakhathong è yang ge ro.

<sup>15</sup> Sohjambling nane zab soh shii nyie um pha ji shii amiie rabo. Nathek sohjambling shii miie arone, nathek ne Aphuii shii amiie ro. <sup>16</sup> Sohjambling shii nyie um pha jine zab layogthek è chid pha ji ro—Bran è nyie doh ne yang



pha, chiuh-è zab sohjambling pha nyie lakhung shii brantheck è wiangwe pha um—Jine Aphuii è thog pha asi; jine zab pha sohjambling è thog pha ro. <sup>17</sup> Sohjambling nane brantheck è chid pha jine san dun ro; jishii hanyie è Hamangkhang-aphuii chid pha ji shii rekpho ai ne idang rai ro.

### *Masi ro suangpho*

<sup>18</sup> Gu aniphiiing, iidohè ne inui sha ro! Nathek shii yao pha duiine Masi ro suangpho ne thog ruii phro; chiuh-è thuh Masi ro suangpho ne bajo khiajong ro, chiuh-è ji è gethek ne id ji pha iidohè ne inui sha ro. <sup>19</sup> Hi pha bran ne izai gethek ro òsia è asi ro, chiuh-è ji è ithek gethek shii thohmaruii ro; ithek yi gethek òsia è arone, ithek ne gethek rog shii rai chid. Jishii ithek ne thohmuii, ji è jine sang ro ithek ne hanyie jia de izai gethek re è asi chak ro.

<sup>20</sup> Jishii nathek shii ne Masi è jiie pha Ragung So um ro, chiuh-è ji è nathek ne zab izai shii id. <sup>21</sup> Chiuhphado, gu nathek shii zey phane, nathek izai shii athieg rone zey pha asi, nyieliieshii nathek thieg pha ji shii, chiuh-è nathek hi de thieg zai è ne khuchungde khlam pha athog.

<sup>22</sup> Chiuhphado, khlam pha hanyie ga? Hi ne hanyie è Isu shii Masaiya asi rone yao pha bran ji ro, ji pha brantheck ne Masi ro makpho ro—Itheck ne Aphuii nane Dufuii nyi-manyi shii snai ro. <sup>23</sup> Hanyie è Dufuii shii snai lei ne ai ne Aphuii shii de snai; hanyie è Dufuii shii nuii lei ne Aphuii shii de nuii ro. <sup>24</sup> Chiuhphado, nathek igobi è yoi pha mua shii nawaithek ro lubu shii ruii pha abia rabo. Nathek è mua shii ruii arone, nathek ne idang Dufuii nane Aphuii rog shii rai phro. <sup>25</sup> Chiuh-è idang pha chai hìne Masi awai è sbang gethek shii phi pha ji ro.

<sup>26</sup> Gu ne hanyie è nathek shii khinrinpho Chiang nathek shii zey. <sup>27</sup> Jishii nathek shii ne, Masi è awai ro Ragung è nathek lakhung shii thoi. Ji-è airo Ragung manathek shii um spha shii ne, nathek ne hanyie jia è yua chid pha asi ro. Ai ro Ragung è nathek shii zab Chiang pha yua ro, chiuh-è ai è nyie yua pha jine zai, biidiè asi ro. Chiuhphado, Ragung muyua shii nuii, Masi rog ò shii rai bo.

<sup>28</sup> Oh, gu aniphiiing, ai rog ò pha ji shii rai bo, ji è ai khia magey shii gethek ne ley lububo shii um chiuh-è ai thog pha inai shii ne wo ne a-ug chid phro.

<sup>29</sup> Nathek ne id ji pha Masi ne giang ro; chiuhphado, na ne id chid, zab hanyie è zai shii rek ithek ne Hamangkhang-aphuii ani ro.

## 3

### *Hamangkhang-aphuii ro aniphiiing*

<sup>1</sup> Riigbo Aphuii è gethek shii khama miie! Ai ro miie ne bajo bajoboh ji è gethek shii Hamangkhang-aphuii aniphiiing rone ho—Chiuh-è ji è, jine izai, sohjambling è gethek shii a-id: nyieliieshii ai ne Hamangkhang-aphuii shii de a-id. <sup>2</sup> Gu iijiaaktheck wo, thuh gethek ne Hamangkhang-aphuii ro aniphiiing ro, jishii hìne thuh de sang arey ba gethek nyie thog ruii. Jishii gethek id ji pha Masi dong magey shii, gethek ne ai duiine um chid, nyieliieshii ai izai khi è mia gethek ne aishii doh ruii. <sup>3</sup> Zab hanyie jia hipha luthong Masi shii ruii ithek ne awaithek shii igang ruii Masi igang duiine.

<sup>4</sup> Hanyie è layogtheck rek ai ne Hamangkhang-aphuii ro iphey shii chui, nyieliieshii iphey shii chui phane layog ro. <sup>5</sup> Nathek ne id Masi ne layogtheck shii khia rone yiedun pha thog,\* chiuh-è aishii ne nyie de layog oi ro. <sup>6</sup> Ji-è

3:1 3:1: Jon 1:12    3:5 3:5: Jon 1:29    \* 3:5 3:5: Layogtheck; giak jigizey shii ne um Gethek ro layogtheck.

hanyie magun Masi rog shii ò rai layog shii ne arek; jishii hanyie è layog shii athodang pha rekpho ne khuchung de aishii adoh chiih-è a-ìd ro.

<sup>7</sup> Gu aniphiing, hanyie jia de nathek shii akhinrin yi rabo! Hanyie magunde izai shii rek anine jine Masi giang duiine ai de giang ro. <sup>8</sup> Hanyie magunde athodang pha layog rek pho ne ai ne Sakhathong re-è ro, nyieliieshii bajo igobi è Sakhathong ne layogthek rek ro. Hi pha Chiang è Hamangkhung-aphuii ro Dufuii khia pha ji ne, Sakhathong è rek pha ji shii srob-ro rek yi pha khia ro. <sup>9</sup> Hanyie yi Hamangkhung-aphuii ro aniphiing ithek ne layog shii arek phro, nyieliieshii ithek shii ne Hamangkhung-aphuii ro zìg um; chiih-è nyieliieshii Hamangkhung-aphuii ne ithek Aphuii, ji è ithek ne layog shii arek muui ro. <sup>10</sup> Ichiih ne Hamangkhung-aphuii nane sakhathong aniphiing duchoi shii ne sang è yoh-yoh um ro: hanyie è izai shii arek chiih-è gaithek shii amiiè, ithek ne Hamangkhung-aphuii ro aniphiing asi ro.

### *Gethek chung miie*

<sup>11</sup> Igobi è nathek yoijong pha mua ne hi: gethek ne gethek chung miie chid. <sup>12</sup> Gethek ne Khain duiine arek; nyieliieshii ai ne sakhathong re-è chiih-è ai ne awai ikhuiu Abel shii ua. Khain ne aishii nyie rek ne ua? Nyieliieshii awai mirek pha manathek ne asi, chiih-è ai khuino è nyie rek pha mana jine zai ro. <sup>13</sup> Ji-è, gu iijiaakthek, sohjambing pha branthek è na shii khiijai arone awieng rabo. <sup>14</sup> Gethek ne id gethek ne iy pha ji è hiia ne chiih-è chai hà thogjong; gethek ne hi id nyieliieshii gethek ne khuino nane bumuii shii de miie ro. Hanyie è amiièpho ne thuh de iy pha blu hà ro. <sup>15</sup> Hanyie è khuino nane bumuii shii khiijai ithek ne ua pho ro, chiih-è nathek ne id uapho ne ithek shii idang pha chai oi ro. <sup>16</sup> Masi è gethek Chiang awai chai phi, ji è gethek ne miie shii id. Chiihphado, gethek de, gethek chai shii de khuino nane bumuii shii phi! <sup>17</sup> Gethek bukho arone chiih-è gaithek è chid pha ji shii riig arone, chiih-è thuh de gethek lubu ne ithek suang shii kheb ba arone, khi-è-rek ne gethek yao mua, gethek ne Hamangkhung-aphuii shii miie ro? <sup>18</sup> Gu aniphiing, gethek ro miie ne miyao nane miyogamthek shii asi bie chid; jine nyie yi bliathek shii riig yi pha duiine zai miie um chid.

### *Hamangkhung-aphuii ibi shii lububo rek*

<sup>19</sup> Chiihphado, hi duiine gethek ne zai è rone id ruii; hi duiine Hamangkhung-aphuii moe shii gethek bujuii um. <sup>20</sup> Gethek khani è gethek shii the arone, gethek ne id Hamangkhung-aphuii ne gethek khani è de bajoboh ro chiih-è ai ne zab id phro. <sup>21</sup> Chiih-è ji è, gu iijiaakthek wo, gethek khani yi gethek shii athe arone, gethek ne Hamangkhung-aphuii moe shii lububo rek ro. <sup>22</sup> Gethek ne ai re è nyie lia pha ji zab mua ro, nyieliieshii gethek ne ai muyung shii nuui chiih-è ai nyie sang pha ji shii rek. <sup>23</sup> Nyie airo muyungthek ne hi ro gethek è airo Dufuii Isu Masi shii migi rek bo chiih-è gethek chung miie, Masi gethek shii yung pha duiine ro. <sup>24</sup> Hamangkhung-aphuii muyungthek shii hanyie è nuui ai ne Hamangkhung-aphuii rog ò shii rai chiih-è Hamangkhung-aphuii ithek rog ò shii rai ro. Chiih-è nyieliieshii Hamangkhung-aphuii è gethek shii Ragung phi, ji è gethek ne id Hamangkhung-aphuii gethek rog ò shii rai.

## 4

*Ragung izai nane khlam pha ragung*

<sup>1</sup> Gu ijjiakthek wo, zab Ragung um rone yao pha ji shii migi arek rabo, jishii ithek ro ragung ne Hamangkhung-aphuii è thog pha bey ne ithek shii chai ne riig bo, khihà ne asi pha chaigthek ne bajo thog ro. <sup>2</sup> Hamangkhung-aphuii ro Ragung shii nathek ne hì è rek ne ìd mua phro: Hanyie è Isu Masi tharothamang rey rone nuii, ai Ragung ne Hamangkhung-aphuii è thog pha ro. <sup>3</sup> Jishii hanyie è Isu shii tharothamang rey pha asi rone yao pho ne Hamangkhung-aphuii è phi pha Ragung ne ithek shii oi ro, ithek ro ragung ne Masi ro suang è ro; hanyie Chiang shii na è thog ruii rone yoi, chiih-è thuh jine ichiih sohjambling shii umjong ro.

<sup>4</sup> Jishii gu aniphiing, nathek ne Hamangkhung-aphuii è ro, chiih-è nathek è ne asi pha chaigpho è yang ge ro, nyieliieshii nathek shii Ragung um pha jine sohjambling pha ragung è huak ne bohblu um ro. <sup>5</sup> Asi pha chaigthek ne sohjambling Chiang shii yao, chiih-è sohjambling pho ne ithek shii nuii nyieliieshii ithek ne sohjambling è ro. <sup>6</sup> Jishii gethek ne Hamangkhung-aphuii è ro. Ji-è hanyie è Hamangkhung-aphuii shii ìd, ithek ne gethek shii nuii; hanyie magunde Hamangkhung-aphuii è asi lei ai ne gethek shii anuii phro. Chiihphado, hìne, è rek ne zai Ragung nane asi pha ragung shii gethek ne yoh-yoh rone nyayao mua phro.

*Hamangkhung-aphuii ne miie*

<sup>7</sup> Bushun pha ijjiakthek, cho gethek chung miie rai haro, nyieliieshii miie ne Hamangkhung-aphuii è ro. Hanyie è miie ithek ne Hamangkhung-aphuii aniphiing ro chiih-è Hamangkhung-aphuii shii ìd ro. <sup>8</sup> Hanyie è amiie ithek ne Hamangkhung-aphuii shii a-ìd, nyieliieshii Hamangkhung-aphuii ne miie. <sup>9</sup> Chiih-è Hamangkhung-aphuii è airo miie shii gethek doh yi pha ne awai ro Dufuii shii sohjambling shii thoh gey, ji è gethek chai ne ai Chiang è um ro. <sup>10</sup> Hì ne zai miie ji ro: Gethek è Hamangkhung-aphuii shii miie pha ji è asi, jishii jine ai è gethek shii miie pha chiih-è awai Dufuii shii thoh gey pha Chiang è gethek layog shii khung yi ro.

<sup>11</sup> Bushun pha ijjiakthek, Hamangkhung-aphuii è gethek shii hì nyama miie arone, jine gethek chung de miie rai chid phro. <sup>12</sup> Hamangkhung-aphuii shii ne thuh thog pha hanyie de adoh, jishii gethek chung miie rai arone, Hamangkhung-aphuii gethek rog ò shii rai, chiih-è airo miie è gethek ro chai shii khiig rab phro.

<sup>13</sup> Gethek ne izai Hamangkhung-aphuii rog ò shii chiih-è ai ne gethek rog ò shii, nyieliieshii ai è awai ro Ragung shii gethek shii phi ro. <sup>14</sup> Chiih-è gethek ne doh chiih-è gai shii yao ji pha Hamangkhung-aphuii è awai Dufuii shii thoh gey pha ne sohjambling shii ragia rek yi pha ro. <sup>15</sup> Gethek è Isu shii Hamangkhung-aphuii ro Dufuii rone yaochak arone, gethek ne Hamangkhung-aphuii rog shii ò rai chiih-è Hamangkhung-aphuii ne gethek rog shii ò rai. <sup>16</sup> Chiih-è Hamangkhung-aphuii shii gethek ro um pha miie shii gethek ne ìd chiih-è migi rek.

Hamangkhung-aphuii ne miie, chiih-è hanyie è miie shii rai ithek ne Hamangkhung-aphuii rog ò shii chiih-è Hamangkhung-aphuii ithek rog ò shii rai ro. <sup>17</sup> Miie ji è ne gethek shii chua pha inai shii lububo rey yi pha khiig rab phi phro; chiih-è gethek hì shii mua ruii nyieliieshii sohjambling

shii gethek ro chai ne Masi ro chai duine ro. <sup>18</sup> Miie shii ne rum pha oi ro; zai miie pha ji è rum pha ji shii ruang rek ro. Chiihphado, ji è hanyie rumpho ro chai shii ne khriig arab mua phro, nyieliieshii rum pha ji è ne lago blia rek chid.

<sup>19</sup> Gethek ne miie nyieliieshii Hamangkhung-aphuii è igobi gethek shii miie. <sup>20</sup> Gethek Hamangkhung-aphuii shii miie rone yao, jishii khiiino nane bumuii è khiiino nane bumuii shii khiijai arone, gethek ne khlam pho ro. Hanyie shii gethek è dopha khiiino nane bumuii shii rangde amiie arone gethek ne Hamangkhung-aphuii shii de amiie nyieliieshii gethek ne Hamangkhung-aphuii shii adoh ro. <sup>21</sup> Masi è gethek shii muyung phi pha ne hi ro: Hamangkhung-aphuii shii hanyie è miie ai ne khiiino nane bumuii shii de miie chid.

## 5

### *Gethek sohjambling è yang*

<sup>1</sup> Hanyie è Isu shii Masaiya rone migi rek ai ne Hamangkhung-aphuii ro ani ro; chiih-è hanyie è aphuii shii miie ai ne dufuii shii de miie ro. <sup>2</sup> Gethek ne Hamangkhung-aphuii shii miie chiih-è ai muyungthek shii nuii pha ji è gethek ne Hamangkhung-aphuii ro aniphiing shii miie rone id ruii. <sup>3</sup> Nyieliieshii gethek Hamangkhung-aphuii shii miie pha miyaosiu jine gethek airo muyung shii nuii ro. Chiih-è gethek shii ai muyung ne diig asi ro, <sup>4</sup> nyieliieshii Hamangkhung-aphuii ro zab ani ne sohjambling è yang mua ruii phro. Chiih-è gethek ro migi Chiang è sohjambling è yang phro. <sup>5</sup> Sohjambling è hanyie yang mua phlei? Hanyie è Isu shii Hamangkhung-aphuii ro Dufuii rone migi rek lei ne ai yang mua bie phro.

### *Isu Masi Chiang shii khagi*

<sup>6</sup> Isu Masi ne khowo pha kho nane ai iy pha ifai jithek rog shii wuijong ro. Ai kho rog shii awuii bie ro, jishii kho nane ifai nyimanyi rog shii wuijong ro. Chiih-è Ragung awai è ji pha miyao jishii khagi rek, nyieliieshii Ragung ne izai. <sup>7</sup> Ji shii ne khagi uom um ro: <sup>8</sup> Ragung, kho chiih-è ifai; chiih-è uom jine zab ò khagi phi ro. <sup>9</sup> Gethek ne tharothamang ro khagi shii migi rek; jishii Hamangkhung-aphuii ro khagi ne ji è de bajo chuh ba, chiih-è airo khagi ne awai Dufuii Chiang phi ro. <sup>10</sup> Ji-è hanyie è Hamangkhung-aphuii ro Dufuii shii migi rek ai ne hipha khagi shii awaithek lubu hà ruii; jishii hanyie è Hamangkhung-aphuii shii migi arek, ai ne Hamangkhung-aphuii shii khlam pha rab ro, nyieliieshii ithek ne Hamangkhung-aphuii è awai Dufuii Chiang shii yao pha ji shii migi arek ro. <sup>11</sup> Khagi ne hi: Hamangkhung-aphuii è gethek shii idang pha chai phi, chiih-è hipha chai khrug ne airo Dufuii è ro. <sup>12</sup> Hanyie shii Dufuii um aishii ne hipha chai um, hanyie shii Hamangkhung-aphuii ro Dufuii oi aishii ne chai de oi ro.

### *Idang pha chai*

<sup>13</sup> Gu ne nathek shii hi zey, ji è nathek ne Hamangkhung-aphuii ro Dufuii shii migi rek pha Chiang è nathek ne id ruii nathek shii idang pha chai um ro. <sup>14</sup> Hamangkhung-aphuii moe shii gethek ne lububo um, nyieliieshii gethek ne ai è yang pha duine aishii nyie magunde sia ne lia arone gethek ne izai nuii phro. <sup>15</sup> Gethek è khuchung magun ai ro sia ne lia arone nuii phro;

chiìh-è gethek hì izai rone ìd pha Chiang è, gethek ne hì de ìd gethek è aishii lia pha jine phi ruii phro.

<sup>16</sup> Nathek è migipho shii layog rek pha nane iy pha ji anow pha layog rek pha doh arone, nathek ne Hamangkhung-aphuii shii sia chid, hanyie è ji pha bran shii chai phi. Hì pha miyao ne ithek ro hanyie layog yi iy thog pha anoh. Jishii layog è ne iy pha jiha noh pha de um ro, chiìh-è gu ne nathek shii ji pha Chiang shii Hamangkhung-aphuii shii sia bone ayao ro. <sup>17</sup> Zab asi pha rek pha jine layog ro, jishii layog ne iy thog pha anoh pha de um ro.

<sup>18</sup> Gethek ne ìd Hamangkhung-aphuii aniphiing ne layog shii bleb-bleb arek phro, nyieliieshii ithek shii ne Hamangkhung-aphuii Dufuii è ragia rek ruii phro, chiìh-è Sakhathong ji è ne ithek shii awie pha arek mua phro. <sup>19</sup> Gethek ne ìd zab sohjambling yi Awiepha Jia ro bokho shii magunde gethek ne Hamangkhung-aphuii ro bran ro. <sup>20</sup> Gethek ne ìd Hamangkhung-aphuii Dufuii wuii chiìh-è gethek shii gao yi pha phi, ji è gethek ne izai Hamangkhung-aphuii shii ìd ro. Gethek ne zai Hamangkhung-aphuii rog ò shii rai—Airo Dufuii Isu Masi rog ò shii rai. Jine zai Hamangkhung-aphuii ro, chiìh-è jine idang pha chai ro.

<sup>21</sup> Gu aniphiing nawaithek shii khlam pha chad è ragia ruii bo.

## JON

### Ro Nyichiieng Pha Jigigam

### Yaophi

*Jon ro nyichiieng pha jigi* ne dukho jia è “Bimi nane airo aniphiing” Ji pha miyaosiu ne thiig pha charch nane migiphothek shii zey. Hi pha mua zey ne khia pha jine jia è jia chung miie pha nane asi pha masdothek chiih-è ithek muyuathek pha ji shii phriie ro.

#### **Iiing shii um pha ji**

Yaophi (1-3)

Miie pha miigak ithua (4-6)

Asi pha yua pho shii phriie (7-11)

Jong sha (12-13)

<sup>1</sup> Dukhow è—Bimi nane ai aniphiing shii,\* hanyie shii gu è zai miie ithek shii zey. Chiih-è gu jia è asi bie ro, jishii zab hanyie yi zai è nathek shii miie rone id pho è ro, <sup>2</sup> nyieliieshii zai è gethek rog shii chiih-è jine gethek rog idang rai ro. <sup>3</sup> Aphuii Hamangkhung-aphuii nane Isu Masi, Aphuii ro Dufuii, gethek shii bushun nane liijiing phi; jithek ne zai nane miie shii idang gethek ro rey ne rai bo.

#### *Zai nane miie*

<sup>4</sup> Aphuii è gethek shii yung pha duiine nathek aniphiing khuyo shii zai hà rai pha doh, gu ne bajo sang ro. <sup>5</sup> Chiih-è ji è gu ne nathek shii sai, bushun bimi: cho zab gethek chung miie rai haro. Gu ne nathek shii zey pha hùne muyung iwo asi ro. Hi ne nyie gethek shii igobi è um pha ji ro. <sup>6</sup> Gu è hìpha miie Chiang yao pha miyaosiu ne gethek Hamangkhung-aphuii ro muyung shii nuii ne rai chid phro. Muyung, nathek è igobi è zab yoi pha duiine, nathek ne zab miie shii rai chid phro.

<sup>7</sup> Khinrinpho ne sohjambling shii bajo thog ro, bran hanyie yi Isu Masi shii tharothamang rey ne wuii rone anuii pho, Ji pha brantheke ne khlampha nane Masi ro Suangpho ro. <sup>8</sup> Chiihphado, nawaithek shii ragia rek bo, ji è gethek è nyie blia rek pha jine amua pha asi ro, jishii nathek† lasen jine ley choi ruii phro.

<sup>9</sup> Hanyie jia è Masi ro muyua rog shii arai pha ji è ruang rey anine, aishii ne Hamangkhung-aphuii oi ro. Hanyie magunde muyua shii rai anine Aphuii nane Dufuii nyimanyi aishii um ro. <sup>10</sup> Ji-è gai hanyie yi nathek shii ji pha muyua ayie pha wuii arone aishii ne nathek hò hà aho rabo, “liijiing nathek rog um bo de ayao rabo.” <sup>11</sup> Hanyie magunde liijiing ithek rog um bone yao arone, ai ne ithek è awiepha blia rog shii iijiak rey ruii phro.

#### *Idohhè pha miyaogamthek*

<sup>12</sup> Gu ne nathek shii yao pha bajo um, jishii hìpha blia ne gu ne jigi nane kholom è azey yang ro, Ji phachiang, gu ne hi luthong nathek shii si din ne chiih-è nathek rog gui sbang è yao, ji-anine gethek ro lised ji zabjong pha rey phro. <sup>13</sup> Bushun pha bumuiithek‡ naro anithek è ithek ro salam nathek

\* **1:1** 1:1: Bimi nane, airo aniphiing: Ji pha miyaosiu ne thiig pha charch nane migiphothek shii zey (ithoh 4-5 shii de um). **1:5** 1:5: Jon 13:34—15:12-17 † **1:8** 1:8: Gethek; giak jigizeytheke shii um Nathek. ‡ **1:13** 1:13: Bushun pha bumuiithek naro anithek: Ji pha miyaosiu ne zeypho re-è thiig pha charch nane migiphothek shii zey.

shii thoh gey ro.

# JON

## Ro Uomchiieng Pha Jigigam Yaophi

*“Dukho re-è” Jon shii uomchiieng pha jigi zey phi pha ne Gaius beng pha charch dumuii shii zey ruii phro. Gai masiphothek shii ai nong phi srane, Diotrephes beng pha bran ro gidieg phriie phi phro yao ne zey pho yi Gaius shii chiong phi ro.*

### **Iiing shii um pha ji**

Yaophi (1-4)

Gaius è chiong (5-8)

Diotrephes shii the (9-10)

Demethrius shii chiong (11-12)

Jongsha (13-15)

<sup>1</sup> Dukhow re-è—

Guro miie pha Gaius shii, hanyie shii gu izai miie. <sup>2</sup> Guro bushun pha iijiiak, zab wie re yi pha nane na siu wie yi pha gu ne sia ramuii ro—Na ne ragung shii wie rone gu thieg. <sup>3</sup> Giak Masiphothek gu shii wuii ne gu shii yao, nane khama chua è isiie nane zai shii rai ramuii, ji yao shii gu ne bajo sang—Idang zai shii rai pha duiine rai ramuii. <sup>4</sup> Guro aniphiing zai shii rai ramuii ji yoi shii ji è yoh-yoh gu shii sang phi pha oi ro.

### *Gaius shii chiong*

<sup>5</sup> Guro bushun pha iijiiak, athiephothek magunde nathek ne gai Masiphothek shii bajo migi è blia rek phi. <sup>6</sup> Ichiih pha charch shii ithek è naro miie pha miyao ji yao ro. Hamangkhung-aphuii shii sang pha rek pha lumuii shii ithek shii nong phi bo, ji è ai ne sang ruii phro. <sup>7</sup> Ithek ne migipho asi pha bran re-è nyie de nong ayie pha Masi ro blia shii khiajong ro. <sup>8</sup> Chiihphado, gethek Masipho hìpha brantheek shii nong phi chid, ji anine ithek è zai pha blia rek pha ji shii gethek de mathang rey ruii.

### *Diotrephes nane Demethrius*

<sup>9</sup> Gu è charch shii jigi dum jia zey; jishii Diotrephes, hanyie è ithek ro dumuii rek yang jine guro miyao anuii phi. <sup>10</sup> Ai è gathek chiang nyie rum pha nane khlamphothek miyao yao, gu thog shii ne ai è nyie rek ruii pha ji shii zab khia ruii phro! Jishii aishii hanyie magunde jia è nyie acho ba phro; ai ne Masiphothek thog shii ne aho phro, chiih-è hanyie è masipho shii ho pha yangpho shii de gak muii phro chiih-è ithek shii ne charch è de fuang gieng pha saro phro! <sup>11</sup> Guro bushun iijiiak, awie pha jishii anui pha wie pha jishii nui bo. Hanyie è wie rek ithek ne Hamangkhung-aphuii ro; hanyie è awie pha rek ithek ne Hamangkhung-aphuii shii adoh ba ro. <sup>12</sup> Zab jia è Demethrius shii wie rone yao; zai de awai shii wie rone yao. Gathek de aishii wie rone yao, chiih-è na ne id gathek nyie yao pha jine zai ro.

### *Idohhè pha salamthek*

<sup>13</sup> Na shii yao pha gu shii ne bajo um, jimagunde gu ne kholom è azey yang ro. <sup>14</sup> Gu ne luthong nathek shii ne khthiie si ruii, chiihphado gethek ne ò jia



shii nyamulo muii phro. <sup>15</sup>Lijjiing nathek rog shii um bo. Zab na iijjiakthek ne salamthek thoh gey. Zab gethek ro iijjiakthek shii salam yao bo.

## JUD Ro Jigigam Yaophi

*Jud ro jigi* ne khlam pha masdothek shii phriie pha zey, hanyie è awai shii migiphothek rone yao. Hi pha jigi dum shii nyie um phane, *2 Phithar* shii um pha ji ò ro, zeypho è ne thanphothek shii “Hamangkhung-aphuii è awai bran shii luang jia shii idang pha migi chiang shii mak rek bone, lububo rek ro.”

### Iliing shii um pha ji

Yaophi (1-2)

Ziig, muyua, chiih-è asi pha masdothek jongpha (3-16)

Migi shii lububo ruii pha (17-23)

Iдохè pha misia (24-25)

<sup>1</sup> Isu Masi ro khiao Jud, Jems ro khuiino re-è—

Hamangkhung-aphuii è hanyie shii ho, chiih-è Aphuii Hamangkhung-aphuii ro miie nane Masi Isu ro ragia shii rai pho:

<sup>2</sup> Bushun, liijiing nane miie ne zab ley è nathek rog shii rai bo.

### *Büdiie pha masdothek*

<sup>3</sup> Gu iijiakthek wo, gu nathek shii hi zey pha ne gethek shii um pha giawo pha miyao chiang ji shii zey chid pha now shii, jishii Hamangkhung-aphuii è awai bran shii luang jia shii idang pha migi phi pha chiang shii mak rek bone lububo rek pha zey phro. <sup>4</sup> Giak ne hamangkhung-aphuii oi pha bran ne hanyie de athieg pha gethek duchoi wuii ro, bran hanyie è awai ro awie pha lumuii shii khriig doh yi pha Hamangkhung-aphuii ro liijiing pha mua shii ne ithek è ikhliie rek muui ro, chiih-è gethek Masdo jia nane Ithong Isu Masi shii de snai ro. Itek choi pha the ne buyo è jigi hà chaigjong ro.

<sup>5</sup> Nathek ne hi thek zab id ro, jimagunde, gu nathek shii now yi pha yang ro khi-è-rek ne Ithong\* è Israelpho shii luang jia Egyph re-è ragia rek ne noh, jishii ji pha iidoh ne migi arekpho shii ne srobro rek muui ro. <sup>6</sup> Hamangkhliiethek shii now bo hanyie è awai ro riichai shii wie arai pha thoh muui, ithek shii iliing pha igiia hà idang pha snai è joi ne ruii ro, Hamangkhung-aphuii è ji pha boh Inai shii ithek shii ne the pha ruii. <sup>7</sup> Sodom, nane Gomora chiih-è ji pha moe pha thiigthek shii now bo, ji pha hamangkhliiethek duine branthekek blia rek chiih-è siulao shii sieng ne awie pha lumuii shii lua ne rai: Zab shii miang phriie pha duine ithek shii ne idang pha bai pha lago shii duhug mua ro.

<sup>8</sup> Hi duine, jipha branthekek shii ne miegriig pha um jipha chiang è awaithek ro siu zea shii layog rek ro; ithek ne Hamangkhung-aphuii ro riichai shii snai, lakhung pha biisiiethek shii raipho shii de makhak-riing ro. <sup>9</sup> Hamangkhliie Michael è de hi arek ro. Michael nane Ibuii Moses ro siu shii hanyie yi phlei ne gui ramuii shii, Michael yi ibuii shii the pha lububo arek muui, “Ithong ne na shii giung rone yao!” <sup>10</sup> Itek ne nyie de athieg pha makhak-riing srane mak rek; chiih-è nyie yi ithek ne ibeymuthung

**1:1** 1: Mth 13:55; Mrg 6:3    **1:5** 5: Mul 12:51; Ssb 14:29-30    \* **1:5** 1:5: Ithong; giak jigi shii ne Isu jine Grekh re-è beng pha, Joshua duine.    **1:7** 7: Igo 19:1-24    **1:9** 9: Dan 10:13-21—12:1; Dng 12:7Iphy 34:6Zekh 3:2

duiine iriie no thieg rone ji Chiang è awaithek srobro rey dun. <sup>11</sup> Ithek shii ne nyama rum pha um, ithek ne Khain lua pha lumuii hà lua ramuii ro. Balam è rek pha duiine Ithek ne bang pha Chiang shii awaithek shii awie pha lumuii shii phi muii. Ithek ne Khora gidieg rek pha duiine gidieg rek, chiih-è ithek de ai duiine srobro rey muii ro. <sup>12</sup> Nathek ro michie pha ishak shii awopho nane ziig oi pha brantheK wuii phane nyielei izea miak um pha duiine ro. Ithek ne awaithek shii now bie ne rai phro. Ithek ne hasam rog shii sakhaming thab pha duiine ro, Jishii haphie ne aphie ro. Ithek ne hingmuii pha iiriingtheK è laziung sieng ne iy dun ro, chiih-è iwoi woi pha ishak shii de awoi pha hingmuii duiine ro. <sup>13</sup> Ithek ne khamuii pha khashao gang duiine ro, ithek ro awo pha blia duiine doh yi ro. Ithek ne mahaw pha dadiang duiine ro, hanyie shii ne Hamangkhung-aphuii è jam igiia pha iliing hà idang pha ithua khriig rab ne ruii.

<sup>14</sup> Hi ne Adam re-è riing miley† pha Enokh ro, hanyie yi buyo hìpha Chiang ithek shii chaig rekjong ro: “Ithong yi bajo itham So hamangkhlietheK rog zab shii wuii ruii phro <sup>15</sup> chiih-è zab hamangkhung-aphuii oi pha rek pha blia chiih-è hamangkhung-aphuii oi pha layogtheK è rum pha miyaogamtheK airo gidieg yao, jithek shii ne chua srane ithek lakhung shii the ruii phro!”

<sup>16</sup> Ji pha brantheK ne idang miishiyy chiih-è gai shii the pho ro; ithek ne awaithek ro awiepha è yang pha ji shii lua ro; ithek ne awaithek ro lumuii khia pha chiih-è awaithek chung nyigodog rek ne gai shii khinrin rek.

### *Muyung nane phriiethék*

<sup>17</sup> Ji-magunde gu iijiiaktheK, buyo Ithong Masi Isu ro guaphasamoytheK re-è nathek shii yaojong jithek shii now bo. <sup>18</sup> Ithek è nathek shii yaojong, iidohè pha ishak thog magey shii nathek shii siakjo rek pha brantheK dong ruii, hanyie yi awai ro hamangkhung-aphuii oi pha michid shii lua ro. <sup>19</sup> Ji pha brantheK ne yoh che ruii pho ro, ithek ne ziig michid è zud ro, chiih-è ragung oi pha brantheK ro. <sup>20</sup> Jimagunde gu iijiiaktheK, nathek yi nawaithek shii ne bajo zai pha so migi shii rung ne rab rai bo. Ragung So pha blu è misiasia bo, <sup>21</sup> chiih-è nawaithek shii Hamangkhung-aphuii ro miie jihà rai bo nyieliieshii nathek Ithong Isu Masi ro bushun nane idang pha chai choi pha khan ramuii ro. <sup>22</sup> Hanyie è than um shii bushun rek bo, <sup>23</sup> chiih-è gai shii bai iliing è iidoh khia srane ragia rek bo, chiih-è rum pha rog gai shii bushun doh yi bo, ithek ro yungtheK shii layog rek yang pha ji miak pha jishii khiijai bo.

### *Chiong pha misia*

<sup>24</sup> Hanyie yi nathek shii chiih pha jihà gak mua pha um, chiih-è nathek shii ichiig oi pha rab srane airo biisiethék pha moe hà lubo re-è yie ruii. <sup>25</sup> Gethek ro ragia Hamangkhung-aphuii ji bie, aishii ne gathek ro Ithong Isu Masi re-è, biisiie, saja shii ilab, bluthek, nane riichai phiang-phiang chiih-è thuh chiih-è idang è de idang pha airo rey bo! Amen.

**1:11** 11: Igo 4:3-8Ssb 22:1-35Ssb 16:1-35 **1:14** 14: Igo 5:18,21,24 † **1:14** 14: Damiley: Hi pha sasab ne Igobi è iidohè nyimanyi shii lao hìpha miley beng pha ne Adam shii Enokh re-è jao ro. **1:18** 18: 2Phth 3:3

## Jon Shii DONG Yaophi

*Jon shii dong pha ji ne* Migiphothek shii diig phi pha ishak shii zey nyieliieshii ithek ne Isu Masi ne Ithong rone migi rek. Zeypho è airo thampho shii luthong nane lububo rek phi pha mugak rek phi, chiih-è ithek shii diig nane diigchiao pha ishak shii migi hà rai yi pha lububo rek phi.

Chiih-è jigigam shii ne bajo ichua ne ichinduii re-è dongthek nane chaigthek è miiriig nyuak re-è yao ro, jipa inai pha Migiphothek ne gao mua ro, jishii zab gaithek ne agao bsa hà rai mua ro. Thiibiingkhinkheb pha gow duine, hipha jigigam pha miyao ne bajo yoh-yoh re-è dong pha ichinduii re-è din ne yao. Ichiih ne jigigam pha yua pha jine yoh-yoh munow um magunde, duchoi pha miyao ne sang ro: Ithong Masi è, Hamangkhung-aphuii è iidohè chiih-è zab awairo makthek shii Sakhathong de lua ne yang ruii phro, chiih-è awairo zab yang mage shii awairo migi branthek rog shii iwo hamangkhung nane iwo sohnyiak pha khirzeythek phi ruii phro.

### **Iiing shii um pha ji**

Yaophi (1:1-8)

Igobi pha dong nane charchthek miley shii jigigamthek (1:9—3:22)

Miley chebthek rog shii khung (4:1—8:1)

Thu-ung mileythek (8:2—11:19)

Hakhliingmuïi nane buii ibeymuthungthek nyi (12:1—13:18)

Yoh yoh dongthek (14:1—15:8)

Hamangkhung-aphuii ro lijieg pha miley shiikhiiakhjam (16:1-21)

Babylon mua pha, nane buii ibeymuthung chiih-è biidiie pha chaigthek nane Sakhathong shii yang (17:1—20:10)

Iidohè pha chua (20:11-15)

Iwo Hamangkhung, sohnyiak, Jerusalem (21:1—22:5)

Jongsha (22:6-21)

<sup>1</sup> Hi pha jigigam ne Isu Masi è dong pha miyaothek ji sasab rek ne ruii. Khthiie nyie rey ramuii pha jine awai khiaothek shii doh yi pha Hamangkhung-aphuii hipha dong aishii phi. Masi è hì thek pha manathek airo khiao Jon shii thieg yi pha airo hamangkhliie yi aishii thoh ge, <sup>2</sup> chiih-è Jon ai è nyie doh pha ji yaojong ro. Hi ne Hamangkhung-aphuii ro mua è ò chiih-è izai ne Isu Masi re-è dong phi rone hìne airo phosro ro. <sup>3</sup> Hanyie jia magunde hipha jigigam tham pha ne bajo sang ro, chiih-è hanyie è chaigthek pha mua pha miyaogamthek ji yoi ne jigigam shii nyie zey ne um pha ji nuii pho ne bajo sang ro! Hi thek pha manathek rey ruii pha ishak ne nui sha ro.

### *Charch miley shii salamthek phi*

<sup>4</sup> Asia du-ùa pha miley charch shii Jon re-è:

Bushun nane liijiing ne nathek shii Hamangkhung-aphuii re-è ro, hanyie yi um, hanyie yi umjong, chiih-è yi wuii ramuii pha ji, chiih-è airo biang moe shii è miley ragung um pha ji è, <sup>5</sup> chiih-è Isu Masi è, isiie khagi, igobi iy pha ji re-è hòi ne hanyie yi sohjambling pha sajathek lakhung shii khoh ro.

Ai ne gethek shii miie ro, chiih-è airo iy ne zid pha ji è ai è gethek ro layogthek è ichad rek <sup>6</sup> chiih-è airo Hamangkhung-aphuii nane Aphiuii ro

bliã rek pha gethek shii phabithek pha sajathua rab phi. Isu Masi shii biisiie nane blu ne idang nane idang rai bo! Amen.

<sup>7</sup> Riig bo, ai ne sakhamiingthek lakhung è wuiiramuii ro! Hanyie aishii giao pho è lao ne, zab aishii doh ruii phro. Sohnyiak pha zab branthek ne ai lakhung shii zo ruii phro. Ji-è ji rey ro!

<sup>8</sup> “Gune igobi nane iidohè ro,” Hanyie yi um, hanyie yi umjong, chiih-è hanyie ne wuiiramuii ro Ithong Bohblu Hamangkhang-aphuii è yao ro.

### *Masi ro dong*

<sup>9</sup> Gu ne Jon, nathek ro khuiino, gu ne Isu rog luagieng chiih-è airo Sajathua è thog pha nathek ro diig shii lubu phiang rek ne zud pha gu ne nathek iijiak ro. Gu shii ne Phathmos pha gachung shii ruii muu nyeliieshii gu ne Hamangkhang-aphuii ro miyaogam nane Isu è dong pha izai ji yao phi. <sup>10</sup> Ithong pha inai shii Ragung è gu shii phrai ne noh dun, chiih-è gu ne goh gang jia yoi, jine thu-ung duuine rone, guro iidoh re-è yao. <sup>11</sup> Ji è yao, “Na è nyie doh pha ji zey bo, chiih-è Jigigam yi rajan miley pha Charchthek: Iphesus, Smyrna, Phergamum, Thyathira, Sardis, Philadelphia, nane Laodisia shii thoh ge bo.”

<sup>12</sup> Gu shii hanyie mulo lei ne gu è iidoh khid ne shan ne riig shii, gu è san pha bunthruak miley doh, <sup>13</sup> chiih-è ithek duchoi shii bran duuine, yung yi awai lai shii thog pha guu pha duuine chiih-è ai rinyie shii san pha rathang reing pha duuine doh ro. <sup>14</sup> Airo khaziang yi miiriing mo nane imo hayun mia, chiih-è airo mieg yi bai duuine hùb; <sup>15</sup> airo lai yi bala duuine khilieng chuang, chiih-è airo goh yi khasuang è ro pha duuine ro. <sup>16</sup> Ai è awairo phazoi wad shii dadiangthek miley khoh, chiih-è irey nyi um pha khamriie jia ai sem è fuang khia thog. Airo mizia ne inai duchoi pha hasiang duuine chuang. <sup>17</sup> Gu aishii doh mage shii, gu ne ai lai shii bran iy duuine chiih dun. Airo phazoi wad è gu lakhung shii khoh srane yao, “Arum rabo!” Gu ne igobi nane iidohè ro. <sup>18</sup> Gu ne isieng ro! Gune iy dun, Jishii thuh gu ne idang nane idang isieng. Gu ne iy pha lakhung shii riichai um ro chiih-è iypho ro sohjambling pha lakhung shii de riichai um ro. <sup>19</sup> Chiihphado, na è manathek doh pha, nyimanyi thuh shii um pha manathek nane iidoh shii rey ramuii pha manathek shii zey bo. <sup>20</sup> Hi ne na è guro phazoi wad shii doh pha miley dadiangthek nane san pha miley bunthruakthek pha ug pha miyaosiu ro: Miley dadiangthek ne miley charch pha hamangkhlithetk ro, chiih-è miley san bunthruak ne miley charch ro.

## 2

### *Iphesus shii mua*

<sup>1</sup> Charch pha hamangkhlie shii Iphesus hà zey:

“Hi ne hanyie è awairo phazoi shii dadiang miley khoh ne hanyie è san miley bunthruak duchoi shii lua muu ro.” <sup>2</sup> Gu ne thieg nathek è nyie rekjong; gu ne thieg nathek ne khama thua re-è bliã rek chiih-è nathek ne khama lubu phiang rek. Gu ne thieg nathek ne awie pha bran shii azud muu chiih-è ithek ne guaphasamoythek rone yao, jishii asi, pho shii de nathek è chua, chiih-è ithek ne biidiithetk ro. <sup>3</sup> Nathek ne lubu phiang rek, nathek ne gu Chiang è diig rek, chiih-è nathek athoh ro. <sup>4</sup> Jishii gu ne nathek shii hi

gidieg rek: ibi nathek è rek pha jine thuh nathek ne gu shii amiie ro. <sup>5</sup> Now bo nathek ne gu re-è ruang chiihdun ro. Nathek ne layog è khid ne igobi nathek nyie rek pha ji rek bo. Nathek ne nawaithek layogthek re-è akhid arone, gu ne nathek shii wuii ne nathek ro bunthruak ne awai ithua è iidoh yie ruii phro. <sup>6</sup> Jishii nathek shii harohan pha jine hì re-è ro: gu è rek pha duine, nathek è Nikholaithans è rek pha ji shii khiijai.

<sup>7</sup> “Nathek shii khoh um arone, chiihphado, Ragung è charchthek shii nyie yao pha ji yoi bo!

“Hanyie è yang pha ji shii mua pho shii gu ne Hamangkhung-aphuii ro raig shii sieng pha hingmuii iwoi ji chie pha rangsua phi ruii phro.

### *Smyrna shii Mua*

<sup>8</sup> “Smyrna charch pha hamangkhliie shii zey:

“Hì pha mua ne hanyie yi igobi nane iidohè chiih-è hanyie iy ne dinne sieng din pha ji re-è ro. <sup>9</sup> Gu ne nathek ro diigthek thieg; gu ne thieg nathek ne dusho—Jishii nathek ne zai bukho ro! Gu ne thieg hanyie è awaithek shii Jewthek rone yao jishii asi, ithek è awie pha manathek nathek shii gidieg yao; ithek ne Sakhathong pha ibrog re-è ro! <sup>10</sup> Nathek ne nyie diig rey pha Chiang ji shii arum rabo. Yoi bo! Sakhathong è nathek giak shii ne phathek hà fen ne chai ruii phro, chiih-è nathek ro diigthek ne inai sua thog pha rey ruii phro. Gu shii migi rek bo, hì re-è iy bsa arone, chiih-è gu nathek shii yang pha lasen chai phi ruii phro.

<sup>11</sup> “Nathek shii khothek um arone, chiihphado, Ragung è charchthek shii nyie yao pha ji yoi bo!

“Hanyie è yang pha ji shii mua pho shii ne dinne iy pha ji shii achun yi phro.”

### *Phergamum shii mua*

<sup>12</sup> Phergamum hà charch pha hamangkhliie shii zey:

“Hì ne hanyie shii khamriie irey nyi um pha airo mua ro.” <sup>13</sup> Nathek khi hà rai pha jine gu ne thieg, thiisa hàne Sakhathong ro biang um ro. Nathek ne gu shii izai rek, chiih-è thiisa Sakhathong rai bsa hà guro migi khagi Anthiphas ua pha ishak shii de nathek è gu shii migi rek pha jine athoh ro. <sup>14</sup> Jishii iujia manathek shii gu nathek shii gidieg rek: Nathek duchoi shii giak ne, Balam ro muyua shii luagieng, hanyie è khi-èrek ne Israel pha bran shii layog hà noh pha Balak shii yua chiih-è jangbangthek shii phi pha michie ithek shii chie pha nuii yi chiih-è siulao rek pha dab yie ro. <sup>15</sup> Ji duiine nathek shii ne bran um ro hanyie ne NikholaithantheK muyua shii luagieng. <sup>16</sup> Thuh shii nathek ne nawaithek layogthek è iidoh khid bo! Nathek è akhid arone, gu nathek shii khthiie wuii ruii ne jithek pha brantheK shii gu sem è khia pha muduii è gidieg mak rek pha ro. <sup>17</sup> “Nathek shii khothek um arone, chiihphado, luruak è charchthek shii nyie yao pha ji nuii bo!”

“Hanyie è yang pha ji shii mua pho shii gu ne ug pha manna ji phi ruii phro. Gu ne zab shii imo lubao phi ruii phro,” Ji shii ne ibeng de iwo zey ne um ro chiih-è hine hanyie è choi ji thieg bie ne gai ne hanyie de athieg mua phro.

### *Thyathira shii mua*

<sup>18</sup> Thyathira hà charch pha hamangkhliie shii zey:

“Hi pha mua ne Hamangkhang-aphui ro Dufui re-è ro, hanyie ro mieg ne bai duiine bliak muui ro, hanyie ro lai ne bala suang pha duiine ro.” <sup>19</sup> Gu ne thieg nathek ne nyie rek, nathek ro miie ne thieg, nathek ro isiethiek, nathek ro bliathiek, chiih-è nathek lubu phiang ne thieg ro. Gu ne thieg nathek ne igobi pha ji re-è muna thuh shii rekramuui ro. <sup>20</sup> Jishii gu ne nathek shii nyie suang rek pha ji ne: Nathek ne hanyie è awai shii, Hamangkhang-aphui ro muapho rone ho pha hò-amuui Jezebel shii zud. Airo muyua re-è guro khiaothiek shii siulao rek pha dab bsa hà chiih-è jangbangthiek shii zid pha michie shii chie yi pha jihà noh ro. <sup>21</sup> Gu ne aishii layogthiek re-è khid pha ishak phi, jishii awairo siulao ji è khid pha ayang ro. <sup>22</sup> Chiih-è gu ne aishii siulao pha biang hà fen muui chiih-è hanyie è ai rog shii siulao rekpho de ai rog shii diig rey yi pha ro. Ithek ne ai rog shii awie pha manathiek rek pha ji re-è akhid arone gune hò thuh shii rek ruii phro. <sup>23</sup> Gu ne airo luagiengpho shii de ua pha ro, chiih-è chiihphado shii zab pha charchthiek ne gu shii thieg mua gu ne zab ro nowthiek nane yangthiek thieg. Gu ne nathek è nyie rek pha ji duiine iidoh phi pha ro.

<sup>24</sup> “Jishii ikhe Thyathirapho gai ne awie pha muyua shii aluagieng ro; nathek ne ‘Sakhatong ro jam ugthek’ Shii gai è ho pha jine adab ro.” Gu ne nathek shii yao gai miian ne gu nathek lakhung shii aruii phro. <sup>25</sup> Jishii gu awuii ruii sapho, nathek ne nathek shii nyie um pha ji chuh khoh ne rai bo. <sup>26-28</sup> Hanyie è yang pha ji mua pho ne, hanyie è gu nyie chid pha ji shii iidohè thog pha athodang pha rek pho shii ne, gu ne Aphui re-è nyie mua pha ò riichai ji phi ruii phro: Ithek shii sothiek lakhung shii riichai phi ruii phro, shiie rog shii ithek shii bohko ne ithek shii khalia pha jariethiek duiine dumrim chui yi pha ro. Gu ne ithek shii hamiang pha dadiang de phi ruii phro.

<sup>29</sup> “Nathek shii khohthiek um arone, chiihphado Ragungthiek è charchthiek shii nyie yao pha ji yoi bo!”

### 3

#### *Sardis shii mua*

<sup>1</sup> Sardis hà charch pha hamangkhlhie shii zey:

“Hi ne Hamangkhang-aphui hanyie shii miley luruakthiek nane miley dadiangthiek um pha airo mua ro. Nathek nyie rek pha jine gu ne thieg; nathek ne isieng rone yao jishii nathek ne iyjong rone gu ne thieg! <sup>2</sup> Ji-è sieng mage bo, nathek shii nyie um bamuii pha ji shii hò zab iy dun pha ibi shii chuh rek bo.” Gu ne doh muui ro nathek è nyie rek pha jine guro Hamangkhang-aphui mieg shii thuh de akhriig ro. <sup>3</sup> Chiihphado, nathek shii nyie yua chiih-è nathek è nyie yoi pha ji shii now bo, ji nuii srane nawaithek layogthiek re-è khid bo. Nathek asieng arone, gu ne mugopho duiine nathek lakhung shii wuii ruii pha ro, chiih-è nathek ne gu khuchung wuii ruii pha ishak ji rangde athieg phro. <sup>4</sup> Jishii Sardis hà giak ne nawaithek yungthiek so ruiijong ro. Nathek ne imo guui ne, gu rog lua ruii phro, nyieliieshii nathek ne rek spho chak ro. <sup>5</sup> Hanyie è yang pha ji shii mua pho ne imo ji duiine guui ruii phro, chiih-è gu ne ithek ro ibengthiek ne sieng pha jigi re-è asad phro. Guro Aphui nane airo hamangkhlhie moe shii

gu ne ithek shii guro chak rone hong ne yaothiak pha ro. <sup>6</sup> “Nathek shii khothtek um arone, chiihphado, jigigam è charch shii nyie yao pha ji yoi bo!

### *Philadelphia shii mua*

<sup>7</sup> “Philadelphia hà, churh pha hamangkhliethek shii zey:

“Hì pha mua ne hanyie yi so nane izai pha jia ji è ro. Dawid shii um pha ziuwad ne aishii um ro, chiih-è ai habin hong mage shii, hanyie jia è abin mua phro, ai è bin mage shii hanyie è ahong mua ro. <sup>8</sup> Nathek nyie rek pha jine gu ne thieg; nathek shii blu ìujia um pha ji gu ne thieg; nathek ne gu muyua shii luagieng chiih-è gu shii isiie rek. Gu ne nathek ibi shii, hanyie jia è abin mua pha habin hong phi ro. <sup>9</sup> Yoi bo! Sakhathong ro ibrog, hanyie è ithek ne Jewthek rone biidiie yao jishii ithek asi pho, gu ne ithek shii wuii yi srane nathek lai shii bam yi pha ro. Gu ne nathek shii miie rone ithek ne zab thieg ruii phro. <sup>10</sup> Nyieliieshii nathek shii zud bo è yao pha guro muyung shii rek, sohnyiak pha zab brantheek shii chai pha diig ishak thog ruii pha ji è gu ne nathek shii de ragia rek ruii phro. <sup>11</sup> Gu ne kthiie wuii ruii pha ro. Nathek shii nyie um pha ji ragia ruii bo, ji è nathek ro yang pha lasen shii ne ithek shii ariao yi rabo. <sup>12</sup> Gu ne hanyie è yangpho shii ne guro Hamangkhung-aphuii ro Jewthek misiahò pha sarongthek rab ruii phro, chiih-è ithek ne khuchungde athoh phro. Gu ne ithek lakhung shii guro Hamangkhung-aphuii ro ibeng zey pha ro chiih-è nyie yi guro Hamangkhung-aphuii pha hamangkhung re-è buzam wuii ruii pha, iwo Jerusalem, guro Hamangkhung-aphuii pha rajan beng zey pha ro. Gu ne ithek lakhung shii guro iwo ibeng de zey ruii phro.

<sup>13</sup> “Nathek shii khothtek um arone, chiihphado, Luruaktek è charchtek shii nyie yao pha ji yoi bo!

### *Laodisia shii mua*

<sup>14</sup> “Laodisia hà, charch pha hamangkhliie shii zey bo:

“Hì ne Amen re-è mua ro, hanyie ne Hamangkhung-aphuii è zen phi zab\* ro igobi ro chiih-è jine isiie nane izai khagi de ro. <sup>15</sup> Nathek è rek pha jine gu ne thieg; gu ne thieg nathek ne chaiy de asi lua de asi ro. Gu ne nathek yi chaiy magunde lua magunde jia rey bone yang ro! <sup>16</sup> Jishii nyieliieshii nathek ne lua chieg de asi chaiy de asi pha laleb lua ro, gu ne nathek shii guro sem è cho muui phro! <sup>17</sup> Nathek ne yao, ‘gu chid pha jine gu shii um, gu ne bajo bukho nane gu ne nyie de achid sha ro.’ Jishii nathek ne khama duhug nane bushunma-èogpho rone athieg ro! Nathek ne dusho, ikhilen, chiih-è miegthi ro. <sup>18</sup> Gu nathek shii yua, chiihphado, bukho rey yi pha igang san ne gu re-è phev bo. Guui pha Yung imo de phev srane nawaithek ro biwo ikhilen shii guui bo. Nawaithek mieg shii shund pha mah de phev bo, ji è nathek ne riig mua. <sup>19</sup> Gu è hanyie shii miie pha ji shii ne giung ne lago phi pha ro. Wiengbo, chiihphado, chiih-è nawaithek layogthek è khid bo. <sup>20</sup> Yoi bo! Gu ne habin shii riu srane chog pha ro; hanyie jia è gu goh yoi srane habin hong arone, gu ne ai hò iliing wuii srane ai rog shii chie pha ro, chiih-è ai ne gu rog shii chie ruii phro. <sup>21</sup> Gu ne yangthek shii mua srane gu è Aphuii airo biang shii dug pha duiine, hanyie è yang pha ji mua pho shii ne gu biang hà gu moe shii dug pha rangsua phi ruii phro.

**3:7** 3:7: Aij 22:22; Job 12:14

**3:9** 3:9: Aij 49:23; 60:14; Aij 43:4

**3:12** 3:12: Dng 21:2; Aij 62:2;

65:15 **3:14** 3:14: Khua 8:22

\* **3:14** 3:14: zen; dinne kho

**3:19** 3:19: Khua 3:12; Heb 12:6



22 “Nathek shii khohthek um arone, chiihphado, Ragung è charch shii nyie yao pha ji yoi bo!”

## 4

### *Hamangkhung hà misiasia*

1 Ji è rekdang pha ji shii yoh dong ne hamangkhung pha habin hong pha doh.

Chiih-è goh yi thu-ung duiine, yoi, pha ibi shii gu shii yao, “Thawuii bo ichiih, chiih-è hipa iidoh shii nyie rey ruii pha ji nathek riig yi pha ro.”<sup>2</sup> Khthiie gu shii Luruak è phrai muui. Thiisa hamangkhung hà biang shii bran jia dug ne um.<sup>3</sup> Airo mizia yi khlieng nane kharnelian pha igong lubaothek duiine chuang pha doh, chiih-è biang shii ne zab shan ne chiigmakhuang ne igong lubao pha emerald duiine mia.<sup>4</sup> Biang shii ne gai ichiignawi biangthek de shan ne um, ji shii yi ichiignawi dukhothek imo guui ne san pha ragothek khak ne dug ne um.<sup>5</sup> Biang è haliao khliingthek, bliakthek thog, ne hakhliing chiie. Biang pha ibi shii miley muchuangthek chuang pha ji hang ne um, nyie jine Hamangkhung-aphuii ro miley ragungthek ro.

<sup>6</sup> Biang pha ibi shii sasia pha khamuii duiine doh, jine sang khrysthal lubao duiine mia ro.

Biang pha zab ithua shii ne isieng miseypho wi ibi iidoh imieg um pha è cheg muui.<sup>7</sup> Igobi pha ji yi bargi duiine mia; din pha ji yi suwuiiphuii duiine mia; uomchieng pha ji yi bran mizia duiine mizia um; chiih-è wichieng pha ji yi biichiing khey pha duiine mia.<sup>8</sup> Zab isieng miseyphothek wi ne jijia shii iyigthek riig um, chiih-è ithek ne iliing nane fuang shii zab imieg ley um ro. Inai nane habiu ithek ne athodang pha ibai bai:

“So, so, so, ne Ithong Hamangkhung-aphuii Bohblu ro,

hanyie ne umjong, hanyie ne um, hanyie yi wuiiramuii pha ji ro.”

<sup>9</sup> Isieng wi ji è hanyie yi biang hà dug pha jia hanyie yi idang nane idang sieng pha ji shii, biisiie nane ilab chiih-è lasothek pha ibai bai muui ro. Ithek è rek mage shii,<sup>10</sup> ichiignawi dukhothek yi hanyie è biang shii dug muui pha moe shii chiih mage, chiih-è hanyie ne idang nane idang sieng pha aishii sia. Ithek è awaithek ro ragothek yi biang moe fen srane yao:

<sup>11</sup> “Gathek ro Ithong nane Hamangkhung-aphuii! Nane biisiie,

ilab, nane blu ne mua spho chak ro.

Chiih-è nane zab pha manathek shii rab,

chiih-è na è yang pha ji è ithek shii ne rey ne sieng yi pha ne ithek shii phi.”

## 5

### *Nim nane shiishaiduii*

1 Biang shii hanyie dug pha jia airo phazoi wad shii nim ne um pha doh; jine nyimanyi ithuathek zey pha ji re-è chaig srane chebthek miley rog shii nab rek ne ruii.<sup>2</sup> Chiih-è gu è hamangkhliie riichaiboh jia doh, hanyie ne ziak ne yao, “Hanyie ne nabthek shii chui ne nim pha ji shii hong mua spho lei?”<sup>3</sup> Jishii hamangkhung hà dinne sohnyiak dinne sohjambling pha bucho hà ne<sup>\*</sup> hanyie nim shii hong ne iliing riig mua spho jia de oi ro.<sup>4</sup> Gu ne

4:2 4:2,3; Ezkh 1:26-28; 10:1    4:5 4:5; Mul 19:16; Dng 8:5; 11:19; 16:18; Ezkh 1:13; Dng 1:4; Zekh 4:2    4:6 4:6; Ezkh 1:22    4:6 4:6,7; Ezkh 1:5-10; 10:14    4:8 4:8; Ezkh 1:18; 10:12; Aij 6:2,3  
5:1 5:1; Ezkh 2:9,10; Aij 29:11    \* 5:3 5:3; Sohjambling pha luii hà: Bi-iy ro sohjambling (riig 1:18)

khiwegkho ne chomage nyieliieshii nim pha ji shii hong ne iliing hà riig mua spho hanyie jia shii de adoh ro. <sup>5</sup> Chiihphado dukhothek pha è jia yi gu shii yao, “Acho rabo. Riig bo! Judah pha jad pha Bargi, Dawid ro boh riing, è ne yang pha ji shii muajong ro, chiih-è ai ne miley nabthek shii chui ne nim shii hong mua ruii phro.”

<sup>6</sup> Chiihphado Isieng miseypho nane dukhothek wi è shan pha biang duchoi shii shiishaiduii yi riu gu è doh. Shiishaiduii ne ua muui pha duiine doh. Aishii iriangthek miley nane imieg miley um, nyie jine Hamangkhung-aphuii ro miley ragungthek ro nyie jine zab pha sohnyiak hà thojong pha ji ro. <sup>7</sup> Shiishaiduii wuii srane hanyie yi biang shii dug pha jia airo phazoi wad re-è nim pha ji yiemuii. <sup>8</sup> Ai è rek shii, isieng miseypho wi nane ichiignawi dukhothek ne shiishaiduii ibi shii lakhiung niing. Zab shii ben nane san pha shiikhiiakhamthek shii bisi chab srane, nyie jine Hamangkhung-aphuii ro branthek misiathek ro. <sup>9</sup> Ithek ne iwo ibai bai: “Nane nim shii yie ne nabthek shii hong mua spho ro.

Chiih-è na shii ne uamuii,  
chiih-è naro iy pha khlem re-è zab pha iiriing, nyuakthek  
zab pha branthek shii chiih-è jad shii ne Hamangkhung-aphuii pha  
pgeg phi ro.

<sup>10</sup> Nane gathek ro Hamangkhung-aphuii ro blia rek pha ithek shii sajathua phabithek pha rabjong ro.

Chiih-è ithek ne sohnyiak shii bokhoh ruii phro.”

<sup>11</sup> Din ne gu è riig, chiih-è gu è hamangkhliiethék shii yoi, ithek ne atham mua pha um ro! ithek ne biang shii isieng miseypho, chiih-è dukhothek shan ne riu, <sup>12</sup> chiih-è goh gang re-è bai:

“shiishaiduii hanyie shii ua muui pha ji shii ne blu, nuruii, khani nane chuh,  
ilab, biisiie, chiih-è chiong mua spho ro!”

<sup>13</sup> Chiih-è hamangkhung pha zab zen, sohnyiak lakhung, sohjambling pha bucho, chiih-è khamuii hà—hamangnyiak pha zab shii chai um pha—thek ne bai ramuii pha jine gu è yoi:

“Hanyie biang shii dug pha aishii chiih-è shiishaiduii shii ne,  
chiong nane ilab, biisiie ne idang  
nane idang pha ro!”

<sup>14</sup> Isieng ibeymuthung wi è chang, “Amen!” Chiih-è dukhothek lakhiung niing srane misiasia.

## 6

### *Nabthek*

<sup>1</sup> Chiihphado shiishaiduii yi chui srane miley pha ji re-è igobi pha chebthek yi hong pha doh, chiih-è isieng ibeymuthung pha wi è jia yi hakhiing duiine goh rone “Thawuii bo è yao!” <sup>2</sup> Gu è riig, chiih-è thiisa ne imo sthuh um. Inpho ne riig han muui ro, chiih-è aishii ne rago phi. Ai ne yangpho duiine yang pha wuii dun. <sup>3</sup> Chiihphado shiishaiduii ji è din pha cheb ji shii hong mage; chiih-è din pha isieng miseypho è yao pha ji gu è yoi, “Thawuii bo!” <sup>4</sup> Gai sthuh shaig jia wuiithok. Ji pha inpho shii sohnyiak shii mak yie pha blu phijong, ji è bran awaithek chung ne ua rai muui ro. Aishii phiang khamriie jia phijong ro.

<sup>5</sup> Chiihphado shii shiishaiduii è uomchieng pha cheb shii hong mage; chiih-è uomchieng pha Isieng ibeymuthung è yao pha ji gu yoi, “Thawuii bo!” Gu è riig shii, chiih-è thiisa hàne isiie sthuh um. Inpho ai wad shii ne idub shiiriethék um ro. <sup>6</sup> Gu è yoi shii Isieng ibeymuthung wi duchoi re-è goh ro, yao, “Inai jia pha riinangthék ne phiughàb briie jia ro, chiih-è briie uom barley ne inai jia pha riinangthék ro. Jishii sumaro imuiithek nane phuiithek raig ne amua rabo!”

<sup>7</sup> Chiihphado shii shiishaiduii è wichieng pha cheb shii hong mage; chiih-è wichieng pha Isieng ibeymuthung è gu è yoi, “Thawuii bo!” <sup>8</sup> Gu è riig shii, thiisa ne ijoj sthuh jia um. Inpho pha ibeng ne Iy ro, chiih-è Thumluii\* ne airo nui iidoh luagieng muui ro. Ithék shii ne mak re-è ua pha, diigchiao, miirrie nane jabiing pha ibeythék è ua yi pha zab sohnyiak wirang rek pha ji è jiarang lakhung shii riichai phijong ro.

<sup>9</sup> Chiihphado shii shiishaiduii re-è guichieng pha cheb shii hong mage. Hanyie è Hamangkhang-aphuii ro miyaogam yao ne isiie re-è khagi rek pho shii ua muui pha luruakthék ne sraibao iliing hà um pha gu è riig. <sup>10</sup> Ithék goh boh è ziaik, “Bohblu Ithong, so nane izai! Gathek shii ua pha Chiang è ithek sohnyiak pha bran shii chua ne lago phi pha ne khama chia ba phlei?”

<sup>11</sup> Ithék zab shii ne imo yung phi, chiih-è ithek shii ua pha duine nathek ro gai khiaothék nane migiphothék shii ua pha nathek ro izey ji azab sapho shii ne iujia thung ne rai bone yao.

<sup>12</sup> Chiih-è gu riig shii shiishaiduii è riigchieng pha cheb shii hong mage. Thiisa hàne buii sajiib sham, chiih-è Hasiang yi awie pha isiie yung duine rey dun, chiih-è habie yi ifai duine ishaig rey dun. <sup>13</sup> Dadiang yi hasam boh sam ne nai mage shii hingmuui è iphem isi chiih pha duine dadiang ne sohnyiak shii chuh dun ro. <sup>14</sup> Hamang ne nim shii nim pha duine san dun, chiih-è zab pha phiing nane gachung ne awaithek ithua è dun dun. <sup>15</sup> Chiihphado zab pha sohnyiak pha sajathek, bokhothék nane arming pha dumuiithek, bukho nane bohblu, chiih-è gai branthék, khiao nane ichad awaithek shii wog hà nane phiingthék pha lubao iliing hà ug dun. <sup>16</sup> Ithék è phiingthék nane sohthék ho ne, “hanyie jia yi biang hà dug pha ji ro mieg re-è nane shiishaiduii ro lijieg pha ji ug pha gathek lakhung shii chiih mage bo! <sup>17</sup> Ithék ro lijieg pha buii inai ne ichiih shii um ro, chiih-è hanyie è aishii suang rek ne riu mage phlei?”

## 7

### 144,000 Israel pha bran

<sup>1</sup> Ji pha iidoh shii hamangkhlithék wi yi sohnyiak pha iring hà riu pha doh, nyieliieshii hasam yi sohnyiak dinne khamuii dinne hingmuui shii hasam asam yi pha hasamthék wi iidoh shii khoh. <sup>2</sup> Chiih-è gu riig shii gai hamangkhliei yi isieng Hamangkhang-aphuii ro nab rog shii bichiu è wuii ruii pha doh. Hamangkhang-aphuii è hanyie shii sohnyiak nane khamuiiboh mua yi pha riichai phi ne ruii pha hamangkhlithék wi shii ai è goh gang è ho. <sup>3</sup> Hamangkhliei è yao, gathek è gathek ro Hamangkhang-aphuii ro khiaothék rone ithek khuwuangthék nab ne cheb arek sapho shii

**6:5** 6:5: Zekh 6:2,6    **6:8** 6:8: Ezkh 14:21    \* **6:8** 6:8: Khijiai: Iypho ro sohjambling (riig 1:18)  
**6:12** 6:12: Dng 11:13; 16:18; Aij 13:10; Jol 2:10,31; 3:15; Mth 24:29; Mrg 13:24,25; Lug 21:25    **6:13**  
6:13,14: Aij 34:4    **6:14** 6:14: Dng 16:20    **6:15** 6:15: Aij 2:19,21    **6:16** 6:16: Hos 10:8; Lug 23:30  
**6:17** 6:17: Jol 2:11; Mal 3:2    **7:1** 7:1: Jeri 49:36; Dan 7:2; Zekh 6:5    **7:3** 7:3: Ezkh 9:4,6

ne, “Sohnyiak, khamuiiboh, dinne hingmuithek shii amua bi rabo.” <sup>4</sup> Chiih-è gu shii yao pha brantheek hanyie shii Hamangkhung-aphuii cheb è ithek khrug shii nab pha jine 144,000 hì thek ro. Itheek ne Israel pha snanyi jadtheek è ro, <sup>5-8</sup> zab pha jad re-è ne itham snanyi ro: Juda, Reuben, Gad, Asher, Naphtali, Manase, Simeon, Lewi, Isakkhar, Zebulun, Joseph, chiih-è Benjamin.

### *Boh iphiing*

<sup>9</sup> Ji pha iidoh shii gu è riig, chiih-è thiisa ne bajo iphiing ro—Hanyie è de zab pha bran shii atham mua ro! Itheek ne zab pha iiriing, jad, zab pha soh, nane nyuaktheek pha ro, chiih-è ithek ne biang nane shiishaiduii moe shii riu ne, yungtheek imo guii ne ithek wadtheek shii chiong idiphaktheek khoh ro. <sup>10</sup> Itheek è goh gang è yao: “Giawo ne hanyie yi biang hà dug pha gatheek ro Hamangkhung-aphuii nane, shiishaiduii è thog ro!” <sup>11</sup> Zab pha Hamangkhliiethiek, dukhotheek, chiih-è wi Isieng miseypho ne biang shii shan ne riu. Chiihphado ithek ne biang pha ibi awatheek mizia yi miemua srane Hamangkhung-aphuii shii misiasia ne, <sup>12</sup> yao, “Amen! Chiong, biisiie, khani, lasophi, ilab, blu, nane bajoboh ne Idang pha Idang gatheek Hamangkhung-aphuii pha rey ro! Amen!”

<sup>13</sup> Dukhotheek jia è gu shii sai, “yung imotheek guii pha brantheek ne hanyie lei, chiih-è ithek ne khi è wuii phlei?”

<sup>14</sup> Gu è chang, masdo. “Gu ne athieg ro,” nawai ne thieg.

Ai è gu shii yao, “Hi ne hanyie è bajo buii diigchiao shii re-è ragia rey pha bran ro. Itheek ne awatheek yung yi shiishaiduii ifai cham srane imo rabjong ro.” <sup>15</sup> Ji pha Chiang è ithek ne Hamangkhung-aphuii ro biang pha ibi riu srane airo Jewtheek misiahò shii hanai habiu blia rek ro. Hanyie biang shii dug pha ji ai ne awai um pha ji re-è ithek ragia rey ruii phro. <sup>16</sup> Itheek ne dinne khuchung de chi-iy a-iy dinne gahang-ahang phro; chiih-è hasiang è de chiih-è ichieg phiang pha ji de ithek shii asid mua phro, <sup>17</sup> Nyieliieshii shiishaiduii hanyie yi biang pha duchoi shii um pha ji ne, ithek ro brogpho rey ruii ne, ithek shii chai phi pha kho gasuang shii noh ne lua ruii phro. Chiih-è Hamangkhung-aphuii è ithek ro mieg è miegkho sud ruii phro.

## 8

### *Miley nab*

<sup>1</sup> Shiishaiduii è milechieng pha nab ji chui ne hong magey shii, thiisa hà hamangkhung ne ishak jia pha re-è khuyo ishak duiine aro pha rey dun. <sup>2</sup> Chiihphado hanyie yi Hamangkhung-aphuii moe shii riu pha miley hamangkhliiethiek shii doh, chiih-è ithek shii ne miley thu-ungtheek phimuii.

<sup>3</sup> Gai hamangkhliie, hanyie shii san pha bisi zan pha mana um pha ji ne, wuiithok srane sraibao shii riu mage. Aishii ne bisi bajo phi srane san pha sraibao shii zid ne biang ibi shii riu ne Hamangkhung-aphuii brantheek ro misiathek shii chodo yi.

<sup>4</sup> Hamangkhung-aphuii moe shii riu pha hamangkhliie wadtheek re-è bisi pha mukham hang pha ji nane Hamangkhung-aphuii shii misia pha bran ro misia nane lakhung kham dun.

<sup>5</sup> Chiihphado hamangkhlhie è zang pha bisi jine yie, ne sraibao pha bai zan ne, chiih-è sohnyiak lakhung shii fen muii. Thiisa hàne hakhliing pha graingurung nane hakhliing, bliak pha ichuang, chiih-è sajiib sam.

### *Thu-ungthek*

<sup>6</sup> Chiihphado miley hamangkhlhieethek yi miley thu-ungthek ithek shii thud pha saro.

<sup>7</sup> Igobi pha hamangkhlhie è awairo thu-ung thud. Thumlui nane bai, Ifai rog shii lao ne, sohnyiak shii shund mage. Uomrang pha sohnyiak re-è jiarang ne hùb dun, chiih-è uomrang pha hingmuithek nane saing rey pha irab re-è ne jiarang ne hùb dun.

<sup>8</sup> Chiihphado dinpha hamangkhlhie è awairo thu-ung thud mage. Nyie mana yi giu phiing duiine hùb pha ji shii ne khamuii shii fen mage. Uomrang pha khamuii re-è ne jiarang pha khamuii ne ifai hà lai dun, <sup>9</sup> Khamuiiboh pha uomrang isieng miseypho re-è jiarang ne iy dun, chiih-è uomrang pha runthek re-è jiarang ne mua dun.

<sup>10</sup> Chiihphado uomchiieng pha hamangkhlhie è awairo thu-ung thud mage. Boh dadiang yi muchuang duiine hang ne, hamang re-è chiih ne uomrang pha khobothek re-è jiarang ne khaduii lakhung shii chiih dun.

<sup>11</sup> (Dadiang ibeng ne “Khiwegkho ro.”) Uomrang pha kho re-è jiarang ne khoh hà laidun, chiih-è kho niing pha ji è bajo bran iy dun, nyielieshii hine ikhow laidun.

<sup>12</sup> Chiihphado wichiieng pha hamangkhlhie è awairo thu-ung thud mage. Uomrang pha hasiang re-è, chiih-è uomrang pha habie re-è, chiih-è uomrang pha dadiangthek re-è jiarang shiine diig thog dun, ji è uomrang pha khlieng ithek ro re-è jiarang ro ichuang ne san dun; thiisa hàne uomrang pha inai nane uomrang pha habiu re-è jiarang ne ichuang oi pha rey dun.

<sup>13</sup> Chiihphado gu è riig, chiih-è hasam giu hà khey pha biichiing è gang goh è yao pha yoi, “Awiedang ishak! Awiedang ishak! Gai hamangkhlhieethek um è thud ruii pha thu-ung ji è dinne wuii ruii shii zab hanyie sohnyiak shii rai pho ne khama diig rey ruii phro!”

## 9

<sup>1</sup> Chiihphado guiichieng pha hamangkhlhie è awairo thu-ung thud mage. Gu è dadiang yi sohnyiak hà chiih pha doh, chiih-è ji shii bajo jam ihung pha ziuwad phi. <sup>2</sup> Dadiang è bajo jam ihung shii hong, chiih-è mukham yi boh bai fu pha ji è khia pha duiine, mukham yi jihà kham; hasiang ichuang nane hasam ne bajo jam ihung pha mukham ji è igiia rey dun. <sup>3</sup> Muroma yi mukham è sohnyiak lakhung shii chiih, chiih-è ithek shii ne ragungphiethek shii um muii pha ò ichua pha blu phi. <sup>4</sup> Ithek shii ne saingthek, dinne hingmuithek dinne nyie misiengthek shii de amua yi rabo ne yao; ithek ne bran hanyie shii Hamangkhung-aphuii ro nab pha cheb yi ithek khrugthek lakhung shii oi pho shii ne diig rek bie bo. <sup>5</sup> Muromathek ne ji pha bran shii a-ua yi, jishii habie guii ithek shii diig phi yi. Ithek shii diig rek ne riie pha jine ragungphie è thak pha duiine riie pha ji ro. <sup>6</sup> Ji pha habie guii shii ithek

**8:5** 8:5: Lew 16:12; Ezkh 10:2; Mul 19:16; Dng 11:19; 16:18      **8:7** 8:7: Mul 9:23-25; Ezkh 38:22

**8:10** 8:10: Aij 14:12      **8:11** 8:11: Jeri 9:15      **8:12** 8:12: Aij 13:10; Ezkh 32:7; Jol 2:10,31; 3:15

\* **9:1** 9:1: Jam ihung: Bajo jam ihung pha sohnyiak hà sakhathong shii iidohe pha lago aphi sapho shii thiisa hà phatgeg hà chab muii ro.      **9:2** 9:2: Igo 19:28      **9:3** 9:3: Mul 10:12-15      **9:4** 9:4: Ezkh 9:4      **9:6** 9:6: Job 3:21; Jeri 8:3

ne rad ne iy pha sow ruii, jishii adoh ruii phro; ithek ne iy pha yang ruii phro, jishii iy pha jine ithek è khey maruii phro.

<sup>7</sup> Muromathek ne suthuiithek yi mak shii saro pha duine doh ro; ithek ro khrugthek shii ne san pha ragothek um pha mia, chiih-è ithek ro miziathek ne tharoththamang ro miziathek mia. <sup>8</sup> Ithek ro khaziang ne ho-amuiithek ro khaziang duine mia, ithek ro shinying ne bargithek shinying mia ro. <sup>9</sup> Ithek ro lubuthothek ne shiie pha khugthek è chiieg pha duine doh, chiih-è gow yi ithek ro iyigthek è bajo sthuh gariie yi mak shii rone ran pha duine ro. <sup>10</sup> Ithek shii inyuithek um chiih-è ragungphie ro iyig duine ro, chiih-è hine ithek ro inyuithek rog shii ithek shii ne brantheke shii habie guii diig phi pha blu um ro. <sup>11</sup> Ithek lakhung shii saja khoh pha ne jia um ro, hanyie jine bajo jam ihung pha ilkhi hamangkhlhie ro. Airo ibeng Hebriu shii ne Abadon; Grekh ibeng shii ne Apholion (Miyaosiu ne Srobrophothek ro).

<sup>12</sup> Igobi pha bajo diig ne jong sha ro; ji pha iidoh shii bajo diigthek nyi ne wuii ba ruii ro.

<sup>13</sup> Chiihphado riigchieng pha hamangkhlhie è awairo thu-ung thud mage. Gu è goh yi Hamangkhung-aphuii ibi shii riu pha san sraibao ijiuthek wi è ro pha yoi. <sup>14</sup> Goh è riigchieng pha hamangkhlhie shii yao, “Hanyie hamangkhlhie thek wi shii Euphrathes khoboh shii phang muui pha ji shii thoh phi bo!” <sup>15</sup> Hamangkhlhie thek wi shii ne sey ge; chiih-è ji pha ishak shii ji pha inai shii ji pha habie shii ji pha idam shii zab pha uomrang tharoththamang shii ua pha sarojong. <sup>16</sup> Inpho pha siphahithek khama um pha jine gu shii yao: hine wieng nyi million ro. <sup>17</sup> Gu ibang shii gu ithek ro sthuhthek nane ithek ro inphothek shii doh: Ithek shii ne bai duine ishaig khugthek um, iphi igong lubao duine, chiih-è ijoi barud duine ro. Sthuhthek khrug ne bargithek khrug duine ro, chiih-è ithek ro semthek è ne bai, miikham, nane barud khia khlei. <sup>18</sup> Uomrang pha tharoththamang re-è jiarang shii ne awie pha muathek uom ji è bai, miikham, nane barud ne sthuhthek semthek è khia khlei ne ua muui. <sup>19</sup> Chiih-è sthuhthek ro blu ne ithek semthek shii nane ithek inyuithek shii de um. Ithek ro inyui khrugthek um pha phamthek duine ro, chiih-è ithek è ithek shii khoh srane brantheke shii diig phi.

<sup>20</sup> Khey pha tharoththamang, zab hanyie shii ji pha awie pha muathek è a-ua ba pho ne, ithek awaithek è rab pha ji è akhid ro. Ithek ne Ibuiithek shii sia pha ne agak ro, chiih-è san, luman, lubao, nane hing, hanyie yi ariig mua, ayoi mua, dinne alua mua pha jangbangthek shii misiasia pha de agak ro. <sup>21</sup> Ithek ne awaithek ro sgothek re-è, awaithek ro jadu re-è, awie pha siulao re-è, dinne awaithek ro mugo lubu akhid ro.

## 10

### *Hamangkhlhie nane ididuii nim*

<sup>1</sup> Chiihphado gune riichaiboh pha hamangkhlhie yi hamangkhung re-è thazam wuii ruii pha doh. Aishii ne sakhamiing è jiang srane chiig-makhuang re-è ai khrug shii jiang; airo mizia ne hasiang duine ro, chiih-è airo laithek ne bai pha sarong duine ro. <sup>2</sup> Ai wad shii ne hong pha nim lu um. Airo phazoi lai yi khamuii shii ruii chiih-è airo phawig lai yi nyiak shii ruii, <sup>3</sup> chiih-è gang è ziak srane bargithek miikhriie duine ro. Iidoh shii ai è

ho mage ne, miley hakhliingthek yi khliing pha rog shii chang. <sup>4</sup> Ithek è yao ched shii, gu ne zey pha rek. Jimagunde hamangkhung è goh yao pha gu è yoi, “Miley hakhliingthek è nyie yao pha jine ug ne ruui bo; azey rabo!”

<sup>5</sup> Chiihphado hamangkhliie yi khamuii shii nane nyiak shii riu ne airo phazoi wad yi hamangkhung hà phia pha gu è doh <sup>6</sup> chiih-è Hamangkhung-aphuii pha ibeng shii surua thak, hanyie yi idang nane idang sieng, chiih-è hanyie yi hamangkhung, sohnyiak, nane khamuii chiih-è zabthek shii zen. Hamangkhliie è yao, “Achia sha ruui phro! <sup>7</sup> Jimagunde milechiieng hamangkhliie è awai thu-ung thud ruui shii, chiihphado ai è awairo khiao chaigthek shii yao pha duine Hamangkhung-aphuii ne awairo ug ne phak pha ji shii ne zab rek ruui phro.” <sup>8</sup> Chiihphado goh yi hamangkhung re-è gu shii yao din pha yoi, yao, “Wuii srane hanyie yi khamuii nane nyiak shii riu pha hamangkhliie wad shii hong pha nim ji shii yie wuii bo.”

<sup>9</sup> Gu hamangkhliie shii wuii srane ji pha nim ji gu shii phi bone aishii lia. Ai è gu shii yao, “Yie srane chiemuii bo; hine naro lui shii chiieng rey ruui phro, jishii naro sem shii ne chimud duine phieng rey ruui phro.”

<sup>10</sup> Gu è ididuii nim ji yie srane chiemuii chiih-è guo sem shii chimud duine rem rey dun. Jishii iidoh gu min muii, jine gu lui shii chiieng redun.

<sup>11</sup> Chiihphado gu shii ne yaodun, “Bajo sohthek, iiringthek, nyuakthek nane sajathek shii din ne na ne Hamangkhung-aphuii mua chiang shii yao chid.”

## 11

### *Nyi khagithek*

<sup>1</sup> Chiihphado gu shii miichang phi pha jine chua pha shiie duine mia, chiih-è yao “Wuii srane Hamangkhung-aphuii ro Jewthek misiahò nane sraibao ji chua bo, chiih-è hanyie yi ji pha misiahò shii misiapiho shii sasab rek mage bo. <sup>2</sup> Jishii fuang pha sibiangthek shii sasab arek rabo, nyieliieshii ithek shii ne migi-arekpho shii phijong ro, hanyie shii ne So Rajan hà habiethek shawi-è nyi habie lai luui shii dia ruui phro. <sup>3</sup> Gu ne guro khagi yi thuloyung guui pha nyi shii ren ruui phro, chiih-è ithek ji pha itham jia è wiengnyi è sariig inaithek iliing shii Hamangkhung-aphuii ro mua yao ruui phro.” <sup>4</sup> Khagipho nyi jine sumaro hingmuithek nyi nane muchuangthek nyi ro, jithek ne sohnyiak pha Ithong ibi shii riu ro. <sup>5</sup> Hanyiejia è de ithek shii saduii thoh yi pha bidiang arone, ithek ro semthek re-è bai khia srane makthek shii srobro rek ruui phro; chiih-è ji duine hanyie magunde ithek shii saduii thoh yi pha bidiang pho ne ua ruui phro. <sup>6</sup> Hamangkhung-aphuii ro mua yao pha ishak shii hamang shii haphie aphe yi pha bin pha riichai de ithek shii um ro. Ithek shii ne noi pha kho lakhung shii ifai hà khid muii yi pha riichai de um ro; ithek shii awaithek è khama yang pha ji shii nyamachiieng zab ichua pha mua è sohnyiak shii zuang pha riichai de um ro.

<sup>7</sup> Ithek yi ithek ro mua ji yao ched mage shii, buii ibeymuthung jine bajo jam ihiung è ithek suang shii mak rek pha wuii ruui phro. Ai ne ithek shii yang srane ithek shii ne ua muii, <sup>8</sup> chiih-è ithek ro Ithong khi pha boh rajan pha lumuii hà ziin dun pha jihà ithek ro siu sud ruui phro. Ji pha rajan beng ne òa ne yao pha jine Sodom nane Egyph ro. <sup>9</sup> Branthek yi zab pha sohthek,

jadthek, nyuakthek, nane iiriingthek re-è ithek ro siuthek da-uom è khuyo inaithek riig srane ithek shii awieng yi phro. <sup>10</sup> Sohnyiak pha brantheek ne isa nyi iy pha ji shii ne sang ruii phro. Itheek ne sai srane awaithek chung lasenthek ren ruii phro, nyieliieshii ji pha chaigtheek nyi è sohnyiak shii brantheek shii bajo diig yie ro. <sup>11</sup> Iidoh shii da-uom re-è khuyo inai shii chai-phi pha misey yi Hamangkhung-aphuii è wuiithok srane ithek shii khuddun, chiih-è ithek riu mage shii; chiih-è zab hanyie è ithek shii riig pho ne rumdun. <sup>12</sup> Chiihphado chaigtheek nyi yi hamangkhung re-è ithek shii goh gang è yao pha yoi, “Thawuii bo!” Makphothek è ithek shii riig ramuii shii ithek shii hamangkhung hà sakhamiing è dun dun. <sup>13</sup> Ji pha ishak shii, thiihchiih ne awiedang pha sajiib sam ro, rajan suarang re-è jiarang ne mua dun ro, chiih-è itham miley brantheek ne ua muui ro. Thiichiih khe pha brantheek ne rum srane hamangkhung pha Hamangkhung-aphuii pha bajoboh shii chiong ro.

<sup>14</sup> Nyichiieng pha awie ne jong sha, jishii uomchiieng pha awie ne khthiie wuii ruii phro!

### *Milechiieng pha thu-ung*

<sup>15</sup> Chiihphado mileychiieng pha hamangkhliie re-è awairo thu-ung thud mage, chiih-è thiihchiih ne hamangkhung hà boh goh, è yao, “sohkhung shii khoh pha blu ne thuh gathek ro Ithong nane Masaiya airo rey dun ro, chiih-è ai ne idang nane idang khoh ruii phro!” <sup>16</sup> Chiihphado dukhothek ichiignawi hanyie yi Hamangkhung-aphuii moe biangtheek shii dug pho ne awaithek ro mizia buzam jiing srane Hamankhung-aphuii shii misiasia ne, <sup>17</sup> yao:

“Ithong Bohblu pha Hamangkhung-aphuii, jia hanyie um ne chiih-è hanyie ne umjong!”

Gathek ne na shii laso phi nyieliieshii na è naro bajoboh blu yie srane khoh pha jao!

<sup>18</sup> Migi arekpho shiine lijiig zandun ro, nyieliieshii lijiig pha naro ishak ne thog sha ro, iy shii chua pha ishak ne thog sha ro. Nawairo khiaothek chaigtheek,

chiih-è zab nawai bran shii, zab hanyie è na shii ilab rek boh nane iu mia pha ji shii lasen phi pha ishak thog sha ruii ro.

Hanyie è sohnyiak shii srob-ro rekpho shii ne srob-ro rek pha ishak thog sha ro!

<sup>19</sup> Hamangkhung-aphuii ro misiahò ne hamangkhung hà hongjong ro, chiih-è Shiinyie Japho ne thiisa hà doh ro. Chiihphado thiisa hàne haliao bliak ne hakhliing pha jiriak yie rone, sajiib sam ne la è haben chiih ro.

## 12

### *Hò-amuii nane hakhliingmuui*

<sup>1</sup> Chiihphado hamang hà boh nane bajoboh cheb agao mua pha jia doh. Thiisa hàne hò-amuii, hanyie yi hasiang guui srane hanyie shii ne ai lai iliiing shii habie um chiih-è ai khrug shii ne dadiangtheek snanyi pha rago um ro. <sup>2</sup> Ai ne khthiie ani giak bsa sha ro, chiih-è ani giak pha riie nane diig jine aishii choh yi.



<sup>3</sup> Gai agao mua pha cheb jia yi hamang è khia. Thiisa hane boh ishaig hakhliingmuii miley khrugthek rog chiih-è sua iriangthek um chiih-è airo zab pha miley khrugthek shii rago um ro. <sup>4</sup> Airo inyui re-è uomrang pha dadiangthek re-è jiarang hamang re-è ri srane ithek shii buzam sohnyiak hà fen muii. Ai yi hò-amuii ibi shii riu srane, airo ani ji kthiie giak dang shii chie pha rek. <sup>5</sup> Chiihphado ai è kthiie dufuii giak, hanyie ne zab sohthek shii shiiebang rog shii khoh ruii phro. Jimagunde ani shii ne riao srane Hamangkhung-aphuii nane airo biang hà noh dun. <sup>6</sup> Hò-amuii ne Hamangkhung-aphuii è aishii saro phi pha ithua bali hà yodun, thiisa hà aishii ne itham jia è wieng nyi sariig inaithek gayiig rek ruii phro.

<sup>7</sup> Chiihphado hamangkhung hane mak rey ro. Machael nane airo hamangkhliiethek ne hakhliingmuii shii mak rek hanyie de awairo hamangkhliiethek rog ithek shii iidoh mak rek; <sup>8</sup> jishii dragon shii yang srane, hakhliingmuii nane airo hamangkhliiethek shii ne hamangkhung hà arai yi ro. <sup>9</sup> Boh hakhliingmuii shii fen muii—Ji pha ihèg pham, Sakhathong rone ho, hanyie è zab pha sohjambling shii khinrin pha ji ro. Ai nane awairo zab hamangkhliiethek shii ne ai rog shii sohnyiak hà fen muii.

<sup>10</sup> Chiihphado hamangkhung re-è gang goh yao pha gu è yoi, “Thuh shii Hamangkhung-aphuii ro giawo ne wuiithok sha ro! Thuh shii Hamangkhung-aphuii è awai blu re-è Saja rone doh yi ro! Thuh airo Masaiya re-è ne airo riichai doh yi ro! Chiih-è hanyie jia yi gethek ro Hamangkhung-aphuii ibi shii riu ne gethek ro migiphothek shii inai nane habiu nin pho shii ne hamangkhung re-è fuang hà fen muii ro. <sup>11</sup> Itek ne shiishaiduii ro ifai nane ithek è nyie yao pha izai è aishii ne yang ge ro; chiih-è ithek ne chaithek de thoh yang ne nya iy pha saro muii. <sup>12</sup> Chiih-è ji è, hamangkhungthek nathek, chiih-è zab thiisa rai pha nathek ne lised bo! Jishii sohnyiak nane khamuii ne khama diig ro! Chiih-è sakhathong ne nathek hà wuiiramuii ro, chiih-è ai ne bajo lijeg rog shii ro, nyieliieshii ai ne thieg aishii ne iujia ishak khe sha bie ro.”

<sup>13</sup> Hakhliingmuii è aishii ne buzam sohnyiak hà fen pha ji than mage shii, ai è hanyie yi dufuii giak pha hò-amuii shii sow. <sup>14</sup> Aishii ne hakhliingmuii è luagieng pha ji shii ragia rek yi pha khi hà uom itham è khuyo gayiig rek pha ithua hà khey yi pha boh biichiing jia ro iyig nyi phi. <sup>15</sup> Chiih-è chiihphado aishii shau yi pha hakhliingmuii è airo sem re-è hò-amuii ro iidoh shii khokhed mage. <sup>16</sup> Jishii sohnyiak è hò-amuii shii nong phi; ji è hakhliingmuii sem è khia pha kho shii ne min muii. <sup>17</sup> Hakhliingmuii yi hò-amuii rog shii lijeg srane airo gai riingthek zab hanyie yi Hamangkhung-aphuii ro muyeng shii nuii pho nane Isu è dong yi pha izai shii migi rekpho shii suang mak rek pha wuii dun. <sup>18</sup> Chiih-è hakhliingmuii\* yi khamuiiring shii riu dun ro.

## 13

### *Bui ibeymuthungthek nyi*

<sup>1</sup> Chiihphado bui ibeymuthung yi khamuii re-è wuii ruii pha gu è doh. Ji ne sua iriangthek nane miley khrugthek um ro; zab jijia pha iriangthek

**12:3** 12:3: Dan 7:7    **12:4** 12:4: Dan 8:10    **12:5** 12:5: Aij 66:7; Chng 2:9    **12:7** 12:7: Dan 10:13,21; 12:1; Jud 9    **12:9** 12:9: Igo 3:1; Lug 10:18    **12:10** 12:10: Job 1:9-11; Zekh 3:1    **12:14** 12:14: Dan 7:25; 12:7    \* **12:18** 12:18: Chiih-è hakhliingmuii è riu; giak jigizey shii um Chiih-è gu riu, hìpha jigi jine nyie è gieng pha ji shii chodo bo.    **13:1** 13:1: Dan 7:3; Dng 17:3,7-12

shii rago um ro, chiih-è zab pha jiajia khrugthek shii Hamangkhung-aphuii shii makhak-riing pha ibeng um ro. <sup>2</sup> Buii ibeymuthung jine bachaing duine mia, chiih-è lai yi shumthek mia chiih-è sem yi bargi sem duine mia ro. Hakhliingmuii è awairo blu nane biang, chiih-è awairo boh riichai buii ibeymuthung shii phi muui. <sup>3</sup> Buii ibeymuthung ro khrug jia shii ne awie pha saduii thoh dun pha duine doh, jishii saduii jine gang ge. Zab pha sohnyiak ne anomuluii pha rey dun, chiih-è buii ibeymuthung rog shii luagieng dun ro. <sup>4</sup> Zab ne hakhliingmuii shii misiasia dun nyieliieshii ai è awairo riichai ne buii ibeymuthung shii phi muui. Ithek ne buii ibeymuthung shii de misiasia ne, yao, “Hanyie ne buii ibeymuthung mia lei? Hanyie è aishii gidieg mak rek mua mage phlei?”

<sup>5</sup> Buii ibeymuthung shii wiangwe yao yi srane Hamangkhung-aphuii shii makhak-riing rek yi, chiih-è riichai ne habie sawi nyi ne ai wad shii um yi pha phi muui. <sup>6</sup> Ji ne Hamangkhung-aphuii shii, ai beng shii, ai khi hà rai pha ithuathek shii chiih-è zab hanyie yi hamangkhung hà rai pho shii ne jao ne thamai ro. <sup>7</sup> Chiih-è Hamangkhung-aphuii bran gidieg shii mak rek ne ithek shii yang pha phijong ro, chiih-è zab pha jad, sothek, nyuak, nane iiriing lakhung shii riichai rek pha phijong ro. <sup>8</sup> Hanyie ro ibeng yi isieng jigigam shii sohjambling azen ba pha ibi shii zey ne, ua muui pha shiishaiduii ro rey pho asi bie pha zab sohnyiak shii rai pha branthek ne aishii misiasia.

<sup>9</sup> “Yoi bo, chiihphado, nathek shii khothek um arone! <sup>10</sup> Hanyie shii zum spho shii ne zum ruii phro; hanyie shii khamriie re-è ua spho ne khamriie re-è ua ruii phro. Jine Hamangkhung-aphuii ro branthek Chiang shii ne zud nane migi ji um chid ro.”

<sup>11</sup> Chiihphado gu gai buii ibeymuthung shii doh, hanyie ne sohnyiak re-è wuiithok ro. Jine shiishaiduii iriangthek duine nyi iriang um ro, chiih-è jine hakhliingmuii duine yao ro. <sup>12</sup> Ji è igobi pha buii ibeymuthung moe shii ai è airo boh riichai ji kho ro. Ji è sohnyiak nane zab hanyie jishii rai pho shii de saduii gangjong pha igobi pha buii ibeymuthung shii misiasia yie pha bangchiie rek. <sup>13</sup> Nyichiieng pha buii ibeymuthung è boh buangthek rek; jine zab ro mieg moe shii ai è hamangkhung re-è bai shii sohnyiak hà wuii yi ro. <sup>14</sup> Chiih-è buangthek ne igobi pha buii ibeymuthung moe shii rek srane ai è sohnyiak shii rai pha zab branthek shii khinrin rek. Buii ibeymuthung chiih-è khamriie re-è saduii rek muui pha jine thuh de isieng ro ai beng shii ilab rek pha ibeymuthung è ithek shii jangbang rab bone yung ro. <sup>15</sup> Nyichiieng pha buii ibeymuthung è igobi pha buii ibeymuthung pha jangbang shii misey phi ne yao, ji è jangbang yao mua chiih-è hanyie è aishii misiasia asia pho shii ua muui. <sup>16</sup> Buii ibeymuthung è zab lu nane boh, bukho nane dusho, khiao nane ichad bran shii ithek ro phazoi wadthek nane khuwuangthek shii cheb rab pha bangchiie rek. <sup>17</sup> Hanyieja è de buii ibeymuthung beng chiih-è izey ai beng rey pha cheb oi pho ne apheg mua aliu mua phro.

<sup>18</sup> Hi ne khani pha mugak ro. Hanyie idpho ne ji pha buii ibeymuthung ro izey pha miyaosiu shii nyayao mua, nyieliieshii izey jine tharohthamang ro beng rey ro. Ji pha izey ne 666 ro.

## 14

### *Shiishaiduii nane awai ro branthek*

<sup>1</sup> Chiihphado thiisa gu è riig shii, thiichihih Zion Phiiing hàne shiishaidui riu ne um; chiih-è ai rog shii brantheek 144,000 hanyie yi awaithek gadongtheek shii airo ibeng nane airo Aphuii ro ibeng zey ne um ro. <sup>2</sup> Chiih-è hamangkhung re-è goh boh yi khasuang muro duine chiih-è gang hakhliing è khliing pha duine roh pha gu è yoi. Hi ne thiibiingkhinkhepphothek è awaithek ro benthek khuang pha duine roh ro. <sup>3</sup> 144,000 brantheek yi biang shii, Isieng misephothek wi, chiih-è dukhothek yi ibi shii riu; ithek ne ithek è nyie dab mua bie pha iwo ibai bai. Zab tharohthamang jad re-è hanyie shii iruii phi ne ragia ruii pha jine ithek bie ro. <sup>4</sup> Itheek ne hò-amuii rog shii amen pha awaithek shii igang ruii ro; ithek ne gangtheek ro. Itheek ne shiishaidui ai khi hà wuii pha jihà luagieng ro. Itheek shii ne ikhe tharohthamang jad re-è iruii phi ne ragia rey yi, chiih-è igobi Hamangkhung-aphuii nane shiishaiduii shii zid pha ji ro. <sup>5</sup> Itheek ne biidiitheek yao pha ne gai è khuchungde athieg ro; ithek shii ne ichiigtheek oi ro.

### *Hamangkhliie uom*

<sup>6</sup> Chiihphado Mua Wie pha idang mua rog shii sohnyiak pha zab brantheek, zab jad, iiriing, nyuak, nane zab bran shii yao pha gai è, hamangkhliie yi hasam shii giu hà khey pha gu è doh ro. <sup>7</sup> Ai gang goh re-è yao, “Hamangkhung-aphuii shii ilab rek ne airo bajoboh shii chiong bo! Chiih-è zab bran shii chua pha ishak ne aishii thog sha ruii ro. Hanyie è hamangkhung, sohnyiak, khamuii, nane kho pha khasuang shii rab muii pha aishii misiasia bo!”

<sup>8</sup> Nyichiieng pha hamangkhliie yi igobi pha hamangkhliie rog luagieng ne, yao, ai ne chiihdun ro! Boh Babylon ne chiihdun ro! Ai è siulao chid pha awairo phuii kho ne—zab pha bran shii airo phuii ji niing yi ro.

<sup>9</sup> Uomchieng pha hamangkhliie è igobi pha nyi rog shii luagieng ne, gang goh re-è yao, “Hanyie magunde buii ibeymuthung shii nane ji pha jangbang shii misiasia chiih-è ithek khuwuang nane wad shii ne cheb choi pho <sup>10</sup> awaithek ne Hamangkhung-aphuii ro phuii niing ruii phro, airo lijieg pha phuii, nyie yi ai è awairo ley chua ne awairo lijieg pha gog shii zan ro! Zab hanyie è jithek rek pho ne so hamangkhlietheek nane shiishaiduii moe shii ne bai nane barud re-è duhug phi ruii phro. <sup>11</sup> Bai mukham pha ithek ro duhug phi pha jine idang nane idang laziung khey ruii phro. Hanyie è buii ibeymuthung nane airo jangbang shii misiasia ne, chiih-è hanyie è airo ibeng shii cheb rek pho ne, thiisa hàne inai habiu them oi ro.”

<sup>12</sup> Jine hanyie è Hamangkhung-aphuii muyungtheek nuii ne chiih-è Isu shii isie rek pho, Hamangkhung-aphuii bran ro zud pha ichua ji chid ro.

<sup>13</sup> Chiihphado hamangkhung re-è goh yao pha gu è yoi, “Hi zey bo: Hanyie ne thuh re-è Ithong ro blia rek ne iy pho ne sang bo!”

“Zai ro!” Ragung è chang. “Itheek ne awaithek ro lei blia shii thung pha ji shii ne lubo rek ruii phro, nyieliieshii ithek ro blia iwoi ne ithek rog shii dun ruii phro.”

### *Sohnyiak shii yamiing*

<sup>14</sup> Chiihphado gu è riig, chiih-è thiisa hà sakhamiing imo um, chiih-è sakhamiing shii dug pha jine tharohthamang duine mia ne, ai khrug shii san pha rago um chiih-è ai wad shii ikhire um pha barai um ro.

<sup>15</sup> Chiiphphado gai hamangkhlhie yi misiahò re-è wuii srane hanyie yi sakhamiing shii dug pha ji re-è ziaak mage, “Nawaithek ro barai kho srane yamiing shii riug mage bo, nyieliieshii ishak ne thog sha ro; sohnyiak ne riug ideb sha ro!” <sup>16</sup> Chiiphphado hanyie è sakhamiing shii dug pha ji re-è awairo barai sohnyiak shii wieg mage, chiih-è sohnyiak pha yamiing shii riugjong ro.

<sup>17</sup> Chiiphphado gai hamangkhlhie yi hamangkhang pha misiahò re-è wuii pha doh, chiih-è aishii de ikhrey barai um.

<sup>18</sup> Chiiphphado gai hamangkhlhie, hanyie yi bai pha ilkhi yi, sraibao re-è wuiithok. Ai è hanyie shii ikhire barai um pha hamangkhlhie shii gang goh re-è ziaak mage, “Nawairo barai wieg bo, chiih-è sohnyiak pha angur raig re-è angurthek riug mage bo, nyieliieshii angurthek ne menjong ro!” <sup>19</sup> Ji-è hamangkhlhie è raig re-è iphiing re-è angur laig pha, awairo barai sohnyiak shii wieg mage, chiih-è Hamangkhang-aphuii ro lijieg pha angur chui pha nyahiung shii fen mage. <sup>20</sup> Angurthek shii rajan re-è fuang pha angur chui pha nyahiung re-è medmed rek muui ro, chiih-è phuii chuii pha ji re-è ifai khia srane wieng uom labiang phiang khed dun chiih-è jine giia guui jam ro dun ro.

## 15

### *Hamangkhlieythek rog iidohè pha muathek*

<sup>1</sup> Chiiphphado gu è hamang hà boh nane anomuluii pha gai pha cheb doh. Thiisa hà miley hamangkhlieythek rog shii awie pha muathek miley um ro, nyie jine iidohè pha ji ro, nyieliieshii ithek ne Hamangkhang-aphuii ro iidohè pha srobro ji ro.

<sup>2</sup> Chiiphphado nyie yi sasia pha khamuii ne bai è lao pha duiine gu è doh. Hanyie yi buii ibeymuthung nane ji pha jangbang chiih-è hanyie ithek ro ibeng yi izey shii doh yi pha lakhung shii yang gey pha gu è doh. Ithek ne Hamangkhang-aphuii è ithek shii phi pha benthek khoh ne sasia pha khamuii shii riu <sup>3</sup> chiih-è Hamangkhang-aphuii ro khiao Moses ro ibai nane shiishaiduii ro ibai bai ramuii ro:

“Ithong Bohblu Hamangkhang-aphuii,  
naro bliathek ne Khinyama boh nane wieng ro!

Sohthek pha Saja, \*

Naro lumuiithek ne khama rangsua nane izai ro!

<sup>4</sup> Ithong, na shii arum pha hanyie riu pha lei?

Hanyie naro bajoboh shii ayaothieg pha hanyie lei?

Nawai jijia ne so ro.

Zab pha sohthek ne

na shii misisia pha wuii ruii phro,

nyieliieshii naro giang bliathek ne zab è dohjong ro.”

<sup>5</sup> Ji pha iidoh shii hamangkhang hà misiahò ne hong pha doh, ji pha rog shii ne Shiinyie giabrang um ro. <sup>6</sup> Miley hamangkhlieythek hanyie shii awie pha muathek miley ji yi imo chuang pha yung guui ne chiih-è awaithek ro lubuthothek shii san pha rathang riing ne misiahò re-è wuii ro. <sup>7</sup> Chiiphphado isieyng miseyphe wi ji è jia è hamangkhlieythek miley shii

san shiikhiiakhjam miley phi ji shii ne idang è idang rai pha Hamangkhung-aphuii ro lijieg ne ley um. <sup>8</sup> Chiih-è misiahò ne Hamangkhung-aphuii ro biisiie nane blu pha mukham re-è ley dun, chiih-è hamangkhliiethék miley è yie pha miley awie pha muathek ji ajong sapho shii ne hanyie de misiahò hà awuii mua phro.

## 16

### *Hamangkhung-aphuii ro lijieg pha shiikhiiakhjam*

<sup>1</sup> Chiihphado gu è misiahò re-è miley hamangkhliiethék shii goh gang re-è yao pha yoi: “Wuii srane Hamangkhung-aphuii ro lijieg pha shiikhiiakhjamtheék miley shii sohnyiák shii thoi mage bo!”

<sup>2</sup> Igobi pha hamangkhliie è wuii srane awairo shiikhiiakhjam ji sohnyiák shii thoi mage. Diig nane riie saduiithek yi hanyie shii buii ibeymuthung pha cheb um pha nane ji pha jangbang shii misiasia pho shii khia yi.

<sup>3</sup> Chiihphado, nyichiieng pha hamangkhliie è airo shiikhiiakhjam shii khamuii lakhung shii thoi mage. Chiih-è kho ne iy dun pha bran ro ifai duine rey dun, chiih-è khamuii pha zab isieng miseypho ne iy dun.

<sup>4</sup> Chiihphado uomchieng pha hamangkhliie è awairo shiikhiiakhjam yi khobothék nane khokhrugthék hà thoi mage, chiih-è jithek ne ifai rey dun.

<sup>5</sup> Khothék pha ilkhi hamangkhliie è yao pha gu è yoi, “Na è chuathék yie pha jithek ne isbang chak ro, So Jia wo, na ne tuh hanyie um chiih-è hanyie um jong pha ji ro!” <sup>6</sup> Ithék è Hamangkhung-aphuii ro brantheék nane chaigthék ifai shii noi yi, chiih-è ji è nathek è ithek shii ifai niing pha phi. Ithék è nyie mua spho ji mua ro!” <sup>7</sup> Chiihphado sraibao re-è goh yao pha gu è yoi, “Bohblu Ithong Hamangkhung-aphuii! Naro chuathék ne izai nane giang ro.”

<sup>8</sup> Chiihphado wichiieng pha hamangkhliie è awairo shiikhiiakhjam yi hasiang shii thoi mage, chiih-è jine brantheék shii ne ji pha ichieg re-è sud yi. <sup>9</sup> Ithék shii ne ichieg re-è sud dun, chiih-è ithek ne Hamangkhung-aphuii ro ibeng shii thamai, hanyie shii awie pha muathek lakhung shii riichai um. Jishii ithek ne awaithek ro layogthék re-è akhid chiih-è airo bajoboh shii de achiong ro.

<sup>10</sup> Chiihphado guiichiieng pha hamangkhliie è awairo shiikhiiakhjam yi buii ibeymuthung pha biang shii thoi mage. Igiia ne buii ibeymuthung ro sajathua lakhung shii chiihdun, chiih-è nyieliieshii ithek ro riie ji re-è brantheék ne awaithek ro rithek thak, <sup>11</sup> chiih-è ithek ne awaithek ro riethék nane saduiithek pha chiang re-è hamangkhung pha Hamangkhung-aphuii shii thamai. Jimagunde ithek ne awaithek ro awie pha lumuiithek re-è akhid ro.

<sup>12</sup> Chiihphado riigchieng pha hamangkhliie è awairo shiikhiiakhjam yi boh Euphrates pha Khoboh shii thoi mage. Bichiu re-è wuii ruii pha sajathek ro lumuii saro phi pha khoboh ne òadun ne. <sup>13</sup> Chiihphado gu è rurusuathék duine mia pha uom izia ragungthék doh. Ithék ne hakhliingmuii chiih-è buii ibeymuthung nane biidiie chaig pha sem re-è khia ro. <sup>14</sup> Ithék ne ibuiithek pha ragungthék ro ji re-è buangthék rek ro. Ji pha ragungthék uom è Bohblu Hamangkhung-aphuii ro boh Inai pha mak shii zab pha sajathek ò yi pha sohjangbling hà wuii dun ro.

15 “Yoi bo! Gu ne mugo duiine wuii ruii phro! Hanyie ne sieng ne awairo yungthek shii ragia rekpho shii ne ai ne sang ruii phro, ji è ai ne ikhilen alua ruii chiih-è brantheek moe shii awo ruii phro!”

16 Chiihphado ragunthek è sajathek shii Hebriu re-è Armagedon rone ho muui pha ithua hà noh ro. 17 Milechiieng pha hamangkhlhie re-è awai ro shiikhiiakhjam yi hasam hà thoi mage. Gang goh yi misiahò pha biang re-è thog ne, yao, “Hi ne rekjong ro!” 18 Thiisa hàne haliao pha bliakthek um chiih-è hakhliing pha khliingthek roh ne, chiih-è buii sajiib sam ro. Thiisa hàne tharohthamang jad nyarab dang ne hì duiine pha sajiib arey ba ro; hine zab re-è awiedang pha sajiib ji ro! 19 Boh rajan ne ichuathek uom shii chui dun ro, chiih-è zab sothtek pha rajantheek ne srobroy dun ro. Hamangkhung-aphuii è boh Babylon ji nowkhlei, chiih-è aishii airo gog re-è phuii niing yi—Airo buii lijig pha phuii ji ro. 20 Zab pha gachungthek ne lamdun, zab pha phiingthek ne san dun ro. 21 Boh habentheek, zab ne shiiriie saguii nyama ro, chiih-è hamang re-è brantheek lakhung shii chiih, ji pha Chiang brantheek ne Hamangkhung-aphuii shii thamai ro, nyieliieshii hine buii awie pha diig ro.

## 17

### *Zab id pha siulao*

1 Chiihphado shiikhiiakhjamthek miley um pha hamangkhlie thek miley ji re-è jia è gu shii wuii srane yao, “Thawuii bo, chiih-è gu na shii khi-è-ek ne zab id pha siulao shii ligo phi pha rek pha ji gu na shii riig yi pha ro. Ji pha boh rajan jine khobothtek moe shii rung ro. 2 Sohnyiak pha sajathek ne ai rog shii siulao rek muui ro, chiih-è sohjambling pha zab brantheek ne airo siulao rek pha ji pha phuii niing ne phuiithiig muui ro.”

3 Ragung ne gu shii phrai re, chiih-è hamangkhlhie è gu shii ne balimuang hà noh dun. Gu è hò-amuii jia yi ishaig buii ibeymuthung lakhung shii dug pha doh, ji shii ne Hamangkhung-aphuii shii makhak-riing pho ibengthek ne zab zey um ro, buii ibeymuthung shii ne miley khrugthek nane iriangthek sua um ro. 4 Hò-amuii jine iphi nane ishaig guii, chiih-è san pha mukthoek, igong lubaothek, nane mukho re-è guii ro. Hò-amuii ro wad shii ne ley awie pha miyao nane awie pha manathek san gog khoh ne awairo siulao rek pha iwoi ro. 5 Airo khuwuang shii ne ug pha miyaosiu pha ibeng zey ne um ro: “Boh Babylon, siulaothek pha nane sohkhung pha awie bliathek pha amuii ro.” 6 Chiih-è ji pha hò-amuii ne Hamangkhung-aphuii ro brantheek nane nyieliieshii hanyie yi Isu shii migi rek pha Chiang ne ua pha brantheek ro ifai niing ne phuiithiig pha gu è doh ro.

Gu è hò-amuii ji shii riig mage shii gu ne zab anomuluii pha rey dun. 7 Hamangkhlhie è gu shii sai? “Na ne nyie rek ne anomuluii pha rey dun lei.” “Hò-amuii nane ai han muui pha buii ibeymuthung, chiih-è buii ibeymuthung rog shii miley khrugthek nane iriangthek sua pha miyaosiu jine gu na shii yao phi pha ro. 8 Ji pha buii ibeymuthung ne luang jia shii ne isieng, jishii isieng asi sha ro; hine bajo jam ihiung re-è wuii ruii srane srobroy pha lakhung hà wuii pha rek pha ji ro. Brantheek ichiih sohnyiak shii rai pho

**16:15** 16:15: Mth 24:43,44; Lug 12:39,40; Dng 3:3    **16:16** 16:16: 2Saj 23:29; Zekh 12:11    **16:18** 16:18: Dng 8:5; 11:13,19    **16:19** 16:19: Aij 51:17    **16:20** 16:20: Dng 6:14    **16:21** 16:21: Mul 9:23; Dng 11:19    **17:1** 17:1: Jeri 51:13    **17:2** 17:2: Aij 23:17; Jeri 51:7    **17:3** 17:3: Dng 13:1  
**17:4** 17:4: Jeri 51:7    **17:8** 17:8: Dan 7:7; Dng 11:7; Chng 69:28

hanyie ro ibeng ne sohnyiak rab pha ji re-è yie ne isieng jigigam shii azey ba pho ne, ithek è buii ibeymuthung shii riig magey shii ithek ne anomuluii pha rey ruii phro. Hi ne luang jia ne isieng ro, thuh ne oi sha ro, jishii jine din ne khia ruii phro.

<sup>9</sup> “Ichihi shii ne khani nane id pha ji chid ro. Hò-amuii è dug pha miley khrugthek jine miley phiingduiithek ro. ItheK de sajathek miley ro: <sup>10</sup> Guii ne chiuhjong ro, jia ne kho bamuii ro, chiuh-è gai jia ne thuh de awuii ba ro; ai wuii ruii mage shii, ai ne iujia ishak kho bie ruii phro. <sup>11</sup> Chiuh-è buii ibeymuthung ne luang jia shii ne isieng ro, jishii thuhchihi ne isieng asi sha ro, awai hanyie yi mileochiieng saja ro, hanyie yi miley re-è jia ro chiuh-è awai shii srobro rey ruii phro.

<sup>12</sup> “Iriangthek sua na è doh pha jine sajathek sua ithek ne thuh de khoh pha ajao ba ro, jishii ithek shii ne buii ibeymuthung rog ishak jia saja khoh pha riichai phi ruii phro. <sup>13</sup> Hi pha saja sua blia ne zab ò ro, chiuh-è ithek è awaithek ro blu nane riichai ne buii ibeymuthung shii phi muui ro. <sup>14</sup> ItheK ne shiishaiduii suang shii mak rek ruii phro; jishii shiishaiduii, ne ai è ho pha rog ò shii, guajong pha, chiuh-è isiie luagiengphothek ne ithek re-è yang ruii phro, nyieliieshii ai ithongthek pha Ithong ro chiuh-è sajathek pha Saja ro.”

<sup>15</sup> Hamangkhliie de gu shii yao, “Siulao rek pha hò-amuii dug muui pha khothek na riig pha ji ne, sohthek, branthek, iriingthek, nane nyuakthek ro. <sup>16</sup> Na è doh pha iriangthek sua chiuh-è buii ibeymuthung jine, siulao rek pha ji shii khiijai ruii phro; aishii nyie um pha jine ithek è zab yie muui ne hò-amuii shii ne ikhilen ruii; ithek ne airo ibey chie srane hò-amuii shii ne bai shii ziao ruii phro. <sup>17</sup> Chiuh-è Hamangkhung-aphuii è awai è yang pha blia ji zab ò è rek yi pha ithek lubuthek hà yang ruii phi chiuh-è Hamangkhung-aphuii ro miyaogamthek izai athog sapho shii kho yi pha awaithek ro blu ne buii ibeymuthung shii phi muui.

<sup>18</sup> “Na è hò-amuii doh pha jine boh rajan sohnyiak pha sajathek lakhung shii khoh muui pha ji ro.”

## 18

### *Babylon chiihdun*

<sup>1</sup> Ji pha iidoh shii gu è gai hamangkhliie yi hamangkhung re-è wuii ruii pha doh. Aishii ne boh riichai um, chiuh-è airo muchuang re-è zab sohnyiak ne sang rey dun ro. <sup>2</sup> Ai è gang goh re-è ziaK mage: “Ai ne chiihdun! Boh Babylon ne chiih dun! Ibiuiithek nane izia ragungthek ne aishii rai dun ro; zab ichuathek pha izia nane khiijai pha fuiithek ne aishii rai dun ro.” <sup>3</sup> Zab pha sohthek ne airo phuii niing ne phuiithiig ne—Hò-amuii ro gang siulao pha phuii ji ro. Sohnyiak pha sajathek ne hò-amuii shii siulao rek ro, chiuh-è sohkhung pha chongjaipho ne ai è bangchiie chid pha ji re-è ithek ne bukho rey dun ro.

<sup>4</sup> Chiihphado gai goh yi hamangkhung re-è yao pha gu è yoi,  
“Fuang hà khia bo, gu branthek! hò-amuii ji re-è fuang khia bo!

Nathek ne hò-amuii layog shii ichua arek rabo;

Nathek ne hò-amuii ro lago shii athang rabo!

- 5 Hò-amui ro layogthek ne khudungkhudung ne hamangkhung hà thog sha dun ro,  
chiìh-è Hamangkhung-aphui ne airo awie pha lumuiithek shii ne nowkhlei ro.
- 6 Hò-amui è nathek shii khui pha duine aishii de khui bo;  
Ho-amui è rek pha zab shii nyirang è iidoh phi bo.  
Ai è nathek shii phuiikho saro pha duine.  
Nathek ne ji è de weg phuiikho shii airo gog shii ley phi bo.
- 7 Ai awai shii biisiie nane ichad chai sieng pha duine  
hò-amui ai ro khama um pha diig nane duhug phi bo.  
Ho-amui awai è yao pha:  
‘Ichiih gu ne sajamui ro!  
Gu ne misiungmui asi ro,  
Gu ne duhug ne khuchungde athieg ro!’
- 8 Nyieliieshii ji ne, inai jia hò-amui ne awie pha muathek rog shii è diig ruii phro  
miiriithek, duhug nane nokhonosiie. Rey ruii phro.  
Chiìh-è aishii ne bai re-è ziao ruii phro,  
Nyeliieshii hò-amui shii chua pha Ithong Hamangkhung-aphui ne zabboh ro.”
- 9 Sohnyiak pha sajathek ne hanyie è ai rog shii siulao nane chid pha ji shii thang gieng pho ne ziak ruii phro chiìh-è aishii ziao pha ji re-è mukham yi ithek è riig mage shii ji pha rajan lakhung shii choi ruii phro.
- 10 Nyieliieshii ithek ne airo diig shii thang pha ji rum ne, ithek ne ruang hà riu ro. ItheK è yao, “Khinyama buii ro! Khinyama buii ro! Hìpha riichaiboh nane bajoboh pha rajan Babylon! Nathek shii ne ishak jia shii Lago phijong ro!”<sup>11</sup> Sohnyiak pha chongjaiphothek airo Chiang cho ne zo ruii phro, nyieliieshii ithek ro manathek shii hanyie de apheg phro;<sup>12</sup> ithek ro manathek san, liiman, igong lubaothek, chiìh-è mukhothek ne; ithek ro manathek pha igong yung imo, iphi yung, yungsiu nane, ishaig yung; zab ithua hà amua pha hingthek zab pha ichuathek nyathong shiinyin re-è rab pha chiìh-è igong hing, dau, shiie, nane marble,<sup>13</sup> chiìh-è dachini, masala, bisi, sirrie, chiìh-è rem no; phuii nane thiillie, muhab nane phiug, shuwuii nane shiishai, sthuhthek chiìh-è hanthek, khiaothek nane tharohthamang chaithek shii rang de hanyie apheg ro.<sup>14</sup> Chongjaiphothek è aishii yao, “Zab wie mana nawai chid pha jine san dun ro, chiìh-è zab naro nuruii nane biisiie nyuii pha jine san dun ro, chiìh-è nane jithek shii din ne amua sha ruii phro!”<sup>15</sup> Chongjaiphothek, hanyie yi ji pha rajan re-è chong rek ne bukho rey pha jine ruang riu dun phro, nyieliieshii ithek ne ai ro diig pha ji thang pha rum. ItheK ne choi ne zo ruii phro,<sup>16</sup> chiìh-è yao, “Khinyama buii ro! Boh rajan shii ne khama buii ro! Ai ne awai shii igong pha yung, iphi, chiìh-è yung shaig, chiìh-è ai ne awai shii san mukhothek, igong lubaothek, chiìh-è mukhothek re-è cheg ruii phro!”<sup>17</sup> Ai ne ishak jia shii awairo nuruii ne zab mua dun ro!”
- Zab pha runboh dumuii nane inphothek, khiyidpho chiìh-è gai hanyie khamuii è wiang pho ne ruang hà riu dun ro,<sup>18</sup> Bai miriak pha mukham hò-amui shii ziao pha ji riig ne gang ziak mage: “Hì è rek pha boh rajan duine



gai rajan oi ro!” <sup>19</sup> ithek è ai khrugthek shii nyiak hà fen muui ro, ithek ziak ne zo ne yao, “Khama buii ro! Rajan boh ne khama buii ro! Ai ne rajan ro zab hanyie yi khamuui hà runboh khiyidpho ne airo nuruui è bukho rey ro! Chiuh-è ishak jia shii ai ne zab mua dun ro!”

<sup>20</sup> Sang bo, hamangkhang, nyieliieshii ai ne mua dun ro! Sang bo, Hamangkhang-aphuui ro brantheke nane guaphasamoythek chiuh-è chaigthek! Hamangkhang-aphuui ne ai è nathek shii nyie rek pha ji shii the muui ro!

<sup>21</sup> Chiuhphado riichaiboh pha hamangkhliie è rathak nyaboh lubao jia chiing ne khamuuiboh lakhung shii fen mage ne, yao, “Hi pha boh rajan Babylon ne khama awiedang pha fen muui ne chiuh-è khuchungde adoh sha ruui phro. <sup>22</sup> Benthek pha thiibingkhinkheb nane tharohthamang goh pha, flui boi pha ji nane thu-ung ne nathek ro iliing shii khuchungde din ne ayoi sha ruui phro; chiuh-è chongjai rek pha ne nathek ro iliing shii adoh sha phro, chiuh-è rathak pha roh ne oi sha ruui phro! <sup>23</sup> Din ne khuchungde mujuang pha ichuang ne nathek shii adoh sha ruui phro; phiyiybufuiithek nane phiyiybimithék ro goh roh pha ne nathek shii ayoi sha ruui phro. Nathek ro chongjai ne sohkhung shii bajo blu um, chiuh-è nathek ro biidiie pha jadu è sohkhung pha zab brantheke shii khinrin ro!”

<sup>24</sup> Babylon shii ne lago phi ro nyieliieshii chaigthek nane Hamangkhang-aphuui brantheke ro ifai ne ji pha rajan hà doh ro; um, jithek pha ifai ne hanyie shii sohnyiak shii ua muui pha ji ro.

## 19

<sup>1</sup> Ji pha iidoh shii hamangkhang hà boh iphiing bran ro goh roh pha duine gu è yoi, “Hamangkhang-aphuui shii chiong bo! Giawo, biisiie, nane blu ne gethek ro Hamangkhang-aphuui ro ro.” <sup>2</sup> Airo chuathék ne izai nane zai chak ro! Hò-amui ro siulao ro è sohnyiak shii awie pha rek ji è ai ne they jong ro. Hamangkhang-aphuui è aishii ne lago phi ro nyieliieshii ai è airo khiaothék shii ua muui ro. <sup>3</sup> Dinne ithek è ziak, “Hamangkhang-aphuui shii chiong bo! Bai è boh rajan shii hùb pha mukham ne idang nane idang laziung kham ramuui ro!” <sup>4</sup> Ichiignawi dukhothék nane wi isieng misepho yi chiuh-è hanyie yi biang shii dug pho ne Hamangkhang-aphuui shii misiasia muui ro. Itheke è yao, “Amen! Hamangkhang-aphuui shii chiong bo!”

### *Phiyiy pha shiishaidui ro michie*

<sup>5</sup> Chiuhphado biang re-è ro pha goh jine thiichiih wuiithok ne, yao, “Zab airo khiaothék nane zab airo brantheke, nyimanyi bo nane iu, hanyie aishii rum pho ne, gethek ro Hamangkhang-aphuui shii Chiong bo!” <sup>6</sup> Chiuhphado gu è nyie yi iphiing re-è roh pha duine, hakhliing chiie pha duine chiuh-è khasuang duine khriie ro. Gu è ithek yao pha yoi, “Hamangkhang-aphuui shii chiong bo! Chiuh-è Ithong, gethek ro Bohlu Hamangkhang-aphuui, ne Saja ro! <sup>7</sup> Cho gethek ne sang ne lised haro; cho gethek ne airo bajoboh shii chiong rai haro! Shiishaidui ro phiyiy pha ishak ne thog sha chiuh-è airo phiyiybimi è awai shii saro phi ro. <sup>8</sup> Aishii ne sang khlieng igong pha yung

**18:19** 18:19: Ezkh 27:30-34    **18:20** 18:20: Iphy 32:43; Jeri 51:48    **18:21** 18:21: Jeri 51:63,64; Ezkh 26:21    **18:22** 18:22: Ezkh 26:13; Aij 24:8    **18:22** 18:22,23: Jeri 7:34; 25:10    **18:24** 18:24: Jeri 51:4    **19:2** 19:2: Iphy 32:43; 2Saj 9:7    **19:3** 19:3: Aij 34:10    **19:5** 19:5: Chng 115:13    **19:6** 19:6: Ezkh 1:24; Chng 93:1; 97:1; 99:1

guii pha phijong ro.” (Yung igong jine Hamangkhung-aphuii ro brantheek ro blia wie ji ro.)

<sup>9</sup> Chiihphado hamangkhliie re-è gu shii yao “Hì zey bo: Hanyie shii shiishaiduii ro phiyiy michie shii ho pho ne sang ro.” Chiih-è hamangkhliie è chodo ne yao, “Hì ne Hamangkhung-aphuii ro izai miyaogamtheek ro.”

<sup>10</sup> Gu ne aishii misiasia ai lai shii chiih, jishii ai è gu shii yao, “Ji arek rabo! gu de na rog shii khiao ro chiih-è gai migiphotheek rog shii hanyie Isu è dong pha izai shii khoh muui pha rog shii khiao ro. Hamangkhung-aphuii shii misia bo!”

Chiih-è ji pha izai Isu re-è dong pha jine chaigtheek ro ragung ro.

### *Stuhkhiyidpho Stuh imo shii*

<sup>11</sup> Chiihphado hamangkhung hong pha gu è doh, chiih-è thiisa hàne stuh imo um. Ji pha inpho ne isiie nane Izai ji ro; hìne rangsua rog shii ai è chua chiih-è awairo mak shii mak rek pha ji ro. <sup>12</sup> Airo mieg ne bai pha iyang duine ro, chiih-è ai awai khrug shii bajo rago khak ro. Aishii ne ibeng de zey ne um ro, jimagunde jine nyie ga hanyie de athieg ro jishii awai jia è thieg bie ro. <sup>13</sup> Ai guii pha yung ne ifai re-è cheg muui ro. Ai ibeng ne “Hamangkhung-aphuii ro miyaogam ro.” <sup>14</sup> Hamangkhung pha armingtheek ne sang imo yung guii chiih-è stuhtheek imo shii in ne aishii luagieng ro. <sup>15</sup> Ai è hanyie sohtheek shii yang pha ji rog shii airo sem re-è ikhire khamriie khiathog. Ai ne ithek rog shii nane shiiesig rog khoh ruii phro, chiih-è ai ne Bohblu Hamangkhung-aphuii ro buii lijieg pha phuii shii ne angur chui pha iliing shii dia muui phro. <sup>16</sup> “Sajathek pha Saja nane ithongtheek pha Ithong rone: airo yung nane airo laphak shii ne ibeng zey ro.”

<sup>17</sup> Chiihphado hamangkhliie yi hasiang shii riu pha gu è doh. Ai è hasam shii khey pha zab pha fuiitheek shii boh goh re-è ziaik: “Thawuii ne Hamangkhung-aphuii ro boh michie shii ò khiirab rai haro! <sup>18</sup> Thawuii ne sajathek ro, siphahi ro dumuiitheek ro, chiih-è siphahitheek ro, stuhtheek ro nane ithek ro inphothek ro ibey, zab brantheek ro ibey, khiao nane ichad, boh nane lu ro ibey chie bo!”

<sup>19</sup> Chiihphado gu è buii ibeymuthung nane sohnyiak pha sajathek shii doh chiih-è hanyie yi stuh shii inpho shii gidieg mak rek pha arming ò shii khrab. Chiih-è airo arming shii gidieg rek ro. <sup>20</sup> Biidiie pha chaigtheek hanyie è ai moe shii buangtheek rek pha chiih-è buii ibeymuthung shii phatæg hà noh dun ro. (Hì ne ji pha buangtheek re-è hanyie è buii ibeymuthung pha cheb rek yi ne chiih-è buii ibeymuthung ro jangbang shii misiasia yi pha khinrin pha ji ro.) Buii ibeymuthung nane biidiie chaig shii ne isiang barud rog shii bai pha khabang pha jihà fen muui. <sup>21</sup> Itheek ro arming shii ne hanyie è stuh inpho pha jia sem re-è khia pha khamriie re-è ua muui; chiih-è zab fuiitheek è ithek ro ibey khama chie mua pha ji chie muui.

## 20

### *Itham idamtheek*

<sup>1</sup> Chiihphado hamangkhliie yi awai wad shii jam ihiung pha ziuwad nane boh shiirnai khoh ne hamangkhung re-è thazam wuii pha gu è doh ro. <sup>2</sup> Ai è ji pha ihèg pham hakhliingmuui shii zum—jine, Sakhathong ro—Chiih-è

aishii ne itham jia idamthek joi ne ruii muui. <sup>3</sup> Hamangkhliie è aishii jam ihiung hà fen ne, bin muui, chiih-è nab rek, ji è ai ne idamthek itham ajong sapho shii ne sothtek pho hanyie shii khinrin arek mua phro. Ji pha iidoh shii aishii ne ùjia ishak sey ne thoh chid ruii phro.

<sup>4</sup> Chiihphado gu è biangthek shii doh, chiih-è thiisa hà dugpho ithek shii ne chua pha blu phijong ro. Gu è ithek shii Isu dong pha izai nane Hamangkhung-aphuii ro miyaogam ji yao pha Chiang re-è hanyie ua muui pha ithek ro luruakthek shii gu è doh ro. Itek ne buii ibeymuthung chiih-è ji pha jangbang shii misiasia asia ro, chiih-è awaithek khuwuangthek nane awaithek ro wadthek shii buii ibeymuthung cheb de arek ro. Itek ne isiang rey ne Isu rog shii itham jia idamthek sajathek khoi ruii phro. <sup>5</sup> (Ikhe iy dun pho ne Idamthek itham athog sapho shii ne chai hà awuii ruii phro.) Jine iy ne hòi pha igobi ji ro. <sup>6</sup> Hanyie è igobi pha iy pha ji re-è hòi pha ji shii chodo pho ne sang nane boh khirzey ji ro. Dinpha iy pha jine ithek lakhung shii nyie blu oi ro; ithek ne Hamangkhung-aphuii ro nane Masi ro phabithek rey ruii phro, chiih-è ithek ne ai rog shii itham idamthek khoi ruii phro.

### *Sakhathong shii yang gey*

<sup>7</sup> Itham idamthek jong pha iidoh shii, Sakhathong shii ne awairo phatgeg re-è se ne thoh ruii phro, <sup>8</sup> chiih-è ai ne wuii srane sohjambling shii dayiingdayang um pha sothtek shii khinrin ruii phro, jine, Gog nane Magog ro. Khamuiiring pha bajo bali igamthek duiine ithek shii mak rek yi pha Sakhathong è ò shii khrab ruii phro. <sup>9</sup> Itek ne sohnyiak shii shiiy ne chiih-è ai miie muui pha rajan shii Hamangkhung-aphuii ro branthek ro giabrang shan ruii phro. Jishii hamangkhung re-è bai wuii srane ithek shii srobros rek muui ro. <sup>10</sup> Chiihphado hanyie è ithek shii khinrin rek pha Sakhathong shii ne, khi hà buii ibeymuthung nane biidiie pha chaig shii fenjong bsa hà bai khabang nane barud hà fen muui ro; chiih-è ithek ne habiu nane inai idang nane idang sud ruii phro.

### *Idohhè pha chuathek*

<sup>11</sup> Chiihphado hanyie yi boh imo biang shii dug pha gu è doh. Sohnyiak nane hamangkhung ne ai moe re-è khey dun ne adoh pha rey dun ro. <sup>12</sup> Chiih-è gu iyiy doh, boh nane ù duiine, biang ibi shii riu. Jigithek ne hong ge, chiih-è chai pha gai jigi ne hongjong ro. Jigithek shii zey ne ruii pha duiine, Iy-iy shii ne awaithek è khi-èrek pha ji duiine chua muui ro. <sup>13</sup> Chiihphado khamuii è iy pha ji phi muui. Iyiy chiih-è iy-iy pha sohjambling de awaithek è rek pha ji shii phi muui. Chiih-è zab shii ne awaithek è nyie rek pha ji duiine chua ro. <sup>14</sup> Chiihphado iy-iy nane iy-iy pha sohjambling shii ne bai khabang hà fen muui. (Hì pha bai khabang ne dinpha iy-iy ji ro.) <sup>15</sup> Chai pha jigi shii hanyie ro ibeng zey ne oi pho shii ne bai pha khabang hà fen muui.

## 21

### *Iwo hamangkhung nane iwo sohnyiak*

<sup>1</sup> Chiihphado gu è iwo hamangkhung nane iwo sohnyiak doh. Igobi pha hamangkhung nane igobi pha sohnyiak ne san dun ro, chiih-è khamuii ne

ùadun ro. <sup>2</sup> Chiih-è gu è So Rajan nyie yi iwo Jerusalem ji shii doh chiih-è Hamangkhung-aphuii re-è hamangkhung wuii ne, phiyiybimi ne awairo gey shii si pha chiakhua pha duiine saro ne khriig rek pha gu è doh ro. <sup>3</sup> Gu è gang goh yi biang re-è yao pha yoi: “Thuh shii Hamangkhung-aphuii ro hò ne bran rog shii ro! Ai ne ithek rog shii rai ruii phro, chiih-è ithek ne airo branthek ro. Hamangkhung-aphuii awai ne ithek rog shii um ruii phro, chiih-è ai ne ithek ro Hamangkhung-aphuii ro. <sup>4</sup> Ai ne ithek ro mieg re-è miegkho sad ruii phro. Thiisa hàne a-iy sha ruii phro, zo chiih-è ziak chiih-è riie ne oi sha ro. Ihèg manathek ne sandjong ro.”

<sup>5</sup> Chiihphado hanyie biang shii dug pha ji è yao, “Chiih-è thuh gu ne zab manathek shii iwo rab pha ro!” Ai è de gu shii yao, “Hi zey bo, nyieliieshii hipha miyaogamthek ne izai nane migi rek mua ruii phro.” <sup>6</sup> Chiih-è ai è yao, “Hi ne rekjong ro! Gu ne igobi nane iidohè ro, jao pha nane jong pha ro. Hanyie magunde khahang-hang pho ne nyie de igong aphii chid pha chai pha khokhrug è niing yi pha rangsua phi ruii phro. <sup>7</sup> Hanyie è yang shii mua pho ne gu re-è ji choi ruii phro: Gu ne ithek ro Hamangkhung-aphuii rey ruii phro, chiih-è ithek ne guro aniphiiing rey ruii phro. <sup>8</sup> Jimagunde murumdumthek, khinrin rek, khiijai blia rekpho, sgothek, siulao, hanyie è jadu rek, hanyie è jangbangthek shii misiasia, chiih-è zab pha khlamthek— ithek ro ithua ne barud rog shii hang pha bai khabang nyie jine dinpha iy ji ro.”

### *Iwo Jerusalem*

<sup>9</sup> Miley pha hamangkhliie yi hanyie shii iidohè pha miley muathek è ley pha miley shiikhiiakhjam um pha ji è jia è gu shii wuii ne yao, Thawuii bo, chiih-è gu ne shiishaiduii ro yiy ji pha phiyiybimi shii doh yi pha ro. <sup>10</sup> Ragung è gu shii phrai dun, chiih-è hamangkhliie re-è gu shii ne bajo giu phiing lakhung hà noh dun. Ai è gu shii Jerusalem riig yi, jine So Rajan ro, jine Hamangkhung-aphuii re-è hamangkhung è thazam wuiiramuii ro. <sup>11</sup> Jine Hamangkhung-aphuii ro biisiie rog shii khlieng ro. Rajan ne jasphar pha igong lubao duiine khlieng ramuii ro, chiih-è sang grasthal duiine, doh yi ro. <sup>12</sup> Ji ne boh, giu muthua snanyi gaktek rog shii chiih-è gaktek pha ilkhi snanyi hamangkhliiethek rog shii ro. Ji pha gaktek shii ne Israel pha bran snanyi jadthek ibengthek zey ne um ro. <sup>13</sup> Thiichiih shii ne jijia ikhichiug hà gak uom um ro: Bichiu hà uom, hayang hà uom, hakhoi hà uom, nugo hà um ro. <sup>14</sup> Rajan pha sarong shii ne snanyi lubaothek è rab ro, ji shii ne shiishaiduii ro guaphasamoythek snanyi ro ibeng zeyjong ro. <sup>15</sup> Hamangkhliie hanyie gu shii yao pha ji shii ne rajan pha gaktek, nane muthua shii chua pha ne san muchuang um ro. <sup>16</sup> Rajan ne riie nane phiang ne ò ikhichiung ro. Hamangkhliie re-è rajan shii awairo chua pha miichang re-è chua: Jine itham nyi è wieng wi labiang um ro, jine ji nyama giu chiih-è ji nyama riyy ro. <sup>17</sup> Hamangkhliie è muthua shii de chua, chiih-è jine 216 giia giu ro, jine ai è kho pha \*chua pha ji duiine chua.† <sup>18</sup> Muthua ne jasphar re-è rab chiih-è rajan shii ne igang san è rab, jine gang sasia duiine ro. <sup>19</sup> Rajan pha muthua pha sarong lubaothek ne igong pha

**21:2** 21:2: Aij 52:1; Dng 3:12; Aij 61:10    **21:3** 21:3: Ezkh 37:27; Lew 26:11,12    **21:4** 21:4: Aij 25:8; Aij 35:10; 65:19    **21:6** 21:6: Aij 55:1    **21:7** 21:7: 2Sam 7:14; Chng 89:26,27    **21:10** 21:10: Ezkh 40:2    **21:12** 21:12, 13: Ezkh 48:30-35    **21:15** 21:15: Ezkh 40:3    \* **21:17** 21:17: giu; dinne boh. † **21:17** 21:17: 16 izey shii chiih-è 17 Grekh Jigi shii 12,000 phiang rone yao, chiih-è 144 phiang nyie shii ne miiriig um ro.    **21:18** 21:18-21: Aij 54:11,12

lubaothek pha zab ichuathek re-è chiakhua ro. Igobi pha sarong lubao ne jasphar lubao ro, dinpha ne saphir pha igong lubao ro, uomchiieng pha jine agathe beng pha igong lubao ro, wichiieng pha jine emerald beng pha igong lubao ro, <sup>20</sup> guiichiieng pha jine onyz pha igong lubao ro, riigchiieng pha jine kharnelian pha igong lubao ro, mileychiieng pha jine ijoï gardz pha igong lubao ro, mileochiieng pha jine beryl pha igong lubao ro, digeychiieng pha jine thophaz pha igong lubao ro, suachieng pha jine chalsedony pha igong lubao ro, suanajachiieng pha jine thurguois pha igong lubao ro, suananyichiieng pha jine amethys pha igong lubao ro. <sup>21</sup> Gak snanyi jine mukhothek snanyi ro; zab pha jijia gak ne iphen mukho è rab ro. Rajan pha lumuii ne igang san è rab ro, jine sasia duine isang ro.

<sup>22</sup> Gu ne rajan shii misiahò adoh ro, nyieliieshii ji pha misiahò ne Ithong Hamangkhung-aphuii Bohblu nane shiishai duine ro. <sup>23</sup> Rajan ne ai lakhung shii chuang pha hasiang nane habie ne achiid ro, nyieliieshii Hamangkhung-aphuii ro biisiie ne ai lakhung shii chuang ro, chiih-è Shiishaiduii awai ne muchuang ro. <sup>24</sup> Zab sohnyiak pha bran ne airo muchuang re-è lua ruii phro, chiih-è sohnyiak pha sajathek ne awaithek ro nuruii ne jihà yie ruii phro. <sup>25</sup> Rajan pha gaktek ne zab pha inai hong ruii phro; ithek ne khuchungde abin ruii phro, nyieliieshii thiisa hàne habiu oi sha ro. <sup>26</sup> Zabèboh nane sothtek pha nuruii shii ne rajan hà yie ruii phro. <sup>27</sup> Jishii izea chiih-è hanyie è biwo manathek rek, chiih-è biidiie yao pho ne ji pha rajan shii akhud ruii phro. Hanyie ro ibeng ne shiishaiduii ro chai pha jigi shii zeyjong pho khud mua bie ruii phro.

## 22

<sup>1</sup> Hamangkhliie è gu shii khoboh pha kho pha chai ne khrysthal duine khlung pha ji riig yi, chiih-è Hamangkhung-aphuii nane shiishaiduii ro biang re-è wuii ruii <sup>2</sup> chiih-è rajan duchoi pha lumuii re-è noi yi ro. Kho pha nyimanyi ithua shii ne chai pha hingmuii um ro, nyie jine idam jia shii ne snanyi ishak iwoi woi ro, habie shii luang jia iwoi woi ro; chiih-è irab ne sothtek shii gang rek phi pha ji ro. <sup>3</sup> Ji pha rajan shii ne Hamangkhung-aphuii è thamai pha adoh ruii phro.

Hamangkhung-aphuii pha biang nane shiishaiduii ro biang ne ji pha rajan hà rey ruii phro, chiih-è airo khiaothek ne aishii misiasia ruii phro. <sup>4</sup> Ithek ne airo mizia riig ruii phro, chiih-è airo ibeng ne ithek ro khuwuangthek shii zey ruii phro. <sup>5</sup> Thiisa hàne habiu oi sha phro, chiih-è ithek ne muchuangthek nane hasiang muchuangthek ne achid sha phro, nyieliieshii Ithong Hamangkhung-aphuii ne ithek ro ichuang ro, chiih-è ithek ne sajathek duine idang nane idang khoh ruii phro.

### *Isu wuii ruii pha ji*

<sup>6</sup> Chiihphado hamangkhliie è gu shii yao, “Hì pha miyaogam ne izai nane migi rek mua ruii phro. Chiih-è Ithong Hamangkhung-aphuii, hanyie è awairo Ragung yi chaigthek shii phi, pha ji è awairo hamangkhliie ren gey ne khthiie nyie rey ruii pha ji awairo khiaothek shii doh yi.”

<sup>7</sup> “Yoi bo!” Isu è yao. “Gu ne khthiie wuii ruii phro! Hanyie è hìpha jigi re-è chaig pha miyaogamthek shii nuii pho ne sang ro!”

<sup>8</sup> Gu ne, Jon è zab hì thek ne yoijong ro chiih-è hì thek pha zab manathek shii dohjong ro. Chiih-è gu è ithek shii doh ched ne yoi ched mage shii, gu ne hanyie è jithek gu shii zab doh yi pha hamangkhliie lai luui shii bam dun, chiih-è gu ne aishii misiasia pha rek. <sup>9</sup> Jimagunde ai è gu shii yao, “Ji arek rabo! Gu de na rog shii chiih-è naro khuiinothek chaigthek rog shii chiih-è zab hanyie è hìpha jigigamthek shii nuui pha rog shii ò khiao ro. Hamangkhung-aphuui shii misiasia bie bo!” <sup>10</sup> Chiih-è ai è gu shii yao, “Hì pha jigi pha chaig miyaogamthek ne ug ne aruii rabo, nyieliieshii hì thek zab rey ruui pha ne ishak nui sha ro. <sup>11</sup> Hanyie yi awie pho ne awie pha rek chid ro, chiih-è hanyie ne zeanakhrui pho ne zeanakhrui rek chid ro; hanyie ne wie pho ne wie rek chid ro, chiih-è hanyie ne so pho ne so rek chid.”

<sup>12</sup> “Yoi bo!” Isu è yao. “Gune khthiie wuii ruui ro! Chiih-è gu ne gui rog shii lasenthek yie ne ruui phro, hanyie zab jijia è nyie rek pha ji duiine phi ruui phro. <sup>13</sup> Gu ne igobi nane iidohè ro, chiih-è jao nane jong ro.”

<sup>14</sup> Ai ne sang ro hanyie è awairo yungthek shii sang sud ji è chai pha hingmuui re-è iwoi chie pha rangsua um ruui phro chiih-è gathek re-è rajan hà wuii ruui phro. <sup>15</sup> Chiih-è khiijai blia rek pho chiih-è hanyie è jadu rek pho chiih-è siulao, chiih-è sgothkek, hanyie è jangbangthek shii misiasia chiih-è hanyie è nyimanyi miyaogamthek nane blia shii khlamphothek ne rajan pha fuang hà ro.

<sup>16</sup> “Gu, Isu, charch hà jithek zab manathek nathek shii yao yi pha guro hamangkhliie shii thoh ge ro. Gu ne Dawid riing pha haliing re-è ro; gu ne hamiang khlieng pha dadiang ro.”

<sup>17</sup> Ragung nane Phiyiybimi è yao, “Thawuui bo!”

Zab hanyie yoi pho ne hì yao bo, “Thawuui bo!”

Thawuui bo, Hanyie ne gahanghang pho ne; hanyie è chiid pho ne chai pha kho shii lasen duiine choi bo.

### *Jongsha*

<sup>18</sup> Gune, Jon, zab hanyie è hìpha jigi pha chaig miyaogamthek shii yoi pho shii suruathak ne phriie ro: hanyie magunde ithek ro miyaogamthek shii chodoh arone, Hamangkhung-aphuui ne ithek ro lago shii hìpha jigi shii yao pha muathek chodoh ruui phro. <sup>19</sup> Chiih-è hanyie magunde hìpha jigi pha chaig ro miyaogamthek è nyiemagunde khia muui arone, jigi shii yao pha duiine Hamangkhung-aphuui è ithek ro mathang chai pha hingmuui iwoi è chiih-è, So Rajan re-è khia muui phro.

<sup>20</sup> Isu è hithek zab pha chiang shii awai è khagi phi ne yao, “Um zai ro! Gu ne khthiie wuii ruui ro!”

Amen. Ithong Isu wuii ruui bo!

<sup>21</sup> Ithong Isu ro bushun ne nathek zabjia rog shii um bo. \*

**22:11** 22:11: Dan 12:10    **22:12** 22:12: Aij 40:10; 62:11; Chng 28:4; Aij 40:10; Jeri 17:10    **22:13** 22:13: Dng 1:8; Aij 44:6; 48:12; Dng 1:17; 2:8    **22:14** 22:14: Igo 2:9; 3:22    **22:16** 22:16: Aij 11:1,10

**22:17** 22:17: Aij 55:1    **22:18** 22:18,19: Iphy 4:2; 12:32    \* **22:21** 22:21: Zabjia; Giak jigi shii um ro Hamangkhung-aphuui ro branthek; gai um ro zab Hamangkhung-aphuui ro branthek.